


# Tangoa New Testament



The New Testament in the Tangoa Language of Vanuatu

**Tangoa New Testament**  
**The New Testament in the Tangoa Language of Vanuatu**  
**Le Nouveau Testament dans la langue Tangoa de**  
**Vanuatu**

copyright © 2010 Wycliffe Bible Translators, Inc.

Language: Tangoa

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-11

---

PDF generated using Haiola and XeLaTeX on 22 Feb 2024 from source files dated 31 Aug 2023

89356e5c-df58-558e-9b27-ae0321adb2df

## Contents

Matthew . . . . .	1
Mark . . . . .	68
Luke . . . . .	110
John . . . . .	180
Acts . . . . .	232
Romans . . . . .	297
1 Corinthians . . . . .	326
2 Corinthians . . . . .	355
Galatians . . . . .	375
Ephesians . . . . .	386
Philippians . . . . .	396
Colossians . . . . .	403
1 Thessalonians . . . . .	410
2 Thessalonians . . . . .	417
1 Timothy . . . . .	421
2 Timothy . . . . .	430
Titus . . . . .	436
Philemon . . . . .	440
Hebrews . . . . .	442
James . . . . .	465
1 Peter . . . . .	473
2 Peter . . . . .	482
1 John . . . . .	488
2 John . . . . .	495
3 John . . . . .	497
Jude . . . . .	499
Revelation . . . . .	502

## Retiruhu Hin Iesu Křisto Matthew Mo Ulia

### *Hin Puku Nike*

Hin puku nike, Iesu mo vujangi sohen harihi, haratu mo vaia aulu na Vutivuti (5.1-7.28), nona usiusi (6.9-13), peresi na 'Leu Ruhu' (7.12) 'ha vaia isana tinapua sohena ka opoia vara la vaia isamim' la lo toho hin puku akerihi.

Matthew mo uli mamahuni na hija pin Iesu (1.1-17) mo vujangia vara enia natu haratu sei God mo retitauhi vara i pa tai isan Supe David, haratu i pa nořa Tamlohi Jujuri.

Matthew mo uli na sava mo masese hin rani atu Tiapolo mo vaihite Iesu na jara hase-toho (4.1-11).

### *Titileu nike la lo toho hin puku akerihi purongo*

1. Piri řuvu (13.24-30)
2. Tavtav Tavera (13.44)
3. Hurutavila Tavera (13.45-46)
4. Tara Maji (13.47-50)
5. Tavtav Matea (13.52)
6. Volitusi Sasati Matea (18.23-35)
7. Tamlohi Isa Grape Matea (20.1-16)
8. Uluvou Mo Rua (21.28-31a)
9. La Harai Maevo Atu (25.1-12)

Matthew mo vujangia vara hinou tari la masese isan Iesu usuri na masalon God (1.22; 2.5, 15, 17, 23; 8.17; 12.17; 13.35; 21.4; 27.9). Matthew mo uli reileu atu non Iesu

mata sile na vavahinai non nona tamlohi usuri mata vano na jara tari na varama (28.18-20).

### **Vujangi Hai Hin Puku Nike**

1. Pin Iesu Peresi Na Nona Rani Vora (1.1-2.23)
2. Vujangi Non John Tamlohi Paptijo (3.1-12)
3. Paptijo Non Iesu Peresi Na Nona Rani Vaihite (3.13-4.11)
4. Iesu Mo Lo Toho Na Jara Tavera Matan Galilee (4.12-18.35)
5. Mo Malue Galilee Mo Sahe Jerusalem (19.1-20.34)
6. Isoiso Wik Non Iesu: Nona Mateia (21.1-27.66)
7. Iesu Mo Mele Mauri (28.1-20)

### *Pin Iesu*

(Lk 3.23-38)

<sup>1</sup> Reti nike mo vereuli na pin Iesu Křisto, mahapin Abraham enia Supe David.

<sup>2</sup> Abraham enia taman Isaac.

Isaac enia taman Jacob, ale Jacob enia taman Judah tolu na voraina,

<sup>3</sup> Judah enia taman Perez peresi Zerah, ale tinara Tamar,

Perez enia taman Hezron, ale Hezron enia taman Ram,

<sup>4</sup> Ram enia taman Amminadab, Amminadab enia taman Nahshon,

ale Nahshon enia taman Salmon,

<sup>5</sup> ale Salmon enia taman Boaz,

ale tinana Rahab, Boaz enia taman Obed, ale tinana Ruth,

ale Obed enia taman Jesse,  
 6 Jesse enia taman Supe David,  
 Supe David enia taman Solomon,  
 ale tinana Bathshiba enia malepun Uriah sei,  
 7 Solomon enia taman Rehoboam.  
 Rehoboam enia taman Abijah,  
 ale Abijah enia taman Asaph,  
 8 Asaph enia taman Jehoshaphat,  
 Jehoshaphat enia taman Joram,  
 Joram enia pin Uzziah,  
 9 ale Uzziah enia taman Jotham,  
 Jotham enia mahapin Ahaz,  
 ale Ahaz enia taman Hezekiah,  
 10 Hezekiah enia taman Manasseh,  
 Manasseh enia taman Amos,  
 ale Amos enia taman Josiah,  
 11 Josiah enia pin Jechoniah  
 tolu na tahisana,  
 enira hasera purongo natu la pa lo mauri hin pongi atu mara Babylon la tauri na tavtavuin Israel la lavira la vano Babylon. 2  
*Ki 24.14-15*  
 12 Hitahun rani atu mara Babylon  
 la lavira la vano,  
 ale pina mo vano sohen harihi:  
 Jechoniah enia taman Shealtiel,  
 ale Shealtiel enia taman Zerabbabel,

13 Zerabbabel enia taman Abiud,  
 Abiud enia taman Eliakim,  
 ale Eliakim enia taman Azor,  
 14 ale Azor enia taman Zadok,  
 Zadok enia taman Achim,  
 ale Achim enia taman Eliud,  
 15 Eliud enia taman Eleazar,  
 Eleazar enia taman Matthan,  
 ale Matthan enia taman Jacob,  
 16 ale Jacob enia taman Joseph,  
 Joseph enia tuan Mary,  
 ale Iesu mo vora isan Mary, enia haratu la tovia Křisto.  
 17 Ale mo sohena natu, pin Abraham mo tikeli Supe David mo tikeli 14, ale pin Supe David mo tikeli rani atu la vano Babylon mo tikeli 14, ale pina hin rani atu tamlohi la vano Babylon mo tikeli na rani Křisto mo vora mo tikeli 14.

*Pongi Vora Non Iesu  
 (Lk 2.1-7)*

18 Ale reti vora non Iesu nořa Křisto mo sohen harihi: Tinana Mary, la tapuhia vara i pa naroun Joseph, pani la sopo lo lahi pani o eři hitea vara Mary mo tau natuna moiso na suiħan Tanume Tapu. 19 Joseph sei enia i pa tuan Mary, ale matan enia tamlohi vokevoke matea, mo sopo opoia vara i vai Mary i mahanuhanu, ale mo aleale malele vara i tinařihia, ale tea la pa sopo levosahia.

20 Pani Joseph mo pa lo řomřomia, ale vahatea

purongo, angelo non Moli God matea mo pala isana na mavuho, ale mo vereea mara, “Joseph pin David, o sopo matahu vara o lavi Mary naroum. Hina rihirihi sei na lolona mo tai isan Tanume Tapu. <sup>21</sup> I pa vasusui na natirihi lamane matea, ale o pa tau na hijana vara Iesu matan enia i pa juri na nona tamlohi na nora hehe.” <sup>22</sup> La hinau nike, la masese matan vara i mařivisi na sava Moli God mo vereea isana přovet tuai sei mara,

<sup>23</sup> ‘Eh! Hařai maevo matea i pa pangepange, ale i pa vasusui na natuna lamane matea.

La pa tau na hijana vara Immanuel.’

*Isa 7.14*

Raramin hija atu enia, ‘God mo lo toho isařa’.

<sup>24</sup> Hitahuna Joseph mara mo turu, mo vai na sava angelo atu non Moli God mo lo vereea, ale mo lavia narouna, <sup>25</sup> pani mo sopo juruvi peresia mo mai mo tikeli na rani mo vasusui na natuna lamane matea, ale mo tau na hijana vara Iesu.

## 2

*Tamlohi Lelevosahi La Pala*

<sup>1</sup> Ale nake, Iesu mo vora Bethlehem na jara tavera Judea na pongi Herod mo lo supe ea, ale mo sopo tuai, tamlohi lelevosahi mata vitusarasara hai matan Opae la mai Jerusalem, <sup>2</sup> la lo usia lara, “Nene natirihi atu mo vora vara i pa Supe nona Jew? Kama hite na

vitusarasarana hin rani atu mo vele atuvano Opae, ale kama mai vara kama lotua.”

<sup>3</sup> Supe Herod mara mo rongo nora retusia sei, enia tolu na tamlohi tari na lolon Jerusalem řomira la kaka matana. <sup>4</sup> Mo tovi na matavuhi matea nona moli nona přis peresi na tamlohi vujangi mata leu nona tamlohi, ale mo usia isara mara, “Sava jara natu, nořa Křisto i pa vora hinia?”

<sup>5</sup> La řaramia lara, “Na vanuan Bethlehem na lolon Judea, matan přovet tuai matea mo ulia sohen harihi mara,

<sup>6</sup> ‘Bethlehem sei na jara tavera atu Judah, engko ko aulu ko jeu la haratu la lo aulu Judah.

Tamlohi aulu matea i pa tai isam i pa tavui sipsip mata i kilau na noku tamlohi Israel.’” *Mic 5.2*

<sup>7</sup> Moiso, Herod mo mele tovi řořoi na matavuhi matea peresi la tamlohi lelevosahi atu, matan vara i levosahi na rani tataholo la hite vitusarasara atu mo lo pala hinia. <sup>8</sup> Moiso Herod mo řulera la vano Bethlehem, ale mo vereea mara, “Ha vano, ha ale mamahuni natirihi atu, ale vara ka hitea, ha mai ha vereau hinia, ale enau sohena a pa vano a lotua.”

<sup>9</sup> La tamlohi lelevosahi atu la rongo la reti atu non supe moiso la turu la vano. Ale, la mele hite pa vitusarasara atu la lo hitea Opae, mo tiromara mo vano tataholo hin jara atu natirihi atu mo

lo toho ea. <sup>10</sup> La tamlohi lelevosahi atu lara la hite vitusarasara atu, la avulahi la uloulo tavera matana. <sup>11</sup> Lara la unu hin ima atu la hite natirihi atu mo lo toho hinia peresi tinana Mary. La popovitoho isana, ale la lotua. La roi na nora tavgav, ale la sile na nora otori mata gold peresi la hasori fuhu atu frankincense peresi na myrrh isana. <sup>12</sup> Pani God mo retiŕoŕoahai isan la tamlohi lelevosahi atu na mavuho matea vara la sopo mele hilu la vano isan Herod. Ale la mule na jarara na malele tinapua.

### *La Rovo La Sivo Egypt*

<sup>13</sup> La tamlohi lelevosahi atu lara la mule, vahatea purongo, angelo non Moli God matea mo pala isan Joseph na mavuho matea, mo vereaa mara, "O turu! O lavi natirihi sei peresi tinana ha rovo ha sivo Egypt matan nakerihi Herod i pa ale natirihi sei vara i vilimateia. Ha lo toho atu Egypt i tikeli rani atu a pa mele vere kamim hinia vara ha eri mele hilu." <sup>14</sup> Vahatea purongo, Joseph mo turu mo lavi natirihi atu peresi tinana la malue la sivo Egypt hin vutepongi atu, <sup>15</sup> moiso, Joseph mo lo toho Egypt mo tikeli na rani Herod mo mate. Hinau nike, mo masese sohena usuri na sava pŕovet la vereaa tuai moiso lara Moli God mo vereaa mara, 'Na tovi narihi natuku Egypt'. *Hos 11.1*

### *Herod Mo Lolokoru*

<sup>16</sup> Moiso, Herod mara mo hitevosahia vara la tamlohi

lelevosahi atu la halua, ale mo lolokoru patuna, ale mo sile na retileu matea vara nona tamlohi vuro la vilimatei na pipi lamane tari sei taunira mo rua teni taunira mo sivo atano na lolon Bethlehem peresi na jara la toho ŕalihia, Herod mo vaia usuri rani atu la tamlohi lelevosahi atu la vereaa. <sup>17</sup> Moiso, sava hinau pŕovet Jeremiah mo vereaa mo masese sohen harihimara,

<sup>18</sup> 'Na jara atu Ramah,  
tamlohi la lo tangi,  
ale la tangtangi tavera,  
Rachel mo lo tangisi na  
natuna,  
ale mo ŕohu vara tea i nanau  
isana  
matan natuna la mate.'  
*Jer 31.15*

### *La Mele Hilu La Sinai Israel*

<sup>19</sup> Pani na rani Herod mo mate, Joseph mo pa lo toho Egypt, ale hin rani atu, angelo matea non Moli God mo pala isana na mavuho matea, <sup>20</sup> angelo atu mo vereaa mara, "O turu! O lavi natirihi sei peresi tinana ha sahe Israel, matan la haratu sei la lo vaihitea vara la vilimatei natirihi sei la pete mate moiso." <sup>21</sup> Ale Joseph mo lavi natirihi atu peresi tinana la sahe Israel. <sup>22</sup> Pani mara mo rongoa vara nake natun Herod, Archelaus mo lo tauri na suiha na lolon Judea, mo matahu vara i vano atu, ale mo mele lavi na retiŕoŕoahai na nona mavuho tinapua matea vara i sahe Galilee. <sup>23</sup> Mo vano na taon tavera matea la tovia Nazareth, ale la tohoa atu

vara sava p̄rovet la vereea tuai matan K̄risto i pa masese lara, 'La pa tovia vara mara Nazareth'.

### 3

*John Tamlohi Paptijo*

(Mk 1.1-8; Lk 3.1-18; Jn 1.19-28)

<sup>1</sup> Hin rani atu John tamlohi paptijo mo pala mo tapulo retivujavujangi na jara hase-toho matan Judea. <sup>2</sup> Mo vereea mara, "Ha posi na nomim hehe matan i pa sopo tuai suiha atu non God mo lo supe hinia i pa pala." <sup>3</sup> Matan enia haratu sei p̄rovet Isaiah mo lo retireti hinia tuai sei mara, 'Na jara hasetoho leona mo lo ulo mara:

Ha tatamahuni na malele na mapumim matan Moli God i pa hahau hinia.' *Isa 40.3*

<sup>4</sup> Ale rurun John la vaia na vulu camel, mo otioti na huri buluk; hana hinia enia hatpoha peresi na wai tau sugabag sei mo meji. <sup>5</sup> Hin rani atu la haratu la lo toho Jerusalem peresi na jara tari Judea, ale na jara řalihi na wai Jordan la lo vano vara la hitea, <sup>6</sup> ale la taviti na nora hehe isana moiso John mo paptijo hinira na wai Jordan.

<sup>7</sup> Pani John mara mo hitea vara Pharisee peresi na Sad-ducee matuvana la lo mai mata la paptijo, mo vereea is-ara mara,

"Kamim mata sasati! Hare mo retiřoařoahai kamim vara ha rovo na aria tavera non God? <sup>8</sup> Ha vai na nomim vavahinau i vujangia vara ka posi varařuhu na nomim

hehe. <sup>9</sup> Ha sopo řomaulu vara, 'Kamam kama juri matan tamamam Abraham!' matan na vereea isamim, God i eři posi la vatu nike, la mai natun Abraham! <sup>10</sup> Matan nakerihi, God mo lo tauri na rita matea moiso vara i tai na wari pahai. Vipahai tari atu la sopo vua řuhu, i pa taijovira, ale i pa pulahira na lolo hapu.

<sup>11</sup> Enau na lo paptijo hin la haratu la posi mata nora hehe na wai, pani i pa sopo tuai tamlohi matea i pa mai mo aulu jea hiniau, ale enau na sopo tataholo vara a uli nařihi na asi eve palona. Enia i pa paptijo hin kamim na Tanume Tapu peresi na hapu. <sup>12</sup> Mo lo tauri na nona foko tavera na limana, ale i pa vasahi na nona jara ase na piri wit, ale i pa takonahi piri wit atu na nona pea, pani i pa suli na pahapaha piri wit na hapu sei tea i sopo eři vunia hin te rani."

*John Mo Paptijo Hin Iesu*

(Mk 1.9-11; Lk 3.21-22)

<sup>13</sup> Moiso Iesu mo tai Galilee mo vano na wai Jordan vara John i paptijo hinia. <sup>14</sup> Pani John mo vaihitea vara i horoa. Mo vereea mara, "Mata sava ko mai isaku mata paptijo? Mo mele tataholo vara engko o paptijo hiniau!"

<sup>15</sup> Iesu mo řaramia mara, "Nake mo tataholo vara o tinarihia i vano sohena, matan vara řa eři vai vevuhi na malele hiniau tari i tataholo la masese."

<sup>16</sup> Ale Iesu mara mo pap-tijo, mo lo maraha na wai,



ale vahatea purongo tuka mo roi, moiso mo hite Tanumen God mo Tapu mo sinai atano mo tau isana sohena vom-  
ahe matea. <sup>17</sup> Ale vahatea leo matea mo reti na tuka mo vereea mara, "Harihi enia Natuku, na opoia mo tavera, ale na avulahi tavera hinia."

#### 4

##### *Tiapolo Mo Vaihite Iesu (Mk 1.12-13; Lk 4.1-13)*

<sup>1</sup> Moiso, Tanume Tapu mo tiroman Iesu mo vano na jara hasetoho vara Tiapolo i vaihitea. <sup>2</sup> Ale Iesu mo tapuhoro na hanhani mata rani mo ngavulu vati (40) peresi na pongi mo ngavulu vati, (40) moiso mo mate hana. <sup>3</sup> Tiapolo mo mai isan Iesu matan vara i vaihitea, ale mo vereea mara, "Vara engko Natun God, o vere la vatu sei la mai pereti." <sup>4</sup> Pani Iesu mo řaramia mara, "Na Retiulia, God mo vereea mara, 'Tamlohi i sopo eři mauri na pereti purongo, pani na reti tari God mo vereea.'" *Deut 8.3*

<sup>5</sup> Moiso Tiapolo mo lavia mo sahe na taon tapu tavera sei Jerusalem, mo taua mo turu aulu na pingopingo Temple ea, <sup>6</sup> ale mo vereea isana mara, "Vara engko Natun God o kue, matan na Retiulia God mo vereea mara, 'Mo retileu isana nona angelo matam, matan vara la pa tauriho na limara, ale o pa sopo eři vujahi na palom hin te vatu.'" *Psa 91.11-12*

<sup>7</sup> Iesu mo řaramia mara, "La mele ulia na Retiulia God mo vereea mara, 'O sopo vaihite nom Moli God.'" *Deut 6.16*

<sup>8</sup> Ale Tiapolo mo mele lavi Iesu mo sahe aulu na vutivuti matea mo aulu jea, ale mo vujangia na jara tari na varama supe la lo tauri na suiha hinira peresi na nora tavitav tavera sei tamlohi la lo hasohasora matara. <sup>9</sup> Tiapolo mo vereea isana mara, "Vara o popovitoho isaku, ale o lotuau a pa sileho hin la hinau tari sei."

<sup>10</sup> Moiso, Iesu mo vereea isana mara, "Setan, o vano! Matan na Retiulia God mo vereea mara, 'O pa lotu nom Moli God, ale o volitusi isana hasena purongo!'" *Deut 6.13*

<sup>11</sup> Moiso, Tiapolo mo tinarihi Iesu, ale vahatea purongo, angelo hai la mai isana Iesu la tuenia.

##### *Iesu Mo Tapulo Vavahinai (Mk 1.14-15; Lk 4.14-15)*

<sup>12</sup> Nake Iesu mara mo rongoa vara la tau John na ima řilangi, mo mele hilu mo vano Galilee. <sup>13</sup> Ale mo tinarihi Nazareth mo vano mo lo toho Capernaum mariviti na tasi atu, na lolo jara matan Zebulun enia Naphtali, <sup>14</sup> matan vara retimangovi non přovet Isaiah sei mara,

<sup>15</sup> "La haratu na jara Zebulun enia Naphtali, peresi la haratu na tavalun tasi atu,

peresi la haratu telesivo na wai Jordan, peresi Galilee jara tamlohi řořoha la lo toho ea,

<sup>16</sup> la tamlohi atu la lo toho hin řořoha tavera atu la hite na malarani tavera atu,

ale merana mo sasarami la haratu

la lo toho na jara řořoha mata mateia.' *Isa 9.1-2*

<sup>17</sup> Hin rani atu Iesu mo tapulo vara i retivujavujangi mo vereea mara, "Ha posi na nomim hehe matan i pa sopo tuai, suiha atu non God sei mo supe hinia i pa pala."

*Iesu Mo Viřoni Na Nona Tamlohi*

*(Mk 1.16-20; Lk 5.1-11)*

<sup>18</sup> Iesu mo lo hahau na pahisa tasin Galilee, mo hite na vorai mo rua Simon la tovia Peter enia tasina Andrew la lo tara na tasi atu matan enira tamlohi aleale maji.

<sup>19</sup> Ale Iesu mo vereea mara, "Ha mai ha usuriau a pa vai kamim ha mai tamlohi aleale tamlohi." <sup>20</sup> Vahatea la tau na nora tara, ale la usuria.

<sup>21</sup> Iesu mo mele vano makomo, mo hite na vorai mo rua, James enia John, natun Zebedee. La lo toho na boti matea peresi tamara Zebedee. La lo tulai na nora tara, ale Iesu mo tovira vara la usuria. <sup>22</sup> Vahatea la tinařihi tamara na boti, ale la usuri Iesu.

*Vavahinau Non Iesu Galilee*

*(Lk 6.17-19)*

<sup>23</sup> Iesu mo vano řalihi na jara Galilee mo lo vujangi na ima lotu nona Jew, mo lo retivujavujangi na

Retiřuhu matan mauri atu God mo aulu hinia isara. Iesu mo vai na tamlohi rojo peresi la haratu la majuejue mata rojoa la mele řuhu.

<sup>24</sup> Sorasoran Iesu mo vano na jara tari Syria. Tamlohi la lavi la haratu la rojo na rojoa matuvana la lo rongohaji na epera, hai la lo lavi na rani řilangi matan tanume sasati mo lo toho hinira, hai la rave, hai la papao, Iesu mo vai mamahuni na nora rojoa tari. <sup>25</sup> Vao tavera la tai Galilee, Decapolis, Jerusalem, Judea, ale na tavalu wai Jordan mo vano, la lo usuria.

## 5

*Iesu Mo Vujangi Aulu Na Vutivuti Matea*

*(Lk 6.20-23)*

<sup>1</sup> Matan Iesu mo hite na vao tamlohi la lo takonahi hin jara atu, ale mo sahe na vutivuti atu, ale mara mo sakele ea, nona tamlohi usuri la mai isana. <sup>2</sup> Moiso mo tapulo retireti mo vujangira mo vereea mara,

<sup>3</sup> "Avulahi řuhu isan la haratu la lo kilau isan God hasena mata hinau tari, matan mauri atu God mo supe hinia i pa nora.

<sup>4</sup> Avulahi řuhu isan la haratu la lo tangtangi matan God i pa nanaura. *Isa 61.2*

<sup>5</sup> Avulahi řuhu isan la haratu la lo řomatano matan God i pa sile na varama isara. *Psa 37.11*

<sup>6</sup> Avulahi řuhu isan la haratu la lo marohati, ale la lo mařohu

vara la vai na masalon  
 God,  
 matan enia i pa tuenira  
 la vai na masalona,  
 enira la pa masu. *Isa*  
*55.1-2*

<sup>7</sup> Avulahi ōhū isan la haratu  
 la lo ōmopoi na tinapua  
 matan God i pa  
 ōmopoiira.

<sup>8</sup> Avulahi ōhū isan la haratu  
 mapura la vokevoke  
 matan la pa hite God. *Psa*  
*24.3-4*

<sup>9</sup> Avulahi ōhū isan la haratu  
 la lo tueni na tamlohi  
 vara la sari tamata  
 matan God i pa tovira  
 natuna.

<sup>10</sup> Avulahi ōhū isan la haratu  
 tamlohi la lo tipahira  
 mata nora posposi tata-  
 holo,  
 matan mauri atu  
 God mo aulu hinia i pa  
 nora. *1Pe 3.14*

<sup>11</sup> Avulahi ōhū isamim  
 vara tamlohi la kali  
 kamim  
 teni vara la tipahi kamim  
 teni la vere na retisasati  
 tinatinapua hin kamim  
 na retihaluhalu matan  
 kamim noku tamlohi.  
*1Pe 4.14*

<sup>12</sup> Ha uloulo, ha avulahi  
 tavera  
 matan nomim otori na  
 tuka  
 mo tavera mo sohena  
 pŕovet tuai sei tiroma  
 tamlohi la lo tipahira.  
*2 Chron 36.16; Acts 7.52*

*Solo Peresi Na Malarani*  
*(Mk 9.50; Lk 14.34-35)*

<sup>13</sup> Kamim ka sohena solo  
 mata varama, pani vara  
 mejina i tihai i pa mele lavi  
 na mejina sohena sava? I  
 pa sopo mele ōhū matan

te hinau, ale la pa pulahi  
 naŕihia, ale tamlohi la pa  
 hahau hinia. <sup>14</sup> Kamim  
 ka sohena malarani mata  
 varama. Vara te taon tavera  
 i lo toho aulu na vutivuti i pa  
 sopo eri luhu. <sup>15</sup> Ale tamlohi  
 la sopo tauhoro na lamu hin  
 te tanga, pani la kehohia  
 aulu vara i sile na merana  
 isana tamlohi tari na lolo  
 ima. <sup>16</sup> Ale sohen haratu, ha  
 vai na maurimim i memera i  
 ōhū matan vara tamlohi la  
 pa hite na nomim vavahinau  
 ōhū ka lo vaira, ale la pa  
 tahe aulu na hijan Tamamim  
 na tuka.

*Vujangi Mata Leu*

<sup>17</sup> Ha sopo ōmŕomia vara  
 na mai vara a lavi naŕihi na  
 leu teni sava pŕovet la vere.  
 Na sopo mai vara a lavi  
 naŕihira, pani vara hinau  
 tari la pa masese hinira.  
<sup>18</sup> Varaŕuhu na vere kamim  
 hinia, i pa sopo te sope maki  
 teni te reti hatea i eri tihai na  
 Leu non God vavano hinau  
 tari hinia la masese tiroma  
 moiso tuka peresi na varama  
 la pa tihai. <sup>19</sup> Vara tea mo  
 tope te retileu rihirihi matea  
 na leu, ale mo lo vujangi na  
 tinapua vara la vaia sohena,  
 tamlohi atu i pa toho atano  
 jea hin mauri atu God mo  
 aulu hinia na tuka, pani vara  
 tea mo lo oloulo na leu, ale  
 mo lo vujangi na tinapua  
 vara la oloulo na leu, tamlohi  
 atu i pa lavi na hija aulu hin  
 mauri atu God mo aulu hinia.

<sup>20</sup> Na vere kamim hinia,  
 vara nomim posposi mo sopo  
 tataholo varaŕuhu, i jue na  
 posposi tataholo halu nona  
 Pharisee peresi na tamlohi

vujangi mata leu, ha pa sopo eři unu hin mauri atu God mo aulu hinia.

### *Vujangi Mata Lolokoru*

<sup>21</sup> Ka rongo na sava la vereea isana tamlohi tuai lara, 'Ha sopo vilimatei na tamlohi. Vara tea mo vilimatei te tamlohi i pa turu na aria.' *Exo 20.13; Deut 5.17*

<sup>22</sup> Pani na vereea isamim, vara ka lolokoru peresi na voraimim matea, ka levosahia moiso vara ha pa turu na aria, ale vara ha kali te voraimim hatea, ka levosahia moiso vara ha pa turu na court tavera nona Jew, ale vara ha vere na voraimim matea vara mo řommate, ka levosahia moiso vara ha pa vano hin hapu atu na moruhapu.

<sup>23</sup> Ale matana, vara ka lo lavi na nomim silesilea vara ha pa taua na votavota mata malamalai, ale vara ka řomřomia vara voraimim matea mo lolokoru hin kamim matan ka vai te hinau matea, <sup>24</sup> ale ha tau na nomim silesilea atu na votavota mata malamalai, ale ha vano ha vai na tamata peresia tiroma, moiso ha pa mele mai vara ha sohai na nomim silesilea. <sup>25</sup> Vara nomim meresahi mo opoia vara i tau kamim na court ha vaia i mai tapalamim matea vila na malele ka lo vano na court. Vara i vono i pa vai kamim ha vano na lima tamlohi aria, ale i pa tau kamim na lima tamlohi mata ima řilangi, ale i pa tau kamim na ima řilangi. <sup>26</sup> Varařuhu, na vere kamim hinia, ha pa sopo eři malue

hin ima řilangi atu i tikeli na rani ha voli vevuhi na nomim ave ka vaira.

### *Vujangi Mata Lahi*

<sup>27</sup> Ka rongo na sava la vereea moiso lara, 'O sopo juruvi peresi te hařai mo sopo naroum'. *Exo 20.14; Deut 5.18*

<sup>28</sup> Pani na vere kamim hinia, vara tea mo kilau na hařai matea ale mo řomusuri hinia, mapuna mo pete vaivaileu peresia moiso. <sup>29</sup> Vara matua matam mo hite te hinau mo vaiho ko opoia vara o vai na hehe, o julai nařihia o pulahia. I pa mele řuhu jea vara te tavalu epem hatelete purongo i tihai hin haratu vara enira mo isoiso la pulahira na moruhapu. <sup>30</sup> Vara marau limam mo vaiho ko opoia vara o vai na hehe, o tai rotoa o pulahia. I pa mele řuhu jea vara te tavalu epem hatelete purongo i tihai hin haratu vara enira mo isoiso la pulahira na moruhapu.

### *Vujangi Mata Rohu Na Naroum*

*(Mt 19.9; Mk 10.11-12; Lk 16.18)*

<sup>31</sup> La ulia moiso vara tea mo opoia vara i řohu hin narouna i pa eři sile na certificate matea mata i řohu purongo hinia. <sup>32</sup> Pani enau na lo vere kamim hinia, vara mo sopo tataholo vara tea i řohu hin narouna matan te hinau, pani vara narouna mo vai na posposi viriu peresi na tamlohi tinapua, ale vara te tamlohi tinapua i lahi peresi na hařai sohen haratu, tamlohi atu mo vaivaileu peresia.

### *Vujangi Mata Retitauhi*

<sup>33</sup> Ka rongoa la vere a isana piʻa tuai lara, ‘O sopo tope na nom retitauhi, ale o pa turu na nom retitauhi ko vaia na hijan Moli’. *Num 30.2*

<sup>34</sup> Pani enau na vere kamim hinia vara ha sopo vere na nomim retitauhi na hijan tuka matan tuka enia jara sakele mata suiha non God, <sup>35</sup> ha sopo vere na nomim retitauhi na hijan varama matan varama enia jara palon God. Ha sopo vere na nomim retitauhi na hijan Jerusalem, matan haratu enia taon tavera non supe tavera atu. <sup>36</sup> Ale ha sopo vere na nomim retitauhi na patumim matan ha sopo efi vai te vulu hatea i lulu teni i viriha. <sup>37</sup> Vara ha vere na nomim retitauhi ha vere a purongo vara ‘io!’ teni ‘mo vono!’ Ha sopo mele vere te hinai i aulu hin haratu matan hinai tinapua mo tai isan Tiapolo.

### *Vujangi Mata Kelekele* (*Lk 6.29-30*)

<sup>38</sup> Ka rongoa la vere a tuai moiso lara, ‘Mata matea mata mata matea’ ale ‘Huʻu matea mata huʻu matea’. *Exo 21.24; Lev 21.24*

<sup>39</sup> Pani nake enau na lo vere kamim hinia vara ha sopo kele haratu mo komo kamim. Vara tea i vojai na tavalu esem o majinga hinia vara i mele vojai na tavalu esem tinapua. <sup>40</sup> Vara tea mo reveho ko vano na court matan vara o sile na nom ruru isana, o silea peresi na nom ruru mata hamariri. <sup>41</sup> Vara te tamlohi vuro mo

lo ngurunguru hiniho vara o sapele na nona tanga mata kilometre matea, o sapelea mata kilometre i rua. <sup>42</sup> Vara tea i usiho matan te nona opoia o silea, ale o sopo ōhu vara tea mo opoi te nom hinai tako.

### *Opoi Nom Meresahi* (*Lk 6.27-28, 32-36*)

<sup>43</sup> Ka rongoa la vere a moiso lara, ‘O opoi na tahisam!’ Ale lara, ‘O ōhu na nom meresahi!’ *Lev 19.18*

<sup>44</sup> Pani enau na lo vere kamim hinia vara, ha opoi na nomim meresahi, ale ha usiho matan la haratu la lo tipahi kamim, <sup>45</sup> matan vara ha pa vai na vavahinai non la haratu la natun Tama varaʻuhu na tuka, matan enia mo vai na alo mo mera isana tamlohi ōhu peresi na tamlohi sasati, ale mo sile na usa isana tamlohi tataholo peresi na tamlohi lejileji. <sup>46</sup> Matan vara ha lo opoi la haratu purongo sei la lo opoi kamim, ha pa sopo lavi na nomim otori isan God, ale la haratu la lo lavi na mania mata takis la lo opoi na tapalara purongo, ale ka hitea, la pa sopo lavi te volira matana. <sup>47</sup> Ale vara ha lo retioloolo isana tapalamim purongo, ka sopo vai te hinai ōhu i jeu na tamlohi ōroha matan enira la lo retioloolo isana tapalara purongo sohemim. <sup>48</sup> Ale matana, na lo vere a vara tarea ha pa vai na hina tataholo sohen Tamamim na tuka mo tataholo ōhu.”

## 6

*Vujangi Mata Tueni*

Ale Iesu mo mele vereea mara,

<sup>1</sup> “Vara ka vai na hina ŋuhu na naho tamlohi, ha sopo vaia matan vara tamlohi la pa hasohaso kamim matana, matan vara ha vaia sohena, Tamamim na tuka i pa sopo sile na otori isamim.

<sup>2</sup> Vara ka silesile isana tamlohi tilavono, ha sopo tiv na tavue matana. Hinau atu tamlohi tapnetano la lo opoia mo tavera vara la lo vaia na naho tamlohi na ima lotu, ale na jingoima vara la pa hasohasora matana. Varaŋuhu, na vereea isamim, enira la pete lavi na volira moiso. <sup>3</sup> Ale vara ha sile te hinau isana tilavono, ha sopo vaia vara tinapua i levosahia, <sup>4</sup> matan vara sava ka silea na jara luhu, Tamamim mo lo hite na sava ka lo vaia na jara luhu, ale enia i pa sile na otori isamim matana.

*Vujangi Mata Usiusi*

(Lk 11.2-4)

<sup>5</sup> Vara ka usiusi, ha sopo usiusi sohena tapnetano la lo vaia na ima lotu teni na jingoima vara tamlohi la pa hasohasora matana. Varaŋuhu, na vereea isamim, enira la pete lavi na volira moiso. <sup>6</sup> Pani engko vara ko usiusi o sivo na lolo ima o pelati na matarua, ale o usiusi isan Tamam tea i sopo hiteho. Tamam mo lo hite na sava ko lo vaia hin jara luhu atu, moiso o pa lavi na nom otori matana.

<sup>7</sup> Ale vara ha usiusi ha sopo verevere vono sohena

tamlohi ŋoŋoha. La lo ŋomŋomia vara nora god la pa ŋaramira matan nora reti mo matuvana. <sup>8</sup> Matan haratu, ha sopo sohera matan Tamamim mo pete levosahi na nomim opoia moiso ka pa usia isana. <sup>9</sup> Ale ha usiusi sohen harihi: God Tamamam na tuka,

kama opoia vara tamlohi tari  
la sile na oloolo tavera isam  
mata engko ko tapu,

<sup>10</sup> kama opoia vara nom  
suiha aulu mata supe i  
pala,

o vai na masalom na varama  
i tataholo sohen ko lo  
vaia na tuka,

<sup>11</sup> o sile kamam na hanhani  
matan nohorihii,

<sup>12</sup> o ŋomi kamam  
mata nomam hehe,

sohen kama lo ŋomi  
na hehe nona tamlohi  
tinapua,

<sup>13</sup> o lavi naŋihii kamam na vai-  
hite,  
o juri kamam hin  
Tiapolo.

<sup>14</sup> Matan vara ha ŋomi na tinapua na nora hehe la vaia isamim, Tamamim na tuka i pa ŋomi kamim mata nomim hehe. <sup>15</sup> Pani vara ha sopo ŋomi na tinapua, Tamamim i pa sopo ŋomi na nomim hehe.

*Tapuhoro Na Hanhani Mata Usiusi*

<sup>16</sup> Na rani vara ka tapuhoro na hanhani ha sopo vai na nahomim la rara sohena tapnetano la lo vaia. Varaŋuhu, na vereea isamim, enira la pete lavi na volira moiso. <sup>17</sup> Pani vara ko tapuhoro na hanhani, o hoje na nahom,

o paspasi na patum hin te makomo wel, <sup>18</sup> matan vara tinapua la pa sopo levosahia vara ko tapuhoro na hanhani mata usiusi, pani matan vara haratu mo sopo tea i efi hitea enia Tamam sei, enia hasena i pa hite na sava ko lo vaia na jara luhu, moiso i pa sile na nom otori matana.

*Tavtav Na Tuka*  
(Lk 12.33-34)

<sup>19</sup> Ha sopo takonahi na tavgav na varama, matan pepe peresi řaeha la pa komora, ale tamlohi vavanaho la pa kauti na ima la unu vara la vanahora. <sup>20</sup> Pani ha takonahi na nomim tavgav aulu na tuka matan pepe peresi na řaeha la pa sopo efi komora, ale tamlohi vavanaho la pa sopo unu la vanahora, <sup>21</sup> matan mapum i pa lo toho tarea na jara nom tavgav mo lo toho ea.

*Malarani*  
(Lk 11.34-36)

<sup>22</sup> Matam enia mo sohen a glas niro matea mata epem. Vara matam mo niro mo řuhu, memera i pa mařivisi na epem. <sup>23</sup> Pani vara matam mo sovsoha, epem tari la pa řořoha. Vara malarani na lolom mo sopo malarani, pani mo řořoha, řořoha atu i pa tavera jea.

*Mania*  
(Lk 16.13)

<sup>24</sup> Mo sopo tea i efi volitusi varařuhu isana tamlohi tavera tinapua i rua. I pa opoi matea i jeu haratu matea,

teni i pa ololo hin matea i jeu haratu matea. Ha pa sopo efi volitusi isan God na tavalu limam matea, ale na tavaluna tinapua ha volitusi isana mania! \*

*Romkaka*  
(Lk 12.22-31)

<sup>25</sup> Na vere kamim hinia vara ha sopo řomkaka mata maurimim, ha sopo řomkaka vara sava ha pa hania, teni ha pa inu te sava, teni ha pa rua na sava. Sohen a sava mauri mo sopo jeu na hanhani, ale epemim mo sopo jeu na ruru? <sup>26</sup> Ha to kilau sahe na maji avuavu na masapa! La sopo lalavo teni la vu na asitauni. La sopo takonahi na piri na ima piri, pani Tamamim na tuka mo lo kilaura. Sohen a sava ka řom vara ka sopo řuhu jea i jeu na maji avuavu? <sup>27</sup> Romkaka, i efi vai kamim ha mauri i mele peravu?

<sup>28</sup> Mo sopo řuhu vara ha lo řomkaka mata nomim ruru. Ha kilau vano sohen a sava pa vira jala la lo ulua. La sopo voko vara lakolako na epera. <sup>29</sup> Pani na vere a isamim vara supe Solomon peresi na nona tavgav tari peresi na nona ruru řuhu mo lo rura, la sopo řuhu sohen te vonara hatea. <sup>30</sup> Vara God mo vai na hinau la ulua hasera na jara tavera la řuhu jea mata makom rani purongo, pani pavuho la mate, ale la pulahira na hapu, pani ha lo levosahia, God i pa kilau mamahuni kamim i mele řuhu jea i jeu la vira jala

\* 6:24: Matam nika enia mapum, vara mapum mo hehe o pa opoi na hinau mata řořoha, ale hina řořoha la pa taurilati na maurim tari.

sei. Mata sava nomim rasua mo rihirihi purongo?

<sup>31</sup> Ha sopo řomkaka vara, 'řa pa hani te sava hinau?' teni 'řa pa inu na sava?' teni 'řa pa ru te sava?' <sup>32</sup> Haratu sei la tamlohi řořoha la lo řomkaka matan la hinau tari sei. Tamamim na tuka mo levosahi na hinau tari ka opoira. <sup>33</sup> Pani ha ale mauri atu God mo aulu hinia tiroma peresi na nona posposi tataholo, ale hinau tari sei la pa nomim.

<sup>34</sup> Ha sopo řomkaka matan pavuho, matan pavuho i pa hasena kilaua. Ale rani hatehateahi la pa lavi na nora hina řilangi hasera.

## 7

### *Ha Sopo Ari Na Tinapua (Lk 6.37-38, 41-42)*

<sup>1</sup> Ha sopo ari na tinapua matan vara God i pa sopo ari kamim. <sup>2</sup> Na sava malele ka lo ari na tinapua hinia, la pa ari kamim hinia sohena, vara nomim aria mo puhoni isana tinapua, God i pa vaia sohena isamim. <sup>3</sup> Ko eři hitevosahi na utauta rihirihi na matan voraim, pani mata sava ko sopo eři hitevosahi na masunga vipahai na matam? <sup>4</sup> Teni o pa eři vereea isan voraim sohena sava vara, 'Tapala o tinařihiau a lavi nařihi na utauta rihirihi matea na matam!' pani ko sopo hitevosahi na masunga vipahai na matam hasem? <sup>5</sup> Engko tapnetano, o lavi nařihi na masunga vipahai na matam hasem tiroma, matan vara o pa eři kilau i řuhu vara o lavi nařihi

na utauta rihirihi na matan voraim.

<sup>6</sup> Ha sopo sile na hina tapu non God isana viriu, matan enira la pa posi la hatisatihiho, ale ha sopo sile na nomim huřutavila isana poi, matan la pa lo varasihira purongo.

### *Usia, Alea, Rerengi (Lk 11.9-13)*

<sup>7</sup> Ha usia, ale la pa silea isamim, ha alea, ale ha pa vileia, ha řerengi, ale pelati i pa roi isamim. <sup>8</sup> Haratu la usia la pa lavia, haratu la alea la pa vileia, ale la haratu la lo řerengi, pelati i pa roi isara. <sup>9</sup> Teni te vonamim i pa eři sile na vatu isan natuna vara mo usia na pereti? <sup>10</sup> Teni te vonamim i pa eři sile na mata isan natuna vara mo usia na maji tasi? <sup>11</sup> Vara kamim tamlohi hehe ka levosahi na sava otori sei mo řuhu vara ha pa silea isana natumim, ka levosahia moiso vara posin Tamamim na tuka mo jeu na posposi tamlohi, ale i pa sile na otori řuhu isan la haratu la usia.

### *Leu Mata Opoia*

<sup>12</sup> Ale matana, ha vaia isana tinapua sohena ka opoia vara la vaia isamim matan harihi mo mařivisi na Leu non God peresi na reti nona přovet tuai.

### *Malele Mo Rua (Lk 13.24)*

<sup>13</sup> Ha unu na matarua rihirihi, matan vao tavera la lo unu na matarua tavera, ale la lo usuri na malele mo tavera sei mo lo vano na talai non God, ale i pa komora.



<sup>14</sup> Pani matarua atu mata unu na malele mata mauri mo rihirihi, malelena mo řilangi, ale tupu visaletē purongo la vileia.

*Přovet Haluhalu*  
(Lk 6.43-45)

<sup>15</sup> Ha lo kilau mata přovet haluhalu! La pa mai sohena tamlohi tuetueni, pani na lolora la sohen viriu varavarahati matan la pa komo na nomim rasua. <sup>16</sup> Ha pa eři hitevosahira na nora vavahinau. Ha sopo eři vu na vua grape na talu kaulu teni vua fig na asi matemate. <sup>17</sup> Hin malele atu pahai řuhu tari la pa sile na vua řuhu, pani pahai sati i pa sile na vua sasati. <sup>18</sup> Pahai řuhu i sopo eři sile na vua sasati, ale pahai sati i sopo eři sile na vua řuhu. <sup>19</sup> Pahai tari sei la sile vua sasati la pa taijovira, ale la pulahira na hapu. <sup>20</sup> Ha pa eři hitevosahi na přovet haluhalu na nora vavahinau.

*Retiřoařoahai Matea*  
(Lk 13.26-27)

<sup>21</sup> Mo sopo tamlohi tari sei la lo toviau lara, 'Moli! Moli!' la pa lavi mauri atu God mo aulu hinia, pani la haratu purongo sei la lo ololo hin Tamaku na tuka la pa unu hinia. <sup>22</sup> Na rani mata aria, tamlohi matuvana la pa toviau vara, 'Moli! Moli!' La pa vereā lara, 'Kama lo retivujavujangi na hijam, ale na hijam kama lo titiu na tanume sasati, ale kama lo vai na hina mařurahi matuvana hinia.' <sup>23</sup> Pani a pa vereā isara vara, 'Kamim, ka sopo noku tamlohi! Ha

malue, kamim ka tamlohi tope na leu!'

*Ima Mo Rua*  
(Lk 6.47-49)

<sup>24</sup> Ale vara tea mo rongo na noku reti, ale mo vaira, mo sohena tamlohi lelevosahi matea sei mo voro na imana na vatu. <sup>25</sup> Tavara mo jovi, ale wai mo tavei mo mai peresi na langi řilangi la vili ima atu, pani mo sopo jovi matan mo voroa na vatu. <sup>26</sup> Ale vara tea mo rongo na noku reti, pani mo sopo vaira, mo sohena tamlohi rongorongono vono matea sei mo voro na imana na oneone. <sup>27</sup> Tavara mo jovi, ale wai mo tavei mo mai peresi na langi řilangi la vili ima atu, ale ima atu mo jovi mo maroe."

<sup>28</sup> Hin rani atu Iesu mo vere harihi mo isoiso, vao atu la mařurahi tavera na nona vujangi, <sup>29</sup> matan mo vujangira sohena tamlohi aulu matea, mo sopo sohena nora tamlohi vujangi mata leu.

## 8

*Tamlohi Lepros Matea*  
(Mk 1.40-45; Lk 5.12-16)

<sup>1</sup> Hin rani atu Iesu mo lo sevuti na vutivuti atu, vao tavera jea la lo usuria. <sup>2</sup> Ale hin rani atu tamlohi lepros matea mo mai mo papaohi isana mo vereā mara, "Moli, vara o opoia, o eři vaiau a vokevoke na noku rojoa."

<sup>3</sup> Iesu mo sohai na limana moiso mo tikelia, ale mo vereā mara, "Enau na opoia. O vokevoke!" Vahatea purongo lepros atu mo tihai.

<sup>4</sup> Moiso Iesu mo vereā isana mara, "O sopo vere hinau

nike isan tea, pani o vano o hase vujangiho isana pŕis vara ko mele řuhu, ale o sile na hina silesilea sohen Moses mo retileu hinia matan vara tamlohi tari la pa levosahia vara engko ko vokevoke moiso.”

*Rasua Hin Iesu  
(Lk 7.1-10; Jn 4.43-54)*

<sup>5</sup> Ale Iesu mo pa lo unu na vanuan Capernaum, captain mata tamlohi vuro matea mo mai isana mo usia řilangi isana, <sup>6</sup> mara, “Moli, o tue-niau, noku volitusi mo lo juruvi na ima, epena mo řira, mo lo lavi na rani řilangi tavera.”

<sup>7</sup> Moiso, Iesu mo vereia isana mara, “A pa vano a vai na nona rojoa i tihai!”

<sup>8</sup> Pani captain mata tamlohi vuro atu mo vereia mara, “Moli, enau na sopo řuhu matan vara o unu na imaku, pani o vereia purongo, ale noku volitusi i pa řuhu.

<sup>9</sup> Matan enau sohem, na lo toho na ruhuruhu suiha aulu tinapua, ale la sileau na suiha vara a aulu na noku tamlohi vuro, vara a vere isan te hatea vara, ‘O vano!’ ale i pa vano, vara a vere isan te tinapua vara, ‘O mai!’ ale i pa mai, vara a vereia isana noku volitusi vara, ‘O vai haranike!’ ale i pa vaia.”

<sup>10</sup> Ale Iesu mara mo rongo hinau sei mo mařurahi tavera, ale mo posi mo vereia isan vao atu la lo usuria mara, “Varařuhu na vereia isamim vara na sopo lo tapai te rasua sohen harihi na lolon Israel. <sup>11</sup> Na vereia, tamlohi matuvana na jara

tari na varama la sopo Jew, la pa mai la sakele matavuhi na hanhani tavera peresi Abraham, Isaac enia Jacob hin mauri atu God mo aulu hinia. <sup>12</sup> Pani tatua tahisan Abraham la pa pulahira na řořoha tavera, la pa tangi, ale la pa nařnařoři na huřura.”

<sup>13</sup> Ale Iesu mo vereia isan captain atu mara, “O eři vano na imam natu. Ale i pa masese sohen ko rasua.” Vahatea nona volitusi mo mele řuhu.

*Mo Vaitihai Na Rojoa  
(Mk 1.29-34; Lk 4.38-41)*

<sup>14</sup> Iesu mo pa lo unu na iman Peter, ale mo hite vepalihan Peter mo lo juruvi na vata mo sereia. <sup>15</sup> Mo tauri na limana, ale seserei atu mo tihai moiso harai atu mo mele turu mo vai na hanhani hani Iesu.

<sup>16</sup> Hin ravravi atu, tamlohi la lavi na tamlohi matuvana sei tanume sasati mo unu hinira la mai isan Iesu, ale mo reti purongo, ale nona reti atu mo titiu nařihi na tanume sasati isara, ale mo vai na tamlohi rojo tari la řuhu. <sup>17</sup> Ale sava přovet Isaiah mo vereia moiso mo masese sei mara:

‘Mo lavi nařihi na nořa rojoa, ale mo vaiřa řa řuhu.’  
*Isa 53.4*

*Mauri Vara O Usuri Iesu  
(Lk 9.57-62)*

<sup>18</sup> Iesu mara mo hite na vao tavera atu la lo mai la lo turu porotia, ale mo vereia isana nona tamlohi vara la pa usuria la vano roto na tasin Galilee.

<sup>19</sup> La sopo lo vano tamlohi vujangi mata leu matea mo

mai isana mara, “Tija, a pa usuriho na sava jara o pa vano ea!”

<sup>20</sup> Iesu mo vereea isana mara, “Viriu jala nora jara juruvi la lo toho, ale maji avuavu taura la lo toho, pani Natun Tamlohi mo sopo te jara vara i lo toho ea.” *Dan 7.14*

<sup>21</sup> Nona tamlohi usuri tina-pua matea mara, “Tija, a pa mai, pani o tinañhia vara a tavuni tamaku tako.”

<sup>22</sup> Pani Iesu mo vereea isana mara, “O usuriau! Haratu la mate la pa tavuni na nora mate!”

*Mo Horo Na Langi Tavera  
(Mk 4.35-41; Lk 8.22-25)*

<sup>23</sup> Ale Iesu mo pa lo vele hin boti atu, nona tamlohi usuri la usuria, <sup>24</sup> ale hin rani atu la vano, ale langi tavera matea mo jovi hin tasi atu, ale mariviti suhusuhu la lo putehi na botira natu, pani Iesu mo lo juruvi, <sup>25</sup> ale na nona tamlohi la vano isana la ñohaia lara, “Tija! O juriña! Ra lo pute!”

<sup>26</sup> Pani Iesu mo vereea isara mara, “Ka matahu mata sava? Nomim rasua mo rihir-ihii hajavua!” Ale mo turu mo reti ñilangi isana langi peresi tasi atu vara la tamata, ale hinau tari la tamata.

<sup>27</sup> Ale la nona tamlohi atu la mañurahi tavera hinia lara, “Sava tamlohi nahai sohena, matan langi peresi na tasi sohena la oloolo hinia?”

*Mara Gadara Na Taptap  
(Mk 5.1-20; Lk 8.26-39)*

<sup>28</sup> Iesu mo hosõ na tavalu tasi atu mariviti hin jara tavera atu Gadarene, ale

hin jara atu tamlohi mo rua tanume sasati la lo toho hinira, la tai na taptap la mai isana. La tupra rua atu enira la putu, ale la lo vaisati na tamlohi, ale la vai na tamlohi la matahu matan vara la lo hahau hin jara atu.

<sup>29</sup> Ale vahatea purongo, la ulo lara, “Natun God! Engko te nom sava isamam! Ko mai nakerihi matan vara o sile na talai isamam sei mo sopo lo ranina tataholo?”

<sup>30</sup> Vao poi tavera matea mo lo toho asau makomona hinira la lo susua, <sup>31</sup> ale la tanume sasati atu la usia ñilangi isan Iesu lara, “Vara o tiu nañihi kamam, o ñule kamam kama unu hin vao poi atuvano!”

<sup>32</sup> Ale Iesu mo vereea isara mara, “Ha vano!” Moiso la malue la vano la unu hin vao poi atu, ale vahatea purongo vao poi atu la maro la solesole la jovi na pesapesa atu la pute na tasi. <sup>33</sup> Moiso tamlohi kilau na poi atu la maro la vano na taon tavera mariviti hin jara atu la vere na hinau tari la masese hin la tamlohi putu atu tanume sasati la lo toho hinira. <sup>34</sup> Ale hin rani atu tamlohi tari na nora taon tavera atu la mai vara la tapai Iesu, ale lara la hitea la usia ñilangi isana vara i malue na jarara.

## 9

*Tamlohi Papao Matea  
(Mk 2.1-12; Lk 5.17-26)*

<sup>1</sup> Ale Iesu mo mele vele hin boti atu mo hilu mo vano roto na tasi mo hosõ mariviti hin taon atu mo lo tohoa ea. <sup>2</sup> Ale hin rani atu, tamlohi

hai la lavi na tamlohi papao matea na epana la mai isana, ale Iesu mara mo hitevosahi na rasua nona tapalan tamlohi papao atu, mo vereea isana mara, "Natuku, řomim i řilangi! Na řomiho mata nom hehe."

<sup>3</sup> Ale hin rani atu, tamlohi vujangi mata leu hai la lo toho atu la lo hasera řomřomia na řomira lara, "Tamlohi akerihi mo lo vaia sohena enia God."

<sup>4</sup> Pani Iesu mo levosahi na sava la tamlohi sei la lo řomřomia, ale mo vereea mara, "Ka lo řomhehe na mapumim mata sava?" <sup>5</sup> Sahara mo mele malum vara a vereea isan tamlohi papao nike? 'Enau na řomiho mata nom hehe!' Teni vara a vereea vara, 'O turu! O hahau!' <sup>6</sup> Pani matan vara ha pa levosahia vara Natun Tamlohi mo lavi na suiha vara i řomi na hehe nona tamlohi na varama, ha tapurongo!" Ale Iesu mo vereea isan tamlohi papao atu mara, "Na vereho hinia, o turu, o viriviri na epam, ale o mule!"

<sup>7</sup> Ale tamlohi papao atu mo turu mo mule. <sup>8</sup> Vao tamlohi atu lara la hitea, matahu mo sohonira, ale la tahe na hihan God matan enia mo sile na suiha sohen harihi isana tamlohi.

*Iesu Mo Tovi Matthew*  
(Mk 2.13-17; Lk 5.27-32)

<sup>9</sup> Iesu mo pa lo vano, mo hite na tamlohi matea mo lo lavi na mania mata takis mo lo sakele na jara mata voli na takis. Iesu mo vereea isana mara, "Eh! O mai o usuriau!" Ale Matthew mo turu, mo usuria.

<sup>10</sup> Hitahu Iesu peresi na nona tamlohi usuri la lo sakele la lo hanhani na iman Matthew, ale hin rani atu tamlohi mata lavi na mania mata takis peresi na tamlohi hehe tinapua matuvana sohera la lo sakele la lo hanhani peresira. <sup>11</sup> Pharisee atu lara la hitea, ale la usi na tamlohi usuri non Iesu lara, "Mata sava nomim tija mo lo hanhani matavuhi peresi la haratu la lo lavi na mania mata takis peresi la tamlohi hehe tinapua sei?"

<sup>12</sup> Pani Iesu mara mo rongoa mo vereea mara, "Haratu la sopo rojo la sopo opoi na doctor, pani la haratu la rojo la opoia. <sup>13</sup> Ha vano ha levosahi na řaramin Retiulia sei mo vereea vara, 'Na sopo opoi na malamalai, pani na opoia vara ha řomopoi na tinapua.' Enau na sopo mai vara a tovi la haratu la tataholo moiso vara la mai noku tamlohi, pani na mai vara a tovi la haratu la hehe." *Hos 6.6*

*Tapuhoro Na Hanhani*  
(Mk 2.18-22; Lk 5.33-39)

<sup>14</sup> Na rani matea tamlohi usuri non John tamlohi paptijo la mai isan Iesu la usia lara, "Mata sava kamam peresi na Pharisee na rani matuvana kama lo tau na rani mata tapuhoro na hanhani mata usiusi, pani nom tamlohi usuri la sopo tapuhoro na hanhani mata usiusi?"

<sup>15</sup> Iesu mo řaramira mara, "Tavtavui tamlohi i pa lahi la sopo eři tapuhoro na hanhani mata usiusi hin rani atu la lo toho peresia. Pani vara

nona meresahi la mai la lavi naʻihia isara, ale hin rani atu natu la pa tapuhoro na hanhahi mata usiusi.

### *Tavalu Ruru Paro*

<sup>16</sup> Te tamlohi i sopo eʻi lavi te tavalu ruru paro hatea i silivi na ruru tuai hinia. Vara i vaia sohena, tavalu ruru paro atu i pa vaia i maʻari tavera i jeu haratu tiroma.

### *Waen Paro*

<sup>17</sup> Te tamlohi i sopo eʻi titisi na waen paro i sivo na jara waen la vaia na huri nani tuai matan waen paro atu i pa sosohi i ʻari jara waen atu, ale i pa komoa peresi waen atu matan i pa roro naʻihi. Waen paro mo tataholo na jara waen la vaia na huri nani paro purongo matan vara jara waen atu la vaia na huri nani peresi waen atu la pa toho i ʻuhu i tuai.”

### *Tamlohi La Tau Na Nora Rasua Hin Iesu* (*Mk 5.21-43; Lk 8.40-56*)

<sup>18</sup> Iesu mo pa lo vere harahi, ale vahatea tamlohi aulu matea mo mai isana, mo papaohi isana mo verea mara, “Venatuku mo mate nakerihi. O mai o tau na limam isana, ale i pa mele mauri.”

<sup>19</sup> Iesu peresi na nona tamlohi usuri la turu la usuri tamlohi atu. <sup>20</sup> La lo vano, ale vahatea haʻari matea mo rojo na rojo nona haʻari tauni mo sangavulu ʻomana mo rua moiso mo mai na haʻina mo tikeli na revurevu ruru non Iesu. <sup>21</sup> Mo lo verea isana hasena mara, “Vara a eʻi

tikeli na nona ruru purongo a pa mele ʻuhu.”

<sup>22</sup> Ale Iesu mo posi isana mo hitea mo verea mara, “Romim i ʻilangi! Nom rasua mo vaiho ko mele ʻuhu.” Ale haʻari atu mo mele ʻuhu vahatea purongo.

<sup>23</sup> Hin rani atu Iesu mara mo unu na iman pa tamlohi aulu atu, mo hite na tamlohi roro la lo roro na flute peresi na vao la lo tangtangi, <sup>24</sup> mo verea mara, “Ha malue! Haʻarihi sei mo sopo mate! Mo juruvi ʻomaliho purongo!” Tamlohi tari atu la manaluluhi Iesu. <sup>25</sup> Pani lara la sohai vao atu la sahe na jingoima moiso, Iesu mo unu mo vano na pahisa vatan haʻarihi atu, mo tauri na limana, ale haʻarihi atu mo turu. <sup>26</sup> Ale sorasorahina mo vano ʻalihi na jara tari atu.

### *Iesu Peresi Na Matavuso*

<sup>27</sup> Moiso Iesu mo lo malue hin jara atu, ale tamlohi matavuso mo rua la lo usuria la lo ulo lara, “Mahapin Supe David, o ʻomopoi kamam!”

<sup>28</sup> Ale Iesu mara mo unu na ima matea, la matavuso atu la mai isana. Iesu mo usira mara, “Ka rasua vara a pa eʻi vai kamim ha ʻuhu?”

La ʻaramia lara, “He'e Moli.”

<sup>29</sup> Ale Iesu mo tikeli na matara mara, “Matan nomim rasua, i pa sohena isamim.”

<sup>30</sup> Ale la matavuso atu la kilau, pani Iesu mo retiʻoʻoahaira vara la pa sopo mele verea isan tea, <sup>31</sup> pani la malue la lo sorahia isana tamlohi tari sei la tapaira na jara tari atu.

## *Tamlohi Mengo Mo Retireti*

<sup>32</sup> Iesu peresi na nona tamlohi la pa lo vano, ale vahatea purongo tamlohi hai la lavi na mengo matea mo mai isana mo mengo matan tanume sasati matea mo lo toho hinia. <sup>33</sup> Ale Iesu mara mo tiu narihi tanume sasati atu hinia, mengo atu mo retireti. Vao tavera atu la mafurahi tavera la lo vereea lara, "Mo sopo lo te hinau sohen harihi i malue Israel mo tikeli nake."

<sup>34</sup> Pani Pharisee la vereea lara, "Tamlohi tavera nona tanume sasati mo silea na suiha vara i tiu narihi na tanume sasati sohen harihi."

## *Iesu Mo Romopoirā*

<sup>35</sup> Ale Iesu mo vano mo lo vujangi na nora ima lotu na taon tari peresi na vanua tari atu. Mo retivujavujangi na Retiruhu hin mauri atu God mo aulu hinia isara, ale mo vai la haratu la rojo peresi la haratu la majuejue mata rojoa la mele ruhu. <sup>36</sup> Hin rani atu Iesu mo hite la vao tamlohi atu, mo romopoirā matan romira la jovi la sohena natu maŕua. La sohena sipsip mo sopo te tavuira. *Num 27.17*

<sup>37</sup> Mo vereea isana nona tamlohi usuri mara, "Vua asitauni mo tavera jea, pani tamlohi isa la tupu visaletē purongo. <sup>38</sup> Ha usi tamlohi tavera atu sei mo aulu na asitauni vara i rrule te tamlohi isa la vano na isana vara la vu na vua asitauni!"

## 10

### *Tamlohi Usuri Non Iesu (Mk 3.13-19; Lk 6.12-16)*

<sup>1</sup> Ale Iesu mo tovi na nona tamlohi usuri mo sangavulu romana mo rua, mo silera na suiha vara la eŕi tiu na tanume lumiha sasati, ale vara la eŕi vai la haratu la rojo peresi la haratu la maŕemaŕe mata rojoa la sopo mele rojo. <sup>2</sup> Hija vahaŕule non Iesu mo sangavulu romana mo rua enira nahai:

Simon, haratu la tovia Peter,

tasina Andrew,

ale James enia John natun Zebedee,

<sup>3</sup> Philip,

Bartholomew,

Thomas,

Matthew haratu mo lo lavi na mania mata takis,

ale James natun Alphaeus, Thaddeus,

<sup>4</sup> Simon mara Cana sei, enia tamlohi matea mata valum mata jarana,

ale Judas Iscariot, haratu mo lo turuposi hin Iesu.

### *Mo Rule Na Nona Tamlohi (Mk 6.7-13; Lk 9.1-6)*

<sup>5</sup> Iesu mo rrule la tupu sangavulu romana mo rua atu, mo retileu mara, "Ha toho asau na jara tamlohi roŕoha, ale ha sopo unu hin te taon non Samaria hatea, <sup>6</sup> ha vano isana tamlohin Israel purongo matan enira la sohena vao sipsip natu maŕua matea, <sup>7</sup> ale ha vano ha retivujavujangi vara suiha atu non God mata supe i pa pala nohorihī. <sup>8</sup> Ha vai mamahuni la haratu la rojo, ha sauteterahi na mate,



tamlohi tavera mata ima, pani la vereea vara patu tamlohi mata ima enia Beelzebul sei supe nona tanume sasati, ha lo levosahia vara la pa retisati hin kamim noku tamlohi.

*Ha Sopo Matahu*  
(Lk 12.2-7)

<sup>26</sup> Ha sopo matahunira. Mo sopo te hina luhu vara i pa sopo malue na jara tavera, ale hina luhu tari la pa pala na jara tavera. <sup>27</sup> Ha vere na sava na vereea isamim na řořoha ha vereea na malarani; ale ha pa retivujavujangi na jara tavera na sava na varavaramasa hinia isamim.

<sup>28</sup> Ha sopo matahuni na tamlohi sei la pa tipahi kamim. La eři vilimatei na epemim, pani la pa sopo eři komo na maurimim. Pani ha matahuni God, matan enia i eři komo na maurimim peresi na tarapemim na moruhapu. <sup>29</sup> Tamlohi tari la levosahia vara ha eři voli te vakarakara i rua na selen matea purongo. Pani mo sopo te hatelete vara i jovi na lepa Tamamim na tuka mo sopo levosahia. <sup>30</sup> Ale Tamamim mo levosahia vara vulu mo viša la lo toho na patumim. <sup>31</sup> Matan haratu, ha sopo matahu. Kamim ka aulu na nahon God ka jeu na vakarakara matuvana.

*Ha Sorahi Iesu*  
(Lk 12.8-9)

<sup>32</sup> Ale vara tea i vereea na naho tamlohi vara enia noku tamlohi, ale enau sohena a pa vereea isan Tamaku na tuka vara enia noku. <sup>33</sup> Pani vara tea i vereea vara mo řohu

hiniau na naho tamlohi, a pa vereea na nahon Tamaku na tuka vara tamlohi atu mo řohu hiniau.

*Rani La Pa Sati*  
(Lk 12.51-53; 14.26-27)

<sup>34</sup> Ha sopo řomřomia vara enau na mai na varama vara a sile na tamata. Na sopo mai vara a sile na tamata, pani matan vara a ase na tamlohi. <sup>35</sup> Matan na mai vara a vai na tamlohi i pa řohu hin tamana, ale venatuna i pa řohu hin tinana, ale narou natirihi i pa řohu hin tinan tuana.

*Mic 7.6*

<sup>36</sup> Nomim meresahi la pa tai na lolo vaomim. <sup>37</sup> Haratu mo opoi tamana teni tinana teni na natuna peresi na venatun mo jeuau, enia mo sopo tataholo vara i mai noku tamlohi usuri. <sup>38</sup> Na vereea vara te mo sopo soloti na nona talopeilopei i usuriau, enia mo sopo tataholo vara i mai noku tamlohi usuri.

<sup>39</sup> Vara tea mo opoi na maurina enia i pa vaitihaia, ale vara tea mo řohu na maurina matak, enia i pa vilei na mauri varařuhu.

*Volvoli Matan Tuka*  
(Mk 9.41)

<sup>40</sup> Haratu mo avulahi vara i lavi kamim, enia mo lo laviau, ale haratu mo laviau mo lavi haratu mo lo řuleau. <sup>41</sup> Haratu mo hitevosahi na přořet matea, ale mo avulahi mo lavia, enia i pa lavi na volina sohena přořet matea. Haratu mo hitevosahi na tamlohi tataholo matea, ale mo avulahi mo lavia, enia i pa lavi na otori sohen tamlohi tataholo atu. <sup>42</sup> Ale haratu mo hitevosahi na



noku tamlohi usuri matea, ale mo silea na hina rihirihī matea sohena paniken wai hamañiri matea isana, varañuhu na vereā isamim, enia i pa lavi na nona otori matana.”

## 11

*John Tamlohi Paptijo*  
(Lk 7.18-35)

<sup>1</sup> Iesu mara mo lo retileu isan la nona tamlohi usuri atu mo sangavulu ñomana mo rua moiso, mo malue mo vano ñalihi na nora taon tavera la lo toho hin jara atu vara i vujangira ale i retivu-javujangira.

<sup>2</sup> John mo lo toho na ima ñilangi, ale mara mo rongo na sava Křisto mo lo vaira, mo ñule na nona tamlohi usuri hai isana, <sup>3</sup> vara la usia isana lara, “Engko sei natu, haratu sei kama pa lo kilau matana, haratu sei God i pa ñulea i sinai? Teni kama pa mele saovi matan te mele tina-pua?”

<sup>4</sup> Iesu mo ñaramira mara, “Ha vano ha vere John na sava ka rongoa, ale ka hitea.

<sup>5</sup> Nake, matavuso la kilau, ale tamlohi papao la hahau, haratu lepros mo hatira la mele vokevoke, peropero la rongo, haratu la mate la turu na mauri, ale tilavono la lo rongo na Retiñuhu. *Isa 61.1* <sup>6</sup> Vara la haratu la sopo ñomrua hiniañu, la pa avulahi tavera.”

<sup>7</sup> Ale la tamlohi atu la pa lo tapulo malue, ale Iesu mo sorahi John isan vao atu mara, “Hin rani atu ka lo vano vara ha hite John,

ka vano hin urata hasetoho atu vara ha hite te hinañu sohena talu ere sei mo sopo ñilangi, ale langi mo serea mo lo hisuhisu teni mata sava? <sup>8</sup> Sava tamlohi natu, ka vano vara ha hitea? Ka hite tamlohi atu mo ru te ruru ñuhu? Ka levosahia vara tamlohi sei la lo ru na ruru sohen haratu enira la tamlohi tavitav purongo sei la lo toho na ima supe. <sup>9</sup> Ka lo vano vara ha hite na sava? Te pñovet matea? Varañuhu enia pñovet matea, enjora, pani mo jeu na pñovet, <sup>10</sup> Retiulia mo retireti hin John mara,

‘O lo levosahia vara,  
a pa ñule na noku va-  
hañule matea  
i tiroma hiniho vara i  
tatamahuni  
na hinañu matam.’ *Mal*  
3.1

<sup>11</sup> Varañuhu na vereā isamim, mo sopo lo tea i vora hin varama nike i jeu John tamlohi paptijo. Pani haratu enia tamlohi purongo hin la haratu la lavi mauri atu God mo aulu hinia, enia i pa aulu i jeu John na pongi hitahu.

<sup>12</sup> Mo tapulo na rani non John tamlohi paptijo mo tikeli nake, tamlohi hai la lo opoia vara la tauri na suiha vara la aulu, ale vara la vere na masalon God vara mo vano sohena sava hin varama nike, ale tamlohi sasahati sohena la lo vaihitea vara la taurilati suiha atu, <sup>13</sup> matan pñovet tari peresi na Leu non Moses la lo retimangovi tuai moiso mo tikeli na rani non John. Vara ha evia ha pa levosahia vara i pa pala sohena sava. <sup>14</sup> Ale vara ka

avulahi vara ha rasua, John enia Elijah, pŕovet atu ka lo kilau matana, <sup>15</sup> haratu mo eŕi rongovosahia, o tapurongo!

<sup>16</sup> Kamim nakerihi ka sohena natuvarihi sei la lo vai na roro na jara maket, ale la lo uloulo isara lara, <sup>17</sup> ‘Kama roro na pue tangtangi, pani ka sopo velu! Kama lavi na vete mata ŕomi na tamlohi mate, pani ka sopo tangtangi!’ <sup>18</sup> Na vere harihi matan John tamlohi paptijo mo sopo vano ŕalihi vara i lo hanhani teni i lo inuinu peresi na tamlohi, pani ka vara, ‘Tamlohi sei tanume sasati matea mo lo toho hinia!’ <sup>19</sup> Ale Natun Tamlohi mo lo hahau ŕalihi mo lo hanhani mo lo inu peresi na tamlohi, ale ka vara, ‘Tamlohi sei mo lo hanhani, ale mo lo inu hajavua. Enia tapala tamlohi la lo lavi na mania mata takis peresi la haratu la hehe.’ Vara ha sopo eŕi hitevosahi na lelevosahi kama lo vaia nake, ha pa eŕi hitevosahia na vuana hitahu.”

*Tamlohi Matuvana La Sopo Rasu Iesu*  
(Lk 10.13-15)

<sup>20</sup> Ale Iesu mo tapulo hapuhi la taon atu sei mo lo vai na hina maŕurahi tavera hinira matan tamlohi hinira la ŕohu vara la tinaŕihi na nora hehe la mai isan God, Iesu mo vereaa mara, <sup>21</sup> “Kamim tamlohin Chorazin, ha pa lavi na talai sasati tavera, ale kamim tamlohin Bethsaida sohena, ha pa lavi na talai sasati tavera! Matan, vara la

hina maŕurahi nike na vaira isamim na nomim taon la pa lo malue na taon non Tyre peresi Sidon, tamlohira la pete posi tuai moiso la vano isan God, ale la vujangia hin posposi matan tuai sei, la lo ru na parat paki, ale la tau na patmakovi na patura. *Ezek 26.1-28.26*

<sup>22</sup> Pani na vereaa isamim, na rani mata aria tamlohin Tyre enia Sidon la pa malue i malum i jeu kamim. <sup>23</sup> Ale kamim tamlohin Capernaum ka ŕomi vara God i pa tahe kamim ha tikeli na tuka? Mo vono, ha pa sivo atano na varama mata mateia! Vara la hina maŕurahi atu sei la lo malue na nomim taon la pa lo malue na taon non Sodom, nake taon atu mo pa lo turu! *Gen 19.24-28*

<sup>24</sup> Pani na vereaa isamim, na rani mata aria tamlohin Sodom la pa malue i malum i jeu kamim.”

*Ha Mai Isaku Ha Mapu*  
(Lk 10.21-22)

<sup>25</sup> Ale hin rani atu Iesu mo vereaa mara,

“Enau na hasahasoho, Tamaku, Moli non tuka peresi na varama, matan ko jaroŕi la hinau tari nike isana tamlohi lelevosahi mata varama peresi na tamlohi la lavi na lelevosahi mata varama, pani ko vujangia isana tamlohi purongo. <sup>26</sup> He'e Tamaku, matan harihi mo lo usuri na nom masalo ŕomŕuhu.

<sup>27</sup> Tamaku mo sileau na hinau tari, ale mo sopo tea, pani enia hasena purongo mo levosahi Natuna. Ale

haratu purongo mo levosahi Tama, enia Natuna peresi la haratu Natuna mo opoia vara i vujangia isara.

<sup>28</sup> Vara ka malokoloko matan nomim tetehi mo puhoni hajavua, ha mai isaku, ale a pa tueni kamim, ha pa lavi na mapu varaŕuhu.

<sup>29</sup> Ha lavi na noku vujangi, ha lavia na maurimim, ale ha levosahi na malele isaku. Enau na malum, enau na ŕomatano, ale ha pa lavi na mapu varaŕuhu isaku. *Jer 6.16*

<sup>30</sup> Noku vujangi mo sopo puhoni, noku vavahinau mo salesale purongo.”

## 12

### *Retiusia Mata Sabbath* (*Mk 2.23-28; Lk 6.1-5*)

<sup>1</sup> Na rani mata Sabbath matea, Iesu mo lo hahau roto te isa wit. Ale nona tamlohi usuri la lo tapulo vesi roto na wit, ale la lo hanira. *Deut 23.25*

<sup>2</sup> Pani Pharisee lara la hitera, la vereea isan Iesu lara, “O to kilau vano, nom tamlohi usuri la lo vai na hinau matea mo sopo tataholo vara la vaia na Sabbath.”

<sup>3</sup> Iesu mo vereea isara mara, “Korong ka sopo lo evi na sava David peresi la haratu la lo toho peresia la vaia na rani la marohati. *1 Sam 21.1-6*

<sup>4</sup> Ale sohena sava mo unu hin ima ruru atu la lo lotu God ea, ale mo hani na pereti sei mo sopo tataholo vara enia teni nona tamlohi vara la hania matan enia mata pŕis hasera? *Lev 24.9*

<sup>5</sup> Teni korong ka sopo lo evi na Leu sohena sava na rani

Sabbath, na lolo ima lotu, pŕis na Temple la lo tope na Sabbath matan la sopo mapu matan la lo vai mamahuni na nora vavahinau, pani la pa sopo ori matana? *Num 28.9-10* <sup>6</sup> Na vereea isamim, matea mo lo toho peresi kamim mo tavera jea na Temple. <sup>7</sup> Ale vara ha pa lo levosahi na ŕaramin hinau sei, ‘Na opoi na posposi ŕomopoi, mo sopo malamalai!’ Ha pa sopo ari la haratu la sopo ori. *Hos 6.6*

<sup>8</sup> Matan Natun Tamlohi enia Moli mata Sabbath.”

### *Vujangi Mata Posposi Ruhu*

(*Mk 3.1-6; Lk 6.6-11*)

<sup>9</sup> Mo malue hin jara atu mo vano mo unu na nora ima lotu ea. <sup>10</sup> Ale tamlohi matea mo lo toho atu limana mo kuti. Ale la tamlohi atu la usia isana lara, “O pa tope na leu vara o vai mamahuni te tinapua na Sabbath teni mo vono?” La usia sohena matan vara la pa tuvaia hinia. <sup>11</sup> Iesu mo vereea isara mara, “Hare vonamim matea pulana sipsip matea mo jovi hin te koko na Sabbath, i pa sopo tauria i sau naŕihia? <sup>12</sup> Ka levosahia vara tamlohi mo aulu jea mo jeu na sipsip. Ale matana, mo ŕuhu vara ŕa vai na hina ŕuhu na Sabbath.”

<sup>13</sup> Moiso, mo vereea isan tamlohi atu mara, “O ŕirahi na limam.” Ale tamlohi atu mo ŕirahia, ale mo ŕuhu sohena tapala limana. <sup>14</sup> Pani Pharisee la malue atu la matavuhi na jara matea vara la aleale malele matan vara la pa vili-matei Iesu hinia.

*Iesu – Volitusi Non God*

<sup>15</sup> Pani Iesu mo levosahi na sava la lo vaia, ale mo malue hin jara atu. Vao tavera la usuria, ale mo vai mamahuni vevuhira na nora rojoa, <sup>16</sup> ale mo retileu vara la sopo vereuli na sava nakonako mo lo vaira. <sup>17</sup> Harihi, enia matan vara reti sei p̄rovet Isaiah mo vereia vara la pa masese mara,

<sup>18</sup> ‘O kilau vano!

Noku volitusi sei enia noku viŋoni,  
enia haratu na opoi jea sei mapuku mo avulahi tavera hinia.

A pa tau na Tanumeku hinia, ale enia i pa vereuli na noku posposi tataholo isana tamlohi ŋoŋoha.

*Isa 42.1-4*

<sup>19</sup> I pa sopo vas teni i ulo ŋilangi,

teni la pa sopo rongo na leona vara i lo hase tahea na malele tavera.

<sup>20</sup> Enia i pa malum, i pa sopo kame

te ere sei mo mahope moiso, teni i pa sopo vuni

te vara kandeli,  
i tikeli pongi atu vara i pa vaitataholoi na hinau tari,

<sup>21</sup> ale tamlohi ŋoŋoha tinatnapu

tari la pa lo ŋomtoho na hijana.’

*Iesu Mo Jeu Tiapolo*

(*Mk 3.20-30; Lk 11.14-23; 12.10*)

<sup>22</sup> Moiso, tamlohi hai la lavi na tamlohi matea tanume sasati matea mo unu hinia mo vaia mo matavuso mo mengo, ale la lavia mo mai isana, ale mo vai mamahunia

vara i eŋi retireti, ale mo eŋi kilau. <sup>23</sup> Moiso tamlohi tari la maŋurahi tavera hinia lara, “Korong haranike natu, enia mahapin David sei, haratu God mo viŋonia mata juriŋa teni mo vono?”

<sup>24</sup> Pani Pharisee lara la rongoa lara, “Tamlohi akerihi mo lo titiu naŋihi na tanume sasati na liman Beelzebul, supe nona tanume sasati tari!”

<sup>25</sup> Matan Iesu mo levosahi na ŋomira mo vereia isara mara,

“Vara na lolo jara matea supe la lo aseasehira hinia, i pa maroe, ale i pa sopo te taon tavera teni te vao ima vara i lo aseasehia hasena i pa eŋi turu. <sup>26</sup> Ale vara Setan mo lo titiu naŋihi na tanume sasati, enia mo lo aseasehia hasena. Ale jara atu mo lo tauri na suiha hinia i pa turu sohena sava? <sup>27</sup> Ale vara enau na lo titiu naŋihi na tanume sasati na suihan Beelzebul, ale na suihan hare natu te nomim tamlohi usuri la lo titiu naŋihira hinia? Matan mo sohena, enira la pa ari kamim. <sup>28</sup> Pani matan enau na lo titiu naŋihi na tanume sasati na suihan Tanumen God, ale mo ŋaramia vara suiha atu non God mata supe mo pete pala isamim moiso. <sup>29</sup> Ale sohena sava natu, tea i eŋi unu na iman te tamlohi suiha haŋea vara i vanaho te nona hinahinai hinia, pani vara mo sopo liholatia tiroma? Ale vara i liholatia i pa eŋi tivesi vevuhi na imana. <sup>30</sup> Haratu mo sopo turu peresiau, enia mo lo hasena vaia mo meresahi isaku, ale haratu mo sopo

reve takonahi na tamlohi peresiau, enia mo lo levuti jalajalaira.

<sup>31</sup> Matana, na lo vereea isamim vara hehe tari peresi na reti sati hin God tari, God i pa řomira, pani vara tea mo vere lejileji na Tanumena vara enia Tiapolo sohen ka lo vaia, God i pa sopo eři řomia. <sup>32</sup> Ale haratu mo lo vere lejileji Natun Tamlohi, God i pa řomia, pani haratu mo lo vere lejileji Tanume Tapu, enia, God i pa sopo eři řomia nake teni hin na pongi mo lo mai.

*Nom Reti Mo Pisuhiho  
(Lk 6.43-45)*

<sup>33</sup> Vipahai matea o eři hite usuria na namana, o vai vipahai atu i řuhu, namana i pa řuhu, o vai vipahai atu i sati, namana la pa sasati. <sup>34</sup> Kamim natu mata sasati! Ha pa eři vere te hinau řuhu sohen sava matan kamim ka sasati, matan sava ka lo vereea mo vujangi na sava mo lo toho na mapumim. <sup>35</sup> Tamlohi řuhu matea mo pa lo vai na hina řuhu mata nona posposi řuhuřuhu, ale tamlohi sasati matea mo pa lo vai na hina sati mata nona posposi sasati. <sup>36</sup> Na vereea isamim, na rani tavera mata aria, tamlohi tari la pa řarami na nora reti rongorongo vono tari sei la verera moiso, <sup>37</sup> matan sava retireti ka verera, la pa vujangia vara ka tataholo na nahon God, ale matan sava retireti ka verera, la pa vujangia vara ka hehe na nahon God.”

*Matamata Non Jonah  
(Mk 8.11-12; Lk 11.29-32)*

<sup>38</sup> Moiso tatua tamlohi vujangi mata leu peresi na Pharisee, la řaramia lara, “Tija, kama opoia vara kama hite te matamata mařurahi isam!”

<sup>39</sup> Pani Iesu mo řaramira mara,

“Tamlohi nake, enira tamlohi sasati, la vaivaileu peresi na tinapua mo lahi moiso, la lo ale na matamata, pani matamata atu a pa silea isara enia sohen matamata atu God mo vaia hin přovet Jonah. <sup>40</sup> Sohen Jonah mo lo toho na lolo pangen maji tavera atu rani mo tolu peresi na vutepongi mo tolu, enau sohen, Natun Tamlohi, a pa toho na lolo lepa mata rani i tolu peresi na vutepongi i tolu. <sup>41</sup> Mara Nineveh la pa sauteterahi na rani aria tavera peresi pina nike, ale la pa vereea vara mo hehe, matan enira la posi na maurira mata retivujavujangi non Jonah, pani ka levosahia, matea mo aulu jea hin Jonah mo lo toho nike, pani ka sopo rasua.

*Jonah*  
<sup>3.5</sup> <sup>42</sup> Vesupe matan Sheba i pa sauteterahi na rani aria tavera peresi pina nike, ale i pa sile na talai isana, matan enia mo mai na jara asau na varama vara i tapurongo na reti lelevosahi non Solomon, ale nake matea mo aulu mo jeu Solomon mo lo toho nike.  
*1 Ki 10.1-10*

*Posposi Tanume Sasati  
(Lk 11.24-26)*

<sup>43</sup> Hin rani atu vara te tanume lumiha mo malue hin te tamlohi, mo lo vano roto na jara mamasa vara i vilei te jara mapu, pani mara mo sopo vilei tea, <sup>44</sup> mo vereea mara, 'A pa mele hilu, a vano na ima na tai ea'. Ale mara mo pala mo tapai ima atu mo vuruvuru, mo hitea vara la tivesia, ale la tau tataholoi na hinau tari na jarara. <sup>45</sup> Ale nake, mo vano vara i lavi na tanume lumiha tupu limaravrua tinapua sei la mele sati la jeua. La mai, ale la unu, la lo toho atu. Na lo vereea vara i pa sati jea isan tamlohi atu i jeu tiroma. Ale i pa sohen haratu isan pina sasati nike, sei la lo ŋohu hiniau!"

*Tinan Iesu Peresi Na Tasina*  
(Mk 3.31-35; Lk 8.19-21)

<sup>46</sup> Mara mo pa lo retireti isana tamlohi, ale vahatea purongo, tinana peresi na tasina la lo turu na jingo ima, la lo usia vara la eŋi retireti peresia, <sup>47</sup> ale tea mo vereea isana mara, "O kilau vano sevano, tinam peresi na tasim la turu na jingo ima, la opoia vara la retireti peresiho."

<sup>48</sup> Pani Iesu mo ŋarami tamlohi atu mara, "Hare natu, enia tinaku? Ale hare natu, enia tasiku?" <sup>49</sup> Mo ŋirahi na limana mo vano tataholo isana nona tamlohi usuri mo vereea mara, "La haranike, enira tinaku peresi na tasiku! <sup>50</sup> Matan hare mo lo vai na masalon Tamaku na tuka enia tasiku, vetasiku, ale tinaku."

## 13

*Tamlohi Hapoŋahi Matea*  
(Mk 4.1-9; Lk 8.4-8)

<sup>1</sup> Hitahu hin rani atu, Iesu mo malue na ima, ale mo sivo mo sakele na pahisa tasi. <sup>2</sup> Ale matan vao tavera la mai la lo turu porotia, Iesu mo vele na boti matea mo sakele hinia, ale vao tari sei la lo turu na oneone. <sup>3</sup> Moiso mo verera na hinau matuvana na titileu mara, "Tamlohi hapoŋahi matea mo vano vara i hapoŋahi te piri. <sup>4</sup> Mo pa lo hapoŋahi na piri, tatuara la jovi na malele, ale maji avuavu la mai la hani vevuhira. <sup>5</sup> Tatua piri la jovi na vatuvatu, lepa mo tavinvin purongo, ale la tuvu vahatea matan mo tavinvin, <sup>6</sup> pani alo mara mo vele mo sulira, ale la mahoa matan la sopo wariha. <sup>7</sup> Tatua piri tinapua la jovi na livuha vipahai ngaŋngaŋiha, ale la vipahai ngaŋngaŋiha atu la ulua la punira. <sup>8</sup> Tatua piri tinapua la jovi na lepa ŋuhu la namaha, hai la tikeli vaha ngavu sangavulu (100) hai vaha ngavulu limarave (60) hai vaha ngavulu tolu (30) hin haratu mo lo hapoŋahira tiroma. <sup>9</sup> Haratu mo peroha i tapurongo!"

*Retusia Matan Titileu Atu*  
(Mk 4.10-12; Lk 8.9-10)

<sup>10</sup> Nona tamlohi usuri la mai la vereea isana lara, "Mata sava ko lo retireti na titileu isara?"

<sup>11</sup> Moiso mo ŋaramira mara, "Isamim God mo majinga vara ha pa levosahi na hina luhu matan mauri

atu God mo aulu hinia, pani isara, mo sopo majinga.

<sup>12</sup> Matan isan haratu mo lavi te lelevosahi na mapuna, God i pa sile na lelevosahi i lo masurere isana, pani isan haratu mo sopo te lelevosahi na mapuna, sava hinau mo rongoa, i pa tihai. <sup>13</sup> Na lo retireti na titileu isara matan harihi, matan la lo hitea, pani la pa sopo rongovosahia, la lo rongoa, pani la pa peropero, ale la pa sopo levosahia.

<sup>14</sup> Varaʻuhū, sava Isaiah mo reti mangovia hinia moiso mo masese hinira vara,

‘Ha pa rongoa,

pani ha pa sopo eʻi levosahia, ale ha pa hitea,

pani ha pa sopo eʻi rongovosahia.

<sup>15</sup> Matan mapura la mai la prapasa,

perora la peroputu,

ale matara la pelati,

matan vara la pa sopo hite na matara, teni rongo na perora,

ale la rongovosahi na mapura

matan vara la eʻi posi la mai isaku

matan vara a vai mamahuni

na mapura na nora rojoa.’ *Isa 6.9-10*

<sup>16</sup> Pani la matamim sei, la avulahi tavera mata sava la eʻi hitea, ale peromim la eʻi rongovosahi na sava la lo rongoa. <sup>17</sup> Varaʻuhū na vereā isamim, tuai pʻrovet matuvana peresi na tamlohi tatholo la opoia vara la eʻi hitea na sava ka lo hitea, pani la sopo hitea, ale vara la rongo

na sava ka lo rongoa, pani la sopo rongoa.

*Iesu Mo Vereuli Titileu Atu (Mk 4.13-20; Lk 8.11-15)*

<sup>18</sup> Ha tapurongo na ʻrarami titileu matan tamlohi hapoʻahi atu: <sup>19</sup> Vara tea mo rongo na reti matan mauri atu God mo aulu hinia, pani mapuna mo sopo levosahia, ale Tiapolo mo mai mo reve naʻrihi na sava mo lavoa na mapuna. Haranike enia piri sei mo lavoa na malele. <sup>20</sup> Hin haratu mo lavoa na lepa ʻrilangi, haranike enia haratu sei mo rongo na Retiʻuhū, ale vahatea purongo mo lavia na avulahi, <sup>21</sup> pani matan mo sopo te nona jara turu, mo turu makomona purongo, ale vara rani ʻrilangi mo mai teni la tipahia mata Retiʻuhū, vahatea purongo i pa rovo na nona rasua. <sup>22</sup> Hin haratu mo lavoa na livuha vipahai ngaʻngaʻriha, enia haratu mo rongo na Retiʻuhū, pani masalo mauri peresi na ʻromʻromi tavgav mo turuhoro na Retiʻuhū, ale mo sopo namaha. <sup>23</sup> Pani hin haratu mo hapoʻahia na lepa ʻruhu, enia haratu mo rongo na Retiʻuhū, ale mo rongovosahia. Enia mo namaha mo tavera, hin tea i pa tikeli vaha ngavu sangavulu (100x) hai mo tikeli vaha ngavulu limarave (60x) ale hai mo tikeli vaha ngavulu tolu (30x) hin haratu mo lo lavoa.”

*Titileu Mata Pongi Hitahu*

<sup>24</sup> Mo mele verera na titileu tinapua matea mara, “Mauri

atu God mo aulu hinia, mo sohena tamlohi matea mo lo hapoʻahi na piri ʻuhu na lolo isana, <sup>25</sup> pani na rani nona tamlohi voko la juruvi ʻromaliho, nona meresahi mo mai mo hapoʻahi na piri ʻuvu hin isa wit atu moiso mo mele rovo.

<sup>26</sup> Ale lara la tuvuvu, ale la namaha ʻuvu sohena la pala.

<sup>27</sup> Moiso volitusi non tamlohi tavera mata ima la mai isana lara, ‘Tamlohi tavera, avei, kama ʻrom vara ko hapoʻahi na piri ʻuhu purongo na isam, pani sohena sava natu, ʻuvu la tuvuvu hinia?’

<sup>28</sup> Ale mo vere isara mara, ‘Noku meresahi matea mo vai hinau sei.’

Ale nona volitusi lara, ‘Ale ko opoia vara kama vano kama saputira?’

<sup>29</sup> Pani mo vere mara, ‘Mo vono! Mo sopo ʻuhu vara ha saputira matan ha pa efi saputi na wit peresira.

<sup>30</sup> Ha tinarihira la ulua jara matea vavano i tikeli na rani asitauni. Na rani asitauni a pa vere na tamlohi asitauni vara la saputi na ʻuvu tiroma, ale la otira matan vara la pa sulira, pani la pa takonahi na wit na noku ima wit.’ ”

### *Pira Paka*

(Mk 4.30-32; Lk 13.18-21)

<sup>31</sup> Mo mele vere na titileu tinapua matea isara mara, “Mauri atu God mo aulu hinia mo sohena piri paka matea sei tamlohi matea mo lavia mo hapoʻahi na isana.

<sup>32</sup> Piri atu enia mo rihirihi mo jeu na piri tari, pani vara mo ulua, mo mai mo tavera mo jeu na vipahai tari,

ale maji avuavu na masapa la mai la vai na taura na rangarangana.”

<sup>33</sup> Mo mele vere na titileu tinapua matea isara mara, “Mauri atu God mo aulu hinia mo sohena isi sei haʻai matea mo lavia, ale mo hoia na flaua vavano isi sei mo vaia mo sohi.”

### *Mo Vujangira Na Titileu*

(Mk 4.33-34)

<sup>34</sup> Hinau tari nike, Iesu mo vere isan vao atu na titileu: varaʻuhu, mo sopo vere te hinau hatea isara vara mo sopo vere na titileu.

<sup>35</sup> Harihi mo maʻivisi na sava pʻovet la vere tuai sei vara, ‘A pa vujangi na tamlohi na titileu,

a pa vereuli na sava la luhu

na tapulo varama mo tikeli nake.’

### *Psa 78.2*

<sup>36</sup> Ale mo malue hin vao atu mo unu na ima. Moiso nona tamlohi usuri la mai isana lara, “O to vere mamahuni kamam na titileu mata ʻuvu hin isa atu.”

<sup>37</sup> Iesu mo ʻaramira mara, “Haratu mo lo hapoʻahi na piri ʻuhu enia Natun Tamlohi. <sup>38</sup> Isa sei enia varama, moiso piri ʻuhu enia la haratu sei la lavi mauri atu God mo aulu hinia, ale ʻuvu atu enia la haratu sei la tamlohi non haratu mo sasati, <sup>39</sup> ale meresahi atu mo lo hapoʻahira, enia Tiapolo. Asitauni enia pongi hitahu, ale tamlohi asitauni enira angelo.

<sup>40</sup> Sohena la saputi na ʻuvu, ale la sulira na hapu, i pa sohena na pongi hitahu.

<sup>41</sup> Natun Tamlohi i pa ʻule



na nona angelo, ale la pa lavi naŕihi na hinau tari sei la lo vai na tamlohi la hehe peresi la haratu tarea la lo tope na leu na lolo jara sei enia mo aulu hinia,<sup>42</sup> ale la pa pulahira la sulira hin jara atu mata hapu. Hin jara atu, la pa tangi, ale la pa ngaŕngaŕori na huŕura na rongohaji tavera.<sup>43</sup> Moiso haratu la tataholo la pa mera sohena alo hin mauri atu na suihan Tamara. Haratu la peroha, ha tapurongo!

#### *Titileu Mata Tavtav Matea*

<sup>44</sup> Mauri atu God mo aulu hinia mo sohena tavgav tavera matea, tamlohi matea mo jarohia na lepa matea, ale tamlohi tinapua matea mo tapaia, ale mo mele tavuhoroa. Moiso mo avulahi tavera, mo vano mo haŕehi vevuhi na nona hinahinau matan vara i eŕi voli lepa atu.

#### *Huŕutavila Ruhuŕuhu Matea*

<sup>45</sup> Ale mele vahatea, mauri atu God mo aulu hinia mo sohena tamlohi aŕeaŕehi matea mo lo aleale huŕutavila ŕuhu,<sup>46</sup> ale enia mo vilei na huŕutavila matea mo ruhuŕuhu jea, mo vano mo haŕehi vevuhi na nona hinahinau, ale mo volia nona.

#### *Titileu Mata Tara Matea*

<sup>47</sup> Ale mele vahatea, mauri atu God mo aulu hinia mo sohena tara sei la pulahia na tasi, ale maji tinatinapua tari la kali hinia.<sup>48</sup> Mara mo maŕivi, tamlohi la reve hosohia, ale la sakele la viŕoni naŕihi na hina ŕuhu la sohonira na tanga, pani haratu

la sati la pulahira.<sup>49</sup> I pa sohena na pongi hitahu. Angelo la pa mai la asehi la haratu la sasati hin la haratu la tataholo,<sup>50</sup> ale la pa pulahira na jara mata hapu. Hin jara atu, la pa tangi, ale la pa hatihati na huŕura.

<sup>51</sup> Ka lo rongovosahi la hinau sei?"

La ŕaramia lara, "He'e."

<sup>52</sup> Ale mo vereea isara mara, "Ale matana, tamlohi vujangi mata leu tari sei la lavi na lelevosahi mata usuri mauri atu God mo aulu hinia, enira la pa sohena tamlohi tavera mata ima matea sei mo lavi naŕihi na nona tavgav vara i vujangira isana tamlohi, hina paro peresi na hina tuai."

#### *Mara Nazareth La Rohu Hinia*

(Mk 6.1-6; Lk 4.16-30)

<sup>53</sup> Iesu mara mo isoiso hin la titileu atu, mo malue hin jara atu,<sup>54</sup> mo mai na jarana mo vujangira na nora ima lotu, ale la maŕurahi hinia lara, "Tamlohi nike, mo lavi na nona lelevosahi epu, mo pa lavi na suiha vara i vai na hina ruhuŕuhu epu?"<sup>55</sup> Pani enia mo sopo natun tamlohi tapatu atu? Ale tinana la tovia Mary, ale tasina sei, James, Joseph, Simon peresi Judas.<sup>56</sup> Ale vetasina tari la lo toho peresiŕa nike, sava jara natu, tamlohi nike mo pa lavi na suiha vara i vai la hinau sei hinia?"

<sup>57</sup> Ale la lo ŕohu hinia, pani Iesu mo vereea isara mara, "Pŕovet matea i pa sopo eŕi lavi na ololo na jarana teni na lolo imana."

58 Ale mo sopo vai te hina řuhuru matuvana ea matan la sopo rasua.

## 14

*John Tamlohi Paptijo Mo Mate*

(Mk 6.14-29; Lk 9.7-9)

1 Hin rani atu supe rihirihi Herod, mo rongo na roroan Iesu, 2 ale mo vereea isana nona volitusi mara, "Haranike enia John tamlohi paptijo sei! Enia mo mele sauteterahi na mateia, ale mo eři vai la hina mařurahi sei matana." 3 Matan Herod natu, mo tauri John, ale mo pesia, ale mo taua na ima řilangi matan narouna Herodias, naroun tasina Philip, 4 matan John mo lo vereea isana mara, "Mo sopo tataholo vara o lavia naroum." 5 Hina purongo vara mo opoia vara i vilimateia, mo matahuni na tamlohi matan enira la rasua vara John enia přovet matea.

6 Pani na rani pongi vora non Herod mo mai, venatun Herodias mo velu na naho vao ea mo vai Herod mo avulahi tavera, 7 matana, enia mo vai na retitauhi řilangi matea vara i pa silea na sava hinau mo usia isana. 8 Tinan hařarihi atu mo retireti patuna, ale hařarihi atu mo vereea mara, "O sileau na patun John tamlohi paptijo na pusa peleti." 9 Supe Herod mo rongo mo sati, pani matan nona retitauhi na naho vao, mo riteileu vara la vaia. 10 Mo řule na nona tamlohi la tai roto na řalon John na ima řilangi, 11 ale la lavi na patuna na peleti

matea la silea isan hařarihi atu, ale mo lavia vano isan tinana. 12 Tamlohi usuri non John la mai la lavi na tarapena, ale la tavunia, ale la vano la vereea isan Iesu.

*Mo Vahani Na Vao Tamlohi*

(Mk 6.30-44; Lk 9.10-17; Jn 6.1-14)

13 Iesu mara mo rongoa, mo malue mo vano mo vele na boti matea, mo vano na jara hasetoho matea vara i lo toho hasena. Pani na rani vao tamlohi lara la rongoa la malue na vanuara la hahau alea. 14 Mara mo sahe na jarauta, mo hite na vao tavera matea, ale mo řomopoiri, ale mo vai mamahuni na nora tamlohi rojoa.

15 Ale mo lo ravravi nona tamlohi usuri la mai isana la vereea lara, "Jara nike, enia jara hasetoho matea, ale pongi mo lo mai. O řule vao sei la vano hin te vanua vara la voli te hara hinau matara hasera."

16 Pani Iesu mo vereea mara, "Mo vono, la lo toho, kamim ha vahanira."

17 La vereea isana lara, "Kama lo lavi na pereti mo lima purongo peresi na maji mo rua."

18 Ale mo vereea isara mara, "Ha lavira la mai isaku." 19 Ale mo riteileu isan la vao atu vara la sakele na řuvuřuvu, ale mo lavi la pereti atu mo lima peresi la maji atu mo rua, mo tařa sahe aulu na tuka mo hasohaso God, ale mo vere meje matara, ale mo tope la pereti atu mo silea isana nona tamlohi usuri, ale nona tamlohi usuri la silea isan la

vao atu. <sup>20</sup> Tamlohi tari la hanhani la masu. La sohoni na sope hanhani na tanga mo sangavulu romana mo rua la marivi. <sup>21</sup> Ale la haratu la lo hanhani enira mariviti i tikeli tari vaha lima (5,000) haratu la sopo evi na haʻai peresi na natuvarihhi.

*Iesu Mo Hahau Na Pusa Tasi*  
(Mk 6.45-52; Jn 6.15-21)

<sup>22</sup> Vahatea purongo, mo aji na nona tamlohi usuri vara la vano tiroma hinia na tavul tasi, ale mo ʻrule vao atu la vano karahi. <sup>23</sup> Ale Iesu mara mo ʻrule vao atu la vano moiso, mo vele sahe na vutivuti matan vara i usiuseria hasena. Ravravi mo mai enia hasena mo lo toho atu, <sup>24</sup> pani botira nakerihhi mo vano asau moiso na jarauta, suhusuhu la lo vilia matan la lo songahi na langi.

<sup>25</sup> Ale majou rani mo lo vele, Iesu mo mai isara, mo hahau na pusa tasi. <sup>26</sup> Pani na rani nona tamlohi usuri lara la hitea mo lo hahau na pusa tasi, la have na matara mo tatavera lara, “Eh, tanume matea!” la ulo na tangi matan la matahu.

<sup>27</sup> Pani vahatea purongo Iesu mo reti isara mara, “Ha romʻilangi! Enau sei, ha sopo matahu!”

<sup>28</sup> Moiso Peter mo ʻaramia mara, “Tija, vara engko sei, o retileu isaku vara a mai isam na pusa tasi.”

<sup>29</sup> Iesu mo vereaa mara, “O mai!” Ale Peter mo malue na boti mo hahau na pusa tasi mo lo vano isan Iesu.

<sup>30</sup> Pani mara mo hite na langi mo sere ʻilangi, ale mo

matahu, mo tapulo marun na tasi, mo ulo mara, “Tija, o juriu!”

<sup>31</sup> Vahatea purongo Iesu mo sohai na limana, ale mo tauria, mo vereaa isana mara, “Engko nom rasu mo rihirihhi hajavua, mata sava ko rom rua?” <sup>32</sup> Ale lara la mele vele na boti, langi atu mo moti.

<sup>33</sup> Haratu la lo toho na boti la lotua lara, “Varaʻuhu, engko Natun God!”

*Tamlohi Rojo Gennesaret*  
(Mk 6.53-56)

<sup>34</sup> Ale lara la vano na tavalu tasi, la hoso na jara Gennesaret. <sup>35</sup> Ale tamlohi hin jara atu lara la hitevosahia, la sohai na reti mo ʻilahi jara atu vara la lavi na nora tamlohi rojoa tari la mai isana, <sup>36</sup> ale la usia ʻilangi vara la pa tikeli purongoi na pingo nona ruru. Ale enira mo isoiso atu sei la tikelia la ruhu.

## 15

*Vujangi Nona Vajiahara*  
(Mk 7.1-13)

<sup>1</sup> Moiso, Pharisee peresi na tamlohi vujangi mata leu la mai isan Iesu la tai Jerusalem lara, <sup>2</sup> “Mata sava nom tamlohi usuri la lo tope na posposi nona vajiaha matan tuai? Matan enira la sopo hoje na limara tiroma moiso la pa hanhani.”

<sup>3</sup> Iesu mo ʻaramira mara, “Ale mata sava ka lo tope na retileu non God matan ka lo usuri na posposi tamlohi? <sup>4</sup> Matan God mo retileu mara, ‘O oloolo hin tamam peresi tinam!’ Ale mara, ‘Hare mo reti sati hin tamana teni

tinana, i pa mate matana.' *Exo 20.12; Exo 21.17* <sup>5</sup> Pani ka vereea kara, 'Mo tataholo vara tea i vereea isan tamana enia tinana vara sava tuetueni vara i efi silea isara, mo pete silea isan God moiso.'

<sup>6</sup> Ale enia mo sopo sile na ooloo isan tamana matan haratu. Ale matan ka lo usuri na posposi tamlohi, ka řohu na reti non God. <sup>7</sup> Kamim tamlohi tapnetano! Isaiah mo retimangovi varařuhu hin kamim na rani mo vereea mara,

<sup>8</sup> 'La tamlohi nike, la lo ooloo hiniau na hurira purongo, pani mapura la lo toho asau hiniau;

<sup>9</sup> la lo vai vono na nora lotu, la lo vujangi na nora retileu lara retileu non God.' " *Isa 29.13*

*Tamlohi La Lumihia Mata Hehe*  
(*Mk 7.14-23*)

<sup>10</sup> Ale Iesu mo tovi vaø atu la mai isana mo vereea isara mara, "Ha tapurongo, ale ha levosahia! <sup>11</sup> Sava mo unu na jingom mo sopo vaiho o lumihia, pani sava mo malue na jingom, enia mo vaiho ko lumihia."

<sup>12</sup> Moiso nona tamlohi usuri la mai isana la vereea lara, "Avei, ko sopo levosahia vara Pharisee la rongo mo sati na sava ko lo vereea?"

<sup>13</sup> Mo řaramira mara, "Vipahai tari haratu Tamaku na tuka mo sopo lavora i pa saputi nařihira. <sup>14</sup> Ha sopo sahara vano isara. Enira la matavuso. La lo tiroma na tamlohi, pani la matavuso. Vara matavuso i tiroma na

matavuso, la pa jovi hin te moru."

<sup>15</sup> Pani Peter mo vereea isana mara, "O to vere mamahuni titileu sei isamam."

<sup>16</sup> Ale mo řaramia mara, "Kamim sohena, ka sopo lo levosahi? <sup>17</sup> Ka sopo levosahia vara sava ka hania mo unu na pangemim, ale ka mele hoti hinia? <sup>18</sup> Pani reti mo lo malue na jingo mo tapulo malue na mapu tamlohi, ale harihi mo vai na tamlohi mo lumihia. <sup>19</sup> Matan hiniau sohen harihi la lo malue na mapu tamlohi: řomřomi sasati, vilimatei, vaivaileu peresi na tinapua mo lahi moiso, posposi lumihia, vavanaho, tuetueni halu, reti sati na hija tamlohi. <sup>20</sup> La hiniau sei la vai na tamlohi mo lumihia. Pani vara tea i hanhani peresi na limana mo sopo hojea, mo sopo vaia i lumihia."

*Rasua Non Hařai Mara Cana*  
(*Mk 7.24-30*)

<sup>21</sup> Ale Iesu mo malue hin jara atu, mo vano na jara tavera matan Tyre enia Sidon. <sup>22</sup> Ale vahatea hin jara atu, hařai mara Cana matea mo pala mo lo tangi mara, "O řomopoiiau Moli, mahapin David! Tanume sasati matea mo sohoni venatuku mo vai komokomoa!"

<sup>23</sup> Pani mo sopo řaramia hin te reti hatea. Ale nona tamlohi usuri la mai la usia řilangi isana lara, "O řulea i malue matan mo lo tangi usuriřa."

<sup>24</sup> Mo řaramia mara, "Haratu mo řuleau, mo

řuleau purongo mata sipsip matan Israel sei la jalio.”

<sup>25</sup> Pani hařai atu mo mai mo papaohi na nahona mara, “Moli, o tueniau.”

<sup>26</sup> Ale Iesu mo řaramia mara, “Mo sopo tataholo vara tea i lavi nařihi na pereti hana natuvarihi i silea isana viriu.”\*

<sup>27</sup> Hařai atu mara, “He'e Moli, pani viriu la lo hani na utauta pereti sei la lo jovjovi na tep non nora tamlohi tavera.”

<sup>28</sup> Moiso Iesu mo řaramia mara, “Na vere, engko hařai matea, nom rasua mo tavera jea. I pa sohena sohen ko opoia.” Ale vahatea purongo, venatuna mo řuhu.

### *Rojoa Nona Tamlohi La Tihai*

<sup>29</sup> Iesu mo mele vano mo hahau na pahisa tasin Galilee. Mo sahe aulu na vutivuti, ale mo lo sakele ea. <sup>30</sup> Moiso vao tavera mo mařivi la mai isana peresi na tamlohi hariju, matavuso, tamlohi papao, la haratu la mengo, ale vao matuvana tinapua, ale la taura na palona, moiso mo vai mamahunira, <sup>31</sup> ale vao atu řomira mo sopo sakele matan mo vai na mengo la retireti, haratu la papao la řuhu, haratu la hariju la hahau, ale matavuso la kilau moiso vao atu la mařurahi tavera matana, ale la sile na hasohaso isan God matan Israel.

*Mo Vahani Na Vao Tavera  
(Mk 8.1-10)*

<sup>32</sup> Moiso Iesu mo tovi na nona tamlohi usuri la mai isana ale mara, “Enau na řomopoi la vao nike, matan la lo toho peresiau mata rani mo tolu moiso, ale mo sopo te hara hinau, ale na sopo opoia vara a řulera la mule marohati, vara i vono la pa matemate na malelera.”

<sup>33</sup> Ale nona tamlohi usuri la vere a isana lara, “Ra pa efi lavi te pereti i tataholo hin vao tavera nike na jara hase-toho sohen harihi epu?”

<sup>34</sup> Moiso Iesu mara, “Ka lo lavi na pereti mo visa?”

Lara, “Mo limaravrva peresi na maji vavarihi mo visalete purongo.”

<sup>35</sup> Moiso mo vere vao atu vara la saksakele na lepa, <sup>36</sup> ale mo lavi la pereti atu mo limaravrva peresi na maji moiso, mo vere meje isan God, ale mo topera, ale mo silera isana nona tamlohi usuri, ale tamlohi usuri la silera isan la vao atu.

<sup>37</sup> Ale enira mo isoiso la hanhani la masu. Moiso la sohoni na sope hanhani na tanga mo limaravrva la mařivi. <sup>38</sup> Evi tamlohi purongo la hanhani mo tikeli tari vaha vati (4,000) la sopo evi na hařai peresi na natuvarihi. <sup>39</sup> Moiso hitahun haratu, mo řule la vao atu la mlemle, mo vele na boti matea, ale mo vano na jara Magadan.

## 16

*La Opoi Na Matamata  
(Mk 8.11-13; Lk 12.54-56)*

\* 15:26: Jew la tovi na tamlohi řořoha 'viriu'.

<sup>1</sup> Ale Pharisee peresi na Sadducee la mai isana vara la vaihitea. La usia vara i vujan-gira hin te matamata tavera matan na tuka.

<sup>2</sup> Iesu mo řaramira mara, "Vara mo ravravi, kara 'Taro i pa řuhu matan telangi mo hahara!' <sup>3</sup> Ale na řalavuho, 'Taro i pa sati nohorihimatan telangi mo hahara, ale mo řořoha!' Ka lo levosahia vara taro i pa sohena sava matan ka lo kilau na masapa, pani ka sopo eři hitevosahi na matamata matan rani nike ka lo toho hinia? <sup>4</sup> Pina sasati nike, mo tamlohi vaivaileu, mo lo aleale matamata, pani i pa sopo lavi te matamata tinapua, pani matamata sei mo mase isan Jonah tuai." Moiso mo malue isara mo vano.

*Pharisee Peresi Na Sadducee*  
(Mk 8.14-21)

<sup>5</sup> Nona tamlohi usuri lara la kakau na tavalu tasi, la pa řomřomia vara la sopo lavi te pereti. <sup>6</sup> Ale Iesu mo vereea isara mara, "Ha sopo řomaliho vara ha lo kilau mata isi sasati nona Pharisee peresi na Sadducee."

<sup>7</sup> Moiso la tapulo sorahia isara hasera lara, "Eh, korong mo pa vereea matan enřa řa sopo lavi te pereti teni?"

<sup>8</sup> Pani Iesu mo levosahi na sava la lo vereea, ale mo vereea mara, "Kamim akerihi, nomim rasu mo rihirihimatan hajavua. Mata sava ka lo sorahia isamim hasemim vara mo sopo te pereti? <sup>9</sup> Ka sopo lo levosahia? Ka mele řomaliho hin la pereti atu mo

lima matan vao atu mo tari vaha lima (5,000) ale ka sohoni na sope hanhani na tanga mo visa hin rani atu? <sup>10</sup> Teni ka řomaliho hin pereti atu mo limaravrua matan vao atu mo tari vaha vati (4,000) ale

tanga mo visa ka lavia isara? <sup>11</sup> Mo sohena sava natu, ka sopo levosahia vara enau na sopo retireti na pereti? Ha lo kilau na isi nona Pharisee peresi na Sadducee."

<sup>12</sup> Ale la pa levosahia natu, vara mo sopo vereea vara la lo kilau mata isi mata pereti, pani mata vujangi nona Pharisee peresi na Sadducee.

*Iesu Enia Hare*  
(Mk 8.27-30; Lk 9.18-21)

<sup>13</sup> Ale na rani Iesu mo mai na jara matan Caesarea Philippi, mo usi na nona tamlohi usuri mara, "Kamim ka lo rongo na tamlohi la lo vereea vara Natun Tamlohi enia hare?"

<sup>14</sup> Moiso lara, "Hai la lo vereea vara John tamlohi pap-tijo, tatuara lara Elijah, ale hai lara Jeremiah teni vonan la přovet atu matea."

<sup>15</sup> Mo vereea isara mara, "Pani kamim ka lo vereea vara enau hare?"

<sup>16</sup> Simon Peter mo řaramia mara, "Engko natu pa Křisto atu, Natun God sei mo mauri!"

<sup>17</sup> Ale Iesu mo řaramia mara, "Simon natun Jonah, God mo leřuhu hiniho matan mo sopo tea hin varama nike i vujangia isam, pani Tamaku na tuka hasena mo vujangia isam. <sup>18</sup> Ale na vereea isam, engko Peter sei řaramin

hijam enia vatu, ale hin pulo vatu nike, a pa voro noku vao kalesia, hina purongo vara suiha non varama mata mateia mo řilangi, pani i pa sopo eři turuhoroa. <sup>19</sup> A pa sileho na kia matan mauri atu God mo aulu hinia, ale sava hinau ko horoa na varama, God na tuka mo horoa moiso, ale sava hinau ko tinařihia na varama, God na tuka mo tinařihia moiso.” <sup>20</sup> Moiso, mo retileu isana nona tamlohi usuri vara la sopo sorahia isan tea vara enia natu, Kristo atu.

*Iesu Mo Vere Na Nona Mate*  
(Mk 8.31-9.1; Lk 9.22-27)

<sup>21</sup> Mo tapulo hin rani atu natu, Iesu mo tapulo vujangi na nona tamlohi usuri hinia vara enia i pa vano Jerusalem, ale i pa lavi na rongohaji isana tamlohi aulu peresi na moli nona prıs peresi na tamlohi vujangi mata leu, ale la pa vilimateia, ale hitahu na hatolu rani i pa mele turu.

<sup>22</sup> Ale Peter mo tauri na li-mana mo revea vano hasena, mo reti řilangi isana mara, “Moli, mo vono! Hinau atu i pa sopo eři masese isam!”

<sup>23</sup> Pani Iesu mo posi mo vereea isan Peter mara, “Setan, na sopo opoia vara a hiteho! Engko ko lo turuhoroau, matan engko ko sopo tau na řomim na hinahin角度 non God, pani na hinahin角度 nona tamlohi.”

\* **16:24:** talopeilopei: Iesu mo vereea vara tamlohi rasua sei la sopo avulahi vara la turu řilangi na rani tamlohi la rohu hinira matan la lo usuri Iesu teni la lavi na rani řilangi matan la lo ololoo na nona reti, enira la sopo eři vereea vara enira nona tamlohi.

<sup>24</sup> Moiso Iesu mo vereea isana nona tamlohi usuri mara, “Vara tea mo opoia vara i usuriau, i pa horo na masalona hasena, i lavi na nona talopeilopei, ale i usuriau.\* <sup>25</sup> Matan haratu mo opoi na maurina mo tavera jea, i pa vaitihaia, pani haratu mo řohu na maurina matak, enia i pa tapai mauri varařuhu atu. <sup>26</sup> Sava hinau mo řuhu isan te tamlohi vara i lavi na hinau tari na varama, pani i vaitihai na maurina? Teni sava hinau natu, tamlohi i eři silea vara i mele lavi na maurina? <sup>27</sup> Matan Natun Tamlohi i pa mai peresi na nona angelo na hasohason Tamana, moiso i pa voli tataholoi na tamlohi hatehateahi mata sava mo vaia na varama. *Psa 62.12; Rom 2.6*

<sup>28</sup> Varařuhu na vereea isamim, tatuamim la lo turu nike nakerihi, la pa sopo eři mate vavano la hite Natun Tamlohi i mai na nona suiha mata Supe.”

## 17

*Epen Iesu Mo Posi*  
(Mk 9.2-13; Lk 9.28-36)

<sup>1</sup> Ale mele rani mo li-marave tinapua mo vano moiso, Iesu mo lavi Peter, James peresi tasina John, mo tiromara la vele sahe aulu na vutivuti tavera matea la toho hasera. <sup>2</sup> Ale epen Iesu mo mai mo tinapua na nahora, nahona mo mera sohena alo, ruruna la lulu sohena malarani, <sup>3</sup> ale vahatea

purongo, la hite Moses enia Elijah la pala la lo retireti peresi Iesu. <sup>4</sup> Moiso Peter mo vereea isan Iesu mara, "Tija, mo řuhu matan řa lo toho nike, vara ko opoia a pa vai te ima ruru i tolu akerihi, matea nom, matea non Moses, ale matea non Elijah."

<sup>5</sup> Mo pa lo retireti, ale vahatea purongo telangi mera matea mo hovira, moiso leo matea mo malue hin telangi atu mara, "Harihi enia Natuku řuhuřuhu, na opoia mo tavera jea, ha tapurongo isana!" <sup>6</sup> Nona tamlohi usuri lara la rongo leo sei, la jovi na nahora na matahu tavera.

<sup>7</sup> Pani Iesu mo mai mo tikelira mo vereea mara, "Ha turu, ha sopo matahu!" <sup>8</sup> Ale na rani la tařa sahe la sopo mele hite tea, pani la hite Iesu hasena. <sup>9</sup> Ale la pa lo sevuti na vutivuti, Iesu mo retileu isara mara, "Ha sopo vere na sava ka hitea vavano i tikeli na rani Natun Tamlohi i mele turu na mateia."

<sup>10</sup> Ale tamlohi usuri la usia lara, "Ale mata sava tamlohi vujangi mata leu la lo vereea vara Elijah i pa mai tiroma?"

<sup>11</sup> Mo řaramira mara, "Elijah i pa mai, ale i pa tau mamahuni na hinau tari. <sup>12</sup> Pani na vereea isamim vara Elijah mo pete pala moiso, ale la sopo hitevosahia, pani la vai masalora isana. Ale sohen haratu la pa sile na rani řilangi isan Natun Tamlohi." <sup>13</sup> Ale tamlohi usuri la pa rongovosahia natu, vara mo lo verera hin John tamlohi paptijo.

*Uluvou Matea*  
(Mk 9.14-29; Lk 9.37-43a)

<sup>14</sup> Ale lara la lo sevuti la mai isan vao atu, tamlohi matea mo mai isan Iesu mo papaohi na nahona, <sup>15</sup> mo vereea mara, "Moli, o řomopoi hin natuku matan enia mo lo matemate, ale tarea mo lo lavi na rongohaji tavera matan hin te rani mo lo jovi na hapu teni wai. <sup>16</sup> Na pete lavia mo mai isana nom tamlohi usuri moiso, pani la sopo eři vai mamahunia."

<sup>17</sup> Ale Iesu mo řaramia mara, "Kamim mo sopo te nomim rasu hatea, kamim pina lejileji matea, a pa mele toho peresi kamim rani i visa? Na sopo levosahia vara a pa lavi na puhon nomim hinau i tikeli pangisa? O lavia i mai isaku!" <sup>18</sup> Ale Iesu mo reti řilangi isan tanume sasati atu, ale mo malue hinia, ale vahatea purongo natuna mo řuhu.

<sup>19</sup> Moiso hitahu, tamlohi usuri la mai na tavaluna la usia lara, "Mata sava kama sopo eři levuti nařihia?"

<sup>20</sup> Mo vereea isara mara, "Matan nomim rasua mo rihirihii! Varařuhu na vereea isamim, vara nomim rasua mo řilangi sohena piri paka matea, ha pa eři vereea isan vutivuti nike, vara 'O juhati o vano sevano!' Ale i pa juha. Ale sava natu, vara ha pa sopo eři vaia?"

<sup>21</sup> Usiusi peresi na posposi tapuhoro na hanhani purongo i pa eři levuti nařihii na tanume sasati sohen harihi i malue."



*Retireti Mata Nona Mateia*  
(Mk 9.30-32; Lk 9.43b-45)

<sup>22</sup> Ale na rani la pa lo pulutahi Galilee, Iesu mo vereia isara mara, “Natun Tamlohi mariviti vara la turuposi hinia natu vara i vano na lima tamlohi, <sup>23</sup> ale la pa vilimateia, moiso i pa mele turu na hatolu rani.” Ale la rongu mo sati tavera matana.

<sup>24</sup> Na rani la kakau Capernaum, haratu la lo lavi na makomo mania mata takis mata nora Temple la mai isan Peter lara, “Nom tija i pa voli na takis teni mo vono?”

<sup>25</sup> Ale Peter mo faramira mara, “He'e.” Ale mo lo unu na ima, ale Iesu mo retireti tiroma isana mara, “Romim mo sohena sava Simon? Supe mata varama la lo lavi na takis isan hare? Isana natura teni isana tamlohi tinapua?”\*

<sup>26</sup> Ale na rani Simon mo vereia mara, “Isana tinapua!” Iesu mo vereia isana mara, “Ale vara sohen haratu, natura la materi na takis. <sup>27</sup> Pani matan vara ra sopo komo na romira, o sivo na tasi, o pulahi na nom asi revereve, ale sava maji mo kali hinia tiroma, o roi na vavana, ale o pa hite na mania matea mo tataholo mata voli takis nofa enfa rua.”

## 18

*Hare Mo Aulu Jea*  
(Mk 9.33-37; Lk 9.46-48)

<sup>1</sup> Hin rani atu tamlohi usuri la mai isan Iesu lara, “Hare natu, enia i pa aulu jea

hin mauri atu God mo aulu hinia?”

<sup>2</sup> Moiso mo tovi na natirihia matea vara i mai isana, ale mo turuhia na livuhara, <sup>3</sup> moiso mara, “Vara ruhu na vereia isamim, vara ha sopo posi mai sohen natirihia nike, ha pa sopo efi levosahi mauri atu God mo aulu hinia. <sup>4</sup> Hare mo hase taua atano sohen natirihia nike, enia mo aulu jea hin mauri atu God mo aulu hinia. <sup>5</sup> Hare mo lavi te natirihia sohen harihi na hijaku, enia mo lo laviau, <sup>6</sup> pani vara tea mo vaitihai na rasua non te vonan la natuvarihia nike la rasuau, i pa mele ruhu jea isana vara la pesi te vatu tavera na ralonga la putehia na tasi puaha.

*Vaihite La Pa Mai*  
(Mk 9.42-48; Lk 17.1-2)

<sup>7</sup> Rani sasati i pa jovi na varama matan rasua i pa tihai. Matan tarea hina vaihite la pa lo mai, pani rani sasati isan haratu mo lo vaitihai na rasua nona tinapua. <sup>8</sup> Ale vara limam teni palom mo vaiho ko vano na hehe, o tai narihia o pulahia. Mo mele ruhu jea vara o unu hin mauri atu o papao teni o hariju, mo jeu haratu vara la pulahiho peresi na limam mo rua teni palom mo rua hin hapu atu mo sopo te isoisona. <sup>9</sup> Ale vara matam mo vaiho ko lo vano na hehe, o julai narihia o pulahia. Mo mele ruhu jea vara o unu hin mauri atu peresi na matam matelete, mo jeu haratu vara

\* **17:25:** Tamlohi hai la romromia vara natura nike, enira natun supe tataholo, ale la haratu la tamlohi tinapua enira la sopo vaon supe atu.

la pulahiho peresi na matam mo rua o vano hin hapu atu mo sopo te isoisona na moruhapu.

*Sipsip Atu Mo Jalio Na Malele*

(Lk 15.3-7)

<sup>10</sup> Ha lo kilau ha sopo hitelehilehi te vonan la natuvarihi nike, matan na vereea isamim vara tarea na tuka, nora angelo, la haratu la lo kilaura, Tamaku na tuka mo tinañihia vara la eñi turu na nahona matara.

*Tavui Sipsip Matea*

<sup>11</sup> Matan Natun Tamlohi mo mai vara i juri la haratu la jalio. <sup>12</sup> Ale nomim kilakilau mo sohena sava? Vara tamlohi matea pulana sipsip mo ngav sangavulu (100) ale matea mo jalio, i pa sopo tau la haratu mo ngavulu limaravati mo limaravati (99) na pahisa vutivuti atu tako ale i ale haratu mo jalio teni i vono? <sup>13</sup> Ale vara mo tapaia, varañuhu na vereea isamim, mo avulahi tavera matana, mo jeu la haratu mo ngavulu limaravati mo limaravati sei la sopo jalio. <sup>14</sup> Mo sohena natu, mo sopo masalom Tamaku na tuka vara rasua non te vonan la natuvarihi nike i vano hina purongo.

*Vara Tea Mo Hehe*  
(Lk 17.3)

<sup>15</sup> Vara voraim mo vai te hehe isam, o vano o vere na nona hehe isana kamim rua hasemim. Vara mo tapurongo isam, voraim i pa mele tapalam. <sup>16</sup> Pani vara mo ñohu vara i tapurongo, o lavi te hatea teni tupra

rua tinapua la vano peresiho matan vara o pa eñi turu na nora vereulia.

*Deut 19.15* <sup>17</sup> Ale vara mo ñohu vara i tapurongo hinira, o pa vereea isana vao kalesia. Ale vara mo ñohu vara i tapurongo isana vao kalesia sohen tiroma, ale i pa sohena tamlohi ñoñoha isamim, ale ha ñohu hinia sohena tamlohi ñoñoha matea teni haratu mo lo lavi na takis.

*Tinañihia Teni Horoa*

<sup>18</sup> Varañuhu na vereea isamim, sava kamim kalesia ka lo horoa na varama, God na tuka mo horoa moiso, ale sava ka tinañihia na varama, God na tuka mo tinañihia moiso.

<sup>19</sup> Na mele vereea isamim vara te tupra rua na varama la majinga hin te hinau la usia, Tamaku na tuka i pa vaia sohena isara. <sup>20</sup> Matan, vara te tupra rua teni tupu tolu la lo pulutahi na hijaku, enau na lo toho peresira.”

*Romi Na Tinapua*

<sup>21</sup> Moiso Peter mo mai isana mo vereea mara, “Tija, vara voraiku mo vai na hehe isaku, a pa ñomi voraiku vaha visa? Vaha limaravrua teni mo vono?” <sup>22</sup> Iesu mo vereea isana mara, “O pa sopo ñomia vaha limaravrua (7x) purongo, pani vaha ngavulu limaravrua vaha limaravrua (70x7). *Gen 4.24*

<sup>23</sup> Matan harihi, mauri atu God mo aulu hinia mo sohena supe matea mo opoia vara i tau mamahuni na ave non nona slev. <sup>24</sup> Na rani mo tapulo tau mamahuni na ave, la lavi vonara matea mo mai isana, mo ave na mania

matea mo tataholo na voli tamlohi mata rani mo tari vaha sangavulu (10,000).

<sup>25</sup> Ale matan i pa sopo efi voli narihia, nona tamlohi tavera mo retileu hinia vara la harehia peresi narouna tolu na natuna peresi na nona hinanu tari vara i spai na nona mania hinia. <sup>26</sup> Ale slev atu mo jovi na pauna, mo tangi mara, 'O romperavu isaku, ale a pa voli vevuhi na noku ave tari isam!' <sup>27</sup> Ale tamlohi tavera non slev atu mo romopoia, mo tinarihia vara i vano purongo, ale mo tinarihi na nona ave.

<sup>28</sup> Pani na rani pa slev atu mara mo malue, mo vano mo tapai na slev tinapua matea non tamlohi tavera atu, ale slev sei mo ave isana na mania mo tataholo na voli tamlohi matea mata rani mo ngav sangavulu (100) mo taurilatia, mo tapulo punia mara, 'O voli na nom ave isaku!' <sup>29</sup> Ale slev atu mo jovi na pauna mo tangi isana mara, 'O romperavu isaku, a pa voli narihi na noku ave isam.' <sup>30</sup> Pa slev atu, mo rohu hinia, ale mo vano mo taua na ima rilangi vara i lo toho atu i tikeli rani atu i voli narihi vevuhi na nona ave.

<sup>31</sup> Na rani la tapalan slev atu lara la hite na sava mo vaia, la rongo mo sati tavera, la vano la vereuli na hinanu tari isan nora tamlohi tavera atu. <sup>32</sup> Moiso nona tamlohi tavera mo tovi pa slev atu mo mai isana, mo vereia isana mara, 'Engko ko slev sasati matea ko putu tataholo. Na tinarihi vevuhi na nom ave matan ko usia mo

rilangi isaku. <sup>33</sup> Ale ko sopo efi romopoi na tapalam slev sohen enau na romopoiho?'

<sup>34</sup> Moiso nona tamlohi tavera atu mo lolokoru patuna, mo silea mo vano isana tamlohi ima rilangi vara i toho atu vavano i voli narihi vevuhi na nona ave. <sup>35</sup> Tamaku na tuka i pa vaia sohen harihi isamim isoiso vara ha sopo romi vara'uhu na voraimim peresi na vevoraimim na mapumim."

## 19

### *Vujangi Mata Lahi* (Mk 10.1-12)

<sup>1</sup> Ale Iesu mara mo vere la hinanu atu mo isoiso, mo malue Galilee mo unu na jara matan Judea na tavalu vano wai Jordan. <sup>2</sup> Ale vao tavera la lo usuria, ale mo vai mamahuni na nora rojoa ea.

<sup>3</sup> Pharisee la mai isana vara la vaihitea lara, "Mo tataholo usuri na leu vara tea i efi tipahi narouna matan te hinanu?"

<sup>4</sup> Pani Iesu mo raramira mara, "Ka sopo lo evia vara haratu mo vaira na pongi tiroma mo vaira lamane peresi na ha'ai.

*Gen 1.27; 5.2*

<sup>5</sup> Ale mo vereia mara, 'Ale matana, tamlohi i pa tinarihi tamana enia tinana, ale i so'otahi isan narouna, ale la pa epe matea?' *Gen 2.24*

<sup>6</sup> Ale matana, la pa sopo mele tamlohi mo rua, pani epe matea purongo. Ale sava God mo so'otahia jara matea, te tamlohi i pa sopo mele asehia."

<sup>7</sup> La vereia isana lara, "Mata sava natu, Moses

mo retileu vara tea i eñi sile na pepa mata řohu hin narouna matan vara i tipahi narouna?" *Deut 24.1-4; Mt 5.31*

<sup>8</sup> Mo vereia isara mara, "Moses mo tinařihia vara ha pa eñi tipahi na naroumim matan mapumim tamlohi hin Israel la řilangi, pani na pongi tiroma mo sopo sohena. <sup>9</sup> Ale na lo vereia isamim vara tea mo tipahi narouna, pani mo sopo matan te hinau tinapua, pani mata mo vaivaileu peresi te tinapua, ale vara haratu mo tipahia mo lahi na tinapua, enia mo vaivaileu peresi hařai atu."

<sup>10</sup> Nona tamlohi usuri la vereia isana lara, "Vara mo sohena natu, isana tamlohi matea peresi narouna, i pa mele řuhu jea vara tea i sopo lahi."

<sup>11</sup> Pani mo vereia isara mara, "Mo sopo tamlohi tari sei la pa eñi lavi reti sei, pani haratu purongo sei God mo tinařihira vara la lavi reti sei. <sup>12</sup> Matan, te tamlohi la vora la povota moiso, ale tea tamlohi la votaira, ale tea la sopo lahi matan la hase tapuhira matan mauri atu God mo aulu hinia. Haratu mo eñi lavi reti nike, i lavia."

*Natuvarihi La Mai Isana*  
(*Mk 10.13-16; Lk 18.15-17*)

<sup>13</sup> Ale tamlohi la lavi na natura la mai isana vara i tau na limana isara i usiusi matara, pani tamlohi usuri la reti řilangi isara, <sup>14</sup> pani Iesu mara, "Ha tinařihi na natuvarihi la mai isaku, ha sopo horora matan la haratu la sohera la pa lavi mauri atu God

mo aulu hinia." <sup>15</sup> Ale mo leřuhu hinira mo tau na limana hinira moiso mo malue hin jara atu.

*Tamlohi Tavtav Matea*  
(*Mk 10.17-31; Lk 18.18-30*)

<sup>16</sup> Ale hin rani atu, tamlohi matea mo mai isana mara, "Tija, sava hina řuhu natu, vara a vaia a pa lavi na mauri tui matana?"

<sup>17</sup> Ale Iesu mo vereia isana mara, "Mata sava ko lo usiau na sava mo řuhu? God purongo enia mo řuhu. Vara ko opoia vara o lavi na mauri, o toho usuri na retileu."

<sup>18</sup> Ale mo usia isana mara, "Sahara nakonako?"

Iesu mo vereia mara, "O sopo vilimatei na tamlohi, o sopo vaivaileu peresi na tinapua mo lahi, o sopo vavanaho, o sopo tuetueni na halu non tea, <sup>19</sup> o ololo hin tamam enia tinam moiso', *Deut 5.16* ale 'O opoi na tinapua sohen ko lo opoiho hasem'." *Lev 19.18*

<sup>20</sup> Uluvou atu mo vereia mara, "La hinau tari sei na lo vaira moiso, pani sava natu, na sopo lo vaia?"

<sup>21</sup> Iesu mo vereia isana mara, "Vara o pa tataholo i řuhu, o vano, o hařehi vevuhi na nom tavgav, ale o sile na volina isana tamlohi tilavono, ale o pa lavi na tavgav na tuka; ale o mai, o usuriau." <sup>22</sup> Pa tamlohi atu mara mo rongo retireti atu, mo malue, řomina mo sati matan nona tavgav mo tavera jea.

<sup>23</sup> Moiso Iesu mo vereia isana nona tamlohi usuri mara, "Varařuhu na vereia isamim, mo řilangi jea

vara tamlohi tavgav matea i efi lavi mauri atu God mo aulu hinia. <sup>24</sup> A mele vereva isamim, vara i pa mele malum jea isana camel matea vara i majorole na koko niteli, mo jeu na tamlohi tavgav matea vara i efi lavi mauri atu God mo aulu hinia.”

<sup>25</sup> Tamlohi usuri lara la rongo reti sei, la mafurahi tavera lara, “Hare natu, i pa efi juri?”\*

<sup>26</sup> Pani Iesu mo kilau vano isara mara, “Isana tamlohi hinia atu i pa sopo te malelena, pani isan God hinia tari la maleleha.”

<sup>27</sup> Moiso Peter mo faramia mara, “Ko hitea, kamam kama tinafihi vevuhi na nomam hinia tari, ale kama usuriho. Sava natu, i pa nomam?”

<sup>28</sup> Ale Iesu mo vereva isara mara, “Varafuhu na vereva isamim, hin varama paro atu vara Natun Tamlohi i sakele na nona jara sakele mata suiha merana mo tavera jea, kamim haratu ka lo usuriau ha pa sakele na jara sakele mata suiha mo sangavulu romana mo rua, ha pa ari la tavgavin Israel atu mo sangavulu romana mo rua.

<sup>29</sup> Ale tamlohi tari sei la malue la tau na imara, teni voraira, teni vevoraira, teni tamara, teni tinara, teni natura, teni nora lepa mata hijaku, God i pa silera la pa mele lavia vaha ngav sangavulu (100x) hin haratu la taua, ale la pa lavi

na mauri tui hitahu, <sup>30</sup> pani tamlohi matuvana nake sei la lo aulu, la pa sopo aulu hin pongi atu mo lo mai, pani la haratu la sopo aulu nake, la pa aulu.”

## 20

### *Tamlohi Isa Grape*

Ale Iesu mo lo vereva mara,

<sup>1</sup> “Ale mauri atu God mo aulu hinia mo sohen harihi: tamlohi tavera mata ima matea mo malue na falavuhu jea matea vara i aleale tamlohi voko mata nona isa grape. <sup>2</sup> Ale tamlohi voko la majinga vara la pa voko mata volvoli mata rani matea, moiso mo rulara la vano na nona isa grape.

<sup>3</sup> Ale na matan alo mo limaravati na falavuhu mo malue mo vano mo hite te tamlohi la lo toho purongo na jara maket, <sup>4</sup> ale mo vereva isara mara, ‘Eh, kamim sohen, ha sivo na isa grape, ale a pa sile na sava mo tataholo vara ha pa lavia.’

<sup>5</sup> Moiso la malue la vano hin isa atu. Ale tamlohi atu mo mele aleale tamlohi sohen tiroma; mo mele malue na livuha rani tataholo, ale mo mele malue na matan alo mo tolu na ravravi atu. <sup>6</sup> Ale na matan alo mo tikeli mo lima na ravravi hin rani atu, mo malue mo vano mo tapai te tamlohi la lo toho purongo, ale mo vereva isara mara, ‘Eh, mata sava ka lo turu purongo nike mo tikeli nakerihi?’

<sup>7</sup> La vereva isana lara, ‘Mo sopo tea i usi kamam vara

\* **19:25:** Tamlohi hin pongi atu la lo romromia lara God mo lefuhu hin na tamlohi sei la tavgav, matan enira la tavgav. La hutura hin reti sei Iesu mo vereva matan enia mo vujangia vara i pa filangi jea vara tea i lavi mauri atu God mo aulu hinia.

kama voko nona.’ Mo vereia isara mara, ‘Kamim sohena, ha vano na isa grape.’ Ale la vano. <sup>8</sup> Ale na ravravi jea mo vereia isan nona patu tamlohi vara i tovi na tamlohi voko vara i silera na volira, ale vara i tapulo hin la haratu la pa voko hitahu, ale i sahe i tikeli la haratu la lo voko tiroma. *Lev 19.13; Deut 24.15*

<sup>9</sup> Ale na rani la haratu mo tovira vara la voko na matan alo mo lima na ravravi la mai, mo silera hatehateahi na volira mo tataholo mata voli rani matea. <sup>10</sup> Moiso na rani la haratu mo tovira tiroma na řalavuhō mata voko la mai, la lo řomřomia vara la pa lavi na mania i jeura, pani enira hatehateahi sohena, la lavi na volira mo tataholo mata voli rani matea. <sup>11</sup> Lara la lo lavia, la lo retireti vavarihi hin tamlohi tavera atu mata ima, <sup>12</sup> lara, ‘La haranike la pa mai hitahu la voko mata aoa matelete purongo, ale ko volira sohemam sei, kama slev nom na alo tavera mo tikeli nakerihi.’

<sup>13</sup> Pani mo řarami na vonara matea mara, ‘Tapala, na sopo vai te hināu i sati isam. Ko sopo majinga peresiau na volim mata rani matea teni mo vono?’ <sup>14</sup> O lavi na sava enia nom, ale o vano. Enāu na opoia vara a sile na sava na silea isam i vano isan la haranike la pa voko hitahu. <sup>15</sup> Ko hitea mo sopo tataholo vara a vai na sava na noku mania sohen na opoia? Teni ko mereimerei matan posiku mo řuhu?’ ”

<sup>16</sup> Ale Iesu mo mele vereia mara, “Vao atu nake sei la lo aulu, la pa sopo aulu hin

pongi atu mo lo mai, pani la haratu la sopo aulu, la pa aulu.”

*Mo Vere Na Nona Mateia  
(Mk 10.32-34; Lk 18.31-34)*

<sup>17</sup> Ale na rani Iesu mo pa lo sahe Jerusalem, mo tovi la nona tamlohi usuri atu mo sangavulu řomana mo rua mo tovira vano na řavul malele, ale mo vereia isara mara, <sup>18</sup> “Ka hitea, řa lo sahe Jerusalem. Ale la pa turuposi hin Natun Tamlohi i pa vano na lima moli nona řis peresi na tamlohi vujangi mata leu, ale la pa sile na talai isana vara i mate, <sup>19</sup> ale la pa silea isana tamlohi řořoha vara la pa kerehia, ale la rupia na asi maja, ale vara la vosaea na talopeilopei, ale na hatolu rani i pa mele turu na mateia.”

*Retusia Matea  
(Mk 10.35-45)*

<sup>20</sup> Ale tinan la natun Zebedee, James enia John, mo mai isana tolu na natuna, ale mo papaohi na nahona vara i usia hin te hināu. <sup>21</sup> Ale Iesu mo vereia isana mara, “Ko opoi na sava?” Mo řaramia mara, “Na opoia vara la natuku nike mo rua la sakele na pahisam vara ko tauri na nom suiha, matea na matuam, ale matea na maraum.”

<sup>22</sup> Iesu mo řaramira mara, “Kamim ka sopo levosahi na sava ka lo usia. Ha eři lavi na rani řilangi a pa lavia?”

La řaramia lara, “Enjora, kama eři lavia.”

<sup>23</sup> Mo vereia isara mara, “Ha pa lavi na sava a pa lavi, pani matan vara ha pa sakele na

matuaku teni na marauku, enia mo sopo noku vara a pa majinga hinia, pani enia non la haratu sei, Tamaku mo tatamahunia matara moiso.”

<sup>24</sup> Ale na rani la tupu sangavulu tinapua atu lara la rongoa, la lolokoru hin la vorai atu mo rua. <sup>25</sup> Pani Iesu mo tovira la mai isana, ale mo vereea mara, “Ka levosahia vara tamlohi aulu hin la haratu la tamlohi řořoha, la opoia tavera vara la pa lo aulu na nora tamlohi, ale ka levosahia sohena sava nora tamlohi tatavera la lo roro na nora suiha hinira. <sup>26</sup> I pa sopo sohena isamim, pani hare mo opoia vara i aulu jea hin kamim mo isoiso, enia i pa nomim volitusi, <sup>27</sup> ale haratu mo opoia vara i pa tiromamim, enia i pa nomim slev, <sup>28</sup> mo sohena natu, Natun Tamlohi mo sopo sinai vara tamlohi la volitusi isana, mo vono, mo sinai vara enia i volitusi, ale vara i sile na maurina vara i volituhu na matuvana.”

### *Tamlohi Matavuso Mo Rua*

*(Mk 10.46-52; Lk 18.35-43)*

<sup>29</sup> Ale lara la lo malue Jericho, vao tavera matea la usuria. <sup>30</sup> Ale hin rani atu tamlohi matavuso mo rua la lo sakele na pahisa malele, ale lara la rongoa vara Iesu mo lo hahau na malele mariviti atu, la ulo aulu lara, “Moli, o řomopoi kamam, Natun David!” <sup>31</sup> Vao atu la merusahira vara la toho malum, pani la mele ulo aulu mo tavera jea lara, “Moli, o řomopoi kamam, Natun David!”

<sup>32</sup> Iesu mo turu, ale mo tovira la mai isana mara, “Ka opoi vara a vai na sava isamim?”

<sup>33</sup> La vereea isana lara, “Moli, kama opoia vara matamam la kilau.” <sup>34</sup> Moiso Iesu mo řomopoi, mo tikeli na matara, ale vahatea purongo la eři hite, ale la usuria.

## 21

### *Iesu Mo Unu Jerusalem*

*(Mk 11.1-11; Lk 19.28-38; Jn 12.12-19)*

<sup>1</sup> Ale lara la lo mai mariviti hin Jerusalem, la kakau taon sei Bethphage na pahisa Vuti talu Olive, moiso Iesu mo řule na tamlohi usuri mo rua, <sup>2</sup> mo vereea isara mara, “Ha vano hin vanua aturihi, ale vara ka lo unu ha pa hite na donki matea peresi natuna la lasira ea. Ha uli nařihira, ale ha lavira la mai isaku. <sup>3</sup> Ale, vara tea mo vere te hinau isamim matana, ha pa vereea vara, ‘Nomam tamlohi tavera mo opoira!’ ale vahatea i pa řulera la mai.” <sup>4</sup> Harihi sei, mo malue sohena matan vara sava hinau přovet mo vereea moiso i pa masese sei mara,

<sup>5</sup> “Ha vereea isan la haratu la lo toho Zion vara:

Nomim Supe mo lo mai isamim,

mo řommalum, ale mo lo sakele na donki matea, ale ha kilau vano, donki sei mo lo sakele hinia enia natu donki matea!’ *Zec 9.9*

<sup>6</sup> Ale la tamlohi usuri atu mo rua la vano la vai na sava Iesu mo vereea isara

moiso. <sup>7</sup> La lavi donki atu peresi na natuna, la tatavu na harin la donki atu na nora ruru hai, ale Iesu mo sakele hinira, <sup>8</sup> moiso, la vao tavera atu la vuʻangi na nora ruru na malele tavera atu, ale tatuara la tai na pere vipahai la vuʻangira hin malele atu. <sup>9</sup> Ale vao tavera atu la vano tiroma hinia peresi la haratu la lo usuria, la lo uloulo tavera lara, “Hasohaso God, matan natun David!”  
 “Ale leʻuru hinia sei mo lo mai na hijan Moli God!”

*Psa 118.26*

“Hasohaso i sahe isan God na tuka sei mo aulu jea!”

<sup>10</sup> Ale na rani mo unu Jerusalem tamlohi tari hin taon tavera atu la hutura hinia, la lo vereea lara, “Hare nahai?”

<sup>11</sup> Ale vao tavera atu lara, “Tamlohi nike, enia pʻrovet Iesu, mara Nazareth hin Galilee.”

*Iesu Mo Unu Na Temple*

(*Mk 11.15-19; Lk 19.45-48; Jn 2.13-22*)

<sup>12</sup> Ale Iesu mo unu na Temple, moiso mo levuti la haratu la lo aʻreaʻrehi peresi la haratu la lo volvoli na lolo Temple, moiso mo tipovi na tepel non la haratu la lo jenjen mania peresi na jara sakele non la haratu la lo haʻrehi na vom- ahe.

<sup>13</sup> Mo vereea isara mara, “Retiulia mo vereea vara, ‘Imaku la pa tovia ima usi.’ Pani kamim ka vaia mo mai jara luhu non la haratu sei la tatamahu moiso mata vili na tamlohi mata vavanaho.”

*Isa 56.7; Jer 7.11*

<sup>14</sup> Moiso matavuso peresi na tamlohi papao la mai isana na lolo Temple, ale mo vai mamahunira. <sup>15</sup> Pani moli mata pʻris peresi na tamlohi vujangi mata leu lara la hite na hina maʻurahi ruhuʻuru mo lo vaira moiso, ale lara la mele rongo na natuvarihia la lo ulo aulu na Temple lara, “Hasohaso isan Natun David!” tamlohi tatavera atu la lolokoru. <sup>16</sup> Ale la vereea isana lara, “Ko rongo na sava la lo vereea?” Ale Iesu mo vereea isara mara, “He'e! Kamim ka sopo lo evia na Retiulia hin te rani vara, ‘God engko ko tatamahu na nom hasohaso vara i pa malue na jingo natuvarihia peresi na pipi?’ ”

*Psa 8.2*

<sup>17</sup> Hitahun haratu, mo malue isara, mo malue Jerusalem mo vano na taon matan Bethany, ale mo juruvi atu.

*Vipahai Fig Matea*

(*Mk 11.12-14, 20-24*)

<sup>18</sup> Na ʻralavuho, mo lo hilu vano Jerusalem, ale mo rongo mo marohati. <sup>19</sup> Ale mo hite na pulo fig matea na pahisa malele, mo vano mariviti, pani mo sopo hite te vuana hinia, pani rauna purongo. Ale mo reti isana mara, “O pa sopo eʻri mele lavi te vuam hin te rani!” Ale vahatea purongo pulo fig atu mo mahoa.

<sup>20</sup> Na rani tamlohi usuri lara la hitea, la hutura lara, “Eh, mo sohena sava natu, pulo fig nike mo mahoa vahatelete purongo?”



<sup>21</sup> Moiso Iesu mo řaramira mara, "Varařuhu na vereia isamim, vara te nomim rasua, ale ha sopo řom rua, kamim ha pa eři vaia sohen harihi na vaia isan pulo fig nike, ale ha pa eři vereia isan vutivuti nike, vara, 'O hase sauho aulu, o pulahiho na lolo tasi!' Ale i pa masese. <sup>22</sup> Ale sava ka lo usia na usi, ha pa lavia, vara te nomim rasua."

*Retiusia Mata Suiha Non Iesu*

(Mk 11.27-33; Lk 20.1-8)

<sup>23</sup> Iesu mo unu na Temple, ale mara mo lo vujangi na tamlohi, moli mata prıs peresi na tamlohi aulu matan Jerusalem la mai isana vara la usi te retiusia isana lara, "Ko lo vai la hinou nike na suiha hare? Hare mo sileho hin suiha sei?"

<sup>24</sup> Iesu mo řaramira mara, "Enau sohena a pa usi kamim na retiusia matea, ale vara ha řaramiau, enau sohena a pa vereulia vara sava suiha nahai na lo vai la hinou sei hini. <sup>25</sup> Suiha atu John mo lo paptijo hini mo tai epu? Mo tai na tuka, teni isana tamlohi?"

Ale la lo sorasorahia isara lara, "Vara řa vereia vara, 'Mo tai na tuka!' i pa vereia isařa vara, 'Mata sava ka sopo rasua?' <sup>26</sup> Pani vara řa vereia vara, 'Mo tai isana tamlohi purongo!' vao nike la pa paruřa matan enira la vereia vara John enia přovet varařuhu matea non God."

<sup>27</sup> Ale matana, la řarami Iesu lara, "Kama sopo levosahia."

Ale Iesu mo vereia isara mara, "Enau sohena, a pa sopo vereuli kamim hini vara sava suiha natu, na lo vai la hinou sei hini.

<sup>28</sup> Ha to řomřomia, tamlohi matea natuna mo rua. Ale mo vereia isan matea tiroma mara, 'Natuku, o pa vano o voko na isa grape nohorihia.'

<sup>29</sup> Ale uluvou atu mo řaramia mara, 'Na řohu!' pani hitahu mo posi na řomina, ale mo vano.

<sup>30</sup> Ale mo mele vano isan natuna tinapua atu, mo vereia sohena. Ale mo řaramia mara, 'A pa vano tata!' pani mo pa sopo vano. <sup>31</sup> Sahara hin la haratu mo rua mo vai na masalon tamana?"

Lara, "Haratu tiroma."

Iesu mo vereia isara mara, "Enjora, varařuhu na vereia isamim, haratu la lo lavi na takis peresi na hařai malele, la pa lavi mauri atu God mo aulu hini tiroma hin kamim. <sup>32</sup> Matan John mo pala isamim mo vujangi na malele posposi tataholo non God, ale ka sopo rasua, pani haratu la lo lavi na takis peresi na hařai malele la rasua. Hina purongo vara ka hitea, ka řohu vara ha posi na řomimim vara ha rasu.

*Tamlohi Isa Sasati*

(Mk 12.1-12; Lk 20.9-19)

<sup>33</sup> Ha mele tapurongo na titileu tinapua. Tamlohi tavera mata ima matea mo lavo na isa grape matea. Mo tiu na wořa matea řalihia, ale mo heli na koko varavarasi grape matea, ale mo voro na ima aulu matea mata kilakilau, ale mo opoia vara

tea la pakaia, ale tamlohi hai la pakaia, moiso enia mo vano na jara tinapua matea mo vano asau. <sup>34</sup> Ale taro asitauni mo lo mai mariviti, mo řule na nona slev la vano isan la tamlohi atu la lo pakai isa atu vara la lavi na řungana. <sup>35</sup> La tamlohi atu la tauri na nona slev, la tamaji matea, la vilimatei matea, ale la parumatei matea. <sup>36</sup> Tamlohi tavera atu mo mele řule na slev tinapua, evira mo jeu la haratu tiroma. Ale la tamlohi atu la vaia isara sohen la lo vaia tiroma.

<sup>37</sup> Na isoisona, mo řule natuna mo vano isara mara, 'Korong la pa ooloo hin natuku!'

<sup>38</sup> Pani na rani la tamlohi atu lara la hite natuna, la vereia isara hasera lara, 'Nona korohi nakerihi. Ha mai, řa vilia, ale řa pa lavi na koruna.' <sup>39</sup> Ale la tauria la pulahi nařihia hin isa atu, ale la vilimateia atu.

<sup>40</sup> Ale na usi kamim hinia vara na rani tamlohi isa atu i mele pala, i pa vai na sava isan la tamlohi atu la lo pakai na isana?"

<sup>41</sup> La řarami Iesu lara, "I pa vilimatei la tamlohi sasati atu na malele řilangi matea, ale i pa mele tinařihia isana tamlohi tinapua vara la pa pakai matana, ale la pa silea na yuana na rani asitauni."

<sup>42</sup> Iesu mo vereia isara mara, "Enjora, ka sopo lo evi hinau nike na Retitapu hin te rani?"

'Vatu atu tamlohi voro ima la lo tipahia,  
enia mo mai tapulo pulo  
vatu mata ima,

haranike Moli God mo vaia,  
ale mo řuhu jea matan řa  
eři hitea.'

*Psa 118.22-23*

<sup>43</sup> Matana, na lo vereia isamim, jara ooloo atu ka lo turu hinia isan God sei mo supe mo aulu hin kamim Jew hasemim purongo hinia, God i pa lavi nařihia ooloo sei isamim, i pa silea isana mara jara tinatinapua sei la pa vua na vua řuhu sei God mo opoia. <sup>44</sup> Ale haratu mo lo tialahalaha hin vatu atu, vatu atu i pa putputia, ale vara vatu atu mo jovi hin tea i pa lomolomoa.' "

<sup>45</sup> Na rani moli mata pñis peresi na Pharisee lara la rongo titileu atu, la rongovosahia vahatea vara mo lo verera. <sup>46</sup> Pani hina purongo vara la lo aleale malele vara la taurilatia hinia, la matahuni la vao atu matan vao atu la rasua vara enia přovet matea.

## 22

*Hanhani Tavera Nona  
Supe Matea*

*(Lk 14.15-24)*

<sup>1</sup> Ale Iesu mo mele vere na titileu hai isara mara, <sup>2</sup> "Ale mauri atu God mo aulu hinia mo sohen harihi: Supe matea mo tatamahu na hanhani tavera matea mata lahi non natuna, <sup>3</sup> ale mo řule na nona slev vara la vano la tovi la haratu sei la lo usira moiso vara la pa mai na hanhani tavera mata lahi sei, pani la řohu vara la mai. <sup>4</sup> Ale mo mele řule te slev tinapua, ale mo vereia isara mara, 'Ha vano isan la haratu řa usira tiroma, ha vereia isara

vara la mai natu, matan na tatamahuni na noku hanhani moiso, ale ka hitea, la vili na pulaku buluk hai peresi na natu buluk hai sei la řavisvis řuhu, hinau tari mo tatamahu moiso, ha mai na hanhani tavera mata lahi.’<sup>5</sup> Pani la sopo tapurongo isara, ale la malue, matea mo vano na isana, matea mo vano na nona stoa,<sup>6</sup> ale la hina tinapua atu la taurilati na nona slev la vailehilehira, ale la vilimateira.

<sup>7</sup> Ale supe atu mo lolokoru, mo řule na nona tamlohi vuro, ale la vano la vili la tamlohi atu la sopo juri, ale la suli jovjovi na nora taon tavera.<sup>8</sup> Ale mo vereea isana nona slev mara, ‘Hanhani tavera mata lahi mo tatamahu moiso, pani haratu řa usira tiroma la sopo řuhu.’<sup>9</sup> Ale matana, ha vano na malele tavera, ha usi na sava tamlohi ka tapaira ea vara la mai na hanhani tavera mata lahi.’

<sup>10</sup> Moiso la slev atu la vano na malele, ale la tovi matavuhi na tamlohi sasati, peresi na tamlohi řuhu, haratu la tapaira, ale ima lahi atu mo mařivi na tamlohi atu la lo usira.<sup>11</sup> Pani na rani supe mo mai vara i hite la tamlohi atu la lo usira, mo hite na tamlohi matea atu mo sopo te nona ruru tataholo mata lahi.<sup>12</sup> Ale mo vereea isana mara, ‘Tapala, ko pa unu nike sohena sava matan mo sopo te nom ruru mata lahi?’ Ale tamlohi atu nona hapu mo mate.<sup>13</sup> Moiso supe atu mo vereea isana nona slev mara, ‘Ha pesi pulutahi na palona peresi na limana,

ha pulahia hin jara řořoha atu mata talai. Hin jara atu la pa tangtangi, ale la pa ngařngařori na huřura mata rongohaji ea.’<sup>14</sup> Matan God mo tovi na tamlohi matuvana, pani mo viřoni na tupu visalete purongo.”

*Voli Na Takis*

(Mk 12.13-17; Lk 20.20-26)

<sup>15</sup> Moiso Pharisee la vano la hatihia vara la pa vaihitea vara Iesu i kali hin te nona reti.<sup>16</sup> Ale la řule na nora tamlohi usuri peresi na tamlohi non supe Herod la vano isana lara, ‘Tija kama levosahia vara engko ko lo varařuhu, ale ko lo vujangi na malele varařuhu mo usuri na masalon God mo tataholo, ale ko sopo řomřomi na řomi tamlohi purongo matan ko sopo tametame tea.’<sup>17</sup> O to vere kamam hinia nakerihi vara mo tataholo vara tamlohi la voli na takis isana supe nona mara Rome teni mo vono?”

<sup>18</sup> Pani matan Iesu mo levosahi na nora posposi vaisatihi na tinapua, mo vereea mara, ‘Kamim tapnetano, ka lo vaihiteau mata sava?’<sup>19</sup> Ha to sileau hin te selen mata takis hatea.” Ale la silea na selen mata takis matea.<sup>20</sup> Moiso Iesu mo vereea isara mara, ‘Ale ha to vereea, niniun harepu peresi na hijana nahai?’

<sup>21</sup> Lara, ‘Supe nona mara Rome.’

Ale mo vereea isara mara, ‘Ale vara mo sohena, ha sile na hinau non supe nona mara Rome isan supe nona mara Rome, ale hinau non God isan God.’<sup>22</sup> Lara

la rongoa sohena sava mo řaramira sei mo řuhuřuhu jea, la hutura hinia, ale la malue la rovo hinia.

*Mauri Na Pongi Hitahu*

(Mk 12.18-27; Lk 20.27-40)

<sup>23</sup> Rani atu mo pa lo vano, ale Sadducee la mai isana. Vao sei la vereea vara mo sopo te sauteterahi, ale la usia na retiusia matea, <sup>24</sup> lara, "Tija, Moses mara, 'Vara te tamlohi mo mate mo sopo te natuna, tasina i pa lavi narouna mata i korohi te natun tavaina.' *Deut 25.5* <sup>25</sup> Ale vorai mo limaravrua la lo toho nike isamam, ale vora tiroma mo lahi, ale mo mate, pani mo sopo te natuna. Vora usuria mo lavi narouna. <sup>26</sup> Ale mo sohena isan nona vora usuria atu peresi na hatolura, mo sivo mo tikeli na halimaravruara. <sup>27</sup> Hitahura, hařai atu mo mate. <sup>28</sup> Ale, hin pongi atu tamlohi la pa sauteterahi hinia, matan enira mo isoiso la lahi hin hařai atu, i pa naroun sahara hinira?"

<sup>29</sup> Ale Iesu mo řaramira mara, "Romimim mo sopo tataholo, matan ka sopo levosahi na Retitapu teni na suihin God. <sup>30</sup> Matan na pongi hitahu na sauteterahi la pa sopo lahi teni la pa tulatulahi, pani la pa sohena angelo na tuka. <sup>31</sup> Ale hin vujangi sei mata sauteterahi, ka sopo lo evi na sava God mo vereea isamim? <sup>32</sup> 'Enau God non Abraham, God non Isaac, ale God non Jacob!' God mo sopo vereea vara enia God non la haratu la mate, pani non la haratu la mauri." *Exo 3.6*

<sup>33</sup> Ale vao tavera atu lara la rongo na nona vujangi, la mařurahi tavera hinia.

*Retileu Mo Aulu Jea*

(Mk 12.28-34; Lk 10.25-28)

<sup>34</sup> Pani Pharisee lara la rongoa vara Iesu mo vuni na hapu non la vao Sadducee atu, Pharisee la pulutahi, ale la mai isana. <sup>35</sup> Ale vonara matea, enia tamlohi lelevosahi mata leu matea, ale mo usia na retiusia matea vara i vaihitea mara, <sup>36</sup> "Tija, sava retileu natu, mo aulu mo jeu na retileu tari na Leu?"

<sup>37</sup> Ale Iesu mo vereea isana mara, " 'O pa opoi Moli nom God vevuhi na mapum, na maurim, ale na nom řomřomi tari'. *Deut 6.5*

<sup>38</sup> Harihi natu, enia retileu atu mo aulu jea mo tiromara.

<sup>39</sup> Haruana mo sohen harihi, 'O opoi na tahisam sohen ko lo opoiho hasem'. *Lev 19.18*

<sup>40</sup> Hin la retileu atu mo rua, vujangi tari mata Leu non Moses peresi na přovet la lo turu hinira."

*Natun David Enia Hare*

(Mk 12.35-37; Lk 20.41-44)

<sup>41</sup> Ale hin rani atu Pharisee la pa lo pulutahi jara matea, Iesu mo usira na retiusia matea, <sup>42</sup> mara, "Ha to vereea na řomimim hin Křisto? Enia mahapin hare?"

Ale la vereea isana lara, "Enia mahapin David."

<sup>43</sup> Mo vereea isara mara, "Mo sohena sava natu, David, na suihin Tanume řuhu mo tovia Moli mara,

<sup>44</sup> 'Moli God mo vereea isan noku Moli:

O sakele na matuaku na jara oloolo nike,

i tikeli pongi atu a tau  
na nom meresahi na  
ruhuruhu palom.'

*Psa 110.1*

45 Vara David mo tovia  
Moli, mo sohena sava natu,  
enia natun David?" 46 Ale,  
te vonara hatea mo sopo efi  
řaramia hin te reti hatea, ale  
mo tapulo hin rani atu, mo  
sopo tea i řomřilangi vara i  
mele usi te retiusia isana.

## 23

*Aria Mata Pongi Hitahu*

*(Mk 12.38-40; Lk 11.37-52;  
20.45-47)*

1 Ale Iesu mo vere a isan la  
vao atu peresi na nona tam-  
lohi usuri mara,

2 "Tamlohi vujangi mata  
leu peresi na Pharisee, enira  
natu, la haratu la lo vujangi  
na malele Retiulia sei Moses  
mo ulia vara mo lo vere na  
sava, 3 matana, mo řuhu vara  
ha vai na hinau tari la vere a  
isamim, ale ha turu hinira,  
pani ha sopo vai na sava la  
lo vaira, matan la sopo vai  
na sava la lo retivujavujangi  
hinira. 4 La lo opoia hajavua  
vara la tau na hinau puhoni  
na mauri tamlohi, pani la  
řohu vara la juhata na pulora  
vara la tuenira.

5 Hinau la lo vaira la vaira  
matan vara tamlohi la pa  
eři hitera, sohen la lo vai na  
nora sope puku mata Retiulia  
sei la lo lasira na patura la  
mele tavera, ale la vai na  
nora revurevu ruru la mele  
peravu jea. *Deut*

6.8 6 Ale la opoia vara la lo  
sakele na jara sakele nona  
tamlohi tatavera na hanhani  
tavaera, ale na jara sakele

nona tamlohi aulu na lolo  
ima lotu, 7 ale la opoi na rani  
tamlohi la tovira vara 'tija'  
ale la opoi na rani tamlohi la  
sile na retiuloolo isara na jara  
maket. 8 Pani kamim ha pa  
sopo lavi na hija tija matan  
nomim Tija enia matelete,  
ale kamim vorai peresi na  
vevorai. 9 Ale ha sopo  
tovi te tamlohi na varama,  
'Tama' matan Tamamim enia  
matelete purongo na tuka.  
10 Sohen haratu ha sopo lavi  
na hija 'tija' matan nomim  
Tija enia Kristo. 11 Haratu  
mo aulu jea hin kamim, enia i  
pa nomim volitusi. 12 Haratu  
mo hase tahea sahe aulu hin  
kamim, God i pa taua sivo  
atano, haratu mo hase taua  
sivo atano, God i pa tahea  
sahe aulu.

13 Rani řilangi tavera i pa  
mai isamim tamlohi vujangi  
mata leu peresi kamim Phar-  
isee, kamim ka tapnetano,  
matan ka lo pelatihoro na  
malele vara tamlohi la sopo  
eři lavi mauri atu God mo  
aulu hinia. Matan kamim  
hasemim ka sopo unu, ale  
ka lo turuhoro la haratu  
la opoia vara la unu hinia.  
14-15 Rani řilangi tavera i  
pa mai isamim, tamlohi  
vujangi mata leu, peresi  
kamim Pharisee, kamim  
ka tapnetano, matan ka lo  
hahau rotoroto na jara peresi  
na tasi vara ha vai te tamlohi  
hatea mo sopo mahapin  
Abraham i lavi na nomim  
rasua, ale na rani mo mai  
sohena vonamim matea, ka  
vaia mo mai natu moruhapu  
matea mo mele sati jea mo

jeu kamim.

<sup>16</sup> Rani řilangi tavera i pa mai isamim ka tamlohi tatavera matavuso, ka lo vujangia kara, vara tea mo vere na nona retitauhi na hija Temple, ka vere a vara enia hina purongo, pani vara tea mo vere na nona retitauhi na gold mata Temple, haratu i pa mele řuhu vara i taurilati na nona retitauhi. <sup>17</sup> Ka matavuso rongorongono vono! Sava mo aulu jea? Gold teni Temple atu sei mo lo vai na gold mo tapu? <sup>18</sup> Ale ka lo vere a vara, vara tea mo vere na nona retitauhi na hija jara silesilea isan God, kara enia hina purongo, pani vara tea mo vere na nona retitauhi na nona silesilea, i pa mele řuhu vara i taurilati na nona retitauhi. <sup>19</sup> Ka tamlohi matavuso! Sava mo aulu jea? Silesilea teni jara silesilea atu sei mo lo vai na silesilea mo tapu? <sup>20</sup> Ale haratu mo vere na nona retitauhi na hija jara silesilea, mo lo retitauhi na hinau tari hinia. <sup>21</sup> Moiso haratu mo lo vere na nona retitauhi na hija Temple, mo retitauhi na hijana peresi God atu mo lo toho hinia. <sup>22</sup> Ale haratu mo retitauhi hin tuka, mo lo retitauhi na jara sakele mata suiha non God peresi God sei mo lo sakele ea. *Isa 66.1*

<sup>23</sup> Rani řilangi tavera i pa mai isamim, tamlohi vujangi mata leu, peresi kamim Pharisee, kamim ka tapnetano. Kamim ka avulahi vara ha lo sile na nomim tithe na hinau sohena: solat, oke peresi na watakres, pani ka lo kilau purongoi na hinau

aulu mata leu sohena: aria tataholo, řomopoia peresi na vai vevuhi na nomim retitauhi tarea. Ha vai la harihi la sopo aulu jea, pani ha sopo řomaliho hin la haratu la mele aulu jea na nahon God. *Lev 27.30*

<sup>24</sup> Ka tamlohi tatavera matavuso! Ka lo spuni nařihi na hina varihi la sati, pani ka lo řolomi jarohe na hina tavera la sasati!

<sup>25</sup> Rani řilangi tavera i pa mai isamim, tamlohi vujangi mata leu, peresi kamim Pharisee. Kamim ka tapnetano, matan ka lo hoje na pahisa paniken peresi na peleti, pani na lolona mo mařivi na posposi hanmarua peresi posposi řomřomi hasemim. <sup>26</sup> Ka Pharisee matavuso! Ha hoje na lolo paniken peresi na peleti tiroma matan vara pahisara la pa vokevoke.

<sup>27</sup> Rani řilangi tavera i pa mai isamim, tamlohi vujangi mata leu, peresi kamim Pharisee. Kamim ka tapnetano! Matan kamim ka sohena ima taptap laem lulu, pani lolona mo mařivi na sui tamlohi peresi na lumira.

<sup>28</sup> Ale kamim sohena, la hite kamim sohen ka vokevoke, pani ka mařivi na tapnetano peresi na vaivaileu.

<sup>29</sup> Rani řilangi tavera i pa mai isamim, tamlohi vujangi mata leu, peresi kamim Pharisee. Kamim ka tapnetano! Matan ka voro na ima taptap nona přovet, ale ka lakolako na taptap tamlohi tataholo na storera la ulia na tapura, <sup>30</sup> kara, 'Vara kama pa lo toho

na pongi non la nomam tata, kama pa sopo tuenira vara la vili na pŕovet.'

<sup>31</sup> Ale matana, ka lo vereulia vara kamim ka natun la tamlohi atu la lo vili na pŕovet. <sup>32</sup> Ha vai maŕivisi na sava tamamim la tapulona, <sup>33</sup> ka sohena mata! Ka natu mata sasati. Ha pa juri kamim sohena sava na talai mata moruhapu? <sup>34</sup> Matan haratu, a pa řule te pŕovet peresi te tamlohi lelevosahi tolu na tamlohi vujangi mata leu, tatuara ha pa vilimateira na talopeilopei, ale tatuara ha pa rupira na asi maja na nomim ima lotu, ale ha pa tipahira na taon tavera tari la pa vano ea, <sup>35</sup> matan haratu i pa sohen harihi: kamim ha pa lavi na talai mata řae tari nona pŕovet tuai mo tapulo na řaen Abel, tamlohi tataholo atu, mo tikeli na řaen Zechariah natun Barachiah, haratu ka vilia na livuha jara tapu na lolo Temple peresi na jara mata silesilea atu. *Gen 4.8; 2 Chron 24.20-21*

<sup>36</sup> Varařuhu na vereea isamim, la talai sei la pa pala isan pina nike."

### *Iesu Mo Tangisi Jerusalem* (Lk 13.34-35)

Iesu mo mele vereea mara, <sup>37</sup> "Jerusalem o Jerusalem, taon tavera sei tamlohi tatavera la lo vilimatei na pŕovet hinia, ale la lo parumatei la haratu God mo řulera isana. Ko sopo levosahia vara vaha visa moiso na opoia vara a hohovi na natum, sohena tina toa mo lo hohovi na natuna

na ruhuruhu hapana, pani kamim tamlohi tatavera hinia ka řohu! <sup>38</sup> Ko hitea, imam nike, i pa mai sohena jara hasetoho matea. *Jer 22.5*

<sup>39</sup> Matan na vereea isamim, ha pa sopo mele hiteau vavano i tikeli rani atu ha pa vereea vara, 'Leřuhu hin haratu mo lo mai na hijan Moli God'." *Psa 118.26*

## 24

### *Temple I Pa Maroe* (Mk 13.1-2; Lk 21.5-6)

<sup>1</sup> Hitahu, Iesu mara mo lo malue na Temple non Jerusalem, nona tamlohi usuri la mai isana vara la vereea vara la ima tavera atu la řuhu sohena sava. <sup>2</sup> Pani Iesu mo řaramira mara, "Ka hite la ima tari akerihi? Varařuhu na vereea isamim vara i pa sopo te vatu hatea i pa lo toho aulu na vatu tinapua sei vara la pa sopo atu jovjovira!"

### *Rani Rilangi Tavera* (Mk 13.3-13; Lk 21.7-19)

<sup>3</sup> Hitahuna, Iesu mo lo sakele na vuti talu Olive, ale nona tamlohi usuri la mai řořo isana, la vereea lara, "O to vere kamam hinia vara sava matamata natu, kama pa lo kilau matana, vara kama pa levosahia vara nom mele mai peresi na pongi hitahu mo pala."

<sup>4</sup> Iesu mo řaramira mara, "Ha lo kilau ha sopo tinařihi tea i halu kamim, <sup>5</sup> matan tamlohi matuvana la pa mai na hijaku la pa vereea vara enira natu pa Křisto atu, la pa tikau leji na tamlohi matuvana. <sup>6</sup> Ale ha pa rongo

na vuro peresi na sorasorahi vuro, pani ha sopo matahu matan harihi natu, i pa mai tiroma, pani pongi hitahu mo sopo lo pala. <sup>7</sup> Mara jara tavera tinatinapu la pa meresahi hinira, ale supe matea i pa meresahi na supe tinapua. Marua tavera i pa mai, ale mihi i pa hisuhi na jara matuvana. <sup>8</sup> La hinau tari sei la sohena tapulo rongohaji na epe ha'ai vara i lavilavi.

<sup>9</sup> Ale la pa tauri kamim ha vano na rani řilangi sati, la pa vilimatei kamim. Tamlohi tari na jara tavera na varama la pa hitesatihi kamim mata hijaku. <sup>10</sup> Vao tavera la pa tina'rihi na nora rasua hin rani atu, ale la pa turuturu-posi hinira, la pa hitesasati-hira. <sup>11</sup> Ale p'rovet haluhalu matuvana la pa pala, la pa tikau leji na tamlohi matuvana. <sup>12</sup> Ale matan vaivaileu i pa tavera jea, opoia nona tamlohi matuvana la pa ti-hai. <sup>13</sup> Pani harepu mo lo turu řilangi mo tikeli na pongi hitahu, i pa juri. <sup>14</sup> Ale tamlohi la pa retivujavujangi na Reti'ruhu matan mauri atu God mo aulu hinia isana mara jara tinatinapua na varama matan vara la pa levosahia, moiso pongi hitahu i pa pala.

### *Hina Sasati Na Lolo Temple*

*(Mk 13.14-23; Lk 21.20-24)*

<sup>15</sup> Vara ha hite hina lumihahi sei God mo řohu hinia, haratu sei p'rovet Daniel mo lo vereaa tuai moiso, vara mo turu na jara tapu na lolo Temple, hare mo lo evi reti

nike i levosahi na řaramina, *Dan 9.27* <sup>16</sup> mo řuhu vara la haratu la lo toho Judea la rovo la sahe na vutivuti. <sup>17</sup> Mo řuhu vara haratu mo lo toho aulu na pusa imana i pa sopo sevuti sivo na lolona vara i lavi na'rihi na nona hinahinaiu hinia, <sup>18</sup> Ale mo řuhu vara haratu mo lo voko na isa i pa sopo posi vara i ale na nona jaket. <sup>19</sup> I pa rani řilangi isana ha'ai sei la pangepange peresi la haratu la pa lo vasusui na nora pipi hin rani atu! <sup>20</sup> Ha usi'usi isan God vara nomim rovorovo i pa sopo jovi na taro hamariri teni na rani Sabbath. <sup>21</sup> Mo sopo lo te rani sohen rani řilangi tavera atu, mo tapulo na pongi tiroma mo tikeli nake, ale i pa sopo mele tea sohena hin te rani. *Dan 12.1*

<sup>22</sup> Ale vara God i sopo lo vai la rani řilangi atu evira la mele vejuveju, i pa sopo te tamlohi hatea i pa mauri. Pani matan la haratu God mo vi'ronira, enia i pa vai la rani atu evira la mele vejuveju. <sup>23</sup> Moiso vara tea mo vereaa mara, 'Ha kilau mai nike! Křisto atu enia nahai, teni enia natu, sevano' — mo vono, ha sopo rasua. <sup>24</sup> Matan křisto haluhalu peresi na p'rovet haluhalu la pa pala, ale la pa vai na matamata tatavera peresi na hinaiu ma'urahi, matan vara la vaihitea vara la efi tikau leji la haratu Moli mo vi'ronira. <sup>25</sup> Ka hitea, mo sopo lo ranina tataholo pani na lo vereaa kamim hinia moiso.

<sup>26</sup> Ale vara la vereaa isamim lara, 'Ha kilau vano, enia natuvano na jara tano koru!'



— ha sopo vano atu! Teni vara la verea lara, 'Ha kilau mai nike, enia nahai mo lo toho na lolo ima nike!' — ha sopo rasua! <sup>27</sup> Matan rani mata mele mai non Natun Tamlohi i pa mera sohena vaha sei mo vilasi, merana mo tai Opae mo sivo Marino. <sup>28</sup> Vara ko hite na karai la lo avu vano hin te jara, o pa levosahia vara te pahai mo mena atu.\*

*Rani Atu Natun Tamlohi I Pa Mele Mai Hinia*  
(Mk 13.24-27; Lk 21.25-28)

<sup>29</sup> La hinau řilangi atu vara la vano moiso,  
'Vahatea purongo mera alo i pa tihai,  
vitu i pa sopo mele sile na memerana,  
vitusarasara la pa jovjovi na masapa,  
ale God i pa hutehi na suiha tari na tuka'. *Isa 13.10; Joel 2.10*

<sup>30</sup> Ale matamata matan Natun Tamlohi i pa pala na masapa aulu, ale tavgavui tari mata varama la pa tangi mata matahu, moiso la pa hite Natun Tamlohi i pa lo mai na telangi matan tuka na nona suiha peresi na merana tavera. *Dan 7.13; Zec 12.10-14* <sup>31</sup> I pa řule na nona angelo na tiv tavera mata trumpet matea, moiso la pa takonahi la haratu mo viřonira řalihi na varama na jara tari na masapa aulu na varama.

*Vujangi Mata Vipahai Fig*  
(Mk 13.28-31; Lk 21.29-33)

<sup>32</sup> Ha lo levosahi na titileu mata vipahai fig: na rani ran-gana la lo sasarıra, ha pa levosahia vara taro mamasa mo lo mai. <sup>33</sup> Ale kamim sohena, vara ha hite la hinau nike, na lo verea isamim la lo tapulo masese, ha pa levosahia vara Natun Tamlohi mo lo mai mariviti moiso, mo lo turu na matarua. <sup>34</sup> Vararuhu na verea isamim, vara pina nike sei mo lo mauri hin rani atu, la pa sopo eři tihai, vavano la hinau nike, la masese vevuhi tiroma. <sup>35</sup> Tuka enia varama la pa tihai, pani noku reti la pa sopo eři tihai hin te rani.

*Tea Mo Sopo Levosahia*  
(Mk 13.32-37; Lk 17.26-30, 34-36)

<sup>36</sup> Pani rani atu tea i pa sopo eři levosahia vara enia sava rani teni aoa natu. Mo sopo te angelo na tuka, teni Natuna, pani Tama hasena purongo mo levosahia.

<sup>37</sup> Hin rani atu Natun Tamlohi i pa mele mai, i pa sohena rani non Noah. *Gen 6.5-8*

<sup>38</sup> Matan sohen hin pongi atu tuai wai tavera mo sopo lo lolovi na varama, tamlohi la lo vai na hanhani tavera, ale la lo vai na lahi, la lo tulat-ulahe vavano Noah mo unu na Ark. <sup>39</sup> Ale tamlohi la sopo levosahi na sava i pa mai mo sinai wai tatave tavera atu mo mai mo tivesi vevuhira.

\* **24:28:** Iesu mo vere na hija maji avuavu sei 'vulture'. Enia posina mo sohena karai pani enira tamlohi mata ale na hinau mo mate mo ranga moiso. v. 28 Translesen tinapua matea: Vara ko hite na vulture la lo takonahi jara matea, o pa levosahia vara te hinau mo mate atu, ale sohen haratu, vara o hite la matamata sei la malue usuri na noku reti, o pa levosahia vara i pa sopo tuai Natun Tamlohi i pa mele pala.

I pa sohen haratu hin pongi atu Natun Tamlohi i pa mele mai hinia. *Gen 7.6-24*

<sup>40</sup> Hin pongi atu, tamlohi mo rua la pa lo voko na isa, la pa lavi naʻihi matea, matea i pa lo toho. <sup>41</sup> Ale haʻrai mo rua la pa lo visi na flaua, la pa lavi naʻihi matea, matea i pa lo toho. <sup>42</sup> Ale matan haratu, ha tatamahu! Ka sopo levosahia vara sava rani natu, nomim Moli i pa mele mai hinia.

<sup>43</sup> Ale ha lo levosahi hinau akerihi, vara tamlohi taverna mata ima matea i pa lo levosahi na sava aoa na vutepongi sei vara tamlohi vavanaho i pa mai hinia, i pa lo kilau, ale i pa sopo tinaʻihia vara i unu na imana. <sup>44</sup> Ale matan haratu, kamim sohena ha tatamahu, matan ha pa sopo levosahi aoa atu Natun Tamlohi i pa mele mai hinia.

*Hare Enia Tamlohi Lelevosahi?*  
(*Lk 12.35-48*)

<sup>45</sup> Harepu natu, enia sohen volitusi lelevosahi matea, ale mo lo romturu rilangi tarea, vara nona tamlohi taverna mo viʻonia vara i lo kilau na vao volitusi na imana matan vara i sile na hara hinau isara na rani tataholo? <sup>46</sup> Avulahi taverna isan volitusi atu mo lo vai na sava nona tamlohi taverna mo vereea hin rani atu vara i mele mai. <sup>47</sup> Varaʻuru, na vereea isamim, tamlohi taverna atu i pa taua i aulu na nona hinahin角度 tari. <sup>48</sup> Pani vara volitusi sasati matea mo lo hase romromia vara, 'Noku tamlohi taverna i pa sopo mai

vila sei!' <sup>49</sup> Moiso mo tapulo tamaji na tatuana volitusi tinapua, ale mo lo hanhani, ale mo inu peresi la haratu la lo sasaʻuru. <sup>50</sup> Nona tamlohi taverna atu i pa pala na rani teni aoa sei volitusi atu mo sopo levosahia vara i pa pala hinia, <sup>51</sup> ale i pa tai rotoa i taua peresi na tapnetano. Hin jara atu la pa tangtangi, ale la pa ngaʻngaʻori na huʻura mata rongohaji."

## 25

*Haʻrai Maevo Mo Sangavulu*

Iesu mo vereea mara,

<sup>1</sup> "Hin pongi atu, mauri atu God mo aulu hinia i pa sohen haʻrai maevo mo sangavulu sei la lavi na nora lamu potele la vano vara la tapai na tamlohi i pa lahi. <sup>2</sup> Mo lima hinira la rongorongo vono, ale mo lima la lelevosahi. <sup>3</sup> Matan la haratu la rongorongo vono lara la lavi na nora lamu potele, la sopo lavi te wel matara, <sup>4</sup> pani la haratu la lelevosahi la lavi na potele wel peresi na nora lamu potele. <sup>5</sup> Ale tamlohi vara i pa lahi mo sopo mai vila, ale la haʻrai maevo tari atu la tapulo peka, ale la juruvi. <sup>6</sup> Pani na livuha vutepongi la rongo na leo matea mo ulo mara, 'Tamlohi i pa lahi nahai. Ha mai ha tapaia.'

<sup>7</sup> Ale la haʻrai maevo atu la kilau, ale la tai naʻihi na korukoru pingo ruru na nora lamu potele vara lamu la mele memera i ruhu. <sup>8</sup> Pani la haratu la rongorongo

vono, la vereia isan la haratu la lelevosahi lara, 'Ha sile te nomim wel makomona isamam matan nomam lamu potele la lo tapulo mate.'

<sup>9</sup> Pani la haratu la lelevosahi la řaramira lara, 'Wel mo sopo tataholo hiniřa mo isoiso. Ha vano na stoa ha voli te nomim!'

<sup>10</sup> Ale la pa lo vano vara la voli tea, tamlohi vara i pa lahi mo pala, ale la haratu la lo tatamahu la usuria la vano na hanhani lahi, ale la pelatihoro na matarua. <sup>11</sup> Mo sopo tuai la hařai maevo tinapua atu la pala lara, 'Tamlohi tavera! Tamlohi tavera, o roi isamam!'

<sup>12</sup> Pani mo řaramira mara, 'Varařuhu na vereia isamim, na sopo levosahi kamim.' "

<sup>13</sup> Iesu mo mele vereia mara, "Matan hinau atu ha tatamahu, matan ka sopo levosahia vara sava rani teni aoa Natun Tamlohi i pa mele mai hinia."

*Slev Mo Tolu*  
(Lk 19.11-27)

<sup>14</sup> Mo mele vereia mara, "I pa sohena tamlohi matea mo vano na nona hahau matea. Mo tovi na nona slev, ale mo řau na nona hinahinau na limara. <sup>15</sup> Isan matea, mo silea na selen mo lima. Selen matea hinira, mo tataholo mata voli tamlohi matea mata voko mata rani i tari vahatea (1,000). Ale isan matea mo sile na selen mo rua, ale isan matea mo sile na selen matea. Mo silea isara mo tataholo na nora eřia, moiso mo malue mo vano na nona hahau. <sup>16</sup> Haratu mo lo sile na selen mo lima isana tiroma, mo vano vahatea mo voko

peresia, ale mo mele tikeli na selen mo lima tinapua.

<sup>17</sup> Haratu mo lo lavi na selen mo rua mo sohena mo mele tikeli na selen mo rua tinapua. <sup>18</sup> Pani haratu sei mo lo lavi na selen matea, mo vano mo heli na koko matea na lepa mo tavuni jaroři mania atu non nona tamlohi tavera.

<sup>19</sup> Rani matuvana la vano moiso, ale tamlohi tavera non la slev atu mo mele hilu vara i levosahia vara la vai na sava hin la mania atu. <sup>20</sup> Ale haratu mo lo lavi na selen mo lima mo juha mai isana, mo lavi na selen mo lima tinapua hin la haratu mo lo lavira tiroma mo vereia mara, 'Tamlohi tavera, ko sileau na selen mo lima; ale na mele vai na selen mo lima tinapua.' <sup>21</sup> Ale nona tamlohi tavera mo vereia isana mara, 'Ko vai na voko řuhu. Ko řomturu řilangi na nom makomo hinau, ale nake a pa řauho o aulu na hinau mo mařivi. O unu na avulahi tavera non nom tamlohi tavera.'

<sup>22</sup> Ale haratu mo lo lavi na selen mo rua mo juha mai isana, mo lavi na selen mo rua tinapua hin la haratu mo lo lavira tiroma mo vereia mara, 'Tamlohi tavera, ko sileau na selen mo rua; ale na mele vai na selen mo rua tinapua.'

<sup>23</sup> Ale nona tamlohi tavera mo vereia isana mara, 'Ko vai na voko řuhu. Ko řomturu řilangi na nom makomo hinau, ale nake a pa řauho o aulu na hinau mo mařivi. O unu na avulahi tavera non nom tamlohi tavera.'

<sup>24</sup> Ale haratu mo lo lavi na selen matea mo juha mai

isana mo vereea mara, 'Tamlohi tavera, na levosahia vara engko tamlohi řilangi matea, ko lo lavi na vua pahai engko ko sopo lavoa. Ko lo takonahi na wit na jara engko ko sopo hapořahi tea ea,<sup>25</sup> ale na matahu, na vano na jarohi na nom mania na lepa. Nahai, o mele lavi na sava enia nom.'

<sup>26</sup> Pani nona tamlohi tavera mo řaramia mara, 'Engko tamlohi sasati, ko slev maloko vari. Ko řomi vara enau tamlohi řilangi matea, ale na lo lavi na vua pahai na sopo lavoa, ale na lo takonahi na wit na jara na sopo hapořahi tea ea?<sup>27</sup> Vara mo sohena, i pa mele řuhu jea vara o lo tau na mania isana tamlohi bank matan vara a mele pala a pa eři lavi na noku mania peresi haratu makomona bank i pa mele silea aulu na noku mania.'

<sup>28</sup> Ale mo vereea isan te nona slev tinapua mara, 'Ha lavi nařihi selen atu isana, ha silea isan haratu mo lavi na selen mo sangavulu,<sup>29</sup> matan isan la haratu la lavi te hinau, la pa mele silera hin te hinau, ale i pa masurere isana. Pani isan haratu mo lekoleko, sava enia nona tiroma i pa lavi nařihi. <sup>30</sup> Ale ha pulahi slev atu mo sopo řuhu hin te hinau hatea i vano na jara řořoha. Hin jara atu la pa tangtangi, ale la pa ngařngařori na huřura mata hajhaji ea.'

#### *Aria Tavera Mo Lo Mai*

<sup>31</sup> Na rani vara Natun Tamlohi i mai na nona sasarami peresi na angelo tari, hin

rani atu natu i pa sakele na nona jara sakele mata suiha nona Supe. <sup>32</sup> Mara jara tinatinapua na varama la pa turu na nahona moiso i pa asera hatehateahi sohena tavui sipsip matea mo lo ase na pulana sipsip na nani. <sup>33</sup> Ale i pa tau na sipsip na matuana, ale nani na marauna. <sup>34</sup> Ale i pa vereea isan la haratu na matuana vara, 'Ha mai, kamim sei Tamaku mo leřuhu hin kamim! Ha lavi mauri atu God mo aulu hinia sei mo tau mamahunia matamim tuai tiroma moiso mo pa vai na varama. <sup>35</sup> Matan na marohati ka sileau na hanhani, na mařohu ka sileau na inu, enau na vinano matea ka toviau na imamim, <sup>36</sup> mo sopo te noku ruru ka sileau na ruru, na rojo ka mai ka rohiau, na lo toho na ima řilangi, ale ka mai ka hiteau.'

<sup>37</sup> Moiso la tamlohi tataholo atu la pa řaramia vara, 'Moli, nangisa kama hiteho ko marohati, ale kama vahaniho, teni ko mařohu, ale kama sileho na wai? <sup>38</sup> Ale nangisa natu, kama pa hiteho ko vinano, ale kama toviho na imamam, teni ko malamala, ale kama ruruho? <sup>39</sup> Ale nangisa natu, kama hiteho ko rojo teni ko lo toho na ima řilangi, ale kama rohiho?'

<sup>40</sup> Ale Supe i pa řaramira, vara 'Varařuhu na vereea isamim, na rani ko vaia te hinau mo řuhu isan te vorauku teni te vevorai rihirihi hatea, ko lo vaia isaku.'

<sup>41</sup> Ale i pa vereea isan la haratu na marauna vara, 'Ha

malue na nahoku, kamim ka lo toho na ruhuruu lesati, ha unu na hapu matan tui tui atu na tatamahunia matan Tiapolo peresi na nona angelo sati, <sup>42</sup> matan na marohati, pani ka sopo sileau hin te hanhani, na maʻohu, pani ka sopo sileau hin te wai, <sup>43</sup> enau na vinano matea, pani ka sopo toviau na imamim, enau na malamala, pani ka sopo ruruau, na rojo, ale ka sopo mai vara ha rohiau, ale na lo toho na ima ʻilangi, pani ka sopo mai isaku.’

<sup>44</sup> Ale enira sohena la pa ʻaramia vara, ‘Moli, nangisa natu, kama hiteho ko marohati, teni ko maʻohu, teni ko vinano matea, teni ko malamala, teni ko rojo teni ko lo toho na ima ʻilangi, ale kama sopo tueniho?’

<sup>45</sup> Ale i pa ʻaramira vara, ‘Varaʻuru na vereia isamim, matan ka sopo vai te hinau ʻuru isan te voraiku rihirihia hatea ka sopo vaia isaku.’

<sup>46</sup> Ale la haratu, la pa vano la unu na talai matan tui tui, pani la haratu la tataholo la pa unu na mauri tui.’ ” *Dan 12.2*

## 26

*La Opoia Vara Iesu I Mate (Mk 14.1-2; Lk 22.1-2; Jn 11.45-53)*

<sup>1</sup> Iesu mara mo vereia la hinau sei moiso mo vereia isana nona tamlohi usuri mara, <sup>2</sup> “Ka levosahia vara rani mo rua mo lo toho moiso rani Passover i pa mai, ale la pa sile Natun Tamlohi vara la vosaea na talopeilopei.”

*Exo 12.1-27*

<sup>3</sup> Hin rani atu moli mata ʻpʻisi peresi na tamlohi aulu nona tamlohi la pulutahi na ima tavera non ʻpʻisi aulu sei, hijana Caiaphas, <sup>4</sup> ale la hatihia jara matea vara la pa taurilati Iesu na malele halu vara la vilia.

<sup>5</sup> Pani la vereia lara, “I pa sopo na livuha hanhani Passover, matan vara i vono, tamlohi la pa lolokoru tavera, ale ʻa sopo eʻi vaira la toho malum.”

*Haʻai Matea Mo Sile Na Oloolo Tavera Isan Iesu (Mk 14.3-9; Jn 12.1-8)*

<sup>6</sup> Ale hin rani atu Iesu mo lo toho Bethany na iman Simon, tamlohi lepros matea, <sup>7</sup> Iesu mo pa lo sakele na tepel ea, ale haʻai matea mo mai isana, mo lo tauri na potele hasori matea la tovia alabaster, volina mo tavera jea, ale mo rengia na patuna.

<sup>8</sup> Nona tamlohi usuri lara la hitea la lolokoru lara, “Mata sava mo lo surei komokomoa? <sup>9</sup> Matan hinau sei o eʻi haʻehia mata mania tavera, ale o silea isana tilavono.”

<sup>10</sup> Pani Iesu mo levosahi na sava la lo vereia, ale mo vereia isara mara, “Mata sava ka lo ari haʻai nike? Enia mo vai na hinau ʻuruʻuru matea isaku. <sup>11</sup> Matan tilavono la pa lo toho peresi kamim tarea, pani enau a pa sopo toho peresi kamim tarea. *Deut 15.11*

<sup>12</sup> Enia mo surei hasori nike na epeku matan vara i tatamahuni na epeku mata noku tavuni. <sup>13</sup> Varaʻuru na vereia isamim, sava jara Retiʻuru la pa sorahia ea na

varama, la pa sorahi na sava mo vaia vara tamlohi la pa mele řomřomia.”

*Judas Mo Turuposi Hin Iesu*

(Mk 14.10-11; Lk 22.3-6)

<sup>14</sup> Ale vonan la tupu sangavulu řomana mo rua atu hijana Judas Iscariot mo vano isana moli mata přis, <sup>15</sup> mo vereea mara, “Ha pa sile na sava isaku vara a taua na limamim?” Ale la vuti la silea na silver selen mo ngavulu tolu. *Zec 11.12*

<sup>16</sup> Moiso, mo tapulo hin rani atu mo tapulo aleale masapa vara i turuposi hinia.

*Hanhani Mata Passover*

(Mk 14.12-21; Lk 22.7-13; Jn 13.21-30)

<sup>17</sup> Na rani tiroma mata hanhani tavera mata pereti mo sopo te isi hinia, tamlohi usuri la mai isan Iesu lara, “Ko opoia vara kama pa tatamahu epu vara o pa hani na Passover ea?”

<sup>18</sup> Mo vereea mara, “Ha unu na taon tavera, ale ha hite na tamlohi matea, ale ha vereea isana vara, “Tija mo vereea mara, noku rani mo mai mariviti, a pa hani na hanhani mata Passover peresi na noku tamlohi usuri na imam.” <sup>19</sup> Ale nona tamlohi usuri la vaia sohena mo vereea isara, ale la tatamahuni na hanhani Passover.

<sup>20</sup> Ale na ravravi mo sakele na tepel peresi la tamlohi usuri tupu sangavulu řomana mo rua atu. <sup>21</sup> Ale la pa lo hanhani mo vereea mara, “Varařuhu na vereea

isamim, vonamim matea i pa turuposi hiniau.”

<sup>22</sup> La rongo mo sati, ale la tapulo vereea isana enira hatehateahi lara, “Tija, enau teni mo vono?”

<sup>23</sup> Mo řaramia mara, “Matea mo lo seri na pereti peresiau na pesin matea, i pa turuposi hiniau. *Psa 41.9*

<sup>24</sup> Natun Tamlohi i pa vano na malele mata mateia sohen la ulia na Retulia matana, pani rani řilangi tavera isan haratu mo lo turuposi hin Natun Tamlohi. I pa mele řuhu jea isana vara tamlohi atu i sopo vora.”

<sup>25</sup> Judas haratu sei i pa turuposi hinia mo řaramia mara, “Tija, korong enau teni mo vono?”

Iesu mo vereea isana mara, “Engko ko hase vereho moiso.”

*Isoison Hanhani Tavera Atu*

(Mk 14.22-26; Lk 22.14-23; 1Co 11.23-25)

<sup>26</sup> Ale lara la lo hanhani, Iesu mo lavi na pereti mo topea mo vere meje isan God matana, ale mo silea isana nona tamlohi usuri, ale mara, “Ha lavia, ha hania, enia epeku.” <sup>27</sup> Ale mo tauri na paniken matea, mara mo vere meje isan God, mo silea isara mara, “Ha inu hinia, kamim mo isoiso, <sup>28</sup> matan harihi enia řaeku mata retitauhi God mo vaia matan vara řaeku i pa roro matan vara i řomi na hehe nona tamlohi matuvana. *Exo 24.8; Jer 31.31-34*

<sup>29</sup> Na vere kamim hinia, enau a pa sopo mele inu

waen nike i tikeli pongi atu a pa mele inua peresi kamim hin mauri atu Tamaku mo supe hinia.”<sup>30</sup> Lara la lalavete na vete matea moiso la malue la sahe na Vuti talu Olive.

*Retitauhi Non Peter*

(Mk 14.27-31; Lk 22.31-34; Jn 13.36-38)

<sup>31</sup> Ale Iesu mo vereā isara mara, “Kamim mo isoiso ha pa rovo hiniāu nohorihī na vutepongi. Matan la ulia na Retiulia moiso vara,

‘A pa vilijovi na tavui sipsip ale sipsip la pa rovorovo.’ *Zec 13.7*

<sup>32</sup> Pani hitahu na noku sauteterahi, a pa vano tiroma hin kamim Galilee.” *Mt 28.16*

<sup>33</sup> Peter mo řaramia mara, “Vara enira mo isoiso la rovo hiniho, enau a pa sopo efi rovo hiniho.”

<sup>34</sup> Iesu mo vereā mara, “Varařuhu na vereā isam, hin vutepongi akerihī purongo, engko o pa vunvuniau vaha tolu, tiroma moiso toa vari i pa tarere.”

<sup>35</sup> Peter mo vereā isana mara, “Vara a pa mate peresiho, a pa sopo vunvuniho!” Nona tamlohi usuri mo isoiso la vereā sohena.

*Iesu Mo Usiusi*

(Mk 14.32-42; Lk 22.39-46)

<sup>36</sup> Moiso, Iesu mo vano peresira na jara matea hijana Gethsemane, ale mo vereā isana nona tamlohi usuri mara, “Ha sakele nike tako, a pa vano sevano a usiusi.”

<sup>37</sup> Moiso mo lavi Peter peresi la natun Zebedee atu mo rua John enia James, ale mo tapulo rongo mo sati, ale řomina mo sopo sakele.

<sup>38</sup> Ale mo vereā isara mara, “Mapuku mo rongo mo sati tavera vara i mate. Ha lo toho nike, ha lo kilau peresiau.”

<sup>39</sup> Mo mele juha vano makomona, ale mo popovi-toho na nahona na lepa, ale mo usiusi mara, “Tamaku, vara mo tataholo, o nařihī rani řilangi nike isaku, pani o sopo usuri na masaloku, o usuri na masalom purongo.”

<sup>40</sup> Moiso mo mele mai isana nona tamlohi usuri mo hitera la juruvi řomaliho. Mo vereā isan Peter mara, “Kamim, ka sopo efi kilau peresiau mata aoa matea purongo?”

<sup>41</sup> Ha kilau, ha usiusi vara ha pa sopo efi jovi na rani vaihite sei la lo mai isamim, řomimim mo řuhu, pani na suihamim purongo ha sopo efi vaira.”

<sup>42</sup> Mo mele sahe haruana vara i usiusi mara, “Tamaku, vara o sopo nařihī paniken akerihī vavano a inua, o usuri na masalom.”<sup>43</sup> Ale mo mele mai isara mo hitera la juruvi řomaliho matan matara la puhoni.

<sup>44</sup> Ale mo mele malue isara, mo vano mo mele usiusi hatoluna, mo mele vereā la retireti atu tiroma mo lo verera.

<sup>45</sup> Moiso mo mai isana nona tamlohi usuri mo vereā isara mara, “Ha pa juruvi, ale ha mapu hin te rani tinapua. Ka hitea, mariviti vara la turuposi hin Natun Tamlohi natu, ale i pa vano na lima tamlohi hehe.”<sup>46</sup> Ha turu, řa lo vano! Ka hitea, tamlohi atu mo lo turuposi hiniāu mo lo mai mariviti.”

*La Taurilati Iesu*

(Mk 14.43-50; Lk 22.47-53;  
Jn 18.3-12)

<sup>47</sup> Mo pa lo retireti, Judas mo pala, vonan la tupu sangavulu romana mo rua atu matea peresi na vao tavera matea la tai isan moli mata p̄ris peresi na nora tamlohi aulu, ale la lo lavi na sita vuro peresi na maja. <sup>48</sup> Tamlohi turuposi atu mo pete verera na matamata matea moiso mara, “Haratu a pa pungosia, enia natu tamlohi atu; ha pa taurilatia.” <sup>49</sup> Ale mo mai isan Iesu vahatea mara, “Tija, mo ruhu!” Ale mo pungosia.

<sup>50</sup> Iesu mo vereia isana mara, “Tapala, o vai na sava ko mai vara o vaia.” Moiso la mai isana la tauria vara la taurilatia. <sup>51</sup> Ale vahatea purongo, vonan la haratu matea mo lo toho peresi Iesu mo řirahi na limana, mo reve nařihi na nona sita vuro, ale mo langa na tavalu pero slev nona p̄ris aulu.

<sup>52</sup> Moiso Iesu mo vereia isana mara, “O mele tau na nom sita na jarana. Matan haratu la lo lavi na sita vuro la pa mate na sita vuro. <sup>53</sup> Ka sopo levosahia vara a eři tovi isan Tamaku vara i řule na angelo i jeu 72,000, ale vahatea purongo la pa tingira? <sup>54</sup> Pani sohena sava natu, hinau la pa masese sohena Retitapu mo vereia vara i sohena?”

<sup>55</sup> Hin rani atu Iesu mo vereia isan vao atu mara, “Ka mai peresi na sita vuro peresi na maja sohena vara ka lo vano mata taurilati na tamlohi sasati matea? Tarea na lo sakele na lolo Temple na

lo vujangi, pani ka sopo tauriau! <sup>56</sup> Pani la hinau sei la pala sohena matan vara Retitapu nona p̄rovet tuai la pa masese.” Moiso nona tamlohi usuri tari la malue la rovo hinia.

*Mo Turu Na Naho Tamlohi Tatavera*

(Mk 14.53-65; Lk 22.54-55,  
63-71; Jn 18.13-14, 19-24)

<sup>57</sup> Ale la haratu sei la lo taurilati Iesu la tiroma hinia mo vano na iman Caiaphas, enia p̄ris aulu, tamlohi vujangi mata leu peresi na nora tamlohi aulu la lo takonahi hin jara atu. <sup>58</sup> Ale Peter mo lo usuria asau makomona, mo vano mo tikeli na rope iman p̄ris aulu atu, ale mo unu na lolona, ale mo lo sakele peresi na tamlohi kilau atu matan vara i pa hite na isoi-sona.

<sup>59</sup> Ale moli mata p̄ris peresi na tamlohi tari tinapua mata council la lo aleale tamlohi vara la pa vere te retireti halu na sava Iesu mo lo vaia moiso matan vara la pa eři vilimateia matara, <sup>60</sup> pani mo sopo tea, hina purongo vara tamlohi halu mo mařivi la turu na nahora. Hitahuna, mo rua la pala mai, <sup>61</sup> lara, “Tamlohi akerihi mo vereia mara, ‘Enau a eři komo na Temple non God, ale a mele voroa na rani i tolu purongo.’”

<sup>62</sup> Ale p̄ris aulu atu mo turu sahe mara, “O pa řaramia teni mo vono? Sava nahai la tamlohi nike, la lo retivuhesia matam?” <sup>63</sup> Pani Iesu mo lo turu tapanono. Ale p̄ris aulu mo vereia isana mara, “Na usiho vara o retitauhi hin



God mauri vara o vere kamam hinia vara engko natu, Křisto atu Natun God?"

<sup>64</sup> Iesu mo vereia isana mara, "Engko ko pete vereia moiso, pani na vereia isam vara i pa sopo tuai o pa hite Natun Tamlohi i sakele na matua suiha na tuka, ale mo lo mai na telangi matan tuka."

*Dan 7.13*

<sup>65</sup> Moiso pñis aulu mo řari na nona ruru mara, "Mo lo vaia sohena enia God. Ra sopo mele opoi te tamlohi tuetueni tinapua, ka pete rongo na nona reti hehe hin God nakerihi moiso. *Lev 24.16*<sup>66</sup> Nomim aria i pa vano sohena sava?"

La řaramia lara, "Mo tataholo vara i mate."

<sup>67</sup> Moiso la litovi na nahona, la tuhia, ale hai la vojahia, *Isa 50.6*<sup>68</sup> lara, "O reti mangovi isamam Křisto, hare natu, mo tuhiho?"

*Peter Mo Vunvuni Iesu*

*(Mk 14.66-72; Lk 22.56-62; Jn 18.15-18, 25-27)*

<sup>69</sup> Hinau atu mo lo vano, ale Peter mo lo sakele na jingoima na lolon ropen ima atu, ale slev hařai matea mo sinai isana mara, "Engko sohena, ko lo toho peresi Iesu mara Galilee atu!"

<sup>70</sup> Pani mo vunvunia na nahon vao atu mara, "Enau na sopo levosahi na sava ko lo vereia."

<sup>71</sup> Ale mara mo malue na matarua atu slev hařai tinapua matea mo hitea mo vereia isan la haratu la lo turu mariviti isana mara, "Tamlohi nike, mo lo toho peresi Iesu mara Nazareth."

<sup>72</sup> Ale mele vahatea mo vunvunia na retitauhi matea mara, "Na sopo halu, na sopo levosahi tamlohi sei."

<sup>73</sup> Ale mo sopo tuai la haratu la lo turu ea la mai isan Peter lara, "Enjora, engko vonara matea matan leom mo vereuliho."

<sup>74</sup> Ale mo tapulo lesati hinia hasena moiso mo retitauhi mara, "Na sopo levosahi tamlohi sei." Ale vahatea purongo toa vari matea mo tarere.

<sup>75</sup> Moiso Peter mo mele řomřomi na retireti non Iesu, "Toa i sopo lo tarere o pa vunvuniau vaha tolu." Ale mo malue hin jara atu mo tangi řomina mo sati tavera.

## 27

*La Lavia Mo Vano Isan Pilate*

*(Mk 15.1; Lk 23.1-2; Jn 18.28-32)*

<sup>1</sup> Mo mele rani sahe na řalavuhō jea, moli mata pñis tari peresi na tamlohi aulu nona tamlohi la pulutahi vara la vai nora řomřomi tavera vara la pa tau Iesu na mateia. <sup>2</sup> Ale la lihoa la tiroma hinia mo malue la taua na liman Pontius Pilate, tamlohi tavera matan Rome sei mo lo aulu hin Israel.

*Judas Mo Mate*

*(Acts 1.18-19)*

<sup>3</sup> Moiso Judas, haratu sei mo lo turuposi hinia mara mo hitea vara la pa sile na talai tavera isan Iesu, mo posi na řomina, ale mo mele lavi la silver selen atu mo ngavulu tolu mo hilu mo vano isana moli mata pñis peresi na tamlohi aulu,

4 mara, “Na vai na hehe matan na turuposi na řae vokevoke.”

Lara, “Kama sopo opoia vara kama levosahia, enia nom hinau.” 5 Ale mo pulahi la silver selen atu la sivo na lolo Temple, mo malue mo vano mo lihoa hasena.

6 Pani moli mata pñis la lavi la silver selen atu lara, “Vara řa mele taura na jara mania na Temple i pa tope na leu matan mania akerihi enia mania mata řae.” 7 Ale la matavuhi la hatihia vara la pa lavi mania atu, la voli na lepa matea la tovia ‘Lepa non Potter’ matan vara la pa lo tavuni na tamlohi la sopo Jew hinia. 8 Matana, lepa atu la tovi ‘Lepa mata Rae’ mo tikeli nake. 9 Ale sava reti pñovet Jeremiah mo vereea mo masese mara, ‘Ale la lavi na silver selen mo ngavulu tolu

(30), voli mauri sei tatua natun Israel la hatihia vara mo tataholo hinia, 10 ale la silera mata voli lepa non Potter sohen Moli God mo retileu hiniau’. *Zec 11.12-13*

#### *Pilate Mo Tapai Iesu*

(*Mk 15.2-5; Lk 23.3-5; Jn 18.33-38*)

11 Moiso Iesu mo turu na nahon tamlohi tavera matan Rome, ale tamlohi tavera atu mo usia isana mara, “Engko natu, Supe nona Jew?”

Iesu mara, “Engko ko pete vereea moiso.”

12 Pani moli mata pñis peresi na vajiahara sei la aulu lara la tuvaia hin te hinau, Iesu mo sopo řaramira. 13 Moiso Pilate mo vereea isana mara, “Ko sopo

rongo na hinau matuvana sei la lo retivuhesia matam?”

14 Pani Iesu mo sopo řaramia, mo sopo řarami te tuvai hatelete, ale tamlohi tavera atu mo mañurahi tavera matana.

#### *La Taua Vara I Mate*

(*Mk 15.6-15; Lk 23.13-26; Jn 18.39-19.16*)

15 Hin rani atu, tarea na hanhani tavera, tamlohi tavera atu mo lo juri na tamlohi matea na ima řilangi mo lo toho isana vao atu vara sava tamlohi vao atu mo opoia vara i pa juria. 16 Ale hin rani atu tamlohi sasati matea la levosahi mamahunia hijana Barabbas mo lo toho na ima řilangi. 17 Ale la tamlohi tavera atu lara la pulutahi moiso, Pilate mo vereea isara mara, “Ka opoia vara a teri hare, Barabbas teni Iesu sei la tovia Křisto?” 18 Mo vere haratu matan mo levosahia moiso vara la tau Iesu na limana mata nora mereimerei purongo.

19 Mo sopo haratu purongo, pani na rani mo pa lo sakele na nona jara sakele mata aria, narouna mo sohai na retisohai matea isana mara, “O sopo tikeli tamlohi vokevoke sei, matan řomiku mo sopo sakele matan noku mamavuho hinia nahapani mo sasati.”

20 Ale moli mata pñis peresi na vajiahara sei la aulu la haluhalu vao atu vara la usi Barabbas vara la pa komo Iesu. 21 Tamlohi tavera atu mo mele vereea isara mara, “Sahara hinira mo rua ka opoia vara a juria nomim?”

Ale lara, “Barabbas!”

<sup>22</sup> Pilate mo vereea isara mara, “Vara sohena a pa vai na sava isan Iesu haratu la tovia Křisto?”

Enira mo isoiso lara, “Vosaea na talopeilopei!”

<sup>23</sup> Ale mo vereea mara, “Mata sava? Mo vai na sava hina sati?”

Pani la mele ngara lara, “Ha vosaea na talopeilopei!”

<sup>24</sup> Ale na rani Pilate mo hitea vara i pa sopo eři jeu na řomira, ale mara mo hitea vara tamlohi la tapulo lolokoru moiso pani mo hitea vara i pa sopo eři vaira la toho malum, mo lavi na wai, ale mo javulahi na limana na nahon vao atu mo vereea mara, “Enau na vokevoke na řaen tamlohi nike: enia nomim hinau.” *Deut 21.6-9*

<sup>25</sup> Tamlohi tari hin vao atu la řaramia lara, “Raena i pa toho hin kamam peresi na natumam!”

<sup>26</sup> Moiso mo vai Barabbas mo materi usuri na řomira, ale nona tamlohi vuro la rupi Iesu na asi maja, moiso la lavia vara la vosaea na talopeilopei.

*Tamlohi Vuro La Vaivai Iesu*

(*Mk 15.16-21; Jn 19.2-3*)

<sup>27</sup> Moiso tamlohi vuro non tamlohi tavera atu la lavi Iesu mo sivo na jara tavera matea na lolo patu ima non tamlohi tavera atu, ale la tovi matavuhi na tamlohi vuro matuvana la mai la turu na nahona, <sup>28</sup> ale la nařihi na nona ruru, la rua na ruru peravu matea majhina mo perpel, <sup>29</sup> ale la viriviri na řongořongo matea la vaia na kaulu la taua na patuna, ale

la tau na mavuro matea na matua limana, ale la popovi-toho na nahona la lo vaivaia lara, “Ha kilaua! Supe nona Jew.” <sup>30</sup> Moiso la litovia la lavi nařihi mavuro atu, ale la lo hamaji na patuna hinia.

*La Vosaea Na Talopeilopei*  
(*Mk 15.22-32; Lk 23.27-43; Jn 19.17-27*)

<sup>31</sup> Ale lara la vaivaia mo isoiso, la nařihi pa ruru peravu atu la mele rua na nona ruru, ale la tiroma hinia vara la vano la vosaea na talopeilopei. <sup>32</sup> La pa lo malue na malele, ale tamlohi vuro la tapai na tamlohi matea Simon mara Cyrene. La ngurunguru hinia vara i lavi na talopeilopei non Iesu.

<sup>33</sup> Moiso na rani la kakau na jara matea hijana Golgotha, – řaramin Golgotha enia Jara Sui Patu Tamlohi <sup>34</sup> la sile Iesu na waen la hohoia peresi na hinau matea mo hohona vara i inua, pani mara mo inu mo rongoa mo řohu vara i inua. *Psa 69.21*

<sup>35</sup> Ale lara la vosaea na talopeilopei moiso, la asehi na nona ruru isara na nora roro matea. *Psa 22.18*

<sup>36</sup> Moiso la sakele la lo kilaua la lo saovia hin jara atu.

<sup>37</sup> La vosae na retiararia matea aulu na patuna mo vereea mara,

### **Haranike nahai enia Iesu Supe nona Jew**

<sup>38</sup> Hin rani atu la vosae na tamlohi vili na tamlohi mata vavanaho mo rua tinapua na talopeilopei peresia, matea na matuana ale matea na marauna. <sup>39</sup> Ale la haratu la lo hahau roto jara atu la lo vaivaia, la lo pulapulahi na

patura isana *Psa* 22.7; 109.25<sup>40</sup> lara, “Engko sei vara o pa komo na Temple, ale a pa mele voroa na rani i tolu purongo, o hasem jurihio! Vara engko Natun God, o sevuti hin talopeilopei sei!” *Mt* 26.61; *Jn* 2.19

<sup>41</sup> Ale moli mata p̄ris peresi na tamlohi vujangi mata leu peresi na tamlohi aulu sohena la vaivaia lara, <sup>42</sup> “Mo lo juri na tamlohi tinapua: mo sopo ēri juria hasena. Enia Supe non Israel, řa hitea vara i sevuti nakerihi na talopeilopei, ale řa pa ēri rasua. <sup>43</sup> Enia mo tau na nona rasu hin God, mo řuhu vara God i pa juria nakerihi vara na masalona, matan mo lo vereea mara, ‘Enau Natun God.’ ” *Psa* 22.8<sup>44</sup> Ale la tamlohi mata vili na tamlohi mata vavanaho atu sohena la vaivaia hin malele atu.

### *Iesu Mo Mate*

(*Mk* 15.33-41; *Lk* 23.44-49; *Jn* 19.28-30)

<sup>45</sup> Ale na livuha rani řořoha tavera matea mo tavuni na jara tari mo tikeli na matan alo mo tolu na ravravi. <sup>46</sup> mariviti na matan alo mo tolu na ravravi, Iesu mo ulo aulu na leo řilangi matea mara, “Eli, Eli, lema sabatani?” Raramina, ‘Noku God, noku God, mata sava ko rovo hiniu?’ *Psa* 22.1

<sup>47</sup> Ale tamlohi hai la lo turu mariviti atu la rongoa lara, “Tamlohi nike, mo lo tovi Elijah.” <sup>48</sup> Ale vahatea purongo, vonara matea mo maro vano mo lavi na tavalu ruru matea la řuřunia na waen hohona, ale mo sohaia na mavuro mo

sahe isana vara i inua. *Psa* 69.21

<sup>49</sup> Pani tatuara lara, “O lo saovi tako, řa pa hitea vara Elijah i pa sinai i juria teni i vono!”

<sup>50</sup> Ale Iesu mo mele ulo řilangi na leo tavera matea, ale maromaronona mo isoiso.

<sup>51</sup> Ale vahatea purongo, ruru tavera atu na lolo Temple mo mařari mo rua mo tapulo aulu mo tikeli atano. Ale lepa mo hisu, ale vatu la mavua. *Exo* 26.31-33

<sup>52</sup> Ale taptap la roi moiso, ale tapuhi matuvana non God sei la mate moiso la mele turu, <sup>53</sup> ale la malue na tapura hitahu na sauteterahi non Iesu, ale la unu Jerusalem la pala isana tamlohi matuvana ea.

<sup>54</sup> Na rani captain mata tamlohi vuro peresi la haratu la lo kilau saovi Iesu, lara la hite na mihi, ale sava mo masese, la mařurahi tavera jea lara, “Varařuhu, tamlohi nike, enia Natun God!”

<sup>55</sup> Hin rani atu, hařai matuvana sei la tai Galilee la lo usuri Iesu la lo tuenia la lo turu asau la lo kilaua. <sup>56</sup> Mary Magdalene peresi Mary tinan James enia Joseph, ale tinan la natun Zebedee, James enia John, la lo toho hin vao atu.

### *La Tau Iesu Na Tapuna*

(*Mk* 15.42-47; *Lk* 23.50-56; *Jn* 19.38-42)

<sup>57</sup> Mo lo ravravi tamlohi tavg matea mo tai Arimathea mo mai hijana Joseph, enia sohena tamlohi usuri non Iesu matea. <sup>58</sup> Enia mo vano mo hite Pilate mo usia vara i ēri lavi na tarapen Iesu. Ale Pilate mo retileu

vara la silea isana. <sup>59</sup> Moiso Joseph mo lavi tarape atu, mo leputia na ruru lulu matea mo vokevoke, <sup>60</sup> ale mo taua na tapuna paro sei mo taia na vatu. Mo kuresi horo na vatu tavera matea na mataruan tapu atu, ale mo mele vano. <sup>61</sup> Mary tinapua atu peresi Mary Magdalene la lo toho atu la lo sakele na tavalu taptap.

<sup>62</sup> Mo mele rani sahe, hin rani atu mo usuri na rani mata Tatamahu mata Passover, moli mata p̄ris peresi na Pharisee la pulutahi na nahon Pilate. <sup>63</sup> Ale lara, “Tamlohi tavera, kama řomřomia vara tamlohi halu atu mo verea na rani mo pa lo mauri mara, ‘Rani i tolu i vano moiso, a pa mele turu’.” <sup>64</sup> Matana, o retileu vara la turuhoro na tapuna i tikeli na hatolu rani, vara i vono, nona tamlohi usuri la pa vano la vanaho na tarapena, ale la pa verea isana tamlohi vara, ‘Mo mele turu na nona mateia.’ Ale halu atu hitahu i pa mele sati jea i jeu haratu tiroma.”

<sup>65</sup> Pilate mo verea isara mara, “Kamim nomim tamlohi kilau hai, ha vano ha kilau mamahunia sohena ha eri vaia.” <sup>66</sup> Ale la vano la kaluti horo na vatu mataruan taptap atu, ale la tau na tamlohi kilau la lo kilaua.

## 28

### *Iesu Mo Mele Mauri*

(Mk 16.1-8; Lk 24.1-12; Jn 20.1-10)

<sup>1</sup> Sabbath mo isoiso, ale mariviti vara i rani na řalavuhu na Sunday, ale

Mary Magdalene peresi Mary tinapua atu matea la vano vara la hitea na tapuna. <sup>2</sup> Vahatea purongo mihi tavera matea mo vili na jara, ale angelo non Moli God matea mo sevuti na tuka. Mo kuresi nařihi vatu atu, ale mo lo sakele aulu hinia. <sup>3</sup> Angelo atu mo memera sohena vaha, ale nona ruru mo lulu sohena katen. <sup>4</sup> Pa la tamlohi kilau atu la savaravara na matahu la jovi na lepa sohen la mate.

<sup>5</sup> Angelo atu mo verea isan la hařai atu mara, “Ha sopo matahu! Na levosahia vara ka lo ale Iesu, haratu la vosaea na talopeilopei. <sup>6</sup> Enia mo sopo toho nike. God mo sauteterahia moiso, mo mele mauri, mo sohen haratu Iesu mo verea vara i pa sohena. Ha mai, ha hite na jara sei la tau na tarapena ea. <sup>7</sup> Ha vila, ha vere na nona tamlohi usuri vara mo turu na mateia mo mele mauri, ale ha levosahia vara enia mo lo vano tiroma Galilee hin kamim. Ha vano atu, ha pa hitea ea. Hinau nike natu, na sinai vara a verea isamim.”

<sup>8</sup> Pa la hařai la matahu, pani la avulahi tavera na rani la malue na tapuna, la maro vila vara la vano la verea isana nona tamlohi usuri. <sup>9</sup> Vahatea purongo Iesu mo tapaira mo sile na retioloole isara. La vano mariviti isana, la popovitoho la tauri na palona, la lotua. <sup>10</sup> Moiso Iesu mo verea mara, “Ha sopo matahu! Ha vere na noku tamlohi usuri vara la vano Galilee. La pa hiteau atu.”

*Retireti Nona Tamlohi Kilau*

<sup>11</sup> Na rani la hañai atu la pa lo toho na malelera, ka levosahia, tamlohi vuro hai sei la lo kilau na tapuna, la vano la unu Jerusalem. La vere na hinau tari sei la masese isana moli mata pñis. <sup>12</sup> Ale matana, moli mata pñis lara la pulutahi peresi na vaji-ahara sei la aulu, la hatihia vara la pa sile te mania tavera luhu isana tamlohi vuro. <sup>13</sup> La vere a isana tamlohi vuro lara, “Ha vere a isana tamlohi tari vara tamlohi usuri non Iesu la mai na vutepongi la vanaho na tarapena na rani ka lo juruvi. <sup>14</sup> Vara nomim tamlohi tavera i rongo hinau nike, kamam kama pa retireti isana. Romimim i sopo kaka hinia.” <sup>15</sup> Ale pa la tamlohi vuro atu la lavi pa mania atu la vaia sohen la vere a isara. Ale Jew matuvana la pa lo vujangi na tatuara hin sorasorahina atu mo tikeli nake.

### *Nona Tamlohi Usuri La Hitea*

(*Mk 16.14-18; Lk 24.36-49; Jn 20.19-23; Acts 1.6-8*)

<sup>16</sup> Ale la tamlohi usuri tupu sangavulu řomana matea atu non Iesu, la sahe na vutivuti matea Galilee, jara atu natu, Iesu mo vere a vara i pa tapaira ea. <sup>17</sup> Ale lara la hitea, la lotua. Pani tatuara la lo řom rua.

<sup>18</sup> Iesu mo mai isara, ale mo vere a mara, “God mo sileau na suiha tari vara a aulu na tuka peresi na varama. <sup>19</sup> Ha vano isana mara jara tinatinapua na varama, ale ha vujangira vara la mai noku tamlohi usuri. Ha paptijo hinira

na hijan Tama, Natuna peresi na Tanume Tapu, <sup>20</sup> moiso ha vujangira vara la taurilati na hinau tari sei na vere a isamim moiso, ale ha lo levosahia, enau a pa toho peresi kamim tarea i tikeli na isoi-son pongi nike!”

## Retiruhu Hin Iesu Křisto Mark Mo Ulia Puku Nike

Tamlohi hai la lo řomřomia lara John Mark natu mo ulia, hara sei Paul mo lavia hitahu na nona tiroma hahau (Acts 12.25). Mo ulia na sava vavahinau Iesu mo lo vaira: Tiroma Iesu mo viřoni tamlohi mo vati vara la usuria (1.16-20), moiso mo pa tapulo vai na hina mařurahi, mo titiu narihi na tanume sasati na tamlohi matea (1.21-28), mo tueni vepalihan Peter (1.30-31), vao tamlohi rojoa (1.32-34), peresi na tamlohi lepros matea (1.40-45), Iesu mo vai na hinau tari nike na suihan God.

Haratu la lo tiroma na Jew la řohu hin Iesu mata nona retireti (2.2-3.6), ale la aleale malele vara la pa vilimateia hinia (11.18). Tanume sasati la hitevosahi na suihana, la levosahia vara enia Natun God tataholo, pani Iesu mo reti horora vara la sopo mele vereea isana tamlohi hin rani atu.

Ra eři hitea vara řomřomi tavera non Mark enia vara Iesu enia tamlohi matea mo lavi na rani řilangi matan enia Jujuri atu sei God mo řulea mo sinai na varama, enia Natuna tataholo (8.31-33; 9.30-31; 10.33-34), Tamlohi atu Provet Daniel mo lo vereea tuai jea moiso (Dan 7.14).

**Hinahinau Hin Puku Akerihi**

1. Reti Hin John Tamlohi Paptijo (1.1-8)
2. Paptijo Non Iesu, Tiapolo Mo Vaihitea (1.9-13)
3. Iesu Hin Galilee (1.14-9.50)
4. Iesu Mo Sahe Jerusalem (10.1-52)
5. Isoiso Rani Non Iesu (11.1-15.47)
6. Iesu Mo Mele Mauri (16.1-8)
7. Iesu Mo Pala (16.9-20)

### *John Tamlohi Paptijo*

*(Mt 3.1-12; Lk 3.1-18; Jn 1.19-28)*

<sup>1</sup> Harihi enia tapulo Retiruhu hin Iesu Křisto, Natun God.

<sup>2</sup> Sohen přovet Isaiah mo ulia mara,

‘Eh! Ko hitea? Na lo řule na noku vahařule vara i tiroma hiniho,

i pa vai na malele la tataholo matam.’ *Mal 3.1*

<sup>3</sup> ‘Na jara hasetoho leona mo lo ulo mara:

Ha vasahi na malelen Moli God!

Ha tano na malelena i tataholo.’

*Isa 40.3*

<sup>4</sup> Ale John mo pala, mo lo paptijo na tamlohi na jara hasetoho matan Judea, mo lo retivujavujangi isana tamlohi vara la lavi na paptijo mata posi na hehe matan vara Moli i řomira. <sup>5</sup> Ale tamlohi tari na lolon Judea peresi Jerusalem, la lo vano vara la hite John, ale enia mo lo paptijo hin la haratu la lo taviti na nora hehe na wai Jordan.

<sup>6</sup> John mo ru na ruru la vaia na vulu camel, ale mo otioti na huri buluk; hana hinau

enia hatpoha peresi na tau sugabag sei waina mo meji. 2  
*Ki 1.8*

<sup>7</sup> Ale mo lo retivujavujangi mara, “Tamlohi matea i pa mai hitahu hiniau mo aulu mo jeuau, enau na sopo tatahola vara a rautoho a lavi narihi na asi eve palona.

<sup>8</sup> Enau na lo paptijo hin kamim na wai purongo, pani enia i pa paptijo hin kamim na Tanume Tapu.”

*John Mo Paptijo Hin Iesu  
(Mt 3.13-17; Lk 3.21-22)*

<sup>9</sup> Hin rani atu Iesu mo tai Nazareth na jara Galilee, mo mai atu ale John mo paptijo hinia na wai Jordan. <sup>10</sup> Iesu mara mo malue na lolo wai, vahatea purongo tuka mo roi, ale John mo hite Tanume Tapu mo sinai atano sohena vomaha matea, ale mo tatau hin Iesu. <sup>11</sup> Leon God na tuka mo reti mara, “Engko Natuku ruhu ruhu, enau na opoiho mo tavera jea, na avulahi tavera hiniho.”

*Tiapolo Mo Vaihite Iesu  
(Mt 4.1-11; Lk 4.1-13)*

<sup>12</sup> Vahatea purongo, Tanume Tapu mo tiroma hin Iesu vara i sahe na jara hasetoho. <sup>13</sup> Iesu mo lo toho atu mata rani mo ngavulu vati, Setan mo lo vaihitea. Iesu mo lo toho peresi na maji jala hin jara atu, ale angelo non God la lo matahia.

*Iesu Mo Tapulo Vavahinau  
(Mt 4.12-17; Lk 4.14-15)*

<sup>14</sup> Mo sopo tuai, Supe Herod mo taurilati John, mo taua na ima rilangi. Ale hitahuna, Iesu mo sivo Galilee,

mo lo retivujavujangi na Retiruhu non God mara, <sup>15</sup> “Rani tatahola atu God mo lo viŋonia mo mai moiso! Mauri atu God mo aulu hinia mo lo mai mariviti. Ha posi na nomim hehe, ale ha rasu Retiruhu nike!”

*Mo Tovi Na Nona Tamlohi Mo Vati  
(Mt 4.18-22; Lk 5.1-11)*

<sup>16</sup> Na rani matea, Iesu mo lo hahau usuri na pahisa tasin Galilee, mo hite Simon enia tasina Andrew, la lo pulahi na tara matea na tasi matan enira tamlohi aleale maji. <sup>17</sup> Ale mo vere isara mara, “Ha mai ha usuriau. Enau a pa vai kamim ha mai tamlohi aleale tamlohi.” <sup>18</sup> Vahatea purongo, la tinaŋihi na nora tara la usuria.

<sup>19</sup> Iesu mo mele hahau mo vano makomona, mo hite James natun Zebedee, enia tasina John la lo sakele na lolo botira, la lo tulai na nora tara. <sup>20</sup> Iesu mo tovera ale vahatea purongo la tinaŋihi tamara Zebedee na lolo botira peresi na nona volitusi ale la usuria.

*Tanume Sasati La Levosahi Iesu  
(Lk 4.31-37)*

<sup>21</sup> Iesu tolu la tupu vati atu la sahe Capernaum, ale na Sabbath mo unu na ima lotu nona Jew, ale mo lo vujangira. <sup>22</sup> La haratu la lo tapurongo isana, la maŋurahi tavera na nona vujangi, matan mo sopo vujangira sohena nora tamlohi vujangi mata leu matea pani sohena tamlohi matea nona vujangi mo sopo te retusia matana.



<sup>23</sup> Hin rani atu tamlohi matea tanume lumiha sasati matea mo lo toho hinia mo lo toho atu hin ima lotu atu, ale mo ulo isan Iesu mara, <sup>24</sup> “Iesu mara Nazareth, ko opoia vara o vai na sava isamam? Ko mai vara o komo kamam teni! Enau na levosahia vara engko hare, engko haratu mo tapu non God!”

<sup>25</sup> Pani Iesu mo savurahia mara, “Ha! O toho malum! O malue isana nakerihi!” <sup>26</sup> Ale tanume lumiha sasati atu mo hisuhi řilangi na epen tamlohi atu moiso mo ulo aulu mo malue hinia.

<sup>27</sup> Tamlohi tari hin ima lotu atu la mařurahi, ale la lo usiusira hasera hinia lara, “Avei, sava nahai? Vujangi paro matea peresi na suiha vahatea mo pala! Ka hitea mo retileu isana tanume lumiha sasati, ale vahatea purongo la ooloo hinia.”

<sup>28</sup> Ale vahatea purongo retin la nona suiha atu mo řalihi na jara tari Galilee.

### *Vepalihan Peter*

*(Mt 8.14-17; Lk 4.38-41)*

<sup>29</sup> Ale Iesu mo malue hin ima lotu atu, mo vano mo unu na iman Simon enia Andrew, enia tolu James enia John. <sup>30</sup> Ale vepalihan Simon mo lo juruvi na vatana matan mo sereia mo taverna, ale la vereia isan Iesu. <sup>31</sup> Moiso Iesu mo mai mo tauri na limana mo sauva mo sakele, ale seserei atu mo rovo hinia, ale mo tapulo tatamahuni na hara hiniau.

<sup>32</sup> Na ravravin rani atu, tamlohi la lavi na tamlohi rojo tari peresi la haratu tanume sasati la lo toho

hinira la mai isan Iesu. <sup>33</sup> Tamlohi tari hin taon taverna atu la takonahi na mataruan ima atu. <sup>34</sup> Ale Iesu mo vai tihai na rojoo nona tamlohi matuvana, ale mo titiu nařihi na tanume sasati matuvana. Mo sopo sile te masapa vara te tanume sasati i eři retireti matan enira la levosahia vara enia hare.

### *Iesu Mo Retivujavujangi Galilee*

<sup>35</sup> Na řalavuho jea mo pa lo řořoha, Iesu mo turu mo vano hasena na jara hase-toho matea vara i usiusi ea. <sup>36</sup> Ale Simon tolu la haratu la lo toho peresia la kilau alea, <sup>37</sup> ale la tapaia la vereia isana lara, “Eh! Tamlohi tari la lo aleho.”

<sup>38</sup> Pani Iesu mo řaramira mara, “Ra malue! Ra vano hin te vanua tinapua matan vara a eři retivujavujangi na Retiřuhu isara sohena, matan enau na tai na tuka na sinai na varama matan hiniau atu natu.”

<sup>39</sup> Iesu mo unu role na jara tari Galilee, mo lo retivujavujangi na nora ima lotu, ale mo lo titiu nařihi na tanume sasati.

### *Tamlohi Lepros Matea*

*(Mt 8.1-4; Lk 5.12-16)*

<sup>40</sup> Tamlohi lepros matea mo mai isan Iesu, mo papaohi isana mo usia řilangi mara, “Vara o opoia, o eři vaiiau a mele vokevoke.”

<sup>41</sup> Iesu mo řomopoia mo taverna, ale mo tau na limana hinia mara, “Na opoia. O mele vokevoke!” <sup>42</sup> Vahatea purongo, lepros atu mo tihai, ale mo mele vokevoke.

43 Moiso Iesu mo reti řilangi isana, ale mo řulea vano mara, 44 “O tapurongo! O sopo vere te hinau isan tea, pani o vano o hase vujangiho isana pńis, ale o sile na nom otori sohen Moses mo retileu hinia matan vara la eři hitea vara ko mele vokevoke.” *Lev 14.1-32*

45 Pani mo turu mo vano mo lo sorahia, ale nona sora-sora mo vano řalihi, ale mo vaia Iesu i sopo eři mele unu hin te taon tamlohi la sopo levosahia, pani mo lo toho na jara hasetoho ale tamlohi la lo mai na jara tari vara la tapaia atu.

## 2

### *Iesu Mo Romi Na Hehe (Mt 9.1-8; Lk 5.17-26)*

1 Te rani la vano moiso Iesu mo mele vano Capernaum, ale mo sopo tuai tamlohi lo la veree lara mo mele mai na ima moiso. 2 Vila řuhu purongo mo sopo mele te masapa na lolo ima teni na mataruana. Ale Iesu mo lo retivujavujangi na reti non God isara. 3 Ale, tamlohi tupu vati la ali na tamlohi papao matea mo mai. 4 Ale matan la sopo eři vano mariviti isana, la sahe aulu na pusa ima, la vai na marole matea mo sivo tataholo hinia, ale la tuhu pa tamlohi papao atu na epana mo sivo na nahon Iesu. 5 Iesu mara mo hite na rasua hin hinau atu la lo vaia, mo veree isan tamlohi papao atu mara, “Natuku, na řomi na nom hehe.”

6 Pani tamlohi vujangi mata leu hai la lo sakele atu, la lo verevere isara hasera

lara, 7 “Mata sava tamlohi nike mo lo retireti sohen haratu? Mo lo vaia sohen enia God. God hasena i eři řomi na hehe.”

8 Ale Iesu mara mo levosahia vara la lo usiusira hinia isara hasera ale, mo veree isara mara, “Mata sava ka lo řomřomi na hinau sohen? 9 Sava hinau mo mele malum vara a veree isan tamlohi papao nike, ‘Na řomi na nom hehe!’ teni a veree vara, ‘O turu! O viriviri na epam, o hahau!’ 10 Pani matan vara ha pa levosahia vara Natun Tamlohi mo lavi na suiha vara i řomi na hehe nona tamlohi na varama, ha tapurongo na sava a pa veree!” Moiso Iesu mo veree isan tamlohi papao atu mara, 11 “O turu, o lavi na epam, o mule!”

12 Tamlohi papao atu mo turu vahatea, mo lavi na epana ale mo hahau mo malue na nahora, ale mo vaira enira mo isoiso la mařurahi ale la tahe na hijan God lara, “Hare mo pete hite te hinau sohen harihi moiso?”

### *Iesu Mo Tovi Matthew (Mt 9.9-13; Lk 5.27-32)*

13 Iesu mo mele sivo na pahisa tasi, ale tamlohi tari la lo mai isana, ale mo lo vujangira. 14 Ale mara mo lo hahau atu mo hite Levi natun Alphaeus mo lo sakele na jara mata lavi na takis, ale mo veree isana mara, “O usuriau!” Levi mo turu vahatea, mo usuria.

15 Hin vutepongi atu na iman Levi, Iesu mo lo hanhani peresi na tamlohi matuvana mata lavi na

takis peresi na tamlohi hehe tolu na nona tamlohi usuri, matan tamlohi matuvana sohera la lo usuri Iesu. <sup>16</sup> Pani tamlohi vujangi mata leu peresi na Pharisee lara la hite Iesu mo lo hanhani peresi na tamlohi hehe tolu na tamlohi mata lavi na takis, la vere isana nona tamlohi usuri, lara, “Mata sava mo lo hanhani peresi na tamlohi mata lavi na takis tolu na tamlohi hehe?”

<sup>17</sup> Ale Iesu mara mo rongoa mo vereea isara mara, “La haratu epera la lo řuhu la sopo opoi na doctor, pani la haratu la rojo purongo. Na sopo mai vara a tovi na tamlohi tataholo pani la haratu la hehe.”

*Tapuhoro Na Hanhani*  
(Mt 9.14-17; Lk 5.33-39)

<sup>18</sup> Hin rani atu, tamlohi usuri non John tamlohi paptijo peresi na Pharisee la tapuhoro na hanhani mata ususi. Tamlohi hai la mai isan Iesu, la usia lara, “Mata sava tamlohi usuri non John peresi la haratu la lo usuri na Pharisee la lo tapuhoro na hanhani mata ususi, pani nom tamlohi usuri la sopo tapuhoro na hanhani?”

<sup>19</sup> Ale Iesu mo vereea isara mara, “Ka řomřomia vara la tamlohi atu sei la mai na lahi la pa tapuhoro na hanhani vara tamlohi lahi mo lo toho peresira? Vara tamlohi lahi mo lo toho peresira, la sopo eři tapuhoro na hanhani. <sup>20</sup> Pani rani matea mo lo mai vara la pa lavi nařihi na tamlohi lahi isara. Hin

rani atu natu, la pa tapuhoro na hanhani.”

*Hina Tuai Peresi Na Hina Paro*

Iesu mo mele vereea mara, <sup>21</sup> “Te tamlohi i sopo eři lavi te tavalu ruru paro hatea i silivi na ruru tuai hinia. Vara i vaia sohena, tavalu ruru paro atu i pa vaia i mařari tavera i jeu haratu tiroma. <sup>22</sup> Te tamlohi i sopo eři titisi na waen paro i sivo na jara waen la vaia na huri nani tuai matan waen paro atu i pa sosohi i řari jara waen atu, ale i pa komoa peresi waen atu matan i pa roro nařihi. Waen paro mo tataholo na jara waen la vaia na huri nani paro purongo.”

*Moli Mata Sabbath*  
(Mt 12.1-8; Lk 6.1-5)

<sup>23</sup> Na Sabbath matea, Iesu mo lo hahau role na isa wit matea tolu na nona tamlohi usuri, ale la lo tapulo vesi roto na pere wit. <sup>24</sup> Ale Pharisee la vereea isan Iesu lara, “Eh! Mata sava la lo vai na hinau matea mo sopo tataholo vara la vaia na Sabbath?”

<sup>25</sup> Ale Iesu mo vereea isara mara, “Avei, korong ka sopo lo evi na sava supe David tolu na nona tamlohi la vaia hin rani atu la vejuveju ale la marohati, <sup>26</sup> ale sohena sava mo unu na Iman God na rani non Abiathar enia mo lo pŕis aulu, moiso mo lavi pereti atu sei mo tapu pŕis hasera la eři hania. David mo hania, ale mo silea isan la haratu la lo toho peresia?” *Lev 24.9*

<sup>27</sup> Ale mo vereea isara mara, “God mo tau na Sabbath vara i tueni na tamlohi, mo

sopo taua vara tamlohi la lo toho mata Sabbath. <sup>28</sup> Matan haratu, Natun Tamlohi enia mo Moli mata Sabbath.”

### 3

#### *Tamlohi Lima Kuti Matea (Mt 12.9-14; Lk 6.6-11)*

<sup>1</sup> Na Sabbath tinapua matea, Iesu mo mele unu na ima lotu nona Jew matea, ale tamlohi lima kuti matea mo lo toho atu. <sup>2</sup> Ale meresahi non Iesu la lo kilau Iesu vara i pa vai mamahuni tamlohi atu na Sabbath teni, matan vara la pa tuvaia matana. <sup>3</sup> Iesu mo vereea isan tamlohi lima kuti atu mara, “O mai nikel!” <sup>4</sup> Ale mo vereea isara mara, “Na Sabbath, mo tataholo vara ra tueni na tamlohi teni vara ra komo tea? Mo tataholo vara ra juri te mauri teni ra vilia?” Pani la rohu vara la raramia. <sup>5</sup> Iesu mo kilau ralihira na lolokoru, matan mapura mo rilangi, ale mo vereea isan tamlohi lima kuti atu mara, “O firahi na limam.” Tamlohi atu mo vaia sohena ale limana atu mo mele ruhu. <sup>6</sup> Pa la Pharisee atu la malue vahatea, la vano la tovi takonahi na tamlohi la lo usuri supe Herod, ale la aleale malele matan vara la pa vilimatei Iesu hinia.

#### *Tamlohi Matuvana La Usuria*

<sup>7</sup> Iesu tolu na nona tamlohi usuri la malue, la sivo na tasin Galilee, ale vao tavera matea mo usuria. La tai Galilee, Judea, <sup>8</sup> Jerusalem, Idumaea, hai la tai na tavalu wai Jordan, ale na jara ralihi Tyre enia Sidon. Vao tavera

atu lara la rongo la hinau atu Iesu mo lo vaira, la mai isana.

<sup>9</sup> Ale hin jara atu Iesu mo vere na nona tamlohi usuri vara la tau mamahuni te boti hatea matana matan vao tavera atu, vara i vono la pa tohoia, <sup>10</sup> matan Iesu mo vai tihai na rojoa nona tamlohi matuvana moiso, mo vai la haratu la rojo la lo vartohoi ralihia vara la tikelia. <sup>11</sup> Ale tanume lumiha sasati na tamlohi lara la hitea, la jovi sivo na nahona la ngara lara, “Engko Natun God!” <sup>12</sup> Pani Iesu mo reti rilangi isara vara la sopo vereulia vara enia hare.

#### *Mo Viřoni Na Nona Tamlohi Usuri (Mt 10.1-4; Lk 6.12-16)*

<sup>13</sup> Moiso, Iesu mo sahe aulu na vutivuti matea, ale mo tovi la haratu mo opoira, ale la mai isana. <sup>14</sup> Ale mo viřoni na tupu sangavulu romana mo rua sei mo tovira vara la vahařule, matan vara i pa řulera la vano isana tamlohi mata retivujavujangira, <sup>15</sup> ale mo silera na suiha mata titiu nařihi na tanume sasati. <sup>16</sup> Mo viřoni la tupu sangavulu romana mo rua atu sohen harihi:

Simon sei Iesu mo tau na hijana vara Peter.

<sup>17</sup> James enia John natun Zebedee, Iesu mo silera na hija vara Boanerges' raramina, ‘Natu Piri’ matan jingora mo lo tupali tarea.

<sup>18</sup> Andrew,  
Philip,  
Bartholomew,  
Matthew,

Thomas,  
James natun Alphaeus,  
Thaddeus,  
Simon mara Cana enia  
tamlohi matea mata  
valum mata jarana,  
19 ale Judas Iscariot, haratu  
mo lo turuposi hinia.

*Suiha Non Iesu*

(Mt 12.22-32; Lk 11.14-23;  
12.10)

20 Moiso Iesu mo mele vano  
hin ima atu mo lo toho hinia.  
Mo sopo tuai vao tavera la  
mele mai la takonahi, ale la  
vaia mo sopo te masapa vara  
la efi hanhani. 21 Tavtavin  
Iesu lara la rongoa, la vano  
vara la taurilatia matan la lo  
verea lara, "Hara sei, romina  
mo tihai sei!"

22 Ale tamlohi vujangi mata  
leu sei la tai Jerusalem la  
lo vereea lara, "Tamlohi sei,  
supe nona tanume sasati sei  
Beelzebul mo sohonia, ale  
mo lo titiu narihi na tanume  
sasati na suihana!"

23 Pani Iesu mo tovira mai  
isana ale mo vereea mara,  
"Mo sohena sava natu Setan  
i efi mele levuti narihi Setan?  
24 Jara tari sei supe la  
lo aseasehira hinira hasera  
la pa maroi, ale i pa sopo te  
taon tavera teni te vao ima  
vara i lo aseasehia hasena i  
pa efi turu. 25 Vara vao ima  
matea i lo levuti na vaona,  
tamlohi hinia la pa efi toho  
ruhu sohena sava? 26 Ale Setan  
peresi na vaona vara la lo  
levlevutira hasera purongo,  
suihan Setan i pa turu so-  
hena sava matan suihana i  
pa isoiso. 27 Ka hitea? Vara  
tamlohi matea mo opoia vara  
i unu na ima tamlohi suiha  
matea mata i vanaho te nona  
hinahinau, i pa lavi te asi

hatea i pesi tamlohi suiha atu  
tako, moiso i pa lavi na nona  
hinahinau.

28 Vararuhu, na vereea  
isamim vara hehe tari tam-  
lohi la lo vaira teni na nora  
retisasati hin God, God i pa  
romira. 29 Pani hare mo lo  
vere lejileji Tanume Tapu,  
enia, God i pa sopo efi romia  
hin te rani." 30 Iesu mo lo  
verera hin la hinia sei matan  
la lo vereea vara tanume  
sasati lumiha matea mo lo  
toho hinia.

*Vaon Iesu La Alea*

(Mt 12.46-50; Lk 8.19-21)

31 Tinan Iesu peresi na vo-  
raina la pala hin ima atu,  
la lo turu na jingoima ale la  
sohai na reti sivo isan Iesu  
vara i mai i hitera. 32 Vao  
matea mo lo sakele ralihi Iesu  
ale la vereea isan Iesu lara,  
"Eh! Tinam peresi na voraim  
peresi na vevoraim la lo toho  
na jingoima la lo aleho!"

33 Pani Iesu mo ramira  
mara, "Tinaku enia hare?  
Voraiku enira hare?" 34 Mo  
kilau ralihi la haratu la lo  
sakele ralihia mara, "Ka  
hitea? Tinaku peresi na  
voraiku enira nahai! 35 Sava  
tamlohi mo lo vai na masan-  
lon God, enia voraiku teni  
vetasiku teni tinaku."

## 4

*Tamlohi Isa Matea*

(Mt 13.1-9; Lk 8.4-8)

1 Na rani tinapua matea,  
Iesu mo lo vujangi na tam-  
lohi na pahisa tasin Galilee.  
Hin rani atu vao tamlohi la  
lo mai la lo turu porotia.  
Ale matana, mo vele na boti  
matea mo lo sale hin tasi atu,  
ale mo sakele hinia. Vao

tavera atu la lo toho na jaurauta na pahisa tasi. <sup>2</sup> Iesu mo lo vujangira na titileu matuvana, ale mo lo vujan-gira mara,

<sup>3</sup> “Ha tapurongo! Tamlohi hapoŕahi matea mo malue mo vano vara i hapoŕahi na pulana piri wit. <sup>4</sup> Mo lo hapoŕahira, pani hai la jovi na malele tavera, maji avuavula mai la hani vevuhira. <sup>5</sup> Hai la jovi na vatuvatu, uluara la vila, matan tano mo sopo tavera. <sup>6</sup> Pani alo mara mo vele, la wit atu la nunu la mate mata warira la sopo sivo atano jea. <sup>7</sup> Hai la jovi na urata, pani urata atu mo rovira mo punira ale la sopo vua. <sup>8</sup> Pani hai la jovi na tano ŕuhu, hin tano ŕuhu atu la ulua. La ulua la vai na vuara, hai namara mo ngavulu tolu (30), hai mo ngavulu limarave (60), hai mo ngavulu sangavulu (100)!” <sup>9</sup> Iesu mo mele vereea mara, “Haratu mo eŕi rongovosahia, o tapurongo!”

*Mata Sava Mo Vere Na Titileu*

(Mt 13.10-17; Lk 8.9-10)

<sup>10</sup> Hitahuna, mara mo lo toho enia hasena, tamlohi hai peresi la nona tamlohi usuri tupu sangavulu ŕomana mo rua atu la usia hin la titileu atu.

<sup>11</sup> Ale Iesu mo vereea isara mara, “God mo majinga hin kamim vara ha levosahi na ŕaramin mauri atu God mo aulu hinia, pani na lo vere la hinau nike na titileu vara a jarohira isana vinano, <sup>12</sup> matan vara Retiulia i masese sei mara, ‘La pa hite na sava na lo vaia,

pani la pa sopo eŕi hitevosahia.

La pa rongo na noku reti, pani la pa sopo eŕi rongovosahia.

Matan, vara i vono, la pa posi mai isaku ale a pa ŕomira na nora hehe.’” *Isa 6.9-10*

*Raramin Titileu Atu*

(Mt 13.18-23; Lk 8.11-15)

<sup>13</sup> Iesu mo vereea isara mara, “Ka sopo rongovosahi titileu akerihi? Vara mo vono, soheni sava natu ha pa eŕi levosahi vevuhi na titileu tinapua? <sup>14</sup> Tamlohi hapoŕahi na piri mo hapoŕahi na reti non God. <sup>15</sup> Ale la haratu la jovi na malele tavera, hin rani atu tamlohi la rongora, Setan mo mai vahatea purongo ale mo lavi naŕihi la reti atu sei la lo toho na mapura. <sup>16</sup> La haratu la lo jovi na vatuvatu, enira la haratu sei lara la rongo na reti non God, la lavia vahatea purongo na avulahi. <sup>17</sup> Pani mo sopo te warira ale reti non God mo lo toho mata makomo rani purongo. Ale vara rani ŕilangi la mai teni tamlohi la turuleji hinira mata reti non God, la jovi naŕihi vahatea purongo. <sup>18</sup> Ale la haratu la lo jovi na urata, enira la haratu sei la lo rongo na reti non God, <sup>19</sup> pani ŕomkaka mata varama peresi na tavgav haluhalu ale masalora mata hinau tinatinapu mo unu hinira mo puni pa reti atu la lo lavia, ale mo sopo eŕi vua. <sup>20</sup> Ale la haratu la lo jovi na tano ŕuhu, enira la

haratu sei la lo rongo na reti non God, ale la lavia na maurira ale la avulahi hinia. Mo vua mo tikeli mo ngavulu tolu (30), hai mo ngavulu limarave (60), ale hai la tikeli mo ngavulu sangavulu (100).”

*Titileu Mata Hinau Sei La Luhu*  
(Lk 8.16-18)

<sup>21</sup> Iesu mo mele vereea isara mara, “Ka řom vara mo tataholo vara tea mo hasahi te lamu ale i taua na ruhuruhun te tanga teni te vata pani mo sopo na jara sakele mata lamu?”

<sup>22</sup> Hinau tari la lo luhu, la pa pala na jara tavera. Ale mo sopo te hinau luhu hatea vara i pa sopo pala na jara tavera. <sup>23</sup> Vara tea te perona, i lo rongo na noku reti!”

*Ha Tapurongo Mamahu*

<sup>24</sup> Iesu mo mele vereea isara mara, “Ha tapurongo na noku retireti i řuhu matan vara nomim lelevosahi i pa ulua i tavera. <sup>25</sup> Haratu mo lo vaihitea vara i levosahi na noku reti, enia i pa eři mele levosahia i tavera i mařivi jea. Pani haratu mo sopo tapurongo i řuhu, sava mo lo toho isana moiso la pa lavi nařihia isana.”

*Titileu Mata Piri*

<sup>26</sup> Iesu mo mele vereea mara, “Mauri atu God mo aulu hinia mo sohena piri vipahai tamlohi mo hapořahira na lepa. <sup>27</sup> Vara mo hapořahira moiso, i pa sopo eři mele vai te hinau hinira. Tamlohi atu mo lo

juruvi ale mo lo mele kilau na rani hatehateahi, ale piri atu mo tupali ale mo ulua pani tamlohi atu mo sopo levosahia vara mo pa sohena sohena sava. <sup>28</sup> Lepa atu hasena mo vai la piri atu la ulua. Tiroma la juliha, ale lahora la peravu, ale mo sopo tuai la vira, la vua. <sup>29</sup> Pani vara vuana la mena, tamlohi atu i pa vura na sita matan nora asitauni natu.”

*Titileu Mata Piri Paka*  
(Mt 13.31-32; Lk 13.18-19)

<sup>30</sup> Iesu mo mele vereea mara, “A pa tovongi na sava hin mauri atu God mo aulu hinia, teni sava titileu natu i pa tataholo vara a vereulia hinia? <sup>31</sup> Mo sohena piri paka matea vara la lavoa na lepa, mo rihirihi mo jeu na piri pahai tari. <sup>32</sup> Pani vara mo ulua mo tavera mo jeu na vipahai tinatinapua tari, ale mo sohahi na rangarangana tavera matan vara maji avuavu la eři vai na taura na malumaluna.”\*

*Mo Vujangira Na Titileu Mata Sava*  
(Mt 13.34-35)

<sup>33</sup> Iesu mo lo vujangi na nona reti na titileu matuvana sohen harihi, matan vara la pa rongovosahira usuri na nora lelevosahi. <sup>34</sup> Iesu mo lo vujangi na vao tamlohi na titileu purongo, pani hitahu vara mo lo toho hasena peresi na nona tamlohi usuri, mo pa lo vereuli na řaramira isara.

\* 4:32: piri paka: Iesu mo vere na piri mustard, enia piri matea mo varihia jea.

*Iesu Mo Horo Na Langi Tavera*

(Mt 8.23-27; Lk 8.22-25)

<sup>35</sup> Iesu mo lo toho hin boti atu, ale alo mara mo pa lo sivo vara i tihai, mo vereia isara mara, "Ra sua roto tasi nike, ra vano na tavaluna."

<sup>36</sup> La tinarihi vao atu ale la vano, pani mo sopo enira hasera purongo, boti tinapua hai sohena la lo usurira.

<sup>37</sup> Mo sopo tuai langi tavera matea mo sere, mo vai na suhusuhu la lo kamekame sivo na lolo boti, ale tungu mo lo marivi.

<sup>38</sup> Pani Iesu mo lo juruvi na elunga matea na pulo boti. Ale nona tamlohi la rohaia lara, "Tija! Ko sopo levosahia vara ra pa pute!"

<sup>39</sup> Iesu mo kilau ale mo reti rilangi isan langi atu, ale mo vereia isan tasi atu mara, "Ha isoiso! Ha toho malum!" Vahatea purongo langi atu mo moti, ale tasi tavera atu mo tamata mo tamata. <sup>40</sup> Iesu mo vereia isara mara, "Ka matahu tavera sohena mata sava? Mo sopo lo te nomim rasua teni?"

<sup>41</sup> Ale matahu tavera mo sohonira ale la lo vereia isara hasera lara, "Avei, sava tamlohi nahai? Mo reti purongo ale langi peresi na tasi la ooloo hinia!"

## 5

*Mara Gerasenes Matea*  
(Mt 8.28-34; Lk 8.26-39)

<sup>1</sup> Iesu peresi na nona tamlohi la hoso na jara Gerasenes. <sup>2</sup> Lara la hoso na jarauta hin jara atu, tamlohi matea tanume lumiha sasati matuvana la lo toho hinia mo

malue na taptap, mo sinai mo tapaia. <sup>3</sup> Tamlohi nike mo lo toho na taptap, ale tea i sopo efi pesia hin te asi teni te jen. <sup>4</sup> Hina purongo vara la pesi na limana peresi na palona na jen teni te aen, mo rotorotoro mo kamekamera. Tea i sopo efi vaia i toho malum. <sup>5</sup> Na rani peresi na vutepongi hatehateahi, mo lo ulo ralihi na taptap peresi na vutivuti atu, ale mo lo tangi mo lo hasena tai na epena na vatu.

<sup>6</sup> Ale mara mo hite Iesu mo pa lo toho asau, mo maro vano isana mo jovi papaohi na nahona. <sup>7</sup> Ale mo tangi na leo tavera matea mara, "Iesu Natun God Aulu Jea, engko te nom sava isaku? Na usiho na hijan God vara o sopo vailejilejiau!" <sup>8</sup> Mo pa vereia sohena matan Iesu mo lo vereia isana mara, "Tanume lumiha sasati, o malue isan tamlohi nike nakerihi!"

<sup>9</sup> Iesu mo usia mara, "Eh, engko hijam hare?"

Tanume sasati atu mo raramia mara, "Hijaku enia Legion, matan kamam kama vao tavera jea!" <sup>10</sup> Tanume sasati atu mo usia rilangi isan Iesu vara i sopo levuti narihira na jara Gerasenes.

<sup>11</sup> Ale vao tavera mata poi matea la lo susua na pahisan vuti atu. <sup>12</sup> Ale tanume sasati atu la usia rilangi isan Iesu lara, "O rule kamam kama vano isana poi, o tinarihi kamam kama unu hinira." <sup>13</sup> Ale Iesu mo tinarihira. La tanume lumiha sasati atu la malue isan pa tamlohi atu, la vano la unu isan la poi atu,



evira korong mo tikeli tari vaha rua (2000). Ale vao poi atu la solesole usuri pesapesa atu la jovi sivo na tasi ale la pute enira mo isoiso.

<sup>14</sup> Tavuin la poi atu la rovo la sahe la vereea na lolon taon tavera atu peresi na jara řalihi ea. Ale tamlohi la maro la mai vara la hitea vara sava natu mo masese atu. <sup>15</sup> Ale la mai isan Iesu, pani lara la hite pa tamlohi atu sei tanume sasati la lo sohonía mo lo sakele ea ale mo ru na ruru, ale řomina mo mele řuhu moiso, matahu mo sohonira. <sup>16</sup> Ale la haratu sei la lo hite na sava mo masese la sorahi na sava mo masese isan tamlohi atu sei tanume sasati la lo toho hinia peresi la poi atu. <sup>17</sup> Ale la tapulo usia řilangi isan Iesu vara i malue na jarara.

<sup>18</sup> Iesu mo pa lo vele na boti, pa tamlohi atu sei tanume sasati la lo sohonía mo usia řilangi isan Iesu vara i pa usuria. <sup>19</sup> Pani Iesu mo sopo tinařihia pani mo vereea isana mara, "O mule, o vano isana tapalam ale o vereea na sava Moli God mo vaia matam, ale sohena sava mo řomopoiho mo tavera jea." <sup>20</sup> Ale pa tamlohi atu mo mele hilu ale mo tapulo vereuli na sava Iesu mo vaia matana hin la taon atu mo sangavulu sei la tovia Decapolis. Ale tamlohi tari la mařurahi tavera hinia.

### *Venatun Jairus*

(Mt 9.18-26; Lk 8.40-56)

<sup>21</sup> Ale Iesu mara mo mele hilu mo hoso na tavalun tasi atu, vao tamlohi tavera jea

matea la mai la turu řalihia na pahisa tasi. <sup>22</sup> Tamlohi tavera matea na ima lotu nona tavyuin Israel hin jara atu hijana Jairus, mo mai mara mo hite Iesu mo papaohi sivo na palona. <sup>23</sup> Jairus mo usia řilangi isana mara, "Venatuku rihirihi, i sopo tuai i pa mate. O mai o tau na limam hinia matan vara i mele řuhu ale i mauri."

<sup>24</sup> Ale Iesu mo usuria. Ale vao tavera matea la lo usuria la lo tiatia hinira. <sup>25</sup> Ale hařai matea mo lo toho hin vao atu. Ale mo rojo na rojoa nona hařai mata tauni mo sangavulu řomana mo rua moiso. <sup>26</sup> Mo jalahi na mania tavera isana doctor matuvana moiso, ale la doctor atu la sopo eři tuenia, la sopo vaia i řuhu pani mo mele sati jea. <sup>27</sup> Mo rongo na tamlohi la lo sorahi Iesu ale mo mai na hařin Iesu hin vao atu mo tikeli na pingopingo nona ruru. <sup>28</sup> Matan řomina mara, "Vara a eři tikeli purongoi na nona ruru, noku rojoa i pa tihai!" <sup>29</sup> Ale vahatea purongo řae atu sei mo lo maro mo mamasa, ale mo rongovosahia na epena vara nona rojoa mo tihai.

<sup>30</sup> Ale Iesu sohena mo rongovosahia vara suiha mo malue hinia, ale mo posi vahatea isan vao atu ale mara, "Hare mo tikeli na noku ruru?"

<sup>31</sup> Nona tamlohi usuri la vereea lara, "Ko pa usia vara hare mo tikeliho sohena sava, ko sopo hitea vara vao nike la lo tiatia isam?"

<sup>32</sup> Ale Iesu mo kilau řalihira vara i vileia vara hare natu, mo tikelia. <sup>33</sup> Pani hařai

atu sei mo levosahi na sava mo lo masese isana mo mai isan Iesu na matahu, mo popovitoho na palona ale mo vereea na hinau tari. <sup>34</sup> Iesu mo vereea isana mara, "Venatuku, nom rasua mo vaiho ko mele ŋuhu. O vano na tamata ale nom rojoa i pa tihai jejeu."

<sup>35</sup> Iesu mo pa lo retireti isana haŋai atu, tamlohi hai la tai na iman Jairus la mai la vereea isan Jairus lara, "Venatum mo mate moiso, o sopo mele usi tamlohi vujangi vara i mai."

<sup>36</sup> Pani Iesu mara mo rongo na sava la lo vereea mo vereea isan Jairus mara, "O sopo matahu! O rasuau!" <sup>37</sup> Ale Iesu mo sopo tinaŋihia vara tea i usuria pani Peter enia James peresi John tasin James. <sup>38</sup> La vano la pala na iman tamlohi taverna mata ima lotu nona Jew atu, ale Iesu mo hite na tamlohi la lo tangtangi, la lo tangi aulu, la lo vai na vavaore taverna. <sup>39</sup> Ale Iesu mara mo unu mo vereea isara mara, "Mata sava ka lo vai na vavaore taverna, ale ka lo tangtangi? Haŋarihi nike mo sopo mate, mo juruvi ŋomalihio purongo."

<sup>40</sup> Ale tamlohi la manaluluhi Iesu, pani mo ŋulera enira mo isoiso la malue. Ale mo lavi taman haŋarihi atu peresi tinana peresi na nona tamlohi usuri la unu sivo na jara haŋarihi atu mo lo toho ea. <sup>41</sup> Iesu mo tauri na liman haŋarihi atu mo vereea mara, "Talitha kumi!" Ale ŋaramin reti nike enia "Venatuku, o turu!" <sup>42</sup> Ale vahatea purongo haŋarihi atu sei taunina

mo sangavulu ŋomana mo rua mo mele turu ale mo tapulo hahau. Ale maŋurahi taverna mo sohoni tamana peresi tinana peresi na nona tamlohi usuri. <sup>43</sup> Iesu mo vereea isara mo isoiso vara la sopo mele sorahia isan tea, ale mo vereea isara vara la silea hin te hinau i hania.

## 6

*Mara Nazareth La Rohu Hin Iesu*  
(Mt 13.53-58; Lk 4.16-30)

<sup>1</sup> Ale Iesu peresi na nona tamlohi usuri la malue hin jara atu la mai na nona taon, Nazareth. <sup>2</sup> Na Sabbath matea Iesu mo tapulo vujangi na ima lotu ea, ale vao tamlohi la rongo na nona vujangi la maŋurahi taverna lara, "Tamlohi nike mo pa lavi la hinau nike epu? Ale nona lelevosahi mo pa tai epu? La hinau maŋurahi nike la pa pala na limana sohena sava? <sup>3</sup> Mo sopo pa tamlohi voro ima nahai teni, natun Mary ale vorain James, Joses, Judas peresi Simon? Mo sopo vetasina nahai la lo toho peresiŋa?" La ŋongo mo sati matan mo lo vai la hinau sei.

<sup>4</sup> Pani Iesu mo vereea isara mara, "Tamlohi jara tinapua la pa sile na ooloo isana pŋovet matea, pani i pa sopo eŋi lavi te ooloo na jarana tataholo teni na naho tahisana teni na naho voraina."

<sup>5</sup> Iesu mo sopo vai te mata-mata taverna isana tahisana, pani mo tau na limana na tamlohi rojoa tupu visalete

purongo, ale nora rojoa la tihai. <sup>6</sup> Iesu mo maʻurahi matan la sopo rasua.

*Tamlohi Usuri La Malue  
(Mt 10.5-15; Lk 9.1-6)*

Moiso mo vano na jara tinatinapua mo lo vujangi na tamlohi ea. <sup>7</sup> Mo tovi la tamlohi atu tupu sangavulu ʻromana mo rua la mai isana, ale mo ʻrulera la vano mo ruarua, ale mo silera na suiha vara la titiu naʻihi na tanume lumiha sasati na tamlohi. <sup>8</sup> Iesu mo vereia isara vara la sopo lavi te hinau na nora hahau sohena hanhani teni te tanga, teni te mania, pani tihonira purongo. <sup>9</sup> La pa ru na sapat pani la pa sopo mele lavi te harua rurura tinapua. <sup>10</sup> Iesu mo vereia isara mara, “Sava ima ka lo toho hinia hin te vanua, ha lo toho atu i tikeli rani atu ka mele malue hin vanua atu. <sup>11</sup> Pani vara te vanua la ʻrohu hin kamim teni la sopo tapurongo isamim, ha saʻsaʻhi naʻihi na tangotango palomim hin jara atu vara i vujangia vara God i pa arira.”

<sup>12</sup> Ale la malue la vano la retivujavujangi na tamlohi vara la posi na hehe. <sup>13</sup> La titiu naʻihi na tanume sasati matuvana, ale la tau na wel na patu tamlohi rojoa matuvana ale nora rojoa la tihai.

*John Tamlohi Paptijo Mo Mate  
(Mt 14.1-12; Lk 9.7-9)*

<sup>14</sup> Hin rani atu, supe Herod Antipas mo rongo na sorasora hin Iesu, matan tamlohi tari la lo sorahia. Hai la vereia lara, “John tamlohi

paptijo mo mele turu na mateia. Hinau atu natu mo vaia mo suiha vara i eʻi vai la matamata sei.” <sup>15</sup> Pani hai la vereia lara Iesu enia Elijah, ale hai la vereia lara enia pʻrovet matea matan tuai. <sup>16</sup> Pani Herod mara mo rongoa mo vereia mara, “John tamlohi paptijo! Pani enau natu na tai naʻihi na patuna, varaʻuhuhu mo mele turu na mateia!”

<sup>17</sup> Matan Herod natu sei mo ʻrule na tamlohi vuro vara la taurilati John, ale la pesia na ima ʻfilangi vara i vai Herodias, naroun tasina Philip i avulahi matan Herod mo lavia sohena narouna. <sup>18</sup> Matan John mo lo vereia isan Herod mara, “Usuri na leu mo sopo tataholo vara o lavi naroun tasim sohena naroum.”

<sup>19</sup> Ale Herodias mo lo vaihitea vara i vilimatei John, pani i sopo eʻi vaia hasena. <sup>20</sup> Matan Herod mo matahuni John matan mo levosahia vara John enia tamlohi tataholo matea mo tapu ale Herod mo lo matahia. Hina purongo vara John mo lo vaia mo lo ʻromkaka tavera, enia mo opoia vara i lo tapurongo na retireti non John.

<sup>21</sup> Pani Herodias mo hite na masapa matea na hanhani tavera mata pongi vora non Herod. Herod mo usi na nona tamlohi aulu peresi na nona tamlohi tatavera mata vuro ale la haratu la lo aulu Galilee la mai hinia. <sup>22</sup> Matan venatuna sei hijana Herodias mo unu mo velu ale mo vai Herod peresi la haratu la lo toho atu la avulahi tavera.

Ale Herod mo vereia isan venatuna mara, "O usiau hin te hinau ko opoia, ale a pa silea isam." <sup>23</sup> Ale Herod mo retitauhi mara, "A pa sileho na sava hinau ko usia, hina purongo vara i tikeli na sope jara na lo aulu hinira."

<sup>24</sup> Moiso mo malue mo vano isan tinana mo usia mara, "Nana, a pa usi na sava isana?"

Ale tinana mara, "Na opoi na patun John tamlohi pap-tijol!"

<sup>25</sup> Ale vahatea purongo mo mele unu mo vereia isan Herod mara, "Na opoia vara o sileau nakerihi na patun John tamlohi paptijo hin te peleti hatea!"

<sup>26</sup> Herod mo rongong mo sati tavera matana. Pani mo mahanuhanu vara i tope na nona retitauhi sei mo vaia na nahon la haratu la lo toho atu. <sup>27</sup> Ale vahatea purongo mo řule na nona tamlohi mata vilimatei na tamlohi matea vara i tai roto na patun John. Tamlohi atu mo vano na ima řilangi ale mo tai roto na patuna, <sup>28</sup> moiso, mo lavi na patuna na peleti matea mo silea isan hařai atu. Ale hařai atu mo lavia mo silea isan tinana. <sup>29</sup> Tamlohi usuri non John lara la rongoa, la mai la lavi na tarapena, ale la taua na papa vatu matea.

*Vao Tavera La Lo Usuri Iesu*

(Mt 14.13-21; Lk 9.10-17; Jn 6.1-14)

<sup>30</sup> Pa la tamlohi usuri atu Iesu mo lo řulera la mele mai ale la vere vevuhi na sava la lo vaira ale la lo vujangira. <sup>31</sup> Ale Iesu mo

vereia isara mara, "Ra malue hin vao nike řa vano hin te jara hasetoho řa mapu makomona tako." Matan tamlohi mo mařivi la lo mai ale la lo vano ale mo sopo te masapa vara la eři hanhani.

<sup>32</sup> Ale la vele na boti matea la vano na jara hasetoho matea enira hasera. <sup>33</sup> Pani vao tavera mata taon matuyana la hitera la lo vano, ale la maro usurira na jarauta, ale la kakau tiroma hin jara atu la pa hoso ea. <sup>34</sup> Iesu mara mo hoso mo hite na vao tavera matea, ale mo řomopoirā matan la sohena sipsip mo sopo te tavuira. Ale mo tapulo vujangira na hinau matuyana.

<sup>35</sup> Alo mo sivo moiso, ale nona tamlohi usuri la mai isana lara, "Moli jara hasetoho nahai, ale nake mo pongi moiso. <sup>36</sup> O řulera la vano řalihi jara nike ale na vanua vara la voli te hara hinau."

<sup>37</sup> Pani Iesu mo řaramira mara, "Kamim purongo ha vahanira!"

Pani lara, "Voli tamlohi mata rani ngavulu sangavulu rua mo sopo lo navu mata i voli te pereti vara i vahani vao tamlohi nike."

<sup>38</sup> Iesu mo usira mara, "Ha vano ha hitea vara ka lo lavi na hanhani mo visa."

La mele mai lara, "Pereti mo lima peresi na maji mo rua." <sup>39</sup> Moiso Iesu mo retileu vara la sakele na vao na talu řuvu. <sup>40</sup> Ale la sakele na vao mo tikeli mo ngavulu lima (50) teni mo ngavulu sangavulu (100).

<sup>41</sup> ‘Moiso, Iesu mo lavi pa pereti atu mo lima peresi pa la maji atu mo rua mo taʻa sahe na tuka mo vere meje isan God matara moiso mo topera mo silera isana nona tamlohi usuri vara la asera isana vao tamlohi hatehateahi atu. <sup>42</sup> Enira mo isoiso la hanhani ale la masu mo ŋuhu. <sup>43</sup> La sohoni na tanga mo sangavulu ŋomana mo rua na mesin la pereti atu mo lima peresi la maji atu mo rua. <sup>44</sup> Evi tamlohi purongo sei la lo hani pereti atu mo tikeli mo tari vaha lima (5000).

*Mo Hahau Na Pusa Tasi  
(Mt 14.22-33; Jn 6.15-21)*

<sup>45</sup> Vahatea purongo atu Iesu mo vere na nona tamlohi usuri vara la vele na boti la vano tiroma na tavalu tasi na vanuan Bethsaida, ale Iesu mo lo ŋule la vao atu vara la mule. <sup>46</sup> Moiso, enia mo malue isara mo sahe aulu na vuti vara i usiusi.

<sup>47</sup> Pongi mo mai ale pa boti mo lo toho na livuha tasi moiso, ale Iesu hasena mo lo toho na jarauta. <sup>48</sup> Ale mo hitera la lo vaihitea ŋilangi vara la suahia boti atu matan la lo songahi na langi. Na toa tarere mo hahau na pusa tasi mo mai isara. Mo vano sohena vara i jeura, <sup>49</sup> pani lara la hitea mo lo hahau na pusa tasi, la ŋomi vara nunua matea, ale la uloulo <sup>50</sup> matan enira mo isoiso la hitea ale la matahu tavera. Pani vahatea purongo Iesu mo retireti isara mara, “Ha sopo matahu, enau sei!” <sup>51</sup> Ale mo vele sivo na lolo boti peresira, ale vahatea purongo langi atu mo moti. Ale la maʻurahi

tavera. <sup>52</sup> Pani la sopo lo hitevosahia vara Iesu enia hare, hina purongo na mata-mata sei Iesu mo lo vaia na suišana hin la maji atu peresi la pereti atu matan mapura la ŋilangi mata la rasua.

*Tamlohi Rojoa Matuvana  
Gennesaret  
(Mt 14.34-36)*

<sup>53</sup> Iesu tolu na nona tamlohi lara la vano roto na tasi la pala Gennesaret la sahe la hoso, <sup>54</sup> ale lara la sevuti hin boti atu, vila ŋuhu purongo tamlohi hin jara atu la hitevosahi Iesu. <sup>55</sup> La maro la vano na jara tari ŋalihi jara atu la lavi na tamlohi rojoa na epara la mai isana na sava jara la rongoa vara mo lo toho ea. <sup>56</sup> Ale na sava jara Iesu mo pala hinia, hina purongo vara hin te vanua, teni te taon tavera, teni na ima hasetoho, tamlohi la lavi na nora tamlohi rojoa la taura na jara maket, ale la lo usia ŋilangi isana vara la eʻi tikeli na pingo nona ruru purongo. Ale tamlohi tari sei la tikelia, nora rojoa la tihai.

## 7

*Vujangi Mata Mapu Tamlohi  
(Mt 15.1-9)*

<sup>1</sup> Na rani matea Pharisee peresi na tamlohi vujangi mata leu, la tai Jerusalem la mai isan Iesu. <sup>2</sup> La mai ale la hitea vara tatua nona tamlohi usuri la lo hanhani pani la sopo hoje na limara tiroma sohena Leu non Moses mo vere. <sup>3</sup> Matan Pharisee peresi na Jew tari,

la sopo efi hanhani vara la sopo javulahi na limara tiroma, matan la lo usuri na posposi nona vajiaha matan tuai. <sup>4</sup> Ale la pa sopo efi hani te hinau la lavia na maket vara la sopo javulahi na limara tiroma. Hinau akerihi enia vonan la leu atu matuvana sei la lo usurira, sohena posposi mata hoje na paniken teni peleti teni jilivi teni pesin. <sup>5</sup> Ale Pharisee peresi na tamlohi vujangi mata leu la usia isan Iesu lara, "Mata sava nom tamlohi usuri la sopo usuri na posposi nona vajiaha matan tuai, matan la lo hanhani peresi na lumi limara?"

<sup>6</sup> Iesu mo faramira mara, "Kamim tamlohi tapnetano, Isaiah mo retimangovi varaŕuhu hin kamim sei hin haratu mo vereea mara,

<sup>7</sup> 'La tamlohi nike la lo ololo hiniau na nora retireti purongo,

pani nora romromi mo pa lo toho asau hiniau.

Nora lotu enia lotulotu vono purongo,

ale la lo vereea lara nora retileu enia retileu non God.' *Isa 29.13*

<sup>8</sup> Ka lo romromi purongo na leu non God, ale ka lo usuri na vujangi nona tamlohi purongo."

<sup>9</sup> Ale mo vereea mara, "Kamim ka rohu na retileu non God matan vara ha pa taurilati na nomim posposi matan tuai. <sup>10</sup> Matan Moses mo ulia na leu mara, 'O ololo hin tinam enia tamam!' ale 'Vara te tamlohi i retisasati hin tinana teni tamana ha

vilimateia!' *Exo 20.12; Lev 20.9; Deut 5.16*

<sup>11</sup> Pani kamim ka lo vereea vara mo tataholo purongo vara tamlohi la sopo tueni na tamara teni tinara na nora vejuveju, ale ka lo vereea kara, 'Mo vono, a pa taurilati na mania na retitauhi hinia moiso vara a pa silea isan God.\* <sup>12</sup> Ale Ka lo horoa vara i sopo efi tueni tamana enia tinana. <sup>13</sup> Ka lo vai na leu non God mo lo mai hina purongo na nomim posposi matan tuai sei la silea isamim. Ale mele hinau matuvana sohena ka lo vaira."

#### *HinAu Mo Vai Na Lumiha (Mt 15.10-20)*

<sup>14</sup> Ale Iesu mo mele tovi na tamlohi la mele mai isana, ale mo vereea mara, "Kamim mo isoiso ha tapurongo i ruhu isaku, ale ha lo levosahi na noku reti. <sup>15</sup> Mo sopo te hinau hatea vara ha hania i sivo na lolomim i efi vai kamim ha lumiha na nahon God. Pani la hinau sasati sei la lo malue na mapumim, enira natu la lo vai kamim ka lumiha na nahon God."

<sup>16-17</sup> Moiso Iesu mo unu na ima matea vara i tinaŕihi vao tamlohi atu, ale nona tamlohi usuri la usi na faramin titileu atu isana. <sup>18</sup> Iesu mo vereea isara mara, "Kamim sohena, ka sopo rongvosahia? Ka sopo lo hitevosahia vara sava tamlohi la hania i sopo efi vaira la lumiha na nahon God. <sup>19</sup> Hanhani mo sopo sivo na mapumim. Mo sivo na pangemim purongo moiso mo mele malue." Hin retireti akerihi Iesu mo lo

\* **7:11:** hinau la retitauhi: vara i mania teni silesilea.

verea vara hanhani tari la ŕuhu purongo.

<sup>20</sup> Ale Iesu mo mele vereea mara, “Sava mo lo malue na mapu tamlohi, enia natu i eŕi vai na tamlohi i lumiha na nahon God.” <sup>21</sup> Matan sava mo lo malue na mapu tamlohi enia: ŕomŕomi hehe, posposi viriu, vavanaho, vilimatei na tamlohi, <sup>22</sup> vaivaileu peresi na tinapua mo lahi moiso, hanmarua, lejileji, haluhalu, posposi maji, maŕivi na mereimerei, retireŕen, ŕomaulu, peresi na posposi rongorongono vono. <sup>23</sup> La hinau sasati nike natu, la lo malue na mapu tamlohi, ale la vaia mo lumiha na nahon God.”

### *Tanume Sasati Matea* (Mt 15.21-28)

<sup>24</sup> Iesu mo malue Galilee mo vano na jara matan Tyre enia Sidon. Ale mo unu na ima matea mo sopo opoia vara tea i levosahia, pani mo sopo eŕi luhu. <sup>25</sup> Pani mo sopo tuai haŕai matea sei venatuna tanume lumiha sasati matea mo sohonia, mo rongoa ale mo mai isana mo jovi na palona. <sup>26</sup> Haŕai atu enia haŕai ŕoŕoha matea mara Syria Phonecia. Ale mo usia ŕilangi vara i titiu naŕihi tanume sasati atu isan venatuna. <sup>27</sup> Ale Iesu mo vereea isana mara, “Ha tinaŕihi na natuvarihi la hanhani tiroma, matan mo sopo tataholo vara a lavi na hara pereti a pulahia isana viriu!”

<sup>28</sup> Pani pa haŕai mo ŕarami Iesu mara, “Ko varaŕuhu Moli, pani viriu sei la lo toho na ruhuruhi tep la lo

hani na utauta hanhani hana natuvarihi sei la lo jovi sivo na lepa!”

<sup>29</sup> Moiso Iesu mara, “Nom ŕarami mo ŕuhu jea! O vano, tanume sasati atu mo malue hin venatum moiso!” <sup>30</sup> Haŕai atu mo turu mo mule, ale mo hite venatuna mo lo juruvi malum na vatana, ale tanume sasati atu mo malue isana moiso.

### *Peropero Matea*

<sup>31</sup> Iesu mo malue Tyre ale mo hahau vano na taon matan Sidon ale mo sivo na tasin Galilee, hin jara atu sei la lo tovia Decapolis. <sup>32</sup> Ale tamlohi la lavi na tamlohi matea mo mengo ale mo peropero mo mai isana, ale la usia ŕilangi isana vara i tau na limana hinia. <sup>33</sup> Iesu mo lavi tamlohi atu mo vano hasena hin vao atu, mo tau na varangona na lolo perona, moiso mo lito sivo na varangona, ale mo tikeli na memen tamlohi atu na litona. <sup>34</sup> Iesu mo taŕa sahe aulu na tuka, ale mo mapsoro mo vereea na leora mara, “Ephphatha!” Ale ŕaramina enia ‘O roi!’ <sup>35</sup> Vahatea purongo perona mo roi, ale memena mo retireti mo mera.

<sup>36</sup> Iesu mo vereea ŕilangi isara vara la sopo sorahi hinau atu isan te tamlohi, pani mara mo vereea mo ŕilangi enira sohena la opoia mo tavera jea vara la vereulia. <sup>37</sup> Matan la maŕurahi tavera ale la lo vereea lara, “Hinau tari mo lo vaira la ŕuhuŕuhu hajavua. Hina purongo vara la peropero mo

vaira la rongo, teni vara la mengo mo vaira la retireti.”

## 8

*Iesu Mo Vahani Na Tamlohi*

(Mt 15.32-39)

<sup>1</sup> Hin la rani atu, vao tavera matea mo mele toho peresi Iesu, ale mo sopo te hara hinau. Iesu mo tovi na nona tamlohi usuri la mai isana, ale mo vere a isara mara, <sup>2</sup> “Enau na ņomopoi vao nike matan enira la lo toho peresiaua mata rani mo tolu moiso, ale mo sopo te hanhahi vara la pa hania. <sup>3</sup> Vara a ņulera la mule marohati, la pa talekoleko na malele matan tatuara la tai asau ņove.”

<sup>4</sup> Nona tamlohi usuri lara, “Pani ņa pa vahani la tamlohi nike sohena sava hin jara hasetoho nike?”

<sup>5</sup> Iesu mo usia isara mara, “Ka lo lavi na pereti mo visa?” Lara, “Mo limaravrua!”

<sup>6</sup> Ale Iesu mo vere vao atu vara la sakele, moiso mo lavi la pereti atu mo limaravrua mo vere meje isan God matara, mo topera ale mo silera isana nona tamlohi usuri vara la aseasera isan vao atu, ale la vaia sohena. <sup>7</sup> Ale la vilei na maji vavarihi mo visaleta purongo, ale Iesu mo vere meje matara ale mo vere a isana nona tamlohi usuri vara la aseasera isan vao atu.

<sup>8</sup> Tamlohi tari la hanhahi vavano la masu. Hitahu nona tamlohi usuri la sohoni na sope hanhahi na tanga mo limaravrua. <sup>9</sup> Evi tamlohi korong mo tikeli tari vaha vati

(4000). Ale lara la hanhahi moiso Iesu mo ņulera la mule. <sup>10</sup> Hitahu Iesu mo vele na boti matea peresi na nona tamlohi usuri la vano na jara matan Dalmanutha.

*Pharisee La Usi Na Mata-mata*

(Mt 16.1-4)

<sup>11</sup> Pharisee lara la rongoa vara Iesu mo pala atu, la mai vara la usi arearea hin te hinau, la opoia vara i vai te matamata matan na tuka vara i vujangia vara enia hare.

<sup>12</sup> Pani Iesu mara mo rongoa mo mapsoro ale mara, “Kamim ka lo usi na mata-mata mata sava? Varafuhu na vere a isamim vara enau a pa sopo vai te matamata vara kamim pin tamlohi nake ha pa hitea.” <sup>13</sup> Iesu mo malue isara ale mo vele hin pa boti atu, mo mele vano roto tasi atu.

*Hehe Nona Pharisee*

(Mt 16.5-12)

<sup>14</sup> Pani nona tamlohi usuri la ņomaliho vara la lavi te pereti, ale la lo toho peresi na pereti matelete purongo na lolo boti. <sup>15</sup> Ale la pa lo vano roto tasi atu, Iesu mo retiņoaņoahaira mara, “Ha lo kilau mata isi nona Pharisee peresi Herod!”

<sup>16</sup> Nona tamlohi usuri lara la rongoa la ņomi vara mo lo vere a sohena matan la sopo lavi te pereti. <sup>17</sup> Pani Iesu mo levosahi na sava mo lo toho na ņomira, ale mo vere a isara mara, “Mata sava ka lo sorahia vara ka sopo lavi te pereti? Ka sopo lo levosahia? Korong ņomimim la pelati. <sup>18</sup> Matamim la vuso?”



Teni ka peropero? Ka sopo mele řomřomi na sava na lo vaira tiroma? <sup>19</sup> Hin rani atu sei na lo ase na pereti mo lima isan la tamlohi atu mo tari vaha lima (5000), ale tanga sope hanhani mo visa ka pa mele takonahira?"

La řaramia lara, "Kama sohoni na tanga mo sangavulu řomana mo rua." <sup>20</sup> Ale mo mele vereea mara, "Hin rani atu na vahani na tamlohi mo tari vaha vati (4000) na pereti mo limaravrua, ale tanga mo visa ka pa mele takonahira?"

Lara, "Mo limaravrua."

<sup>21</sup> Iesu mo mele vereea isara mara, "Ka lo levosahi na sava na lo vereea teni mo vono?"

### *Tamlohi Vuso Matea*

<sup>22</sup> Iesu peresi na nona tamlohi usuri lara la pala Bethsaida, tamlohi hai la lavi na tamlohi vuso matea la mai isana, ale la usia řilangi isana vara i tikelia na limana. <sup>23</sup> Ale Iesu mo tauri na liman tamlohi atu mo tiroma hinia la malue hin vanua atu. Ale mara mo litovi na matana, ale mo tau na limana hinia moiso mo usia isana mara, "Ko hite te hinau?"

<sup>24</sup> Tamlohi atu mo kilakilau řalihi ale mara, "Na hite na tamlohi, pani la sohena vipahai la lo hahau řalihi."

<sup>25</sup> Ale Iesu mo mele tau na limana na matana, moiso tamlohi atu mara mo mele roi na matana mo eři hite na hinau tari la memera. <sup>26</sup> Iesu mo vereea isana mara, "O mule, pani o sopo hahau na vanua."

### *Iesu Enia Křisto*

*(Mt 16.13-20; Lk 9.18-21)*

<sup>27</sup> Iesu peresi na nona tamlohi usuri la malue Galilee

ale la sahe na vanua sei la lo toho na jara matan Caesarea Philippi. La pa lo hahau Iesu mo usi na nona tamlohi usuri mara, "Ka rongo na tamlohi la lo vereea vara enau hare?"

<sup>28</sup> La řaramia lara, "Tamlohi hai la vereea vara engko John tamlohi paptijo, hai la vereea vara engko Elijah. Hai la lo vereea vara engko přovet matea."

<sup>29</sup> Moiso Iesu mo pete usia isara mara, "Pani kamim, ka lo vereea kara enau hare?"

Peter mo řaramia mara, "Engko natu pa Křisto atu!"

<sup>30</sup> Ale Iesu mo vereea řilangi isara vara la sopo mele vereea isan tea vara enia hare.

### *Mo Retireti Na Nona Mateia*

*(Mt 16.21-28; Lk 9.22-27)*

<sup>31</sup> Iesu mo tapulo vereea isara mara Natun Tamlohi i pa lavi na rani řilangi na hinau matuvana. Ale tamlohi aulu matan Israel peresi na přis aulu, peresi na tamlohi vujangi mata leu la pa řohu hinia, ale la pa vilimateia, pani i pa mele turu na hatolu rani. <sup>32</sup> Mara mo lo vere la hinau atu sohena, Peter mo lavi Iesu mo vano hasena, ale mo reti řilangi isana vara i sopo retireti sohen haratu.

<sup>33</sup> Pani Iesu mo posi mo kilau vano isana nona tamlohi usuri, mo reti řilangi isan Peter mo vereea mara, "O rovo isaku Setan. Romřomi atu mo tai isana tamlohi, mo sopo tai isan God."

<sup>34</sup> Ale Iesu mo tovi la vao atu peresi na nona tamlohi usuri vara la mai isana, ale

mo vereā mara, “Vara te von-amim hatea mo opoia vara i usuriau, o vaihitea vara o ŀomalihu na masalom moiso o soloti na nom talopeilopei ale o usuriau! <sup>35</sup> Matan sava tamlohi vara mo opoia vara juri na maurina, i pa vaitihaia, pani hare vara mo vaitihai na maurina matakū peresi na Retiŀuhu i pa juri na maurina. <sup>36</sup> Sava hināu mo ŀuhu hinia vara o lavi na hināu tari matan varama nike, pani o pa vaitihai na maurim? <sup>37</sup> Sava hināu natu, o pa eŀi vaia vara o eŀi volituhu na maurim hinia?”

<sup>38</sup> Matan sava tamlohi vara mo mahanuhanu hiniaū peresi na noku retireti hin pina vaivaileu nike sei mo ŀejileji, enia sohena Natun Tamlohi i pa sopo avulahi hinia hin rani atu i pa mai peresi na nona angelo tapu peresi na mera tavera non Tamana.”

## 9

<sup>1</sup> Iesu mo mele vereā isara mara, “Varaŀuhu na vereā isamim vara tatuamim sei la lo turu nakerihi, la pa sopo lo mate la pa hite mauri atu God mo aulu hinia i mai na suihana tavera.”

*Epen Iesu Mo Posi*  
(Mt 17.14-21; Lk 9.28-36)

<sup>2</sup> Rani mo limarave la vano moiso, ale Iesu mo lavi Peter, James peresi John, la sahe aulu na vutivuti enira hasera. Hin rani atu la hite na epen Iesu mo posi, <sup>3</sup> ale la hite na nona ruru la mera hajavua, la lulu tinapua, la jeu na hināu lulu tari nike na varama. <sup>4</sup> Moiso la hite

pŀovet Elijah enia Moses la pala ale la lo sorasora peresi Iesu. <sup>5</sup> Peter mo vereā isan Iesu mara, “Moli, mo ŀuhu matan kama lo toho akერიhi. Mo ŀuhu ŀa vai te tent i tolu akერიhi, matea nom, matea non Moses ale matea non pŀovet Elijah.” <sup>6</sup> Matan Peter mo sopo levosahia vara i pa vere na sava matan la matahu hajavua.

<sup>7</sup> Ale telangi matea mo mai mo hohovira, moiso la rongo na leo matea mo malue hinia mara, “Harihi enia Natuku sei na opoia mo tavera jea. Ha tapurongo isana!” <sup>8</sup> Vahatea purongo la pa ale Moses enia Elijah pani la tihai, pani la hite Iesu hasena mo pa lo toho atu. <sup>9</sup> Ale lara la lo sevuti na vutivuti, Iesu mo reti horora vara la sopo mele vereā na sava la hitea isan te tamlohi vavaŀo Natun Tamlohi i mele mauri na mateia. <sup>10</sup> Ale la sopo mele vereā isan tea, pani la lo usia vara ŀaramin reti sei vara i pa mele turu na mateia enia sava.

### *Elijah I Pa Mele Mai*

<sup>11</sup> Ale la usia isana lara, “Mata sava natu, tamlohi vujangi mata leu la vereā lara, ‘Elijah i pa mai tiroma?’”

<sup>12</sup> Iesu mo ŀaramira mara, “Varaŀuhu, Elijah i pa mai tiroma vara i vai tataholoi na hināu tari. Pani mata sava natu la ulia na Retiulia vara Natun Tamlohi i pa lavi na ŀilangi ale la pa vailejleja na nora hiteŀeresi? <sup>13</sup> Pani na vereā isamim vara Elijah mo pete mai moiso, ale tamlohi

la vailejlejia usuri na masalora sohena Retitapu mo lo vereaa.”

*Iesu Mo Tueni Na Uluvou Matea*

*(Mt 17.14-20; Lk 9.37-43a)*

<sup>14</sup> Iesu peresi la tupu tolu atu, lara la mele sevuti sivo na pulon vuti atu, la hite na tapalara tamlohi usuri peresi na vao tavera matea la lo turu řalihira, ale la hite na tamlohi vujangi mata leu hai la lo vasvasi peresira. <sup>15</sup> Ale la vao tamlohi atu lara la hite Iesu la hutura hinia, ale vahatea la avulahi la maro vano isana.

<sup>16</sup> Iesu mo usi na nona tamlohi mara, “Eh! Kamim ka lo vauriuri na sava?”

<sup>17</sup> Vonara matea mo vereaa isan Iesu mara, “Tija, na lavi natuku na mai isam matan tanume mata mengo mo lo toho isana. <sup>18</sup> Vara mo vaia, mo lo pulahia atano na lepa, ale epena la lo řira mo lo hatihati na huřuna moiso jingona mo lo valval. Ale na usia isana nom tamlohi usuri vara la titiu nařihi tanume sasati nike, pani la sopo eři vaia.”

<sup>19</sup> Iesu mo řaramira mara, “Kamim nomim rasua mo sohena sava! A pa toho peresi kamim i tikeli pangisa? A pa tueni kamim i tikeli pangisa? Ha lavi uluvou atu i mai isaku!”

<sup>20</sup> Moiso la lavi uluvou atu mo mai isana, ale tanume sasati atu mara mo hite Iesu, mo tuatuahi pa uluvou atu mo jovi atano na lepa, ale mo lo makurekure, moiso valval jingona mo lo malue.

<sup>21</sup> Iesu mo usia isan tamana mara, “Tanume sasati nike mo tapulo vaia nangisa?”

Ale tamana mo řaramia mara, “Na rani mo lo natirihi. <sup>22</sup> Hin te rani mo vaia mo jovi na hapu teni na wai vara i vilimateia. Pani vara o eři vai te hinau, o řomopoi kamam, o tueni kamam.”

<sup>23</sup> Iesu mara, “Ko vereaa vara a eři vaia! Vara te nom rasua o eři vai na hinau tari!”

<sup>24</sup> Vahatea tamana mo řaramia mara, “Na rasua, pani o nařihi na noku řomkaka!”

<sup>25</sup> Ale Iesu mara mo hite na vao matea la lo maro la mai vara la pa turu porotia matana, mo reti řilangi isan tanume lumiha sasati atu mara, “Tanume mengo, na vereaa isam vara o malue isan uluvou sei nakerihi! O sopo mele unu hinia hin te rani!” <sup>26</sup> Tanume sasati atu mo ulo sasati, mo mele tuatuahia mo jovi sivo atano moiso mo malue hinia. Tamlohi la hitea sohena vara uluvou atu mo mate moiso, ale lara, “Eh, mo mate!” <sup>27</sup> Pani Iesu mo saua, ale mo mele turu.

<sup>28</sup> Ale hitahu Iesu mara mo mele unu hin ima atu, nona tamlohi usuri la usia lara, “Mata sava natu, kamam kama sopo eři titiu nařihi tanume sasati atu?”

<sup>29</sup> Ale Iesu mo vereaa isara mara, “Tanume sasati sohen haratu, usiuri purongo i eři titiu nařihia.”

*Iesu Mara I Pa Mate*

*(Mt 17.22-23; Lk 9.43b-45)*

<sup>30</sup> Iesu peresi na nona tamlohi la malue hin jara atu, ale la hahau roto na jara Galilee, matan hin rani atu Iesu mo sopo opoia vara tea i levosahia vara mo lo toho atu.

<sup>31</sup> Matan mo opoia vara i vujangi na nona tamlohi usuri hasera. Mo mele vereea isara mara, “Tamlohi la pa turuposi hin Natun Tamlohi, ale la pa taua na lima tamlohi vara la vilimateia. Pani na hatolu rani i pa mele turu na mateia.” <sup>32</sup> Pani la sopo rongvosahi na sava hinau mo lo vereea isara, ale la matahu vara la usi na řarami nona retireti.

*Hare Mo Aulu*  
(Mt 18.1-5; Lk 9.46-48)

<sup>33</sup> Lara la kakau Capernaum, ale la unu na ima matea mata la pa toho hinia. Iesu mo usia isara mara, “Sava natu, ka lo sorahia na malele?” <sup>34</sup> Pani la sopo řaramia matan la lo vauriuri vara hare natu mo aulu jea hinira. <sup>35</sup> Ale Iesu mo sakele mo tovi la tupu sangavulu řomana mo rua atu la mai isana mara, “Vara tea mo opoia vara i aulu i jeu na tinapua, enia i pa hasena taua atano i jeu na volitusi nona tamlohi tari.”

<sup>36</sup> Moiso Iesu mo lavi na natirihia matea hin vao atu ale mo taua na livuhara. Moiso mo tulia mara, <sup>37</sup> “Vara tea mo lavi te natirihia sohen haranike na hijaku, enia mo lo laviau. Ale vara tea mo laviau, mo sopo laviau haseku, pani mo lo lavi Tamaku sei mo lo řuleau sohena.”

*Vavahinau Na Hijan Iesu*  
(Lk 9.49-50)

<sup>38</sup> John mo vereea isan Iesu mara, “Tija, kama hite na tamlohi matea mo lo titiu nařihi na tanume sasati na

hijam, pani kama horoa vara i isoiso matan enia mo sopo tatuara.” <sup>39</sup> Pani Iesu mo vereea isara mara, “Ha sopo horoa, matan i pa sopo te tamlohi hatea vara mo lo vai na matamata tavera na hijaku i eři mele verelejleiau hin te rani. <sup>40</sup> Matan la haratu la sopo turuleji hinira, enira nořa. <sup>41</sup> Varařuhu na vereea isamim, vara tea mo sile te paniken wai hamařiri isamim matan ka tamlohi non Křisto, varařuhu enia i pa lavi na otori matana!”

*Ha Lo Kilau Mata Posposi Hehe*  
(Mt 18.6-9; Lk 17.1-2)

<sup>42</sup> “Pani vara tea mo vai na natirihia matea sohen harihi sei mo rasuau i jovi na hehe, i pa mele řuhu jea vara la lasi te vatu tavera na řalona, ale la putehia na tasi puaha. <sup>43</sup> Vara limam mo lo vaiho ko lo vai na hehe, o tai nařihia! I pa mele řuhu jea vara o lavi mauri atu na tuka peresi te limam hatelete purongo, mo jeu haratu vara o pa vano na hapu mata moruhapu sei mo sopo eři mate peresi na limam mo rua! <sup>44-45</sup> Vara palom mo lo vaiho ko lo vai na hehe, o tai nařihia! I pa mele řuhu jea vara o unu hin mauri atu na tuka peresi te palom hatelete purongo, mo jeu haratu vara la pulahiho peresi na palom mo rua na moruhapu. <sup>46-47</sup> Vara matam mo lo vaiho ko lo vai na hehe, o hoti nařihia! Mo mele řuhu jea vara o unu hin mauri atu God mo aulu hinia peresi te matam hatelete purongo, mo jeu haratu vara la pulahiho

peresi na matam mo rua na moruhapu. <sup>48</sup> ‘Hin jara atu hulesira la sopo efi mate, ale hapu mo sopo mate hin te rani.’ *Isa 66.24*

<sup>49</sup> Matan God i pa tau na hapu mata rani filangi na mauri tamlohi tari, matan vara i hani narihi na hehe na maurira sohena solo mo lo vai na mit mo sopo ranga. <sup>50</sup> Solo mo ruhu, pani vara mejina mo tihai, ha pa efi vaia i mele meji sohena sava? Ha taurilati na romimim mata rohu na hehe, ale ha toho na tamata peresi kamim hatehateahi!”

## 10

### *Vujangi Mata Lahi* (*Mt 19.1-12; Lk 16.18*)

<sup>1</sup> Ale Iesu mo malue Capernaum, mo sivo na jara matan Judea, ale mo vano na tavalu wai Jordan na jara Opae hinia. Hin jara atu vao tamlohi la mele mai isana sohen tarea, ale mo lo vujan-gira sohen tarea.

<sup>2</sup> Pharisee hai la mai isana la vaihitea hin retiusia akerehi lara, “Tamlohi i pa tope na leu vara mo rohu hin narouna teni mo vono?”

<sup>3</sup> Iesu mo faramira mara, “Leu non Moses mo vereea vara sava?”

<sup>4</sup> La tamlohi atu la vereea lara, “Moses mo majinga hinia mara i pa uli na certificate matea matana, moiso i pa efi rule narihia i vano.” *Deut 24.1-4; Mt 5.31*

<sup>5</sup> Pani Iesu mo faramira mara, “Moses mo pa uli leu atu matan patumim mo rilangi. <sup>6</sup> Pani na pongi tiroma sei God mo vai na

varama, ‘Mo vai na lamane peresi na haiai.’ *Gen 1.27; 5.2*

<sup>7</sup> Mata hinau atu natu, tamlohi matea i pa soŋotahi isan narouna, i pa malue isan tamana enia tinana. <sup>8</sup> La tupra rua atu la pa mai epe matelete purongo.’ Matan la sopo mele mo rua, pani la pa matea, *Gen 2.24*

<sup>9</sup> i pa sopo te tamlohi hatea i efi mele tauhasehira matan God mo soŋotahira la mai matea moiso.’” <sup>10</sup> Ale hitahuna, Iesu mara mo lo toho hasena na ima peresi na nona tamlohi usuri, ale la mele usia hin pa vujangi atu.

<sup>11</sup> Ale Iesu mo vereea isara mara, “Vara te tamlohi mo rohu hin narouna, moiso mo mele lavi na haiai tinapua, enia mo lo vaivaileu peresi haiai atu. <sup>12</sup> Ale vara te haiai mo rohu hin tuana, moiso mo mele lahi isana tamlohi tinapua, enia mo lo vaivaileu peresi tamlohi atu.”

### *Iesu Mo Leŋuhu Na Natu-varihi*

(*Mt 19.13-15; Lk 18.15-17*)

<sup>13</sup> Na rani tinapua, tamlohi hai la lavi na natura la mai isan Iesu matan vara i tau na limana hinira, ale i leŋuhu hinira, pani nona tamlohi usuri la lo horora. <sup>14</sup> Pani Iesu mara mo hitea mo lolokoru hinira, ale mo vereea isara mara, “Ha tinarihi na natuvarihi la mai isaku, ha sopo horora matan mauri atu God mo aulu hinia, enia non la haratu sei la sohera. <sup>15</sup> Vararuhi na vereea isamim vara te tamlohi mo sopo efi lavi mauri atu God mo aulu hinia sohen natirihi nike, enia i pa sopo efi unu

hin mauri atu hin te rani.”  
 16 Moiso Iesu mo tuli na natuvarahi na limana, ale mo tau na limana aulu na patura mo leʻuhu hinira.

*Tamlohi Tavtav Matea*  
 (Mt 19.16-30; Lk 18.18-30)

17 Na rani matea, Iesu mo pa tapulo vara i mele vano na nona hahau matea na jara tinapua matea, uluvou matea mo maro mo mai ale mo papaohi isan Iesu mo usia mara, “Tija ʻrūhuʻrūhu, a pa vai na sava natu vara a lavi na mauri tui hinia?”

18 Iesu mo vereā mara, “Mata sava ko vereāu vara na ʻrūhu? God hasena mo ʻrūhu. 19 Engko ko levosahi na leu, ‘O sopo vilimateia na tamlohi, o sopo vaivaileu peresi na tinapua mo lahi moiso, o sopo vavanaho, o sopo halu, o sopo retihalu hin tahisam, o sopo vai te halu mata vavanaho, moiso o oloolo hin tamam enia tinam.’” *Exo 20.12-16; Deut 5.16-20*

20 Uluvou atu mo vereā mara, “Tija, la leu tari atu na lo usurira na pa lo natirihi mo sinai mo kakau nake.”

21 Iesu mo kilau tataholo isan tamlohi atu na opoia, ale mo vereā isana mara, “Ko pa lo vejuveju na hināu matea. O vano o haʻehi vevuhi na nom hināu tari, ale o sile na maniana isana tilavono, ale o pa lavi na tavgav na tuka. Moiso, o pa mai, o usuriau!”

22 Pa tamlohi atu ʻromina mo jovi mata sava Iesu mo vereā isana, matan enia tamlohi tavgav matea.

23 Iesu mo kilau ʻralihi, ale mo vereā isana nona tamlohi usuri mara, “I pa ʻrilangi isan la haratu la tavgav vara la unu hin mauri atu God mo aulu hinia.” 24 Nona tamlohi usuri la maʻurahi na nona reti matan la lo ʻromʻromia lara God mo leʻuhu na tamlohi tavgav. Iesu mo mele vereā isara mara, “Natuvarahi, mo ʻrilangi jea vara tea i ʻēri unu hin mauri atu God mo aulu hinia! 25 Mo mele malum jea vara camel i unu na koko niteli matea mo jeu haratu vara tamlohi tavgav matea i ʻēri unu hin mauri atu God mo aulu hinia.”

26 Nona tamlohi la maʻurahi tavera hinia, ale la lo usiusira hinia lara, “Hare natu, i pa ʻēri juri?”

27 Iesu mo kilau tataholo isara mara, “Hināu tamlohi la sopo ʻēri vaia, God i ʻēri vaia. Matan God i ʻēri vai na hināu tari.”

28 Moiso Peter mo tapulo vereā isan Iesu mara, “Kama tināʻihi na hināu tari vara kama usuriho!”

29 Ale Iesu mara, “Varaʻrūhu, na vereā isamim, vara tea mo tināʻihi na imana, teni tasina teni vetasina, teni tamama teni tinana teni te natuna, teni jarana, ale mo tināʻihira matakū teni mata Retiʻrūhu, 30 enia i pa mele lavia nike nake na varama i vaha ngavulu sangavulu (100) na imana, na voraina peresi na vetasina, tinana, peresi na natuna teni jarana, ale i pa lavi na rani ʻrilangi na lima tamlohi, pani na pongi hitahu i pa lavi na mauri tui. 31 Pani la haratu sei la lo ʻromʻromia vara enira la aulu na tamlohi nake, la pa

atano jea, ale la haratu sei la lo atano nake, la pa aulu hinira.”

*Iesu Mo Mele Vereā Vara I Pa Mate*

(Mt 20.17-19; Lk 18.31-34)

<sup>32</sup> Ale lara la lo vano na malele vara la sahe Jerusalem, Iesu mo lo vano tiroma, ale la haratu na hařina la mařurahi na nona reti, ale la tupu sangavulu řomana mo rua atu la matahu matan Iesu mo mele tapulo vere na sava i pa maseše isana Jerusalem. <sup>33</sup> Mo vereā isara mara, “Ka hitea, řa lo sahe Jerusalem nahai, pani i pa sopo tuai la pa tau Natun Tamlohi na lima moli mata pŗis peresi na tamlohi vujangi mata leu, ale la pa silea na talai vara i mate, moiso la pa taua na lima mara Rome. <sup>34</sup> La pa retikerekerehia, la pa litovia, la pa rupia na asi maja, ale la pa vilimateia. Pani na hatolu rani i pa mele turu na mateia.”

*Vujangi Mata Volitusi*

(Mt 20.20-28)

<sup>35</sup> Ale James enia John natun Zebedee, la mai isan Iesu la vereā isana lara, “Tija, kama opoi na hinau matea vara o pa vaia matamam.” <sup>36</sup> Iesu mara, “Ka opoia vara a vai na sava matamim?”

<sup>37</sup> La vereā lara, “Kamam kama opoia vara kama pa sakele na pahisam na nom rani suiha. Matea na matuam, ale matea na maraum.”

<sup>38</sup> Ale Iesu vereā isara mara, “Ka sopo levosahi na sava hinau ka lo usia. Kamim

ha eři inu hin paniken atu mata rani řilangi sei a pa inu hinia? Kamim ha eři lavi paptijo atu mata rongohaji sei a pa lavia?”

<sup>39</sup> La řaramia lara, “Kama eři vaia.”

Ale Iesu mo vereā isara mara, “Ha pa inu hin paniken atu sei a pa inu hinia, ale ha pa lavi paptijo atu sei a pa lavia, <sup>40</sup> pani mo sopo noku hinau vara a pa vereā vara hare natu i pa sakele na matuaku teni na marauku. God Tama mo tatamahuni la jara atu moiso matan la haratu sei mo viřonira moiso.”

*Haratu Mo Aulu Varařuhu*

<sup>41</sup> La tupu sangavulu tinapua atu lara la rongo hinau atu la lolokoru hin James enia John. <sup>42</sup> Ale matana, Iesu mo tovi matavuhira mai isana mo vereā isara mara, “Ka levosahia vara la haratu la lo aulu na tamlohi řoroħa la lo řomřomira hasera purongo, ale la lo vailehilehi na tamlohi la lo toho na ruhuruhura. <sup>43</sup> Pani i pa sopo sohen haratu isamim. Vara te vonamim mo opoia vara i aulu hin kamim, enia i pa mai sohena nomim volitusi. <sup>44</sup> Ale vara tea mo opoia vara i tiroma, enia i pa mai sohena slev nona tamlohi tari. <sup>45</sup> Matan hina purongo vara enau na Natun Tamlohi, na sopo mai vara tamlohi la volitusi isaku. Pani na mai vara a volitusi, ale vara a hase sile na mauriku vara i volituhu na tamlohi matuvana.”

*Iesu Mo Tueni Bartimaeus*  
(Mt 20.29-34; Lk 18.35-43)

46 La kakau Jericho, ale hitahu Iesu mara mo pa lo malue Jericho tolu na nona tamlohi usuri peresi na vao tavera matea, tamlohi matavuso matea hijana Bartimaeus natun Timaeus, mo lo sakele na pahisa malele, ale mo lo usi na mania isana tamlohi. 47 Ale mara mo rongoa vara Iesu mara Nazareth mo lo hahau hin jara atu, mo tapulo tangi aulu mara, "Iesu, natun Supe David, o řomopoiâu!"

48 Pani tamlohi matuvana la merusahia lara i toho malum, pani mo mele ulo aulu jea mara, "Natun Supe David, o řomopoiâu!"

49 Iesu mara mo rongoa mo turu atu, mo vereia isara mara, "Ha vereia i mai isaku!"

Ale tamlohi la tovi matavuso atu lara, "Eh, řomim i sopo sati! O turu! Iesu mo toviho." 50 Mo pulahi narīhi na nona ruru hamariri, mo vai vilavila mo mai isan Iesu.

51 Iesu mo usia mara, "Ko opoi na sava vara a vaia isam?"

Matavuso atu mo řarami Iesu mara, "Tija, na opoia vara a eři kilau."

52 Ale Iesu mara, "O vano! Nom rasua mo vaiho ko řuhu moiso."

Ale vahatea purongo matana la kilau, moiso mo usuri Iesu na malele.

## 11

*Iesu Mo Unu Jerusalem*

(Mt 21.1-11; Lk 19.28-40; Jn 12.12-19)

1 Iesu tolu na nona tamlohi usuri la lo usuri na malele mo

sahe Jerusalem, ale la mai na vanua matan Bethphage peresi Bethany na pahisa vutivuti sei la tovia Vuti talu Olive. Iesu mo řule na nona tamlohi usuri mo rua vara la vano tiroma hinira. 2 Mo vereia mara, "Ha vano hin vanua aturihi ale ha unu hinia, ale ha pa hite na natu donki matea la lihoa. Tea mo sopo lo sakele hinia hin te rani. Ha uli na asina, ale ha lavia i mai isaku. 3 Vara tea mo usi kamim vara, 'Ka lo vai na sava?' ha vereia vara, 'Moli mo opoia, ale i pa mele sohaia i mai nohorihī'."

4 La vano hin vanua atu, moiso la hite natu donki atu mo lo toho na pahisa malele la lihoa na jingoima ima matea, ale la uli na asina. 5 Pani tamlohi hai sei la lo turu atu la usira lara, "Mata sava ka lo uli na asin natu donki sei?" 6 La řaramira sohen Iesu mo vereia isara moiso, ale la tamlohi atu la tinarīhia vara la lavi natu donki atu i vano. 7 La lavia mo mai, la vuřangi na nora ruru aulu na harin natu donki atu, ale Iesu mo sahe mo sakele hinia.

8 Tamlohi matuvana la vuřangi na nora ruru na malele, ale hai la lo tai na rau pahai na pahisa malele la vuřangira na malele vara natu donki atu i pa hahau hinia. 9 Tamlohi hai la lo hahau tiroma, hai la lo hitahu, ale Iesu mo lo toho na livuhara, ale la lo uloulo tavera lara,

"Hasohaso God!" *Psa 118.25*

Ale "Leřuhu isan haratu sei mo lo mai na hijan

Moli God". *Psa 118.26*

10 "Avulahi tavera mo lo mai



mata rani suiha non tamaña Supe David mo pala.”

“Hasohaso God aulu na tuka sei mo aulu jea!”

<sup>11</sup> Iesu mo unu Jerusalem, ale mo unu na rope Temple. Ale mara mo vano řalihi mo hite na hinau tari moiso, ale matan pongi mo mai mariviti moiso mo malue mo vano Bethany peresi la nona tamlohi atu mo sangavulu řomana mo rua.

*Mo Lesati Na Vipahai Fig Matea*

(Mt 21.18-19)

<sup>12</sup> Na harua rani na řalavuhō, la malue Bethany ale la lo vano, Iesu mo marohati. <sup>13</sup> Mo hite na vipahai fig matea mo lo turu asau na pahisa malele, ale mo hahau mo vano hinia vara i hitea vara te vuana, pani mo sopo te vuana, mo lo rauha purongo matan mo sopo lo taro mata i vua. <sup>14</sup> Iesu mo reti isan vipahai atu mara, “I pa sopo mele tea i eři mele hani te vuam hin te rani.” Ale nona tamlohi usuri la rongo reti atu mo lo vereea isana.

*Iesu Mo Levutira Na Temple*

(Mt 21.12-17; Lk 19.45-48; Jn 2.13-22)

<sup>15</sup> La vano la mele tikeli Jerusalem moiso Iesu mo unu na rope Temple, mo tapulo levuti la haratu sei la lo hařehi na hinahināu peresi la haratu sei la lo voli na nora hinahināu. Iesu mo tarasahi na tep non la haratu la lo jeni na mania nona tamlohi sei la mai Jerusalem.

Mo vano mo tohoi roiroi na palapala non la haratu la lo hařehi na vomahe.

<sup>16</sup> Mo horo la haratu sei la opoia vara la lavi na nora hinahināu mata hařehira na lolo ropen Temple atu.

<sup>17</sup> Ale Iesu mo vujangira mo vereea isara mara, “Ka sopo lo levosahi na sava la ulia na Retiulia sei mo vereea vara,

‘Imaku enia ima mata usiusi nona tamlohi tari na varama.’ *Isa 56.7*

Pani nake ka vaia mo mai sohena,

‘Papa tamlohi vili tamlohi mata mania matea.’” *Jer 7.11*

<sup>18</sup> Pŗis aulu peresi na tamlohi vujangi mata leu lara la rongo na sava Iesu mo vaira na Temple, la tapulo aleale malele vara la vilimateia hinia. Pani la matahuni Iesu matan tamlohi tari la lo mařurahi tavera na nona vujangi. <sup>19</sup> Na ravravi Iesu enia tolu na nona tamlohi usuri la mele malue Jerusalem.

*Pa Vipahai Fig Atu Mo Koru*

(Mt 21.20-22)

<sup>20</sup> Na řalavuhō tinapua, lara la mele vano mařiviti hin pa vipahai fig atu, la hite na rauna la menumenu, ale lahona peresi na warina la koru moiso. <sup>21</sup> Peter mo mele řomŗomi pa reti atu non Iesu sei mo vereea isan vipahai atu, ale mara, “Tija, o to kilau vano! Pa fig atu ko lo lesati hinia mo koru moiso.”

<sup>22</sup> Moiso Iesu mo řaramia mara, “Ha tau na nomim rasua hin God! <sup>23</sup> Varařuhu na vereea isamim, vara tea nona

rasua mo řilangi, ale mo sopo řomkaka hinia, i eři vereea isan vuti tavera akerihi vara, 'O hase taheho o sahe aulu, ale o pulahiho sivo na tasi tavera!' ale i pa oloolo hinia!  
 24 Ha tapurongo isaku! Na vereea vara sava hinau ka usia na nomim usiusi, vara ka rasua mo řilangi i pa sohena.  
 25-26 Pani vara ka lo usiusi, ha řomi na hehe nona tinapua sei la vaia isamim, ha řomira tiroma, matan vara Tamamim na tuka sohena i eři řomi na nomim hehe."

*Tamlohi Tavera La Mai Isan Iesu*  
 (Mt 21.23-27; Lk 20.1-8)

27 Iesu peresi na nona tamlohi usuri la mele unu Jerusalem, ale lara la lo hahau na lolo rope Temple, pñis aulu tolu na tamlohi vujangi mata leu peresi na tamlohi aulu tinapua hai la mai isana, moiso la reti isana lara, 28 "Sava suiha natu ko lo vai la hinau nike hinia teni hare mo sileho na suiha matana?"

29 Iesu mo vereea isara mara, "A pa usi kamim na retiusia matea, ale vara ha řaramiau, enau a pa vere kamim hinia vara na lavi na suiha isan hare natu na lo vai la hinau nike hinia. 30 Ha to vereau hinia, paptijo non John mo tai isan God teni isana tamlohi?"

31 Ale la lo hasera sora-sorahia lara, "Vara řa vereea vara enia mo tai isan God, i pa usiřa vara, 'Mata sava natu, ka sopo rasu John?' 32 Pani vara řa vereea vara enia mo tai isana tamlohi, la vao nike la pa lo lolokoru hiniřa." La lo

verea matan la matahu vara la pa vai la vao tamlohi atu la lolokoru ale la sopo eři mele vaira la toho malum, matan la vao atu la rasua vara John enia pñovet varařuhu matea.  
 33 Matan haratu, la tamlohi tatavera atu la řarami Iesu lara, "Kama sopo levosahia."

Ale Iesu mo vereea isara mara, "Enau sohena, a pa sopo vere kamim hinia vara sava suiha natu, na lo vavahinau hinia."

## 12

*Vujangi Mata Tamlohi Sasati*  
 (Mt 21.33-46; Lk 20.9-19)

1 Ale na lolo rope Temple Iesu mo tapulo vujangi na titileu isara mara, "Tamlohi tavera matea mo lavo na isa mata grape matea. Mo vai na ropena, mo voro na jara mata lavi nařihi na waena hinia. Mo voro na ima aulu matea mata kilau na isana. Ale mo sile isana atu vara tamlohi lalavo tinapua la pakaia, ale la lalavo hinia. Moiso pa tamlohi tavera atu mo vano na jara tinapua mata i tohoa ea.  
 Isa 5.1-2

2 Taro mata vua grape la mena, ale pa tamlohi tavera atu mo řule na nona volitusi matea mo vano vara i lavi na řungana vuara. 3 Pani pa la tamlohi atu la tauri pa volitusi, la hamajia, moiso la řulea mo vano lekoleko.

4 Tamlohi tavera atu mo mele řule na volitusi tinapua matea. Mo vano, pani la hamajia na patuna, ale la vaimahanuhanu hinia.  
 5 Tamlohi tavera atu mo mele řule na volitusi tinapua

matea. Pani la vilimateia. Tamlohi tavera atu mo mele fule te nona volitusi tinapua matuvana, pani hai la hamajira, ale hai la vilimateira vavano,<sup>6</sup> tamlohi tavera atu mo hitea vara natuna tataholo purongo mo pa lo toho. Enia mo opoia mo tavera jea, ale mo řomřomia mara, 'Na levosahia vara a řule natuku i sivo, la pa ooloo hinia.'

7 Pani pa la tamlohi sasati atu la lo vereverera isara hasera lara, 'Natuna tataholo nakerihi mo lo mai, vara řa vilimateia, řa pa lavi na koruna tari!' <sup>8</sup> La tauria, ale la vilimateia moiso la pulahia mo sahe na jingoiman rope atu."

<sup>9</sup> Iesu mo usia isara mara, "Ka řom vara tamlohi tavera atu i pa vai na sava? A vereea tataholo isamim, i pa sinai i vilimateira enira mo isoiso, ale i pa sile isa atu isana tamlohi tinapua vara la mele pakaia. <sup>10</sup> Varařuhu, ka sopo lo evi hinau nike na Retiulia? 'Vatu atu tamlohi voro ima la lo tipahia,

enia mo mai tapulo pulo vatu mata ima.

<sup>11</sup> Hinau atu Moli God hasena mo vaia.

Kama hitea vara mo řuhu jea.'

*Psa 118.22-23*

<sup>12</sup> Tamlohi tatavera non Jew la opoia vara la taurilatia matan la hitevosahia vara Iesu mo lo vere titileu atu matan vara i pisuhira, pani la matahu vara la tauria matan la vao atu. Matan haratu, la malue atu, ale la rovo.

*Ha Voli Na Takis*

*(Mt 22.15-22; Lk 20.20-26)*

<sup>13</sup> Ale la řule na Pharisee hai peresi na tamlohi hai non Herod Antipas la vano isan Iesu matan vara la vaihitea vara i ori hin te nona retireti. <sup>14</sup> Ale la mai isana la vereea lara, "Tija, kama levosahia vara engko ko lo varařuhu, ale ko sopo tametame na řomřomi nona tamlohi, matan ko sopo usuri na kilakilau nona tamlohi isana tamlohi aulu, pani engko ko lo vujangi na malele tataholo non God usuri na retivarãřuhu.

Nomam retusia isam nahai, mo tataholo vara tavgavin Israel la voli na takis isana supe nona mara Rome teni mo vono? Ra pa silea teni i toho?" <sup>15</sup> Pani Iesu mo levosahi na nora tapnetano, ale mo vereea isara mara, "Mata sava ka lo vaihiteau sohena? Ha lavi te selen hatea i mai isaku a hitea." <sup>16</sup> Ale la lavi matea la silea isana moiso mo usia isara mara, "Niniun hare nahai, ale hijan hare nahai la ulia hin selen nike?"

Lara, "Nahon supe nona mara Rome."

<sup>17</sup> Ale Iesu mo vereea isara mara, "Ale ha sile na hinau non supe nona mara Rome isan supe nona mara Rome, ale hinau non God isan God."

Ale lara la rongo mo řaramira sohena, la mařurahi tavera hinia.

*Vujangi Mata Sauteterahi Na Mateia*

*(Mt 22.23-33; Lk 20.27-40)*

<sup>18</sup> Ale Sadducee hai la mai isan Iesu, enira vao matea na Jew sei la sopo rasua

vara God i pa sauteterahi na tamlohi na mateia. La mai isana la usia na retiusia matea lara, <sup>19</sup> “Tija, Moses mo ulia mara vara tamlohi lahi matea mo mate, pani narouna mo sopo vasusu, tasina i pa lavi na malepuna i mai narouna matan vara haʻai atu i eʻi lavi te natun tavaina. *Deut 25.5*

<sup>20</sup> Tuai, vorai mo limar-avrua la lo toho. Ale vora tiroma mo lavi na haʻai matea, pani mo sopo lo te natuna, ale mo mate. <sup>21</sup> Vora usuria mo pete lavi haʻai atu, pani enia sohena mo mate, mo sopo te natuna. Hatolura mo pete lavia, ale mo mate mo sopo te natuna. <sup>22</sup> Mo sohena mo tikeli na vora hitahu, ale enira mo isoiso la mate. Haʻai atu sohena mo mate, pani mo sopo te natuna. <sup>23</sup> O to vere kamam hinia vara haʻai atu i pa naroun hare na pongi sauteterahi matan enia mo lahi isan la vorai atu enira mo isoiso.”

<sup>24</sup> Iesu mo vereea isara mara, “Nomim ʻomʻomi mo sopo tataholo, matan ka sopo levosahi mamahuni na Retitapu teni na suiham God! <sup>25</sup> Matan hin rani atu tamlohi la pa mele turu na mateia, la pa sopo mele lahi, pani la pa sohena angelo na tuka. <sup>26</sup> Pani hin vujangi sei mata sauteterahi na mateia, korong ka sopo lo evia matan vipahai rihirihi atu sei Moses mo hite na hapu mo lo hani hinia? God mo vereea isan Moses mara, ‘Enau God non Abraham, God non Isaac, ale God non Jacob.’ *Exo 3.6*

<sup>27</sup> God enia mo sopo God nona tamlohi mate, pani nona tamlohi mauri, matan isana, tamlohi tari la lo mauri. Kamim ka jalio mo tavera.”

### *Retileu Atu Mo Jeu Na Tinapua*

*(Mt 22.34-40; Lk 10.25-28)*

<sup>28</sup> Ale hin rani atu tamlohi vujangi mata leu matea mo mai mo lo tapurongo na vauriuri nona Sadducee, ale mo rongo sohena sava Iesu mo ʻaramira sei mo ʻuhu jea, ale mo usi Iesu hinia mara, “Sava leu natu mo aulu mo jeu na leu tari?”

<sup>29</sup> Iesu mo ʻaramia mara, “Leu atu mo aulu mo jeu na leu tari enia vara, ‘Israel, ha tapurongo! Moli noʻa God, enia Moli matelete. <sup>30</sup> O pa opoi Moli nom God vevuhi na mapum, na maurim, na ʻomim, peresi na suiham.’ *Deut 6.4-5*

<sup>31</sup> Ale haruana enia nahai, ‘O opoi na tahisam sohen ko lo opoiho hasem.’ Moiso mo sopo mele te leu tinapua i aulu i jeu la leu sei mo rua.” *Lev 19.18*

<sup>32</sup> Tamlohi vujangi mata leu atu mo vereea mara, “Tija, ko varaʻuhu vara God enia matelete purongo, ale mo sopo mele te tinapua. <sup>33</sup> Ale mo tataholo vara ʻa opoi vevuhia na mapuʻa, na ʻomiʻa, na suihaʻa, ale vara ʻa opoia na tahisaʻa sohena ʻa lo opoiʻa haseʻa. La leu akerihi la aulu la jeu na maji tari mata malamalai ʻa lo sulira na noʻa silesilea isan God usuri na leu.” *Hos 6.6*

<sup>34</sup> Iesu mara mo hitevosahi na lelevosahi non tamlohi ak-erihi, mo vere a isana mara, “Engko ko lo toho mariviti moiso hin mauri atu God mo aulu hinia.”

Ale hitahun haratu, mo sopo te vonara hatea i mele opoia vara i usia hin te retusia hatea.

*Kristo Enia Natun God*  
(Mt 22.41-46; Lk 20.41-44)

<sup>35</sup> Na rani tinapua Iesu mo lo vujangi na tamlohi na lolo rope Temple, mo lo vere a isara mara, “Sohena sava natu, tamlohi vujangi mata leu la lo vere a vara Kristo enia natun Supe David?” <sup>36</sup> Na lo usia sohena matan tuai David mo retireti na suihan Tanume Tapu mo vere a mara,

‘Moli God mo vere a isan noku Moli mara:

O sakele na matuaku,  
o lo sasaovi i mai i tikeli  
a tau na nom meresahi  
na ruhuruhi palom.’ *Psa*  
*110.1*

<sup>37</sup> David sohena mo tovia ‘Moli’. Vara mo sohen haratu, sohena sava natu, Kristo enia natun David?”

Ale vao tavera atu la avulahi tavera vara la lo tapurongo na nona vujangi.

*Vujangi Mata Posposi Aulu*  
(Mt 23.1-36; Lk 20.45-47)

<sup>38</sup> Iesu mo lo vujangira mara, “Ha lo kilau na tamlohi vujangi mata leu. Matan la lo opoia vara tamlohi la hitera la lo hahau peresi na nora ruru peravu, ale la opoia vara tamlohi la lo popovitoho isara na jara maket. <sup>39</sup> La opoia vara la

lo sakele nahonaho tarea na lolo ima lotu teni na rani matan te hanhani tavera. <sup>40</sup> Ale la lo haluhalu na haʻai malepu mata voli narihi na imara na volina makomona purongo, pani la lo tatavu horo na nora posposi sasati na ususi peravu na naho tamlohi. Matan hinau atu, nora talai i pa mele tavera jea.”

*Malepu Tilavono Matea*  
(Lk 21.1-4)

<sup>41</sup> Iesu mo lo sakele mariviti na jara silesilea na Temple. Ale mo lo kilau na vao tamlohi la lo tau na nora mania. Tamlohi tavgav matavana la tau na mania tavera hinia. <sup>42</sup> Mo sopo tuai mo hite na malepu tilavono matea mo mai, ale mo tau na nona mania, selen mo rua purongo. <sup>43</sup> Iesu mo tovi na nona tamlohi usuri la mai isana mara, “Varaʻuhuh na vere a isamim, malepu tilavono nike, mo taua mo jeu na tamlohi tinapua tari sei la lo tau na nora silesilea nike. <sup>44</sup> Matan la haratu sei la silea mo tavera pani la levosahia vara nora tavgav tavera mo pa lo toho. Pani malepu tilavono nike mo sile vevuhi na sava mo lo toho mata maurina.”

## 13

*Hinai La Pa Masese Hitahu*

(Mt 24.1-2; Lk 21.5-6)

<sup>1</sup> Iesu mo pa lo malue na Temple, ale nona tamlohi usuri matea mo vere a isana mara, “Tija, o to kilau vano sevano hin la vatu tavera sevano la voro na roro ima

hinira, ale o to kilau la ima tavera sevano!”

<sup>2</sup> Ale Iesu mo vereia isana mara, “Ko lo hite ima tavera nike? I pa sopo te vatu hatea i pa lo toho aulu na vatu tinapua vara la pa sopo atu jovjovira.”

*Rani Rilangi La Pa Mai  
(Mt 24.3-14; Lk 21.7-19)*

<sup>3</sup> Ale hitahu, Iesu mara mo lo sakele na pahisa Vuti talu Olive mo lo kilau sivo na Temple, Peter, James, John enia Andrew la mai ņoņo hasera, ale la usia lara, <sup>4</sup>“O to vere kamam hinia, la hinau sei la pa masese pangisa? Ale sava matamata atu i pa mai tiroma vara kama pa levosahi mamahunia vara i sopo tuai natu la hinau tari natu la pa masese?”

<sup>5</sup> Iesu mo vereia isana mara, “Ha lo kilau i ņuhu! Mo sopo ņuhu vara tea i halu kamim. <sup>6</sup> Matuvana la pa mai na hijaku. La pa vereia vara, ‘Enau natu, tamlohi atu!’ ale la pa halu na tamlohi matuvana. <sup>7</sup> Ale vara ka rongo te vuro teni sorasora mata vuro, ņomim i sopo kaka hin la hinau sei la pa mai tiroma, pani mo sopo isoisona. <sup>8</sup> Mara jara tavera tinatinapu la pa lo meresahi hinira, ale supe matea i pa meresahi na supe tinapua. Ale mihi i pa hisuhi na tatua jara na varama. Tamlohi la pa marohati na marua. Pani la hinau sei enira tapulona purongo. La hinau tari sei la sohena tapulo rongohaji na epe haņai vara i lavilavi. <sup>9</sup> Ha lo kilau! Tamlohi la pa

tauri kamim la pa ari kamim. La pa hamaji kamim na ima lotu. Ha pa turu na naho tamlohi aulu nona gavman peresi na naho supe mataku. Enia i pa masapamim matea vara ha eņi vereia isara vara enau hare. <sup>10</sup> Retiņuhu atu la pa retivujavujangia na jara tari na varama tiroma, moiso isoisona i pa mai. <sup>11</sup> Ale vara la lavi kamim la vai kamim ka turu na nahora vara la vaihite kamim, ha sopo ņomkaka na sava ha pa vereia, pani ha pa vere na sava God i pa silea isamim, matan i pa sopo kamim ka lo retireti pani Tanumen God hin kamim.

<sup>12</sup> Vorai matea i pa turuposi hin voraina vara i mate. Tama i pa turuposi hin natuna. Natuvarihi la pa turuposi na tamara peresi na tinara la pa vaira tamlohi la vilimateira. <sup>13</sup> Tamlohi tari la pa ņohu hin kamim mataku. Pani haratu mo turu ņilangi mo tikeli na isoisona i pa juri.

*Hina Lumiha Matea Na Lolo Temple*

*(Mt 24.15-21; Lk 21.20-24)*

<sup>14</sup> Rani matea i pa mai ha pa hite hina lumiha atu God mo lo ņohu hinia i pa turu na jara tapu na lolo Temple. *Dan 9.27; 11.31; 12.11* Hare mo evi harihi, i lo lelevosahi na ņaramina! Hin rani atu, i pa ņuhu vara tamlohi hin Judea la rovo la sahe na vutivuti.

<sup>15</sup> I pa ņuhu vara haratu mo lo toho na pusa ima, i sopo mele unu na lolo ima vara i lavi te hinau hinia, <sup>16</sup> ale i pa ņuhu vara haratu mo lo voko na isana i sopo mele posi i

sivo mata i lavi na nona ruru na lepa. *Lk 17.31*

<sup>17</sup> Hin rani atu, i pa řilangi jea isana hařai mo tau natuna, teni te hařai mo lo vasusui te natuna. <sup>18</sup> Ha usiusi vara rani atu i pa sopo mase na taro hamariri.

<sup>19</sup> Rani sati tavera atu i pa jeu na rani sati tamlohi la lo hitera mo tapulo hin rani atu God mo vai na varama mo tikeli nake i pa sopo mele te rani sasati i sohena hin te rani. *Dan 12.1; Rev 7.14*

<sup>20</sup> Vara Moli God i sopo vai rani řilangi atu i vejuveju, i pa sopo tea i eři juri, pani mata nona tapuhi, la haratu sei mo viřonira i pa vai rani atu i vejuveju.

<sup>21</sup> Hin rani atu, vara tea mo vere a isamim vara, 'Ha kilau nike, Křisto nahai!' Teni tea i pa vere a vara, 'Ko hitea, enia nahai!' Pani ha sopo rasura. <sup>22</sup> Matan křisto haluhalu peresi na tamlohi tapu haluhalu la pa mai. La pa vai na matamata tatavera. La pa vaihite la tamlohi atu God mo viřonira moiso vara la tinařihi na nora rasua. <sup>23</sup> Ha lo kilau! Enau na lo vere kamim hinia tiroma moiso.

*Natun Tamlohi I Pa Mai*  
(*Mt 24.29-31; Lk 21.25-28*)

<sup>24</sup> Moiso hitahu hin rani sasati atu, 'Alo i pa řořoha, ale vitu i pa sopo mele sile na merana.'

*Isa 13.10*

<sup>25</sup> 'Vitusarasara la pa jovjovi na masapa, ale suiha tari na masapa la pa hisu.' *Isa 34.4; Joel 2.10*

<sup>26</sup> Hitahuna natu, tamlohi tari la pa hite na Natun Tamlohi mo lo mai na telangi na suiha tavera peresi na merana tavera.

*Dan 7.13*

<sup>27</sup> Natun Tamlohi i pa řule na nona angelo la vano řalihi na varama vara la takonahi na nona tapuhi na jara tari na varama, ale aulu na masapa.

*Tea Mo Sopo Levosahia*  
(*Mt 24.32-35; Lk 21.29-33*)

<sup>28</sup> Ha levosahi na posi vipahai fig sei julina la mai la malum, ale mo tivu, ka levosahia vara rani mata huli-huli mo pala. <sup>29</sup> I pa sohena na pongi hitahu vara ka hite na hinau tari sei na lo vere kamim hinira moiso. Ha pa levosahia vara i sopo tuai Natun Tamlohi i pa pala.

<sup>30</sup> Varařuhu na vere a isamim, pina akerihi nake i pa sopo lo mate vevuhi vavano la hinau tari akerihi la pa mase.

<sup>31</sup> Tuka enia varama la pa tihai, pani noku reti la pa toho jejeu.

*Ha Tatamahu Tarea*  
(*Mt 24.36-44*)

<sup>32</sup> Mo sopo tea i levosahi rani tataholo atu teni matan alo matana, angelo na tuka sohena, la sopo levosahia teni Natun Tamlohi. God Tama hasena mo levosahia. <sup>33</sup> Ha lo kilau! Ha sopo juruvi! Matan ka sopo levosahia vara pongi atu i pa pala pangisa!

<sup>34</sup> I pa sohena tamlohi matea mo vano na nona hahau matea na jara tinapua matea, ale mo tau na imana na lima nona volitusi, ale la lo vai na nora vavahinau

hatehateahi hinia. Ale mo vere haratu mo lo kilau na pelati mara, 'O lo kilau tarea mata noku mele pala!' <sup>35</sup> Matan haratu, ha lo kilau! Matan ka sopo levosahia vara tamlohin ima sei i pa mele pala pangisa, i efi pala na ravravi teni na livuha pongi, teni na toa tarere teni na řalavuhu, ha lo kilau! <sup>36</sup> Mo sopo řuhu vara ha hutu kamim na nona pala, ale i vilei kamim ka lo juruvi. <sup>37</sup> Sava na vere kamim hinia, na vereia isamim kamim isoiso, ha lo kilau i řuhu mata nona rani pala!"

## 14

*Jew La Aleale Malele Mata Taurilatia Hinia*  
(Mt 26.1-5; Lk 22.1-2; Jn 11.45-53)

<sup>1</sup> Rani mo rua mo lo toho vara i tikeli na pongi rani Passover peresi rani atu la lo hani na pereti hinia sei mo sopo te isi hinia. Pŗis aulu peresi na tamlohi vujangi mata leu la lo aleale malele vara la pa tauri luhu Iesu hinia vara la vilimateia. *Exo 12.1-27*

<sup>2</sup> Matan lara, "Ra sopo efi vaia hin rani tavera sei matan tamlohi la pa levutiřa."

*Hařai Matea Mo Rengi Na Hasori Hin Iesu*  
(Mt 26.6-13; Jn 12.1-8)

<sup>3</sup> Iesu mo pa lo toho Bethany na iman Simon, tuai enia tamlohi lepros matea, ale lara la pa lo hanhani na tep, hařai matea mo sinai isana, mo lavi na potele

hasori matea la vaia na lepa hijana alabaster, hasori řuhu mo lo toho na lolona la tovia nard ponana mo řuhu ale volina mo aulu jea. Hařai atu mo lavia mo kosahi na řalo potelena, ale mo rengia na patun Iesu. <sup>4</sup> Tamlohi hai la lo toho atu la rongo mo sati matana, la lo vereia isara hasera lara, "Mata sava mo rengi komokomoi hasori sei sohena? <sup>5</sup> Volina mo sohena voli voko nona tamlohi matea mata tauni matea! Vara i hařehia i pa efi sile na volina isana tilavono." La savurahi hařai atu.

<sup>6</sup> Pani Iesu mo vereia mara, "Eh, ha tinařihi hařai sei. Mo lo vai na hina řuhu matea isaku. <sup>7</sup> Tamlohi tilavono la pa lo toho tarea isamim, ale vara ka opoia ha pa efi tuenira. Pani enau, a pa sopo toho tarea isamim. <sup>8</sup> Hařai nike mo vai na sava i efi vaia isaku. Mo rengi na hasori na epeku mo vaia mo tatamahu mata noku tavuni mata noku mateia. <sup>9</sup> Varařuhu na vereia isamim, sava hinau hařai nike mo vaia isaku la pa sorahia na jara tari na varama mata řomřomia vara la vere na Retiřuhu matakū."

*Judas Mo Turuposi Hin Iesu*  
(Mt 26.14-16; Lk 22.3-6)

<sup>10</sup> Judas Iscariot, vonan la tupu sangavulu řomana mo rua atu matea, mo vano isana pŗis aulu nona tavgavin Israel, matan vara i tau Iesu na limara. <sup>11</sup> Pŗis aulu la avulahi jea matana, ale la retitauhi vara la pa voli Judas matana.



Judas mo tapulo aleale mas-apa vara i pa sile Iesu i vano isara hinia.

### *Hanhani Passover*

(Mt 26.17-25; Lk 22.7-14, 21-23; Jn 13.21-30)

<sup>12</sup> Na rani tiroma mata pereti sei mo sopo te isi hinia sei la lo sile na natu sipsip mata Passover sohen malamalai hinia, tamlohi usuri non Iesu la vereā isana lara, “Eh! Ko opoia vara kama pa tatamahu mata hani na Passover epu?”

<sup>13</sup> Mo ŋule na nona tamlohi usuri tupra rua, mo vereā isara mara, “Ha vano ha unu Jerusalem, ale ha pa hite na tamlohi matea mo lo soloti na jara wai tavera matea, ale ha usuria. <sup>14</sup> Ale sava ima i pa unu hinia, ha vere na tamlohin ima atu vara, ‘Tija mo usia mara, sava jara ko tatamahunia moiso matakū vara a pa hani na Passover hinia peresi na noku tamlohi?’ <sup>15</sup> I pa vujangi kamim na jara matea mo lo toho aulu hin ima atu. Mo tatamahuni na hināu tari moiso. Ha tatamahuni na haŋa hināu ea.” <sup>16</sup> La tamlohi usuri tupra rua atu la malue la sivo hin taon tavera atu, ale hināu tari mo masese sohena Iesu mo vereā, ale la tatamahuni na hanhāni mata Passover ea.

### *Hare I Pa Turuposi*

<sup>17</sup> Ale mara mo ravravi, Iesu mo sahe hin ima atu peresi la tupu sangavulu ŋomana mo rua atu. <sup>18</sup> La sakele ŋalihi na tep la lo hanhāni, ale Iesu mara, “Varaŋuhu, vonamim matea i pa turuposi hinia, enia

vonamim matea sei mo lo hanhāni peresiau nakerihi.”  
*Psa 41.9*

<sup>19</sup> Nona tamlohi la tapulo rongo mo sati, ale enira hate-hateahi la lo usia isana lara, “Hare, enau teni mo vono?”

<sup>20</sup> Iesu mo vereā mara, “Vonamim matea la tupu sangavulu ŋomana mo rua, ale enia mo lo seseri peresiau nakerihi. <sup>21</sup> Matan Natun Tamlohi i pa vano sohena Retiulia mo vereā moiso matana. Pani rani sasati tavera isan tamlohi atu sei mo turuposi hinia. I pa mele ŋuhu jea vara i sopo vora.”

### *Retitauhi Paro*

(Mt 26.26-30; Lk 22.14-23; 1Co 11.23-25)

<sup>22</sup> La pa lo hanhāni, Iesu mo lavi na pereti, mo vere meje matana, mo topea mo silea isana nona tamlohi ale mara, “Ha lavia. Harihi enia epeku!”

<sup>23</sup> Mo mele lavi na paniken waen, mo vere meje isan God matana, moiso mo silea isara, ale enira isoiso la inua hinia. <sup>24</sup> Moiso, mo vereā isara mara, “Harihi enia ŋaeku sei i pa roro mata tamlohi matuvana matan vara i vai na retitauhi paro non God peresi na nona tamlohi i turu.”  
*Jer 31.31-34*

<sup>25</sup> Varaŋuhu na vereā isamim, a pa sopo eŋi mele inu te waen i tikeli rani atu a pa mele inua peresi kamim hin mauri atu God mo aulu hinia.” <sup>26</sup> La lalavete na vete matea moiso, la malue la sahe na Vuti talu Olive.

*Peter I Pa Vunvuni Iesu**(Mt 26.31-35; Lk 22.31-34; Jn 13.36-38)*

27 Na malele Iesu mo vereia isara mara, "Kamim mo isoiso ha pa rovo hiniau, matan Retiulia non God mo vereia mara, 'A pa vili na tavui sipsip.

Sipsip la pa rovo.' Zec 13.7

28 Pani hitahu vara na mele turu na mateia, a pa vano tiroma hin kamim Galilee."

29 Peter mo vereia isana mara, "Hina purongo vara enira mo isoiso la rovo hiniho, enau i vono!"

30 Iesu mo vereia isan Peter mara, "Varaŕuhu na vereia isam, o pa vunvuniau vaha tolu nohorihhi na vutepongi, moiso toa i pa tarere vaha rua."

31 Pani Peter mo reti řilangi mara, "Vara a pa mate peresihhi, i pa sohenaa! A pa sopo eři vunvuniho!" Enira mo isoiso la vereia sohenaa.

*Mo Usiisi Gethsemane**(Mt 26.36-46; Lk 22.39-46)*

32 La sahe na jara la tovia Gethsemane, Iesu mo vereia isana nona tamlohi usuri mara, "Ha lo sakele nika tako. Enau a sahe a usiisi." 33 Mo lavi Peter, James, John la vano peresia, ale mo tapulo rongo mo sati tavera jea, ale řomina mo sopo sakele.

34 Ale mo vereia isara mara, "Romiku mo jovi tavera vara a mate matana. Ha lo toho peresia, ha sopo juruvi!"

35 Mo mele vano makomona, mo jovi sivo na lepa mo usiisi isan God mara vara te malele tinapua, i pa sopo vano hin nona rani řilangi

nika. 36 Ale Iesu mara, "Tata! Tamaku! Ko eři vai na hinau tari. O lavi nařihi na noku rani řilangi nika, pani o sopo vaia sohenaa masaloku, pani sohenaa masalom."

37 Mo mele sinai mo hite Peter la juruvi řomaliho. Mo vereia isan Peter mara, "Simon, varaŕuhu ko lo juruvi? O sopo eři kilau peresia, matan te matan alo hatelete purongo? 38 Ha lo kilau! Ha lo usiisi, matan vara ha pa sopo jovi na vaihite. Tanumemim mo opoia vara i ololo, pani masalomim mo řilangi jea."

39 Moiso, mo mele sahe vara i usiisi, mo mele vere la nona reti atu tiroma. 40 Mo mele sinai, mo mele vileia vara la mele juruvi moiso, ale matan matara mo puhoni, la sopo eři řaramia.

41 Iesu mara mo mele mai hatoluna, mo vereia isara mara, "Varaŕuhu ka pa lo juruvi, ka pa lo mapu? Mo isoiso natu, la tau Natun Tamlohi na lima tamlohi hehe natu. 42 Ha turu! Ra vano! Ka hitea, noku meresahi mo lo mai moiso."

*La Taurilati Iesu**(Mt 26.47-56; Lk 22.47-53; Jn 18.1-11)*

43 Iesu mo pa lo retireti Judas vonan la tupu san-gavulu řomana mo rua atu matea mo pala isara peresi na vao tavera matea, la mai la lo lavi na sita mata valum peresi na nalnal. Pŕis aulu peresi na tamlohi vujangi mata leu peresi na vajiahara natu la řulera la mai isan Iesu. 44 Ale tamlohi atu mo lo turuposi hinia mo verera

na matamata matea isara moiso mara, “Tamlohi atu a pa pungosia, enia tamlohi atu natu. Ha tauria, ha lavia i vano.”

<sup>45</sup> Judas mo kakau jara atu, mo vano isan Iesu mo vereea mara, “Tija.” Ale mo pungosia. <sup>46</sup> Ale la tamlohi atu la mai la tauri Iesu. <sup>47</sup> Pani vonara matea sei mo lo turu atu mo lavi na nona sita vuro mo langai nañihi na pero volitusi non pñis aulu.

<sup>48</sup> Iesu mo vereea isara mara, “Ka mai peresi na sita peresi na nalnal sohena vara enau tamlohi vili tamlohi mata vavanaho matea? <sup>49</sup> Tarea na lo toho peresi kamim na lolo Temple na lo vujangi, pani ka sopo tauriau. Pani i pa sohen harihi matan vara Retiulia i pa masese matakau.”

<sup>50</sup> Nona tamlohi la malue isana, ale la rovo. <sup>51</sup> Uluvou matea mo lo usuri Iesu, enia mo lavolavo purongo, ale la tauria, <sup>52</sup> pani la lo taurilati na nona ruru purongo, ale mo tinañihira mo rovo mala-mala.

### *Iman Pñis Aulu*

(Mt 26.57-68; Lk 22.54-55, 63-71; Jn 18.13-14, 19-24)

<sup>53</sup> La lavi Iesu mo vano na iman pñis aulu. Ale moli nona pñis tari peresi na vajiahara peresi na tamlohi vujangi mata leu la matavuhi jara matea. <sup>54</sup> Ale Peter mo lo usuri Iesu asau makomona mo sivo vahatea na lolo ropen iman pñis aulu atu. Mo lo sakele peresi la tamlohi kilau matan ima atu, la lo marijo na hapu.

<sup>55</sup> Moli nona pñis peresi la tamlohi tari mata council Aulu, la lo aleale tamlohi vara i vereuli te hinau hin Iesu matan vara la pa vilimateia matana, pani la sopo vilei tea. <sup>56</sup> Tamlohi matuvana la vai na retihalu hinia, pani nora retihalu la sopo matea. <sup>57</sup> Hai la turu sahe la retihalu hinia lara, <sup>58</sup> “Kama rongoa mo vereea mara, ‘Enau a pa viliroiroi Temple nike sei tamlohi la vaia na limara, moiso na rani i tolu purongo a pa mele voroa na hina tinapua sei tamlohi la sopo voroa na limara.’” <sup>59</sup> Pani mo sohen tiroma, nora řomřomi mo sopo matea.

<sup>60</sup> Moiso nora pñis aulu mo turu na livuhara, mo vereea isan Iesu mara, “Mo sopo te nom retireti vara o vereea matan la retireti nike? Sava nahai, la tamlohi nike la lo vereulia matam?” <sup>61</sup> Pani Iesu mo sopo langati na jingona, ale mo sopo řaramia. Pñis aulu atu mo mele usia vahatea mara, “Engko natu Křisto atu, Natun God teni mo vono?”

<sup>62</sup> Iesu mo řaramia mara, “Enau natu, ale ha pa hite Natun Tamlohi i pa sakele na tavalu liman God na jara mata suiha, ale ha pa hite Natun Tamlohi i mele mai na telangi matan tuka.” *Dan 7.13*

<sup>63</sup> Ale pñis aulu mara mo rongoa sohena, mo hasena řari na nona ruru, ale mo vereea mara, “Mata sava řa pa lo mele aleale retireti vara řa pa tuvaia hinia? Enia hasena mo vereea! <sup>64</sup> Ka pete rongoa sohena sava mo vereea moiso

vara enia God. Ha pa vai na sava?" Enira mo isoiso la vereea lara i mate.

<sup>65</sup> Hai la tapulo litovia, hai la tatavuhoro na nahona la tutuhia, ale la usia isana lara, "Vara engko p̄ovet matea, o to vereea vara hare natu mo tutuhiho?" Ale tamlohi kilau sohena lara la lavia mo vano la tutuhia.

*Peter Mo Vunvuni Iesu*  
(Mt 26.69-75; Lk 22.56-62;  
Jn 18.15-18, 25-27)

<sup>66</sup> Hinau atu mo lo masese, Peter mo lo toho atano na lolo rope matan ima atu na jingoima. Ale volitusi hañai matea non p̄ris aulu mo mai, <sup>67</sup> mara mo hite Peter mo lo marijo, mo lo kilau mamahunia, ale mara, "Engko vonara matea ko lo usuri Iesu mara Nazareth!"

<sup>68</sup> Pani Peter mo vunvunia, ale mara, "Na sopo levosahia teni a levosahi na sava ko lo vereea." Mo malue atu mo vano mo turu na mataruan rope atu, ale toa mo tarere.

<sup>69</sup> Pa hañai atu mo mele hite Peter mo lo turu atu ale mo vereea isana tamlohi mara, "Tamlohi aturihi enia vonara matea!"

<sup>70</sup> Peter mo mele vunvunia. Ale tamlohi hai la lo turu atu la vereea isan Peter lara, "Varañuhu engko vonara matea matan engko mara Galilee!"

<sup>71</sup> Pani Peter mo tapulo lesati hinia hasena, mo varakali ale mo vereea mara, "Na sopo levosahi tamlohi nike ka lo vereea." <sup>72</sup> Ale vahatea purongo, toa mo tarere haruana. Peter mo mele řomřomi na reti non Iesu sei mara, "Engko o pa

vunvuniau vaha tolu, moiso toa i pa tarere vaha rua." Moiso řomin Peter mo jovi tavera, ale mo tangi tavera.

## 15

*Iesu Enia Pilate*  
(Mt 27.1-2, 11-14; Lk 23.1-5; Jn 18.28-38)

<sup>1</sup> Na řalavuhu jea, moli mata p̄ris peresi na vajiahara tolu na tamlohi vujangi mata leu peresi na tamlohi mata council tari la matavuhi vara la vai te řomřomi. La lasi Iesu la lavia mo vano la taua na liman Pilate, tamlohi aulu nona gavman matan Rome.

<sup>2</sup> Ale Pilate mo usia mara, "Engko Supe nona Jew?"

Iesu mo vereea mara, "He'e, mo sohen ko vereea."

<sup>3</sup> Moli nona p̄ris la tuvaia na retireti matuvana. <sup>4</sup> Pilate mo mele usi Iesu vahatea mara, "Mata sava ko sopo talaira? Ko hitea, la lo tuvaiho na hina sati matuvana!" <sup>5</sup> Pani Iesu mo sopo mele řaramia, ale Pilate mo mañurahi jea.

*Pilate Mo Ari Iesu*  
(Mt 27.15-26; Lk 23.13-25;  
Jn 18.39--19.16)

<sup>6</sup> Tarea na hanhani tavera mata Passover, Pilate mo lo teri na tamlohi matea na ima řilangi sei enira la opoia. <sup>7</sup> Vonara matea hin la haratu la lo toho na ima řilangi hin rani atu, hijana Barabbas. Enia mo lo toho atu matan mo vilimateia na tamlohi matea na rani la turu mata valum mata jarara. <sup>8</sup> Vao atu la mai isan Pilate ale la usia vara i mele vaia sohen tarea mo lo vaia isara. <sup>9</sup> Ale Pilate mo usia isara mara,

“Ka opoia vara a tinafihi Supe nona Jew nike teni mo vono?”<sup>10</sup> Matan Pilate mo levosahia vara la pa lavi Iesu mo mai isana mata nora mereimerei purongo.<sup>11</sup> Pani moli nona p̄ris la haluhalu na tamlohi mata usi Pilate vara i teri Barabbas na jaran Iesu.<sup>12</sup> Ale Pilate mo mele usia isara vahatea mara, “Vara i sohena, a pa vai na sava hin tamlohi nike sei ka lo tovia vara enia Supe nona Jew?”

<sup>13</sup> La mele ngara lara, “O vosaea na talopeilopei!”

<sup>14</sup> Pilate mo mele usira hinia mara, “Sava hinau natu mo vaia mo sati?”

Pani la mele ngara mo řilangi jea lara, “O vosaea na talopeilopei!”

<sup>15</sup> Ale matan Pilate mo opoia vara i vai vao atu i avulahi, mo teri Barabbas sohen la usia. Ale mo retileu vara la rupi Iesu, moiso mo taua na lima tamlohi vuro nona mara Rome vara la vosaea na talopeilopei.

### *La Vailejeleji Iesu*

*(Mt 27.27-30; Jn 19.2-3)*

<sup>16</sup> La tamlohi vuro atu la tiroma hin Iesu la unu na lolo nora patu ima mata vuro non Pilate. La tovi vevuhi na vao tamlohi vuro la mai na jara matea.<sup>17</sup> La mai la rua na ruru perpel matea, ale la viriviri na asi ngařngařiha matea sohena rongorongonona supe, ale la taua na patuna.<sup>18</sup> La tapulo salute isana la lo vereea lara, “Tamlohi tavera, engko Supe nona Jew!”<sup>19</sup> La lo tamaji na patuna na apo matea. La lo litovia, ale la lo popovitoho

isana sohena vara la lo lotua.<sup>20</sup> Lara la kerehia moiso la mele lavi nařihi pa ruru perpel atu isana, ale la mele rurua na nona ruru. Ale la tiroma hinia la vano vara la vosaea na talopeilopei.

### *Simon Mara Cyrene Matea Mo Tueni Iesu*

<sup>21</sup> Ale mara Cyrene matea, hijana Simon, enia tamana Alexander enia Rufus, mo pa lo tai purongo asau řove na jara vutivuti mo lo sinai na malele, ale la ngurun-guru hinia vara i soloti na talopeilopei non Iesu.

### *La Vosae Iesu Na Talopeilopei*

*(Mt 27.31-44; Lk 23.27-43; Jn 19.17-27)*

<sup>22</sup> La lavi Iesu mo sahe hin jara atu sei la tovia ‘Golgotha’, řaramin hija sei enia ‘Jara Sui Patu Tamlohi’.<sup>23</sup> La vaihitea vara la sile na waen la hoihoia peresi na myrrh, pani mo řohu hinia.<sup>24</sup> La vosae Iesu na talopeilopei, moiso la tamlohi vuro atu la roro mata nona ruru na taes matan vara la vileia vara hare natu i pa lavi na sava nona ruru. *Psa 22.18*

<sup>25</sup> Matan alo mo limaravati na řalavuho natu la vosaea na talopeilopei hinia.<sup>26</sup> La uli na reti matea mata nona aria na tavalu tapea matea la vosaea aulu na patuna mo vereea vara,

### **Supe Nona Jew**

<sup>27</sup> La vosae na tamlohi vili na tamlohi mata vavanaho tupra rua na tavalun Iesu. Matea na matuana, ale matea na marauna. *Isa 53.12*

<sup>28-29</sup> Tamlohi sei la lo hahau hin malele atu la lo tařa sahe

la lo kerehia, ale la lo pula-pulahi na patura, la lo vereea lara, “Ko vara, vara o pa vil-ijovjovi na Temple, ale o efi mele voroa rani i tolu? *Psa 22.7; 109.25* <sup>30</sup> Vara mo sohena, o hasem juriho o sevuti hin talopeilopei sei!”

<sup>31</sup> Moli nona pris peresi na tamlohi vujangi mata leu sohena la lo vaivaia isara hasera lara, “Mo lo juri na tamlohi tinapua, pani enia i sopo efi hase juria! <sup>32</sup> Vara engko Kristo, Supe non Israel, o sevuti na talopeilopei nakerihi matan vara kama pa hitea ale kama rasuho!” La tamlohi atu sei la vosaera na pahisan Iesu sohena, la lo kerehia.

### *Iesu Mo Mate*

*(Mt 27.45-56; Lk 23.44-49; Jn 19.28-30)*

<sup>33</sup> Na livuha rani, rofoha tavera mo jovi mo tavuni na jara tari, mo lo toho mo tikeli na matan alo mo tolu na ravravi. <sup>34</sup> Na matan alo mo tolu, Iesu mo tangi na ulo tavera matea mara, “Eloe, eloe, lema sabatani?” Raramina reti sei enia ‘Noku God, noku God, mata sava ko posi na nahom isaku?’ *Psa 22.1*

<sup>35</sup> Tamlohi hai la lo turu atu lara lo rongoa, lara, “Ka hitea! Mo lo tovi Elijah!”

<sup>36</sup> Tamlohi matea mo maro mo vano mo lavi na tavalu ruru matea la rufunia na waen hohona mo pesia na apo matea, ale mo sohaia sahe isan Iesu vara i inua. Vonara matea mara, “Tako, ra pa hitea vara Elijah i pa mai i lavi nafihia na

talopeilopei i sivo atano teni i vono.” *Psa 69.21*

<sup>37</sup> Iesu mo mele ulo tavera vahatea, ale maromaronona mo isoiso. <sup>38</sup> Ruru tavera atu mo lo toho horo na Jara Tapu atu na lolo Temple mo mafari hasena tavaluna mo rua, mo mafari mo tapulo aulu mo sivo atano. <sup>39</sup> Moiso captain mata tamlohi vuro atu sei mo lo turu tataholo na nahon Iesu, mara mo hitea sohena sava mo mate mo vereea mara, “Varafuhu, tamlohi nike enia Natun God tataholo!”

<sup>40</sup> Harai hai la lo turu asau makomona la lo kilau vano na talopeilopei. La harai sei la tupu tolu, Mary Magdalene, Salome, Mary tinan uluvou sei James peresi Joses. <sup>41</sup> La harai sei la lo usuri Iesu na rani mo lo toho Galilee, ale la lo kilaua. Vao harai matuvana sohena, enira tolu natu la lo usuria la sinai Jerusalem.

### *Joseph Mo Tavunia*

*(Mt 27.57-61; Lk 23.50-56; Jn 19.38-42)*

<sup>42</sup> La hinou sei la masese na Friday ravravi, enia rani mata tatamahu mata nora Sabbath. <sup>43</sup> Joseph mara Arimathea, enia tamlohi aulu matea mata nora council tavera, ale enia matea sei mo lo kilau toho matan mauri atu God mo aulu hinia vara i pala. Ale romina mo rilangi mo mai mo turu na nahon Pilate mo usia vara i lavi na tarapen Iesu. <sup>44</sup> Pilate mo rongoa vara Iesu mo mate vila, moiso mo mafurahi tavera matana. Pilate mo tovi na nona captain mata tamlohi vuro matea, mo usia

mara, “Varaŕuhu, Iesu mo pete mate moiso?” <sup>45</sup> Captain atu mo vere Pilate hinia mara varaŕuhu mo mate moiso. Pilate mo vere isan Joseph mara i eŕi lavi na tarapen Iesu. <sup>46</sup> Joseph mo vano mo voli na ruru lulu matea. Mo juri na tarapen Iesu aulu na talopeilopei mo sivo atano. Mo leputia na ruru. Mo lavi na tarapen Iesu mo taua na papa vatu matea enia mo taia. Mo tai na pelatina vatu tavera matea vara mataruana. <sup>47</sup> Mary Magdalene enia Mary tinan Joses la hite jara atu la tau na tarapen Iesu ea.

## 16

*Iesu Mo Mele Turu Na Mateia*

*(Mt 28.1-8; Lk 24.1-12; Jn 20.1-10)*

<sup>1</sup> Saturday na ravravi jea na isoison rani mapu atu, Mary Magdalene, Mary tinan James enia Salome, la vano la voli te hasori ŕuhu vara la pa vano la taua na tarapen Iesu vara i mele rani sahe. <sup>2</sup> Sunday ŕalavuho jea alo mo pa lo tapulo vele purongo, la vano hin papa vatu atu. <sup>3</sup> La pa lo vano la lo vereverea isara lara, “Hare i pa tueniŕa vara i kuresi naŕihi vatu atu na mataruan papa atu?” <sup>4</sup> Ale lara la taŕa sahe aulu, la hite vatu tavera atu la pete kuresi naŕihia moiso. <sup>5</sup> La sahe la unu hin papa atu ale la hite na uluvou matea, mo ru na ruru lulu mo lo sakele na matuana, ale la hutura hinia. <sup>6</sup> Ale mo vereea isara mara, “Ha sopo matahu! Ka lo ale

Iesu mara Nazareth haratu sei la vosaea na talopeilopei? Mo turu na mateia moiso, enia mo sopo toho nike. Ha to hite na jara sei la taua hinia. <sup>7</sup> Pani ha vano ha vereea isana nona tamlohi usuri peresi Peter, ha verera vara Iesu mo vano Galilee tiroma hin kamim moiso. Ha vano ha pa hitea ea sohen mo lo vereea isamim tiroma moiso.”

<sup>8</sup> La haŕai atu lara la malue la rovo hin papa atu matan matahu mo sohonira ale la savaravara. La sopo vere te hinau isan tea matan la matahu.

*e Tiroma Isoison Mark -  
(Mt 28.9-10; Jn 20.11-18)*

Ale la vere vevuhi na hinau tari isan Peter peresi na tapalana. Hitahuna Iesu mo ŕulera la vano na varama, la vano Opaie mo sivo mo tikeli Marino, la lavi nona Retiŕuhu tapu mata juri sei mo lo sile na mauri tui sei i sopo eŕi tihai hin te rani. Amen.

*e Harua Isoison Mark -*

*Mary Magdalene*

<sup>9</sup> Iesu mo mele turu na Sunday na ŕalavuho jea, ale Mary Magdalene natu enia haŕai tiroma mo hitea, enia natu Iesu mo titiu naŕihi na tanume sasati mo limaravrua isana. <sup>10</sup> Hitahu Mary mo vano mo vereea isana nona tamlohi usuri sei la lo rongoa mo sati ale la lo tangisia. <sup>11</sup> Pani lara la rongoa vara Mary mo hite Iesu mo mele mauri, la sopo rasua.

*Nona Tamlohi Mo Rua La Hite Iesu*  
(Lk 24.13-35)

<sup>12</sup> Hitahun la hinau atu Iesu mo mele pala isana tupra rua sei la lo hahau mata jara tinapua matea, pani la sopo hitevosahia matan mo posi na nahona. <sup>13</sup> Hitahuna lara la hitevosahia la mele hilu vilavila la sahe vara la vereea isana tatuara, pani tea i sopo rasura.

*Iesu Mo Turu Na Livuhara*  
(Mt 28.16-20; Lk 24.36-49; Jn 20.19-23; Acts 1.6-8)

<sup>14</sup> Hitahuna Iesu mo pala isan la tupu sangavulu romana matea atu lara la lo hanhani. Ale mo reti rilangi isara matan mo sopo te nora rasua, ale mata romira mo rilangi jea. Mo reti rilangi sohena matan la sopo rasu la haratu sei la hitea vara mo mele mauri.

<sup>15</sup> Ale mo vereea isara mara, "Ha vano na jara tari na varama, ale ha vereuli na noku Retiruhu isana tamlohi tari. <sup>16</sup> Sava tamlohi mo rasua ale mo paptijo, God i pa juria, pani haratu mo sopo rasua, God i pa aria. <sup>17</sup> God i pa sile la matamata tavera akerihi natu i usuri la haratu la rasuau: na hijaku la pa eri titiu narhihi na tanume sasati, ale la pa eri retireti na leo paro tinapua, <sup>18</sup> ale la pa tauri na mata sasati jea na limara, ale vara la inu te wai mata vilimatei na tamlohi la pa sopo eri mate matana. La pa tau na limara na tamlohi rojoa moiso ale nora rojoa i tihai."

*Iesu Mo Sahe Aulu Na Tuka*  
(Lk 24.50-53; Acts 1.9-11)

<sup>19</sup> Iesu mara mo vere la hinau atu isara mo isoiso, God mo lavi narhihia mo sahe aulu na tuka, ale mo sakele na jara mata suiha na matuan God. <sup>20</sup> Ale nona tamlohi usuri la vano la retivujavujangi na jara hatehateahi. Moli Iesu mo lo tuenira na nora vavahinau, ale mo vujangia vara nora reti mo tai isana na mata-mata matuvana.



## Retiruhu Hin Iesu Kristo Luke Mo Ulia Puku Nike

Opoia non God enia mata tamlohi tari! Iesu mo mai na varama matan enia Jujuri nona tamlohi tari. Vujangi hai o efi hitera hin puku nike purongo, te hinau sohen harihi Luke mo ulia: Mara Samaria matea (10.25-37), Sipsip mo jalio (15.1-7), Uluvou atu mo jalio (15.11-32). Luke mo vereulia vara Iesu mo lo toho na iman Zachaeus (19.1-10), ale mo uli retitauhi atu sei Iesu mo lo silea isan tamlohi sasati atu na talopeilopei (23.39-43).

Luke mo vere na vavahinau non Tanume Tapu mo jeu na tinapua. Mo ulia mara Tanume Tapu mo lo toho peresi John Tamlohi Paptijo na rani mo vora (1.15), isan Mary (1.35), ale sohena sava Iesu mo usuria (4.1, 14, 18; 10.21), Iesu mo vujangia vara Tanumen God enia otori atu mo jeu na tinapua God i pa silea isana tamlohi (11.13).

Luke mo ulia vara Iesu mo lo romromi na tilavono, mo sile na Retiruhu non God isara (4.18; 7.22), la pa lavi na hina ruhu ruhu isana (6.20), God mo usi na tilavono na nona hanhani tavera (14.13, 21), tilavono atu Lazarus mo sahe na tuka peresi na angelo (16.20, 22), ale Iesu mo retileu vara nona tamlohi usuri la lo sile na mania isana tilavono (12.33).

Luke mo vereulia mata sava mo uli puku nike ale mara, "enau sohena na usuri mamahuni la hinau sei mo tapulo na tapulona, matan vara o pa efi levosahi mamahunia vara la hinau sei la vujangiho hinira moiso la vararuhu." (1.3-4) Luke mo vujangia vara Iesu mo ususi na rani mo opoi na tueni non God: hin rani atu mo paptijo (3.21), hin rani atu mo vifoni na nona tamlohi usuri (6.12), mo ususi matan retusia atu lara enia hare (9.18), hin rani atu mariviti i mate (23.34, 46), ale nona vujangi mata ususi (11.5-9; 18.1-8, 9-14), ale vara nona tamlohi la pa sile na mania isana tilavono (12.33). Luke mo opoia vara tamlohi la levosahi mamahunia vara Iesu mo mele turu na mateia, mo ulia vara Iesu mo hani te maji hin rani atu matan enia tamlohi matea mo sopo nunua tamlohi purongo (24.42-43).

### *Hin puku nike*

1. Mata sava Luke mo uli puku nike (1.1-4)
2. Rani vora non Iesu, John tamlohi paptijo mo pala (1.5-2.52)
3. Retisohai non John tamlohi paptijo (3.1-20)
4. Paptijo peresi na vaihite non Iesu (3.21-4.13)
5. Vavahinau non Iesu Galilee (4.14-9.50)
6. Iesu mo malue Galilee mo sahe Jerusalem (9.51-19.27)
7. Isoiso wik non Iesu: Nona mateia (19.28-23.56)
8. Iesu mo mele mauri (24.1-12)

## 9. Iesu mo pala, mo sahe na tuka (24.13–53)

### *Reti Tiroma Non Luke*

<sup>1</sup> Enau Luke, na uli reti nike isam tamlohi tavera Theophilus. Tamlohi matuvana la vaihitea vara la uli na sorasora mata sava mo masese isaʻa mo tikeli nake, <sup>2</sup> sohen la sorasora atu ʻa lavia isan la haratu enira la hitea na matara, ale enira la volitusi mata reti non God mo tapulo na tapulona. <sup>3</sup> Ale matana, enau sohena, mo tataholo vara a uli na hinau tari sei la masese na tapulona mo sinai nake isam tamlohi tavera ʻuhufuhu Theophilus, matan enau sohena na usuri mamahuni la hinau sei mo tapulo na tapulona, <sup>4</sup> matan vara o pa eʻi levosahi mamahunia vara la hinau sei la lo vujangiho hinira moiso la varaʻuhu.

### *Angelo Gabriel Mo Pala*

<sup>5</sup> Na rani non Herod supe non Judea, pʻris matea hijana Zechariah enia mo tai na vao pʻris non Abijah, ale narouna sohena, enia mahapin Aaron, hijana Elizabeth. <sup>6</sup> Ale la tupra rua sei maurira la tataholo mo ʻuhu na nahon God. La lo oloolo mamahu na nona retileu peresi na leu tari, ale tea i sopo eʻi tuvaira hin te hinau. <sup>7</sup> Pani mo sopo te natura matan Elizabeth mo aroaro, ale la vajiaha moiso.

<sup>8</sup> Na rani matea, hinau matea mo masese isana hin rani atu mo lo voko peresi na nona vao pʻris na Temple non God. <sup>9</sup> Vao pʻris atu la viʻonia usuri na nora posposi mata viʻoni sohen la lo vaia tarea

vara i unu na Temple non Moli vara i suli na hasori ea. <sup>10</sup> Ale rani tataholo mata suli na hasori mo mai, vao tavera mata lotu la lo pulutahi mata usiusi na jingoima.

<sup>11</sup> Zechariah mo lo toho atu, ale angelo non Moli matea mo pala isana, mo turu na matua votavota mata suli na hasori. <sup>12</sup> Zechariah mara mo hite angelo atu mo hutua, ale matahu tavera mo sohonua. <sup>13</sup> Pani angelo atu mo vereea isana mara, “Zechariah, o sopo matahu! Nom usiusi God mo rongoa moiso, ale naroum Elizabeth i pa vasusui na natum lamane matea, ale o pa tau na hijana vara John. <sup>14</sup> Ale i pa vaiho o avulahi, o avulahi tavera jea, ale tamlohi matuvana sohena, la pa avulahi na nona rani vora, <sup>15</sup> matan God i pa silea na vavahinau matea mo aulu jea. I pa sopo inu na waen teni te wai ʻilangi tinapua hin te rani, ale Tanume Tapu i pa maʻivisia i tapulo na lolo pangen tinana. <sup>16</sup> Ale enia i pa posi na natun Israel matuvana la mele mai isan Moli nora God. <sup>17</sup> Ale enia i pa vano tiroma hin Moli hin suiha atu Tanumen God mo silea isan pʻrovet Elijah, matan vara i posi na ʻomʻromi nona tama vara la ʻomʻromi na natura, ale la haratu la sopo oloolo hin God la usuri na posposi nona tamlohi tataholo, matan vara i vai na vao tamlohi matea la tatamahu matan Moli.” *Mal 4.5*

<sup>18</sup> Ale Zechariah mo vereea isan angelo atu mara, “Avei,

sohena sava natu a pa efi levosahia vara i pa sohen ko lo vereaa? Matan enau na vajiaha moiso, ale taunin narouku mo jeu na rani mata nona tatape moiso.”

<sup>19</sup> Ale angelo atu mo raramia mara, “Enau Gabriel, haratu sei mo lo turu na nahon God, ale God mo ruleau vara a sinai isam vara a vereho hin retiŕuhu nike. <sup>20</sup> Ale nakerihi, o pa mengo, o sopo efi vere te reti vavano i tikeli rani atu i masese matan ko sopo rasu na noku reti, sei la pa masese na ranira tataholo.”

<sup>21</sup> Ale vao tamlohi la lo saovi Zechariah na jingoima, ale la lo romromia vara mo pa lo toma na lolo Temple.

<sup>22</sup> Ale mara mo malue, mo sopo efi retireti isara, ale la hitevosahia vara God mo vujangia na hinau matea na lolo Temple, ale mo lo vai na matamata nakonako isara, ale mo sopo efi retireti.

<sup>23</sup> Ale nona rani mata vavahinau mo isoiso, ale mo mele mule. <sup>24</sup> Hitahun la rani atu, narouna Elizabeth mo tau natuna, ale mo luhu mata vitu mo lima mara, <sup>25</sup> “Moli mo romŕuhu isaku, mo lavi narihi na noku mahanuhanu mata aroaro na tamlohi.”

### *Retisohai Matan Iesu*

<sup>26</sup> Elizabeth mo epe puhoni mata vitu mo limarave moiso, ale God mo rule pa angelo atu, Gabriel vara i sivo Nazareth, vanua matea hin Galilee, <sup>27</sup> mo sivo isana harai maevo matea hijana Mary. La tauhoroa moiso vara i pa lahi vano isana tamlohi matea hijana Joseph,

enia mahapin Supe David matea. <sup>28</sup> Gabriel mo pala isana mara, “Raniŕuhu isam, engko harai matea God mo romŕuhu isam mo tavera jea! Moli mo lo toho peresiho.”

<sup>29</sup> Pani Mary, romina mo tuturahi hajavua hin retireti atu, ale mo vaihitea vara i levosahi na raramin retioloolo atu. <sup>30</sup> Ale angelo atu mo vereaa isana mara, “O sopo matahu! Mary, matan na masalon God mo opoia vara i ruhu isam. <sup>31</sup> Ale mo tapulo nake, o pa tau natum, ale o pa tape na lamane matea, ale o pa tau na hijana vara Iesu.

<sup>32</sup> Enia i pa tamlohi aulu jea, ale la pa tovia Natun God, sei mo aulu jea. Ale Moli God i pa silea na suiha nona supe non tamana Supe David. <sup>33</sup> Enia i pa tauri na suiha vara i aulu na vaon Israel tui tui, ale i pa sopo te isoiso rani mata nona tauri na suiha.”

<sup>34</sup> Mary mo usia isan angelo atu mara, “Hinau atu i pa mai sohena sava, matan enau harai maevo matea?”

<sup>35</sup> Angelo atu mo raramia mara, “Tanume Tapu i pa mai hiniho, ale suihan God Aulu jea i pa hohoviho; ale matana, natirihisei i pa vora i pa tapu, la pa tovia — Natun God. <sup>36</sup> Ale ko levosahia vara tahisam Elizabeth na nona vajiaha enia sohena, mo tau natuna lamane matea, ale vitu akerihi enia nona halimarave vitu isana harai matea la vereaa vara enia harai aroaro matea! <sup>37</sup> Matan mo sopo te hinau hatea i rilangi jea vara God i sopo efi

vaia.”

<sup>38</sup> Ale Mary mara, “Varaŕuhu enau haŕai slev non God purongo. Na opoia vara hinau atu i mai isaku sohena ko vereea.” Ale angelo atu mo mele malue mo vano.

### *Mary Mo Rohi Elizabeth*

<sup>39</sup> Hitahun rani atu, Mary mo vele sahe na jara vutivuti, mo siyo vila na taon matea na lolon jara matan Judea. <sup>40</sup> Mo unu na iman Zechariah, ale mo vere na retioloolo isan Elizabeth. <sup>41</sup> Ale Elizabeth mara mo rongo na retioloolo non Mary, pipi atu na lolona mo hisu, ale Tanume Tapu mo maŕivisi Elizabeth, <sup>42</sup> mo vereea aulu mara, “Avulahi tavera jea isam mo jeu na haŕai tinapua. God mo leŕuhu hin natirihi sei mo lo toho na lolom. <sup>43</sup> Ale enau hare vara tinan noku Moli i eŕi mai vara i rohiau? <sup>44</sup> Matan, vahatea purongo atu sei nara na rongo na nom retioloolo, pipi nike, na loloku mo hisu na avulahi. <sup>45</sup> Avulahi tavera isam matan ko rasu Moli vara i pa vai na sava mo vereea isam!”

### *Vete Hasohaso Non Mary*

<sup>46</sup> Ale Mary mo vereea mara, “Na ŕomiku na hasohaso God mo tavera jea, <sup>47</sup> ale mauriku mo avulahi tavera hin God noku Jujuri, <sup>48</sup> matan mo kilau mai isaku nona haŕai volitusi atano, ale mo tapulo nake, mahapi tari la pa vereea vara avulahi tavera mo mai isaku,

<sup>49</sup> matan haratu sei mo ŕilangi jea mo vai na hinau tavera isaku, ale hijana mo tapu.

<sup>50</sup> Ale nona ŕomopoia mo vano isana mahapi tari, isan la haratu sei la lo sile na oloolo tavera isana.

<sup>51</sup> Enia mo vujangi na nona suiha, mo leputi jalajalai la haratu la mangisi na mapura.

<sup>52</sup> Mo lavi naŕihi la haratu la lo tauri na suiha nona supe, ale mo tahe la haratu ŕomira la atano la sahe aulu.

<sup>53</sup> Mo sohoni la haratu la marohati na hina ŕuhu, pani mo ŕule naŕihi la haratu la tavgav la vano lekoleko.

<sup>54</sup> Mo tueni nona volitusi Israel, usuri na nona retitauhi mata nona ŕomopoia hinira,

<sup>55</sup> matan mo retitauhi vara i pa ŕomopoi isan Abraham peresi na taniana na rani tui tui.”

<sup>56</sup> Mary mo lo toho atu isan Elizabeth mata vitu mo tolu, moiso mo pa mele mule vano na jarana.

### *John Tamlohi Paptijo Mo Vora*

<sup>57</sup> Ale vitu non Elizabeth mo asi vara i lavlavi, ale mo vasusui na nona pipi lamane matea. <sup>58</sup> Ale tavgavuina peresi na tahisana la rongoa vara Moli mo ŕomŕuhu tavera jea isana, ale la avulahi peresia. <sup>59</sup> Ale na hali-maravtolu rani la mai vara la

vai na nona taiřalihi. Tatu-  
ara la lo opoia vara la tau na  
hijana vara Zechariah vara i  
lavi na hijan tamana, <sup>60</sup> pani  
tinana mo vereā mara, “Mo  
vono, enia hijana John.”

<sup>61</sup> Ale la vereā isan Eliz-  
abeth lara, “Mo sopo te  
tavgavim hijana i sohen  
haratu!” <sup>62</sup> Ale la vai na  
matamata hai isan tamana  
na limara vara sava hija  
natu, enia mo opoia vara i  
silea isana. <sup>63</sup> Ale Zechariah  
mo usia vara la lavi te  
hināu mata uliuli hinia i mai  
isana, ale la mařurahi tavera  
matan mo ulia mara, “Hijana  
enia John.” <sup>64</sup> Ale vahatea  
purongo memena mo mele  
materi, ale mo retireti mo  
hasohaso God.

<sup>65</sup> Tahisara tari la hutura,  
ale la matahu, ale sorasora  
atu mo řalihi vevuhi na jara  
tari na jara vutivuti Judea.  
<sup>66</sup> Ale tamlohi tari sei la rong-  
gora la sopo levosahia vara  
natirihī atu i pa sava tam-  
lohi pavuho natu matan li-  
man Moli mo lo toho hinia.

### *Tanumen God Mo Mařivisi Zechariah*

<sup>67</sup> Ale tamana, Zechariah,  
Tanume Tapu mo mařivisia,  
ale mo retimangovi mara,

<sup>68</sup> “Hasohaso tavera isan Moli  
God matan Israel,  
matan nake mo rohi na  
nona tamlohi vara i ju-  
rira,

<sup>69</sup> God mo sileřa na Tamlohi  
Jujuri matea mo suiha  
tavaera mo tai na iman  
nona volitusi supe  
David,

<sup>70</sup> sohena nona přovet tapu  
tuai la vereā

<sup>71</sup> lara vara i pa juriřa isana  
nořa meresahi, ale na  
liman la haratu sei la  
řohu hiniřa.

<sup>72</sup> Mo mařivisi na nona reti-  
tauhi tapu sei vara i pa  
řomi na nomam pua,

<sup>73</sup> retitauhi atu mo silea  
isan tamařa Abraham  
vara i pa vaia,

<sup>74</sup> ale vara i juriřa isana  
nořa meresahi, ale  
i pa tueniřa vara řa  
volitusi isana i sopo te  
matahu isařa,

<sup>75</sup> na mauri tapu mo tataholo  
na nahona mata nořa  
rani tari.

<sup>76</sup> Ale engko natuku, la pa  
toviho přovet non  
haratu mo aulu jea;  
matan engko o pa vano  
tiroma hin Moli,  
mata vai mamahuni na  
malelena,

<sup>77</sup> o pa vere na tamlohi so-  
hena sava God i pa ju-  
rira matan i pa řomi na  
nora hehe.

<sup>78</sup> matan nořa God enia God  
mata řomi na tamlohi na  
nona řomřuhu,  
matan mai non nona  
Jujuri mo sohena alo  
mo vele aulu mo sinai  
isařa na tuka,

<sup>79</sup> vara i mera isan la haratu  
la lo toho na řořoha,  
ale na liman mateia,  
matan vara i tiromařa  
na malele mata tamata.”

### *John Tamlohi Paptijo Mo Ulua*

<sup>80</sup> Ale pa natirihī atu mo  
ulua, ale Tanume Tapu na  
maurina mo suiha, ale mo lo  
toho na tano koru mo tikeli  
na rani mata nona pala na  
nahō tamlohin Israel.

## 2

*Iesu Mo Vora*  
(Mt 1.18-25)

<sup>1</sup> Hin pongi atu, supe nona mara Rome, enia Augustus, ale mo vereea mara la evi vevuhi na tamlohi řalihi na jara tari sei enia mo lo tauri na suiha hinira na varama. <sup>2</sup> Harihi enia tiroma evi na tamlohi hin pongi atu Quirinius, tamlohi aulu matea mara Rome mo lo aulu hin Syria. <sup>3</sup> Ale, tamlohi tari la vano na jarara tataholo vara la pa sile na hijara ea. <sup>4</sup> Ale Joseph mo malue Galilee na taon matan Nazareth mo sahe na taon non pin supe David sei Bethlehem na jara matan Judea, matan enia tahisan supe David, <sup>5</sup> vara i tau na hijana peresi Mary, hařai atu sei mo tauhoroa moiso mata lahi, ale mo tau natuna.

<sup>6</sup> Ale hin pongi atu la pa lo toho atu, nona rani mo mai vara i lavilavi. <sup>7</sup> Ale mo vasui natuna vora tiroma lamane matea. Mo leputi mamahunia na ruru, ale mo taua sivo na puhoro řuvu hana maji palovati, matan mo sopo te mele masapa na lolon ima malele atu nona tamlohi la lo hahau.

*Tavui Sipsip La Hite Na Angelo*

<sup>8</sup> Hin vutepongi atu, hin jara atu, na pahisan taon atu, tavui sipsip hai la lo toho saovi na pulara sipsip na jara řuvuřuvu tavera. <sup>9</sup> Ale la pa hutura purongo, angelo non God matea mo pala isara, ale meran God mo merasahira,

ale matahu mo sohoni vevuhi na epera. <sup>10</sup> Angelo atu mo vereea isara mara, "Ha sopo matahu, matan enau na lavi na retiřuhu mata avulahi tavera matea vara a silea isamim sei i pa nona tamlohi tari. <sup>11</sup> Matan, nakerihi, natirihi matea mo vora isamim na taon non supe David, enia Křisto sei i pa juri na tamlohi, nořa Moli. <sup>12</sup> Ha pa eři hitevosahia sohen harihi: ha pa hite na pipi matea, la leputia na ruru la taua mo lo juruvi na puhoro řuvu hana maji palovati."

<sup>13</sup> Ale, la pa hutura, vao angelo vuro na tuka la pala vahatea na hařin pa angelo atu, ale la lo hasohaso God lara,

<sup>14</sup> "Hasohaso i sahe isan God na jarana aulu jea na tuka!

Ale na varama, tamata i pa toho isan la haratu God mo avulahi hinira."

<sup>15</sup> Na rani la angelo atu la malue isara la sahe na tuka, la tavui sipsip atu la lo vereverea isara lara, "Ale řa vano, řa vano Bethlehem vara řa hite hinau sei Moli God mo lo vereřa hinia."

<sup>16</sup> La tamlohi atu la vano vilavila la tapai Mary enia Joseph, ale pa natirihi atu mo lo juruvi na řuvu na puhoro matea. <sup>17</sup> Lara la hitea, la vereuli na sava pa angelo atu mo lo vereea isara matan natirihi atu. <sup>18</sup> Ale tamlohi tari sei la rongo la retireti atu, la mařurahi tavera na sava la tavui sipsip atu la vereea isara. <sup>19</sup> Pani Mary mo tau mamahuni la hinau nike na řomina, ale mo lo

řomřomira. <sup>20</sup> Ale pa la tavui sipsip atu la mele hilu vano isana pulara sipsip, la lo tahe na hijan God, ale la sile na hasohaso isana mata sava la rongoa, ale sava la hitea sohen la vereea isara.

*La Tau Na Hijan Iesu*

<sup>21</sup> Mo kakau na halimar-avtolu rani, vara i lavi na nona tairalihi, ale la tau na hijana vara Iesu, hija atu sei angelo atu mo lo silea tiroma moiso Mary mo pa tau natuna.

*La Lavi Iesu Vano Na Temple*

<sup>22</sup> Ale mo kakau na rani mata malamalai matan vara i vai Joseph enia Mary la vokevoke usuri na Leu non Moses, la lavia mo sahe Jerusalem mata silea isan Moli God <sup>23</sup> sohen la ulia na leu non Moli God lara,

‘Lamane vora tiroma tari sei la malue na pangen tinara tiroma, enira la tapuhi non Moli God.’  
*Exo 13.2-12*

<sup>24</sup> Ale la sile na malamalai usuri na sava leu non Moli God mo vereea vara la vaia, ‘vomahe i rua teni te wepe i rua.’

*Lev 12.2-8*

*Simon Mo Hite Iesu*

<sup>25</sup> Ale hin pongi atu, mara Jerusalem matea, hijana Simon, enia tamlohi tataholo matea, ale řomina mo řilangi mata lotu tarea. Mo lo kilau matan Jujuri non Israel, ale Tanume Tapu mo mařivisia. <sup>26</sup> Tanume Tapu mo vujangia hinia moiso vara i pa sopo mate vavano i tikeli pongi atu i hitea Kristo non Moli

God. <sup>27</sup> Ale Tanume Tapu mo vai na řomina vara i vano na lolo Temple, ale na rani taman Iesu enia tinana la lavia mo sinai matan vara la vai na posposi sei leu mo opoia, <sup>28</sup> mo tulia, ale mo sile na hasohaso isan God mara,

<sup>29</sup> “Moli God, nake natu, na levosahia moiso vara o eři majinga hiniau nom volitusi,

vara a mate na tamata matan nom retitauhi isaku mo masese,

<sup>30</sup> matan mataku mo hite na nom Jujuri moiso,

<sup>31</sup> ko tatamahunia mata tamlohi tari,

<sup>32</sup> enia malarani matea mata vuhesi God isana tamlohi řořoha tari,

ale mata hasohaso nona nom tamlohin Israel.”

<sup>33</sup> Taman Iesu enia tinana la mařurahi tavera na sava mo vereea matana. <sup>34</sup> Ale Simon mo leřuhu hinira, ale mo vereea isan tinana Mary mara, “God mo viřoni natir-ihini niki, vara i pa vai na tamlohi matuvana Israel la jovi, ale i pa tahe na tamlohi matuvana hinia, enia i pa matamata matea tamlohi la pa verelejeleja, <sup>35</sup> matan vara řomřomi nona tamlohi matuvana la pa mavuhesi, ale ko hitea, sita vuro i pa hoti na maurim tataholo.”

*Přovet Hařai Sei Anna*

<sup>36</sup> Přovet hařai matea mo lo toho atu hijana Anna, venatun Phanuel tavgavin Asher. Enia mo vajiaha sasati moiso, mo lo toho peresi tuana mata tauni mo limaravrua purongo hin la rani atu mo pa lo hařai

maevo, <sup>37</sup> moiso mo lo toho sohena haʻai malepu matea mo tikeli na taunina mo ngavulu limaravtolu mo vati (84). Enia mo sopo lo malue hin Temple atu, mo lo lotu God na nona tapuhoro na hanhani peresi na nona usiuseri terea na rani peresi na vutepongi. <sup>38</sup> Ale mo sinai tataholo hinira atu, ale mo tapulo vere meje isan God. Mo retireti matan natirihi atu isan la haratu sei la lo kilau toho matan rani atu vara God i pa volituhu Jerusalem hinia.

### *Joseph Enia Mary La Mele Mule*

<sup>39</sup> Ale na rani Joseph enia Mary la vai vevuhi na sava leu non God mo opoia, la mele vano na jarara Galilee, na nora taon matan Nazareth. <sup>40</sup> Natirihi atu mo ulua, mo mai mo řilangi, ale řomina mo mařivi na lelevosahi. Ale řomřuhu non God mo lo toho isana.

### *Iesu Mo Uluvou Mo Sahe Na Temple*

<sup>41</sup> Na tauni hatehateahi tamana enia tinana la lo sahe Jerusalem mata Hanhani mata Passover. <sup>42</sup> Ale hin rani atu Iesu taunina mo tikeli mo sangavulu řomana mo rua, la mele sahe usuri na posposi sohen la lo vaia terea matan Hanhani atu. <sup>43</sup> Ale na rani Hanhani atu mara mo isoiso, na malele la lo mele mule, uluvou atu Iesu mo pa lo toho Jerusalem. Tamana enia tinana la sopo levosahia, <sup>44</sup> pani mata rani matea la řomřomia vara mo lo hahau peresi na vaora, pani mo sopo tuai la tapulo

alea isana tahisara peresi na tapalara na malele, <sup>45</sup> ale lara la sopo hitea, la mele hilu la vano vara la alea Jerusalem. <sup>46</sup> La alea, ale na hatolu rani la pa tapaia na lolo Temple, mo lo sakele na livuha tamlohi vujangi ea, mo lo tapurongo isara, ale mo lo usi na retusia. <sup>47</sup> Ale tamlohi tari sei la rongoa la mařurahi tavera na nona lelevosahi peresi na nona řarami reti isara.

<sup>48</sup> Ale tamana enia tinana lara la tapaia, la hutura tavera hinia. Ale tinana mo vere isana mara, "Natuku, mata sava ko vailehilehi kamam sohena? Enau tamam kama aleho vavano řomimam mo jovi tavera!"

<sup>49</sup> Ale mo vere isara mara, "Ka lo aleau mata sava? Ka sopo levosahia vara enau a pa lo toho na iman tamaku?" <sup>50</sup> Pani la sopo levosahi na řaramin reti atu sei mo vere isara.

<sup>51</sup> Ale mo usurira la sivo Nazareth, ale mo hase taua na ruhuruhi limara. Ale tinana mo tau mamahuni la hiniau nike na řomina, ale mo lo řomřomira. <sup>52</sup> Ale Iesu mo ulua mo mai tamlohi, nona lelevosahi mo ulua, ale mo ulua na řomřuhu non God peresi na řomřomi nona tamlohi tari isana.

## 3

### *Vujangi Non John Tamlohi Paptijo*

(Mt 3.1-12; Mk 1.1-8; Jn 1.19-28)

<sup>1</sup> Na sangavulu řomana mo lima tauni, Tiberias Caesar, Supe nona mara Rome mo



lo tauri na suiha, ale Pontius Pilate mo lo aulu hin Judea. Herod Antipas mo lo aulu hin Galilee, ale tasina Philip, mo lo kilau Ituraea peresi Trachonitis, ale Lisaniyas mo lo aulu hin Abilene, <sup>2</sup> ale tataholo hin rani atu Anas peresi Caiaphas la lo pŕis aulu, God mo sile na retiso-

hai matea isan John natun Zechariah hin rani atu mo lo toho na jara tano koru. <sup>3</sup> Ale John mo hahau řalihi na jara tari Jordan, ale mo vano mo lo retivujavujangi isana tamlohi vara la lavi na paptijo mata posi na hehe matan vara Moli i řomira. <sup>4</sup> Sohen pŕovet Isaiah mo ulia mara, 'Na jara hasetoho leon matea mo lo ulo mara:

Ha vasahi na malelen  
Moli God!

Ha tano na malelena i tataholo.

<sup>5</sup> God i pa tavuni na vakoa tari,

ale i pa mavalolohi na  
vutivuti tari la mai la  
tataholo i řuhu,

ale kolekole la pa tataholo,  
ale malele morumoruha  
la pa tataholo,

<sup>6</sup> ale tamlohi tari la pa hite  
malele sei God i pa juri  
na tamlohi hinia.'

*Isa 40.3-5*

<sup>7</sup> Vao tamlohi la lo mai mata paptijo isan John, ale mo lo vereea isara mara, "Kamim mata sasati! Hare mo retiřoařoahai kamim vara ha rovo na talai lolokoru non God mata hehe sei mo lo mai? <sup>8</sup> Ha namaha usuri na nomim posi na hehe. Ha sopo řomaulu vara, 'Kamam kama juri matan tamamam

Abraham!'; matan na vereea tataholoi kamim hinia vara, God i eři vai la vatu nike la mai natun Abraham! <sup>9</sup> Matan nakerihi, God mo lo ava na nona rita moiso mata wari. Matan, vipahai tari sei la sopo lavi na vuara řuhu, i pa tai jovjovira, ale i pa pulahira la vano na hapu."

<sup>10</sup> Ale vao atu la usia isana lara, "Vara mo sohena, kama pa vai na sava?"

<sup>11</sup> John mo řaramira mara, "Vara nom ruru mo rua, o sile te hatea isan haratu mo sopo te nona ruru, ale haratu hana hinau mo matuvana, i vaia sohena."

<sup>12</sup> Tamlohi mata lavi na takis sohena, la mai isana mata paptijo, la vereea isana lara, "Tija, kamam kama pa vai na sava?"

<sup>13</sup> Ale mo vereea isara mara, "Ha sopo lavi na mania i jeu na sava mo tataholo vara ha lavia."

<sup>14</sup> Moiso, tamlohi vuro hai la usia lara, "Ale kamam, kama pa vai na sava?" Ale John mo vereea isara mara, "Ha sopo vai na tamlohi la matahu mata lavi te mania isara, ha sopo tuvai na tamlohi na halu mata mania, ha avulahi na volimim."

<sup>15</sup> Ale matan tamlohi la lo kilau moiso mata rani pala non nora Křisto, enira mo isoiso la lo řomřomia na mapura lara korong, John enia pa Křisto atu.

<sup>16</sup> Pani John mo řaramira mara, "Enau na lo paptijo hin kamim na wai purongo, pani tamlohi matea mo aulu jea hiniau mo lo mai, enau na sopo tataholo vara a uli

nañihi na asi eve palona. Enia i pa paptijo hin kamim na Tanume Tapu peresi na hapu. <sup>17</sup> Mo lo tauri na nona foko tavera na limana vara i vasahi na nona jara ase na piri wit, ale matan vara i takonahi piri wit atu na nona pea, pani i pa suli na pahapaha piri wit na hapu sei tea i sopo eñi vunia hin te rani.” <sup>18</sup> Ale hin na reti tinatinapua matuvana John mo retiñoañoahai na tamlohi, ale mo retivujavujangi na Retiñuhu isara hinira.

<sup>19</sup> Ale hin pongi atu John mo rethoro Herod tamlohi aulu non Judea, mata nona vaivaileu peresi Herodias, naroun tasina, ale mata hina sasati tinatinapua tari sei Herod mo lo vaira, <sup>20</sup> ale aulu hin la hina sati atu mo lo vaira, Herod mo tau John na ima ñilangi.

*John Mo Paptijo Hin Iesu  
(Mt 3.13-17; Mk 1.9-11)*

<sup>21</sup> Pani hin pongi atu John mo sopo lo toho na ima ñilangi, tamlohi tari la lavi na paptijo, ale John mo paptijo hin Iesu. Ale Iesu mo pa lo usi, tuka mo maroi, <sup>22</sup> ale Tanume Tapu mo sinai atano sohena vomahe matea, ale mo tau hinia; ale leon matea mo tai na tuka mara, “Engko Natuku ñuhuñuhu jea, enau na avulahi tavera jea hiniho.”

*Pina Iesu Tuai  
(Mt 1.1-17)*

<sup>23</sup> Taunin Iesu mañiviti i ngavulu tolu (30) moiso mo pa tapulo na nona vavahinau.

Iesu la vereva vara enia natun Joseph,  
Joseph, enia natun Heli,  
<sup>24</sup> Heli, enia natun Matthat,  
Matthat, enia natun Levi,  
Levi, enia natun Melchi,  
Melchi, enia natun Jannai,  
Jannai, enia natun Joseph,  
<sup>25</sup> Joseph, enia natun Mat-  
tathias,  
Mattathias, enia natun  
Amos,  
Amos, enia natun Nahum,  
Nahum, enia natun Esli,  
Esli, enia natun Naggai,  
<sup>26</sup> Naggai, enia natun  
Maath,  
Maath, enia natun Mat-  
tathias,  
Mattathias, enia natun Se-  
mein,  
Semein, enia natun Josech,  
Josech, enia natun Joda,  
<sup>27</sup> Joda, enia natun Joanan,  
Joanan, enia natun Rhesa,  
Rhesa, enia natun Zerab-  
babel,  
Zerabbabel, enia natun  
Shealtiel,  
Shealtiel, enia natun Neri,  
<sup>28</sup> Neri, enia natun Melchi,  
Melchi, enia natun Addi,  
Addi, enia natun Cosam,  
Cosam, enia natun El-  
madam,  
Elmadam, enia natun Er,  
<sup>29</sup> Er, enia natun Joshua,  
Joshua, enia natun Eliezer,  
Eliezer, enia natun Jorim,  
Jorim, enia natun Matthat,  
Matthat, enia natun Levi,  
<sup>30</sup> Levi, enia natun Simeon,  
Simeon, enia natun Judah,  
Judah, enia natun Joseph,  
Joseph, enia natun Jonam,  
Jonam, enia natun Eliakim,  
<sup>31</sup> Eliakim, enia natun Me-  
lea,

Melea, enia natun Menna,  
 Menna, enia natun Mat-  
 tatha,  
 Mattatha, enia natun  
 Nathan,  
 Nathan, enia natun David,  
 32 David, enia natun Jesse,  
 Jesse, enia natun Obed,  
 Obed, enia natun Boaz,  
 Boaz, enia natun Sala,  
 Sala, enia natun Nahshon,  
 33 Nahshon, enia natun  
 Amminadab,  
 Amminadab, enia natun  
 Admin,  
 Admin, enia natun Arni,  
 Arni, enia natun Hezron,  
 Hezron, enia natun Perez,  
 Perez, enia natun Judah,  
 34 Judah, enia natun Jacob,  
 Jacob, enia natun Isaac,  
 Isaac, enia natun Abra-  
 ham,  
 Abraham, enia natun  
 Terah,  
 Terah, enia natun Nahor,  
 35 Nahor, enia natun Serug,  
 Serug, enia natun Reu,  
 Reu, enia natun Peleg,  
 Peleg, enia natun Eber,  
 Eber, enia natun Shelah,  
 36 Shelah, enia natun  
 Cainan,  
 Cainan, enia natun  
 Arphaxad,  
 Arphaxad, enia natun  
 Shem,  
 Shem, enia natun Noah,  
 Noah, enia natun Lamech,  
 37 Lamech, enia natun  
 Methuselah,  
 Methuselah, enia natun  
 Enoch,  
 Enoch, enia natun Jared,  
 Jared, enia natun Maha-  
 laleel,  
 Mahalaleel, enia natun  
 Cainan,

38 Cainan, enia natun Enos,  
 Enos, enia natun Seth,  
 Seth, enia natun Adam,  
 Adam, enia natun God.

## 4

### *Tiapolo Mo Vaihite Iesu (Mt 4.1-11; Mk 1.12-13)*

1 Ale Tanume Tapu mo  
 maʻivisi Iesu, ale Iesu mo  
 malue na wai Jordan, ale  
 Tanume Tapu mo tiroma  
 hinia mo vano na jara tano  
 koru. 2 Tiapolo mo vaihite  
 Iesu atu mata rani mo  
 ngavulu vati. Hin la rani atu,  
 Iesu mo sopo hani te hinau  
 hatea, ale rani atu la isoiso  
 Iesu mo marohati jea.

3 Tiapolo mo verea isana  
 mara, “Vara engko Natun  
 God, o vere vatu sei i mai  
 pereti!”

4 Iesu mo ʻaramia mara,  
 “Retiulia mo verea vara,  
 “Tamlohi i pa sopo mauri na  
 pereti purongo!”” *Deut 8.3*

5 Ale Tiapolo mo lavi Iesu  
 mo sahe aulu na masapa,  
 ale vahatea purongo, mo  
 vujangia na jara tari na  
 varama sei supe la lo tauri na  
 suiha hinira, 6 ale mo verea  
 isana mara, “A pa sileho na  
 nora suiha peresi na nora  
 hasohaso, matan hinau tari  
 sei la lo toho na limaku, ale a  
 eʻi silera isan hare na opoia.  
 7 Vara o lotuau purongo,  
 hinau tari sei la pa nom!”

8 Ale Iesu mo ʻaramia  
 mara, “Retiulia mo verea  
 vara,  
 ‘O pa lotu Moli nom God,  
 ale o pa volitusi isana  
 hasena!’”

*Deut 6.13*

<sup>9</sup> Ale Tiapolo mo lavi Iesu mo taua aulu na pusa Temple, ale mo vereia isana mara, "Vara engko Natun God, o kue! <sup>10</sup> matan Retiulia mo vereia vara,

'God i pa ritleu isana nona angelo vara la pa lo kilau mamahuniho,

<sup>11</sup> ale la pa tauriho na limara matan

vara o sopo vujahi na palom hin te vatu.' "

*Psa 91.11-12*

<sup>12</sup> Iesu mo řaramia mara, "Retiulia mo vereia vara, 'O pa sopo vaihite Moli nom God!' " *Deut 6.16*

<sup>13</sup> Ale na rani Tiapolo mo isoiso na nona vaihite isan Iesu, mo malue mo vano, pani mo lo kilau matan te masapa řuhu tinapua.

*Iesu Mo Tapulo Vujangi Na Tamlohi Galilee*

*(Mt 4.12-17; Mk 1.14-15)*

<sup>14</sup> Iesu mo mele vano Galilee na suihan Tanume Tapu, ale sorasorahina mo řalihi jara atu. <sup>15</sup> Mo vujangi na tamlohi na nora ima lotu, ale tamlohi tari la hasohasoa.

*La Turuleji Hin Iesu*

*(Mt 13.53-58; Mk 6.1-6)*

<sup>16</sup> Ale Iesu mo pala Nazareth, jara atu sei mo ulua ea. Ale sohena mo lo vaia tarea mo vano na nora ima lotu na Sabbath, ale mo turu na naho tamlohi mata i evi na Retiulia, <sup>17</sup> ale la silea hin viriviri pepa atu sei Isaiah mo lo ulia, mo vuhesia ale mo vano hin jara atu sei mo opoia vara i evia, ale mo vereia mara,

<sup>18</sup> "Tanumen Moli mo lo toho hiniau matan enia

mo viřoniau vara a vereuli na Retiřuhu isana tilavono.

Mo řuleau vara a vere na materi isan la haratu la lo taurilatira,

ale vara a vai na tamlohi matavuso la kilau,

ale vara a teri la haratu la lo toho na ruhuruhu tamlohi sasati,

<sup>19</sup> ale vara a vereulia vara nake enia pongi řomřuhu non Moli."

*Isa 61.1-2a*

<sup>20</sup> Ale Iesu mo mele viriviri pepa atu, mo silea isan tamlohi atu mo lo silea isana, ale mo sakele. Tamlohi tari na lolon ima lotu atu matara la lo toho hinia, <sup>21</sup> ale mo tapulo vereia isara mara, "Nahapani natu Retitapu nike mo pa masese na peromim."

<sup>22</sup> Ale tamlohi tari la hasohasoa, la mařurahi na retiřuhu mo lo verera, ale la vereia lara, "Avei, tamlohi nike enia natun Joseph teni!"

<sup>23</sup> Ale Iesu mo vereia isara mara, "Na levosahi mamahunia vara ha pa vereau hin titileu sei mo vereia vara, 'Doctor, o hase vai mamahuniho!' Ha pa vereia vara, 'Sava hina mařurahi kama rongoa vara ko lo vaia Capernaum, o vaia nike na jaram sohena!' " <sup>24</sup> Ale mo vereia isara mara, "Varařuhu na vereia isamim, vara mo sopo te přovet hatea i eři lavi na řomřuhu nona tamlohi na vanuana.

<sup>25</sup> Pani, na varařuhu hin haratu na vereia vara, 'Malepu matuvana Israel la lo toho na rani non Elijah, hin rani atu usa mo sopo jovi mata tauni mo tolu vitu mo

limarave, ale marua tavera mo voroi Israel, <sup>26</sup> ale God mo sopo řule Elijah i vano isan te vonara, pani isana hařai malepu matea mo lo toho Zarephath na jara Sidon. <sup>27</sup> Ale tamlohi lepros matuvana hin Israel la lo toho na rani non Elisha, God mo sopo vai mamahuni te vonara hatea pani Naaman purongo mara Syria matea.”

<sup>28</sup> Ale lara la rongo la hinau atu Iesu mo lo verera, tamlohi tari na lolon ima lotu la lolokoru patura. <sup>29</sup> La turu la titiua vara i malue hin taon atu, ale la lavia mo vano na tavalu taon matan vara la pa pulahia na pesapesan vutivuti atu sei la voro na nora taon hinia. <sup>30</sup> Pani Iesu mo hahau roto na livuhara mo vano.

*Iesu Mo Titiu Nařihi Na Tanume Sati*  
(Mk 1.21-28)

<sup>31</sup> Ale Iesu mo sahe Capernaum, taon tavera matea Galilee. Mo lo vujangira na Sabbath, <sup>32</sup> ale la haratu la rongoa la mařurahi tavera na nona vujangi, matan nona reti mo suiha.

<sup>33</sup> Na lolon ima lotu atu tamlohi matea, tanume lumiha sasati matea mo lo toho hinia, mo ulu aulu řilangi mara, <sup>34</sup> “Aaah! Ko mai isamam mata sava, Iesu mara Nazareth? Ko mai vara o komo kamam? Na levosahia vara engko hare – haratu mo tapu non God!”

<sup>35</sup> Pani Iesu mo merusahia mara, “O sopo retireti! O malue isan tamlohi sei!” Ale tanume sasati atu mo sařihi tamlohi atu sivo atano

na livuhan vao atu, ale mo malue hinia, pani mo sopo komo te epena.

<sup>36</sup> Tamlohi tari la mařurahi matana, ale la lo hase vereverea isara lara, “Eh! Sava reti nahai? Matan na suiha nona retileu purongo, mo titiu nařihi na tanume lumiha sasati la malue!” <sup>37</sup> Ale sorasorahina mo vano řalihi na jara tari ea.

*Iesu Mo Tueni Na Tamlohi Matuvana*

(Mt 8.14-17; Mk 1.29-34)

<sup>38</sup> Ale hitahun haratu, Iesu mo turu mo malue na ima lotu, mo vano na iman Simon Peter mo unu hinia. Hin rani atu vepalihan Peter mo rojo na seserei řilangi matea, ale la usi Iesu matana vara i tuenia. <sup>39</sup> Iesu mo turu na pahisa vatana, mo kilau sivo isana, ale mo řule nařihi seserei atu, ale seserei atu mo malue isana, ale vahatea purongo mo turu mo tapulo tatamahuni na hara hinau.

<sup>40</sup> Alo mo lo tapulo majo, ale la haratu te tahisara la rojo na rojoa tinatinapua la lavira la mai isan Iesu, ale mo tau na limana hinira hatehateahi mo isoiso, ale nora rojoa la tihai. <sup>41</sup> Ale tanume sasati sohena la malue isana tamlohi matuvana la ulu lara, “Engko Natun God!” Pani Iesu mo merusahira, ale mo sopo tinařihira vara la vere te hinau, matan la levosahia vara enia natu pa Křisto atu.

*Iesu Mo Retivujavujangi*

<sup>42</sup> Ale na rani tinapua na řalavuhu, Iesu mo malue mo vano na jara hasetoho matea. Ale tamlohi la alea la mai isana, la poia vara i

lo toho peresira tako, <sup>43</sup> pani Iesu mo vereea isara mara, "A pa vano na taon tinatinapua vara a retivujavujangi hin mauri atu God mo aulu hinia isara sohena na vaia isamim, matan God mo řuleau matana." <sup>44</sup> Ale mo malue mo vano řalihi na jara Judea mo lo retivujavujangi na nora ima lotu.

## 5

*Mo Tovi Na Nona Tamlohi Usuri*

(Mt 4.18-22; Mk 1.16-20)

<sup>1</sup> Na rani matea, Iesu mo lo turu na pahisa tasin Galilee, vao tamlohi matuvana la lo turu porotia mata tapurongo na reti non God, <sup>2</sup> ale mo hite na boti mo rua la seretahira na oneone, mo hite na tamlohin la boti atu la lo turu na jarauta, la lo hoje na nora tara. <sup>3</sup> Iesu mo vele na vonan la boti atu matea sei enia botin Simon Peter, mo usia vara i sohai nařihia makomona na jarauta. Ale Iesu mo sakele na boti mo vujangi pa vao tamlohi atu.

<sup>4</sup> Mara mo isoiso na nona retireti isara, mo vereea isan Simon mara, "Eh, o sohai nařihia i sivo na jara puaha, ale ha tuhu na nomim tara mata tarai te maji."

<sup>5</sup> Moiso, Simon mo řaramia mara, "Tamlohi tavera, kama kalvono vutepongi jarohi, ale kama sopo tikeli tea, pani matan ko vereea, a pa tuhu na tara." <sup>6</sup> Ale lara la vaia sohena, la řalihi na takonahi maji, ale nora tara la tapulo mařari. <sup>7</sup> La alovi na tapalara hin boti tinapua atu vara la mai la tuenira, ale la mai la

sohoni la boti atu mo rua, mariviti vara la pute.

<sup>8</sup> Pani Simon Peter mara mo hite hinau atu mo jovi sivo mo papaohi na paun Iesu mara, "O malue isaku Moli! Matan enau na tamlohi hehe matea!" <sup>9</sup> Matan Simon Peter enira tolu la haratu la lo toho peresia la mařurahi tavera na maji la tikelira, <sup>10</sup> ale James enia John sohena, enira natun Zebedee sei la tapalan Simon Peter na bisnis mata aleale maji.

Ale Iesu mo vereea isan Simon mara, "O sopo matahu! Mo tapulo nake, engko o pa tamlohi tara tamlohi!" <sup>11</sup> Ale lara la tahe na botira sahe na jarauta, la tinařihia na hinau tari nora mata botira, ale la usuri Iesu.

*Tamlohi Lepros Matea*

(Mt 8.1-4; Mk 1.40-45)

<sup>12</sup> Ale na rani matea Iesu mo lo toho na taon tavera matea atu, tamlohi matea mo mai isana lepros mo hati vevuhi na epena, ale mara mo hite Iesu, mo jovi na nahona, mo tangi isan Iesu mara, "Moli, vara o majinga, o eři vaiau a vokevoke."

<sup>13</sup> Moiso Iesu mo řirahi na limana mo tikelia mara, "Ale a vaia! O vokevoke!" Vahatea purongo lepros atu mo tinařihia. <sup>14</sup> Iesu mo vereea isana vara i sopo mele vereea isan tea, pani mo vereea mara, "O vano o hase vujangiho isan te pŕis hatea, ale o sile te silesilea hatea mata nom vokevoke usuri na sava Moses mo retileu hinia, matan vara i eři vereea vara engko ko mele řuhu." <sup>15</sup> Pani nake natu sorasorahina mo

mele tavera jea mo vano asau, ale vao tavera la lo mai vara la tapurongo na nona retireti, ale mo vai na nora rojoa la tihai. <sup>16</sup> Pani tarea Iesu mo lo vano hasena na jara hasetoho mata usiusi.

*Tamlohi Hariju Matea  
(Mt 9.1-8; Mk 2.1-12)*

<sup>17</sup> Ale na rani matea hin la rani atu, Iesu mo lo vujangi, Pharisee peresi na tamlohi vujangi mata leu, la lo sakele mariviti atu, enira la tai na vanua tari matan Galilee, Judea peresi Jerusalem. Ale suiha tavera non God mata titiu narihi na rojoa mo lo toho hinia. <sup>18</sup> Tamlohi la hutura matan tamlohi hai la lo lavi na tamlohi rojoa matea na epa matea, epena tari la mate, ale la lo aleale malele vara la lavia i unu sivo na nahon Iesu. <sup>19</sup> Pani la sopo hite te malele vara la pa unu hinia, la vele sahe aulu na pusa ima la role na masapa matea, ale la tuhua na epana mo sivo atano na livuha vao tataholo na nahon Iesu. <sup>20</sup> Ale Iesu mara mo hite na nora rasua, mo vereia isan tamlohi rojoa atu mara, "Tapala, na romiho mata nom hehe."

<sup>21</sup> Ale tamlohi vujangi mata leu peresi na Pharisee la tapulo usiusira lara, "Sava tamlohi nahai mo lo vaia sohena enia God? God hasena i eri romi na hehe!"

<sup>22</sup> Iesu mo levosahi na romira ale mo ramira mara, "Mata sava romimim mo lo sati na sava na vereia? <sup>23</sup> Sava natu, mo mele malum jea? Vara a vereia isan tamlohi hariju nike vara, 'Na romi na nom hehe!' teni

'O turu! O hahau!' <sup>24</sup> Pani matan vara ha eri levosahia vara Natun Tamlohi mo lavi na suiha mata romi na hehe na varama, ha tapurongo na sava a pa vereia!" Moiso Iesu mo vereia isan tamlohi hariju atu mara, "Na vereia isam, o turu, o lavi na epam, ale o mule!"

<sup>25</sup> Vahatea purongo, mo turu na nahora, mo lavi na epana mo mule, ale mo lo hasohaso God. <sup>26</sup> Marurahi tavera mo taurilatira, ale enira mo isoiso la hasohaso God, matahu mo sohonira lara, "Na vereia! Mele hina marurahi tinatinapua nahai ra lo hitera nakerihi!"

*Iesu Mo Vironi Matthew  
(Mt 9.9-13; Mk 2.13-17)*

<sup>27</sup> Hitahuni haratu, Iesu mo malue mo vano, ale mo hite na tamlohi mata lavi na takis matea, hijana Levi, mo lo sakele na jarana, ale mo vereia isana mara, "O usuriau!" <sup>28</sup> Ale mo turu, mo tinarihi vevuhi na nona voko tari mo usuri Iesu.

<sup>29</sup> Moiso, Levi mo vai na hanhani tavera matea non Iesu na imana, ale takonahi tamlohi mata lavi na takis peresi na tamlohi tinapua hai la lo hanhani peresira na tep atu. <sup>30</sup> Ale Pharisee peresi na nora tamlohi vujangi mata leu hai la lo ngutungutu isana nona tamlohi usuri lara, "Mata sava ka lo hanhani ale ka lo inu peresi na tamlohi mata lavi na takis peresi na tamlohi hehe?"

<sup>31</sup> Ale Iesu mo ramira mara, "Haratu la sopo rojo la sopo opoi na doctor, pani haratu purongo sei la rojo.

<sup>32</sup> Na sopo sinai matan vara a tovi la haratu la tataholo la posi, pani mata tamlohi hehe.”

*Tapuhoro Na Hanhani*  
(Mt 9.14-17; Mk 2.18-22)

<sup>33</sup> Pharisee la vereea isana lara, “Tamlohi usuri non John tamlohi paptijo la lo tapuhoro na hanhani hin te rani mata usiusi, ale tamlohi usuri nona Pharisee la lo vaia sohena, pani nom la lo hanhani la lo inu!”

<sup>34</sup> Iesu mo řaramira mara, “Ha eři vai na tamlohi ka tovira mata mai na hanhani lahi la tapuhoro na hanhani vara tamlohi lahi mo lo toho peresia? <sup>35</sup> Pani rani mo lo mai vara la pa lavi nařihi na tamlohi lahi isara, ale la pa tapuhoro na hanhani hin la rani atu natu.”

*Ruru Tuai Peresi Na Ruru Paro*

<sup>36</sup> Iesu mo mele verera na titileu matea mara, “Mo sopo tea i řari te nona ruru paro vara i lavi tavalu ruru atu i silivi horo na mařari ruru tuai matea hinia. Vara i vaia sohena, i pa řari ruru paro atu, ale tavalu ruru paro atu i pa sopo eři sořo i řuhu hin ruru tuai atu.

*Waen Tuai – Waen Paro*

<sup>37</sup> Ale mo sopo tea i tisi na waen paro i sivo na huri waen tuai. Vara i vaia sohena, waen paro atu i pa vali i sohi i kosahi huri waen tuai atu sei mo masa moiso, ale waen atu i pa roro nařihi, ale huri atu i pa sopo mele řuhu matan te hinau. <sup>38</sup> Pani ha pa tisi na waen paro na lolo huri waen paro purongo matan

mo malum. <sup>39</sup> Ale mo sopo tea vara i lo inu na waen tuai i opoi na waen paro, matan i pa vereea vara, ‘Waen tuai mo meji.’”

## 6

*Iesu Enia Supe Mata Sabbath*

(Mt 12.1-8; Mk 2.23-28)

<sup>1</sup> Na Sabbath matea, Iesu mo pa lo hahau roto na isa wit matea, ale nona tamlohi usuri la vesi roto na perera hai, ale la savasavahira na limara, moiso la hanira. <sup>2</sup> Pani tatua Pharisee lara, “Eh! Mata sava ka lo vai na hinau matea mo sopo tataholo vara ha vaia na Sabbath?”

<sup>3</sup> Iesu mo řaramira mara, “Ka sopo lo evi na sava David mo vaia hin rani atu mo marohati, enia peresi la haratu la lo toho peresia?”

<sup>4</sup> Ka evia ka hitea sohena sava mo unu na Tabernacle non God mo lavi na pereti tapu, pereti atu přiš hasera la eři hania, ale David mo hania mo silea isana tatuana la hania sohena.” <sup>5</sup> Ale Iesu mo vere isara mara, “Natun Tamlohi, enia Moli mata Sabbath.”

*Tamlohi Matea Tavalu Limana Mo Rihirihi*

(Mt 12.9-14; Mk 3.1-6)

<sup>6</sup> Na Sabbath tinapua matea, Iesu mo unu na lolo ima lotu, ale mo lo vujangi. Tamlohi matea mo lo toho atu matua limana mo rihirihi. <sup>7</sup> Ale tamlohi vujangi mata leu peresi na Pharisee la lo kilau Iesu vara i pa titiu nařihi na rojo na Sabbath teni mo vono,



matan vara la eñi vilei te hinau mata pisuhia hinia. <sup>8</sup> Pani hina purongo vara Iesu mo levosahi na řomira, mo vereia isan tamlohi lima rihirihia atu mara, "O mai o turu akerihi!" Ale tamlohi atu mo turu mo vano isana. <sup>9</sup> Ale Iesu mo vereia isara mara, "Na lo usi kamim vara mo tataholo vara o vai na hina řuhu na Sabbath, teni vara o sile na rongohaji isan tea na Sabbath, teni vara o juri na mauri, teni vara o komoa?" <sup>10</sup> Mo kilau řalihira mo isoiso, moiso mo vereia isan tamlohi atu mara, "O řirahi na limam!" Ale pa tamlohi atu mo vaia sohena, ale limana mo mele řuhu vevuhi. <sup>11</sup> Pani la Pharisee atu la lolokoru patura, la lo usiusira hinia lara, sava natu la pa eñi vaia isan Iesu.

*Iesu Mo Viřoni Na Nona Vahařule*  
(Mt 10.1-4; Mk 3.13-19)

<sup>12</sup> Hin la rani atu Iesu mo malue isara, mo sahe aulu na vutivuti mata usiusi, mo usiusi rani isan God. <sup>13</sup> Ale na řalavuhō mo řovi na nona tamlohi usuri, ale mo viřoni na tupu sangavulu řomana mo rua hinira, enira mo tovira vahařule;

<sup>14</sup> Simon sei Iesu mo tau na hijana vara Peter, tasina Andrew, ale James enia John, Philip,

Bartholomew,

<sup>15</sup> Matthew,

Thomas,

James natun Alphaeus,

Simon sei, enia tamlohi matea

mata valum mata jarana,

<sup>16</sup> ale Judas natun James,

ale Judas Iscariot sei mo lo turuposi hin Iesu.

*Iesu Mo Vujangi Na Tamlohi*

(Mt 4.23-25)

<sup>17</sup> Ale Iesu mo sevuti mo sinai atano peresira, ale la turu na mavalolo matea. Ale vao nona tamlohi usuri tolu na vao tamlohi tinapua tavera jea matea la takonahi moiso, la tai na jara tari Judea, Jerusalem ale na pahisa tasi Tyre peresi Sidon, <sup>18</sup> sei la mai vara la rongo na nona retireti, ale matan vara i titiu nařihi na nora rojoa. Ale la haratu sei tanume lumihā sasati mo lo vaira, Iesu mo vaira la mele řuhu. <sup>19</sup> Ale enira mo isoiso la lo vaihitea vara la tikeli Iesu matan suiha tavera mo lo malue isana mo lo titiu nařihi na nora rojoa tari.

*Avulahi Atu God I Pa Silea*  
(Mt 5.1-12)

<sup>20</sup> Iesu mo tařa sahe isana nona tamlohi usuri mo vereia mara,

"Avulahi isamim sei ka tilavono,

matan mauri atu God mo aulu

hinia enia nomim.

<sup>21</sup> Avulahi isamim sei ka lo marohati

nake, matan ha pa masu.

Avulahi isamim sei ka lo tangi

nake, matan ha pa mana.

<sup>22</sup> Avulahi isamim na rani sei tamlohi la řohu hin

kamim,

teni la lo horo kamim,

teni la lo veresatihi kamim,

teni la lo vereleji kamim,

matan ka tamlohi non

Natun Tamlohi.

23 Hin la pongi atu ha pa avulahi tavera, ale ha kuekue na avulahi, matan ka levosahia vara nomim otori na tuka mo tavera jea; matan tuai tamara la vaia sohena moiso isana pŕovet.

*Rani Sasati God I Pa Silea*

24 Pani rani sasati isamim sei ka tavgav,

matan ka lavi na volimim moiso.

25 Rani sasati isamim sei ka lo mana nake, matan ha pa tangtangi ale ha tangi.

26 Rani sasati isamim na rani tamlohi

la vere na retireti ŕuhu matamim,

matan tuai tamara la vaia sohena moiso isana pŕovet haluhalu.

*O Opoi Na Nom Meresahi  
(Mt 5.38-48; 7.12a)*

27 Pani na vere a isamim nakerihi ka lo tapurongo vara ha opoi na nomim meresahi, ha vai na hina ŕuhu isan haratu mo ŕohu hin kamim. 28 Ha leŕuhu hin la haratu la lesati hin kamim, ha usiusi matan la haratu la lo vailehilehi kamim. 29 Isan haratu mo vojahi na esem, o tinaŕihia i mele vojahi na tavalu esem. Ale haratu mo reve naŕihi na nom ruru hamariri, o sopo horoa vara mo opoia vara i reve naŕihi na nom ruru. 30 O silea isana tamlohi tari sei la usia ŕilangi isam, ale isan haratu mo reve naŕihi na nom hinau, o sopo ngurunguru hinia vara i mele sileho hinia. 31 Ale sava ka opoia vara tamlohi la vaia isamim, ha vaia sohena isara.

32 Vara ha opoi la haratu la lo opoi kamim purongo, ka ŕom vara God i pa avulahi hin kamim? Matan tamlohi hehe sohena, la lo opoi la haratu la opoira. 33 Ale

vara ha lo vai na hina ŕuhu isan la haratu la lo vai na hina ŕuhu isamim purongo, ka ŕom vara God i pa avulahi hin kamim? Matan tamlohi hehe sohena la lo vaia sohena. 34 Ale vara ha lo sile na mania isan la haratu sei ko levosahia vara la pa mele spaia, ka ŕom vara God i pa avulahi hin kamim? Matan tamlohi hehe sohena, la lo sile na mania isana tamlohi hehe matan vara la pa mele lavi na spaina tataholo.

35 Pani ha opoi na nomim meresahi, ale ha vai na hina ŕuhu, ha sile na mania vara tea mo usia, ha sopo ŕomŕomia vara ha pa mele lavi na spaina. Matan nomim otori i pa tavera jea, ale kamim ha pa natun haratu mo aulu jea, matan enia mo ŕuhu isan la haratu mo sopo te vere meje isara, peresi la haratu la sasati. 36 Ha ŕomopoia sohena Tamamim mo lo ŕomopoia.

*Ha Sopo Ari Na Tinapua  
(Mt 7.1-5)*

37 Ha isoiso na nomim ari na tamlohi tinapua, ale God i pa sopo ari kamim, ale ha isoiso na nomim sile na talai isana tamlohi tinapua, ale God i pa sopo sile na talai isamim, ha ŕomi na tinapua, ale God i pa ŕomi kamim, 38 ha silesile, ale God i pa sile purongoia isamim, i pa silea i

tavera jea i jeu na řomimim, i pa sařihia, i hutehutehia, ale i lo masurere. Vara ka silea sohena sava, i pa mele silea sohena isamim.”

*O Hase Kilau Na Maurim*

<sup>39</sup> Iesu mo mele verera na titileu matea mara, “Matavuso matea i eři tiroma na matavuso tinapua? Ra levosahia vara la pa jovi hin te koko. <sup>40</sup> Tamlohi usuri matea mo sopo aulu na nona tamlohi vujangi, pani vara i levosahi vevuhi na sava mo lo vujangia, i pa sohen nona tamlohi vujangi atu.

<sup>41</sup> Mata sava ko eři hitevosahi na utauta tapea rihirihia na matan voraim matea, pani ko sopo eři hitevosahi na laho pahai na matam? <sup>42</sup> Mo sohena sava natu ko eři vereaa isan voraim vara, ‘A eři nařihia utauta tapea rihirihia sei na matam!’ pani ko sopo hitevosahi na laho pahai na matam hasem? Ko tapnetano! O nařihia na laho pahai na matam hasem tiroma, ale o pa eři kilau i memera matan vara o eři lanarhihi na utauta tapea rihirihia na matan voraim.

*Vua Vipahai*

*(Mt 7.21-27; 12.34b, 35)*

<sup>43</sup> Mo sopo te pulo vipahai řuhu hatea i eři sile na vua sasati, teni te pulo vipahai sasati i eři sile na vua řuhu, <sup>44</sup> matan, pulo vipahai hatehateahi o eři hitevosahira na vuara. Matan la sopo vu na fig na pahai ngařngařiha, teni la sopo vu na grape na asikauli. <sup>45</sup> Tamlohi řuhu, hina řuhuřuhu na mapuna i pa sile na hina řuhu, tamlohi

sasati, hina sasati na mapuna i pa sile na hina sasati. Matan sava mo tavera na mapu tamlohi, haratu natu i pa malue na jingona.

*Tamlohi Voro Ima Mo Rua*  
*(Mt 7.24-27)*

<sup>46</sup> Mata sava ka lo toviau vara, ‘Moli! Moli!’ pani ka sopo vai na sava na vereaa isamim? <sup>47</sup> Sava tamlohi mo mai isaku, mo rongo na noku reti ale mo vaira, a pa vujangia isamim vara enia mo sohena sava: <sup>48</sup> Enia mo sohena tamlohi matea mo lo voro na ima matea, mo heli na moru mo sivo atano na vatu matan vara i tau na pulo ima hinia. Ale na rani wai tavei mara mo vele, mo sari ima atu, pani mo sopo eři hisuhia matan mo voro mamahunia. <sup>49</sup> Pani haratu mo rongoa pani mo sopo vaia, mo sohena tamlohi matea mo voro na ima na lepa purongo, ale mo sopo te pulona řuhu. Ale wai tavei mara mo vele mo saria, vahatea purongo ima atu mo jovi, ale nona jovi atu mo tavera jea.”

**7**

*Volitusi Matea Mo Mele Ruhu*

*(Mt 8.5-13; Jn 4.43-54)*

<sup>1</sup> Hitahun la nona titileu atu mo vereaa isana tamlohi, mo mele unu Capernaum. <sup>2</sup> Ale slev matea nona captain mata tamlohi vuro nona mara Rome matea mo rojo, mariviti vara i mate. Tamlohi tavera atu mo opoi volitusi atu mo tavera jea. <sup>3</sup> Ale pa captain atu mara mo rongo te hinu matan Iesu, mo řule na

vajiaha Jew hai la vano isana vara la usia vara i efi mai vara i titiu narihi na rojoa non nona volitusi atu. <sup>4</sup> Ale la mai isan Iesu, la lo usia rilangi isana lara, "Tamlohi tavera sei enia tamlohi ruhu matea, mo tataholo vara o tuenia, <sup>5</sup> matan enia mo opoi na noia tamlohi, ale enia natu mo voro na nomam ima lotu."

<sup>6</sup> Ale Iesu mo usurira. Mo pa lo mai mariviti na ima, ale pa captain atu mo rule na tapalana hai la mai isana, la lo lavi na nona reti ale lara, "Moli, o sopo kalvono purongo, matan enau mo sopo tataholo vara o efi unu na imaku. <sup>7</sup> Matan haratu, na sopo hitea vara i tataholo vara enau haseku a mai a usia isam. Pani vara o sile te reti hatea purongo, na levosahia vara noku volitusi i pa mele ruhu. <sup>8</sup> Matan enau sohena, enau tamlohi matea na lo toho na ruhuruhi suiha tamlohi tinapua matea, ale tamlohi vuro hai la lo toho na ruhuruhi suiaku: vara a vereia isan matea vara, 'O vano!' i pa vano, ale isana tinapua vara, 'O mai!' i pa mai, ale vara a vereia isan noku volitusi vara, 'O vai haratu!' i pa vaia."

<sup>9</sup> Iesu mara mo rongo la reti atu, mo mafurahi tavera hin tamlohi atu, ale mo posi vano isan vao atu sei la lo usuria, mo vereia isara mara, "Vararuhu, na vereia vara na sopo lo tapai te tamlohi nike Israel i lavi na rasua sohen tamlohi nike!" <sup>10</sup> Ale na rani la haratu sei tamlohi tavera atu mo lo rulara isan Iesu la mele hilu vano na imana, la

hitea vara pa volitusi atu mo pete ruhu moiso.

### *Uluvou Matea Mo Turu Na Mateia*

<sup>11</sup> Mo sopo tuai usuri haratu, Iesu mo vano na taon matea hijana Nain, ale nona tamlohi usuri peresi na vao tavera matea la lo usuria. <sup>12</sup> Mara mo lo mai mariviti na mataruan taon atu, ale la hutura na tamlohi la lo ali na tamlohi mate matea, mo lo malue na taon, enia vorahese non tinana, ale harai atu enia malepu matea. Vao tamlohi matan taon atu la lo usuria. <sup>13</sup> Ale mara mo hite harai atu, Iesu mo romopoa, ale mo vereia isana mara, "O sopo tangi!" <sup>14</sup> Ale mo vano na vatan tamlohi mate atu, mara mo tau na limana hinia, la haratu la lo alia la turu vahatea. Ale mo vereia mara, "Uluvou, o turu." <sup>15</sup> Moiso, tamlohi mate atu mo sakele, ale mo tapulo retireti, moiso Iesu mo silea isan tinana.

<sup>16</sup> Matahu mo sohoni na tamlohi tari, ale la hasohaso God lara, "Provet aulu matea mo lo turu na livuhaia!" ale lara, "God mo rohi na nona tamlohi!" <sup>17</sup> Ale sorasorahina sei, mo vano asau mo ralihi na jara Judea peresi na jara tari ralihia.

### *John Tamlohi Paptijo (Mt 11.1-19)*

<sup>18</sup> Tamlohi usuri non John tamlohi paptijo, la sorahi la hinou tari sei isana. Moiso John <sup>19</sup> mo tovi na vonara mo rua la mai isana matan vara i rulara la vano isan Moli vara la usia isana vara, "Engko natu haratu sei i pa mai, teni

kama pa lo mele kilau matan te tinapua?"

<sup>20</sup> Ale lara la kau isan Iesu lara, "John tamlohi paptijo mo řule kamam kama mai isam mara, 'Engko natu haratu sei i pa mai, teni kama pa lo mele kilau matan te tinapua?'"

<sup>21</sup> Hin aoa atu, Iesu mo titiu nařihi na rojoa na tamlohi matuvana, ale mo titiu nařihi na tanume sasati matuvana, ale isan la haratu la matavuso mo vaira vara la eři kilau. <sup>22</sup> Ale Iesu mo řaramira mara, "Ha vano ha vere John na sava ka hitea, ale ka rongoa: matavuso la mele kilau, tamlohi papao la hahau, tamlohi lepros la vokevoke, peropero la rongo, haratu la mate la mauri, ale la haratu la tilavono la rongo na Retiruhu. <sup>23</sup> Ale avulahi isan la haratu la pa sopo řohu hiniau hin te rani."

<sup>24</sup> Na rani vahařule non John la mele hilu vano, Iesu mo tapulo retireti isan vao atu matan John mara, "Ka vano na jara tano koru vara ha hite na sava ea? Apo matea langi mo lo serea ea?"

<sup>25</sup> Pani sava natu ka vano vara ha eři hitea ea? Tamlohi matea mo ru na ruru řuhu matea ea? Ka levosahia vara la haratu la lo ru na ruru řuhu jea, la lo toho na jara Supe tavera purongo.

<sup>26</sup> Sava natu ka opoia vara ha hitea ea? Provet matea? Varařuhu, pani na vereia isamim vara enia mo jeu na provet. <sup>27</sup> Sava la ulia tuai matana mo vereia vara,

'Ha kilau nike! Na lo řule na

noku vahařule na nahom,

vara i vai na malelem i roi.' *Mal 3.1*

<sup>28</sup> Varařuhu na vere isamim vara la haratu la vora isana hařai, mo sopo tea i eři lavi na ooloo i jeu John, pani haratu mo hitahu hin mauri atu God mo aulu hinia, enia mo aulu jea mo jeu John."

<sup>29</sup> Na rani tamlohi tari peresi na tamlohi mata lavi na takis la rongo reti nike, la majinga vara sava God mo vaia mo tataholo, matan enira la lavi na paptijo non John moiso, <sup>30</sup> pani Pharisee peresi na tamlohi vujangi mata leu, la řohu na masalon God matara, matan la sopo lavi na nona paptijo.

<sup>31</sup> Iesu mo mele vereia mara, "Na sopo levosahia vara a pa vereia vara tamlohi matan nake la sohena sava?"

<sup>32</sup> La sohena natuvarihi la lo sakele na jara maket la lo uloulo isara hasera lara, 'Kama roro na vete mata lahi, pani ka řohu vara ha velu; ale kama lalavete na vete mata řomsati matea, pani ka sopo tangi.' <sup>33</sup> Matan John tamlohi paptijo mo mai, mo tapuhoro na pereti peresi na waen, ale kara, 'Tanume sasati mo lo toho hinia!'

<sup>34</sup> Ale Natun Tamlohi mo mai, mo hanhani ale mo inu, ale kara, 'Ha to kilaua! Hanhani jea matea, tamlohi drong matea, enia mo tapala peresi na tamlohi la lo lavi na takis peresi na tamlohi hehe!'

<sup>35</sup> Pani o pa eři hitevosahia vara malele lelevosahi non God mo tataholo mata vuana řuhu."

### *Opoia Tavera*

<sup>36</sup> Ale Pharisee matea mo usi Iesu vara i hanhani peresia, ale mo vano mo unu na iman Pharisee atu mo sakele na tep. <sup>37</sup> Ale atu, haʻai malele matea hin taon atu mo levosahia vara Iesu mo lo hanhani na iman Pharisee atu, ale mo lavi na potele matea la vaia na alabaster, hasori ʻruhu mo lo toho hinia, <sup>38</sup> mo turu na haʻina ale mo papaohi mo lo tangi na palona, ale mo tapulo kamoti na wai matana sei la jovi na palona na vuluna, ale mo lo pungosi na palona, mo rengi na hasori hinira.

<sup>39</sup> Pa Pharisee atu sei mo lo usia vara i vano na imana mara mo hite hinau atu, mo vereea isana hasena mara, “Vara tamlohi nike enia pʻrovet matea, i pa levosahia vara sava haʻai nahai mo lo tikelia, matan enia haʻai hehe matea.”

<sup>40</sup> Ale Iesu mo ʻaramia tamlohi atu mara, “Simon, na opoia vara a vereho na hinau matea.”

Ale mo ʻaramia mara, “Tija, o vereea.”

<sup>41</sup> Iesu mara, “Tamlohi matea, tamlohi la lo usi na mania isana moiso la pa mele spaia, tupra rua la ave na mania isaʻa. Matea mo ave na denarii mo ngavulu sangavulu lima, matea mo ave na ngavulu lima. <sup>42</sup> Na rani la sopo eʻi mele spaia, tamlohi atu mo ʻomira mo ʻomaliho hinia. Ale, sahara hinira i pa opoi tamlohi atu i tavera jea?”

<sup>43</sup> Simon mo ʻaramia mara, “Korong haratu sei nona ave

isana mo tavera jea.” Ale Iesu mo vereea isana mara, “Nom kilakilau mo tataholo.”

<sup>44</sup> Moiso mo posi vano isan haʻai atu, ale mo vereea isan Simon mara, “Ko hite haʻai nike? Na unu na imam, ko sopo sileau hin te wai vara a hoje na paloku hinia, pani enia mo hoje na paloku na wai matana, ale mo kamotira na vuluna. <sup>45</sup> Ko sopo

pungosiau, pani mo tapulo hin haratu mo unu, mo sopo lo mapu mata pungosi na paloku. <sup>46</sup> Ko sopo rengi na wel na patuku, pani enia mo rengi na hasori ʻruhu jea na paloku. <sup>47</sup> Matan harihi, na vereea isam, varaʻruhu nona hehe mo matuvana, pani na ʻomira moiso matan nona opoia mo tavera jea. Pani haratu nona hehe mo sopo

maʻivi jea, nona opoia mo sopo tavera.” <sup>48</sup> Ale mo vereea isan haʻai atu mara, “Na ʻomiho mata nom hehe.”

<sup>49</sup> Ale la haratu la lo sakele peresia na tep, la tapulo vereverea isara hasera lara, “Sava tamlohi nahai, matan mo hitea vara i eʻi ʻomi na hehe?”

<sup>50</sup> Mo vereea isan haʻai atu mara, “Nom rasua mo juriho; o vano o toho na tamata.”

## 8

### *Haʻai La Usuri Iesu*

<sup>1</sup> Hitahun haratu Iesu mo lo vano toho na taon tavera peresi na vanua. Mo lo retivujavujangi ale mo lo sile na Retiʻruhu matan mauri atu God mo aulu hinia. Ale la nona tamlohi atu mo sangavulu ʻomana mo rua la lo toho peresia, <sup>2</sup> ale peresi

na hañai hai sei Iesu mo lo titiu nañihi na tanume sasati isara peresi na nora rojoa: Mary la tovia Magdalene, enia natu, tanume sasati mo limaravrua la malue isana, <sup>3</sup> peresi Joanna, naroun Chuza, patu tamlohi mata kilau na iman supe Herod, peresi Susanna, enira peresi na vao matuvana tinapua la lo tueni Iesu peresi na nona tamlohi na nora tavgav purongo.

*Tamlohi Lavo Na Piri*  
(Mt 13.1-9; Mk 4.1-9)

<sup>4</sup> Ale na rani vao tavera la lo tapulo takonahi, ale tamlohi mata taon tari la lo mai isana, moiso Iesu mo vere na titileu matea mara, <sup>5</sup> "Tamlohi hapoñahi piri matea mo vano vara i hapoñahi na piri. Mo lo hapoñahi na piri mo lo vano, tatuara la jovi na malele, ale tamlohi la varasi kosakosahira, ale maji avuavu la hanira. <sup>6</sup> Tatua piri la jovi na vatuvatu, ale na rani la ulua la mele mahoa matan mo sopo te heu i tikelira. <sup>7</sup> Ale tatua piri la jovi na livuha vipahai ngañngañiha, ale vipahai ngañngañiha la punira. <sup>8</sup> Ale tatua piri la jovi na lepa ñuhu, ale la ulua la vua la namaha mo vaha ngavu sangavulu hin la haratu mo lo hapoñahira tiroma. Haratu mo eñi rongovosahia, o tapurongo!"

*Mo Sile Na Titileu Mata Sava*  
(Mt 13.10-17; Mk 4.10-12)

<sup>9</sup> Ale na rani nona tamlohi usuri lara la usia na ñaramin titileu atu, <sup>10</sup> mo vere mara,

"Isamim God mo tinañihia vara ha pa levosahi na hina luhu matan mauri atu God mo aulu hinia, pani isana tamlohi tinapua enia mo lo toho na titileu matan vara Retitapu i pa masese:

'La hite na sava na lo vaia  
pani la pa sopo  
hitevosahia,  
la pa rongo na sava na lo  
verea,  
pani la pa sopo ron-  
govosahia.' Isa  
6.9

*Titileu Atu*  
(Mt 13.18-23; Mk 4.13-20)

<sup>11</sup> Ale ñaramin titileu atu enia nahai: Piri atu enia reti non God. <sup>12</sup> La haratu na malele enira la haratu la rongoa moiso, ale Tiapolo mo mai, mo lanañihi reti atu na mapura matan vara la pa sopo eñi rasua, ale vara la eñi juri hinia. <sup>13</sup> La haratu na vatuvatu enira la haratu la rongo reti atu, la lavia na avulahi. Pani mo sopo te warira, la rasua mata makomo rani purongo, ale na rani vaihite, la jovi. <sup>14</sup> La haratu la jovi na livuha vipahai ngañngañiha enira la haratu la rongo reti atu pani lara la vano, ñomkaka peresi na ñom tavgav peresi na masalo tamlohi mo punira, ale vuara la sopo jea. <sup>15</sup> Pani la haratu la jovi na lepa ñuhu, enira la haratu la rongo reti atu, ale la tauria mo ñilangi na mapura ñuhu na posposi varañuhu, ale la vua peresi na ñomperavu.

*I Pa Sopo Te Hinai I Eñi Luhu*  
(Mk 4.21-25)

16 Mo sopo te tamlohi vara i hasahi na nona lamu matea ale i povia hin te baket teni i taua na ruhuruhu vata matea, mo vono. Pani i pa kehoia aulu na jarana matan vara tea la unu na imana la pa hite na merana. 17 Matan i pa sopo te hinau hatea i efi luhu vara i pa sopo pala, teni te hina luhu vara i pa sopo pala na jara tavera. 18 Ha lo levosahi na sava ka lo rongoa, matan isan haratu mo lavia, i pa mele lavia i tavera jea, ale isan haratu mo sopo te nona, hina purongo vara sava mo romromia vara mo lavi moiso, la pa lanarhia isana."

*Tasin Peresi Na Vetasin Iesu*

(Mt 12.46-50; Mk 3.31-35)

19 Ale tinana peresi na tasina la mai isana, pani la sopo efi mai mariviti isana matan vao tavera atu. 20 Hai la vereea isana lara, "Tinam tolu na tasim la lo turu na jingoima, la opoia vara la hiteho."

21 Pani Iesu mo raramira mara, "Tinaku peresi na tasiku enira la haratu sei la rongoa na reti non God ale la vaia."

*Iesu Mo Savurahi Na Langi*  
(Mt 8.23-27; Mk 4.35-41)

22 Na rani matea mo vele na boti matea tolu na nona tamlohi usuri, ale mo vereea isara mara, "Ra vano tavalu vano na tavalu tasin Galilee." Ale la malue, 23 ale la pa lo vano, ale Iesu mo juruvi romaliho. Ale langi tavera matea mo jovi hin tasi atu, botira mo lo utua, mariviti la pute.

24 Ale nona tamlohi la vano la rohaia lara, "Moli, Moli, ra lo tapulo tihai!" Ale mo turu mo reti savurahi langi atu peresi la leputi tavera atu ale la isoiso mo tamata. 25 Mo vereea isara mara, "Nomim rasua mo lo toho epu?" Ale la matahu la marurahi tavera hinia, la lo vereveera isara lara, "Sava tamlohi nahai? Enia mo reti purongo isana langi peresi na tasi, ale la ooloo hinia!"

*Tanume Sasati Na Mara Gerasenes Matea*

(Mt 8.28-34; Mk 5.1-20)

26 Hitahun haratu la hapan la vano na jara mara Gerasenes, jara atu enia mo lo toho na tavalun Galilee. 27 Iesu mara mo sevuti na jara, tamlohi matea tanume sasati la lo toho hinia mo pala isana. Tuai moiso tamlohi atu mo lo malamala purongo, ale mo sopo toho na lolon te ima pani tarea mo lo toho na jara taptap. 28 Ale pa tamlohi atu mara mo hite Iesu, mo ulo aulu, ale mo mai mo jovi na nahon Iesu mo vereea na leo tavera matea mara, "Engko te nom sava isaku, Iesu Natun God Aulu Jea? Na tangi isam, aah! O sopo vailejilejiau!" 29 Matan mo retileu isan tanume lumiha sasati atu vara i malue hin tamlohi atu. Matan rani mo visa moiso tanume sasati atu mo lo sohoni tamlohi atu. Tamlohi la taurilatia ale la tau na jen na limana peresi na palona, pani mo lo roto la jen atu, ale tanume sasati atu mo tiroma hinia mo lo vano na jara hasetoho.



<sup>30</sup> Iesu mo usia isana mara, “Hijam hare?” Ale mo vereea mara, “Legion!” Hija atu mo vereea matan tanume sasati matuvana jea la lo toho hin tamlohi atu. <sup>31</sup> Ale tanume sasati la tangi isana vara i pa sopo retileu isara vara la sivo hin koko tavera jea atu sei mo sivo atano jea na lolo varama mata mateia. <sup>32</sup> Hin jara atu vao poi matea la lo hanhahi na pahisa vutivuti atu, ale la tanume sasati atu la tangi isana vara i tinañihira la unu hinira, ale mo tinañihira. <sup>33</sup> Ale la tanume sasati atu la malue hin tamlohi atu la unu hin pa vao poi atu, moiso vao poi atu la maro sevuti hin pesapesa atu la jovi sivo na tasi la pute.

<sup>34</sup> Ale tamlohi kilau la poi atu lara la hite hinau atu mo masese, la rovo ale la sorahia na taon tavera peresi na jara řalihi atu. <sup>35</sup> Ale moiso tamlohi la vano vara la hite na sava mo masese, ale la kau isan Iesu la tapai pa tamlohi atu sei tanume sasati la lo malue hinia moiso mo lo sakele na palon Iesu, mo ruru ale řomina mo řuhu moiso, ale la matahu. <sup>36</sup> Ale la haratu sei la lo hite hinau atu la vereea isara sohena sava tanume sasati la malue hin tamlohi atu. <sup>37</sup> Ale tamlohi tari řalihi hin jara atu Gerasenes la usia vara i malue isara, matan matahu tavera mo sohonira. Ale mo mele vele hin pa boti atu ale mo mele hilu. <sup>38</sup> Pa tamlohi atu sei tanume sasati la lo malue isana, mo usia řilangi vara i usuria, pani Iesu mo řulea mara, <sup>39</sup> “O mule, ale o

vereuli na sava God mo vaia matam.” Ale mo vano, mo retivujavujangi na jara tari hin taon tavera atu na sava Iesu mo vaia matana.

*God Mo Lo Kilau Mata Rasua*

(Mt 9.18-26; Mk 5.21-43)

<sup>40</sup> Ale na rani Iesu mo mele hilu, pa vao tamlohi atu la avulahi matan la lo saovia.

<sup>41</sup> Ale hin jara atu, tamlohi matea hijana Jairus mo mai isana, enia tamlohi aulu hin ima lotu atu. Ale mo jovi na palon Iesu mo tangi isana vara i mai na imana, <sup>42</sup> matan venatuna vorahese matea, taunina mo sangavulu řomana mo rua, mariviti i mate.

Ale Iesu mo lo vano, tamlohi la lo tiatia hinia. <sup>43</sup> Ale hařai matea, rojo nona hařai mo lo toho mo tuai isana mata tauni mo sangavulu řomana mo rua moiso, hina purongo vara mo jalahi vevuhi na nona mania isana Doctor, mo sopo tea i eři vai mamahunia. <sup>44</sup> Mo mai na hařin Iesu, ale mo tikeli na revrevu nona ruru, ale vahatea purongo nona rojo mo isoiso.

<sup>45</sup> Ale Iesu mara, “Hare natu mo tikeliau?”

Tamlohi tari lara enira mo vono, ale Peter mara, “Moli, vao nike la porotiho, la lo tiatia isam!”

<sup>46</sup> Pani Iesu mara, “Tamlohi matea mo tikeliau, matan na rongovosahia vara suiha mo malue isaku.” <sup>47</sup> Ale na rani hařai atu mo hitea vara i sopo eři mele luhu, mo mai isana mo savaravara, mo jovi na nahona, ale mo

vereulia na naho tamlohi vara mata sava natu mo tikelia, ale sohena sava Iesu mo vai na nona rojoa mo tihai vahatea purongo. <sup>48</sup> Ale Iesu mo vereia isana mara, "Venatuku, nom rasua mo vaiho ko ruhu; o vano peresi na tamata."

<sup>49</sup> Na rani mo pa lo retireti, volitusi matea na iman tamlohi aulu atu mo mai isan tamlohi aulu atu mara, "Venatum mo tihai moiso; o sopo mele vereia isan Tija sei."

<sup>50</sup> Pani Iesu mara mo rongo hinau atu mo vereia isana mara, "O sopo matahu; o rasuau purongo ale venatum i pa ruhu."

<sup>51</sup> Ale na rani mo mai mo kau na iman pa tamlohi aulu atu, mo sopo tinaŕihia vara tea i unu peresia, pani Peter purongo enia John, James, peresi taman haŕarihi atu enia tinana. <sup>52</sup> Ale tamlohi la lo tangi, ale la lo tangtangi matana, pani Iesu mo vereia mara, "Ha sopo tangi matan enia mo sopo mate, pani mo lo juruvi purongo."

<sup>53</sup> Ale la manaluluhia matan la levosahia vara enia mo mate moiso. <sup>54</sup> Pani mo tauri na limana mo tovia mara, "Natirihi, o turu!" <sup>55</sup> Ale maurina mo mele unu hinia, ale mo turu vahatea. Iesu mo vereia isara vara la silea hin te hinau vara i hania. <sup>56</sup> Ale tamana enia tinana la maŕurahi tavera, pani mo vereia isara vara la sopo mele vere te tamlohi hatea na sava mo masese.

## 9

### *Iesu Mo Rule Na Nona Vahaŕule*

(Mt 10.5-15; Mk 6.7-13)

<sup>1</sup> Ale mo tovi la tupu sangavulu ŕomana mo rua atu la mai jara matea, ale mo silera na suiha vara la aulu na tanume sasati tari, ale vara la eŕi vai na rojoa la tihai, <sup>2</sup> ale mo ŕulera la vano vara la retivujavujangi hin mauri atu God mo aulu hinia, ale vara la vai mamahuni na tamlohi na nora rojoa.

<sup>3</sup> Ale Iesu mo vereia isara mara, "Ha vano lekoleko na malelemim, ha sopo lavi te tihonimim teni te tanga, teni te pereti, teni te mania, ale ha sopo lavi te ruru i rua.

<sup>4</sup> Ale sava ima ka unu hinia, ha lo toho atu i tikeli na rani ka opoia vara ha mele malue hin taon atu. <sup>5</sup> Ale sava jara la ŕohu vara la lavi kamim, vara ka malue hin taon atu, ha saŕsaŕhi naŕihi na tangotango palomim sohena matamata matea matan God mo tipahira."

<sup>6</sup> Nona tamlohi la malue la vano na vanua tari, la retivujavujangi na Retiŕuhu, la vai na rojoa la tihai na jara tari la vano ea.

### *Supe Herod Antipas Mo Romikaka*

(Mt 14.1-12; Mk 6.14-29)

<sup>7</sup> Hin rani atu, Herod Antipas natun supe Herod mo lo tamlohi aulu hin Judea, ale mo rongo la hinau atu la lo masese, ŕomina mo sopo sakele matan hai la lo vereia lara John tamlohi Paptijo mo mele turu na mateia, <sup>8</sup> ale hai lara Elijah mo mele pala, hai tinapua isara lara pŕovet

matan tuai matea mo mele turu.

<sup>9</sup> Herod mara, “Enau na tairoto na patun John moiso, pani sava tamlohi nahai sei na lo rongo na sorasorahina?” Ale Herod mo opoia vara i hitea.

*Mo Vahani Na Vao Tavera Matea*

(Mt 14.13-21; Mk 6.30-44; Jn 6.1-14)

<sup>10</sup> Na rani vahañule non Iesu la mele pala, la vere na hinau tari la vaira isana. Ale mo lavira la malue la vano hasera na taon matea la tovia Bethsaida. <sup>11</sup> La vao atu lara la levosahia, la usuria ale mo avulahi hinira mo vujangira hin mauri atu God mo aulu hinia, ale mo vai na rojoa non la haratu la rojo la tihai. <sup>12</sup> Ravravi mo lo sivo, ale la tupu sangavulu řomana mo rua atu la mai la vereea isana lara, “O řule vao nike la vano la aleale hara hinau peresi na nora jara juruvi na vanua tari hin jara tavera nike, matan řa lo toho na jara hasetoho nahai.”

<sup>13</sup> Pani mo vereea isara mara, “Kamim natu ha silera hin te hinau vara la hania.”

Lara, “Kama lo lavi na pereti mo lima peresi na maji mo rua purongo, avei ko lo vereea vara kama pa vano mata voli te hinau han la tamlohi tari nike?” <sup>14</sup> Matan evi tamlohi purongo korong mo tikeli tari vaha lima (5000) Iesu mo vereea isana nona tamlohi usuri mara, “Ha vaira la sakele tamlohi mariviti i ngavulu lima na vao matea.” <sup>15</sup> Ale la vaia sohena, la vaira enira mo isoiso la sakele. <sup>16</sup> Ale Iesu

mo lavi la pereti atu mo lima peresi la maji atu mo rua, mo taña sahe aulu na tuka mo leřuhu hinira, moiso mo tope la pereti atu mo silea isana nona tamlohi usuri vara la taua na nahon la vao atu. <sup>17</sup> Ale tamlohi tari la hanhani la masu. Ale la takonahi na tanga mo sangavulu řomana mo rua.

*Iesu Enia Kristo*

(Mt 16.13-19; Mk 8.27-29)

<sup>18</sup> Na rani tinapua matea, Iesu mo lo usiusi enia hasena, ale nona tamlohi usuri la lo toho atu, ale mo usia isara mara, “La vao nike la lo vereea lara enau hare?”

<sup>19</sup> Ale la řaramia lara, “John tamlohi paptijo. Pani hai lara Elijah, ale tatuara lara přovet matea matan tuai mo mele turu.”

<sup>20</sup> Moiso mo vereea isara mara, “Pani kamim kara enau hare?” Ale Peter mo řaramia mara, “Engko Kristo non God!”

<sup>21</sup> Ale mo horora vara la sopo mele vere hinau atu isan te tinapua hatea, <sup>22</sup> mara, “Natun tamlohi i pa lavi na rongohaji na hinau matuvana, ale tamlohi aulu hin Israel peresi na Moli mata pñis tolu na tamlohi vujangi mata leu, la pa řohu hinia, la pa vilimateia, ale na hatolu rani i pa mele turu na mateia.”

<sup>23</sup> Ale mo vereea isara mo isoiso mara, “Vara tea mo opoia vara i usuriau, i řohu na masalona, ale i soloti na nona talopeilopei tarea ale i usuriau. <sup>24</sup> Matan sava tamlohi mo opoia vara i hase

juri na maurina, maurina i pa tihai; pani sava tamlohi mo vai tihai na masalona matakū, i pa juri na maurina. <sup>25</sup> Matan sava mo ŋuhu isana tamlohi matea vara i lavi vevuhi na hināu tari na varama, pani hitahu maurina i pa tihai? <sup>26</sup> Matan hare mo mahanuhanu hiniaū peresi na noku reti, Natun Tamlohi i pa mahanuhanu hiniā hin rani atu vara i mai na hasohasona tolu na hasohason Tama peresi na angelo tapu. <sup>27</sup> Pani vararūhu na vereā isamim, vara tatuamim la lo turu nakerihi akerihi la pa sopo hite na mate vavano la hite mauri atu God mo aulu hiniā i pala.”

*La Hite Na Hasohason Iesu*

(Mt 17.1-8; Mk 9.2-8)

<sup>28</sup> Ale korong rani mo limaravtolu mo vano moiso hin la nona retireti atu, Iesu mo lavi Peter, John peresi James la sahe aulu na vutivuti mata usi. <sup>29</sup> Ale mo lo usi, nahona mo posi, ale nona ruru merara la ŋilangi jea mata kilaura. <sup>30</sup> Eh! Tamlohi mo rua la lo retireti peresia, Moses enia Elijah, <sup>31</sup> la pala na hasohaso tavera la lo sorahia na nona malue sei i pa masese Jerusalem i pa sopo tuai.

<sup>32</sup> Ale Peter tolu na tapalana sei la lo toho peresia la malokoloko sati na juruvi, pani mara la hite na hasohasona peresi na tamlohi mo rua la lo turu peresia matara mo ŋilangi. <sup>33</sup> Ale la tamlohi atu lara la lo malue isana,

Peter mo vereā isan Iesu mara, “Tamlohi tavera, mo ŋuhu jea matan kama lo turu akerihi nakerihi. Mo ŋuhu vara kama turuhi te tent i tolu akerihi, nom matea, matea non Moses, ale matea non Elijah!” Pani Peter mo sopo levosahi na sava mo lo vereā. <sup>34</sup> Mo pa lo vere la hināu sei, telangi matea mo jovi tataholo isara, ale matahu tavera mo sohonira matan telangi atu mo hovira.

<sup>35</sup> Ale leo matea mo malue hin telangi atu mara, “Haranike enia Natuku, haratu na viŋonia; ha tapurongo isana!” <sup>36</sup> Leo atu mara mo reti mo isoiso, Iesu hasena mo pa lo toho atu. Ale la nona tamlohi usuri atu la sopo mele verevereā, ale la sopo vere na sava la hitea isan tea hin la rani atu.

*Natun Tamlohi Matea*

(Mt 17.14-21; Mk 9.14-29)

<sup>37</sup> Mo mele rani sahe, lara la sevuti hin vutivuti atu moiso, vao tavera matea mo tapaira. <sup>38</sup> Ale moiso, tamlohi matea hin vao atu mo ulo mara, “Tija, na usia ŋilangi isam vara o mai o hite natuku matan enia vorahese. <sup>39</sup> Tanume sasati matea mo sohonā, ale vahatea purongo mo ngara. Mo lo tuatua hia vavano valval jingona mo lo malue; mo lohilo hi na epena tari, mo ŋohu vara i malue hiniā. <sup>40</sup> Na usia ŋilangi isana nom tamlohi usuri vara la pa titi narihia, pani la sopo eŋi vaia!”

<sup>41</sup> Iesu mo ŋaramia mara, “Kamim mo sopo te nomim rasua, ka pina lejileji, na sopo

levosahia vara a pa toho i tikeli pangisa isamim natu ha pa rongovosahi. O lavi natum i mai!" <sup>42</sup> Mo pa lo mai, tanume lumiha sasati atu mo mele vujahia sivo na lepa, ale mo tuatuhia. Pani Iesu mo savurahi tanume sasati atu, ale mo vai na epena tari la mele űuhu, moiso mo silea isan tamana. <sup>43</sup> Ale tamlohi tari la maűurahi tavera na suiha tavera non God.

*Iesu Mo Mele Retireti Vara I Pa Mate*  
(Mt 17.22-23; Mk 9.30-32)

Pani la pa lo maűurahi na hinau tari sei mo lo vaira, Iesu mo vereea isana nona tamlohi usuri mara, <sup>44</sup> "Ha lo levosahi na sava a pa vereea isamim: i pa sopo tuai la pa tau Natun Tamlohi na lima tamlohi." <sup>45</sup> Pani la sopo levosahi nona reti sei, God mo jorohia isara matan vara la pa sopo eűi rongovosahia, pani la matahu vara la usia na űaramin reti atu.

*Hare Mo Aulu Mo Jeu Na Tinapua*  
(Mt 18.1-5; Mk 9.33-37)

<sup>46</sup> Mo sopo tuai vauriuri matea mo malue isara vara hare isara enia mo aulu jea. <sup>47</sup> Pani Iesu mo levosahi na űomira, mo turu mo lavi na natirihia matea mo taua na pahisana, <sup>48</sup> ale mo vereea isara mara, "Vara tea mo lavi te natirihia sohen harihi na hijaku, enia mo laviau. Ale sava tamlohi mo laviau mo lavi haratu mo lo űuleau. Matan haratu mo atano jea hin kamim, enia natu mo aulu jea."

*Hare Enia Tapalan Iesu?*  
(Mk 9.38-40)

<sup>49</sup> John mo űaramia mara, "Moli, kama hite na tamlohi matea mo lo titiu naűihi na tanume sasati na hijam, ale kama vaihitea vara kama horoa matan enia mo sopo vonamam matea."

<sup>50</sup> Pani Iesu mo vereea isana mara, "Ha sopo horoa, matan haratu mo sopo meresahi isamim enia tatuamim."

*Mara Samaria La Tipahi Iesu*

<sup>51</sup> Rani mo lo mai mariviti vara i sahe na tuka, Iesu mo tau na űomina vara i sahe Jerusalem. <sup>52</sup> Ale mo űule na tamlohi hai la vano tiroma hinia, ale la vano la unu na vanua matea nona mara Samaria matan vara la pa tatamahu matana. <sup>53</sup> Pani la tamlohi atu la űohu hinia matan mo tau na űomina vara i sahe Jerusalem. <sup>54</sup> Ale nona tamlohi usuri sei James enia John lara la rongoa lara, "Moli, ko opoia vara kama usi na hapu na tuka i jovi sivo i sulira?" <sup>55</sup> Pani Iesu mo posi mo reti isara. <sup>56</sup> Ale la malue la vano na vanua tinapua.

*Hare I Pa Usuri Iesu*  
(Mt 8.19-22)

<sup>57</sup> La pa lo vano na malele, ale tamlohi matea mo vereea isana mara, "A pa usuriho vano na sava jara ko vano ea."

<sup>58</sup> Ale Iesu mo vereea isana mara, "Viriu jala enira nora jara juruvi mo lo toho, maji avuavu enira taura, pani Natun Tamlohi mo sopo te nona jara juruvi."

<sup>59</sup> Isana tinapua mo vereea mara, "O usuriau!"

Pani tamlohi atu mara, "Moli, o tinañihiau a vano a tavuni tamaku tako."

<sup>60</sup> Ale Iesu mo vereea isana mara, "O tinañihi la haratu la mate la tavuni na nora mate. Pani engko, o vano, o retivu-javujangi mauri atu God mo aulu hinia."

<sup>61</sup> Ale mele tamlohi tinapua matea mo vereea mara, "A pa usuriho Moli, pani o tinañihia vara a vano a tulahi na tahisaku tako."

<sup>62</sup> Iesu mo vereea isana mara, "Haratu mo sopo tau na řomina i řilangi vara i tikeli na isoisona, mo sopo tataholo vara i unu hin mauri atu God mo aulu hinia."

*1 Ki 19.19-21*

## 10

*Vavahinau Nona Tamlohi Usuri*

<sup>1</sup> Hitahun haratu, Moli mo viřoni na tupu ngavulu limaravrua mo rua tinapua (72), ale mo řulera la vano tiroma hinia, la vano mo rua rua na taon tari peresi na jara sei i pa vano ea i pa sopo tuai. <sup>2</sup> Ale Iesu mo vereea isara mara, "Vua asitauni mo mařivi hajavua pani tamlohi voko enira tupu visalete purongo. Matana, ha usiusi isan Moli mata asitauni vara i řule na tamlohi voko la vano mata vu na nona asitauni.

<sup>3</sup> Ha vano na malelemim; ha lo levosahia vara na lo řule kamim ka lo vano soħena natu sipsip na livuha viriu jala. <sup>4</sup> Ha sopo lavi te tanga korohi, teni te tanga, teni te sabat, ale ha sopo sile na retioloolo isan tea na malele.

<sup>5</sup> Sava ima ka unu hinia, tiroma ha vereea vara, 'Tamata i pa toho hin ima akerihi!'

<sup>6</sup> Ale vara tea hin ima atu mo avulahi hin kamim, nomim leřuhu i pa lo toho isana, pani vara mo vono, i pa mele hilu mai isamim.

<sup>7</sup> Ale ha lo toho hin ima atu purongo, ale ha lavi na sava la silea mata inua peresi na hanhani, matan mo tataholo vara tamlohi voko i lavi na volina. Ha lo juruvi na ima matea purongo.

<sup>8</sup> Vara ka unu na taon matea, ale la lavi kamim, ha hani na sava la taua na nahomim. <sup>9</sup> Ha vai na nora rojoa la tihai, ale ha vereea isara vara, 'Mauri atu God mo aulu hinia mo mai mariviti isamim moiso.' <sup>10</sup> Pani vara ka unu na taon matea, ale la řohu hin kamim, ha sivo na nora malele tavera, ale ha vereea vara, <sup>11</sup> 'Kama sařsařhi nañihi na tangotango nomim taon na palomam soħena matamata matea na nahomim matan ka řohu hin kamam, ale matana, God i pa řohu hin kamim. Ha lo levosahia vara mauri atu God mo aulu hinia mo lo mai mariviti.' <sup>12</sup> Varařuhu na vereea isamim, vara talai non Sodom i pa sopo řilangi i tikeli na talai nona taon soħen harihi na rani mata aria.

*Tamlohi Matuvana Israel La Sopo Rasua*

*(Mt 11.20-24)*

<sup>13</sup> Rani sasati isam Chorazin! Rani sasati isam Bethsaida! Matan vara la hina mařurahi nike sei la vaira isamim la pa lo

vaira hin Tyre enia Sidon, enira la pete posi moiso tuai, la ru na paraparati paki, ale la vuluvului na patmakovi moiso mata nora hehe. <sup>14</sup> Pani talai non Tyre enia Sidon i pa sopo řilangi i tikeli na nomim talai na rani mata aria. <sup>15</sup> Ale engko Capernaum, ko řom vara God i pa taheho o sahe na tuka? I pa tauho sivo atano na varama mata mateia!

<sup>16</sup> Haratu sei mo tapurongo isamim mo tapurongo isaku, ale haratu mo řohu hin kamim mo řohu hiniaiu; ale haratu mo řohu hiniaiu mo řohu hin haratu sei mo lo řuleau."

<sup>17</sup> Hitahu la tupu ngavulu limaravrua mo rua atu la mele hilu mai isan Iesu na avulahi lara, "Moli, tanume sasati sohena, la oloolo hin kamam mata hijam!"

<sup>18</sup> Ale Iesu mo vereia isara mara, "Na hite Setan mo jovi sivo atano sohena vaha na masapa mo sari na varama.

<sup>19</sup> Ha lo levosahia vara na sile kamim na suiha vara ha varasi na mata peresi na novu lepa peresi na suiha tari tinatinapua non Setan matan ha pa aulu hinira mo isoiso, ale i pa sopo te hinau hatelete hinira i eři komo kamim. <sup>20</sup> Varařuhu, pani ha sopo avulahi matan tanume sasati la oloolo hin kamim; pani ha avulahi matan God mo uli na hijamim moiso na tuka!"

*Iesu Mo Vere Meje Isan  
God Tama  
(Mt 11.25-27; 13.16-17)*

<sup>21</sup> Na ranin hinau atu, Iesu mo avulahi na suihan Tanume Tapu ale mara, "Na vere meje isam Tama, Moli matan tuka peresi na varama, matan ko jarohi la hinau nike isana tamlohi lelevosahi peresi na tamlohi rongovosahi, ale ko vujangira isana natuvarihia purongo. Varařuhu Tama, ko avulahi hinia matan mo usuri na masalom řuhuřuhu!"

<sup>22</sup> Tamaku mo sileau na hinau tari, ale mo sopo tea i levosahia vara Natuna enia hare pani Tama purongo, ale mo sopo tea i levosahi Tama pani Natuna purongo peresi na sava tamlohi Natuna mo viřonia vara i vujangia isana."

<sup>23</sup> Moiso mo posi vano isana nona tamlohi usuri mo varavaramasa isara mara, "Avulahi isamim matan ka hite na sava ka lo hitea. <sup>24</sup> Varařuhu na vereia isamim, přovet peresi na supe matuvana la lo kilau vara la hite na sava ka lo hitea, ale vara la rongo na sava ka lo rongoa, pani la sopo rongoa."

### *Retileu Atu Mo Aulu Jea*

<sup>25</sup> Ale na rani matea tamlohi lelevosahi mata leu matea mo turu vara i vaihite Iesu na retiusia matea sohen harihi, "Tija, a pa vai na sava natu, vara a lavi na mauri tui hinia?"

<sup>26</sup> Iesu mo vereia isana mara, "La uli na sava na Leu? Na nom kilakilau mo vereia sohena sava?"

<sup>27</sup> Ale mo řaramia mara, "O opoi Moli nom God vevuhi na mapum, na maurim, na suiham peresi na

řomim'; *Deut 6.5*  
ale, 'O opoi na tahisam sohen  
ko lo opoiho hasem'." *Lev*  
*19.18*

<sup>28</sup> Moiso, Iesu mo vereea  
isana mara, "Ko vereea mo  
tataholo. O vaia sohena, ale o  
pa mauri matana."

### *Hare Enia Tahisaku?*

<sup>29</sup> Tamlohi atu mo opoia  
vara i hasena vaia i tataholo  
na nahon Iesu, ale mo vereea  
isan Iesu mara, "Ale, hare  
enia tahisaku?"

<sup>30</sup> Iesu mo řaramia mara,  
"Ale na rani matea tamlohi  
matea mo tai Jerusalem mo lo  
sivo Jericho, ale tamlohi vili  
na tamlohi mata vavanaho  
hai la tauria la řari nařihi na  
nona ruru, la lavi nařihi na  
nona mania, moiso la vilia la  
pulahia na malele mariviti i  
mate, ale la malue.

<sup>31</sup> Ale mo sopo tuai přis  
matea mo lo sevuti hin  
malele atu mo hitea, pani  
mara mo hite tamlohi atu  
mo hahau pahipahi hinia.

<sup>32</sup> Ale sohen haratu purongo,  
tamlohi voko na Temple  
matea na vaon Levi mara mo  
mai hin jara atu mo hitea,  
ale mo hahau pahipahi hinia.

<sup>33</sup> Pani hitahu, mara Samaria  
matea na nona hahau mo  
mai hin jara atu, ale mara  
mo hitea mo řomopoia. <sup>34</sup> Mo  
rautoho na pahisana, mo  
rengi na wel peresi na waen  
na matara maja, ale mo  
pesira, moiso mo taua aulu  
na haři pulana donki, ale  
mo lingia mo mai na ima  
mapu matea, mo lo kilaua  
atu. <sup>35</sup> Mele rani sahe tamlohi  
atu mo sile na tamlohin  
ima mapu atu na mania mo

tataholo mata voko mata rani  
mo rua mara, 'O lo kilaua,  
ale sava hinau ko jalahia  
matana, a pa mele spaia na  
rani na mele pala nike.' "

<sup>36</sup> Ale Iesu mo usia isana  
mara, "Na řomim, sava tam-  
lohi natu hin la haratu mo  
tolu enia tahisan tamlohi atu  
sei tamlohi vili na tamlohi  
mata vavanaho la tauria?"

<sup>37</sup> Moiso pa tamlohi atu mo  
řaramia mara, "Haratu mo  
řomopoia."

Ale Iesu mo vereea isana  
mara, "O vano o vaia so-  
hena."

### *Martha Enia Mary*

<sup>38</sup> Ale na malelera la lo  
vano Jerusalem, Iesu mo unu  
na vanua matea, ale haři  
matea hijana Martha mo  
avulahi vara i unu na imana.  
<sup>39</sup> Ale vetasina matea hijana  
Mary, mo sakele na palon  
Moli mo lo tapurongo na  
nona vujangi. <sup>40</sup> Pani Martha  
mo tiatia na nona tatamahu,  
ale mo mai isan Iesu mara,  
"Moli, ko sopo řomiau matan  
vetasiku mo rovo hiniau, ale  
enau haseku purongo na lo  
tatamahu? O vereea isana  
vara i mai i tueniau!"

<sup>41</sup> Pani Moli mo řaramia  
mara, "Martha, Martha  
engko ko řomkaka na hinau  
matuvana, <sup>42</sup> pani hinau  
matea mo aulu jea. Mary mo  
viřoni na sava mo mele řuhu  
jea sei tea i pa sopo eři lavi  
nařihia isana."

## 11

### *Vujangi Mata Usiusi* (Mt 6.9-15; 7.7-11)

<sup>1</sup> Ale Iesu mo lo usiusi na  
jara matea, ale mara mo  
isoiso, nona tamlohi usuri



matea mo vereea isana mara, “Moli, o vujangi kamam mata usiusi sohen John tamlohi paptijo mo lo vujangi na nona tamlohi usuri hinia.”

<sup>2</sup> Ale Iesu mo vereea isara mara,

“Vara ka usiusi, ha vereea vara:

God Tama, kama opoia vara tamlohi tari la sile na oloolo tavera isam matan engko ko tapu.

Kama opoia vara nom suiha aulu mata supe i pala.

<sup>3</sup> O sile kamam na hanhani matan nohorihi,

<sup>4</sup> O ŋomi kamam matan nomam hehe sohena kama lo ŋomi na hehe nona tinapua isamam.

O lavi narihi kamam na hina vaihite.”

<sup>5</sup> Ale mo vereea isara mara, “Ra levosahia vara, vara te tapalam mo mai isam na livuha vutepongi ale mo vereea isam vara, ‘Tapala, o eŋi sileau hin te pereti i tolu, ale a pa mele spaia, <sup>6</sup> matan tapalaku matea mo pa pala purongo na nona hahau, ale mo sopo te sope hanhani vara a silea isana.’ <sup>7</sup> Ale na lolo ima o pa ulo isan tapalam na jingoima vara, ‘O sopo vaore, matarua mo pelati ale natuku la lo juruvi peresiau na vata. A sopo eŋi turu vara a sileho hin te hinau.’ <sup>8</sup> Varaŋuhu na vereea isamim, hina purongo vara enia tapalam matea, o pa sopo eŋi turu vara o silea hin te hinau hatea, pani o pa turu vara o sile na sava mo opoia matan mo lo ajiho matana.

<sup>9</sup> Varaŋuhu na vereea isamim, ha usia, ale i pa mai isamim; ha alea, ale ha pa lavutia; ha ŋerengi, ale i pa roi isamim. <sup>10</sup> Matan tamlohi tari sei la usia la lavia, ale haratu mo alea, mo lavutia, ale isan haratu mo lo ŋerengi, pelati i pa roi.

<sup>11</sup> Ale sava tama isamim, vara natuna mo usia na maji matea, i pa turu i sile na mata sasati matea isana, pani mo sopo maji sei mo usia? <sup>12</sup> Teni vara mo usia hin te esile toa, i pa turu i silea na novu lepa? <sup>13</sup> Vara kamim sei ka sasati jea, pani ka levosahia sohena sava vara ha sile na otori ŋuhuŋuhu isana natumim, ha lo levosahia vara God Tama na tuka i pa sile na hinau mo ŋuhuŋuhu jea sohena Tanume Tapu, isan la haratu la usia!”

*Beelzebul Enia Setan*  
(Mt 12.22-30; Mk 3.20-27)

<sup>14</sup> Na rani matea Iesu mo titiu narihi na tanume sasati matea sei mo vai na tamlohi matea mo mengo. Pa tanume sasati mara mo malue, pa mengo atu mo retireti, ale tamlohi la maŋurahi tavera. <sup>15</sup> Pani tatuara lara, “Enia mo lo titiu narihi na tanume sasati na hijan Beelzebul, tamlohi tavera nona tanume sasati!” <sup>16</sup> Ale tatuara, matan la opoia vara la vaihitea, la ajia vara i vai te matamata maŋurahi hatea i tai na tuka.

<sup>17</sup> Pani matan Iesu mo levosahi na ŋomira mo vereea isara mara, “Jara supe tari sei la patumasa na lolora la pa puru, ale patumasa na lolo ima matea i pa aseasera

la jovi. <sup>18</sup> Ale, vara Setan sohena mo lo hase valum isana hasena matan enia mo vaiau na eʻi titiu naʻihi na nona tanume sasati, nona suiha mata supe i pa turu sohena sava? <sup>19</sup> Ale, vara na lo titiu naʻihi na tanume sasati na hijan Beelzebul, hare natu mo lo tueni na natumim na rani la lo titiu naʻihi na tanume sasati? Matan haratu, enira natu la pa nomim tamlohi aria. <sup>20</sup> Pani vara na lo titiu naʻihi na tanume sasati na suihan God, ka levosahia vara mauri atu God mo aulu hinia mo pala isamim. <sup>21</sup> Vara tamlohi suiha matea sei mo tatamahu mata valum, enia mo lo matahi na imana tavera, nona tavgav la pa lo toho i ruhu. <sup>22</sup> Pani vara tea mo mele suiha mo jeua mo mai mo valum peresia, ale mo jeua, enia i pa lavi naʻihi na nona hinahinau mata vuro sei mo lo tau na nona rasua hinira, ale i pa ase na nona tavgav.

<sup>23</sup> Haratu mo sopo turu peresiau enia mo lo turuleji hiniau, ale haratu mo sopo vilevilei peresiau mo lo levuti jalajalai.

*Vujangi Mata Tanume Sasati*  
(Mt 12.43-45)

<sup>24</sup> Vara te tanume lumiha sasati mo malue na tamlohi matea, mo vano ʻalishi na jara hasetoho mo lo aleale nona jara mapu, ale mara mo sopo hite tea mo vereea mara, ‘A pa mele vano na imaku sei na tai ea!’ <sup>25</sup> Ale, mara mo mele mai mo hite imana atu la tivesia, ale la vai mamahunia. <sup>26</sup> Moiso, mo mele vano

mo lavi na tanume lumiha sasati mo limaravrua tinapua sei la sati la jeua, ale la unu hin ima atu ale la lo toho hinia. Ale hitahu, maurin tamlohi atu i pa sati i jeu tiroma.”

<sup>27</sup> Iesu mo pa lo vere la hiniau nike, haʻai matea hin vao atu mo ulo isana mara, “Avulahi isan haʻai atu mo tapeho ale mo kilauho!”

<sup>28</sup> Iesu mo ʻaramia mara, “Avulahi i pa mele ruhu jea isan la haratu la rongo na reti non God ale la hahau hinira.”

*Matamata Non Jonah*  
(Mt 12.38-42; Mk 8.12)

<sup>29</sup> Ale vao atu mara mo lo tavera jea Iesu mo tapulo vereea isara mara, “Pina nike enia pina sasati matea. Mo lo ale na matamata, pani i pa sopo eʻi hite te matamata pani matamata non Jonah purongo. <sup>30</sup> Matan sohen Jonah enia matamata matea isana mara Nineveh, Natun Tamlohi sohena isan pina nike. <sup>31</sup> Ale Vesupe non Sheba i pa turu na rani aria peresi na tamlohin pina nike nake, ale i pa vereea vara talai non pina akerihi mo tataholo, matan enia mo tai na jara asau rove mo sinai vara i tapurongo na lelevosahi non Solomon; pani hiniau matea mo mele aulu jea hin Solomon mo lo toho nike. <sup>32</sup> La tamlohi atu matan Nineveh la pa turu na rani aria peresi pina nike nake, ale la pa vereea vara talai non pina nike mo tataholo, matan enira la posi mata retivujavujangi non Jonah;

pani tamlohi matea mo aulu jea hin Jonah mo lo toho nike nake.

*Malarani Na Maurim  
(Mt 5.15; 6.22-23)*

<sup>33</sup> Mo sopo te tamlohi i hasahi na lamu, vara i taua na jara jarohi matea na lolo ima, teni i taua na ruhuruhun te tanga; pani i pa kehoia na jarana matan vara la haratu la unu na ima la pa hite na merana. <sup>34</sup> Matam enia lamu mata epem. Vara matam mo lo ruhu, epem tari la lo mařivi na mera; pani vara matam mo sati, epem tari la pa mařivi na řořoha. <sup>35</sup> Matan haratu, o lo kilau mamahu vara sava ko lo řom vara enia mera na lolom mo sopo mera vara ruhu pani řořoha. <sup>36</sup> Pani vara epem tari mo mařivi na mera, ale mo sopo te řořoha hinia, i pa mera vevuhi sohena sasarami lamu matea sei mo lo sileho na merana.”

*Iesu Mo Retiřoařoahaira  
(Mt 23.1-36; Mk 12.38-40;  
Lk 20.45-47)*

<sup>37</sup> Iesu mo pa lo retireti, ale Pharisee matea mo usia vara i vano na imana i hanhani peresia, ale mo vano mo sakele na jara hanhani. <sup>38</sup> Pharisee atu mo hutua matan Iesu mo sopo javula tiroma vara i pa hanhani. <sup>39</sup> Ale Moli mo vereia isana mara, “Kamim Pharisee ka lo hoje na paniken peresi na peleti na hařira, pani na lolomim ka mařivi na hanmarua peresi na posposi sasati jea. <sup>40</sup> Kamim ka rongorongono vono! Haratu sei mo lo vai na hařina enia

mo vai na lolona. <sup>41</sup> Pani ha sile na silesilea na avulahi isan la haratu la vejuveju, ale ha pa vokevoke vevuhi na maurimim tari.

<sup>42</sup> Pani rani sasati isamim Pharisee! Matan ka lo sile na sangavulu solat, oke peresi na pere pahai tari, ale ka lo řomřomi purongo na hinau mo aulu na nahon God sohena nomim ariari, ale ka sopo opoi God. Pani i pa mele ruhu jea vara ha vaira enira mo isoiso.

<sup>43</sup> Rani sasati isamim Pharisee! Matan ka opoi na jara sakele nona tamlohi aulu na lolo ima lotu, ale ka opoi vara tamlohi la lo sile na retioloole isamim na jara maket. <sup>44</sup> Rani sasati isamim Pharisee! Matan kamim, ka sohena taptap sei tamlohi la sopo levosahia vara enira taptap, ale tamlohi la hahau aulu hinira pani la sopo levosahia, ale mo vaira la lumia matana.”

<sup>45</sup> Tamlohi lelevosahi mata leu matea hin la haratu la lo turu atu mo řaramia mara, “Tija, sava ko lo vereia ko vai mahanuhanu hin kamam sohera!”

<sup>46</sup> Ale Iesu mara, “Rani sasati sohena isamim tamlohi lelevosahi mata leu! Matan ka tau na tetei puhoni isana tamlohi la sopo eři lavira, ale te vonamim hatea mo sopo vai te hinau hatelete vara i tuenira. <sup>47</sup> Rani sasati isamim! Matan ka voro na matamata mata řomřomi na přovet sei tamamim la vilira. <sup>48</sup> Matan haratu, kamim ka nora tuetueni ale ka majinga na sava tamamim la vaira,

matan enira la vilira ale kamim ka vai na matamata mata ņomņomira na tapura. <sup>49</sup> Matan haratu, God na nona lelevosahi mo vereea mara, 'A pa ņule te pņovet peresi na vahaņule isara, la pa vilimatei te tatuara ale la tipahi te tatuara.'

<sup>50</sup> Matana, ņae pņovet tari sei mo roro mo tapulo na rani vavahinau hin varama nike, God i pa taua na liman pina nike nake, <sup>51</sup> mo tapulo na ņaen Abel mo tikeli na ņaen Zechariah, hara sei mo mate na livuha votavota peresi na jara tapu na Temple. Varaņuhu na vereea isamim, God i pa sile na talai tavera isan pina nike nake.

<sup>52</sup> Rani sasati isamim tamlohi lelevosahi mata leu! Matan ka lo turuhoro na malele tamlohi vara la eņi levosahi God, ale kamim sohena ka sopo levosahi God, ale ka lo turuhoro na tamlohi sei la opoia vara la levosahi God."

<sup>53</sup> Ale Iesu mara mo malue hin jara atu, Pharisee peresi na tamlohi vujangi mata leu, la tapulo area ņilangi, la jinea vara i mele vere te hinau matuvana, <sup>54</sup> la lo sasaovi ņoņo matana vara la eņi tuvaia hin te hinau i pa vereea.

## 12

### *Posposi Tapnetano*

<sup>1</sup> Iesu mo pa lo vano makomona, ale vao tamlohi matuvana la lo takonahi la tiatia hajavua la lo tapulo turu aulu hinira hasera, ale Iesu mo tapulo vereea isana nona tamlohi usuri mara, "Ha lo kilau mata isi nona

Pharisee, isi sei enia posposi tapnetano. <sup>2</sup> Mo sopo te hinau vara la jarohia i pa sopo pala, teni te hina luhu vara la pa sopo levosahia. <sup>3</sup> Matan haratu, sava ka vereea na ņoņoha, la pa rongoa na malarani, ale sava ka varavaramasa hinia na jara luhu, la pa vereulia na jara tavera.

### *Retiņoaoņoahai Matea (Mt 10.28-31)*

<sup>4</sup> La tapalaku, varaņuhu na vereea isamim vara ha sopo matahuni la haratu la lo vilimatei na epemim, pani hitahu la sopo eņi mele vai te hinau tinapua. <sup>5</sup> Pani a pa retiņoaoņoahai kamim hin haratu vara ha pa matahunia: ha matahuni God sei matan enia mo lo tauri na suiha vara i vilimatei kamim, ale i eņi pulahi kamim na moruhapu. Enia natu ha pa matahunia!

<sup>6</sup> Tamlohi tari nike isaņa la levosahia vara ha eņi voli te vakarakara i lima na sellen mo rua purongo, pani God mo sopo ņomaliho hin te hatelete. <sup>7</sup> Vulumim hatehateahi na patumim sohena, God mo sopo ņomaliho hin te hatelete. Ha sopo matahu matan kamim ka mele aulu jea na vakarakara matuvana na nahon God.

### *Ha Sorahi Iesu Isana Tina- pua*

#### *(Mt 10.32-33; 12.32)*

<sup>8</sup> Ale na vereea isamim vara te vonamim hatea i vereea vara enia noku na naho tamlohi, Natun Tamlohi sohena i pa vereea vara enia nona na naho angelo non God, <sup>9</sup> pani

haratu mo vunvunia vara enia noku na naho tamlohi, enau a pa vunvunia vara enia noku na naho angelo non God. <sup>10</sup> Ale tamlohi tari sei la lo veresatihi Natun Tamlohi, God i pa řomira, pani haratu mo veresatihi Tanume Tapu, God i pa sopo řomia.

<sup>11</sup> Ale na rani vara tamlohi la lavi kamim na lolo nora ima lotu, teni na naho tamlohi aulu peresi la haratu la lo tauri na suiha, ha sopo řomkaka vara ha pa řaramira sohena sava teni vara ha pa vere na sava, <sup>12</sup> matan Tanume Tapu i pa vujangi na sava ha pa vere a hin rani atu."

### *Haratu La Sopo Romřomi God*

<sup>13</sup> Tamlohi matea hin vao atu mo vere a isana mara, "Tija, o vere a isan voraiku vara i ase na korun tamam peresiau." <sup>14</sup> Pani Iesu mo vere a isana mara, "Tapala, na sopo sinai matan vara a ari teni a ase na nomim hinahinau." <sup>15</sup> Ale Iesu mo vere a isara mara, "Ha lo kilau, ha toho asau na posposi tari mata marohati na hinau mo sopo te nomim, matan mauri varařuhu enia mo sopo na sava nakonako ka lo lavira."

<sup>16</sup> Ale mo vere na titileu matea isara mara, "Tamlohi tavgav matea, isana la jea la matuvana hajavua i sopo eři vaira, <sup>17</sup> ale mo lo hase řomřomia mara, 'A pa vai na sava natu, matan mo sopo te jara vara a pa tau mamahuni la vua isaku nike hinia?' <sup>18</sup> Ale mara, 'Ale! Na levosahi na hinau matea a

pa vaia, a pa kauti nařihi la noku pea nike, ale a mele vorora la mele tavera jea, ale a pa takonahi na vua isaku peresi na noku hinahinau hinira. <sup>19</sup> Ale a pa vere a isaku haseku vara, 'Engko nom hinau řuhu mo mařivi, ko takonahira la eři toho mata tauni matuvana: o mapu, o hanhani, o inu ale o avulahi.'

<sup>20</sup> Pani God mo vere a isana mara, "Tamlohi rongorongono vono! Hin vutepongi akerehi purongo, a pa nařihi na maurim, ale la hinau sei ko lo tatamahunira la pa sopo řuhu matan te hinau isam."

<sup>21</sup> I pa sohena isan haratu sei mo lo takonahi na nona tavgav mata masalona, pani mo sopo řomřomia vara i tapala řuhu peresi God."

### *Ha Sopo Romkaka (Mt 6.25-34)*

<sup>22</sup> Ale Iesu mo vere a isana nona tamlohi usuri mara, "Matan haratu, na vere a isamim, ha sopo řomkaka mata maurimim vara sava ha pa hania, teni na epemim vara sava ha pa rua. <sup>23</sup> Matan mauri mo aulu jea, mo jeu na hanhani, ale epemim mo aulu jea, mo jeu na ruru. <sup>24</sup> Ha to řomřomi na maji avuavu, enira la sopo lavo teni la sopo vu, ale mo sopo te nora jara tatamahu teni te pea, pani God mo lo vahanira. Ka levosahia vara na nahon God kamim ka mele aulu jea na maji avuavu! <sup>25</sup> Ale sava tamlohi isamim na nona řomkaka i eři vai na maurina i mele peravu matan te aoa hatea? <sup>26</sup> Ale vara ha sopo eři vai

te hina rihirihī hatea sohen haratu, mata sava natu ka lo ŋomkaka na hinau tari?

<sup>27</sup> Ha to ŋomŋomi na lili wai sohena sava la lo ulua, la sopo voko, la sopo tulai na nora ruru, pani na vereā isamim vara ruru ŋuhuŋuhu non Solomon na nona tavgav tavera, la sopo ŋuhu sohena ruru non te lili wai hatea. <sup>28</sup> Pani vara God mo ru na ŋuvuŋuvu matan nahapani purongo, pani pavuho mo mahoa, ale la pulahia na hapu, mo sohena sava, ka ŋom vara God i pa sopo ruru kamim? Kamim akerihī, nomim rasua mo rihirihī hajavua! <sup>29</sup> Ale ha sopo ale na sava ha pa hania teni na sava ha pa inua, teni ha lo ŋomkaka. <sup>30</sup> Matan la haratu la sopo levosahi God la lo ale la hinau atu, pani Tamamim mo levosahia vara ka opoira. <sup>31</sup> Pani ha ale mauri atu sei God mo lo silea sei enia mo supe hinia, ale enia i pa sile na hinau tinapua sei ka opoira peresia isamim.

*Hinau Atu Na Tuka*  
(Mt 6.19-21)

<sup>32</sup> Natuvarihi, ha sopo matahu, matan Tamamim enia mo avulahi tavera vara i sile kamim hin mauri atu enia mo supe hinia. <sup>33</sup> Ha haŋehi na nomim hinahinau, ale ha silesile isan la haratu la vejuveju hin te hinau. Ha vai na nomim tanga korohi sei la pa sopo eŋi ŋovo hin te rani la maŋivi na tavgav matan tuka sei la pa lo toho tui tui ea. Mo sopo te tamlohi vavanaho ea teni te majmaj vara i eŋi komora atu. <sup>34</sup> Matan sava jara nomim tavgav la lo toho

ea, mapumim sohena la pa lo toho atu.

*Ha Tatamahu Tarea*  
(Mt 24.45-51)

<sup>35</sup> Ha tatamahu matan Moli, ale ha vai na nomim lamu la lo hani, <sup>36</sup> ale ha sohena tamlohi sei la lo saovi nora moli vara i pa mele mule na hanhahi lahi matea matan vara la eŋi roi na matarua isana vahatea na rani mo pala ale mo ŋerengi. <sup>37</sup> Avulahi tavera isana volitusi tari vara nora moli mo tapaira la pa lo kilau na rani mo pala. Varaŋuhu na vereā isamim vara na nona avulahi tavera, moli atu i pa ru na ruru nona volitusi, ale i verera vara la sakele na jara hanhahi, moiso i pa lavi na hara hinau i silea isara. <sup>38</sup> Vara mo pala na livuha vutepongi teni na toa tarere ale mo tapaira la pa lo kilau, la volitusi atu la pa avulahi tavera.

<sup>39</sup> Pani ha lo levosahi harihi: vara moli mata ima i pa lo levosahia vara sava rani tataholo tamlohi vavanaho i pa pala hinia, i pa sopo malue na imana vara tamlohi vavanaho i eŋi unu na imana. <sup>40</sup> Kamim sohena, ha lo tatamahu, matan Natun Tamlohi i pa mai na rani ka ŋom vara i pa sopo mai hinia."

<sup>41</sup> Ale Peter mara, "Moli, ko lo vere titileu nike nomam purongo teni nona tamlohi tari?"

<sup>42</sup> Ale Moli mo vereā mara, "Hare natu enia patu tamlohi lelevosahi matea sei mo lo turu ŋilangi tarea mata kilau na iman nona moli? Ale nona moli mo taua mo aulu

na imana matan vara i vahani na nona volitusi mata imana na rani hanhani tataholo. <sup>43</sup> Avulahi tavera isan volitusi atu vara nona moli mo tapaia mo lo vaia sohena na rani mo pala. <sup>44</sup> Varaʻuhu na vereā isamim vara moli atu i pa tau volitusi atu i aulu na nona hinahinau tari. <sup>45</sup> Pani vara volitusi atu mo hase vereā isana vara, 'Noku moli mo sopo mai vila!' Ale mo tapulo tamaji na volitusi haʻrai peresi na lamane, ale mo hanhani ale mo inu mo drong, <sup>46</sup> moli non volitusi atu i pa pala na rani mo sopo ʻrom vara i pa pala hinia na aoa matea mo sopo levosahia, moiso i pa sile na talai tavera jea isana, ale i pa taua peresi la haratu la sopo ʻruhu. <sup>47</sup> Ale sava volitusi sei mo levosahi na masalon nona moli pani mo sopo tatamahu teni mo sopo vavahinau usuri na masalon nona moli, enia i pa lavi na talai ʻrilangi.

<sup>48</sup> Pani isan volitusi sei mo sopo levosahia vara mo vai na hinau mo sopo tataholo, nona talai i pa sopo ʻrilangi. Isana tamlohi tari sei God mo tau na hinau matuvana na limara, God mo lo kilau mata hinau matuvana jea la pa tai isara.

*Patumasa Matan Rasua Hin Iesu*  
(Mt 10.34-36)

<sup>49</sup> Na sinai vara a pulahi na hapu na varama mata ase na tamlohi vara hare i pa toho jejeu, ale na opoia jea vara mo lo tapulo hani moiso. <sup>50</sup> A pa lavi na pap-tijo sasati matea mo lo toho na nahoku, ale enia tetehi

puhoni matea moiso isaku, ale i pa sohena i tikeli rani atu na lavi vevuhia. <sup>51</sup> Ka ʻrom vara na sinai matan vara a sile na tamata na varama? Mo vono, pani vara a sile na patumasa. <sup>52</sup> Matan mo tapulo nakerihi mo lo vano, vao ima matea tamlohi mo lima la pa patumasa, mo tolu la pa meresahi hin mo rua, ale mo rua la pa meresahi hin mo tolu. <sup>53</sup> La pa patumasa, tamana i pa meresahi isan natuna, natuna isan tamana, ale tinana i pa meresahi isan venatuna, ale venatuna isan tinana, haʻrai i pa meresahi isan tinan tuana, ale tinan tuana isan naroun natuna."

*Ha Hitevosahi Na Hinau Non God*

(Mt 16.2-3; 5.25-26)

<sup>54</sup> Ale Iesu mo vereā isan vao atu mara, "Vara ka hite na telangi matea mo lo vele Marino, ka vereā vahatea vara, 'Usa matea mo lo mai.' Ale mo pala sohena. <sup>55</sup> Ale vara ka hite na langin tahuna mo lo sere kara, 'Alo i pa tutuni sati!' Ale mo pala sohena. <sup>56</sup> Ka tapnetano! Ka levosahia vara ha eʻri vereā vara i pa sohena sava na sava ka lo hitera na varama peresi na masapa, pani mata sava natu, ka sopo eʻri vereā vara sava rani nahai ʻra lo toho hinia nake?

<sup>57</sup> Ale mata sava natu ka sopo eʻri hase hitevosahi na sava mo tataholo? <sup>58</sup> Vara ko lo vano na court, ale i pa mele ʻruhu vara o tapai haratu mo lo tau kamim na court na malele tako, ale o vaihitea vara o vai tataholoi hinau atu

peresia tiroma; vara i vono, o pa turu na nahon tamlohi aria, ale i pa ariho o vano na lima tamlohi ima řilangi, ale i pa tauho na ima řilangi. <sup>59</sup>Varařuhu na vereia isam, o pa sopo eři malue vavano o voli vevuhi na nom ave tari.”

### 13

<sup>1</sup> Hin pongi atu, tamlohi hai la lo toho atu, la vereia isan Iesu lara Pilate mo vilimatei na mara Galilee hai hin rani atu la lo sile na nora malamalai na Temple, ale řaera mo hoi peresi na řae nora malamalai. <sup>2</sup> Ale mo řaramira mara, “Ka řom vara la mara Galilee atu la hehe mo jeu na mara Galilee tinapua matan la lavi na mateia sohena teni mo vono? <sup>3</sup> Mo vono, pani na vereia isamim vara ha sopo posi, kamim mo isoiso ha pa tihai sohera. <sup>4</sup> Teni la tupu sangavulu řomana mo limaravtolu atu sei taoa matan Siloam mo jovi mo vilimateira, ka řom vara enira la hehe mo jeu na tamlohi tari tinatinapua sei la lo toho Jerusalem? <sup>5</sup> Mo vono, pani na vereia isamim, vara ha sopo posi, kamim sohena ha pa tihai sohera.”

#### *Vipahai Pulo Fig Matea*

<sup>6</sup> Ale Iesu mo vere titileu akerihi mara, “Tamlohi matea mo lavo na pulo fig matea na isana, ale mo mai mo aleale vuana pani mo sopo hite tea. <sup>7</sup> Ale mo vereia isan nona tamlohi voko mata isa mara, ‘Ko hitea, na mai tauni mo tolu moiso vara a hite te naman pulo fig akerihi

ale na sopo hite tea. O tai jovia. Mo lo turuhoro na jara purongo.’

<sup>8</sup> Ale mo řaramia mara, ‘Tamlohi tavera, o mele tinarihia hin tauni akerihi, a pa heli řalihia, ale a pa tau na te buluk i řalihia. <sup>9</sup> Ale tavalu tauni korong i pa vua, vara i sohena mo řuhu, pani vara mo vono, o eři tai jovia.’ ”

#### *Iesu Mo Vavahinau Na Sabbath*

<sup>10</sup> Na rani matea Iesu mo lo vujangi na ima lotu matea atu na Sabbath. <sup>11</sup> Ale hařai matea tanume sasati matea mo vai na hařina mo hoho mata tauni mo sangavulu řomana limaravtolu. Hařina mo hoho ale i sopo eři turu tataholo. <sup>12</sup> Na rani Iesu mo hitea, mo usia mo mai isana, mo vereia isana mara, “Hařai, engko ko materi na nom rojoa.” <sup>13</sup> Ale mo tau na limana hinia; ale vahatea purongo hařina mo tataholo, ale hařai atu mo hasohaso God.

<sup>14</sup> Pani patu tamlohi mata ima lotu atu mo lolokoru matan Iesu mo vai na rojoa mo tihai na Sabbath, ale mo vereia isana tamlohi mara, “Rani mo limarave la lo toho mata vavahinau hinira. Ha sinai hin la rani atu mařan vara i vai na nomim rojoa la tihai, mo sopo na rani Sabbath.”

<sup>15</sup> Moiso Moli mo řaramia mara, “Kamim ka tapnetano! Na levosahia vara kamim hatehateahi ka lo uli narihi na pulamim buluk teni donki na nora jara juruvi hin te Sabbath, ale ka lavia vano vara i inu te wai. <sup>16</sup> Ale



ka ŋomi vara mo tataholo teni mo vono vara haŋai akerihi venatun Abraham matea sei Setan mo lihoa mata tauni mo sangavulu ŋomana limaravtolu moiso, vara i eŋi materi na nona rani ŋilangi na Sabbath?" 17 Ale mara mo lo vere la hinau atu, nona meresahi tari la mahanuhanu, ale tamlohi mo isoiso la avulahi na hina ruhuŋuhu tari sei mo lo vaira.

*Vujangi Mata Piri Paka*  
(Mt 13.31-33; Mk 4.30-32)

18 Moiso Iesu mo vereaa mara, "Mauri atu God mo aulu hinia mo sohena sava? A pa vereaa vara mo sohena sava hinau? 19 Mo sohena piri paka matea tamlohi matea mo lavia mo pulahia purongo, ale mo ulua mo mai vipahai tavera matea; ale maji avuavu la lo vai na taura na rangarangana."

*Vujangi Mata Isi*

20 Ale mo mele vereaa mara, "A pa mele vereaa vara mauri atu God mo aulu hinia mo sohena sava hinau? 21 Enia mo sohena makomo isi sei haŋai matea mo lavia mo hoia na paki flaua matea vavano isi mo vaia mo sosohi vevuhi."

*Hare I Pa Juri*

(Mt 7.13-14, 21-23)

22 Iesu na nona hahau mo unu ŋole na taon peresi na vanua mo lo vujangi, ale mo hahau mo lo vano Jerusalem. 23 Ale tamlohi matea mo vereaa isana mara, "Moli, la haratu sei la pa juri, enira i pa tupu visalette purongo?" Ale mo vereaa isara mara, 24 "Ha vaihitea vara ha eŋi unu hin matarua rihirihia atu. Matan na vereaa, vao tavera la pa

opoia vara la unu pani la pa sopo eŋi vaia. 25 Na rani tamlohi tavera mata ima mo turu mo pelati na matarua, ale kamim na jingoima ka tapulo ŋerengi na pelati kara, 'Moli, o roi isamam!' Ale i pa ŋarami kamim vara, 'Na sopo levosahia vara ka tai epu!' 26 Moiso ha pa tapulo vereaa isana vara, 'Pani kamam kama lo hanhani, ale kama lo inu peresiho, ale engko ko lo vujangi na malele tavera na nomam taon.' 27 Pani i pa vereaa vara, 'Na vereaa isamim, na sopo levosahia vara ka tai epu! Ha malue na nahoku, kamim tamlohi lejileji!'

28 Na jara talai, la pa tangtangi ale la pa naŋnaŋori na huŋura na rani la hite Abraham, Isaac, Jacob peresi na pŋovet tari hin mauri atu God mo aulu hinia, pani kamim ka hase horo kamim hinia. 29 Ale tamlohi la pa tai Opae, Marino, Tahuna peresi Auta, ale la pa sakele na jara hanhani hin mauri atu God mo aulu hinia, ale la pulahi kamim. 30 Ale ha lo levosahia vara, tatuara sei la lo hitahu nake, la pa tiroma, ale tatuara la lo tiroma nake, la pa hitahu."

*Iesu Mo Tangi Matan Jerusalem*

31 Tataholo hin rani atu, Pharisee hai la mai la vereaa isana lara, "O rovo nike, matan Herod mo opoia vara i vilimateiho."

32 Ale Iesu mo vereaa isara mara, "Ha vano ha vereaa

isan pusi atu vara, 'O levosahia vara nohorihi peresi pavuho enau a pa titiu narihi na tanume sasati, ale a pa vai na rojoa la tihai, ale na hatolu rani a pa isoiso na maleleku. <sup>33</sup> Hina purongo, a pa vano na maleleku nohorihi, pavuho peresi pongi tolu, matan i pa sopo tataholo vara p̄ovet matea i mate na jingoiman Jerusalem!'

*Iesu Mo Tangisi Jerusalem  
(Mt 23.37-39)*

<sup>34</sup> Jerusalem, o Jerusalem, taon tavera sei mo vilimatei na p̄ovet, ale mo paru la haratu God mo řulera isana. Vaha visa moiso na opoia vara a takonahi na natum jara matea sohena toa hafai matea mo hovi na natuna na ruhuru hapana, pani ko řohu! <sup>35</sup> O lo levosahia vara imam mo puru! Ale na vereaa isam vara engko o pa sopo mele hiteau i tikeli rani atu o pa vereaa vara, 'Avulahi isan haratu mo lo mai na hijan Moli!' " *Psa 118.26*

## 14

*Iesu Mo Vai Na Rojoa La  
Tihai*

<sup>1</sup> Na Sabbath matea, Iesu mo vano na ima tamlohi aulu matea na vao Pharisee, ale la tamlohi atu la lo kilau řořoia. <sup>2</sup> Ale tamlohi purapura matea mo lo toho atu na nahon Iesu. <sup>3</sup> Iesu mo usi na Pharisee peresi na tamlohi lelevosahi mata leu mara, "Mo tataholo vara tea i vai na rojoa i tihai na Sabbath teni mo vono?" <sup>4</sup> Pani la sakele tapnono. Moiso Iesu mo tauri tamlohi atu mo vai

na nona rojoa mo tihai, ale mo řulea mo vano. <sup>5</sup> Moiso mo usia isara mara, "Vara te vonamim hatea te natuna teni pulana buluk hatea mo jovi sivo atano hin te moru wel matea na rani Sabbath matea; hare natu i pa sopo reve narihia vila?" <sup>6</sup> Ale enira la sopo eri řarami la hinau nike.

*Vujangi Mata Posposi  
Romatano*

<sup>7</sup> Ale Iesu mo vere na titileu matea isan la haratu sei la usira la mai atu, matan mo hitea sohena sava la lo hase viřoni na jara sakele řuhu atu na tep, ale mo vereaa isara mara, <sup>8</sup> "Na rani tamlohi matea mo usiho vara o mai na hanhani lahi, o sopo sakele na jara řuhu tako, matan ko sopo levosahia vara tamlohi lahi atu mo usi te tamlohi aulu tinapua mo aulu hiniho teni mo vono, <sup>9</sup> ale haratu mo lo usi kamim tupra rua sei i pa mai isam i vereaa vara, 'O sile na masapam isan tamlohi akerihi!' Ale o pa mahanuhanu o sivo na jara sakele atano.

<sup>10</sup> Pani vara la usiho, o vano o sakele na jara sakele nona tamlohi purongo tiroma, matan vara tamlohi lahi atu vara i mai isam i vereaa vara, 'Tapala, o juha o sahe na jara matea mo mele řuhu!' Moiso, matan haratu o pa lavi na ololo na naho tamlohi tari sei la lo sakele hin jara hanhani atu peresiho. <sup>11</sup> Matan tamlohi tari sei la hase taura aulu, God i pa taura atano, haratu mo hase

taua atano, God i pa taua aulu.”

<sup>12</sup> Iesu mo mele vereea isan tamlohin ima atu mara, “Vara o vai na hanhani teni te hanhani tavera hatea, o sopo usi te tapalam teni te voraim, teni te tahisam teni la haratu la taytav sei la lo toho mariviti isam, matan enira la pa mele usiho na imara matan vara la mele vaia sohena isam. <sup>13</sup> Pani vara o vai na hanhani tavera, o usi na tamlohi tilavono, haratu la kuti, haratu la papao peresi na matavuso, <sup>14</sup> ale God i pa leʻuhuhu hiniho matan enira la sopo eʻfi mele spaia. God i pa voliho na rani mata sauteterahi na tamlohi tataholo.”

### *Hanhani Tavera Nona Supe Matea*

*(Mt 22.1-10)*

<sup>15</sup> Moiso, tamlohi matea mo lo sakele peresi Iesu hin tep atu, mara mo rongo la hinau nike, mo vereea isan Iesu mara, “Avulahi isana tamlohi tari sei la pa hani pereti atu hin mauri atu God mo aulu hinia!”

<sup>16</sup> Pani Iesu mo vereea isana mara, “Na rani matea tamlohi tavera matea mo vai na hanhani tavera matea, ale mo usi na tamlohi matuvana la mai hinia. <sup>17</sup> Ale hin rani mata hanhani tavera atu mo ʻrule na nona volitusi isan la haratu mo usira moiso vara i vereea isara vara, ‘Ha mai matan hinau tari la tatamahu moiso!’ <sup>18</sup> Pani enira mo isoiso la tapulo posi na ʻromira. Tiromara mo vereea isana mara, ‘Na voli na lepa matea, ale a pa vano vara a hitea. O vereea vara

a pa sopo mai.’ <sup>19</sup> Ale mele tinapua mo vereea mara, ‘Na voli na buluk mo sangavulu, ale a pa vano vara a lo kilau usurira. O vereea vara a pa sopo mai.’ <sup>20</sup> Ale mele tinapua mo vereea mara, ‘Na pa lahi na narouku matea, ale matan haratu a sopo eʻfi mai.’

<sup>21</sup> Ale volitusi atu mo mai mo vere la hinau sei isan nona tamlohi tavera. Moiso tamlohi tavera atu mata ima mo lolokoru, ale mo vereea isan nona volitusi mara, ‘O vano vila na malele tavera peresi na malele vavarihi hin taon tavera nike, ale o lavi la haratu la tilavono, haratu la kuti, haratu la matavuso peresi la haratu la papao.’ <sup>22</sup> Ale volitusi atu mo vereea mara, ‘Tamlohi tavera, sava ko retileu hinia na vaia moiso, ale masapa mo pa lo toho na lolo ima.’

<sup>23</sup> Ale tamlohi tavera atu mo vereea isan nona volitusi atu mara, ‘O vano asau na malele tavera peresi na pahisa malele, ale o haluhalu na tamlohi tari vara la mai la unu, matan na opoia vara imaku i maʻrivi. <sup>24</sup> Matan na vereea isamim, i pa sopo te vonan te tamlohi atu na lo usira tiroma moiso vara la pa eʻfi hatiʻoro hin te hinau hatea hin noku hanhani tavera nike.’ ”

### *Ha Opoi God Ale Ha Usuri Iesu*

*(Mt 10.37-38)*

<sup>25</sup> Tataholo hin rani atu, vao tavera la lo toho peresia, ale Iesu mo posi mai isara mo vereea isara mara, <sup>26</sup> “Vara tea mo mai isaku, pani mo

sopo ŋohu hin tamana peresi tinana peresi na natuna, peresi na voraina peresi na vevoraina, teni mo sopo ŋohu na maurina hasena, enia i pa sopo eŋi mai noku tamlohi usuri. <sup>27</sup> Sava tamlohi mo sopo soloti na nona talopeilopei ale i usuriau, enia i pa sopo eŋi mai noku tamlohi usuri.

<sup>28</sup> Matan sava tamlohi isamim natu, vara mo opoia vara i voro na ima aulu matea mata kilau vano asau, mo sopo sakele tiroma matan vara i evia vara nona mania mo tataholo mata i eŋi voro vevuhi ima aulu atu mata kilau vano asau teni mo vono? <sup>29</sup> Vara i vono, vara mo tau na pulona, pani mo sopo eŋi voro vevuhia, tamlohi tari sei la hitea la pa lo kerehia matana, <sup>30</sup> lara, ‘Tamlohi akerihi mo tapulo voro, pani mo sopo eŋi vaia vevuhia!’

<sup>31</sup> Teni, sava supe natu, mo vano vara i vai na vuro peresi na supe tinapua matea, mo sopo sakele tiroma matan vara i hitea vara la nona tamlohi vuro atu tupu tari vaha sangavulu (10,000) vara la ŋilangi mata la turuhoro supe atu sei mo lo mai peresi na nona tamlohi vuro tupu tari vaha sangavulu rua (20,000).

<sup>32</sup> Vara mo vono, i pa ŋule te tamlohi la vano isan nona meresahi atu vara mo pa lo toho asau vara la usia hin te malele mata i sari tamata. <sup>33</sup> Matan haratu, te vonamim i sopo eŋi mai noku tamlohi usuri vara mo sopo tinaŋihi na nona hinahinau tari.

*Solo Peresi Na Malarani*  
(Mt 5.13; Mk 9.50)

<sup>34</sup> Niu la saoroia enia mo ŋuhu, pani vara mo sopo mele te ngaŋpulu hinia, ngaŋpulu i pa mele sivo hinia sohena sava? <sup>35</sup> Jamana mo sopo mele ŋuhu mata ŋavao peresi te hinau. La pa pulahia purongo. Haratu mo eŋi rongovosahia, o tapurongo!”

## 15

*Sipsip Atu Mo Jalio*  
(Mt 18.12-14)

<sup>1</sup> Moiso tamlohi lavi na mania mata takis peresi na tamlohi hehe, la lo mai isana vara la rongoa. <sup>2</sup> Pani Pharisee peresi na tamlohi vujangi mata Leu la lo reti vavarihi lara, “Tamlohi akerihi mo lo pulutahi peresi na tamlohi hehe, ale mo lo hanhani peresira.”

<sup>3</sup> Ale Iesu mo verera hin titileu akerihi mara, <sup>4</sup> “Hare isamim, vara pulana sipsip mo tikeli mo ngavulu sangavulu (100) vara matea mo jalio, mo sopo mele vano vara i alea? I pa tinaŋihi la haratu mo ngavulu limaravati mo limaravati (99) la lo hanhani na jara tavera vavano i mele lavuti pa haratu mo lo tihai. <sup>5</sup> Ale mara mo hitea, i pa solotia na pilina na avulahi. <sup>6</sup> Vara mo pala na imana, i pa tovi na tapalana peresi na tahisana la pulutahi peresia, ale i vereva vara, ‘Ha avulahi peresiau matan na mele lavuti pa pulaku sipsip atu mo lo tihai.’ <sup>7</sup> Ale i pa sohen haratu natu, tuka

i pa avulahi jea hin haratu matea sei mo mele posi, mo jeu la haratu mo ngavulu limaravati mo limaravati (99) sei la tataholo la sopo jalio na malelera.

### *Haʻrai Matea Mo Ale Na Selen*

<sup>8</sup> Teni sava haʻrai vara nona selen mo sangavulu, pani mo vaitihai matea, mo sopo hasahi na lamu vara i tivesi na imana i alea vavano i lavutia?\*

<sup>9</sup> Ale vara mo lavutia, i pa tovi na tapalana peresi na tahisana la pulutahi peresia, ale mo vereea mara, 'Ha avulahi peresiau matan na mele lavuti pa selen atu sei na lo vaitihaia!' <sup>10</sup> Ale na vereea isamim, vara i pa sohen haratu natu, avulahi tavera mo lo toho na naho angelo non God matan tamlohi hehe atu sei mo mele posi na nona hehe."

### *Natun Tamlohi Tavera Mo Jalio*

<sup>11</sup> Ale Iesu mo mele vereea isara mara, "Tamlohi matea natuna mo rua. <sup>12</sup> Ale vora hitahu mo vereea isan tamana mara, 'Tata, o sileau hin korum atu sei enia ʻrungskaku.' Ale tamana mo ase na koruna isara tupra rua.

<sup>13</sup> Mo sopo tuai, vora hitahu atu mo takonahi na nona hinahinau tari, ale mo vano vara i hitehite jara, ale mo jalahi vevuhi na nona tavgav na posposi rongorongono vono. <sup>14</sup> Ale mara mo jalahi vevuhi na nona mania, marua tavera

matea mo pala hin jara tavera atu, ale mo vejuveju. <sup>15</sup> Ale mo vano mo voko isana tamlohi matea hin jara atu, ale tamlohi tavera atu mo ʻrulea vara i vano na isana i vahani na pulana poi.

<sup>16</sup> Ale mo marohati mo tikeli na makina vahatea, ale mo opoia vara i hani te hanhahi sei mo lo silea isana poi, pani tea mo sopo silea hin te hanhahi. <sup>17</sup> Pani ʻromina mara mo mele mai, mo hase vereea isana mara, 'Tamlohi voko tari non tamaku, hara hinau mo maʻrivi savulevule, pani enau na lo marohati mate nike. <sup>18</sup> A pa vano isan tamaku ale a vereea isana vara, 'Tata, na hehe isan tuka peresiho. <sup>19</sup> Na sopo mele tataholo vara o toviau natum. O vaiiau sohena nom volitusi matea.'"

<sup>20</sup> Ale mo turu mo mele vano isan tamana. Pani mo pa lo toho asau, ale tamana mo hitea ale mo ʻromia, ale mo maro vano isana mo rahoa, ale mo pungosia. <sup>21</sup> Moiso, natirihia atu mo vereea isan tamana mara, 'Tata, na hehe isan tuka peresiho. Na sopo mele tataholo vara o toviau natum.'

<sup>22</sup> Pani tamana mo vereea isana nona volitusi mara, 'Ha lavi na noku ruru peravu ʻruhuʻruhu jea i mai ha rua hinia, ale ha tau te ring hatea na varangona, ale sabat na palona. <sup>23</sup> Ale ha lavi na natu buluk ʻravisvisi atu sei ʻra lo kilau mamahunia ha vilia, ale ʻra hania ʻra avu-

\* **15:8:** selen: selen matea mo tataholo na volvoli mata rani matea, la selen akerihi enira oso puhoro mata nona lahi.

lahi. <sup>24</sup> Matan natuku nike mo mate moiso, ale mo mele mauri, mo jalio, ale na mele lavutia!' Ale la tapulo vai na hanhani tavera na avulahi.

<sup>25</sup> Ale natuna vora tiroma mo lo toho na isa, ale mara mo lo mai mariviti na ima mo rongo na vete, ale la lo velu, <sup>26</sup> moiso mo tovi na volitusi matea ale mo usia mara, 'Ka lo vai na sava sei?' <sup>27</sup> Ale mo vereā isana mara, 'Tasim mo mele pala, ale tamam mo vili pa natu buluk řavisvisi atu sei řa lo kilau mamahunia matan mo mele pala mo lo řuhu.'

<sup>28</sup> Pani mo lolokoru, ale mo řohu vara i unu na ima. Tamana mo malue mo sinai mo usia vara i unu, <sup>29</sup> pani mo řarami tamana mara, 'Ko hitea, la takonahi tauni nike enau na lo voko mate nom sohena slev matea, ale na sopo lo tope na nom retileu hin te rani, pani ko sopo sileau hin te natu nani hatelete matan vara a eři avulahi hinia peresi na tapalaku. <sup>30</sup> Pani natum akerihi mara mo pala, haratu sei mo lo jalahi vevuhi na korum na harai malele, ale ko vili pa natu buluk řavisvis atu sei ko lo kilau mamahunia, matana.'

<sup>31</sup> Ale tamana mo vereā isan natuna atu mara, 'Natuku, engko ko lo toho peresiau tarea, ale hinau tari noku enira nom. <sup>32</sup> Mo tataholo vara řa vai na hanhani řa avulahi matana, matan tasim nike mo mate pani mo mele mauri; mo jalio ale na mele lavutia.' "

## 16

### *Patu Tamlohi Lelevosahi Matea*

<sup>1</sup> Iesu mo mele vereā isana nona tamlohi usuri mara, "Na rani matea tamlohi tavgav matea, mo rongoa vara nona patu tamlohi sei mo lo kilau na nona hinahinau, mo lo roro purongo na nona hinahinau. <sup>2</sup> Ale mo tovi pa nona patu tamlohi atu, ale mo vereā isana mara, 'Sava nahai na lo rongoa matam? O sileau na nom puku mata kilau na mania matan engko ko isoiso sohena patu tamlohi.'

<sup>3</sup> Ale patu tamlohi atu mo hase vereā isana mara, 'A pa vai na sava, matan noku tamlohi tavera mo tau nařihiau sohena patu tamlohi matea? Enau na sopo řilarilangi vara a eři heli na lepa, ale na mahanuhanu vara a usi na tuetueni. <sup>4</sup> Ale, na levosahi na sava a pa vaia nake, matan vara i tau nařihiau ale tamlohi la pa avulahi mata laviau na imara.'

<sup>5</sup> Ale, mo tovi vevuhi la haratu la lo ave isan nona tamlohi tavera la mai matea matea. Ale mo vereā isan haratu tiroma mara, 'Nom ave isan noku tamlohi tavera mo visa?' <sup>6</sup> Mara, 'Na ave na litre wel, mo tari vaha tolu (3,000).' Ale mo vereā isana mara, 'Ale o jarai nařihi na nom ave, ale o ulia vara ko ave mo tari vaha hatea mo ngavulu sangavulu lima (1, 500).'

<sup>7</sup> Ale mo vereā isana tinapua mara, 'Nom ave mo visa?' Ale mo vereā mara, 'Na ave na piri wit, kilo mo tari vaha

ngavulu tolu (30,000).’  
Ale mo vereā isana mara, ‘Ale o jarai naʻihi na nom ave, ale o ulia vara ko ave na piri wit, kilo mo tari vaha ngavulu rua mo vati (24,000).’

<sup>8</sup> Ale tamlohi tavera atu mo hitea vara nona patu tamlohi atu mo patuha na sava mo vaia, hina purongo vara mo lejileji. Matan tamlohi hin varama nike, enira la patuha na nora bisnis la lo vaira peresi na tamlohi tinapua na varama, mo jeu la haratu la natun malarani. <sup>9</sup> Ale na lo vereā isamim, vara ha vai na nomim hinahinau nike na varama la tueni na tinapua ale ha tapala peresira. Hin malele nike, vara nomim hansohai hin varama nike mo isoiso, pa la tapalamim atu na tuka la pa avulahi hin kamim.

<sup>10</sup> Haratu mo eri turu rilangi na hinau rihirihi purongo, i pa turu rilangi na hinau matuvana, ale haratu mo lejileji na hinau rihirihi matea purongo, i pa lejileji na hinau matuvana. <sup>11</sup> Ale vara ka sopo eri turu rilangi na tavgav matan varama nike, hare i pa eri tau na tavgav vararuhu na limamim? <sup>12</sup> Ale vara ka sopo eri turu rilangi na hinau nona tinapua, hare i pa eri tau te hinau na limamim vara nomim?

<sup>13</sup> Tea i sopo eri volitusi isana tamlohi tavera i rua, matan i pa opoi matea, ale i rohu hin matea, teni i pa volitusi isan matea, ale i hitele-hilehi matea. Ha sopo eri volitusi isan God peresi na mania.”

### *Te Vujangi Non Iesu*

(Mt 11.12-13; 5.31-32; Mk 10.11-12)

<sup>14</sup> Pharisee la opoi na mania, ale la haratu la lo toho atu, lara la rongo la hinau sei, la kerehia. <sup>15</sup> Ale Iesu mo vereā isana mara, “Kamim ka la tamlohi atu sei la lo vai tataholoira hasera na naho tamlohi, pani God mo levosahi na mapumim. Matan sava tamlohi la lo romromia vara la aulu, enira hina niketa na nahon God.

<sup>16</sup> Leu non Moses peresi na sava provet la vereā la lo turu mo kakau na rani non John tamlohi paptijo, ale mo tapulo atu mo mai nake. Retiruhu matan mauri atu God mo aulu hinia, la lo retivujavujangi hinia, ale la lo ngurunguru na tamlohi vara la unu hinia. <sup>17</sup> Pani i pa mele malum vara tuka peresi na varama la tihai, mo jeu haratu vara tea i jarai naʻihi te sope leta hatea na lolo leu, ale suihana i mai hina purongo.

<sup>18</sup> Tamlohi tari sei la rohu hin naroura, ale la lahi na tinapua la vaivaileu, ale haratu sei mo lahi na hafai lahi matea mo rovo hin tuana, mo vaivaileu.”

### *Tamlohi Tavgav Enia Lazarus*

<sup>19</sup> Iesu mara, “Na rani matea tamlohi tavgav matea tarea mo lo ru na perpel peresi na ruru lulu malum, ale mo lo hani na hanhani ruhu tarea. <sup>20</sup> Ale na nona matarua, tamlohi la tau na tamlohi tilavono matea mo solasola vevuhi na epena hijana Lazarus, <sup>21</sup> mara mo lo

toho atu tarea mo opoia vara i efi hani te sope hanhani na jara hanhani non tamlohi tavgav atu, pani mo vono. Aulu hin haratu, viriu la lo mai la lo řamesi na solana. <sup>22</sup> Hitahu pa tamlohi tilavono atu mo mate, ale angelo la lavi nařihia vara i toho peresi Abraham. Pa tamlohi tavgav atu sohena mo mate, ale la tavunia, <sup>23</sup> ale enia mo sivo na jara talai na varama mata mateia, ale na nona rongohaji tavera, ale mo kilau vano mo hite Abraham enia Lazarus la lo turu asau hinia.

<sup>24</sup> Ale mo ulo mara, 'Pua Abraham, o řomopoiu, ale o řule Lazarus vara i vano i weti na pisuna na wai, ale i mai i taua na memeku vara i hamariřia, matan na lo rongohaji hajavua na pepe hapu nike.'

<sup>25</sup> Pani Abraham mara, 'Natuku, o to řomřomia, na maurim, ko lo lavi na hinau řuhuřuhu, pani Lazarus, mo lo lavi na hinau mo sati, pani nake enia mo lo nanau nike, ale engko ko lo lavi na rongohaji. <sup>26</sup> Ale mo sopo haratu purongo, pani masapa tavera matea mo lo toho na livuhařa, ale mo sopo te malele vara tea nike i efi vano sei isam, teni tea sei i efi mai nike isamam.'

<sup>27</sup> Ale mara, 'Vara sohena, na lo tangi isam vara o řulea i sivo na iman tamaku <sup>28</sup> matan enau tasiku mo lima, ale vara i retiřoãoahaira. Vara i vono, enira sohena la pa sinai hin jara nike mata vailejileji na tamlohi.

<sup>29</sup> Pani Abraham mara, 'Retiulia non Moses peresi na přovet la lo toho isara moiso; mo tataholo vara la tapurongo isara.' <sup>30</sup> Ale mara, 'Mo vono, pua Abraham, vara tea i tai nike na varama mata mateia i sivo isara, la pa posi.' <sup>31</sup> Abraham mo vereea isana mara, 'Vara la sopo tapurongo isan Moses peresi na přovet, la pa sopo efi rasu tea vara i mele turu na varama mata mateia.'

## 17

### *Vujangi Mata Romi Na Tinapua*

*(Mt 18.6-7, 21-22; Mk 9.42)*

<sup>1</sup> Ale Iesu mo vereea isana nona tamlohi usuri mara, "Hinau vaihite mata hehe la pa lo mai tarea, pani rani sasati isan haratu mo lo lavira la mai. <sup>2</sup> I pa mele řuhu jea isana, vara la liho te vatu tavera na řalona, ale la pulahia na lolo tasi puaha. Matan i pa mele sati jea isana, vara i vai te vonan la natuvarihi nike la hehe. <sup>3</sup> Ha hase kilau mamahuni kamim! Vara voraim mo hehe, o reti isana, ale vara mo posi o řomia, <sup>4</sup> ale vara mo hehe isam vaha limaravrua na rani matea, ale mo mele mai isam vaha limaravrua mo vereea isam mara, 'Na posi!' o pa řomia."

<sup>5</sup> Nona vahařule la vereea isan Moli Iesu lara, "O vai na nomam rasu i tavera!"

<sup>6</sup> Ale Moli Iesu mara, "Hina purongo vara nomim rasu mo sohena piri paka matea purongo, ha efi vereea isan pulo hatapola nike vara, 'O hase saputiho, o sivo o lavoho



na tasi!' Ale i pa oloolo hin kamim.

<sup>7</sup> Sava nomim slev matea vara mo isoiso na nona voko na isa teni mo lo kilau na sipsip, i pa mai vara i sakele vahatea mata hanhani?  
<sup>8</sup> Ka levosahia vara i pa tatamahuni na hinau hani nona tamlohi tavera, ale i volitusi isana tako, moiso natu i pa hani na hana hinau.  
<sup>9</sup> Ale mo sopo te hinau vara nona tamlohi tavera mo sopo vere meje isana, matan enia mo lo vai na sava mo tataholo vara i pa vaia. <sup>10</sup> Mo sohena purongo, vara ka lo oloolo hiniau, mo tataholo vara ha vereea vara, 'Mo sopo tataholo vara kama lavi na hasohaso isam. Kamam volitusi sei kama lo vai na sava mo tataholo purongo vara kama vaira.'

### *Tamlohi Lepros Mo Sangavulu*

<sup>11</sup> Na malelena mo lo vano Jerusalem, mo hahau na livuhan Samaria enia Galilee. <sup>12</sup> Mara mo lo unu na vanua matea, tamlohi lepros mo sangavulu la lo turu asau, <sup>13</sup> la ulo lara, "Iesu, tamlohi tavera, o ŋomi kamam!"

<sup>14</sup> Mara mo hitera, mo vereea isara mara, "Ha vano, ha vujangi kamim isana pris." Na rani la pa lo vano, lepros atu mo tihai na epera.

<sup>15</sup> Moiso vonara matea mara mo hitea vara mo vokevoke, mo mele hilu isan Iesu mo lo ulo aulu mo lo hasohaso God. <sup>16</sup> Mo jovi na nahona sivo na palon Iesu mo vere meje isan Iesu mata sava mo vaia isana, tamlohi

akerihi enia mara Samaria matea.

<sup>17</sup> Iesu mo usia isana mara, "Avei, na ŋom vara kamim tupu sangavulu? Tupu limaravati la haipu? <sup>18</sup> Tavasau akerihi hasena purongo mo mele hilu vara i sile na hasohaso isan God?" <sup>19</sup> Ale Iesu mo vereea isan tamlohi atu mara, "O turu, o vano. Nom rasua mo vaiho ko ŋuhu."

### *Mauri Atu God Mo Supe Hinia* *(Mt 24.23-28, 37-41)*

<sup>20</sup> Na rani matea Pharisee la usi Iesu lara mauri atu God mo aulu hinia i pa mai pangisa. Ale Iesu mo ŋaramira mara, "Mauri atu God mo aulu hinia i pa sopo mai na matamata tavera vara ha eŋi hitera, <sup>21</sup> teni ha pa eŋi vereea vara, 'Ha kilau mai, enia nahai!' teni 'Enia sevano!' matan mauri atu God mo aulu hinia mo lo toho na livuhamim."

<sup>22</sup> Ale mo vereea isana nona tamlohi usuri mara, "Pongi matea mo lo mai ha pa marohati vara ha hite te rani hatea non Natun Tamlohi, pani ha pa sopo eŋi hitea. <sup>23</sup> Ale tamlohi la pa vereea isamim vara, 'Ha kilau vano, enia sevano!' teni 'Ha kilau mai, enia nahai!' Pani ha sopo malue teni ha usurira. <sup>24</sup> Matan sohena vaha mo vilasi na tavalu masapa mo vano na tavaluna, i pa sohena natu isan Natun Tamlohi na nona rani. <sup>25</sup> Pani tiromana enia i pa lavi na rani ŋilangi matuvana, ale pina nike nake la pa tipahia.

<sup>26</sup> Sava mo masese na pongi non Noah i pa sohena na rani non Natun Tamlohi.

27 Tuai tamlohi la lo hanhani, la lo inu, la lo lahi, ale la lo silesilera mata lahi mo tikeli rani atu Noah mo unu na aka. Ale wai tatave mo maro ale mauri tamlohi tari la sopo juri.

28 I pa sohena natu, sohen na pongi non Lot, tamlohi la lo hanhani, la lo inu, la lo volvoli, la lo aŕeaŕehi, la lo lalavo ale la lo voro na ima — 29 pani hin rani atu Lot mara mo malue Sodom, hapu peresi na vatu tutuni mata volkeno mo jovi na tuka sivo isara, ale enira mo isoiso la mate. 30 Ale i pa sohen haratu natu na rani Natun Tamlohi i pala. 31 Hin rani atu, vara tea mo lo toho na jingoima, ale vara te nona hinahinau la lo toho na lolo ima, i pa sopo sivo vara i tau mamahunira, ale i pa sohena isan haratu mo lo toho na isa, i pa sopo posi vara i sivo na ima. 32 Ha to ŕomŕomi naroun Lot! 33 Sava tamlohi mo opoia vara i hase juri na maurina, i pa vaitihaia, pani sava tamlohi mo vaitihai na maurina, i pa taurilatia. 34 Na vereaa isamim vara, hin vutepongi atu tamlohi mo rua la pa lo juruvi na vata matea, ale la pa lavi naŕihi matea, matea purongo i pa lo toho atu. 35 Haŕai i rua la pa lo pete kosakosahi na piri wit jara matea, ale la pa lavi naŕihi matea, ale matea purongo i pa lo toho atu.”

36-37 Moiso nona tamlohi usuri la usia lara, “Moli la

hinau sei la pa masese epu?” Mo ŕaramira mara, “Vara ko hite na karai la lo avu vano hin te jara, o pa levosahia vara pahai matea mo mena atu.”\*

## 18

### *Haŕai Malepu Matea*

1 Ale Iesu mo vere na titileu matea isara vara i vujangira vara la pa lo usiusera, ale vara ŕomira la sopo jovi na sava la usia. 2 Mo vereaa mara, “Na taon tavera matea, tamlohi aria matea mo lo toho ea, mo sopo matahuni God teni vara i sile na ololo isan te tamlohi tinapua hatea. 3 Ale haŕai malepu matea sohena mo lo toho atu, mo lo mai tarea mo lo usia isana mara ‘O sile na talai mo tataholo vara noku meresahi i lavia.’ 4 Tiroma mo lo ŕohu hinia, pani hitahu mo hase vereaa isana mara, ‘Hina purongo vara na sopo matahuni God teni a sile na ololo isan tea, 5 pani matan haŕai malepu akerihi tarea mo lo areau mo sopo te isoisona, a pa silea na sava mo lo usia matan vara i sopo mele hotiau hinia.’”

6 Ale Moli mo mele vereaa mara, “Ha tapurongo na sava tamlohi ari hehe atu mo lo vereaa. 7 Ale ka ŕom vara God i pa sopo eŕi sile na sava sei nona tapuhi la lo usia isana tarea? 8 Na vereaa isamim, enia i pa sile na talai mo tataholo vara nora meresahi la lavia i vila purongo. Hina purongo hin haratu, vara

\* 17:36-37: karai: ŕarami reti hin sope jara rihirihia akerihi enia vara pongi hitahu mo mai mariviti, vara tamlohi la hite la hinau sei la pala, la pa eŕi hitevosahia i ŕuhu vara i pa sopo tuai, Natun Tamlohi (Iesu) i pa mele pala hin varama nika.

Natun Tamlohi i mele mai, i pa vilei te rasua na varama teni i vono?"

*Pharisee Peresi Na Tamlohi Hehe Matea*

<sup>9</sup> Ale mo mele vere titileu akerihi isan la haratu sei la lo hase romromia vara enira la tataholo na nahon God, ale la lo hitelehilehi na tinapua: <sup>10</sup> "Tamlohi mo rua la lo toho na lolo Temple, ale la lo usiusi, matea enia Pharisee matea, ale haratu matea enia tamlohi mata lavi na mania mata takis matea. <sup>11</sup> Pharisee atu mo turu atu mo lo hase usiusi matana hasena mara, 'God, na vere meje isam matan enau na sopo sohena tamlohi tinapua, haratu la lo ngurunguru mata mania, haratu la hehe, haratu la lo vaivaileu peresi na tinapua mo lahi moiso, teni sohen tamlohi mata lavi na mania mata takis akerihi. <sup>12</sup> Enau na tapuhoro na hanhani vaha rua na wik matea; tarea na lo sile na sangavulu hinau tari na lo lavira.'

<sup>13</sup> Pani tamlohi mata lavi na mania mata takis atu mo turu asau, mo sopo efi tahe na matana i kilau sahe na tuka, pani mo vilivili na rumana mo vere mara, 'God, o romopoiu, enau tamlohi hehe matea!' <sup>14</sup> Varaŕuhu na vere isamim vara tamlohi akerihi mo mele mule mo tataholo na nahon God, pani mo sopo haratu matea. Matan tamlohi tari sei la lo hase tahera, God i pa taura la sivo atano, pani haratu mo hase tau atano God i pa tahea sahe aulu."

*Iesu Mo Leŕuhu Na Natuvarihi*

(Mt 19.13-15; Mk 10.13-16)

<sup>15</sup> Na rani matea, tama natuvarihi hai peresi na tinara la lavi na natura la mai isan Iesu vara i tau na limana hinira, ale i leŕuhu hinira. Pani nona tamlohi usuri la tapulo horora. <sup>16</sup> Pani Iesu mo tovira vara la mai isana, ale mo vere isana nona tamlohi usuri mara, "Ha tinarihi na natuvarihi la mai isaku, ha sopo horora! Matan mauri atu God mo aulu hinia enia nona tamlohi sohen la harihi. <sup>17</sup> Varaŕuhu na vere isamim, vara sava tamlohi mo sopo lavi mauri atu God mo aulu hinia sohena natirihia matea, i pa sopo efi unu hinia hin te rani."

*Tamlohi Tavtav Matea*

(Mt 19.16-30; Mk 10.17-31)

<sup>18</sup> Ale na rani matea tamlohi aulu matea mo usia isana mara, "Tija ŕuhu, a pa vai na sava natu vara a efi lavi na mauri tui hinia?"

<sup>19</sup> Ale Iesu mo vere isana mara, "Mata sava ko toviau ŕuhu? God hasena mo ŕuhu, mo sopo mele te tamlohi tinapua i ŕuhu. <sup>20</sup> Ko levosahi na retileu, 'O sopo vaivaileu peresi na tinapua mo lahi moiso, o sopo vilimatei, o sopo vavanaho, o sopo tuetueni na halu, o ololo hin tamam enia tinam'." *Exo 20.12; Deut 5.16*

<sup>21</sup> Ale tamlohi aulu atu mo vere mara, "La hinau tari sei na tapulo vaira na pa lo uluvou purongo."

<sup>22</sup> Iesu mara mo rongoa, mo vere isana mara, "Hinau

matea ko vejuveju hinia. O aŕehi vevuhi na nom hinahinau, ale o asea isana tilavono, ale hitahu tavgav na tuka i pa nom; ale o mai o usuriau!" <sup>23</sup> Pani tamlohi atu mara mo rongo la hinau sei mo rongo mo sati tavera, matan enia tamlohi tavgav tavera matea.

<sup>24</sup> Iesu mara mo hitea vara mo rongo mo sati, mo vereea mara, "Mo ŕilangi hajavua vara tamlohi tavgav la unu hin mauri atu God mo aulu hinia! <sup>25</sup> A pa vereea vara mo mele malum jea vara camel matea i unu na koko niteli matea, mo jeu haratu vara tamlohi tavgav matea i unu hin mauri atu God supe hinia."

<sup>26</sup> Ale la haratu la lo rongo la reti atu lara, "Avei, vara mo sohena, sava tamlohi natu i pa eŕi juri?"

<sup>27</sup> Pani mo vereea isara mara, "Sava tamlohi la sopo eŕi vaira, God i eŕi vaira."

<sup>28</sup> Ale Peter mara, "Ko hitea, kama tinaŕihi vevuhi na imamam ale kama usuriho."

<sup>29</sup> Ale Iesu mo vereea isana mara, "Varaŕuhu na vereea isamim, mo sopo te tamlohi hatea vara i tinaŕihi na imana, teni narouna, teni te voraina, teni tamana enia tinana, teni natuna matan mauri atu God mo aulu hinia, <sup>30</sup> vara God i pa sopo volia nake na varama, i jeu na sava mo tinaŕihira moiso, ale hitahu i pa lavi na mauri tui hin pongi atu mo lo mai."

*Iesu Mo Sorahi Na Nona Mateia*  
(Mt 20.17-19; Mk 10.32-34)

<sup>31</sup> Ale Iesu mo tovi matavuhi la nona tupu sangavulu ŕomana mo rua atu, ale mo vereea isara mara, "Ka levosahia vara ŕa lo sahe Jerusalem. Ale hinau tari sei pŕovet la ulia matan Natun Tamlohi la pa masese atu.

<sup>32</sup> Matan la pa silea i vano na liman la haratu la tamlohi ŕoŕoha, ale la pa kerehia, la pa vai na hina mahanuhanu isana, ale la litovia. <sup>33</sup> Ale la pa rupia na asi maja, moiso la pa vilimateia, ale na hatolu rani i pa mele turu."

<sup>34</sup> Pani la sopo levosahi te hinau hatea sei mo lo vereea isara. La reti atu God mo jarahira isara, ale la sopo rongovosahi na sava mo lo vereea.

*Matavuso Matea Mo Tovi Iesu*  
(Mt 20.29-34; Mk 10.46-52)

<sup>35</sup> Mara mo lo mai mariviti Jericho, tamlohi matavuso matea mo lo sakele na pahisa malele, mo lo usi na tuetueni.

<sup>36</sup> Ale mara mo rongo na roroa vao tamlohi la lo hahau na pahisana, mo usia mara sava natu. <sup>37</sup> La vereea isana lara, "Iesu mara Nazareth mo lo hahau roto jara nike."

<sup>38</sup> Ale mo ulo aulu mara, "Iesu, natun supe David, o ŕomopoiu!" <sup>39</sup> Ale la haratu la lo toho na nahona, la reti isana lara i toho malum. Pani mo mele ulo aulu mo ŕilangi jea mara, "Natun David, o ŕomopoiu!"

<sup>40</sup> Ale Iesu mo turu mo retileu mara la lavia i mai isana. Ale mara mo mai mariviti isana, mo usia isana mara, <sup>41</sup> “Ko opoi vara a vai na sava isam?”

Mo vereea mara, “Moli, o tinañihia vara a mele kilau.”

<sup>42</sup> Ale Iesu mo vereea isana mara, “O mele kilau, nom rasua mo vaiho ko řuhu.” <sup>43</sup> Ale vahatea purongo, mo mele kilau, ale mo usuria mo lo tahe na hijan God. Ale tamlohi tari lara la hitea, enira sohena la hasohaso God.

## 19

### *Iesu Enia Zacchaeus*

<sup>1</sup> Iesu mo unu Jericho, ale mo lo vano vara i hahau roto jara atu. <sup>2</sup> Hin jara atu tamlohi matea hijana Zacchaeus, enia patu tamlohi matea mata lavi na mania mata takis, ale enia mo tavgav. <sup>3</sup> Enia mo lo vaihitea vara i hite Iesu, matan enia pejulana matea purongo, ale vao atu la lo turuhoroa. <sup>4</sup> Ale matana, mo maro mo vano tiroma mo vele aulu na pulo sycamore matea vara i eri hitea, matan i pa sopo tuai Iesu i pa hahau hin malele atu.

<sup>5</sup> Ale Iesu mara mo tikeli jara atu, mo tařa sahe, ale mo vereea isana mara, “Zacchaeus, o vila. O sevuti matan a pa toho na imam nohorihia.”

<sup>6</sup> Ale mo jurete vilavila sivo atano, ale mo avulahi taverna vara i lavia. <sup>7</sup> Ale tamlohi lara la hitea, la reti vavarihi lara, “Eh, mo lo vano vara i toho na ima tamlohi hehe matea.”

<sup>8</sup> Ale Zacchaeus mo turu na naho tamlohi atu mo vereea isan Moli mara, “Ko hitea

Moli, nakerihi a pa sile na sope noku hinahinau isana tilavono. Ale vara na halu tea hin te hinau, a pa mele silea isana i aulu vaha vati!”

<sup>9</sup> Ale Iesu mo vereea isana mara, “Nahapani, juri mo mai hin ima nike, matan enia sohena enia natun Abraham matea. <sup>10</sup> Matan Natun Tamlohi mo šinai vara i ale la haratu la jalio ale i jurira.”

### *Volitusi Mo Sangavulu* (Mt 25.14-30)

<sup>11</sup> Tamlohi lara la lo tapurongo hin la hinau nike, ale matan Iesu mo lo mai mariviti Jerusalem, mo tapulo vere na titileu matea isara, matan la lo řomřomia lara mariviti vara God i turu na suihana natu, <sup>12</sup> matan haratu mo vereea isara mara, “Tamlohi aulu matea mo vano na jara asau tinapua matea, vara i tauri na suiha mata supe ea, ale mara i pa mele mai. <sup>13</sup> Pani tiromana, mo tovi na nona volitusi tupu sangavulu vara la mai isana, ale mo silera na selen mo tataholo na volvoli mata rani voko mo ngavulu sangavulu (100) isara hatehateahi, ale mo vereea isara mara, ‘Ha lavi mania akerihi; ha vavahinau peresia i tikeli rani atu vara a mele pala.’ <sup>14</sup> Pani nona tamlohi la řohu hinia, moiso la řule na tamlohi hai la lo usuria vara la vere vara, ‘Kama sopo opoia vara tamlohi nike i supe hin kamam.’

<sup>15</sup> Pani pa tamlohi aulu atu, mo vano mo tauri na suiha hin jara tinapua atu, moiso mo mele hilu mai na jarana. Ale mo tovi la

nona volitusi atu, sei mo lo silera na mania matan mo opoia vara i levosahia vara la vai na sava hin mania atu mo lo silea isara. Mo opoia vara i levosahia vara la mele lavi na mania mo visa aulu hin haratu mo lo silea isara. <sup>16</sup> Tiromara mo mai, mo turu na nahona mo vereea mara, 'Moli na nom mania na mele vai mo vaha sangavulu tinapua hinia.' <sup>17</sup> Ale mo vereea isana mara, 'Ko vaia mo űuhu jea, ko volitusi űuhu matea. Matan ko kilau mamahuni hinau rihirihī sei na taua na limam; ale a pa tauho vara o pa aulu na taon tavera i sangavulu.'

<sup>18</sup> Harua tamlohi mo mai, mo vereea mara, 'Tamlohi tavera, na nom mania na mele vai mo vaha lima tinapua hinia.' <sup>19</sup> Ale supe atu mo vereea isana mara, 'Ale engko o pa aulu na taon tavera i lima.'

<sup>20</sup> Moiso mele volitusi tinapua matea mo mai mo vereea mara, 'Tamlohi tavera, nom mania nahai. Na jarohi mamahunia na tavalu ruru matea vara i lo toho űuhu hinia. <sup>21</sup> Matan na matahuniho matan engko tamlohi űilangi matea. Matan ko lo lavi na hinau tamlohi tinapua mo lo taua, ale ko lo vu na isa engko ko sopo lavaoa.'

<sup>22</sup> Supe atu mo vereea isana mara, 'Engko volitusi lejileji sati matea! A pa ariho usuri na nom retireti. Ko levosahia moiso vara enau tamlohi űilangi matea, ale vara na lo lavi na hinau tamlohi tinapua mo lo taua, ale na lo vu na isa na sopo lavaoa.'

<sup>23</sup> Mata sava ko sopo tau na noku mania na bank matan vara a mele mai a eűi lavi noku mania sei peresi haratu bank mo lo vaia noku?' <sup>24</sup> Ale mo vereea isan la nona volitusi atu sei la lo turu mariviti atu mara, 'Ha lavi naűihi na mania isana, ha silea isan haratu mo lavi mo sangavulu!'

<sup>25</sup> Pani la vereea isana lara, 'Pani enia mo lavi mo sangavulu moiso!'

<sup>26</sup> Supe atu mo vereea mara, 'Na vereea isamim vara tamlohi tari sei la lo tauri te hinau moiso, la pa mele silea isara i aulu hin haratu la lo tauria tiroma. Pani isan la haratu la sopo tauri te hinau, la pa lavi naűihi na sava la lo taurira moiso. <sup>27</sup> Pani isan la noku meresahi nike, sei la űohu vara a nora supe; ha lavira la mai nike, ale ha vilimateira na nahoku.' "

### *Iesu Mo Unu Jerusalem*

*(Mt 21.1-11; Mk 11.1-11; Jn 12.12-19)*

<sup>28</sup> Ale Iesu mara mo vere la hinau atu mo isoiso, mo mele vano na malelena, mo vele mo sahe Jerusalem. <sup>29</sup> Iesu mara mo pa lo mai mariviti na taon matan Bethphage enia Bethany hin vutivuti atu sei la tovia Vuti talu Olive, mo űule na nona tamlohi usuri mo rua la vano la tiroma hinira, <sup>30</sup> mara, "Ha vano, ha unu hin vanua sei na nahomim, ale vara ka lo unu, ha pa hite na natu donki matea la pesia mo lo turu atu; tea mo sopo lo vele i sakele hinia hin te rani. Ha uli naűihia ale ha lavia i mai. <sup>31</sup> Vara tea mo usia vara, 'Mata sava ka lo uli

nañihia?’ Ha pa vereea sohen harihi vara, ‘Moli mo opoia.’ ”

<sup>32</sup> Ale la vano la tapai natu donki atu sohen Iesu mo lo vereea isara. <sup>33</sup> Ale la pa lo uli nañihia, tavuina mo usia isara mara, “Mata sava ka lo uli nañihī natu donki sei?” <sup>34</sup> Ale lara, “Moli mo opoia.” <sup>35</sup> Ale la lavia mo mai isan Iesu, ale la vuñangi na nora ruru taverna na hañina, ale la vai Iesu mo sakele hinia. <sup>36</sup> Ale mara mo lo hahau hinia mo lo vano, la pulahi na nora ruru na malele. <sup>37</sup> Ale Iesu mara mo lo mai mariviti hin jara atu na malele mo lo tapulo sevuti na Vuti talu Olive, vao nona tamlohi usuri la tapulo lalavete, ale la lo hasohaso God na leo taverna matea, mata sava vavahinau mata suiha la hitera moiso lara,

<sup>38</sup> “Avulahi isan supe atu mo lo mai na hijan Moli. Tamata i toho na tuka ale ololo taverna i vano isan God Aulu Jea!”

<sup>39</sup> Pani tatua Pharisee hin vao atu la vereea isan Iesu lara, “Tija, o reti isana nom tamlohi usuri mata sava la lo vereea.” <sup>40</sup> Iesu mo řaramira mara, “Varařuhu na vereea isamim, vara la toho malum, la vatu nike, la pa ulo aulu!”

<sup>41</sup> Iesu mara mo pa lo mai mariviti ale mo hite taon taverna atu Jerusalem, mo tangisia, <sup>42</sup> mara, “Tahisaku, vara o pa lo levosahi na nom rohi hin rani akerihi, o pa hite na tamata, pani nakerihi, God mo vusohi na matam moiso. <sup>43</sup> Matan i pa sopo tuai nomim meresahi la pa voro na vořa řalihio, matan vara la pa piruho na

jara tari.

<sup>44</sup> La pa viliroiroiho, engko peresi na natum vahatea na lolo ropem, la pa ase vevuhi na vatu vořam tari matan ko sopo hitevosahi na rani God mo rohiho.” <sup>45</sup> Moiso, Iesu mo unu na rope Temple, ale mo lo tapulo levuti nañihī la haratu la lo ařeařehi hinia, <sup>46</sup> ale mo vereea isara mara, “La ulia vara, ‘Imaku enia ima mata usiusi’, *Isa 56.7* pani kamim ka vaia mo mai ‘jara luhu nona tamlohi vili na tamlohi mata vavanaho matea.’” *Jer 7.11*

<sup>47</sup> Hitahun haratu, na rani hatehateahi Iesu mo lo vujangi na lolo Temple. Tamlohi aulu nona pñis, tamlohi vujangi mata leu peresi na patu tamlohi tinapua hai, la aleale malele vara la vilimateia hinia, <sup>48</sup> pani la sopo hite te malele matan tamlohi tari la pa lo marohati hajavua mata nona retireti.

## 20

### *Suihan Iesu Mo Tai Epu*

(*Mt 21.12-17; Mk 11.15-19; Jn 2.13-22*)

<sup>1</sup> Na rani matea, Iesu mo pa lo vujangi na tamlohi na lolo Temple na retivujavujangi mata Retiřuhu, ale tamlohi aulu nona pñis peresi na tamlohi vujangi mata leu, peresi na vajiahan Israel la mai isana, <sup>2</sup> ale la vereea isana lara, “O to vere kamam hinia, vara sava suiha nahai, ko lo vai la hinai nike hinia, teni ko lo vai la hinai nike na suihan hare?” <sup>3</sup> Mo řaramira mara, “Enau sohena, a pa usi kamim na retiusia matea,

ale ha to vereia isaku vara  
 4 paptijo non John mo tai  
 na tuka teni isana tamlohi?"  
 5 Moiso la sorasorahia isara  
 lara, "Vara řa vereia vara, 'Mo  
 tai na tuka!' enia i pa vereia  
 vara 'Mata sava ka sopo ra-  
 sua?' 6 Pani vara řa vereia  
 vara, 'Isana tamlohi!' tam-  
 lohi tari la pa parumateiřa  
 matan la řom vara John enia  
 přovet matea." 7 Ale matana  
 la řaramia lara, "Kama sopo  
 levosahia vara mo tai epu."

8 Ale Iesu mo vereia isara  
 mara, "Vara sohenā, enau  
 sohenā a pa sopo eři vere  
 kamim hinia vara na lo vai la  
 hināu nike na suiħan hare."

### *Titileu Mata Tamlohi Isa Sasati*

(Mt 21.33-46; Mk 12.1-12)

9 Ale, Iesu mo tapulo vere  
 na tamlohi hin titileu akerihi  
 mara, "Tamlohi tavera matea  
 mo lavo na isa grape matea,  
 ale tamlohi la lo pakaia isana.  
 Ale enia mo vano na jara  
 tinapua mo toho mo peravu  
 ea. 10 Na rani asitauni mo  
 mai, mo řule na nona volitusi  
 matea mo vano vara i lavi  
 te vua asitauni isara. Pani  
 la tamlohi atu la tamajia, ale  
 la řulea mo vano lekoleko.  
 11 Ale tamlohi tavera atu mo  
 mele řule na volitusi tinapua  
 matea, pani la mele tamajia  
 la vailejlejia, ale la mele řulea  
 mo vano lekoleko. 12 Ale tam-  
 lohi tavera atu, mo mele řule  
 na hatolura. Enia sohenā  
 la vili kitkitia, ale la tipahia.  
 13 Pa tamlohi tavera matan  
 isa grape atu mara, 'A pa vai  
 na sava natu? Na levosahia,  
 a pa řule natuku řuhufuhu  
 nike; korong la pa ololo  
 hinia.' 14 Pani la tamlohi atu

lara la hitea la hase vereia is-  
 ara lara, 'Avei korong natuna  
 nahai, řa vilimateia matan  
 koruna i pa nořa.' 15 Ale  
 la pulahi nařihia hin isa atu  
 ale la vilimateia." Ale Iesu  
 mo usira mara, "Ka levosahia  
 vara tamlohi tavera matan  
 isa grape atu i pa vai na sava  
 isan la tamlohi atu? 16 I pa  
 mai i vaikomokomora, ale i  
 mele sile isa grape sei isan te  
 tamlohi tinapua." La tamlohi  
 tavera atu lara la rongo la  
 reti atu lara, "I pa sopo sohen  
 haratu!"

17 Pani Iesu mo kilau  
 vano tataholo isara mo  
 vereia mara, "Vara mo vono,  
 řaramin reti sei la ulia tuai  
 enia sava lara,

'Vatu atu, tamlohi voro na  
 ima la tipahia mo mai  
 pulo vatu atu mata  
 ima?' *Psa 118.22*

18 Tamlohi tari vara la tiala-  
 halaha hin vatu atu, vatu atu  
 i pa putputira, ale vara i jovi  
 hin tea i pa lomolomoa."

19 Tamlohi vujangi mata  
 leu peresi na tamlohi aulu  
 nona přis la aleale malele  
 vara la taurilatia hin rani  
 atu purongo, matan la ron-  
 govosahia vara Iesu mo lo  
 vereia titileu atu matara, pani  
 la matahuni na tamlohi.

### *Iesu Mo Voli Na Takis*

(Mt 22.15-22; Mk 12.13-  
 17)

20 Moiso la lo kilau řořohia,  
 ale la řule hai vara la usuri  
 řořohia la lo tiasia vara i  
 vere te hināu la eři taurilatia  
 matana, ale la eři taua na  
 lima tamlohi aulu matan  
 Rome matana. 21 Matan  
 haratu, la usia lara, "Tija,  
 kama levosahia vara nom



reti peresi na nom vujangi la tataholo, ale ko sopo tametame tea, pani tarea ko lo vujangi na malele varaʻuhu non God. <sup>22</sup> Kama opoia vara kama usiho na retiusia matea. Mo tataholo vara kama sile na takis isan Supe nona mara Rome teni mo vono?" <sup>23</sup> Pani Iesu mo levosahi na nora halu, ale mo vereia isara mara, <sup>24</sup> "Ha vujangiau hin te selen hatea mata takis. Niniun hare nakerihi, ale sava uliuli nahai hinia?" Lara, "Non Supe nona mara Rome." <sup>25</sup> Iesu mo vereia isara, "Vara sohena, ha sile Supe nona mara Rome na sava enia nona, ale isan God na sava enia non God." <sup>26</sup> Ale la tamlohi atu la sopo eʻi pisuhia hin te hinou mo lo vereia na naho tamlohi, pani la maʻurahi tavera na nona ʻarami reti, ale la lo turu tapanono.

### *Sauteterahi Na Mateia*

(Mt 22.23-33; Mk 12.18-27)

<sup>27</sup> Sadducee hai la mai isana, enira vao matea la sopo rasua vara God i pa sauteterahi na tamlohi, <sup>28</sup> ale la usi na retiusia matea isana lara, "Tija, Moses mo ulia mara vara vorai tamlohi matea mo mate, enia narouna matea pani mo sopo te natuna, tamlohi atu i pa lavi na malepun voraina ale i pa tape te natun voraina. <sup>29</sup> Ale na rani matea, vorai mo limaravrua la lo toho. Vora tiroma mo lavi na narouna matea, ale mo mate mo sopo te natuna. <sup>30</sup> Ale vora usuria mo pete lavia, <sup>31</sup> moiso hatolura mo mele lavia, ale

la tupu limaravrua atu la mate enira mo isoiso, pani la sopo tape te natuvarihi. <sup>32</sup> Hitahuna haʻai atu mo mate. <sup>33</sup> Hin rani atu vara God i sauteterahi na tamlohi, haʻai atu i pa naroun hare? O to vereia isamam, matan enira tupu limaravrua la lahi hinia!"

<sup>34</sup> Ale Iesu mo vereia isara mara, "Nake na varama, tamlohi la lo lahi, ale la lo sile na haʻai mata lahi, <sup>35</sup> pani la haratu God mo hitea vara la tataholo mata turu na sauteterahi na mateia mata unu hin pongi atu mo lo mai, enira la pa sopo lahi teni tea i pa sopo silera mata lahi, <sup>36</sup> matan la pa sopo eʻi mele mate hin te rani matan enira la pa sohena angelo, la natun God matan enira la natun sauteterahi atu. <sup>37</sup> Pani usuri ʻomʻomi atu sei vara tamlohi la pa mele turu na mateia teni mo vono, Moses sohena mo ulia na Retiulia, sei mo vereia hin rani atu God mo retireti isana hin vipahai atu mo lo pepe, Moses mo tovi Moli God mara, 'God non Abraham, God non Isaac ale God non Jacob'. *Exo 3.6*

<sup>38</sup> God enia mo sopo God nona tamlohi mate, pani nona tamlohi mauri, matan isana, tamlohi tari la lo mauri."

<sup>39</sup> Moiso tatua tamlohi vujangi mata leu la ʻaramia lara, "Tija, ko vereia ko varaʻuhu." <sup>40</sup> Mo sopo te vonara hatea i mele opoia vara i usia hin te retiusia hatea.

*Kristo Enia Natun Hare*  
(Mt 22.41-46; Mk 12.35-37)

<sup>41</sup> Pani Iesu mo mele vereea isara mara, “Mo sohena sava natu la pa vereea vara Kristo enia natun supe David?”

<sup>42</sup> Matan David hasena mo vereea na puku non psalms mara,

‘Moli God mo vereea isan noku Moli mara:

O sakele na matuaku,  
<sup>43</sup> vavano a vai na nom meresahi la mai la toho na ruhuruhu palom.’ *Psa 110.1*

<sup>44</sup> David mo tovia Moli, sohena sava natu enia mo pa natuna?”

<sup>45</sup> Ale na peron vao atu la lo tapurongo mo vereea isana nona tamlohi usuri mara,  
<sup>46</sup> “Ha lo kilau mata tamlohi vujangi mata leu, sei la lo opoia vara la lo hahau řalihi peresi na ruru peravu mata hapahapa, ale la opoia vara la lo lavi na retioloolo na naho tamlohi na jara maket, ale la opoi na jara sakele la taura mata tamlohi aulu na ima lotu, ale la opoia vara la lo sakele na jara sakele nona tamlohi sei la tovira mata mai na hanhani tavera, <sup>47</sup> ale ha lo kilau mata nora halu sei la lo lavi nařihi na hinahinau tari nona hařai malepu hinia, ale la lo tavuhoro na nora vavahinau na ususi peravu. La pa lavi na talai tavera i jeu na tinapua.”

## 21

*Silesilea Nona Malepu Matea*  
(Mk 12.41-44)

<sup>1</sup> Iesu mo kilau vano mo hite na tamlohi tavgav, la

lo tau na nora silesilea na jara silesilea na lolo Temple.

<sup>2</sup> Ale mo hite na hařai malepu tilavono matea, mo tau na selen mo rua.

<sup>3</sup> Ale mo vereea mara, “Varařuhu na vereea isamim, hařai malepu tilavono nike mo taua mo jeu na tamlohi tavgav mo isoiso.

<sup>4</sup> Matan sava la silea mo malue na nora tavgav tavera, pani sava enia mo silea, mo malue na nona tilavono, mo tau vevuhi na sava sei vara i pa eři tueni na maurina.”

*Temple I Pa Maroe*

(Mt 24.1-2; Mk 13.1-2)

<sup>5</sup> Ale, la pa lo verevereea vara Temple atu mo řuhu sohena sava, ale sohena sava la tau mamahuni na vatu řuhuru hinia, ale sohena sava tamlohi hai la sile na silesilea řuhuru mata lakolakoa hinira, ale Iesu mo vereea isara mara, <sup>6</sup> “La hinau sei ka lo hitera, pongi matea mo lo mai vara i pa sopo mele te vatu hatea, i lo sakele aulu na vatu tinapua sei matan la pa atu jovjovira.”

*Rani Rilangi La Pa Mai*

(Mt 24.3-14; Mk 13.3-13)

<sup>7</sup> Ale la usia isana lara, “Tija, pangisa natu la hinau sei la pa masese, ale sava matamata natu i pa vujangia vara mariviti natu vara la hinau atu la pa masese?”

<sup>8</sup> Ale mo vereea mara, “Ha sopo tinařihia vara tea i tikauleji kamim! Matan tamlohi matuvana la pa mai na hijaku lara, ‘Enau natu, Kristo!’ ale ‘Nake natu nona rani pala mo lo mai mariviti!’ Pani ha sopo

usurira! <sup>9</sup> Ale vara ka rongo vara jara tavera la lo vai na vuro, ale vara la lo vuro na lolo jarara hasera, ha sopo matahu matan la hinau atu, la pa masese tiroma, ale pongi hitahu, i pa sopo mai vahatea.”

<sup>10</sup> Iesu mo mele vereea isara mara, “Mara jara tavera tinatinapu la pa meresahi hinira, ale supe matea i pa meresahi na supe tinapua.

<sup>11</sup> Mihi tavera la pa hisu na jara tinatinapua, ale marua peresi na rojoa tavera la pa vili na jara tinatinapua. Ale ha pa hite na hinau matahu tavera peresi na matamata tavera aulu na masapa.

<sup>12</sup> Pani tiroma, hin la hinau nike, tamlohi la pa taurilati kamim, ale la pa tipahi kamim, la pa sile kamim isan la haratu la lo kilau na ima lotu peresi na ima řilangi, ale la pa lavi kamim la turuhi kamim na naho supe peresi na patu tamlohi, matan ka lo lavi na hijaku.

<sup>13</sup> Enia masapa matea vara ha pa eři vereuliau na naho tamlohi. <sup>14</sup> Ha lo levosahia nake vara, ha sopo matahu vara ha pa řaramira sohena sava, <sup>15</sup> matan enau a pa sile kamim na reti tataholo, vara ha pa verera isana nomim meresahi, ale la pa sopo eři řaramira teni la eři vereea vara ka lo halu. <sup>16</sup> Tamamim peresi na tinamim, voraimim, tahisamim peresi na tapalamim, enira sohena, la pa tau te vonamim vara la pa vilimateira. <sup>17</sup> Tamlohi tari la pa řohu hin kamim mata

hijaku. <sup>18</sup> Pani te vulumim hatea na patumim i pa sopo eři tihai purongo. <sup>19</sup> Mauri tui i pa nomim mata nomim turu řilangi.

*Jerusalem I Pa Jovi Na Lima Tamlohi Rořoha*  
(Mt 24.15-21; Mk 13.14-19)

<sup>20</sup> Pani vara ka hite na tamlohi vuro la řalihi Jerusalem, ka levosahia vara nona pongi maroi mo pala natu. <sup>21</sup> Ale la haratu la lo toho Judea, la pa rovo la sahe na vutivuti, ale la haratu la lo toho na lolon taon tavera atu la malue, ale ha pa horo la haratu la lo toho řalihi taon tavera atu vara la sopo unu hinia, <sup>22</sup> matan harihi, enira rani mata talai tavera matan vara sava la ulira moiso la pa masese. <sup>23</sup> I pa mele sati jea isana hařai sei la epe puhoni, teni la haratu la pa lo susui na natura. Matan rani sasati tavera na varama peresi na lolokoru tavera non God mata hehe, i pa jovi isan la tamlohi nike.

*Natun Tamlohi Mo Mele Mai*

<sup>24</sup> La pa vilimateira na sita vuro, ale la pa tiroma hinira sohena slev la vano na jara tinatinapua na varama. Ale la haratu la tamlohi rořoha, la pa varasi Jerusalem i tikeli isoiso rani atu sei God mo taua na limara moiso.

*Hin Rani Atu Iesu I Pa Mele Pala*

(Mt 24.29-31; Mk 13.24-27)

<sup>25</sup> Ale matamata la pa pala na alo, na vitu peresi na vitusarasara. Ale na

varama, tamlohi na jara tinatinapua la pa řomkaka tavera mata roroa tasi peresi na loloputuna. <sup>26</sup> Tamlohi la pa matemate mata nora matahu peresi na sava la levosahia vara la pa masese usuri na hinau la pa mai na varama, matan suiha la lo tauri na tuka peresi na masapa la pa malue na jarara. <sup>27</sup> Moiso natu tamlohi tari la pa hite Natun Tamlohi i pala na telangi na suihana peresi na merana tavera. <sup>28</sup> Ale vara la hinau atu la lo lavi na jara, ha turu tataholo ha tařa sahe aulu matan nomim jujuri mo lo mai mariviti.”

### *Titileu Matea Mata Vipahai Fig*

(Mt 24.32-35; Mk 13.28-31)

<sup>29</sup> Moiso, Iesu mo verera na titileu matea mara, “Ha kilau usuri na pulo fig peresi na pulo pahai tari tinatinapua, <sup>30</sup> vara la tapulo sohai na perera ka hitevosahia vara taro alo mo lo mai mariviti moiso. <sup>31</sup> Ale mo sohena purongo, vara ka hite la hinau sei la lo mai, ka levosahia vara mauri atu God mo aulu hinia, mo lo mai mariviti. <sup>32</sup> Varařuhu na vereaa isamim vara pina nike i pa sopo lo tihai vevuhi vavano hinau tari la masese. <sup>33</sup> Tuka peresi varama la pa tihai, pani noku retireti la pa sopo eři tihai.

<sup>34</sup> Pani ha lo kilau! Mo sopo řuhu vara a tapai kamim ka lo toho purongo, teni ka lo drong, teni nomim řomkaka la lo taurilati kamim. Ha

sopo tinařihia vara pongi atu i pala isamim i sařumahi kamim. <sup>35</sup> Matan i pa sařumahi na tamlohi tari la lo toho na varama. <sup>36</sup> Pani tarea ha lo kilau, ha lo usiusera vara ha pa eři jelu hin la hinau tari sei la pa masese, ale ha pa eři turu na nahon Natun Tamlohi.”

<sup>37</sup> Rani tarea, Iesu mo lo vano mo lo vujangi na lolo Temple; moiso na ravravi mo lo hilu mo lo sahe na Vuti talu Olive, ale mo lo toho ea na vutepongi. <sup>38</sup> Ale na řalavuhu jea, tamlohi tari la lo mai isana na Temple vara la tapurongo isana.

## 22

### *Judas Mo Turuposi Hin Iesu*

(Mt 26.1-5, 14, 16; Mk 14.1-2, 10-11; Jn 11.45-53)

<sup>1</sup> Hanhani tavera mata pereti atu mo sopo te isi hinia mo lo mai, haratu la tovia Passover. <sup>2</sup> Ale tamlohi aulu nona pris peresi na tamlohi vujangi mata leu, la lo aleale malele vara la pa vilimatei Iesu hinia, matan la matahu vara la vaia na naho tamlohi.

<sup>3</sup> Ale Setan mo sohoni Judas Iscariot, vonara matea hin la tupu sangavulu řomana mo rua atu. <sup>4</sup> Mo malue mo vano mo sorasora peresi na tamlohi aulu nona pris peresi na patu police mata Temple. Matan la pa vereaa vara i pa turuposi hinia sohena sava matan vara i pa taua na limara. <sup>5</sup> Ale la avulahi, la hati-hia vara la pa sile te mania isana. <sup>6</sup> Ale matana mo ma- jinga hinia, moiso mo aleale

masapa vara i pa turuposi hinia, vara i efi taua na limara hin te jara, mo sopo te vao tamlohi hinia.

*Isoiso Hanhani Non Iesu*  
(Mt 26.17-25; Mk 14.12-21;  
Jn 13.21-30)

<sup>7</sup> Moiso rani mata pereti sei mo sopo te isi hinia mo pala, enia rani atu la lo sile na natu sipsip mata Passover sohena malamalai isan God.  
<sup>8</sup> Matana, Iesu mo řule Peter enia John mara, "Ha vano ha tatamahu mata nořa hanhani mata Passover vara řa eri hania."

<sup>9</sup> La usia isana lara, "Ko opoia vara kama pa tatamahunia epu?"

<sup>10</sup> Mo vereia isara mara, "Ha tapurongo, vara ka lo unu na taon tavera, ha pa tapai na tamlohi matea mo lo utu na jara wai tavera matea. Ha usuria ha unu hin ima atu enia mo unu hinia,<sup>11</sup> ale ha vereia isan tamlohi tavera mata ima atu vara, "Tija mo vereia isam mara, "Nene jara mata matavuhi na imam sei vara a efi hani na hanhani mata Passover peresi na noku tamlohi usuri ea?"

<sup>12</sup> Ale i pa vujangi kamim na jara tavera matea aulu na imana sei mo tatamahunia moiso, ha tatamahu atu."

<sup>13</sup> Ale la malue la vano la hitea mo tataholo sohen mo vereia isara, ale la tatamahu mata Passover atu.

*Hanhani Mata Passover*  
*Atu*

(Mt 26.26-30; Mk 14.22-26;  
1Co 11.23-25)

<sup>14</sup> Ale aoa matan hanhani atu mo tataholo, Iesu mo sakele na jara hanhani na

tep moiso, ale nona vahařule la lo toho peresia.<sup>15</sup> Ale mo vereia isara mara, "Na opoia mo tavera jea vara a hani Passover nike peresi kamim, moiso a pa lavi na rongohaji tavera.<sup>16</sup> Matan na vereia isamim, vara a pa sopo mele hania vavano i tikeli rani atu hinau tari la masese hin mauri atu God mo aulu hinia."<sup>17</sup> Ale mo lavi na paniken matea ale mara mo vere meje moiso mo vereia mara, "Ha lavia, ha aseia isamim ha inua.<sup>18</sup> Matan na vereia isamim, vara a pa sopo mele inu waen akerihi vavano i tikeli rani atu, mauri atu God mo aulu hinia i mai."

<sup>19</sup> Moiso, mo lavi na pereti, ale mara mo vere meje moiso, mo topetopea mo silea isara mara, "Harihi enia epeku sei na silea matamim. Ha lo vaia sohena mata řomřomiau hinia."<sup>20</sup> Ale lara la hanhani moiso, mo mele vaia sohena hin paniken waen atu mara, "Paniken nike, na lo sureia matamim, enia retitauhi paro sei na lo vaia na řaeku.

<sup>21</sup> Pani ha tapurongo, haratu sei i pa turuposi hiniau, mo lo sahara na hanhani na tep peresiau nakerihi.<sup>22</sup> Matan Natun Tamlohi i pa vano i usuri na masalon God, pani rani sasati isan haratu sei mo turuposi hinia."

<sup>23</sup> Moiso, enira mo isoiso la tapulo ususia isara hatehateahi vara sava tamlohi isara natu i pa vai hinau atu.

24 Pani mo sopo tuai, vau-riuri matea mo malue isara vara hare natu enia i pa aulu hin mauri atu God mo aulu hinia. 25 Ale Iesu mo vereea isara mara, "Hin varama nike supe nona tamlohi fofoha la aulu na nora tamlohi peresi la haratu suiha mo lo toho na limara, ale la lo retileu isara tarea vara la vai na masalora, pani hina purongo vara la lo toho na ruhuruhura, la lo tovira lara 'Tuetueni nona tamlohi'. 26 Pani i pa sopo sohena isamim: haratu enia mo opoia vara i aulu i jeu na tinapua, i pa hase taua atano sohena vora hitahu matea, ale haratu mo opoia vara i tiroma na tamlohi, i pa mai i lo volitusi. 27 Hare natu enia tamlohi tavera? Haratu mo sakele na tep teni haratu mo volitusi isana? Enia haratu mo sakele na tep. Pani enau na lo mai isamim sohena volitusi matea.

28 Kamim natu, ka lo toho peresiau na noku rani rilangi. 29 Matan haratu, na lo silea isamim sohen Tamaku mo silea isaku vara, ha pa aulu sohena supe, 30 matan vara ha pa hanhani ale ha inu na noku tep na rani vara na lo tauri na suiha, ale ha pa sakele na jara sakele nona supe mata ari la tavitavui tupu sangavulu romana mo rua atu non Israel.

*Rani Vaihite La Pa Mai*

(Mt 26.31-35; Mk 14.27-31; Jn 13.36-38)

31 Simon, Simon, o lo levosahia vara Setan mo usia rilangi vara i pa laviho matan

vara i hutehutehiho sohena tamlohi mo lo asehi na piri wit, 32 pani na usiusi moiso matam matan vara nom rasua i pa sopo jovi, ale hin rani atu sei ko mele posi, o pa tueni na voraim vara la turu rilangi."

33 Peter mo vereea isana mara, "Moli, enau na tatamahu vara a vano peresiho na ima rilangi, teni a mate matam."

34 Iesu mo vereea mara, "Vararuhu na vereea isam Peter, toa i sopo lo tarere nohorihhi vavano, i tikeli rani atu ko vunvunia vaha tolu vara ko sopo levosahiau."

35 Ale Iesu mo vereea isara mara, "Hin rani atu sei na rule kamim ka vano ka sopo lavi te tanga korohi teni te tanga, teni te sabbat — ka vejuveju hin te hinau teni mo vono?"

Lara, "Mo vono."

36 Mo vereea isara mara, "Pani nake natu, haratu vara te nona tanga korohi teni te tanga i pa lavia. Ale haratu mo sopo lo te nona sita vuro, i pa ahehi na nona ruru hamariri, ale i voli te hatea. 37 Matan na vereea isamim vara Retitapu nike i pa masese hiniau sei mo vara, 'La evia peresi la haratu la lo tope na leu'. Matan sava la ulia matakua i pa masese."

38 Ale la vereea lara, "Eh Moli, sita vuro mo rua nahai moiso!"

Ale mo vereea mara, "Mo isoiso natu."

*Iesu Mo Usiusi*

(Mt 26.36-46; Mk 14.32-42)

<sup>39</sup> Ale mo malue hin ima atu mo mele vano na Vuʻti talu Olive sohen mo lo vaia tarea, ale nona tamlohi usuri la usuria. <sup>40</sup> Ale mara mo kakau jara atu mo vereia isara mara, “Ha usiusi matan vara ha pa sopo jovi na vaihite.” <sup>41</sup> Ale mo hahau vano makomona, mo papaohi atano, ale mo usiusi <sup>42</sup> mara, “Tata, vara ko opoia, o eʻfi lavi naʻihi na noku rani ʻfilangi nakerihi, pani o sopo vai na masaloku, pani o vai na masalom purongo.” <sup>43</sup> Ale angelo matea mo pala isana mo tuenia vara i mele ʻfilangi. <sup>44</sup> Ale na nona ʻrom sati tavera mo usiusi mo mele ʻfilangi jea; ale masmasuna mo hoi peresi na ʻrae mo tuturu sivo na lepa. <sup>45</sup> Ale mo mele turu na nona usiusi mo mai isana nona tamlohi usuri, mo hitera la juruvi ʻromaliho, matan la malokoloko tavera, matan ʻromira mo sati na sava i pa masese, <sup>46</sup> ale mo vereia isara mara, “Ka lo juruvi mata sava? Ha turu, ha usiusi matan vara ha pa sopo jovi na vaihite.”

### *La Taurilati Iesu*

(Mt 26.47-56; Mk 14.43-50; Jn 18.3-11)

<sup>47</sup> Ale Iesu mo pa lo retireti, vao tavera matea mo pala, ale pa tamlohi atu sei la tovia Judas, enia vonara matea hin la tupu sangavulu ʻromana mo rua atu, mo lo tiroma hin vao atu, mo mai mariviti isan Iesu vara i pungosia, <sup>48</sup> pani Iesu mo vereia isana mara, “Judas, o pa turuposi hin Natun Tamlohi na pungosi

matea?” <sup>49</sup> Ale la haratu la lo toho ʻralihia, lara la hitevosahi na sava i pa masese lara, “Avei Moli, ʻra taira na sita vuro teni mo vono?” <sup>50</sup> Ale vonara matea mo langa naʻihi na peron volitusi non pʻris aulu. <sup>51</sup> Pani Iesu mara, “Ha isoiso!” ale mo tikeli na perona, ale mo mele soʻroa vano na patuna. <sup>52</sup> Moiso, Iesu mo vereia isana tamlohi aulu nona pʻris peresi na police mata Temple, peresi na vajiahara sei la mai matana mara, “Ka mai peresi na sita vuro peresi na maja sohen ka lo vano mata taurilati na tamlohi vili na tamlohi mata vavanaho matea? <sup>53</sup> Tarea na lo toho peresi kamim na lolo Temple pani ka sopo taurilatiau. Pani nakerihi enia nomim rani peresi na rani non suihan ʻroʻroha.”

### *Peter Mo Vunvuni Iesu*

(Mt 26.57-58, 67-75; Mk 14.53-54, 66-72; Jn 18.12-18, 25-27)

<sup>54</sup> Moiso la taurilatia, la tiroma hinia la malue la vano na iman pʻris aulu, ale Peter mo lo usurira asau makomona. <sup>55</sup> Ale lara la vai na hapu matea na livuha jara na lolon rope ima atu moiso, la sakele ʻralihia ale Peter mo vano mo sakele peresira. <sup>56</sup> Moiso, volitusi haʻarihi matea mara mo hite Peter mo lo sakele atu, mo mele kilau mamahunia mara, “Tamlohi nike sohena, mo lo toho peresi Iesu.” <sup>57</sup> Pani Peter mo vunvunia mara, “Haʻai, na sopo levosahia.” <sup>58</sup> Ale moiso, tamlohi tinapua matea mo hitea mo mele

verea mara, "Engko vonara matea." Pani Peter mo vereea mara, "Tapala, enau mo vono." <sup>59</sup> Ale korong mele aoa matea mo vano moiso, tamlohi tinapua matea mo mele vereea mara, "Varaŕuhu sei, tamlohi nike enia mo lo toho peresia, matan enia mara Galilee matea." <sup>60</sup> Pani Peter mara, "Tapala, na sopo levosahi na sava ko lo vereea." Ale mo pa lo vereea toa mo tarere. <sup>61</sup> Ale Moli mo posi mo kilau vano isan Peter, ale Peter mo mele ŕomŕomi na sava Moli mo vereea isana mara, "Toa i sopo lo tarere, o pa vunvunia vaha tolu." <sup>62</sup> Ale mo malue mo sahe na jingoima mo tangi huruhuru.

<sup>63</sup> Ale la haratu la lo taurilati Iesu la tamajia, ale la lo kerehia. <sup>64</sup> La pesihoro na matana ale la lo usia hinia lara, "O to retimangovi! Hare natu mo tutuiho?" <sup>65</sup> Ale la mele vere na hinia sati tinapua matuvana isana, ale la lo kalia.

*Iesu Mo Turu Na Naho Pulutahi Tavera*  
(Mt 26.59-66; Mk 14.55-64; Jn 18.19-24)

<sup>66</sup> Mara mo rani sahe, matavuhi nona vajiahara la pulutahi peresi na tamlohi aulu nona pŕis peresi na tamlohi vujangi mata leu. Ale la haratu la lo taurilatia la tiroma hinia mo vano isan nora matavuhi atu, ale la vereea isana lara, <sup>67</sup> "Vara engko natu, Kŕisto atu, o vereea isamam!" Pani mo vereea isara mara, "Vara a vereea isamim, ha pa sopo rasua, <sup>68</sup> ale vara a usi kamim hin te retiusia, ha pa sopo

ŕaramiaiu. <sup>69</sup> Pani mo tapulo nake natu, Natun Tamlohi i pa sakele na tavalu suihan God."

*Psa 110.1*  
<sup>70</sup> Ale matana, enira mo isoiso lara, "Engko natun God teni mo vono?" Moiso mo vereea isara mara, "Ka pete vereea moiso, enau natu." <sup>71</sup> Moiso, la vereea lara, "Ra pa mele opoi na sava vereulia tinapua! Ra rongoa mo pete hase vereea moiso vara enia Natun God."

## 23

*Iesu Mo Turu Na Nahon Pilate*  
(Mt 27.1-2, 11-14; Mk 15.1-5; Jn 18.28-38)

<sup>1</sup> Moiso enira mo isoiso la turu, ale la lavi Iesu mo vano isan Pilate. <sup>2</sup> La tapulo tuvaia lara, "Kama hite tamlohi nike mo lo tikauleji na nomam tamlohi, ale mo lo horo kamam vara kama sopo sile te takis isan supe matan Rome, ale enia mo lo vereea vara enia natu, Kŕisto, supe atu sei i pa mai." <sup>3</sup> Ale Pilate mo usia isana mara, "Engko Supe nona Jew?" Ale mo ŕaramia mara, "Engko ko vereea moiso." <sup>4</sup> Moiso Pilate mo vereea isana tamlohi aulu nona pŕis peresi vao tavera atu mara, "Na sopo vilei te hehe hin tamlohi nike." <sup>5</sup> Pani la vereea toho hinia mo ŕilangi lara, "Enia mo vai na tamlohi la lo usuri na ŕomina, mo vujangira na jara tari Judea mo tapulo Galilee mo sinai mo kau nike."

<sup>6</sup> Pilate mara mo rongoa sohena, mo usia mara enia mara Galilee matea teni.



<sup>7</sup> Ale Pilate mara mo levosahia vara Iesu mo tai na jara Galilee mo lo toho na ruhuruhun Herod, mo řulea mo vano isana matan mo lo toho Jerusalem hin rani atu.

<sup>8</sup> Na rani Herod mara mo hite Iesu, mo avulahi taverna matan tuai moiso, mo opoia vara i hitea matan mo lo rongo na sorasarahina, ale mo lo řomtau vara i pa hite Iesu i vai te matamata. <sup>9</sup> Ale mo usia na retiusia mo usia mo tuai, pani Iesu mo sopo řaramira. <sup>10</sup> Tamlohi aulu nona pñis peresi na tamlohi vujangi mata leu la lo turu na pahisana, la lo tuvaia mo řilangi. <sup>11</sup> Ale Herod peresi na nona tamlohi vuro, la vaisatihia na nora retireti, ale la kerehia. Moiso la rua na ruru řuhuru, la řulea mo mele vano isan Pilate. <sup>12</sup> Hin rani atu purongo, Herod mo tapala peresi Pilate. Pani tiroma enira tupra rua la meresahi.

### *La Taua Vara I Pa Mate*

*(Mt 27.15-26; Mk 15.6-15; Jn 18.39-19.16)*

<sup>13</sup> Moiso Pilate mo tovi matavuhi na tamlohi aulu nona pñis peresi na tamlohi aulu non Israel peresi na tamlohi, <sup>14</sup> ale mo vereaa isara mara, “Ka lavi tamlohi nike mo mai isaku, ale ka vereaa vara enia mo lo tikauleji na tamlohi. Ale nara na kilau usuri na sava ka lo vereaa matana moiso, ale ha levosahia vara na sopo vileia vara tamlohi nike mo ori hin te hinau hatea sei ka lo tuvaia hinia. <sup>15</sup> Herod sohenaa, mo sopo vilei te hinau, matan enia mo mele řulea mai

isařa. Ka hitea, mo sopo vai te hinau vara i pa mate matana. <sup>16</sup> Matana, a pa sile na talai matea isana, moiso a pa tinařihia vara i vano.”

<sup>17-18</sup> Pani la uloo enira mo isoiso vahatea lara, “O vili-matei tamlohi sei! Ale o sile Barabbas isamam!”

<sup>19</sup> Barabbas enia tamlohi matea la pulahia na ima řilangi matan mo lo tiroma na tamlohi mata valum hin taon taverna atu, ale matan mo lo vilimatei na tamlohi. <sup>20</sup> Pilate mo mele sile na retireti isara matan mo opoia vara i tinařihi Iesu, <sup>21</sup> pani la lo uloo toho lara, “Ha vosaea na talopeilopei! Ha vosaea na talopeilopei!” <sup>22</sup> Ale Pilate mo mele sile na nona hatolu reti isara mara, “Mata sava? Mo vai na sava mo sati? Enau na sopo vilei te hinau vara i pa mate matana. Ale matana, a pa sile na talai matea isana moiso a tinařihia vara i vano.” <sup>23</sup> Pani la lo uloo toho isana la lo usia lara la vosaea na talopeilopei. Ale nora reti mo vili na reti non Pilate. <sup>24</sup> Matana, Pilate mo tinařihia vara sava la usia i pa sohenaa. <sup>25</sup> Matan la usia, mo tinařihi pa tamlohi atu sei mo lo taua na ima řilangi matan mo lo tiroma na tamlohi mata valum, ale matan enia mo lo vilimatei na tamlohi, pani mo sile Iesu vara i vano na masalora.

### *La Vosae Iesu Na Talopeilopei*

*(Mt 27.31-44; Mk 15.21-32; Jn 19.17-27)*

<sup>26</sup> Ale la pa lo tiroma hinia mo lo malue, la taurilati na tamlohi matea hijana Simon

mara Cyrene, enia mo tai asau ŀove na jara vutivuti, ale la tau na talopeilopei isana matan vara i solotia, ale mo usuri Iesu. <sup>27</sup> Ale vao tavera jea nona tamlohi peresi na haŀai la lo tangisia, la lo tangtangi, ale la lo usuria. <sup>28</sup> Pani Iesu mo vereea isara mara, "La venatun Jerusalem, ha sopo tangisiau, pani ha tangisi kamim hasemim peresi na natumim. <sup>29</sup> Matan ha lo levosahia vara rani matea mo lo mai sei la pa vereea vara, 'Avulahi isana haŀai aroaro, ale isan haratu la sopo tatape, ale isan la haratu la sopo lo vasusu hin te rani.'

<sup>30</sup> Hin rani atu,

'Tamlohi la pa tangi isana vutivuti lara – ha jovjovi isamam!

Ale isana pesapesa la pa vereea lara – ha tavuni kamam!'

*Hos 10.8*

<sup>31</sup> Matan vara, vara la vai la hinau nike na rani ŀuhu sei vipahai la lo ulua mo ŀuhu, i pa sohena sava hin rani atu mo kuru?"

<sup>32</sup> Tamlohi tinapua mo rua sei la tamlohi sasati, la tiro-mara la vano matan vara la pa vilimateira peresi Iesu.

<sup>33</sup> Ale lara la kakau jara atu sei la tovia 'Sui Patu Tamlohi' la vosaea hin jara atu na talopeilopei peresi la tamlohi sasati atu, matea na matuana, ale matea na marauna.

<sup>34</sup> Ale Iesu mara, "Tata, o ŀomira matan la sopo levosahi na sava la lo vaia!" Ale tamlohi vuro atu la vai na roro matea mata hitea vara

hare natu i pa lavi te nona ruru. *Psa 22.18*

<sup>35</sup> Tamlohi la lo turu atu, la lo kilaua, pani tamlohi aulu natu la lo kerehia lara, "Enia mo juri na tinapua! I to hase juria vara enia natu, Kŀisto non God, hara sei God mo viŀonia!" <sup>36</sup> Tamlohi vuro atu sohena la lo kerehia, la mai isana la sile na waen hohona isana vara i inua, <sup>37</sup> ale lara, "Vara engko Supe nona Jew, o hase juriho!" <sup>38</sup> La uli na uli-uli matea la taua aulu hinia, mo vereea vara,

**Harihi Enia Supe Nona Jew**

<sup>39</sup> Vonara matea hin la tamlohi sasati mo rua atu, la lo sevu na pahisana, mo kerehi Iesu mara, "Engko Kŀisto atu teni mo vono? O hase juriho, ale o juri kamam!" <sup>40</sup> Pani tamlohi sasati tinapua atu matea mo merusahia mara, "Eh, ko sopo matahuni God? Ko sopo levosahia vara enŀa ŀa lo toho na ruhuruhu talai nike peresia?" <sup>41</sup> Enŀa mo tataholo vara ŀa lavia, matan enŀa ŀa lavi na volvoli tataholo mata noŀa vavahinau, pani tamlohi nike mo sopo vai te hina sati." <sup>42</sup> Ale mo vereea isan Iesu mara, "Iesu, o lo ŀomŀomiau hin rani atu vara ko tauri na nom suiha mata supe." <sup>43</sup> Ale Iesu mo vereea isana mara, "Varaŀuhu, na vereea isam, engko o pa toho peresiau hin jara avulahi atu Paradise nohorihii."

*Iesu Mo Mate*

(Mt 27.45-56; Mk 15.33-41; Jn 19.28-30)

<sup>44</sup> Matan alo mo sangavulu ŀomana mo rua na rani tavera, ale ŀoŀoha tavera mo

tahavuni jara tavera atu mo tikeli na matan alo mo tolu na ravravi<sup>45</sup> matan mera alo mo tihai. Ale ruru tavera atu mo lo horo na jara tapu mo tapu jea na lolo Temple, mo maʻfari mo rua.<sup>46</sup> Moiso Iesu mo ulo aulu mara, “Tata, na tau na mauriku na limam!” Mara mo vereaa moiso maromaronaa mo isoiso.<sup>47</sup> Ale captain mata tamlohi vuro mara mo hite la hinau sei la lo masese, mo hasohaso God mo vereaa mara, “Varaʻuhu. Tamlohi nike mo sopo vai te hina sati hatea.”<sup>48</sup> Ale vao tamlohi tari atu sei la lo pulutahi mata hite hinau akerihi, lara la hite la hinau sei la masese, la mule peresi na tangtangi tavera.<sup>49</sup> Ale tapalana tari, peresi la haʻrai atu sei la tapulo usuria Galilee, la lo turu asau makomona, la lo kilau la hinau akerihi.

*La Tavuni Na Tarapen Iesu*  
(Mt 27.45-56; Mk 15.33-41;  
Jn 19.28-30)

<sup>50</sup> Ale tamlohi matea hijana Joseph mo lo toho atu, mo tai na taon nona Jew la tovia Arimathea. Enia vonara matea na lolo council tavera non Israel, pani enia tamlohi ʻuhu matea posina mo tataholo,<sup>51</sup> ale enia mo sopo avulahi na sava la hatihia teni na sava la vaira, enia mo tai Arimathea na jaran Judea, ale enia mo lo kilau matan rani atu God i pa tauri na suiha hinia.<sup>52</sup> Tamlohi atu mo vano vara i hite Pilate matan vara i usi na tarapen Iesu.<sup>53</sup> Mo juria sivo atano, ale mo viriviria na ruru lulu ʻuhu matea mata mate, ale

mo taua na taptap matea la taia na pesapesa, ale mo sopo lo te tarape i juruvi hinia hin te rani.<sup>54</sup> Rani atu enia Rani mata Tatamahu nona Jew, ale mariviti Sabbath i tapulo.<sup>55</sup> La haʻrai sei la lo usuria la tai Galilee la usuria vara la hitea vara la pa taua na sava taptap, ale la pa hitea vara la pa tau na tarapena so-hena sava.<sup>56</sup> Moiso, la mele mule, ale la tatamahuni na lai ponaha ʻuhu peresi na hasori mata taua na tarapena.

Na Sabbath la mapu usuri na retileu non Moses.

## 24

*Sauteterahi Non Iesu*  
(Mt 28.1-10; Mk 16.1-8; Jn 20.1-10)

<sup>1</sup> Pani na Sunday na ʻalavuhu jea, pa la haʻrai atu la vano na taptap, la lavi na lai ponaha ʻuhu sei la tatamahunira moiso.<sup>2</sup> Ale lara la kau na taptap la hite vatu tavera atu mata matarua la kuresi naʻihia moiso,<sup>3</sup> pani lara la unu la sopo hite na tarapen Moli Iesu,<sup>4</sup> ʻomira mo pa lo tihai, ale la pa hutura purongo, tamlohi mo rua la lo turu na pahisara, nora ruru la memera tavera.<sup>5</sup> Ale la matahu tavera, la popovi na nahora atano na lepa, ale la tamlohi atu la vereaa isara lara, “Mata sava ka lo ale na tamlohi mauri na jara mate?”<sup>6</sup> Enia mo sopo toho nike, pani mo mele turu moiso. Ka lo ʻomʻomi na sava mo vereaa isamim hin rani atu mo pa lo toho Galilee,<sup>7</sup> mara Natun Tamlohi i pa

vano na lima tamlohi sasati matan vara la pa vosaea na talopeilopei, ale i pa mele turu na hatolu rani.”<sup>8</sup> Ale la pa mele řomřomi na nona retireti,<sup>9</sup> ale la malue na taptap la vano la vere na hinau tari isan la tupu sangavulu řomana matea atu, peresi la haratu la lo toho peresira.<sup>10</sup> Ale Mary Magdalene, Joanna, Mary tinan James peresi na hařai tinapua hai sei la lo toho peresira, enira natu la vere la hinau sei isan la vahařule atu.<sup>11</sup> Pani la rongoa sohena sorasora rongorongo vono matea, ale la sopo rasura.

### *Iesu Na Malele Emmaus*

<sup>12</sup> Pani Peter mo turu mo maro mo vano na taptap, mo riorio sivo mo hite na tavalu ruru lulu purongo la pa lo toho atu, ale mo mele mule mo mařurahi tavera na sava mo masese.

### *Iesu Mo Pala Isana Tamlohi Mo Rua* (Mk 16.12-13)

<sup>13</sup> Tataholo hin rani atu, tamlohi mo rua isara, la lo vano na vanuan Emmaus, mariviti kilometre i sangavulu řomana matea hin Jerusalem.<sup>14</sup> Ale la lo sorahi na hinau tari sei la masese Jerusalem.<sup>15</sup> La pa lo retireti la lo sorahia, Iesu mo mai mo hahau peresira.<sup>16</sup> Pani la sopo hitevosahia matan God mo horora.<sup>17</sup> Ale mo vere a isara mara, “Avei, sava sei ka lo sorahia na nomim hahau?”

La turu vahatea ale nahora mo vujangia vara řomira mo sati.

<sup>18</sup> Ale vonara matea, hijana Cleopas mo řaramia mara, “Avei, korong engko hasem purongo sei ko rohi Jerusalem, ale ko sopo levosahi na sava mo masese hin la rani akerihi sei la vano moiso?”

<sup>19</sup> Ale Iesu mo vere a isara mara, “Sava hinau natu?”

Ale la vere a isana lara, “Hinau la vaia isan Iesu mara Nazareth, enia přovet sei nona retireti peresi na suihana la řuhuřuhu jea na nahon God, peresi na tamlohi tari.<sup>20</sup> Ale sohena sava nomam tamlohi aulu nona přis peresi na tamlohi aulu

la taua na liman Pilate, vara i sile na talai isana mata mate, ale la vosaea na talopeilopei.

<sup>21</sup> Pani kama lo řomtoho vara enia natu, haratu sei i pa juri Israel. Pani mo sopo haratu purongo, nahapani enia hatolu rani usuri la hinau sei la masese.<sup>22</sup> Ale aulu hin haratu, nomam hařai hai, la vai kamam kama mařurahi jea. Enira la lo toho na tapuna na řalavuh o jea.<sup>23</sup> Ale lara la sopo hite na tarapena, ale la mele hilu mai, la vere a isamam vara la hite na angelo hai, ale la vere a isara vara mo mele mauri.<sup>24</sup> Tatuamam la rongoa la vano na tapuna vara la hitea, ale la hitea mo tataholo sohen haratu la hařai atu la lo vere a, ale la hitea varařuhu tarapen Iesu mo tihai.”

<sup>25</sup> Ale Iesu mo vere a isara mara, “Ka tamlohi rongorongo vono! Mapumim la řilangi mata rasu na hinau tari přovet la vere a moiso!

26 Mo mera purongo na sava la ulia lara Křisto i pa lavi na rongohaji tiroma, moiso i pa lavi na hasohasona tavera.”  
 27 Ale Iesu mo tapulo vereuli na hinau tari sei Moses peresi na přovet la ulira na jara tari na Retitapu sei la vereulia vara maurina i pa sohena sava.

28 Ale lara la lo mai mariviti hin vanua atu sei la lo hahau matana, Iesu mo lo hahau o hitea sohena vara i pa jeu vanua atu, 29 pani la verea řilangi isana lara, “O lo toho peresi kamam matan mo ravravi moiso, ale alo mo sakele na vuti moiso.” Ale mo usurira, mo lo toho peresira. 30 La sakele na tep, ale mo lavi na pereti mo leřuhu hinia, mo topea, moiso mo silea isara. 31 Ale vahatea purongo, matara la roi la hitevosahia, ale mo tihai isara. 32 La verea isara hasera lara, “Varařuhu sei matan mapuřa la avulahi jea na rani Iesu mo lo retireti peresiřa na malele sei mo vai na Retiulia la roi isara?”  
 33 Ale la turu vahatea la hilu, la mele vano Jerusalem, la tapai la tupu sangavulu řomana matea atu peresi la haratu la lo toho peresira la lo pulutahi na jara matea.  
 34 Ale la verea isan la tupra rua atu lara, “Varařuhu, Moli mo mele turu, mo pala isan Simon Peter moiso!”  
 35 Moiso la tupra rua atu la pete vere na sava mo masese na malele, ale sohena sava la pa hitevosahia na rani mo tope na pereti.

*Vavahinau Non Nona*

### *Tamlohi Usuri*

(Mt 28.16-20; Mk 16.14-18; Jn 20.19-23; Acts 1.6-8)

36 La pa lo sorahi la hinau sei, Iesu mo turu na livuhara, mo vereea isara mara, “Tamata i toho isamim!”  
 37 Pani la hutura hinia, la matahu tavera matan la řom vara la hite na tanume matea. 38 Moiso mo vereea isara mara, “Ka matahu mata sava? Ale řomkaka mo malue na mapumim mata sava? 39 Ha hite na limaku peresi na paloku vara enau varařuhu nahai. Ha tikeliau, ale ha levosahia, matan tanume mo sopo te epena soheku sohen ka lo hitea.” 40 Ale mara mo vereea moiso, mo vujangi na limana peresi na palona isara. 41 Ale la sopo lo rasu na sava la hitera mařan la mařurahi tavera hinia, ale mo vereea isara mara, “Avei, te hanhani nike?” 42 Ale la silea na tavalu maji matea mo noha na wai tutuni, 43 ale mo lavia mo hania na nahora.

### *Iesu Mo Retileu Isara*

44 Ale Iesu mo vereea isara mara, “Reti nike enira noku reti sei na pete vereea moiso isamim hin rani atu na pa lo toho peresi kamim, vara hinau tari sei la ulia na Leu non Moses peresi na Retiulia nona přovet peresi na puku non psalms la pa masese.” 45 Moiso mo vai na řomira la roi matan vara la eři rongovosahi na Retitapu, 46 ale mo vereea isara mara, “La ulia sohen harihi lara, Křisto i pa lavi na rongohaji moiso i mate, ale na hatolu rani i pa mele turu na mateia,

<sup>47</sup> ale la pa retivujavujangi na posi mata hehe, ale God i pa řomi na nora hehe na hijan Křisto, la pa retivujavujangia i vano isana tamlohi mara jara tinatinapua tari i tapulo Jerusalem i vano. <sup>48</sup> Kamim ka hite la hinau sei na matamim. <sup>49</sup> Ale halevosahia vara na lo řule na Tanume Tapu usuri na retitauhi non Tamaku isamim. Pani ha lo toho Jerusalem i tikeli rani atu suiha aulu matan na tuka i jovi hin kamim.”

*Iesu Mo Sahe Na Tuka*

*(Mk 16.19, 20; Acts 1.9-11)*

<sup>50</sup> Moiso mo tiromara la malue la vano la tikeli Bethany, ale mo tahe na limana mo leřuhu hinira. <sup>51</sup> Mo pa lo leřuhu hinira, God mo lavi nařihia mo sahe aulu na tuka. <sup>52</sup> Ale la lotua, la mele hilu la vano Jerusalem peresi na avulahi tavera, <sup>53</sup> ale la vano la lo toho tarea na Temple mata hasohaso God ea.

## Retiŕuhu Hin Iesu Kŕisto John Mo Ulia Puku Nike

John mo vujangia vara Iesu Kŕisto enia 'Reti non God' sei mo vai na hinau tari la lo toho (1.3-4). Mo vujan-  
gia vara John Tamlohi Paptijo mo levosahia vara enia 'Natu Sipsip non God tata-  
holo, enia natu, i pa lavi naŕihi na hehe nona tamlohi na varama'. (1.29) Philip mo  
verea mara Iesu enia haratu Moses mo lo vereea mara i pa mai (1.45).

John mo vujangia vara Iesu enia sava tamlohi, ale nona vavahinau sohenā, la vujan-  
gia vara enia God mo mai tamlohi.

### **Matamata Mo Limaravrua Non Iesu:**

1. Mo posi na wai mo mai waen (2.1-12)
2. Natun tamlohi tavera Capernaum mo mele ŕuhu (4.43-54)
3. Tamlohi rojoa matea Bethzatha mo mele ŕuhu (5.1-47)
4. Iesu mo vahani na tamlohi (6.1-15)
5. Iesu mo hahau na pusa tasi (6.16-21)
6. Tamlohi matavuso matea (9.1-41)
7. Lazarus mo mele mauri (11.1-57)

### **'Enau na' Reti non Iesu mo limaravrua**

1. Enau na pereti mata mauri (6.35, 51)
2. Enau na malarani mata varama (8.12)

3. Enau na matarua (10.7, 9)
4. Enau na tavui sipsip ŕuhu (10.11, 14)
5. Enau na sauteterahi peresi na mauri (11.25)
6. Enau na malele, re-tivarāŕuhu peresi na mauri (14.6)
7. Enau na asi grape varaŕuhu (15.1)

John mo uli puku nike matan vara ha pa eŕi tau na nomim rasua hin Iesu vara enia Kŕisto atu, Natun God. Vara ha tau nomim rasua hinia ha pa lavi na mauri varaŕuhu. (20.31)

'Matan God mo opoi na tamlohi na varama sohen harihi: mo sile Natuna sei enia vorahese, vara sava tamlohi mo rasua i pa sopo vano na komo, pani i pa lavi na mauri tui.' (3.16)

### **Hin Puku Nike**

1. Iesu enia Reti non God (1.1-18)
2. Vujangi non John Tamlohi Paptijo (1.19-34)
3. Iesu mo viŕoni na nona tamlohi usuri (1.35-51)
4. Tatua matamata tavera Iesu mo lo vaira (2.1-12.50)
5. Isoiso wik non Iesu; nona mateia (13.1-19.42)
6. Iesu mo turu na mateia (20.1-10)
7. Iesu mo pala isana nona tamlohi usuri (20.11-21.25)

### *Iesu Enia Reti Non God*

<sup>1</sup> Tuai tiroma, Reti atu mo pete toho moiso. Mo lo toho peresi God, ale Reti sei enia God tataholo. <sup>2</sup> Tuai tiroma, enia mo lo toho peresi God, <sup>3</sup> ale hinia, God mo vai na

hinaiu tari, mo sopo te hinaiu hatea vara mo sopo vaia hinia. <sup>4</sup> Pulo mauri mo lo toho isana. Mauri atu enia mo lavi na malarani mo mai isana tamlohi. <sup>5</sup> Malarani atu mo sasarami na ŋoŋoha. Roŋoha atu mo sopo eŋi turuhoroa.\*

### *God Mo Rule John*

<sup>6</sup> God mo ŋule na tamlohi matea mo mai, hijana John. <sup>7</sup> Enia mo mai mo sohena tuetueni matea vara i vereuli na tamlohi hin malarani atu. Mo vereea matan vara tamlohi tari la pa rasu malarani atu. <sup>8</sup> Tuetueni atu enia mo sopo malarani atu, pani enia mo mai vara i vereuli malarani atu.

### *Malarani Mata Varama*

<sup>9</sup> Malarani atu mo mai na varama, enia mo malarani varaŋuhu. Malarani varaŋuhu atu mo sile na malarani vara tamlohi tari la pa levosahia.

<sup>10</sup> Hina purongo vara God mo vai na varama hinia, pani varama mo sopo hitevosahia. <sup>11</sup> Mo mai na nona varama, isan la tavitavua tataholo, pani la ŋohu hinia. <sup>12</sup> Pani isan la haratu la lavia, la rasu na hijana, ale enia mo tinaŋihira vara enira la pa eŋi mai natun God. <sup>13</sup> La mai natun God mata masalon God hasena. La sopo mai natun God na posposi tamlohi mo vora teni na masalo tamlohi.

### *Reti Atu Mo Mai Tamlohi*

<sup>14</sup> Reti sei mo mai tamlohi, mo lo toho peresiŋa. Kama

hite na hina ŋuhuŋuhu matuvana na maurina moiso, hina ŋuhuŋuhu matuvana non haratu hasena enia mo tai isan Tama, enia pulo ŋomŋuhu, ale enia pulo retivaraŋuhu.

<sup>15</sup> John mo ulo aulu mara, "Hara sei natu, na lo vereea vara i pa mai hitahu hinaiu, enia mo aulu hinaiu, matan enia mo lo toho tiroma tuai hinaiu."

<sup>16</sup> Matan nona tavitav mo tavera, ale enŋa mo isoiso ŋa lo lavi na nona otori ŋuhu matuvana, ale matana, nona ŋomŋuhu mo lo maŋivisihiŋa la lo masurere hiniŋa, <sup>17</sup> matan Moses mo sileŋa na Leu, pani ŋomŋuhu peresi na retivaraŋuhu la tai isan Iesu Kŋisto. <sup>18</sup> Te tamlohi mo sopo lo hite God hin te pongi, pani haratu enia God sei mo lo toho na tavalun Tama, enia mo vujangia isaŋa vara God enia mo sohena sava.

### *John Tamlohi Paptijo*

(Mt 3.1-12; Mk 1.1-8; Lk 3.15-17)

<sup>19</sup> Hin rani atu tamlohi tatavera nona Jew la ŋule na pŋis peresi na tatua vao Levi enira tuetueni nona pŋis la lo toho Jerusalem vara la mai la usia isan John vara, "Engko natu Kŋisto atu teni mo vono?" Ale John mo ŋaramira, <sup>20</sup> mo sopo vunvunia, mo taviti isara mara, "Enau mo sopo Kŋisto atu!" <sup>21</sup> Ale la usia isana lara, "Ale o to vereea vara, engko hare? Engko Elijah teni mo vono?"† Pani mo ŋaramira

\* 1:5: turuhoroa: teni 'hitevosahia'.

† 1:21: Elijah: tavitavuin Israel la levosahia vara Moses mo vereea tiroma vara tamlohi matea God mo viŋonia vara i pa pala isara hin te rani.



mara, "Mo vono, mo sopo enau." La mele usia lara, "Engko natu, pŕovet atu teni mo vono?" Mo mele vereia isara mara, "Mo vono." *Deut 18.15, 18; Isa 40.3*

<sup>22</sup> Ale la vereia isana lara, "Engko hare? O vere kamam hinia matan kama pa eŕi řarami la haratu la lo řule kamam. O to vere kamam hiniho vara engko hare."

<sup>23</sup> John mo vereia sohen pŕovet Isaiah mo vereamara, 'Enau leo atu mo lo ulo na jara hasetoho,

ha vasahi na malele matan vara Moli God i pa hahau hinia!' *Isa 40.3*

<sup>24</sup> Ale tatuara la mai isana enira la tai na vao Pharisee.

<sup>25</sup> La mele usi John hinia lara, "Kama rongoho moiso vara engko mo sopo Křisto atu, teni Elijah teni pŕovet atu Moses mo vereia vara i pa mai, ale vara mo sohena, mata sava ko lo paptijo na tamlohi?" *Deut 15.15-18*

<sup>26</sup> John mo řaramira mara, "Paptijo nike, enau na lo vaia na wai purongo, pani matea mo lo turu na livuhamim moiso kamim ka sopo lo hitevosahia, <sup>27</sup> haratu sei i pa mai usuriau enia mo aulu hiniau, ale enau na sopo tataholo vara a uli naŕihi na asi eve palona." <sup>28</sup> La hiniau sei la masese na taon Bethany, tavalu vano na wai Jordan. Hin jara atu John mo lo paptijo na tamlohi ea.

*Iesu Enia Natu Sipsip Non God*

<sup>29</sup> Mo mele rani sahe, John mo hite Iesu mo lo hahau

mo lo mai isana, mo vereia isan vao atu mara, "Eh! Ha kilau vano sevano isan tamlohi sei mo lo mai. Enia natu, Natu Sipsip non God tataholo, enia natu, i pa lavi naŕihi na hehe nona tamlohi na varama. <sup>30</sup> Enau na pete vere kamim hinia moiso vara, 'Tamlohi matea i pa mai hitahu hiniau mo aulu jea hiniau!' matan mo lo mauri mo lo toho moiso tiroma na noku pongi vora.' <sup>31</sup> Enau na sopo hitevosahia vara enia hare, pani enau na mai na lo paptijo na wai matan vara enia i pa pala isan Israel."

<sup>32</sup> Moiso, John mo lo vereulia mara, "Na hite Tanumen God mo tai aulu na tuka sohena vomaha matea, mo tau hinia. <sup>33</sup> Tiroma na sopo hitevosahia vara enia hare, pani haratu sei mo řuleau vara a paptijo na wai mo vereau hinia mara, 'Vara o hite na Tanume Tapu i sevuti i tau na tamlohi matea, tamlohi atu natu, ko lo kilau matana. Enia haratu i pa řuŕuni na tamlohi na suihan Tanume Tapu.' <sup>34</sup> Matan na hitea moiso enau a eŕi vereia kamim hinia vara varaŕuhu haranike natu, enia Natun God."

*Andrew Enia Peter La Hite Iesu*

<sup>35</sup> Mo mele rani sahe, John mo lo turu atu mo lo sorasora peresi na nona tamlohi usuri mo rua hin jara atu. <sup>36</sup> Moiso, John mo hite Iesu mo lo hahau na tavalura, moiso John mo vereia isara mara, "Ka hite tamlohi sevano, enia natu, enia Natu Sipsip non God

tataholo.”<sup>37</sup> Tamlohi usuri non John lara la rongoa, la vano vahatea vara la pa usuri Iesu.

<sup>38</sup> Moiso Iesu mo posi vano isara mo hite vara la lo usuria mara, “Ka opoi na sava?”

La řaramia lara, “Rabbi, imam mo lo toho epu?” Ale řaramin hija nike ‘rabbi’ enia ‘tija’.<sup>39</sup> Moiso mo vereia isara mara, “Ha mai, ha pa hitea.” La vano enira tolu Iesu la hite jara atu Iesu mo lo toho ea. Matan alo mo vati na ravravi moiso, ale la lo toho peresia mo sinai mo ravravi jea.

<sup>40</sup> Vonara matea atu sei mo rongo John mo lo verera hin Iesu, ale mo usuria enia Andrew, vorain Simon Peter.<sup>41</sup> Hinau tiroma Andrew mo vaia mo vano vara i ale tavaina Simon vara i vereia isana vara, “Kama hite tamlohi atu, enia natu pa Tamlohi Jujuri atu!” Tamlohi Jujuri na leon tavitavin Israel řaramina enia ‘Křisto’ na leo mara Greek.

<sup>42</sup> Andrew mo vereia isana moiso mo lavia mo mai isan Iesu. Moiso Iesu mo vereia isana mara, “Engko Simon natun John, pani nake a pa tau na hijam vara Cephas.” Raramin hija sei ‘Cephas’ enia ‘Peter’.

*Iesu Mo Tovi Philip Peresi Nathanael*

<sup>43</sup> Mo mele rani sahe Iesu mo vano Galilee. Mo tapai Philip ea, ale mo vereia isana mara, “O pa mai noku tamlohi o usuria!”<sup>44</sup> Philip mo tai hin taon sei Bethsaida,

jaran Andrew enia Peter.<sup>45</sup> Philip mo malue vara i ale Nathanael, moiso mo vereia isana mara, “Kama tapai pa tamlohi tataholo atu sei Moses mo lo ulia na Leu, ale přovet sohena la uliuli matana vara i pa mai.† Kama hitea enia mara Nazareth, natun Joseph, hijana Iesu.”

<sup>46</sup> Pani Nathanael mara mo rongoa mo vereia mara, “Nazareth! I vono! Sava hinau i řuhu i eři malue hin jara atu?”

Philip mo řaramia mara, “O mai, o pa hitea engko hasem.”

<sup>47</sup> La pa lo mai, Iesu mo hitera, mo vereia isan Nathanael mara, “Varařuhu, na lo hite na tamlohi matea enia mahapin Israel tataholo matea, mo sopo te halu hinia.”<sup>48</sup> Ale Nathanael mo usia mara, “Pani engko ko levosahiau sohena sava?”

Iesu mo řaramia mara, “Hin rani atu Philip mo sopo lo vano matam, enau na pete hiteho moiso, ko lo sakele na malumalu pulo fig vipahai atu.”

<sup>49</sup> Nathanael mo řaramia mara, “Tija, engko Natun God tataholo! Engko Supe non Israel!”§

<sup>50</sup> Iesu mo řaramia mara, “Enau na vereia purongo vara na hiteho ko lo sakele na pulo fig matea, moiso vahatea purongo ko rasuau, pani o pa mele hite na hina mařurahi matuvana, la pa jeu haratu sei ko lo hitera!”<sup>51</sup> Varařuhu

† 1:45: la ulia: Reti sei řaramina enia Retiulia tuai la ulia matařa. § 1:49: Nathanael mo hutua matan Iesu mo sopo hitea na matana, matan Nathanael mo sopo toho hin te jara mariviti isan Iesu.

na vereā isamim mo isoiso, ha pa hite tuka i roi, moiso ha pa hite na angelo non God la pa lo mai, la pa lo sahe aulu, moiso la pa lo sevuti isan Natun Tamlohi.”\*

## 2

### *Lahi Matea Cana*

<sup>1</sup> Rani mo tolu mo vano moiso, ale tinan Iesu mo lo toho na lahi matea na taon matan Cana na jara Galilee.

<sup>2</sup> La usi Iesu tolu na nona tamlohi usuri vara la pa mai hin lahi atu.

<sup>3</sup> Pani hin rani atu waen mo isoiso, mo sopo mele tea. Tinan Iesu mo vere Iesu hinia mara, “Mara waen mo isoiso, mo sopo mele tea.” <sup>4</sup> Iesu mo ʔaramia mara, “Eh, nana, mo sopo te noʔa hināu hinia, matan noku rani mo sopo lo mai.”\*

<sup>5</sup> Tinana mo vereā isan la tamlohi tuetueni hin jara atu mara, “Ha vai na sava hināu i pa vereā isamim.”

<sup>6</sup> Moiso mo kilau vano mo hite na jara wai tatavera mo limarave la vaira na lepa; Jew la lo utu na wai loso mata nora lotu hinira. La eʔi tau na wai i tikeli 50 lita hinira hatehateahi. <sup>7</sup> Iesu mo vereā isan la tamlohi tuetueni atu mara, “Ha maʔivisira na wai!” Ale la vaia sohena, <sup>8</sup> ale mo vereā isara mara, “Ha rengi tea, ha silea isana tamlohi tavera mata hanhani vara i inu rongoronga.”

Ale la vaia sohena mo vereā. <sup>9</sup> Pa tamlohi sei mo lo kilau na hanhani mo rongoa vara waen, pani enia mo sopo levosahi te hināu hinia, pani tamlohi tuetueni purongo enira la levosahia, ale mo vano mo tovi pa tamlohi atu vara i pa lahi mo mai isana, <sup>10</sup> mo vereā isana mara, “Tarea na lahi, tamlohi lahi mo lo sile na waen ʔuhu mo memeje tiroma vara tamlohi la pa putu makomona hinia, moiso i pa sile na waen mo sopo ʔuhu jea, pani engko ko tau na waen ʔuhu sei vara ʔa pa inua hitahu!” <sup>11</sup> Matamata tavera atu enia tiroma matamata tavera Iesu mo vaia, ale mo vaia na taon Cana na jara Galilee.† Iesu mo vuhesi na nona suiha ʔuhuʔuhu isana nona tamlohi usuri ea, ale la tau na nora rasua hinia. <sup>12</sup> Hitahun haratu Iesu mo sahe Capernaum peresi tinana, la tasina tolu na nona tamlohi usuri, vara la pa toho atu te makomo rani.

### *Iesu Mo Rohi Na Temple*

(Mt 21.12-13; Mk 11.15-17; Lk 19.45-46)

<sup>13</sup> Nake mo lo mai mariviti mata hanhani tavera nona Jew la tovia Passover, ale Iesu mo sahe Jerusalem matana. <sup>14</sup> Iesu mo unu na Temple mo hite na vao tamlohi matuvana la lo haʔehi na buluk, sipsip peresi na vomahe mata malamalai ea. Ale mo

\* **1:51:** la pa lo mai, la pa lo sahe aulu: Na rani Jacob mo rovo isan Esau, mo mavuho mo hite na angelo la lo mai, la lo sahe aulu na tuka na lada matea.

\* **2:4:** noku rani: rani sei vara tamlohi la pa hitevosahia vara Iesu enia Natun God tataholo. Hite: Jn 12.23. † **2:11:** matamata tavera: matamata atu mo vujangia vara la pa rasu na suihan God mo lo toho hin Iesu.

hite na tamlohi mata jenjen mania la lo jeni na mania na mania mata silesilea na lolo Temple, la lo sakele na nora tep. <sup>15</sup> Moiso mo vai na maja na oti asihai, mo levuti nañihira peresi na pulara maji mo isoiso na lolon Temple atu. Mo jarai jovi na nora mania, ale mo tipovi na nora tep.

<sup>16</sup> Isan la haratu la lo hañehi na vomahe mo vereia isara mara, "Ha lavi nañihi la hinai nike! Ha sopo vai na Iman Takaku ima añañehi matea!"

<sup>17</sup> Nona tamlohi usuri la hitea, la mele řomřomi na sava Retiulia mo vereia mara, "Noku opoia mata imam mo tavera jea, ale mo joleau vara a kilaua'.

<sup>18</sup> Ale tamlohi tavera nona Jew lara, "O pa eñi vai te matamata hatea nakerihi vara kama pa levosahia vara engko natu, tamlohi tataholo sei vara o pa eñi vai hinai sei?"

<sup>19</sup> Iesu mo řaramira mara, "Ha kauti Temple nike, moiso na rani i tolu purongo, a pa mele turuhia."

<sup>20</sup> Moiso tamlohi tatavera nona Jew atu la řaramia lara, "La voro Temple nike mata tauni mo ngavulu vati mo limarave (46), pani o pa mele turuhia na rani i tolu purongo sohena sava?"

<sup>21</sup> Pani Iesu mo lo retireti na epena sohena Temple matea. <sup>22</sup> Hin rani atu mo mele turu na mateia, nona tamlohi usuri la mele řomřomi nona retireti atu,

ale la rasu na Retitapu peresi na retireti non Iesu.

*Iesu Mo Levosahi Na Tamlohi*

<sup>23</sup> Hin rani atu Iesu mo lo toho Jerusalem na hanhani Passover, vao tavera la rasua vara enia tamlohi atu la lo kilau matana, matan la hite na matamata mo lo vaira. <sup>24</sup> Pani Iesu mo sopo rasura matan mo levosahi na sava mo lo toho na mapura. <sup>25</sup> Tea i sopo eñi vereulia isana vara tamlohi la sohena sava. Enia mo levosahira moiso.

### 3

*Nicodemus Mo Mai Isan Iesu*

<sup>1</sup> Ale tamlohi tavera matea na vao Pharisee hijana Nicodemus, enia tamlohi aulu matea nona Jew, <sup>2</sup> mo mai isan Iesu na vutepongi matea mo vereia isana mara, "Tija, kama levosahia vara God mo řuleho vara o vujangi kamam, matan mo sopo te tamlohi hatea vara i eñi vai na matamata vara God mo sopo toho isana."

<sup>3</sup> Iesu mo řaramia mara, "Varařuhu na vereho hinia, vara tamlohi la sopo lavi na vora paro tiroma,\* la pa sopo eñi hitevořahi mauri atu God mo aulu hinia."

<sup>4</sup> Nicodemus mo usia mara, "Pani tamlohi mo vajiaha moiso i pa mele vora sohena sava? I pa eñi mele unu na pangen tinana vara i pa mele vora teni i vono?"

<sup>5</sup> Iesu mo řaramia mara, "Varařuhu, varařuhu na vereia isam vara te tamlohi

\* 3:3: vora paro: vora atu mo tai aulu.

i sopo vora na wai peresi na Tanumen God, i pa sopo efi unu hin mauri atu God mo aulu hinia. <sup>6</sup> Tamlohi la sile na mauri tamlohi isan natura, pani Tanumen God mo lo sile mauri atu mo tai isana. <sup>7</sup> Ha sopo mafurahi hin noku reti sei, na lo vereea isam vara ha pa lavi vora paro atu mo tai na tuka. <sup>8</sup> Tanumen God hasena mo lo sile na mauri paro. Tanumen God mo sohena langi sei mo lo sere mo vano na jara mo opoia, ko rongoa, pani ko sopo levosahia vara mo tai epu teni na sava jara mo lo vano ea.”

<sup>9</sup> Nicodemus mo usia mara, “La hinau sei la pa sohen haratu sohena sava?”

<sup>10</sup> Iesu mo faramia mara, “Engko natu, tija nona tavitavu in Israel, pani ko sopo lo levosahi la hinau sei mata sava? <sup>11</sup> Varafuhu na vereea isam, kama lo vereuli na sava kama levosahira, matan kama hasemam hitera, pani ka sopo rasu nomam vereulia sei. <sup>12</sup> Vara a vere kamim na hinau mata varama, pani ha sopo rasuau, ha pa rasuau sohena sava vara a vere kamim na hinau matan na tuka? <sup>13</sup> Tea mo sopo lo sahe na tuka, ale i mele sinai, pani Natun Tamlohi hasena, enia mo tai atu mo sinai nike. <sup>14</sup> Sohen tuai Moses mo tahe na mata mo vaia na bronze na tano koru, ale sohen haratu natu la pa tahe Natun Tamlohi aulu,† <sup>15</sup> vara

sava tamlohi mo tau na nona rasua isana, enia i pa lavi na mauri tui.

<sup>16</sup> Matan God mo opoi na tamlohi na varama sohen harihi: mo sile Natuna sei enia vorahese, vara sava tamlohi mo rasua i pa sopo vano na komo, pani i pa lavi na mauri tui. <sup>17</sup> Matan God mo sopo rule Natuna na varama vara i ari na tamlohi, mo vono. Mo rulea vara i jurira hinia. <sup>18</sup> Haratu mo rasu na Natun God enia i pa sopo lavi na talai, pani isan la haratu la sopo rasua, God mo pete tau na nora talai moiso matan la sopo rasu na hijan Natun God vorahese.

<sup>19</sup> Pulo nora talai mo sohen harihi: matan malarani mo mai na varama, pani tamlohi la opoi na rofoha mo tavera mo jeu na malarani matan nora vavahinau la hehe. <sup>20</sup> Pani la haratu la lo vai na hehe la pa sopo efi mai na malarani, la rohu vara la mai na malarani matan vara i vono, malarani i pa vuhesi na nora hehe. <sup>21</sup> Pani la haratu la lo ololo na retivarafuhu na maurira, enira la pa mai na malarani, matan vara i vujangia vara nora vavahinau la tai isan God.”

### *John Mo Vereuli Iesu*

<sup>22</sup> Hitahun harihi, Iesu tolu na nona tamlohi usuri, la mai na jara Judea. Enia mo lo toho peresira makomona, ale mo lo paptijo na tamlohi.

† **3:14:** mata mo vaia na bronze: hin pongi atu tuai God mo sile na talai isana tavitavu in Israel. Mo sohai na mata vara la hatimateira. Moses mo vai na mata na bronze aen mo tahea aulu matan God mo vereea mara, vara tea i kilau sahe isana i pa mele ruhu, ale la haratu la rasua la mauri.

23-24 Hin rani atu la sopo lo tau John na ima řilangi, enia mo lo paptijo na tamlohi la lo mai isana na jara Aenon mariviti Salim mata wai mo mařivi ea.

25 Hin rani atu tamlohi usuri non John la lo vasvas peresi na Jew matea mata nora posposi mata hoje vara la vokevoke.‡ 26 Ale la mai isan John la vereea isana lara, "Tija, pa tamlohi atu ko lo vereea hin rani atu, na tavalu wai Opae Jordan, nakerihi mo lo paptijo na tamlohi, moiso tamlohi tari la lo marongia."

27 John mo řaramira mara, "Tea i sopo eři vai te hinau hatea, pani vara God mo tinarihia, enia i pa eři vaia. 28 Kamim ka levosahi na sava na pete vereea isamim moiso vara enau, mo sopo Kristo atu, pani God mo řuleau vara a mai tiroma hinia. 29 Ka sopo levosahia vara tamlohi i pa lahi natu, mo lahi na hařai, pani tapalan tamlohi atu mo avulahi vara mo rongo na leona, ale vara i turu mariviti isana. Enia natu, noku avulahi tavera mo vano sohena natu. 30 Enia hijana i pa mai i mele aulu jea, pani hijaku i pa lo sivo atano jea.

#### *Haratu Mo Tai Na Tuka*

31 Haratu mo tai na tuka, enia mo aulu na tamlohi tari. Haratu mo tai na varama, enia non varama, ale enia mo eři vere na hinau na varama purongo. Pani haratu mo tai

na tuka mo aulu na tamlohi tari. 32 Mo lo vere na sava mo hitera, mo rongora, pani tamlohi la sopo rasua. 33 La haratu la rasua enira la vereea vara God enia varařuhu. 34 Matan God mo řule Natuna vara i vere na nona reti, matana, mo sile vevuhi na suiha Tanumena isana.

35 Tama sei, mo opoi Natuna, ale mo tau na hinau tari na limana vara i aulu hinira. 36 Haratu mo rasu Natuna mo pete lavi na mauri tui moiso. Pani haratu mo sopo ooloo hin Natuna, i pa sopo eři lavi mauri tui atu, matan talai lolokoru non God mata hehe mo lo toho isana."

## 4

### *Hařai Mara Samaria Matea*

1 Na rani Iesu mo levosahia vara Pharisee la rongoa moiso vara tamlohi la lo usuria, la jeu la haratu la lo usuri John, 2 mo řuhu vara ha levosahia vara Iesu hasena mo sopo paptijo na tamlohi, pani nona tamlohi usuri hasera la lo paptijo na tamlohi, 3 ale matana, Iesu mo malue Judea mo mele vano Galilee.

4 Hin rani atu mo lo hahau roto Samaria, 5 mo hahau mo mai Samaria na taon matan Sychar mariviti hin lepa atu sei tuai Jacob mo silea isan natuna Joseph. 6-8 Wel atu Jacob mo helia tuai mo pa lo toho ea, ale Iesu mo sakele na tavaluna matan mo hahau jara peravu mo malokoloko.

‡ 3:25: hoje vara la vokevoke: tavgvuin Israel tuai la tau na posposi matuvana mata hoje na nora jilivi teni te hinau sohena matan la řomřomia vara God i pa avulahi hinira matana.

Ale na livuha rani, tamlohi usuri non Iesu la vano vara la voli te hanhani na taon. Haʻrai mara Samaria matea mo mai vara i utu te wai na wel. Iesu mo usia isana mara, “O eʻri utu te maku wai?”<sup>9</sup> Haʻrai atu mo ʻaramia mara, “Engko Jew matea, ale enau haʻrai mara Samaria! Vara sava engko ko usiau vara a utu te mam wai?” Mo usia sohena matan mara Judea peresi na mara Samaria la lo hitelehilehira.

<sup>10</sup> Moiso Iesu mo ʻaramia mara, “Engko ko sopo levosahi na sava God mo opoia vara i silea isam. Ale engko ko sopo levosahia vara harepu nahai mo lo usiho na wai mata i inua. Vara o pa lo levosahia, o pa usiau na wai sei mo sile na mauri.”

<sup>11</sup> Ale haʻrai atu mo usia isana mara, “Tapala, mo sopo te nom baket, ale wel sei mo sivo atano. O pa eʻri utu wai atu mo sile na mauri epu?”<sup>12</sup> Pimam Jacob mo heli wel sei matamam, moiso enia peresi na vaona peresi na pulana maji palovati tari la inu hinia. Engko o pa eʻri jeu na sava Jacob mo vaia?”

<sup>13</sup> Iesu mo ʻaramia mo vereia mara, “Tamlohi tari la lo inu wai sei la pa mele maʻohu.”<sup>14</sup> Pani la haratu vara la inu na wai a pa silea, la pa sopo eʻri mele maʻohu na rani sei la pa mai. Wai atu a pa silea enia patu wai sei mo sile na mauri tui.”

<sup>15</sup> Ale haʻrai atu mo ʻaramia mara, “Tapala, o sileau a inu wai atu matan vara a sopo

mele maʻohu vara a pa mele mai hin wel nike.”

<sup>16</sup> Ale Iesu mo vereia isana mara, “O vano o lavi tuam i mai.”

<sup>17</sup> Haʻrai atu mo ʻaramia mara, “Enau mo sopo te tuaku.” Iesu mo vereia isana mara, “Ko vereia ko varaʻuhu, mo sopo te tuam.”<sup>18</sup> Engko ko lahi, ale tuam mo lima moiso, ale nake tamlohi atu ko lo toho peresia enia mo sopo tuam tataholo. Haratu ko vereia mo varaʻuhu.”

<sup>19</sup> Ale haʻrai atu mo vereia isana mara, “Moli, na hitevosahia vara engko pʻovet matea.”<sup>20</sup> Pimam la lo lotu na vutivuti nike,\* pani kamim Jew ka vara Jerusalem purongo enia jara tataholo vara tamlohi la lo lotu ea.”

<sup>21</sup> Ale Iesu mo vereia isana mara, “O rasuau, pongi matea mo lo mai vara ha pa sopo mele lotu Tama hin vutivuti nike teni Jerusalem.”

<sup>22</sup> Kamim mara Samaria, ka sopo levosahia varaʻuhu vara ka lo lotu hare. Pani kamam Jew, kama levosahi God atu kama lo lotua. Hin na mahapi Jew God i pa juri na varama.”<sup>23</sup> Pani pongi matea mo lo mai, ale mo tapulo moiso vara la haratu la lotu varaʻuhu, la pa lotu Tama sohena Tanumena mo vujangira na malele retivaraʻuhu. Tama mo lo ale na tamlohi sohen harihi vara la lotua.”<sup>24</sup> God enia Tanume, la haratu sei la lotu God la pa lotua sohena Tanumena i pa

\* 4:20: Vutivuti nike: Vutivuti Gerizim, mariviti na taon Shechem.

tiromara vara la pa usuri na malele retivaraʻuhu.”

<sup>25</sup> Haʻai atu mara, “Enau na levosahia vara Tamlohi Jujuri i pa mai, enia natu kama tovia Kʻristo. Ale hin pongi atu vara i mai, i pa vere mamahuni na hinau tari isamam.”

<sup>26</sup> Iesu mo vereaa mara, “Enau natu, tamlohi atu mo lo toho jejeu. Na lo retireti isam nakerihi.”

<sup>27</sup> Vahatea atu, tamlohi usuri non Iesu la mele hilu, moiso la maʻurahi tavera matan Iesu mo lo retireti peresi na haʻai matea. Pani te vonara mo sopo usia vara, ‘Ko opoi na sava?’ teni ‘Mata sava ko lo retireti isan haʻai nike?’†

<sup>28</sup> Moiso haʻai atu mo tau nona jara wai, ale mo mele maro hilu mo vano na taon. Mo vereaa isana tamlohi mara, <sup>29</sup> “Ha mai! Ha hite na tamlohi matea sei mo vereaa na hinau tari na vaira moiso. Korong enia natu, Kʻristo atu teni?” <sup>30</sup> Ale tamlohi tari hin taon atu la vano la hite Iesu. <sup>31</sup> La hinau atu la lo vano, moiso tamlohi usuri non Iesu la lo vereaa isana lara, “Tija, o hani te hinau.”

<sup>32</sup> Pani Iesu mo verera hinia mara, “Haku hinau kamim ka sopo levosahia te hinau hinia.”

<sup>33</sup> Nona tamlohi usuri la lo usiusira hinia lara, “Tea mo sile te hanhani isana teni mo vono?”

<sup>34</sup> Pani Iesu mo vereaa isara mara,

“Haku hinau, enia mata a vai na masalon God. Enia natu, mo ʻruleau, ale enau a pa vai vevuhi na nona vavahinau sei mo taua isaku vara a vaira. <sup>35</sup> Ha sopo vereaa vara vitu mo vati mo lo toho vara i tikeli na asitauni. Pani enau na lo vereaa kamim hinia vara ha to kilau vano, ha pa hite vara isa la jea la lo mena mata lavi na asitauni moiso. <sup>36</sup> Tamlohi asitauni la lo lavi na volira, mata la lo vu na vua mata mauri tui. La haratu la lo hapoʻahi na piri peresi la haratu la lavi na vua asitauni la pa avulahi jea na jara matea.

<sup>37</sup> Hin haratu reti nike mo vararaʻuhu, ‘Hai la hapoʻahi na piri, hai la lavi na vua asitauni.’ <sup>38</sup> Enau na lo ʻrule kamim vara ha pa lavi na vua asitauni na isa sei tamlohi tinapua la vai na voko ʻilangi ea moiso.”

### *Mara Samaria La Rasu Iesu*

<sup>39</sup> Vao tavera mara Samaria hin taon atu la tau na nora rasua hin Iesu matan haʻai atu mo vereaa mara, “Tamlohi nike, mo vereaa na hinau tari na vaira moiso.” <sup>40</sup> La mai la usia isana vara i lo toho na taon nona mara Samaria. Ale mo lo toho ea mata rani mo rua.

<sup>41</sup> Ale vao tavera mara Samaria la tau na nora rasua hin Iesu, mata sava la rongoa mo lo vereaa. <sup>42</sup> La vereaa isan haʻai atu lara, “Kama sopo rasu Iesu matan la hinau atu ko lo vereaa isamam purongo,

† **4:27:** mo lo retireti peresi na haʻai matea: la romʻromia vara nona tamlohi usuri la hutura hin Iesu matan posposi tavitavuini Israel tuai mo sopo tataholo vara te tamlohi vujangi hatea i sorasora peresi te haʻai hasena teni vara Iesu mo lo sorasora peresi na haʻai Samaria enira nora meresahi.



pani matan kama hasemam rongoa, ale kama levosahia mo řuhu vara enia natu, Mujuri mata Varama!"

*Tamlohi Tavera Matea Mo Rasu Iesu*  
(Mt 8.5-13; Lk 7.1-10)

<sup>43</sup> Mo mele rani mo rua tinapua moiso, mo malue mo vano Galilee, <sup>44</sup> matan Iesu mo vereea moiso vara tamlohi la pa ooloo na přovet na jara tari, pani mo sopo na jarara tataholo, <sup>45</sup> ale mo sinai Galilee, ale mara Galilee atu la avulahi na nona mai matan la hite la hinau tari atu mo lo vaia Jerusalem na hanhani Passover ea matan enira sohana la sahe Jerusalem mata hanhani ea.

<sup>46</sup> Ale hin rani atu mo lo toho Galilee, mo mele hilu mo vano Cana taon sei mo posi na wai mo mai waen ea tiroma. Ale tamlohi tavera matea atu Capernaum natuna mo rojo.

<sup>47</sup> Pa tamlohi tavera mo rongoa vara Iesu mo tai Judea mo mai Galilee moiso, mo vano vara i usia řilangi vara i eři vai mamahuni natuna.

<sup>48</sup> Iesu mo vereea isan tamlohi tavera atu mara, "Kamim tamlohi, i pa sopo te nomim rasua vara ha sopo hite na matamata tavera peresi na hina mařurahi!"

<sup>49</sup> Pani tamlohi atu, mo řaramia mara, "Moli! O eři mai vila? Vara i vono, natuku i pa mate!"

<sup>50</sup> Iesu mo řaramia mara, "Natum i pa mauri. O mule, o vano isana!" Tamlohi atu mo rasu na sava Iesu mo vereea isana, ale mo tapulo mule.

<sup>51</sup> Te slev non tamlohi tavera atu la tapaia na malele, ale la vereea isana lara, "Natum mo mele řuhu moiso!" <sup>52</sup> Mo usira mara, mo mele řuhu nangisa, ale la řaramia lara, "Seserei atu mo malue isana nanovi na matan alo matea."

<sup>53</sup> Vahatea taman uluvou atu mo řomřomia vara matan alo matea nanovi Iesu mo vereea isana mara, "Natun i pa mauri!" Ale tamlohi atu peresi na vao imana la tau na nora rasua hin Iesu.

<sup>54</sup> Matamata tavera sei enia harua matamata Iesu mo vaia hin rani atu, hitahun haratu mo malue Judea mo vano Galilee.‡

## 5

*Tamlohi Rojoa Matea*

<sup>1</sup> Hitahun la hinau sei, Iesu mo sahe Jerusalem mata hanhani tavera matea nona Jew. <sup>2</sup> Na lolon Jerusalem paltungu tavera matea la vaia mata loloso mo lo toho ea na leon tavitavin Israel la tovia Bethsaida. Mo lo toho mariviti na matarua matea mata sipsip sei la tauhasehira mata malamalai vara la lo unu na rope Temple atu. Paltungu atu la voro na palapala mo lima mo řalihia.\*

‡ **4:54:** matamata: o hite reti sei hin jara rihi sei 2.11. \* **5:2:** paltungu: peravun paltungu atu 95 metre, ale hin la pongi atu tamlohi la rasua vara wai i vali hin paltungu atu matan la vereea vara angelo matea mo tai na tuka vara i ariaria. Ale haratu mo sevuti tiroma hin paltungu atu i pa mele řuhu.

3-4 Tamlohi matuvana la rojo, la haratu la matavuso, la haratu tavalu epera la mate, la haratu epera la mate, sohen la papao, la lo juruvi řalihi paltungu sei.

5 Na pahisan paltungu tavera atu, tamlohi matea tavalu epena mo mate mata tauni mo ngavulu tolu mo limaravtolu (38). 6 Ale Iesu mo hite tamlohi sei mo hitevosahia vara enia tavalu epena mo mate mata tauni matuvana moiso, ale mo usia isana mara, "Eh, ko opoia vara o řuhu teni mo vono?"

7 Ale tamlohi atu mo řaramia mara, "Tapala, mo sopo te tapalaku vara i pa eři tauau na lolo paltungu hin rani atu wai mo lo vali. Na vaihitea vara a pa sivo tiroma, pani tamlohi tinapua la lo sivo tiroma hiniau."

8 Iesu mo vereia isana mara, "O lavi na epam o hahau!"

9 Vahatea tamlohi atu mo mele řuhu. Mo lavi na epana mo tapulo hahau řalihi. Rani atu hinau atu mo masese hinia, enia Sabbath matea.

10 Moiso tamlohi tavera nona Jew la hite tamlohi atu mo lo řalihi mo lo lavi na epana, la vereia isana lara, "Ĥaranike Sabbath nahai! Tea i sopo eři lavi na epa i lo hahau na Sabbath!"

11 Pani mo řaramira mara, "Tamlohi atu mo vaiau na řuhu mo vereia isaku vara a lavi na epaku a hahau."

12 La usia isana lara, "Sava tamlohi natu, mo vereho vara o pa lavi na epam o hahau?" 13 Pani enia mo sopo levosahia vara Iesu

enia hare, ale Iesu mo malue moiso mata vao hin jara atu.

14 Hitahun haratu, Iesu mo tapai tamlohi atu na lolo Temple, ale mo vereia isana mara, "Engko ko řuhu moiso, pani o sopo mele vai te hehe, vara i vono te hinau i mele sati jea i pa tikeliho." 15 Ale tamlohi atu mo malue mo vano mo vereia isana tamlohi tavera nona Jew mara Iesu natu, mo vaia mo řuhu. 16 Ale matana, tamlohi tavera nona Jew la tapulo tipahi Iesu matan mo vai na hinau sohen na Sabbath.

17 Pani Iesu mo vereia mara, "Tamaku mo lo vavahinau mo tikeli nakerihi, ale enau sohen na lo vavahinau."

18 Ale matan haratu, tamlohi tavera nona Jew la vaihitea řilangi vara la vilimateia. Mo sopo matan haratu vara mo lo tope na Sabbath purongo, pani matan mo lo vereia vara God enia Tamana, retireti atu mo vaia enia mo tataholo hin God.

### *Suiha Non Natun God*

19 Iesu mo řaramira mara, "Varařuhu na vereia, Natun Tama hasena i sopo eři vai te hinau hatea, pani haratu purongo sei mo hite Tamana mo lo vaia tiroma, ale enia i pa vaia. Matan sava hinau Tamana mo lo vaia, Natuna sohen i pa vaia. 20 Matan Tama mo opoi Natuna, ale mo vujangia na hinau tari enia mo lo vaia. Tama i pa mele vujangi na hinau matuvana la jeu haranike isana matan vara ha pa mařurahi tavera. 21 Mo sohen Tama

mo sauteterahi na mate mo silera na mauri, ale Natuna sohena i pa sile na mauri isan hare enia mo opoia.

<sup>22</sup> Tama mo sopo ari te tamlohi, pani mo tau na aria mata tamlohi tari isan Natuna, <sup>23</sup> matan Tama mo opoia vara tamlohi tari la oloolo hin Natuna sohen la lo oloolo hinia. Vara tea mo sopo oloolo hin Natuna, mo sohena mo sopo oloolo hin Tama sei mo lo rulea.

<sup>24</sup> Varaŕuhu na vereea isamim, vara harepu mo rongo na noku reti, ale mo rasu haratu mo ruleau, enia mo pete lavi na mauri tui moiso, enia i pa sopo lavi na talai hin pongi atu, pani mo malue moiso na mateia, ale mo lavi na mauri.

<sup>25</sup> Varaŕuhu na vereea isamim, pongi matea mo lo mai, mo pete mai moiso, vara mate la pa rongo na leon Natun God, moiso la haratu purongo sei la tapurongo isana, la pa mauri.

<sup>26</sup> Ale matan Tama enia pulo mauri enia mo sile Natuna vara enia sohena, i pa lavi pulo mauri atu. <sup>27</sup> Moiso, mo silea vara Natuna i lavi na suiha vara i ari na tamlohi, matan enia Natun Tamlohi.

<sup>28</sup> Ale ha sopo maŕurahi matan hinau sei! Matan pongi matea mo lo mai vara la haratu la lo toho na taptap la pa rongoa na leon Natun Tamlohi, <sup>29</sup> ale la pa malue, la haratu la vai na hina ŕuhu la pa sauteterahi la vano na mauri, la haratu la lo vai na hina hehe la pa sauteterahi la lavi na talai.

### *Retivuhesi Non Iesu*

<sup>30</sup> Enau haseku a sopo eŕi vai te hinau. Haratu mo lo ŕuleau, enia mo vereau vara a pa ari sohena sava. Enau na ari tataholo matan na lo oloolo hinia, ale na sopo vai na masaloku matan na lo vai na masalona.

<sup>31</sup> Vara a lo vereau enau haseku, tamlohi la pa sopo rasua vara na lo varaŕuhu. <sup>32</sup> Tamlohi tinapua matea mo lo vere na hinau varaŕuhu matakū. Ale na levosahia vara la hinau atu mo lo verera matakū enira la varaŕuhu. <sup>33</sup> Kamim ka rule na tamlohi la vano isan John moiso, ale enia mo vereuli na retivaraŕuhu matakū isara, <sup>34</sup> pani na sopo turu na vereulia nona tamlohi matakū, pani na lo vere la hinau sei matan vara ha pa eŕi juri hinira.

<sup>35</sup> Ale John enia lamu matea mo lo hani mo memera, ale kamim ka lo avulahi jea mata makomo rani na memerana.

<sup>36</sup> Pani hinau matea mo mele ŕuhu jea, mo jeu vereulia atu John mo lo vereea matakū. La hinau atu Tama mo silea isaku vara a vaira, enira natu, la vujangia vara Tama hasena mo lo ruleau.

<sup>37</sup> Ale Tama sei mo lo ŕuleau, enia mo lo vereau, pani kamim ka sopo lo rongo na leona teni hitea hin te rani. <sup>38</sup> Ale ka sopo lavi na nona reti na mapumim matan ka sopo rasu haratu mo lo ruleau na mai.

<sup>39</sup> Kamim ka lo ale na Retiulia matan ka ŕomia vara hinira ha pa lavi na mauri tui. Retitapu sei la lo vereuliau,

<sup>40</sup> pani ka ũohu vara ha mai isaku mata mauri tui.

<sup>41</sup> Na sopo lavi na ololo nona tamlohi matakū, <sup>42</sup> pani na levosahi kamim vara mo sopo te vonamim hatea i opoi God. <sup>43</sup> Na lo mai na suiha hijan Tamaku, pani ka lo tipahiau. Vara te tamlohi i mai na hijana hasena, kamim ha pa avulahi vara ha lavia. <sup>44</sup> Ha pa rasu sohena sava matan kamim, ka lo opoia vara tea i sile na ololo isan te vonamim, ale ka sopo opoia vara God hasena i pa sile na ololo isamim.

<sup>45</sup> Ha lo levosahia vara enau a pa sopo retitalai hin kamim isan Tama! Pani Moses sei, ka lo tau na nomim ũomtoho hinia, enia i pa retitalai hin kamim. <sup>46</sup> Varaŕuhu, vara ha rasu Moses varaŕuhu, ha pa rasuau, matan enia mo uliuli matakū. <sup>47</sup> Pani vara ka sopo eŕi rasu na sava Moses mo ulia, ha pa eŕi rasu na noku reti sohena sava?"

## 6

*Iesu Mo Vahani Na Tamlohi*  
(Mt 14.13-21; Mk 6.30-44; Lk 9.10-17)

<sup>1</sup> Hitahun la hināu sei, Iesu mo vano na tavalu tasin Galilee la tovia Tiberias. <sup>2</sup> Vao tavera la lo usuria matan la hite na matamata tavera mo lo vaia isana tamlohi rojoa la mele ũuhu. <sup>3</sup> Ale matan vao atu Iesu tolu na nona tamlohi usuri la sahe aulu na vutivuti, ale la sakele

ea. <sup>4</sup> Pongi Passover hanhani tavera nona Jew mo lo mai.

<sup>5</sup> Hin rani atu, Iesu mo hite na vao tavera la lo mai isana, mo usia isan Philip mara, "Ra pa lavi te hanhani epu vara ŕa pa vahani vevuhi la tamlohi nike hinia?" <sup>6</sup> Iesu mo vereā sohena isan Philip vara i vaihitea matan enia mo levosahia moiso vara i pa vai na sava.

<sup>7</sup> Philip mo ŕaramia mara, "Voli tamlohi matea mata rani mo ngavulu sangavulu rua i sopo eŕi navu vara i vahanira hatehateahi na makomo pereti!" <sup>8</sup> Vonara, tamlohi usuri non Iesu matea, hijan Andrew, enia tasin Simon Peter, mo vereā isana mara, <sup>9</sup> "Natirihi matea nahai, mo lavi na pereti vavarihi mo lima la vaia na piri barley\* peresi na maji mo rua, pani haratu mo ŕuhu na sava isan la tamlohi nike?"

<sup>10</sup> Iesu mo vere mara, "Ha vere na tamlohi tari la saksakele nike!" Mo vereā sohena matan ŕuvuŕuvu ŕuhu hin jara atu mo maŕivi. Evi tamlohi purongo la lo sakele atu mo tikeli tari vaha lima (5000). † <sup>11</sup> Ale Iesu mo lavi pa la pereti atu mo vere meje isan God matara, moiso mo asease na pereti isan la haratu la lo sakele. Mo lavi la maji atu mo vaia sohena. Mo vahani na tamlohi, la hanhani sohen la opoia, la masu. <sup>12</sup> Hitahun haratu enira mo isoiso la masu, Iesu mo vere na nona tamlohi usuri vara la takonahi na

\* **6:9:** barley: piri matea mo sohena piri wit mata flaua, pani tamlohi tilavono la hania. † **6:10:** Evi tamlohi purongo: mo sopo evievi te harai teni natuvarihia la lo toho ea.

sopesope hanhani vara tea i pa sopo sati purongo. <sup>13</sup> Tamlohi non Iesu, la sohoni na tanga tavera mo sangavulu ŀomana mo rua na sopesopen la pereti atu mo lima. <sup>14</sup> Hitahun matamata tavera atu Iesu mo vaia, tamlohi la tapulo vereea vara, "Tamlohi nike, enia pŀovet atu Moses mo lo vereea vara i pa sinai na varama!" *Deut 18.15-18*

<sup>15</sup> Moiso Iesu mo hitevoŀahia vara la pa ngurunguru isana vara la pa tahea nora supe. Ale matana, mo rovo mo sahe aulu na vutivuti vara i toho enia hasena.

*Iesu Mo Hahau Na Pusa Tasi*  
(Mt 14.22-27; Mk 6.45-52)

<sup>16</sup> Hin ravravi atu tamlohi usuri non Iesu la sevuti sivo na tasin Galilee, <sup>17</sup> moiso la vele na boti matea, la tapulo sua roto na tasi matan Capernaum, ale mo ŀoŀoha moiso, Iesu mo sopo lo sinai isara, <sup>18</sup> ale langi matea mo tapulo sere mo ŀilangi, mo vaia mo tasiha.

<sup>19</sup> Nona tamlohi la sua, la jeu na kilometre mo limarave moiso, ale la hite Iesu mo lo hahau na pusa tasi mo lo mai isara, la matahu tavera maŀana. <sup>20</sup> Pani Iesu mo vereea isara mara, "Enau sei! Iesu! Ha sopo matahu!" <sup>21</sup> Nona tamlohi la opoia vara i vele na boti, ale vahatea purongo boti atu mo lo hoso hin jara atu la lo vano matana.

*Iesu Enia Pereti Mata Mauri*

<sup>22</sup> Mo mele rani sahe, la vao atu la lo toho na tavalu tasi boti mo tai isara, la levosahia vara mo sopo mele te boti tinapua i lo toho atu, la levosahia vara Iesu mo sopo vele hin boti rihirihi atu peresi na nona tamlohi usuri, pani enira hasera purongo la malue. <sup>23</sup> Hin rani atu, boti hai nona mara Tiberias la hoso mariviti hin jara atu Iesu mo lo vere meje mata hanhani ea. <sup>24</sup> Ale vahatea purongo, la levosahia vara Iesu peresi na nona tamlohi usuri la sopo toho atu. Ale la vele hin la boti atu la sivo Capernaum vara la ale Iesu. <sup>25</sup> Ale la vano la tapaia na tavalu tasi, la usia isana lara, "Tija, ko pa mai nangisa?"

<sup>26</sup> Iesu mo ŀaramira mara, "Varaŀuhu na vereea isamim, ka sopo aleau mata mata-mata tavera ka lo hitera, pani matan ka lo hani vevuhi na hanhani ka opoia vara ha hanira. <sup>27</sup> Ha sopo kalvono mata hanhani sei i pa tihai purongo, pani ha vavahinau matan hanhani sei i pa sopo eŀi tihai ale i pa sile na mauri tui. Natun Tamlohi i pa sile kamim hin hanhani atu matan, Tama mo tinaŀihia vara enia i vaia."

<sup>28</sup> Vao atu la usia lara, "Sava hinau tataholo natu, God mo opoia vara kama pa vaia?"

<sup>29</sup> Iesu mo ŀaramira mara, "Vavahinau sei God mo opoia mo sohen harihi: vara ha tau na nomim rasua hin haratu mo lo ŀulea."

<sup>30</sup> La ŀaramia lara, "Sava matamata o pa vaia, matan vara kama pa tau na nomam

rasua hiniho? Engko o pa vai na sava? <sup>31</sup> Pimam tuai la hani na mana na tano koru. Sohen la ulia na Retiulia vara, 'Mo silera na pereti mo tai na tuka vara la hania'." *Exo 16.4*

<sup>32</sup> Iesu mo verera hinia mara, "Varaŕuhu na vereea isamim, Moses mo sopo sile na pereti mo tai na tuka isamim, pani Tamaku natu mo lo sile kamim na pereti varaŕuhu sei mo tai na tuka. <sup>33</sup> Pereti atu God mo silea enia haratu mo tai na tuka, matan vara i sile na mauri na varama."

<sup>34</sup> Ale la tamlohi atu la vereea lara, "Moli, tarea o pa sile kamam hin pereti atu!"

<sup>35</sup> Iesu mo řaramira mara, "Enau pereti atu mo lo sile na mauri! Vara tea i mai isaku i pa sopo eři mele marohati. Mo sopo tea vara i tau na nona rasua hiniho i pa mele maŕohu. <sup>36</sup> Na vereea isamim moiso vara kamim ka hiteau, pani ka sopo lo rasuau! <sup>37</sup> La haratu enira mo isoiso Tama mo lo sileau hinira la pa mai isaku. Ale haratu mo mai isaku a pa sopo tipahia.

<sup>38</sup> Matan enau na sevuti na tuka vara a pa vai na masalon God. Na sopo mai vara a pa vai na masaloku haseku.

<sup>39</sup> Hara nike masalon haratu mo lo řuleau, vara a sopo vaitihai te vonan la haratu mo lo sileau hinira, pani enau a pa sauteterahira na pongi hitahu.† <sup>40</sup> Masalon Tamaku mo sohen harihi, mo opoia vara la haratu la hite Natuna, la pa tau na nora rasua isana, ale vara la lavi na mauri tui.

Ale na pongi hitahu, enau a pa sauteterahira."

<sup>41</sup> Ale tamlohi tavera nona Jew atu la tapulo ngutungutu matan mo vereea vara, 'Enau natu, pereti atu mo tai na tuka!' <sup>42</sup> Ale la vereea lara, "Avei, tamlohi akerihi, enia Iesu natun Joseph sei teni mo vono? Enŕa řa levosahi tamana enia tinana, pani mo pa vere vara enia mo tai na tuka sohen sava?"

<sup>43</sup> Iesu mo vereea isara mara, "Ha sopo mele ngutungutu! <sup>44</sup> Tama mo řuleau, ale masalon Tama hasena sei mo vai na tamlohi i eři mai isaku, vara i vono, i pa sopo tea i eři mai isaku. Pani vara tea i mai isaku, a pa sauteterahira na pongi hitahu. <sup>45</sup> Sava sei la uli na reti nona pŕovet tuai lara, 'God i pa vujangira enira mo isoiso'. *Isa 54.13* Ale la haratu la lo tapurongo hin Tama, la pa lavi na levosahi isana, enira la pa mai isaku.

<sup>46</sup> Haratu hasena sei mo tai isan God mo hite Tama atu. Mo sopo mele te tinapua vara i hite Tama hin te pongi.

<sup>47</sup> Varaŕuhu na vereea vara la haratu la lo tau na nora rasua hiniho, la pete lavi na mauri tui moiso. <sup>48</sup> Enau pereti atu mo lo sile na mauri! <sup>49</sup> Pimim tuai la hani na mana na tano koru, ale la mate. <sup>50</sup> Pani pereti atu mo lo tai na tuka mo sevuti matan vara tea vara i hania i pa sopo eři mate hin te pongi. <sup>51</sup> Enau pereti mauri atu mo tai na tuka! Vara tea i hani pereti atu enia i pa mauri jejeu. Pereti mauri

† 6:39: pongi hitahu: pongi atu God i pa ari na tamlohi tari hinia.

atu a pa silea isana tamlohi na varama, enia epeku.”

<sup>52</sup> Ale, tamlohi tavera nona Jew atu la ŋohu hin Iesu la tapulo vauriuri isara hasera lara, “Sohena sava natu, tamlohi nike i eŋi sileŋa na epena vara ŋa hania?”

<sup>53</sup> Iesu mo vereea isara mara, “Varaŋuhu na vereea isamim, vara ha sopo hani na epen Natun Tamlohi, ale vara ha sopo inu na ŋaena, i pa sopo te mauri varaŋuhu hin kamim. <sup>54</sup> Pani haratu mo hani na epeku, mo inu na ŋaeku, enia mo pete lavi na mauri tui moiso, ale enau a pa sauteterahia na pongi hitahu. <sup>55</sup> Epeku, enia hanhani varaŋuhu, ale ŋaeku, enia wai inu varaŋuhu. <sup>56</sup> Vara tea i hani na epeku, ale i inu na ŋaeku, enia i pa toho hiniau, enau a pa toho hinia.

<sup>57</sup> Tama sei mo ŋuleau, enia mo lo mauri, ale enau na lo mauri matana. Nake, tamlohi tari sei la haniau la pa mauri matakū. <sup>58</sup> Pereti nike, mo tai na tuka mo sinai, mo sopo sohen haratu pimim la hania tuai matan enira la mate, pani hare mo hani pereti nike, i pa mauri jejeu.” <sup>59</sup> Iesu mo lo retivujavujangi na ima lotu nona Jew Capernaum na rani mo lo vere la hinau sei.

### *La Vahaŋi Hinia*

<sup>60</sup> Nona tamlohi usuri matuvana la rongo nona reti atu lara, “Avei, hara sei mo lo vere na sava sei?”

<sup>61</sup> Iesu mo levosahia vara nona tamlohi usuri la lo ngutungutu, ale mo usira mara, “Ka rongo hinau sei mo

sati? <sup>62</sup> I pa sohena sava vara ha hite Natun Tamlohi i mele sahe na tuka sei mo tai ea mo sinai? <sup>63</sup> Tanumena enia natu, mo lo sile na mauri! Suiha tamlohi i sopo eŋi vai te hinau. Noku reti na lo vereea isamim, la tai isan Tanume atu sei mo lo sile na mauri. <sup>64</sup> Pani te vonamim la sopo rasuau.” Iesu mo vereea sohena matan na pongi tiroma mo levosahia moiso vara harepu i pa rasua, ale harepu i pa turuposi hinia.

<sup>65</sup> Ale Iesu mo mele vereea mara, “Matan haratu na vereea isamim moiso vara, ‘I pa sopo tea i eŋi mai isaku vara Tama enia i sopo tinaŋihia vara i mai tiroma.’ ”

<sup>66</sup> Matan la hinau sei Iesu mo verera, nona tamlohi usuri matuvana la vahaŋi hinia, la sopo mele usuria.

<sup>67</sup> Iesu mo usi la nona tamlohi usuri atu tupu sangavulu ŋomana mo rua (12) mara, “Kamim sohena ha pa rovo hiniau?” <sup>68</sup> Simon Peter mo ŋaramia mara, “Moli, mo sopo mele te tamlohi vara kama pa eŋi vano isana. Nom reti la sile na mauri tui. <sup>69</sup> Kama rasuho, kama levosahia mo ŋuhu nake vara engko natu, tamlohi atu mo tapu non God!”

<sup>70</sup> Iesu mo vereea isana nona tamlohi mara, “Na viŋoni kamim tupu sangavulu ŋomana mo rua (12) pani vonamim matea enia tanume sasati matea!” <sup>71</sup> Iesu mo lo vere hinau sei matan Judas natun Simon Iscariot matan hitahu i pa halu na hijan Iesu, hina purongo hin haratu vara enia mo vonan la

tupu sangavulu mo rua (12) atu, tamlohi non Iesu.

## 7

### *Tasin Iesu La Sopo Rasua*

<sup>1</sup> Iesu mo hahau řalihi Galilee, pani mo sopo vano mariviti Judea matan tamlohi tavera nona Jew la opoia vara la vilimateia. <sup>2</sup> Hanhani tavera nona Jew la tovia Tabernacle, pongina mo lo mai mariviti. <sup>3</sup> Ale tasin Iesu la lo vereia isana lara, "O vano Judea matan vara nom tamlohi usuri la pa eři hite na nom matamata tavera sei ko lo vaira. <sup>4</sup> Vara tamlohi matea mo opoia vara tamlohi la levosahia, i pa turu na naho tamlohi, i pa sopo jarohi na nona vavahinau. Vara ko lo vai la hinau atu varařuhu, mo řuhu vara o vai na nom vavahinau na naho tamlohi." <sup>5</sup> Tasina sohena la sopo lo rasua.

<sup>6</sup> Pani Iesu mo řaramira mara, "Noku pongi mo sopo lo mai, pani kamim ka tatamahu na rani tari. <sup>7</sup> Tamlohi varama la pa sopo tipahi kamim, pani la pa tipahiau matan na lo vereuli na nora sasati la lo vaira. <sup>8</sup> Kamim hasemim, ha sahe hin hanhani tavera atu. A pa sopo sahe nakerihi matan noku pongi mo sopo lo pala vevuhi." <sup>9</sup> Iesu mo vere hinau atu, ale mo lo toho atu Galilee.

### *Iesu Mo Vujangi Na Temple*

<sup>10</sup> Ale tasin Iesu la sahe hin hanhani tavera atu, Iesu mo pa lo sahe hitahu, tea mo sopo levosahia. <sup>11</sup> Hin

hanhani tavera atu tamlohi tatavera nona Jew la lo ale Iesu lara, "Enia nene?"

<sup>12</sup> Vao tamlohi atu sohena la lo vasvas matana. Hai lara, "Iesu enia tamlohi řuhu matea."

Ale hai lara, "Enia mo lo halu na tamlohi."

<sup>13</sup> Pani tamlohi la matahuni na tamlohi tatavera nona Jew ea, ale la sopo sorahi Iesu na naho vao.

<sup>14</sup> Na sope rani matan hanhani tavera atu, Iesu mo unu na Temple, ale mo tapulo vujangi. <sup>15</sup> Tamlohi tavera nona Jew la mařurahi hinia, ale lara, "Tamlohi nike, mo pa patuha sohena sava? Tea mo sopo vujangia!"

<sup>16</sup> Iesu mo řaramira mara, "Enau na sopo vujangi na sava vara a haseku řomřomia. Sava na lo vujangia mo tai isan haratu mo lo řuleau. <sup>17</sup> Vara ha pa lo opoia varařuhu vara ha oloolo hin God, ha pa levosahia vara enau na lo vujangi na sava mo tai isan God, pani mo sopo isaku haseku. <sup>18</sup> Haratu mo opoia vara tamlohi la sile na oloolo isana matan mo lo řomřomia vara nona retireti mo tai isana hasena enia hapahapa, pani haratu sei mo opoia vara i sile na oloolo isan haratu mo lo řulea, enia tamlohi matea mo lo vere na varařuhu, ale mo sopo te hehe isana. <sup>19</sup> Moses mo sile kamim na Leu teni mo vono? Pani mo sopo te vonamim hatea i oloolo hinia! Ka opoia vara ha vilimateiau mata sava?"

<sup>20</sup> Vao atu la řaramia lara, "Ko putu! Sava tanume mo



unu hiniho mo vaiho ko ŀomia vara tea mo opoia vara i vilimateiho?”

<sup>21</sup> Iesu mo ŀaramira mara, “Enau na vai na matamata tavera matea purongo, ale kamim mo isoiso ka maŀurahi tavera hinia. <sup>22</sup> Moses mo retileu vara ha pa taiŀalihi na natumim, pani retileu atu mo sopo tai isan Moses, mo tai isan pimim tuai atu Abraham, pani nake kamim ka lo taiŀalihi na natumim na Sabbath, <sup>23</sup> Ale vara ha taiŀalihi te tamlohi hatea na Sabbath matan vara ha pa sopo tope na Leu non Moses, mata sava ka lo lolokoru hinihu matan enau na lo vai na tamlohi rojoa epena tari la mele ŀuhu na Sabbath? <sup>24</sup> Ha sopo ari na tamlohi na nomim kilakilau purongo! Ha ari na malele tataholo.”

### *Iesu Enia Kŀristo*

<sup>25</sup> Mara Jerusalem hai, la lo vereea lara, “Avei, mo sopo tamlohi nike natu, sei la lo vaihitea vara la pa vilimateia? <sup>26</sup> Pani enia nahai! Mo lo retireti isana naho vao, pani la sopo vere te hinau hatea isana, la tamlohi tavera nike la toma? Korong la pa hitevosahia vara enia natu, Kŀristo atu? <sup>27</sup> Pani tamlohi nike, enŀa ŀa levosahi na jarana, pani hare i pa levosahi na sava jara Kŀristo i pa tai hinia?”

<sup>28</sup> Iesu mo lo vujangi na lolo Temple atu, ale mo ulo mara, “Kamim ka ŀomi vara ka levosahiau, ale sava jara na tai ea. Enau na sopo mai na masaloku. Haratu mo ŀuleau enia mo varaŀuhu, pani

kamim ka sopo levosahia. <sup>29</sup> Pani enau na levosahi haratu mo lo ŀuleau, matan enau na tai isana.”

<sup>30</sup> Tatu tamlohi la vaihitea vara la taurilatia atu natu, pani pongina mo sopo lo masese. <sup>31</sup> Pani tamlohi matuvana hin vao atu la tau na nora rasua hinia lara, “Avei, vara Kŀristo atu i pala, ka ŀomi vara enia i pa eŀi vai te matamata tavera i jeu tamlohi nike?”

### *La Vaihite Vara La Taurilatia Iesu*

<sup>32</sup> Pharisee lara la rongo na vao atu la lo ngutungutu hin Iesu moiso la pulutahi peresi na moli pŀis, ale la ŀule na police mata Temple atu vara la taurilatia. <sup>33</sup> Pani Iesu mo vereea isara mara, “Enau a pa mele toho isamim i peravu makomona purongo, moiso enau a pa sahe isan haratu mo lo ŀuleau. <sup>34</sup> Ha pa aleau, pani ha pa sopo eŀi hiteau. Ha pa sopo eŀi vano na jara enau a pa vano ea.”

<sup>35</sup> Ale tamlohi tavera nona Jew la lo usiusira hinia lara, “Enia i pa vano epu vara ŀa pa sopo eŀi tapaia? Korong i pa vano hin te jara tinapua sei noŀa tamlohi la lo toho ea vara i vujangira peresi na mara Greek teni mo lo vereea sohena sava sei?” <sup>36</sup> Raramin nona retireti atu, enia sava sei mo vereea mara, “Ha pa aleau, pani ha pa sopo hiteau. Ha pa sopo eŀi vano na jara enau a pa vano ea.”

### *Retitauhi Mata Wai Mauri*

<sup>37</sup> Isoiso rani matan hanhahi tavera atu, enia rani tavera matara, ale Iesu mo

turu mo ulo aulu mara, “Vara tea mo maŋohu, i mai isaku i inu! *Isa 55.1* <sup>38</sup>Vara ha rasuau, i pa sohena Retitapu mo vereea mara, ‘Wai mauri i pa roro malue na mapumim sohena wai roro matea.’” *Isa 58.11*

<sup>39</sup>Iesu mo lo retireti hin Tanume Tapu atu God i pa silea i pa sopo tuai isan la haratu la rasua. God mo sopo lo sile na Tanumena isan tea matan Iesu mo sopo lo turu na nona mateia.

#### *Tamlohi La Patumasa*

<sup>40</sup>Tatuan vao atu la rongo Iesu mo vere hinau sei, ale lara, “Avei, enia natu, pŕovet atu Moses mo lo vereea!” *Deut 18.15*

<sup>41</sup>Tatuara lara, “Enia natu, Kŕisto atu!”

Pani tatuara la lo vereea vara, “Kŕisto atu i pa sopo eŕi tai Galilee! <sup>42</sup>Retitapu mo sopo vereea vara Kŕisto atu i pa vora na vaon Supe David na vanua Bethlehem?” *Psa 7.12; Mic 5.2* <sup>43</sup>Vao tamlohi atu la tapulo hase asera matan Iesu. <sup>44</sup>Tatuara la opoia vara la taurilatia, pani tea mo sopo tau na limana hinia.

#### *Tamlohi Tavera La Rohu Hinia*

<sup>45</sup>Police mata Temple la mele hilu lekoleko, la vano isana pŕis tatavera peresi na Pharisee, ale Pharisee la usi na police lara, “Mata sava ka sopo lavi Iesu i mai nike?”

<sup>46</sup>La řaramira lara, “Tea mo sopo lo vujangi i sohen tamlohi atu.”

<sup>47</sup>Pharisee la kilau řalihi isara, ale lara, “Mo halu kamim sohera? <sup>48</sup>Avei, tea

hin la haratu la lo tauri na suiha teni te Pharisee la rasua? <sup>49</sup>Ka levosahia vara la jaraŋoha nike la sopo levosahi te hinau hatea na Leu. La lo toho na ruhuruhu lesati non God moiso.”

<sup>50</sup>Hin rani atu, Nicodemus mo lo toho peresira matan enia mo lo sakele na nora pulutahi, nona tamlohi tatavera atu, enia natu, tamlohi tiroma mo mai isan Iesu. Mo vereea mara, <sup>51</sup>“Avei, noŕa Leu mo vara řa sopo eŕi sile na talai isan te tamlohi vavano řa sakele řa rongo na nona retireti tiroma matan vara řa pa levosahi na sava mo vaia.”

<sup>52</sup>Ale la vereea isana lara, “Nicodemus, engko ko tai Galilee teni mo vono? O vano o evi na Retiulia! O sopo eŕi hitea vara te pŕovet hatea i pa tai Galilee!”

<sup>53</sup>Ale tamlohi tari atu, la mele mule.

## 8

### *Iesu Mo Romi Na Haŕai Matea*

<sup>1</sup>Pani Iesu mo hahau mo vano na vutivuti la tovia Vuti talu Olive. <sup>2</sup>Ale na řalavuho jea mo mele vano na Temple. Vao tamlohi la lo mai isana, mo sakele mo pa lo tapulo vujangira. <sup>3</sup>Ale Pharisee peresi na tamlohi vujangi mata leu la mai isana la taurilati na haŕai matea la vileia mo lo juruvi peresi na tamlohi matea mo sopo tuana. La vaia mo turu na livuha vao, <sup>4</sup>ale la vereea isan Iesu lara, “Rabai, haŕai nike la taurilatia mo lo vaivaileu peresi na tamlohi matea mo sopo tuana. <sup>5</sup>Leu non Moses mo vujangia vara

haʻrai sohen haranike la pa parumateia! Pani, engko ko vereea sohena sava?”

*Lev 20.10; Deut 22.22-24*

<sup>6</sup> La usi retiusia sei matan vara la vaihite Iesu vara sava reti i pa vereea, ale la pa tau na talai hinia. Pani Iesu mo rautoho sivo atano, mo tapulo uliuli na varangona na lepa.

<sup>7</sup> La lo area hin retiusia sei matan haʻrai atu, moiso mo turu mo vereea mara, “Vara te vonamim mo sopo lo vai te hehe hin te rani, enia i parua tiroma!” <sup>8</sup> Ale mo mele rautoho mo mele uliuli na lepa. <sup>9</sup> La tamlohi atu la rovo hinia hatehateahi, vajiahara la tiroma. Hitahu Iesu enia haʻrai atu purongo la pa lo toho atu. <sup>10</sup> Iesu mo turu mo usi haʻrai atu mara, “Tamlohi tari la haipu? Mo sopo tea vara i sile na talai isam?” <sup>11</sup> Haʻrai atu mo řaramia mara, “Mo vono, tija.” Ale Iesu mo vereea isana mara, “Enau sohena, a pa sopo sile na talai isam. O vano natu, ale nake o sopo mele vai na hehe!”

*Iesu Enia Malarani Varama*

<sup>12</sup> Moiso Iesu mo mele retireti isana tamlohi, mo vere mara, “Enau malarani mata varama! Vara ha usuriau, ha pa sopo hahau na řořoha, ha pa lavi na malarani sei mo sile na mauri.”

<sup>13</sup> Pharisee la reti isana lara, “Engko, ko lo vereulihohasem, ale sava ko lo vereea mo sopo varařuhu!”

<sup>14</sup> Iesu mo řaramira mara, “Hina purongo vara na lo hase vereuliau, sava na lo

verea mo varařuhu matan enau na levosahi na jara na tai ea, ale enau na levosahia vara na lo vano epu. Pani kamim ka sopo levosahia vara enau na tai epu teni sava jara na lo vano hinia. <sup>15</sup> Kamim ka lo ari na tamlohi na kilakilau nona tamlohi purongo, pani enau na sopo ari tea. <sup>16</sup> Pani vara a sile na aria, aria atu i pa tataholo matan mo sopo enau haseku a pa vaia. Pani enau Tama sei mo lo řuleau kama pa turu na jara matelete purongo. <sup>17</sup> Na nomim Leu la ulia lara, vara tamlohi tupra rua la vere na hinau matelete moiso mo varařuhu, o pa eři rasua. *Deut 19.15*

<sup>18</sup> Enau na lo hase retivuhesia, ale Tama sei mo lo řuleau, enia mo lo retivuhesia.”

<sup>19</sup> La usia lara, “Tamam mo lo toho epu?”

Iesu mo řaramira mara, “Ka sopo levosahiau teni Tamaku! Vara ha pa lo levosahiau ha pa levosahi Tamaku.”

<sup>20</sup> Iesu mo lo vere la reti atu hin rani atu mo lo vujangi hin jara atu tamlohi la lo tau mamahuni na nora silesilea hinia na Temple. Pani mo sopo tea i taurilatia matan pongina mo sopo lo mai.

<sup>21</sup> Mele vahatea Iesu mo vereea isara mara, “Enau a pa malue, ale kamim ha pa aleau, pani kamim ha sopo eři vano na jara enau na lo vano ea, moiso kamim ha pa mate na nomim hehe matan God i pa sopo řomira.”

22 Tamlohi tavera nona Jew la usiusira lara, "Avei, mo lo vai na řomina vara i pa vilimateia hasena matan enia mara, 'Ha pa sopo eři usuriau ha vano hin jara atu enau na lo vano ea!' teni sava?"

23 Iesu mo řaramira mara, "Kamim matan atano, pani enau na tai aulu. Kamim mata varama, pani enau mo vono. 24 Na pete vereia isamim moiso vara ha pa mate na nomim hehe vara ha sopo rasua vara enau haratu sei mo lo toho jejeu, ha pa mate na nomim hehe."

25 La usia lara, "Engko hare?"

Iesu mo řaramira mara, "Sava na lo vereia isamim na pete vereia isamim moiso na pongi tiroma.\* 26 Hinau matuvana a eři vereia isamim matan vara a ari kamim matana, pani haratu mo lo řuleau, enia mo varařuhu, ale sava hinau mo lo vereia isaku enia natu, na lo vereia isana tamlohi na varama."

27 Tea mo sopo lo levosahia vara Iesu mo lo vere na hinau matan Tama. 28 Iesu mo mele vereia mara, "Hin pongi atu vara ha tahe Natun Tamlohi, ha pa levosahia vara enau natu, haratu mo lo toho jejeu. Ha pa levosahia vara enau haseku a pa sopo eři vai te hinau haseku, na lo vere na sava purongo, Tama mo vujangiau hinia. 29 Haratu mo řuleau, enia mo lo toho perezia. Tarea na lo usuri na masalona, ale enia i pa sopo tinařihiau."

30 Hin pongi atu Iesu mo lo vere la hinau sei, tamlohi matuvana la tau na nora rasua hinia.

### *Retivarařuhu I Pa Teriho*

31 Ale Iesu mo vereia isana tamlohi tavera nona Jew atu la rasua ea mara, "Vara ha lo oloolo hin na noku vujangi, ha pa noku tamlohi usuri varařuhu, 32 ale ha pa levosahi na retivarařuhu, moiso retivarařuhu atu i pa teri kamim."

33 La řaramia lara, "Kamam mahapin Abraham tataholo! Kama sopo lo slev isan te tamlohi hatea, ko pa vereia sohen sava vara kama pa materi?"

34 Ale Iesu mo řaramira mara, "Varařuhu na vere kamim hinia, haratu mo lo hehe enia slev non hehe! 35 Slev mo sopo toho na lolo vao ima matea jejeu, pani Natuna i pa toho jejeu. 36 Ale vara Natuna i vai kamim ha materi, ha pa materi varařuhu. 37 Na levosahia vara kamim mahapin Abraham, pani ka lo opoia vara ha vilimateiau matan noku reti mo sopo toho na maurimim varařuhu. 38 Enau na lo vere kamim na sava Tamaku mo vujangiau hinia, mo sohen kamim, ka lo vai na sava tamamim mo lo vujangi kamim hinia."

39 La tamlohi atu la řaramia lara, "Abraham enia tamamam."

Iesu mo řaramira mara, "Vara kamim natun Abraham, ha pa vai na sava Abraham mo lo vaia. 40 Pani

\* **8:25:** hai la posi sope jara akerihi sohen harihi, 'Kamim ka tinapua, a pa mele retireti peresi kamim mata sava?'

kamim ka opoia vara ha vilimateiau matan na lo vere kamim na retivarāruhu God mo sileau hinia. Abraham mo sopo vai te hināu sohena.

<sup>41</sup> Pani kamim ka lo vai na hināu tataholo sohen tamamim mo lo vaia.”

Ale la řaramia lara, “Pani kamam kama sopo natu malele! Kamam tamamam matea purongo, kama natun God!”

<sup>42</sup> Iesu mo řaramira mara, “Vara God enia tamamim, kamim ha pa opoiau matan enau na tai isan God. Enia mo řuleau, ale enau na sopo mai na masaloku haseku.

<sup>43</sup> Mata sava ka sopo eři levosahi na sava na lo vere isamim? Ka opoia vara ha peropero na sava na lo vere isamim? <sup>44</sup> Tamamim enia Tiapolo, kamim ka lo vai na masalona. Pongi tiroma enia tamlohi vilimatei na tamlohi, ale enia tamlohi halu. Mo sopo te hināu varařuhu hinia. Enia mo lo vere na masalona purongo, ale hināu tari mo vere enira halu. Mo sopo vara enia tamlohi halu purongo, pani enia tina halu.

<sup>45</sup> Pani hināu tari na lo vere kamim hinia la varařuhu, pani kamim ka pa lo řohu vara ha rasuau. <sup>46</sup> Te vonamim i eři vere vara na vai te hehe? Vara na vere na varařuhu, ka sopo rasuau mata sava? <sup>47</sup> Haratu enia non God i pa tapurongo na nona reti, pani kamim ka řohu vara ha tapurongo matan ka sopo non God.”

<sup>48</sup> Ale tamlohi tavera nona Jew la vere isan Iesu lara, “Kamam kama varařuhu hin

haratu kama vere vara, engko mara Samaria matea, ale tanume sasati matea mo lo toho hiniho!”

<sup>49</sup> Iesu mo řaramira mara, “Mo sopo te tanume sasati hiniau! Enau na lo ooloo hin Tamaku, pani kamim ka řohu vara ha ooloo hiniau.

<sup>50</sup> Enau na sopo opoia vara a lavi na ooloo matakū haseku, mo vono, pani matea enia mo opoia vara a lavi na noku ooloo, ale enia natu, haratu i pa sile na aria.

<sup>51</sup> Varařuhu na vere kamim hinia, vara ha ooloo na noku reti, ha pa sopo eři mate!”

<sup>52</sup> Tamlohi tavera nona Jew sei la lo toho atu la lo tapurongo hinia lara, “Nake natu, kama levosahia vara tanume sasati matea mo lo toho isam. Abraham mo mate moiso, ale la pšovet atu tuai sohena. Mo sohena sava natu, ko pa vere vara, la haratu la lo ooloo na nom reti, la pa sopo eři mate?”

<sup>53</sup> Engko ko aulu ko jeu tamamam Abraham? Enia mo mate, ale la pšovet atu tuai sohena la mate. Engko ko řomi vara engko hare?”

<sup>54</sup> Iesu mo řaramira mara, “Vara enau a lo hase tahe hijaku aulu, hijaku i pa sopo aulu varařuhu. Tamaku natu, enia mo lo tahe na hijaku aulu, enia haratu kamim ka lo tovia nomim God, <sup>55</sup> ka lo vere, pani ka sopo levosahia varařuhu. Vara enau a vere vara na sopo levosahia, enau a pa tamlohi halu matea sohemim kamim mo isoiso, pani enau na levosahia, ale na lo vai na sava mo lo vere.

56 Tamamim Abraham mo avulahi tavera matan mo hite na noku pongi pala, ale mo avulahi matana.”

57 Ale la tamlohi tavera nona Jew atu la vereia isana lara, “Pani engko taunim mo sopo lo tikeli ngavulu lima (50)! Ko pa hite Abraham sohena sava?” 58 Iesu mo řaramira mara, “Varařuhu na vereia isamim, Abraham mo sopo lo vora, enau na lo toho moiso, enau haratu mo lo toho jejeu.” 59 La rongo nona reti atu, la vilevilei vatu vara la pa paru Iesu, pani mo luhu hinira, ale mo malue hin Temple atu.

## 9

### *Tamlohi Vuso Mo Kilau*

1 Iesu mo pa lo hahau, ale hin rani atu mo hite na tamlohi matea mo vora mo matavuso moiso. 2 Tamlohi usuri non Iesu la usia isana lara, “Avei, Tija, mata sava tamlohi nike mo vora matana mo vuso? Mata nona hehe teni hehe non tamana enia tinana?”

3 Iesu mo řaramira mara, “Mo vono, mo sopo mata nona hehe teni hehe non tamana teni tinana. Pani matan mo matavuso, ha pa eři hite God i vai na mata-mata tavera hinia. 4 Nake mo lo rani, řa pa vai na masalon haratu mo lo řuleau. Pongi mo lo mai, ale i pa sopo tea i eři vai te vavahinau hinia. 5 Ale nakerihi na pa lo toho na varama, enau na malarani mata varama.”

6 Iesu mo vere reti atu moiso, mo litovi na lepa, mo hoi na lepa peresi na litona, ale mo jarai makamaka atu

na matan tamlohi atu. 7 Ale mo vereia isana mara, “O vano, o hoje nařihi na lepa na paltungu Siloam!” Tamlohi atu mo vano na paltungu Siloam, řaramin hija atu enia ‘Haratu la řulea’. Hin rani atu mo hoje nařihi na lepa moiso mo eři kilau, ale mo mule.

8 Hin rani atu tahisana peresi la haratu la hitea la lo usiusira lara, “Avei, tamlohi sei natu, enia tamlohi sei tarea mo lo sakele mo lo usiusi teni mo vono?”

9 Tatuara lara, “Enia natu, tamlohi atu!”

Ale tatuara lara, “Mo vono, pani mo sohen tamlohi atu.”

Pani tamlohi atu hasena mo vereia mara, “Enau sei, tamlohi atu!”

10 La usia lara, “Pani nake, ko pa kilau sohena sava?”

11 Mo řaramira mara, “Tamlohi matea hijana Iesu, mo vai na makamaka mo jaraia na matakū, mo řuleau vara a vano a hoje nařihi na paltungu Siloam. Vahatea atu na vaia na eři kilau.”

12 La usia lara, “Mo lo toho epu nakerihi?”

Mo řaramira mara, “Na sopo levosahia.”

### *Sorasorahin Iesu*

13-14 Hin rani atu Iesu mo vai tamlohi atu mo řuhu na lepa peresi na litona, enia Sabbath matea. Tahisana la lavia mo vano isana Pharisee. 15 Pharisee la mele usia vara mo pa kilau sohena sava. Tamlohi atu mo řaramira mara, “Enia mo jarai na lepa na matakū moiso na hoje nařihi, ale nake na eři kilau.”

16 Tatu Pharisee la vereia isana lara, “Tamlohi nike, mo

sopo tai isan God matan mo lo tope na Sabbath!”

Pani tatuara la vereea lara, “Sohena sava natu, tamlohi hehe matea i pa eʻri vai te matamata tavera sohen harihi?” Ale matana, Pharisee la patumasa, <sup>17</sup> la mele usi tamlohi atu lara, “Pani engko ko řomia vara tamlohi atu mo vaiho ko kilau, enia hare?”

Mo řaramira mara, “Enia pŕovet matea!”

<sup>18</sup> Pani la tamlohi tatavera atu nona Jew la řohu vara la rasua vara tamlohi sei natu, matana mo matavuso tiroma. Ale, la vahařule matan tamana enia tinana. <sup>19</sup> Ale, la mai moiso la usira lara, “Haranike natu, enia natumim sei ka vereea vara mo vora mo vuso? Sohena sava mo pa kilau nake?”

<sup>20</sup> Tamana enia tinana la řaramira lara, “Kama levosahia vara enia natumam, ale kama levosahia vara mo vora mo vuso, <sup>21</sup> pani kama sopo levosahia vara mo pa kilau sohena sava, teni hare mo vaia vara i eʻri kilau. Ha usia isana! Enia mo tamlohi moiso, ale enia hasena i pa vereea.”

<sup>22-23</sup> Tamana enia tinana la vereea sohena matan la matahuni na nora tamlohi tatavera nona Jew. Matan nora tamlohi tatavera la hatihia moiso vara la pa tipahi te tamlohi na nora ima lotu vara la lo vereea vara, Iesu enia Křisto.

<sup>24</sup> Tamlohi tatavera la mele tovi pa tamlohi sei mo vuso tiroma mo mele sinai, la vereea isana lara, “O reti tataholo na nahon God vara o pa vere na hinau varařuhu!

Kama levosahia vara Iesu enia tamlohi hehe matea.”

<sup>25</sup> Tamlohi atu mo řaramira mara, “Na sopo levosahia vara enia tamlohi hehe teni mo vono. Na levosahia vara tiroma na vuso, pani nake na kilau.”

<sup>26</sup> La usia isana lara, “Mo vai na sava isam? Mo vai mamahuni na matam sohena sava?”

<sup>27</sup> Tamlohi atu mo řaramira mara, “Na pete vereea isamim vahatea moiso, pani ka řohu vara ha tapurongo. Ka opoia vara a mele vereea mata sava? Kamim sohena ka opoia vara ha mai na nona tamlohi usuri?”

<sup>28</sup> La kalia moiso, ale lara, “Engko nona tamlohi usuri! Kamam tamlohi usuri non Moses! <sup>29</sup> Kama levosahia vara God mo reti isan Moses, pani kama sopo levosahia vara harakerihi mo tai epu.”

<sup>30</sup> Tamlohi atu mo řaramira mara, “Kamim ka tinapua! Tamlohi atu mo vai mamahuni na matakū, pani kamim ka sopo levosahia vara mo tai epu! <sup>31</sup> Ra levosahia vara God mo lo tueni la haratu la opoia, ale la oloolo hinia. God mo sopo tueni na tamlohi hehe. <sup>32</sup> Tuai jea na tapulo varama mo tikeli nake hare mo rongoa vara te tamlohi mo mele vai mamahuni te tamlohi mo vora mo vuso vara i kilau. <sup>33</sup> Vara tamlohi atu i sopo tai isan God, i pa sopo eʻri vai te hinau hatea sohen harihi.”

<sup>34</sup> La řaramia lara, “Tarea engko ko tamlohi hehe na rani ko vora mo tikeli nake.

Engko ko řomřomia vara o pa eři vujangi kamam hin te hinau hatea?" Ale la pulahi nařihia la tipahia.

<sup>35</sup> Iesu mo rongo hinau atu mo masese moiso mo vano vara i ale tamlohi atu, ale mo tapaia mo usia mara, "Engko ko rasu na Natun Tamlohi?"

<sup>36</sup> Mo řaramia mara, "Moli, vara o vereau hinia vara enia hare, a pa tau na noku rasua hinia."

<sup>37</sup> Iesu mo vereaa isana mara, "Engko ko hitea moiso, ale nakerihi enia mo lo retireti peresiho."

<sup>38</sup> Tamlohi atu mara, "Moli, na rasua." Ale mo papaohi mo lotua.

<sup>39</sup> Moiso Iesu mo vereaa mara, "Na mai vara aria i mai na tamlohi na varama. Na mai nike, vara a roi na matavuso la kilau, ale vara a vai la haratu la eři kilau, matara la vuso."

<sup>40</sup> Pharisee la rongo Iesu mo vere hinau atu moiso, la usia lara, "Kamam kama matavuso?"

<sup>41</sup> Iesu mo řaramira mara, "Vara ka vuso i pa sopo te nomim hehe, pani nake matan ka lo vereaa vara kamim ka lo kilau, kamim ha pa lo toho na nomim hehe."

## 10

### *Iesu Enia Tavui Sipsip řuhu*

<sup>1</sup> "Varařuhu na vereaa isamim, tamlohi vavanaho peresi la haratu la lo vili na tamlohi mata vavanaho, la lo vele palausi na vořa vara la unu na jara sipsip, la sopo unu na matarua vořa.

<sup>2</sup> Pani haratu mo unu na matarua jara sipsip enia tavui sipsip tataholo.

<sup>3</sup> Tamlohi kilau na matarua atu i pa roi na matarua matan vara tavui sipsip hasena i pa unu, ale sipsip la pa levosahi na leon tavuira moiso enia i tovi na pulana sipsip na hijara hatehateahi moiso i tiromara la malue.

<sup>4</sup> Hin rani atu vara tavui sipsip mo tiroma na pulana sipsip tari vara la malue hin rope sipsip atu, enia mo tiromara, ale la usuria matan la rongovosahi na leona. <sup>5</sup> La pa sopo eři usuri te vinano hatea matan la pa sopo rongovosahi na leon vinano atu, pani la pa rovo hinia."

<sup>6</sup> Iesu mo vereaa titileu atu isara, pani la sopo levosahi na sava mo lo vereaa isara.

<sup>7</sup> Ale Iesu mo mele vereaa mara, "Varařuhu na vereaa isamim, enau matarua mata sipsip. <sup>8</sup> Tamlohi tari la mai tiroma hiniuu, enira tamlohi vavanaho peresi la haratu la lo vili na tamlohi mata vavanaho, pani sipsip la pa sopo tapurongo isara. <sup>9</sup> Enau matarua. Vara tea i unu hiniuu, enia i pa juri, i pa eři unu, ale i pa mele malue vara i vilei na řuvuřuvu řuhu mata hanhani.

<sup>10</sup> Tamlohi vavanaho mo mai matan vara i pa vanaho i vilimatei, ale i komokomo purongo. Enau na mai vara haratu la unu hiniuu, la pa lavi na mauri řuhuřuhu jea. <sup>11</sup> Enau tavui řuhu mata sipsip. Tavui řuhu mata kilau na sipsip mo tau na maurina mata pulana



sipsip. <sup>12</sup> Tamlohi voko mata mania,\* enira la sopo sohena tavui sipsip matan mo sopo pulara sipsip ale hin rani atu vara la hite na wolf i mai,† la pa rovo na sipsip, ale la pa sopo turuhoro na wolf sei enia viriu jala matea mo sati. Wolf i pa komora la rovorovo. <sup>13</sup> Tamlohi voko la rovo matan la sopo řomřomia vara la pa kilau na sipsip.

<sup>14</sup> Enau tavui řuhu mata sipsip. Enau na levosahi na pulaku sipsip, enira la levosahiau <sup>15</sup> sohena Tama mo levosahiau, ale enau na levosahi Tama, ale enau na sile na mauriku mata pulaku sipsip. <sup>16</sup> Tatua pulaku sipsip la sopo lo toho na lolon vořa nike. A pa lavira la mai sohera, ale la pa tapurongo na leoku. La pa mai matea, ale tavui sipsip i pa matelete.

<sup>17</sup> Ale Tama mo opoiau matan enau na sile na mauriku matara, ale a pa mele eři lavia. <sup>18</sup> Mo sopo tea i eři lavi nařihia isaku, pani enau na silea na masaloku purongo. Enau na lavi na suiha matan vara a silea, ale na lavi na suiha matan vara a mele lavia sohen Tamaku mo retileu vara a vaia.”

<sup>19</sup> Tamlohi tatavera nona Jew atu la mele patumasa mata sava Iesu mo lo vereea isara. <sup>20</sup> Matuvana lara, “Tanume sati matea mo lo toho hinia! Mo putu! Mata sava ka lo tapurongo isana?”

<sup>21</sup> Pani tatuara lara, “Vara tamlohi matea tanume sasati mo lo toho hinia i pa eři vere na hinau sohen harihi sohena sava? I pa sopo te tanume sasati i eři vai na matavuso vara i kilau!”

### *La Tipahi Iesu*

<sup>22</sup> Hin rani atu na taro hamariri, hanhani tavera mata Dedication mo tapulo mata rani turuhi na Temple Jerusalem. <sup>23</sup> Na rani matea Iesu mo lo hahau na lolo Temple hin jara atu la lo tovia Palapalan Solomon na roro ropen Temple atu, <sup>24</sup> ale tamlohi tatavera nona Jew la řalihia la vereea isana lara, “O pa vereuli kamam hiniho pangisa? Vara engko Křisto atu, o vere tataholo kamam hinia!”

<sup>25</sup> Iesu mo řaramira mara, “Na vere isamim moiso, pani ka řohu vara ha rasuau. Hinau na vaira na hijan Tamaku, enira la vujangia vara enau hare. <sup>26</sup> Pani matan kamim mo sopo pulaku sipsip, ka sopo rasuau. <sup>27</sup> Pulaku sipsip la rongovosahi na leoku, enau na levosahira, ale la pa usuriau. <sup>28</sup> Na silera na mauri tui, ale i pa sopo te hatea i eři tihai hin te rani, ale mo sopo tea i eři tuahi nařihira na limaku. <sup>29</sup> Tamaku natu, mo silera isaku, ale enia mo aulu jea mo sopo tea i sohena, ale mo sopo tea i eři tuahi nařihira na liman Tama, <sup>30</sup> ale enau na matea peresi Tama.”

\* **10:12:** tamlohi voko: haratu la kilau na sipsip mata mania purongo. † **10:12:** wolf: enia viriu jala tavera matea i eři vilimatei na tamlohi peresi na sipsip.

<sup>31</sup> Mele vahatea tamlohi tatavera nona Jew atu la lavi na vatu vara la pa parumatei Iesu hinira. <sup>32</sup> Pani mo vereā isara mara, “Enau na vujangi kamim na hina řuhu matuvana Tama mo řuleau vara a vaira. Sahara hinira natu, ka opoia vara ha parua matana?”

<sup>33</sup> La tamlohi tatavera nona Jew atu la řaramia lara, “Kama sopo paruhō matan te hinau řuhu ko vaia, pani matan engko tamlohi purongo ko lo hase vaiho ko sohen God matan ko lo retihehe vara engko God!” *Lev 24.16*

<sup>34</sup> Iesu mo řaramia mara, “Na nomim leu la ulia vara, ‘Na vereā vara kamim god’. *Psa 82.6* <sup>35</sup> Ale, kamim ha sopo eři tope na Retitapu sei mo vereā vara God mo retireti isana tamlohi, ale mo tovira vara enira god. <sup>36</sup> Ale, mata sava ka lo vere lejilejiau vara na lo retihehe matan na lo vereā vara enau Natun God? Pulon hinau sei Tama enia mo tauhasehiau mata masalona vara a pa vai la hinau sei. Enia natu, haratu mo lo řuleau na varama. <sup>37</sup> Vara a sopo vai la hinau sei Tamaku mo lo vaira, ha sopo rasuau, <sup>38</sup> pani vara a vai na hinau Tama mo lo vaia, hina purongo vara ha sopo rasuau, pani mo řuhu vara ha rasu God matan la hina mařurahi sei na lo vaira. Matan hinau atu ha pa levosahia varařuhu vara Tama enia mo matea peresia, ale enau na matea peresi Tama.”

<sup>39</sup> Mele vahatea la opoia

vara la taurilati Iesu, pani mo majuri na limara, <sup>40</sup> ale mo vano roto na wai Jordan hin jara atu John mo lo paptijo ea tiroma. Hin rani atu Iesu mo lo toho atu, <sup>41</sup> tamlohi matuvana la mai isana. La lo vereā lara, “John mo sopo vai te matamata tavera hatea, pani hinau tari mo vereā matan Iesu, enira la varařuhu.” <sup>42</sup> Tamlohi matuvana la tau na nora rasua hin Iesu hin jara atu.

## 11

### *Lazarus Mo Mate*

<sup>1-2</sup> Tamlohi matea hijana Lazarus, mo rojo na vanuan Bethany. Vetasina mo rua, Mary enia Martha la lo toho peresia. Mary enia hařai atu sei mo lo surei na hasori na palon Moli peresi na patuna, ale mo kamoti na palona na vuluna. <sup>3</sup> Vetasin Lazarus la sohai na reti isana lara, “Tija, tapalam řuhu sei Lazarus mo rojo tavera.”

<sup>4</sup> Hin rani atu Iesu mo rongoa, mo vereā mara, “Rojo atu, i pa sopo isoiso na mate, pani i pa sile na ooloo isan God, ale Natuna i pa lavi na ooloo matan haratu i pa vaia.” <sup>5</sup> Iesu mo opoi Martha enia vetasina peresi Lazarus. <sup>6</sup> Ale matan mo rongō vara mo rojo Iesu mo mele toho atu rani mo rua. <sup>7</sup> Hitahun haratu, mo vereā isana nona tamlohi usuri mara, “Nake řa mele sahe Judea.”

<sup>8</sup> Nona tamlohi usuri la řaramia lara, “Tija, mo řuhu, pani mo sopo tuai sei tamlohi tatavera atu nona

Jew la opoia vara la pa parumateiho! Avei, ko opoia vara o pa mele vano atu?"

<sup>9</sup> Iesu mo řaramia mara, "Matan alo mo visa na rani matea? Ka levosahia vara mo sangavulu řomana mo rua (12). Vara o hahau na rani o pa hite na mera alo, ale o pa sopo tialahalaha. <sup>10</sup> Pani vara o hahau na vutepongi o pa tialahalaha matan mo sopo te mera hinia." <sup>11</sup> Ale mo vereea isara mara, "Tapalařa Lazarus mo lo juruvi, pani enau a pa vano vara ā pa řohaia."

<sup>12</sup> Nona tamlohi usuri la řaramia lara, "Tija, vara enia mo lo juruvi, enia i pa mele rongo i řuhu." <sup>13</sup> Iesu mo levosahia vara Lazarus mo mate, pani enira la lo řomřomia vara enia mo lo vereea vara mo lo juruvi řomaliho purongo.

<sup>14</sup> Moiso Iesu mo vere tatholoia isara mara, "Lazarus mo mate, <sup>15</sup> na avulahi matamim matan na sopo toho atu matan nake masapa matea vara ha pa tau na nomim rasua hiniau, řa vano isana!"

<sup>16</sup> Ale Thomas sei la lo tovia Havo, mo vereea isan tamlohi usuri tinapua non Iesu atu mara, "Eh! Ha turu, řa vano! Enřa řa vano vara řa pa tolu mate peresi Moli."

### *Lazarus Mo Mele Mauri*

<sup>17</sup> Na rani Iesu mo kakau Bethany, mo rongoa vara Lazarus la taua na papavatu rani mo vati moiso. <sup>18</sup> Taon sei Bethany mo lo toho mariviti kilometre mo tolu, ale mele sopena asau hin

Jerusalem, <sup>19</sup> ale tamlohi tatavera nona Jew matuvana la mai isan Martha enia Mary, vara la tangtangi peresira matan tavaira mo tihai.

<sup>20</sup> Vahatea atu Martha mo rongoa vara Iesu mo pala, mo malue vano vara i tapaia, pani Mary mo lo toho na ima. <sup>21</sup> Martha mo vereea isan Iesu mara, "Tija, vara o pa lo toho nike tavaiku i pa sopo mate, <sup>22</sup> pani hina purongo hin haratu matan na levosahia vara God i pa vai na sava hinau vara o usia."

<sup>23</sup> Iesu mo vereea isana mara, "Tavaim i pa mele mauri!"

<sup>24</sup> Martha mo řaramia mara, "Na levosahia vara i pa mele mauri na pongi hitahu hin rani atu vara tamlohi mate la mele turu."

<sup>25</sup> Iesu mo vereea mara, "Enau pulo mauri, ale enau na sauteterahi na mateia, matan la haratu la rasuau la pa mauri, hina purongo vara la pa mate. <sup>26</sup> Moiso la haratu la rasuau, la pa lo mauri, la pa sopo eři mate varařuhu. Martha, ko rasu hinau sei?"

<sup>27</sup> Martha mo řaramia mara, "He'e Moli! Na lo rasua vara engko natu, Křisto, Natun God. Engko haratu kama lo kilau toho matana vara i pa mai na varama!"

<sup>28</sup> Martha mo retireti isan Iesu, moiso mo mele hilu vara i vere malumia isan Mary mara, "Tija mo mai, mo opoia vara i hiteho." <sup>29</sup> Mary mo rongoa, vahatea mo turu mo malue, mo vano isana. <sup>30</sup> Iesu mo sopo lo unu na vanua, mo pa lo toho hin

jara atu Martha mo tapaia ea.  
<sup>31</sup> Na rani tamlohi tatavera nona Jew matuvana la lo nanau Mary na lolo ima, la hitea mo malue vilavila, ale la lo řomřomia vara mo vano vara i tangtangi na papa, ale la usuria.

<sup>32</sup> Mary mo vano hin jara atu Iesu mo lo toho ea. Mo hitea, ale vahatea mo pa-paohi na palona, mo vereea mara, "Moli, vara o pa lo toho nike, tavaiku i pa sopo mate."

<sup>33</sup> Na rani Iesu mo hite Mary tolu na tamlohi tavera nona Jew la lo tangtangi, enia mo rongo mo sati hajavua.

<sup>34</sup> Iesu mo usia mara, "Ka tau na tarapena epu?" La řaramia lara, "Moli, o mai vara o pa hitea."

<sup>35</sup> Iesu mo tangi. <sup>36</sup> Ale tamlohi tavera nona Jew lara, "Ka hitea, mo řomia mo tavera."

<sup>37</sup> Pani tatuara la vereea lara, "Enia mo vai na vuso mo mele kilau, pani mo sopo eři vai Lazarus vara i sopo mate mata sava?"

<sup>38</sup> Iesu mo mele řomia hajavua, ale mo vano na papa, enia papa matea la kuresi na vatu matea mo lo turuhoro na mataruana.  
<sup>39</sup> Iesu mo verera mara, "Ha kuresi nařihi vatu sei!" Pani Martha mo vereea mara, "Tija, engko ko levosahia vara nahapani enia havati pongin Lazarus, ale i pa ponaha."

<sup>40</sup> Iesu mo řaramia mara, "Na vereea isamim moiso, vara ha rasuau, ha pa hite na hina řuhuřuhu matea na suihan God."

<sup>41</sup> Ale la kuresi nařihi vatu atu, ale Iesu mo tařa sahe na tuka mo usiusi mara,

"Tamaku, na vere meje isam matan ko lo tapurongo isaku.

<sup>42</sup> Na levosahia vara tarea ko lo řarami na noku usiusi, pani na vere hinau nike, vara la tamlohi nike la pa rasua vara engko ko řuleau."

<sup>43</sup> Iesu mo usiusi moiso, mo ulo mara, "Lazarus, o malue!" <sup>44</sup> Tamlohi atu mo mate moiso, mo malue hin papa atu. Limana peresi na palona la pesira na tavalu ruru lulu, la tavu na nahona na tavalu ruru matea.

Iesu mo vere isana tamlohi mara, "Ha uli nařihia vara i malue."

*La Hatihia Vara La Vili-matei Iesu*

(Mt 26.1-5; Mk 14.1-2; Lk 22.1-2)

<sup>45</sup> Ale Jew matuvana la lo toho peresi Mary atu, la rasu Iesu matan la hite hinau atu mo vaia ea. <sup>46</sup> Pani tatuara la vano la hite na Pharisee, la vereuli na sava Iesu mo vaia isara. <sup>47</sup> Moiso moli mata pŕis tolu na Pharisee la tovi na matavuhi matea, la vereea lara, "Ra pa vai na sava? Tamlohi nike, mo vai na matamata tavera matuvana. <sup>48</sup> Vara řa sopo horoa nakerihi, tamlohi tari la pa tau na nora rasua hinia. Vara i sohena mara Rome la pa mai la komo na nořa Temple tapu peresi na nořa tamlohi jara mo isoiso."

<sup>49</sup> Vonara matea, Caiaphas enia pŕis aulu hin tauni atu mo vereea mara, "Ka sopo levosahi te hinau hatea, <sup>50</sup> ka sopo hitevosahia vara i pa mele řuhu vara tamlohi matelete purongo i mate matan la tamlohi tari nike,

mo jeu haratu vara tamlohi jara mo isoiso hin Israel la mate!”<sup>51</sup> Caiaphas mo sopo vere hinau sei hasena, pani matan hin tauni atu enia p̄ris aulu, ale mo lo retimangovia sohen God mo opoia vara Iesu i pa mate mata tamlohi jara tari hin Israel,<sup>52</sup> pani i pa sopo mate mata tamlohi jara tari hin Israel hasena, i pa mate mata tamlohi tari sei la natun God na sava jara la lo toho ea la pa mai matea.<sup>53</sup> Mo tapulo hin pongi atu vao atu la hatihia vara la pa vilimatei Iesu.

<sup>54</sup> Matan hinau atu Iesu mo sopo mele hahau na jara tavera isana tamlohi tatavera nona Jew, pani mo vano asau na taon Ephraim enia mariviti na jara hase-toho tavera atu, ale mo lo toho atu peresi na nona tamlohi usuri.

<sup>55</sup> Rani Passover nona Jew mo lo mai mariviti. Tamlohi matuvana la lo toho řalihi hin jara atu la vano Jerusalem matan vara la vai na nora posposi mata onehi na hinahinau mata Passover.<sup>56</sup> La lo ale Iesu řalihi ea. Ale hin rani atu la lo toho na Temple la lo usiusira lara, “Avei, ka levosahia vara i pa mai mata hanhahi tavera mata Passover teni i vono?”

<sup>57</sup> Haratu la moli mata p̄ris tolu na Pharisee la vereea isana tamlohi lara vara la hite Iesu, la pa vereulia isara vara la pa taurilatia.

### *Isan Iesu*

(Mt 26.6-13; Mk 14.3-9)

<sup>1</sup> Rani mo limarave mo lo toho vara i tikeli na rani Passover. Iesu mo mele sivo Bethany, taon atu sei Iesu mo lo vai Lazarus mo lo turu na mateia ea.<sup>2</sup> La tatamahu na hanhahi matan Iesu. Martha natu, mo lo julai na hanhahi, ale Lazarus enia vonara matea hin la haratu la lo sakele peresia atu.<sup>3</sup> Ale Mary mo lavi na potele hasori řuhu matea sohena sope lita matea, ale volina mo tavera jea, ale mo rengia na palon Iesu, ale mo kamotira na vuluna, ale ponana řuhu mo marivisi na lolo ima.<sup>4</sup> Tamlohi usuri non Iesu matea, hijana Judas Iscariot mo lo toho atu. Enia natu, i pa turuposi hin Iesu hitahu, ale mo usia mara,<sup>5</sup> “Mata sava mo sopo harehi hasori sei matan volina mo tataholo na voli tamlohi voko mata tauni matea, ale mania atu i pa eri vano isana tamlohi la tilavono?”<sup>6</sup> Pani Judas mo sopo řomi na tamlohi tilavono matan enia mo lo lavi na nora tanga mania, ale enia tamlohi vavanaho matea, ale hin te rani i pa vanaho hinia.

<sup>7</sup> Iesu mo vereea mara, “Ha sopo hitesatihia! Enia mo tauhasehia mata noku tavun.<sup>8</sup> Tamlohi tilavono la lo toho peresi kamim tarea, pani enau a pa sopo toho peresi kamim tarea.” *Deut 15.11*

### *Pharisee La Opoia Vara La Vilimatei Lazarus*

<sup>9</sup> Na rani vao tamlohi tavera nona Jew atu la levosahia vara Iesu mo lo toho atu. La sopo opoia vara

## 12

### *Mary Mo Rengi Na Hasori*

la hite Iesu hasena, pani vara la hite Lazarus sohena matan Iesu mo vaia mo mele turu na mateia. <sup>10</sup> Ale moli mata p̄ris la tau na řomira vara la pa vilimatei Lazarus, <sup>11</sup> matan la hite na Jew matuvana la lo rovo hinira, ale la lo tau na nora rasua hin Iesu.

*Iesu Mo Unu Jerusalem*

(Mt 21.1-11; Mk 11.1-11; Lk 19.28-40)

<sup>12</sup> Rani tinapua mo mele sahe, vao tavera la lo mai Jerusalem mata hanhani tavera mata Passover. Pa vao atu la rongoa vara Iesu i pa mai matan hanhani tavera atu moiso, <sup>13</sup> la lavi na rau viniu, ale la vano vara la tapaia. La lo ulo lara,

‘Moli, o juri nakerihi!’

‘God o leřuhu hin haratu mo lo mai na hijan Moli God!’ *Psa 118.26*

‘God o leřuhu na Supe non Israel!’

*Zep 3.15*

<sup>14</sup> Iesu mo vilei na natu donki matea, ale mo vele hinia sohena Retiulia mo vereia,

<sup>15</sup> ‘Ha sopo matahu kamim tamlohi hin Zion,\*

Nomim supe mo lo mai na ĥari natu donki.’ *Zec 9.9*

<sup>16</sup> Tiroma, tamlohi usuri non Iesu la sopo levosahia, pani la pa mele řomřomia hin pongi atu mo turu na nona mateia mo sahe na tuka. Hinau tari la masele la tataholo hin haratu la ulia na Retiulia vara la pa sohena.

<sup>17</sup> Ale vao atu la pa lo toho peresi Iesu hin rani atu mo tovi Lazarus mo malue na papa, ale la lo sorahia. <sup>18</sup> Ale vao atu la tapaia matan la rongo matamata tavera atu mo lo vaia. <sup>19</sup> Pani Pharisee la lo vereverera hinia lara, ‘Ra sopo eři vai te hinau hatea! Tamlohi tari na varama la lo usuri Iesu.’

*Mara Greek Hai La Mai Isan Iesu*

<sup>20</sup> Mara Greek hai tolu na tamlohi la sahe Jerusalem vara la lotu na rani mata Passover. <sup>21</sup> Philip sohena, mara Bethsaida na jara Galilee mo lo toho ea. Mara Greek la vano isana la usia lara, ‘Tapala, kama opoia vara kama tapai Iesu.’

<sup>22</sup> Philip mo vereia isan Andrew, ale enira tupra rua la vano isan Iesu la vereia isana.

<sup>23</sup> Iesu mo řaramia mara, ‘Pongi tataholo mo pala vara Natun Tamlohi i lavi na nona ooloolo tavera. <sup>24</sup> Varařuhu na vereia isamim, vara piri wit matea i sopo jovi na lepa i mate atu, i pa sopo ulua, i pa lo toho atu purongo, pani vara i jovi i mate na lepa i pa eři ulua, ale i pa sile na vuana i mařivi. <sup>25</sup> Vara tea mo opoi na maurina, i pa vaitihaia. Vara i řohu na maurina nake na varama enia i pa taurilatia pongi tui tui. <sup>26</sup> Vara tea mo volitusi noku enia i pa usuriau. Noku volitusi i pa toho peresiau na sava jara enau na lo toho ea. Vara tea mo volitusi Tama i pa sile na ooloolo isana.

\* 12:15: Zion: Zion enia Jerusalem.

<sup>27</sup> Nake řomiku mo puhoni hajavua. A pa vere na sava? A pa vere vara, ‘Tamaku o juriau hin rani řilangi sei?’ Pani mo vono, matan na lo mai na varama matan rani řilangi sei. <sup>28</sup> Tamaku, o tahe na hijam aulu.” Ale leo matea mo tai na tuka mo vereea mara, “Enau na pete tahe na hijaku aulu moiso, ale a pa mele tahea aulu.” <sup>29</sup> Vao tamlohi la lo turu atu la rongo leo atu, pani hai la lo řomřomia vara mo piri, hai la lo řomřomia vara angelo matea mo lo retireti isan Iesu.

<sup>30</sup> Moiso, Iesu mo verera mara, “Leo atu mo sopo mai matakū, pani matamim. <sup>31</sup> Nake aria varama mo lo tapulo. Nake God mo tapulo vara i tipahi tamlohi tavera sasati atu matan varama nike.† <sup>32</sup> Hin pongi atu vara la taheau aulu na lepa, a pa vai na tamlohi tari vara la mai isaku.” <sup>33</sup> Iesu mo lo vereulia vara i pa mate sohena sava.

<sup>34</sup> Vao tamlohi atu la vereea isana lara, “Retiulia mo vujangia vara Křisto atu enia i pa toho jejeu. Mo sohena sava natu, engko ko lo vereea vara la pa tahe Natun Tamlohi aulu? Hare natu, enia Natun Tamlohi atu ko lo vereea?” <sup>35</sup> Iesu mo řaramira mara, “Malarani i pa toho isamim mata makomo rani purongo. Ha hahau na merana matan nake mo lo rani, pani haratu mo lo hahau na řořoha i pa sopo levosahi na sava jara mo lo vano ea. <sup>36</sup> Ha rasu na malarani nake mo lo toho

peresi kamim, ale kamim ha pa natu malarani!” Hitahun la hinau atu Iesu mo lo verera, mo malue mo vano mo sopo mele hahau na naho vao.

*Tamlohi La Rohu Hin Iesu*

<sup>37</sup> Hina purongo vara Iesu mo vai na matamata tavera matuvana na nahora, pani tamlohi la sopo tau na nora rasua hinia, <sup>38</sup> hinau sei mo masee sohena retireti non přovert Isaiiah mo vereea mara, ‘Moli God, hare mo rasu na nomam reti?’

Hare mo levosahi na suiha tavera non Moli God?’ *Isa 53.1*

<sup>39-40</sup> Matan retireti sei, tamlohi la sopo eři rasua, matan Isaiiah mo mele vereea mara, ‘Enia mo vaira la matavuso, ale mo vai na mapura la řilangi

matan vara la pa sopo eři kilau na matara, ale vara la sopo eři levosahi na řomira, vara la pa posi mai isaku – matan vara enau a pa vaira la řuhu.’ *Isa 6.10*

<sup>41</sup> Isaiiah mo vere la hinau sei matan mo hitea vara Tamlohi Jujuri mo řuhuřuhu jea sohena sava, ale mo vereulia.

<sup>42</sup> Hina purongo hin haratu, tamlohi tauri na suiha nona Jew matuvana la rasua, pani matan la matahuni na Pharisee enira la sopo taviti na nora rasua hinia matan vara la vereea, ale Pharisee la pa tipahira na nora ima lotu.

<sup>43</sup> Matan enira la řomřomi na hasohaso nona tamlohi mo jeu hasohaso atu God mo lo silea.

† **12:31:** moli mata varama: Iesu mo lo vere Tiapolo.

### *Iesu Mo Retireti Isara*

<sup>44</sup> Pani Iesu mo ulo aulu mara, “Vara te tamlohi mo rasuau, mo sopo rasuau haseku, pani mo rasu haratu mo lo řuleau, <sup>45</sup> haratu mo hiteau, enia mo hite haratu mo lo řuleau. <sup>46</sup> Enau na mai na varama sohena malarani vara tamlohi tari la rasuau, la pa sopo mele toho na řořoha.

<sup>47</sup> Enau mo sopo haratu sei i pa ari la haratu la sopo ooloo na noku vujangi. Enau na mai vara a juri na tamlohi hin varama nike, na sopo mai vara a sile na talai. <sup>48</sup> Pani na vere a vara la haratu la lo řohu hiniu peresi na noku vujangi vara nora hina aria mo lo toho moiso, na sava na verera moiso enira natu, la pa arira na pongi hitahu. <sup>49</sup> Na sopo retireti haseku, pani na lo vere na sava Tama sei mo lo řuleau mo retileu isaku vara a vere a. <sup>50</sup> Matan na levosahia vara vua nona retileu sei la pa sile na mauri tui, ale na lo vere tataholoi na sava Tama mo vereau hinia.”

## 13

### *Mo Vujangi Na Nona Tamlohi*

<sup>1</sup> Ale rani mo tiroma na rani Passover mo lo mai, Iesu mo levosahia vara nona rani mo mai vara i malue na varama, ale vara i mele hilu sahe isan Tamana. Tarea mo lo opoi na nona tamlohi na rani mo lo toho hin varama nike, mo opoira mo tikeli na isoisona.

<sup>2</sup> La pa lo hanhani na ravravi, Tiapolo mo posi na řomin Judas natun Simon

Iscariot, vara i turuposi hin Iesu.

<sup>3</sup> Iesu mo levosahia vara Tama mo tau na hinu tari na limana, Iesu mo levosahia vara enia mo tai isan God, ale vara i pa mele sahe isan God, ale matan haratu, <sup>4</sup> Iesu mo turu hin hanhani atu, mo lavi nařihi na ruruna matea, ale mo lavi na ruru kamoti mo talihia na otiotina, <sup>5</sup> ale mo tau na wai na pesin tavera matea moiso mo tapulo hoje na palo nona tamlohi usuri, ale mo kamotira peresi ruru kamoti atu mo lo talihia hinia.

<sup>6</sup> Pani hin masapa atu Iesu mara i hoje na palon Simon Peter, Peter mo usia mara, “Tija, mata sava ko opoia vara o hoje na paloku?”

<sup>7</sup> Iesu mo řaramia mara, “Nake engko ko sopo hitevosahi na sava na lo vaia, pani hitahu, o pa levosahia.”

<sup>8</sup> Peter mo vere a mara, “Mo vono! Engko o pa sopo efi hoje na paloku hin te rani!” Iesu mo vere a isana mara, “Vara a sopo hojeho, engko o pa sopo noku!”

<sup>9</sup> Ale Simon Peter mo vere a mara, “Tija, o sopo hoje na paloku purongo, pani limaku peresi na patuku sohena!”

<sup>10</sup> Iesu mo řaramia mara, “Isan la haratu la loloso moiso, epera la vokevoke vevuhi moiso, la pa hoje na palora purongo. Ale kamim ka vokevoke moiso, pani vonamim matea mo vono.”

<sup>11</sup> Iesu mo levosahia vara hare natu i pa turuposi hinia hin haratu mo vere a mara, ‘vonamim matea.’



<sup>12</sup> Hitahun haratu Iesu mo hoje na palo nona tamlohi moiso, mo mele ru na nona ruru, ale mo mele sakele. Mo vere a isara mara, “Ka levosahi na sava hinau na lo vaia matamim?” <sup>13</sup> Ka lo toviau nomim tija, ale nomim tamlohi tavera. Haratu ka vere a mo tataholo, matan ka lo retivararuhu. <sup>14</sup> Vara enau na hoje na palomim, pani enau nomim tamlohi tavera, ale nomim tija, mo ruhu vara ha hojehoje na palomim isamim hasemim. <sup>15</sup> Enau na lo vai na tovongi matea isamim, mo ruhu vara ha vaia isamim sohen enau na vaia isamim. <sup>16</sup> Vararuhu na vere a isamim vara slev la sopo aulu na nora tamlohi tavera moiso vahaŕule la sopo aulu hin la haratu la lo rŭlera. <sup>17</sup> Vara ka levosahi la hinau sei moiso, God i pa leŕuhu hin kamim vara ha vaira.

<sup>18</sup> Na sopo retireti hin kamim mo isoiso. Na levosahi la haratu na viŕonira moiso, pani matan vara sava hinau sei Retitapu mo lo vere a i masese, mo vere a mara, “Tamlohi atu mo lo hanhani peresiau, mo pete turuposi hiniau moiso!” *Psa 41.9* <sup>19</sup> Na lo vere kamim hinia tiroma moiso i pa masese matan hin pongi atu vara i masese ha pa rasua vara enau natu, haratu mo lo toho jejeu. <sup>20</sup> Vararuhu na vere a isamim, vara tea mo lavi na noku vahaŕule, enia mo lo laviau, vara tea mo laviau, enia mo lavi haratu mo lo rŭleau.”

### *Pa Masese*

(*Mt 26.20-25; Mk 14.17-21; Lk 22.21-23*)

<sup>21</sup> Iesu mo vere la haratu moiso, mo rongo ŕomina mo puhoni hajavua, mo vere a isana nona tamlohi mara, “Vararuhu na vere a isamim, vonamim matea i pa turuposi hiniau!” <sup>22</sup> Nona tamlohi usuri la lo hase kilakilaura matan la sopo levosahia vara mo lo vere hare.

<sup>23</sup> Tamlohi usuri non Iesu matea mo olo vano na ruman Iesu hin hanhani atu, ale tamlohi atu natu Iesu mo opoia, <sup>24</sup> moiso Simon Peter mo tianaho na patuna isana vara i usia isan Iesu vara mo lo vere hare. <sup>25</sup> Ale nona tamlohi usuri atu mo olo vano na ruman Iesu, ale mo usia mara, “Tija, hare natu?”

<sup>26</sup> Iesu mo ŕaramia mara, “A pa seri na tavalu pereti na wai pihi, ale a pa silea isana.”

Moiso Iesu mo seri tavalu pereti atu mo silea isan Judas, natun Simon Iscariot. <sup>27</sup> Vahatea purongo, Setan mo unu hin Judas. Iesu mo vere a mara, “Judas, o vano o vai na sava ko opoi vara o pa vaia vila!” <sup>28</sup> Te vonara mo sopo levosahi na ŕaramin reti atu Iesu mo lo vere a isana. <sup>29</sup> Pani matan Judas mo lo tauri na tanga mania, hai la lo ŕomŕomia vara Iesu mo lo rŭlea vara i voli te hinau mata hanhani, hai la lo ŕomŕomia vara Iesu mo rŭlea vara i sile te mania isan la haratu la tilavono. <sup>30</sup> Judas mo lavi tavalu pereti atu, ale mo malue vahatea. Mo ŕoŕoha moiso.

## 14

<sup>31</sup> Judas mo vano moiso, ale Iesu mo vereea mara, "Nake God mo lo tahe na hijan Natun Tamlohi, ale enia i pa tahe na hijan God matana. <sup>32</sup> Vara maurin Natun Tamlohi mo tahe na hijan God, God i pa hase tahe na hijana aulu vahatea. <sup>33</sup> Na natuku, enau a pa mele toho peresi kamim mata makomoni. Ha pa aleau, pani ha pa sopo efi hiteau. Na lo vere isamim sohen haratu na pete vereea isana tamlohi tavera nona Jew moiso nara, 'Ha pa sopo efi vano hin jara atu enau na lo vano ea'. <sup>34</sup> Pani nake, na lo sile na retileu paro matea isamim. Ha pa opoiopoi kamim hatehateahi sohen enau na lo opoi kamim. <sup>35</sup> Vara ha opoiopoi kamim, tamlohi tari la pa hitea la pa levosahia vara kamim ka noku tamlohi usuri varaŕuhu."

*Peter Mo Retitauhi Isan Iesu*

(Mt 26.31-35; Mk 14.27-31; Lk 22.31-34)

<sup>36</sup> Simon Peter mo usia mara, "Tija, engko ko lo vano epu?"

Iesu mo řaramia mara, "Nake o pa sopo efi usuriau na jara na lo vano ea, pani hitahu o pa usuriau."

<sup>37</sup> Peter mo usia mara, "Tija, mata sava a sopo efi usuriho nakerihi? A efi mate matam!"

<sup>38</sup> Iesu mo usia mara, "O efi mate matakū? Varaŕuhu na vereea isam, engko o pa vun-vuniau vaha tolu, moiso toa vari i pa tarere."

*Ra Pa Toho Peresi Iesu*

<sup>1</sup> Iesu mo vereea isana nona tamlohi usuri mara, "Ha sopo matahu! Ha rasu God, ale ha rasuau sohena, <sup>2</sup> matan na iman Tamaku jara matuvana la lo toho ea. A pa sopo vereuli kamim hinia vara mo sopo varaŕuhu. A pa sahe vara a tatamahuni na jara matamim. <sup>3</sup> Vara a tatamahunia i isoiso, a pa mele mai, a pa lavi kamim vara na sava jara na lo toho ea, kamim sohena ha pa toho ea. <sup>4</sup> Kamim ka levosahi na malelen jara atu enau na lo vano ea."

<sup>5</sup> Thomas mo vereea mara, "Tija, kama sopo levosahi na jara ko lo vano ea. Kama pa levosahi na malele sohena sava?"

<sup>6</sup> Iesu mo vereea mara, "Enau malele varaŕuhu, enau pulo hina varaŕuhu, enau pulo mauri! Vara i sopo matakū, te vonamim i pa sopo efi sahe isan Tama.

<sup>7</sup> Vara ha pa lo levosahiau, ha pa levosahi Tama, ale mo tapulo nake ka levosahia, ale ka hitea moiso."

<sup>8</sup> Philip mo vereea isana mara, "Tija, o vujangi kamam hin Tama! Haratu purongo kama opoia."

<sup>9</sup> Iesu mo řaramia mara, "Philip, na lo toho peresi kamim mo tuai moiso. Kamim ka sopo lo levosahia vara enau hare? Vara ka hiteau, ka hite Tama. Mo sohena sava natu, ka lo usia vara a vujangi kamim hin Tama? <sup>10</sup> Ka sopo rasua vara enau na matea peresi

Tama, ale Tama enia mo matea peresiau? Sava na lo vereea na sopo vereea haseku. Tama sei mo lo toho hiniau, mo lo vai la nona matamata rufuruhu atu.

<sup>11</sup> Ha rasuau hin haratu na vereea vara Tama enia mo matea peresiau, ale enau na matea peresi Tama. Pani vara i vono, ha rasu mata vavahinau hasera purongo. <sup>12</sup>Vararuhu na vereea isamim, vara ha rasuau, ha pa efi vai na sava hiniau na lo vaira. Ha pa vai na hiniau la pa jeuau, matan nake na lo mele hilu sahe isan Tama. <sup>13</sup>Ha usiau, ale enau a pa vai na sava ka usia na hijaku matan vara Natuna i pa sile na ooloo i sahe isan Tama. <sup>14</sup>Vara ha usi te hiniau na hijaku, a pa vaia.”

### *Tanume Tapu I Pa Mai*

<sup>15</sup> Iesu mo vereea isana nona tamlohi usuri mara, “Vara ha opoiau, ha pa vai na sava na lo retileu hinira. <sup>16</sup>Ale, a pa usi Tama vara i mele rule na meramim matea isamim, i pa toho peresi kamim tui tui, <sup>17</sup>meramim atu enia Tanumena, ale i pa vujangi na hina vararuhu hin God. Tamlohi na varama la pa sopo efi lavi na Tanumena matan la pa sopo efi hitea teni la levosahia. Pani kamim ka levosahi na Tanumena matan enia mo lo toho peresi kamim, i pa lo toho hin kamim.

<sup>18</sup> A pa sopo rovo hin kamim sohena natu marua, pani a pa mai isamim. <sup>19</sup> I pa sopo tuai, tamlohi varama la pa sopo efi mele hiteau,

pani kamim ha pa hiteau, ale matan enau a pa mauri, kamim ha pa mauri. <sup>20</sup> Hin pongi atu ha pa levosahia vara enau na matea peresi Tama. Ha pa levosahia vara kamim ka matea peresiau, ale enau na matea peresi kamim. <sup>21</sup> Haratu mo lavi na noku retileu, ale mo ooloo hinira enia haratu mo opoiau, ale Tamaku i pa opoia, ale enau sohena a pa opoia, ale a pa hase vujangiau isana.”

<sup>22</sup> Moiso Judas, mo sopo Judas Iscariot, mo reti mo usia mara, “Tija, raramin nom reti sei vara o pa vujangiho isamim, pani i pa sopo isana tamlohi varama, enia sava?”

<sup>23</sup> Iesu mo raramia mara, “Vara tea mo opoiau, i pa ooloo hina noku reti, moiso Tamaku i pa opoia, kama pa mai isana, kama pa toho hinia. <sup>24</sup> Pani haratu mo sopo opoiau, mo sopo ooloo hina noku reti. Sava reti ka rongo na vereea, la sopo noku, pani non Tamaku sei mo lo ruleau.

<sup>25</sup> Na lo vere kamim hin la hiniau sei nake matan na pa lo toho peresi kamim. <sup>26</sup> Pani Tuetueni ruhu atu i pa mai, enia Tanume Tapu, Tama i pa rulea i lavi na jarku, enia i pa vujangi kamim na hiniau tari, ale i pa vai kamim ha mele romromi na hiniau tari na lo vereea isamim moiso.

<sup>27</sup> Na lo sile kamim na tamata, noku tamata atu, enau haseku a efi silea, mo sopo sohena tamata varama nike i efi silea. Ale ha sopo romkaka, ha sopo matahu.

<sup>28</sup> Ka pete rongoa, na vere a isamim moiso vara a pa vano, ale a pa mele mai isamim. Vara ka opoiau varaʻuhu, ha pa avulahi matan enau na lo sahe isan Tama, matan Tama enia mo aulu jea hiniau.

<sup>29</sup> Na lo vere la hiniau nike tiroma isamim matan vara pongi atu vara i masese ha pa rasuau. <sup>30</sup> A sopo eʻi retireti peravu isamim matan tamlohi tavera sasati matan varama nike mo lo mai, pani enia mo sopo lavi te suiha vara i aulu hiniau. <sup>31</sup> Pani vara tamlohi tari na varama la pa levosahia vara enau na opoi Tamaku, na lo vai na sava enia mo retileu vara a vaira.

Ale ha turu, ʻra malue!”

## 15

### *Iesu Enia Asi Grape Varaʻuhu*

<sup>1</sup> Iesu mo vere a isana nona tamlohi mara, “Enau asi grape varaʻuhu, ale Tamaku enia tamlohi isa. <sup>2</sup> Mo tai naʻihi vevuhi na rangaku sei la sopo vua hiniau. Pani hin haratu la lo vua, mo jalo na rangana vara i pa namaha i maʻivi. <sup>3</sup> Kamim ka vokevoke moiso mata sava na lo vere a isamim moiso.

<sup>4</sup> Ha toho hiniau, ale enau a pa lo toho hin kamim. So-hena ranga matea i sopo eʻi vua matan mo sopo soʻotahi peresi na lahona, kamim ha pa sopo eʻi vua vara ha sopo toho hiniau. <sup>5</sup> Enau pulo asi grape, ale kamim rangaranga, pani vara kamim ha soʻotahi isaku, ale enau a lo soʻotahi isamim, kamim

ha pa vua i maʻivi, pani vara enau a sopo toho isamim, ha pa sopo eʻi vai te hiniau hatea. <sup>6</sup> Vara ha sopo toho hiniau, la pa pulahi kamim sohena ranga mahoa sei la takonahira, ale la pa sulira na hapu.

<sup>7</sup> Vara ha lo toho hiniau, ale vara noku reti i lo toho hin kamim, sava ka usia Tamaku i pa vaia nomim. <sup>8</sup> Tamaku mo lo lavi na ooloo tavera hin malele sei, vara ha vua tavera ka lo vujangia vara ka noku tamlohi usuri varaʻuhu. <sup>9</sup> Na lo opoi kamim sohen Tama mo opoiau. Ha toho na noku opoia. <sup>10</sup> Vara ha ooloo na noku retileu, ha pa lo toho na noku opoia sohen enau na lo ooloo na retileu non Tamaku, ale na lo toho na nona opoia.

<sup>11</sup> Na lo vere la hiniau sei isamim vara ha pa avulahi tavera soheku. <sup>12</sup> Noku retileu na lo vere a isamim nakerihi, vara ha opoiopoi kamim sohen enau na lo opoi kamim tiroma mo mai nake. <sup>13</sup> Mo sopo tea nona opoia i jeu haranike: vara tea i tau na maurina mata tapalana. <sup>14</sup> Ale kamim ha pa tapalaku vara ha lo ooloo na sava na retileu hinia isamim. <sup>15</sup> Slev la sopo levosahia vara nora tamlohi tavera mo lo vai na sava, ale enau na sopo mele retireti isamim sohena noku slev. Na tovi kamim tapalaku matan enau na vere vevuhi na sava Tamaku mo vereau hinia.

<sup>16</sup> Kamim ka sopo viʻoniau, pani enau na viʻoni kamim matan vara ha pa vano ha

vua na vua sei i pa lo toho jejeu. Ale sava hinau ka usia na hijaku, Tamaku i pa silea isamim. <sup>17</sup> Ale na retileu isamim vara ha opoiopoi kamim.”

### *Tamlohi Varama La Pa Rohu Hiniho*

Iesu mo vereea mara:

<sup>18</sup> “Vara tamlohi varama la rohu hin kamim, ha romromia vara la rohu hiniau tiroma. <sup>19</sup> Vara kamim tamlohi non varama, tamlohi hinia la pa opoi kamim. Pani kamim ka sopo tamlohi non varama, mo vono. Enau na vironi narihi kamim vara ha pa tau na varama na harimim, ale matan haratu, tamlohi non varama la pa rohu hin kamim. <sup>20</sup> Ha romromi na sava na lo vere kamim hinia moiso, ‘Slev mo sopo aulu i jeu na nona tamlohi tavera’. *Jn 13.16* Vara tamlohi la vailejilejiau, la pa vailejileji kamim. Vara la ooloo na sava na vereea, la pa ooloo na sava ka lo verera. <sup>21</sup> Tamlohi la pa vailejileji kamim matan ka lo lavi na hijaku, ale matan la sopo levosahi haratu sei mo lo ruleau. <sup>22</sup> Vara a sopo lo sinai a vereea isara, enira la pa sopo ori na hehe, pani nake, la sopo efi vereea vara mo sopo te nora hehe.

<sup>23</sup> Haratu sei mo rohu hiniau, enia i pa rohu hin Tamaku. <sup>24</sup> Vavahinau sei na vaira, mo sopo lo te tamlohi i vaira hin te rani, vara la sopo lo hiteau a vai la hinau atu, la pa sopo ori na hehe, pani la hiteau na vai la hinau atu, ale la rohu tavera hiniau peresi

Tamaku. <sup>25</sup> Pani matan sava la pete ulia na nora leu moiso i pa masese, ale mo vereea mara, ‘Tamlohi la rohu tavera hiniau, pani mo sopo matan te hinau’. *Psa 35.19; 69.4*

<sup>26</sup> Pani a pa rule na Tuetueni ruhu matea i pa tai isan Tama i sinai isamim, enia Tanumena, i pa vujangi na hina vararuhu mo malue isan Tama, ale Tanumena i pa vereuliau. <sup>27</sup> Ale kamim sohena, ha pa vereuliau matan kamim ka lo toho peresiau na tapulo noku rani nike.”

## 16

### *Iesu Mo Vereulia Vara I Pa Mate*

Iesu mo mele vereea mara:

<sup>1</sup> “Na lo vere kamim hin la hiniau nike, matan vara ha sopo kali hin te hinau. <sup>2</sup> La pa tipahi kamim na ima lotu nona Jew. Ale pongi matea i pa mai, tamlohi la pa vili-matei kamim, ale matana, la pa romromia vara la lo vai na masalon God. <sup>3</sup> La pa vai hiniau atu matan la sopo levosahi Tama teni enau. <sup>4</sup> Pani na lo vere hiniau sei isamim nake, matan vara pongina i masese, ha pa romromi na sava na lo vere kamim hinia moiso. Tiroma na sopo vere la hiniau nike, matan enau na lo toho peresi kamim, <sup>5</sup> pani nake na lo sahe isan haratu mo lo ruleau, ale mo sopo te vonamim i usiau hinia vara, ‘Ko lo haipu?’ <sup>6</sup> Mata sava na vereea isamim, ale ka rongo mo sati tavera. <sup>7</sup> Pani na vereea isamim, i pa mele ruhu isamim vara a malue. Vara

a sopo malue, Tuetueni řuhu atu i pa sopo eři mai vara i tueni kamim. Vara a vano a pa řule na Tanume Tapu i mai isamim.

<sup>8</sup> Tanume Tapu i pa mai i tuvai na tamlohi na varama na sava mo hehe, ale na sava mo vokevoke, mata aria non God. <sup>9</sup> Ale i pa mai i tuvai na tamlohi na varama na sava mo hehe matan la sopo rasuau. <sup>10</sup> Ale i pa mai i tuvai na tamlohi na varama na sava mo vokevoke matan mauriku mo vokevoke, ale enau na lo sahe isan Tama ale kamim ha pa sopo eři mele hiteau nike, <sup>11</sup> ale i pa mai i tuvai na tamlohi na varama mata aria non God matan mo pete ari haratu mo lo tauri na suiha non varama nike moiso.

<sup>12</sup> Na opoia vara a vere kamim na hinau matuvana, pani nakerihi i pa řilangi vara ha pa levosahira. <sup>13</sup> Pani hin pongi atu vara Tanume Tapu i mai, enia i pa vujangi na hina varařuhu, ale i pa tiroma hin kamim na malele varařuhu tari vara ha pa levosahira. Tanume Tapu mo sopo vere na hinau enia hasena, pani enia i pa vere kamim purongo na sava mo rongoa isaku. Moiso enia i pa vai kamim ha levosahi na sava i pa masese hitahu. <sup>14</sup> Tanume Tapu i pa vuhesia isamim vara enau na řuhuřuhu jea sohena sava, i pa vaia sohen harihi: i pa lavi na noku reti vara i vuhesia isamim. <sup>15</sup> Hinau tari non Tama enia noku. Matan hinau atu na lo vere vara Tanume Tapu i pa lavi

na noku reti, ale i vuhesia isamim.

### *Avulahi I Pa Mai*

<sup>16</sup> I pa sopo tuai ha pa sopo mele hiteau, pani hitahun haratu, ha pa mele hiteau.”

<sup>17</sup> Nona tamlohi usuri la lo vereverera hinia lara, “Raramin nona reti sei isařa enia sava sei enia mara, ‘I pa sopo tuai ha pa sopo hiteau, pani hitahun haratu ha pa mele hiteau mata makomo rani!’ teni ‘matan a pa mele sahe isan Tama?’ ” <sup>18</sup> Nona tamlohi usuri la lo mele usiusira hinia lara, “Raramin nona reti sei, ‘I pa sopo tuai!’ enia sava řa sopo levosahi na sava mo lo vere.”

<sup>19</sup> Iesu mo levosahia vara la opoia vara la usia hin la hinau sei, ale mo vere isara mara, “Avei, ka lo usiusi kamim na řaramin noku reti sei, ‘I pa sopo tuai ha pa sopo hiteau, pani hitahun haratu, ha pa mele hiteau?’ <sup>20</sup> Varařuhu na vere isamim vara ha pa tangi, moiso ha pa rongo i sati, pani tamlohi na varama la pa avulahi. Ha pa rongo i sati, pani hitahu ha pa avulahi. <sup>21</sup> Vara harai mariviti vara i lavilavi, enia i pa rongohaji tavera, pani vara mo isoiso, mo řomaliho na rongohaji, ale mo avulahi matan mo vasusui na natirihi matea mo pala na varama. <sup>22</sup> Ale sohen haratu nake řomimim la lo sati, pani hitahu hin pongi atu vara a mele hite kamim, ha pa avulahi tavera, ale tea i pa sopo eři posi na nomim avulahi. <sup>23</sup> Vara pongi atu i masese, ha pa sopo eři mele



matan la haratu non varama. Noku tamlohi enira nom, ale na lo usiusi matara matana. <sup>10</sup> Hinau tari noku, enira nom moiso, ale na lavi na ololo tavera matan la lo vereuliau.

<sup>11</sup> I pa sopo tuai enau a sopo mele toho na varama, pani enira la lo pa toho na varama, ale enau na lo mai isam. Tama Tapu o pa tingira hin suiham atu ko lo silea isaku. Moiso la pa matea peresira hasera sohen engko peresiau řa matea. <sup>12</sup> Hin rani atu na lo toho peresira, na lo tingira hin suiha atu ko lo sileau hinia. Na lo kilaura, ale mo sopo te vonara hatea i tihai, pani tamlohi atu matea purongo sei mo lo vano na komo matan vara Retitapu i pa masese. *Psa 41.9*

<sup>13</sup> Na lo mai isam, pani na lo vere la hinau nike nake na lo toho na varama vara noku tamlohi, la pa eři avulahi tavera soheku matana. <sup>14</sup> Na silera na nom reti moiso, ale tamlohi non varama la řohu hinira, matan enira la sopo tamlohi non varama, mo soheku, la řohu hiniau matan enau na sopo non varama.

<sup>15</sup> Tata, na sopo usiho vara o lavi nařihi na noku tamlohi na varama, pani vara o tingira matan Tiapolo. <sup>16</sup> Enira la sopo non varama, sohen enau na sopo non varama. <sup>17</sup> O tapuhira na retivararuhu, nom reti enia vararuhu. <sup>18</sup> Enau na lo řulera vara la vano isana tamlohi řalihi na varama sohen engko ko řuleau. <sup>19</sup> Enau na tapuhiau haseku vara a vai na masalom

purongo, matan vara la pa eři hitevosahia, ale la mai tamlohi non retivararuhu.

<sup>20</sup> Enau na sopo usiusi matan la noku tamlohi nike hasera, pani na lo usiusi mata tamlohi tari sei la pa tau na nora rasua hiniau na sava la pa lo vereea mataku. <sup>21</sup> Na opoia vara enira mo isoiso la pa matea peresihira hatehateahi, sohen enau na lo matea peresiho, ale engko ko matea peresiau. Na opoia vara la pa matea peresira, matan vara tamlohi hin varama nike, la pa rasua vara engko ko řuleau.

<sup>22</sup> Suiha řuhuruahu atu ko lo sileau hinia, na pete silea isara moiso, matan vara la pa matea sohen enra řa matea, <sup>23</sup> enau hinira, ale engko hiniau, matan vara la pa matea na hinau tari, matan vara tamlohi na varama la eři levosahia vara engko ko řuleau, ale ko lo opoira sohen ko opoiau.

<sup>24</sup> Tata, na opoia vara la haratu ko lo sileau hinira, la pa toho peresiau na jara na lo toho ea, matan vara la pa eři hite noku ololo tavera atu sei ko lo sileau hinia, matan ko opoiau hin pongi atu varama mo sopo lo toho. <sup>25</sup> Tata ko vokevoke, hina purongo vara tamlohi na varama la sopo levosahiho, enau na levosahiho, ale la tamlohi nike la levosahia vara engko ko řuleau. <sup>26</sup> Ale enau na vereea isara vara engko ko sohena sava, ale a pa mele vereea isara vara opoia atu ko opoiau hinia, i



pa toho isara, ale enau a pa toho hinira.”

## 18

*La Turuposi Hin Iesu*

(Mt 26.47-56; Mk 14.43-50; Lk 22.47-53)

<sup>1</sup> Iesu mo usi mo isoiiso, enia tolu na nona tamlohi usuri, la vano roto na Vakoan Kidron na talu olive matea atu. <sup>2</sup> Tarea Iesu tolu na nona tamlohi usuri la lo pulutahi ea, ale Judas haratu mo lo turuposi hin Iesu mo levosahi jara atu.

<sup>3</sup> Ale Judas mo vano hin talu olive atu peresi na tamlohi vuro hai nona mara Rome peresi na police mata Temple. Nora moli mata p̄ris peresi na Pharisee la řulera. La lavi na hapu jilangi, lamu peresi na hinau mata valum, ale la mai isan Iesu. <sup>4</sup> Iesu mo pete levosahi na sava i pa masese moiso, pani mo usi isara mara, “Ka lo ale hare?” <sup>5</sup> Ale Judas haratu mo lo turuposi hinia mo lo turu peresira atu. La řaramia lara, “Kama lo ale Iesu mara Nazareth!”

Iesu mo vereaa isara mara, “Enau natu, haratu na lo toho jejeu!” <sup>6</sup> Vahatea purongo enira mo isoiiso la turu juha hinia, ale la jovi na lepa.

<sup>7</sup> Iesu mo mele usia mara, “Ka lo ale hare?”

La řaramia lara, “Kama lo ale Iesu mara Nazareth!”

<sup>8</sup> Iesu mo řaramira mara, “Na pete vereaa moiso vara enau natu. Vara ka lo aleau, ha tinařihi la tamlohi nike la vano!” <sup>9</sup> Mo vereaa sohena matan vara nona reti atu mo

lo vereaa tiroma i pa masese mara, ‘Enau na sopo vaitihai te vonara hatea hin la haratu ko lo sileau hinira’. *Jn 6.39*

<sup>10</sup> Ale Simon Peter enia nona sita vuro matea, ale mo reve narihi sita vuro atu mo langa na matua pero slev non p̄ris aulu atu, hijan slev atu enia Malchus. <sup>11</sup> Pani Iesu mo reti isan Peter mara, “O tau narihi na nom sita vuro! Vara sava, ko řom vara enau a pa sopo eři lavi rani řilangi sei Tama mo lo sileau hinia?”

*La Lavia Mo Vano Isan Annas*

(Mt 26.57-58; Mk 14.53-54; Lk 22.54)

<sup>12</sup> Ale vao tamlohi vuro matea nona mara Rome peresi nora commander peresi na police mata Temple nona Jew, la taurilati Iesu, ale la pesia. <sup>13</sup> La lavia mo vano tiroma isan Annas, enia palihan Caiaphas, p̄ris aulu hin tauni atu. <sup>14</sup> Caiaphas sei natu, mo lo vereaa isana tamlohi tatavera nona Jew mara, “I pa mele řuhu vara tamlohi matea purongo i mate mata tamlohi tari.”

*Peter Mo Vunvuni Iesu*  
(Mt 26.69-70; Mk 14.66-68; Lk 22.55-57)

<sup>15</sup> Simon Peter peresi na tamlohi usuri tinapua non Iesu matea, la usurira la lavi Iesu mo vano isan Annas. Tamlohi non Iesu atu enia mo levosahi mamahuni p̄ris aulu atu, ale mo usuri Iesu mo sivo na lolo rope iman p̄ris aulu atu. <sup>16</sup> Pani Peter mo lo toho na jingoima mariviti na mataruan rope atu. Pani pa tamlohi usuri non Iesu atu

mo mele malue, ale mo vano mo retireti peresi hařarihi atu mo lo kilau na matarua rope. Mo tinařihia vara Peter i unu hin rope atu,<sup>17</sup> pani mo usia isana mara, "Avei, engko ko sopo vonara matea sei la lo usuri tamlohi atu?"

Peter mo řaramia mara, "Enau mo vono!"

<sup>18</sup> Slev peresi na police mata Temple la lo turu řalihi na hapu matea la vaia na valaji hapu mata hamariri. Peter sohena mo lo turu peresihira mo lo marijo.

*Pris Aulu Peresi Iesu*  
(Mt 26.59-66; Mk 14.55-64;  
Lk 22.66-71)

<sup>19</sup> Na lolo ima, pñis aulu atu mo lo usi Iesu mata nona tamlohi usuri peresi na nona vujangi. <sup>20</sup> Pani Iesu mo řaramia mara, "Enau na lo retireti na jara tavera isana tamlohi na varama. Ale tarea, enau na lo vujangi na lolo ima lotu peresi na Temple sei Jew la lo pulutahi ea. Na sopo vere te hinau hatea vara tamlohi la sopo rongoa. <sup>21</sup> Mata sava ka lo usiau hinia? Ha usi la haratu la lo rongoa, la levosahi na hinau na lo vere!"

<sup>22</sup> Iesu mo vere reti atu moiso police mata Temple matea mo vojaja, ale mo vere mara, "Ko řom vara o eři řarami na pñis aulu matea sohen haratu?"

<sup>23</sup> Iesu mo řaramia mara, "Vara na vere te hinau mo sopo tataholo o vere! Pani vara mo vono, mata sava ko

vojaiu?" <sup>24</sup> Ale Annas mo řule Iesu mo vano isan Caiaphas, pñis aulu, pani la sopo lo uli nařihia na asihai hinia.

*Peter Mo Mele Vunvunia*  
(Mt 26.71-75; Mk 14.69-72;  
Lk 22.58-62)

<sup>25</sup> Haratu mo lo vano, pani Simon Peter mo pa lo turu mo lo marijo, ale la usia isana lara, "Avei, engko ko sopo nona tamlohi usuri matea?"

Peter mo mele vunvunia mara, "Enau mo vono!"

<sup>26</sup> Slev matea non pñis aulu tahisan haratu sei Peter mo lo langa na perona, mo usia mara, "Mo sopo engko sei na hiteho na talu olive peresi tamlohi nike?"

<sup>27</sup> Peter mo mele vunvunia, ale vahatea purongo, toa vari matea mo tārere.

*Iesu Mo Turu Na Nahon Pilate*

(Mt 27.1-2, 11-14; Mk 15.1-5; Lk 23.1-5)

<sup>28</sup> Na řalavuho jea natu, la lavi Iesu la malue na iman Caiaphas, la vano na ima tavera matea nona tamlohi tavera nona mara Rome. Pani la lo sasaovi na jingoima, matan la rasua vara tea i unu, enia i pa lumiha na nahon God, ale enia i pa sopo eři hani na Passover.\*

<sup>29</sup> Pilate mo malue mo usia mara, "Tamlohi nike, mo vai na sava hina sati?"

<sup>30</sup> La řaramia lara, "Ko řom vara kama pa lavi tamlohi ak-erihi i mai isam vara enia mo sopo vai te hina hehe?"

\* **18:28:** lumiha: hite: Num 9.9 Leu non Moses mo vere vara haratu mo tope na leu sei i pa saovi te vitu hatea tiroma moiso i pa mele eři hani na Passover.

<sup>31</sup> Pilate mo vereia isara mara, "Ha lavia, ale ha pa aria i usuri na nomim leu."

Vao tamlohi nona Jew atu la řaramia lara, "Pani nomim leu mo tapuhoro kamam vara kama eři tau te tamlohi na mateia." <sup>32</sup> Ale sohen Iesu mo vereia moiso vara nona mateia i pa sohena sava, mo lo mai vara i masese. *Jn 3.14; 12.32*

<sup>33</sup> Pilate mo mele unu na lolon patu ima tavera atu, ale mo tovi Iesu mo vano isana, ale mo usia isana mara, "Avei, engko natu, Supe nona Jew?"

<sup>34</sup> Iesu mo řaramia mara, "Retiusia sei mo tai isam hasem teni tea la vereia isam matakū?"

<sup>35</sup> Pilate mo řaramia mara, "Sava? Vara sava, enau Jew matea? Tahisam tataholo peresi na pŕis aulu, enira natu, la laviho ko mai isaku. Ko vai na sava mo sati?"

<sup>36</sup> Iesu mo řaramia mara, "Jara atu na lo tauri na suiha hinia mo sopo non varama nike, vara i sohena, noku tamlohi la pa valum moiso matan vara la turuhoroau vara a pa sopo eři vano na lima tamlohi tatavera nona Jew, pani mo vono, jara atu na lo tauri na suiha hinia mo sopo non varama nike."

<sup>37</sup> Pilate mo vereia mara, "Varařuhu, engko Supe matea?"

Iesu mo vereia isana mara, "Engko ko lo vereia vara enau Supe matea. Enau na vora hin varama nike matan vara a vere na retivarařuhu. Ale la haratu non varařuhu la levosahi na leoku."

<sup>38</sup> Pilate mo usia isan Iesu mara, "Retivarařuhu enia sava?"

*Iesu Mo Vano Na Mateia (Mt 27.15-31; Mk 15.6-20; Lk 23.13-25)*

Hitahun haratu Pilate mo mele malue mo vereia isan la Jew atu mara, "Tamlohi nike, na sopo hite te hinau i ori hinia vara a sile na talai isana. <sup>39</sup> Ale tarea na lo teri na tamlohi matea na nomim pongi Passover. Ale kamim ka opoia vara a teri na Supe nona Jew teni mo vono?"

<sup>40</sup> Ale la řaramia la ulo lara, "Mo vono! Mo sopo enia. Kama opoi Barabbas." Barabbas enia tamlohi valvalum matea ale enia mo řohu na gavman non Rome.

## 19

### *Pilate Mo Sile Iesu Isara*

<sup>1</sup> Ale Pilate mo lavi Iesu mo retileu vara, la tamlohi vuro atu, la pa rupia na asi maja. <sup>2</sup> Tamlohi vuro la

peri na rongorongo na asihai ngařngařiha la taua na patuna, ale la liho na ruru peravu majhina mo perpel nona tamlohi aulu na pilina.

<sup>3</sup> La mai isana la kerehia lara, "Engko Supe nona Jew, avei?" Ale la tutuhi na nahona.

<sup>4</sup> Pilate mo mele malue, mo vereia isana tamlohi tatavera nona Jew mara, "Ka hitea, na lavia mo mai isamim, matan ha pa levosahia vara enau na sopo eři vilei te hinau i ori hinia vara i lavi na talai matana."

<sup>5</sup> Ale Iesu mo malue peresi na řongořongo la vaia na asihai ngařngařiha na patuna

peresi na ruru peravu, majhina mo perpel. Ale Pilate mo vereea isara mara, “Ka hitea, tamlohi atu nahai!”

<sup>6</sup> Moiso na rani moli nona p̄ris peresi na police mata Temple la hitea, la ulo lara, “Ha vosaea na talopeilopei! Ha vosaea na talopeilopei!”

Pilate mo vereea mara, “Kamim ha lavia, ha vosaea na talopeilopei kamim hasemim! Enau na sopo vilei te hinau hatea vara mo ori hinia.”

<sup>7</sup> Tamlohi tatavera nona Jew atu la řaramia lara, “Kamam nomam leu matea mo vereea vara i pa mate matan mo lo vereea vara enia Natun God!”

<sup>8</sup> Ale Pilate mara mo rongo reti atu mo mele matahu mo tavera, <sup>9</sup> moiso mo posi vara i mele unu hin nona patu ima tavera atu, ale mo hite Iesu, mo vereea isana mara, “Engko ko tai epu?” Pani Iesu mo sopo řaramia.

<sup>10</sup> Moiso Pilate mo vereea mara, “Ko sopo řaramiau mata sava? Ko sopo levosahia vara ko lo toho na suiha limaku vara o pa materi teni la vosaeo na talopeilopei vara a opoia?”

<sup>11</sup> Iesu mo řaramia mara, “Vara God i sopo lo sileho na suiha, engko o sopo efi vai te hinau isaku, ale matan harihi, la haratu la sileau isam, nora hehe mo jeu na nom.”

<sup>12</sup> Hitahun haratu Pilate mo tapulo vaihite vara i teri Iesu, pani vao atu mo mele ulo aulu lara, “Vara o teri tamlohi nike, engko ko sopo tapalan supe hin Rome! Vara

tea i vereea vara enia supe enia mo meresahi non supe hin Rome!”

<sup>13</sup> Ale Pilate mara mo rongoa, mo tiroma hin Iesu la vano na jingoima, ale mo sakele na jara tamlohi ari la lo tovia, ‘Jara Pulutahi la tiua na vatu’ na leon tavgavuvin Israel lara, ‘Gabbatha’. <sup>14</sup> Nake mo livuha rani moiso na rani mo tiroma na rani Passover. Pilate mo vereea isana vao Jew atu mara, “Ka hitea! Nomim Supe nahai!”

<sup>15</sup> Vao atu la ulo aulu lara, “O vilimateia! O vilimateia! O vosaea na talopeilopei!”

Pilate mo usia isara mara, “Avei, ka opoia vara a vosae nomim Supe na talopeilopei?”

Moli p̄ris la řaramia lara, “Mo sopo te nomam Supe, pani Supe nona mara Rome enia nomam Supe!” <sup>16</sup> Ale Pilate mo tau Iesu na limara vara la pa vosaea na talopeilopei.

### *La Vosae Iesu Na Talopeilopei*

*(Mt 27.32-44; Mk 15.21-32; Lk 23.26-43)*

La tauri Iesu la tiroma hinia, <sup>17</sup> ale la lavi Iesu mo vano, ale enia mo hasena lavi na talopeilopei, mo malue la vano hin jara atu la tovia vara, ‘Jara Patusui Tamlohi’ na leon tavgavuvin Israel la tovia Golgotha.

<sup>18</sup> Hin jara atu natu la vosaea na talopeilopei peresi na tamlohi tinapua mo rua na tavaluna, Iesu na livuhara.

<sup>19</sup> Pilate sohena mo uli na reti matea mo vosaea aulu

hin talopeilopei atu mo vereaa mara,

### **Iesu mara Nazareth Supe nona Jew**

<sup>20</sup> Jew matuvana la evia matan jara atu la vosae Iesu hinia, mo lo toho na pahisan taon tavera atu, ale mo ulia na leo tavitavin Israel peresi na leo mara Rome peresi na leo mara Greek. <sup>21</sup> Ale moli nona p̄ris la vano isan Pilate lara, “Mata sava ko ulia vara, enia Supe nona Jew? I pa mele řuhu vara o ulia vara, enia mo lo vereaa vara enia Supe nona Jew!”

<sup>22</sup> Pani Pilate mo řaramira mara, “Sava na ulia moiso i lo toho sohena!”

<sup>23</sup> Tamlohi vuro la vosae Iesu na talopeilopei moiso, ale la asease na nona ruru isara tupu vati na sope ruru matea isara hatehateahi. Nona ruru tavera enia tavalu ruru matea purongo, mo sopo te sořosořo hinia, <sup>24</sup> ale matana, la tamlohi vuro atu la vereverea isara lara, “Ra sopo řariřaria. Ra pa roro matana, vara řa pa hitea vara hare i pa lavia nona!” Haratu mo masese matan vara sava Retitapu mo vereaa i pa masese mara, ‘La aseasehi na noku ruru, la roro mata noku ruru.’ *Psa 22.18* Ale tamlohi vuro la vai na sava la hatihia moiso.

<sup>25</sup> Tinan Iesu mo lo turu na tavalu nona talopeilopei peresi vetavain tinana, peresi Mary atu naroun Clopas, ale Mary Magdalene. <sup>26</sup> Moiso Iesu mo hite tinana peresi tamlohi usuri atu mo opoia mo tavera, mo vereaa isan tinana mara, “Tamlohi

nike, nake enia natum.” <sup>27</sup> Ale mo vereaa isan tamlohi usuri atu mara, “Enia nake tinam.” Mo tapulo hin rani atu, tamlohi atu mo lavia mo vano na imana.

### *Iesu Mo Mate*

*(Mt 27.45-56; Mk 15.33-41; Lk 23.44-49)*

<sup>28</sup> Hitahun haratu, Iesu mo levosahia vara mo vai vevuhi na nona vavahinau, ale vara na sava hinou Retitapu mo vereaa moiso vara i pa masese mo vereaa mara, “Na mařohu!” *Psa 22.15*

<sup>29</sup> Potele waen hohona matea mo lo toho atu, ale la řuřuni na susupaheu hin waen hohona atu na ranga hyssop matea, ale la tahea mo sahe na jingona. *Psa 69.21* <sup>30</sup> Hitahun haratu Iesu mo inu waen atu mo vereaa mara, “Hinau tari mo isoiso!” Mo rautoho moiso mo mate.

### *La Sari Na Roron Iesu*

<sup>31</sup> Ale matan vara i mele rani sahe i pa Sabbath matea peresi na Passover, enia rani aulu matea nona Jew. Jew la sopo opoia vara la tarape atu la lo sevu na talopeilopei hin rani atu, ale la vano la usia isan Pilate vara la kame na palora vara la mate vila, ale la pa eři suira. <sup>32</sup> Ale tamlohi vuro la kame na palon la tamlohi mo rua atu sei la lo vosaera na talopeilopei na tavalun Iesu tiroma. <sup>33</sup> Pani lara la mai isan Iesu, la hitea vara enia mo pete mate moiso, ale la pa sopo kame na palona.

<sup>34</sup> Pani tamlohi vuro matea mo urai Iesu na rorona, ale řae peresi na wai mo

malue. <sup>35</sup> Kama levosahia vara hinau atu mo varaʻuhu matan haratu mo lo hitea mo vereulia vara mo varaʻuhu, ale nake kamim sohena, ha pa eʻri rasua. <sup>36</sup> La hinau sei la masese matan vara Retitapu i pa masese sei mo verea mara, 'Te sui epena hatea i pa sopo moti.'

*Exo 12.46; Num 9.12; Psa 34.20*

<sup>37</sup> Ale na jara tinapua na Retitapu mara,

'La pa hitea hin haratu sei la urai na rorona na sari.'  
*Zec 12.10; Rev 1.7*

*La Tavuni Iesu*  
*(Mt 27.57-61; Mk 15.42-47; Lk 23.50-56)*

<sup>38</sup> Tamlohi usuri non Iesu matea, Joseph mara Arimathea, mo jarohe na nona rasua hin Iesu matan mo matahu vara tamlohi tatavera nona Jew la pa sile na talai isana, ale mo vano isan Pilate mo usia vara i tinaʻrihi na tarapen Iesu vara i tavunia. Pilate mo tinaʻrihia, ale Joseph mo sui naʻrihia na talopeilopei.

<sup>39</sup> Pa Nicodemus sei mo lo mai isan Iesu na vutepongi, mo usuri Joseph. Mo lavi na tanga hasori ʻuhu matea la tovia myrrh peresi na aloes la hoihoira jara matea, puhonina mo jeu 25 kilo.

<sup>40</sup> La tupra rua atu la tali ʻralihi na tarapen Iesu na ruru lulu peresi na hasori sei Jew la lo tavuni na nora mate peresia. <sup>41</sup> Mariviti hin jara atu sei la vosae Iesu na talopeilopei ea, lovuhai matea la lavo na vipahai mata lakolako mo ʻralihia mo

lo toho atu. Ale papa vatu matea la sopo lo tau te tarape tamlohi hinia mo lo toho ea. <sup>42</sup> La tau na tarapen Iesu hin papa vatu atu matan mo lo toho mariviti atu, ale la vaia vilavila matan enia rani atu nona Jew mata tatamahu mata Passover.

## 20

*Iesu Mo Mele Turu*  
*(Mt 28.1-10; Mk 16.1-8; Lk 24.1-12)*

<sup>1</sup> Na nahonaho rani na ʻralavuhu na rani tiroma mata wik, mo pa lo ʻroʻroha, ale Mary Magdalene mo vano hin papa atu. Ale mo hitea vara la kuresi naʻrihi vatu tavera atu na matarua moiso, ale papa atu mo roi. <sup>2</sup> Mara mo hitea sohena, mo maro mo mai isan Simon Peter peresi tamlohi usuri atu Iesu mo opoia, ale mo verea isara mara, "La lavi naʻrihi Tija na papa moiso! Kama sopo levosahia vara la taua epu!"

<sup>3</sup> Peter peresi tamlohi usuri non Iesu tinapua atu la maro mata papa. <sup>4</sup> La maro pulupulu, pani tamlohi usuri non Iesu tinapua atu mo maro mo jeu Peter mo kakau na papa tiroma. <sup>5</sup> Mo rautoho mo riorio, ale mo hite te tavalu ruru la lo toho na lolo papa, pani mo sopo unu na lolo papa.

<sup>6</sup> Hin rani atu Simon Peter mara mo kakau mo unu na papa, ale mo hite te tavalu ruru atu. <sup>7</sup> Ale enia mo hite tavalu ruru atu sei la lo tavu na nahon Iesu hinia, la pirura la lo toho hasera. <sup>8</sup> Tamlohi usuri non Iesu atu haratu mo lo kakau tiroma, mo unu na

papa, ale mo hitea moiso mo rasua. <sup>9</sup> Hin rani atu, Peter peresi nona tamlohi tinapua atu, la sopo levosahia vara Retitapu mo vereea vara Iesu i pa mele turu na mateia. <sup>10</sup> Ale la tamlohi usuri tupra rua atu la mele hilu la mule.

*Mary Magdalene Mo Hite Iesu*  
(Mk 16.9-11)

<sup>11</sup> Mary Magdalene mo lo turu na jingoiman papa atu mo lo tangi, mo lo tangi ale mo rautoho mara mo riorio sivo hin papa atu, <sup>12</sup> mo hite na angelo mo rua, la ru na ruru lulu la lo sakele na jara la tau na tarapen Iesu ea. Matea mo sakele na jara patuna, ale haruana mo sakele na jara palona. <sup>13</sup> La angelo atu la usi Mary lara, "Haʻrai, ko lo tangi mata sava?"

Mo ʻaramira mara, "La lavi naʻihi na tarapen noku Tija! Na sopo levosahia vara la taua epu."

<sup>14</sup> Mary mo vereea sohena mo isoiso mo posi mo hite Iesu mo lo turu atu, pani enia mo sopo hitevosahia vara enia Iesu. <sup>15</sup> Iesu mo usia mara, "Haʻrai, mata sava ko lo tangi? Ko lo ale hare?"

Mary mo ʻromi vara enia tamlohi lovuhai, ale mo vereea mara, "Tapala, vara engko ko naʻihi na tarapena, na opoia vara o vereau hinia, matan vara a eʻi vano a lavia."

<sup>16</sup> Ale Iesu mo vereea isana mara, "Mary!"

Mary mo posi mo vereea isana mara, "Rabbi!" Ale

ʻaramin 'rabbi' enia 'tija' na leon tavitavuin Israel.

<sup>17</sup> Iesu mo vereea isana mara, "O sopo tikeliau! Na sopo lo sahe isan Tata, pani o pa vereea isana noku tamlohi vara enau na lo sahe isan Tamaku enia noku God, ale enia nomim God, ale Tamamim."

<sup>18</sup> Mary Magdalene mo mele hilu vano mo vereea isana nona tamlohi usuri vara mo hite Moli. Mo verera na sava Iesu mo vereea isana.

*Iesu Mo Pala Isara*  
(Mt 28.16-20; Mk 16.14-18; Lk 24.36-49)

<sup>19</sup> Nona tamlohi usuri la matahuni na tamlohi tatavera nona Jew, ale na ravravin rani atu la pelatihoro na lolo ima matea. Vahatea purongo Iesu mo pala na livuhara, mo vereea isara mara, "Tamata i toho isamim!" <sup>20</sup> Ale mo vujangira na limana peresi na rorona, ale nona tamlohi usuri la avulahi tavera matan la hite Moli.

<sup>21</sup> Iesu mo mele vereea isara mara, "Tamata i toho isamim, enau na lo ʻrule kamim sohen Tama mo ʻruleau." <sup>22</sup> Hitahun haratu Iesu mo soro na maromaroni isara mo vereea mara, "Ha lavi na Tanume Tapu! <sup>23</sup> Vara ha ʻromi tea na nona hehe, God i pa ʻromia, pani vara ha sopo ʻromi tea na nona hehe, God i pa sopo ʻromia."

*Thomas Mo Hite Iesu*  
<sup>24</sup> Hin rani atu Iesu mo pala isana nona tamlohi usuri, matea mo sopo toho peresira, enia Thomas la tovia 'Havo'. <sup>25</sup> Ale tatua tamlohi usuri tinapua la vereea isana lara,

“Kama hite Moli!” Pani Thomas mara, “A pa rasua vara a hite na matara nila na limana, ale a majohoi na limaku na mataran sari atu mo lo unu na rorona.”

<sup>26</sup> Ale wik matea mo vano moiso, nona tamlohi usuri la lo mele pulutahi, pani nake Thomas mo lo toho peresira. La pelatihoro, pani Iesu mo pala mo turu na livuhara mo vereea mara, “Tamata i toho isamim!” <sup>27</sup> Ale mo vereea isan Thomas mara, “O tau na pisum nike, ale o kilau usuri na limaku. O majohoi na limam na roroku. O isoiso na nom rom rua o rasul!”

<sup>28</sup> Thomas mo řaramia mara, “Engko noku Moli, engko noku God!”

<sup>29</sup> Iesu mara, “Thomas, engko ko rasua matan ko hiteau purongo teni mo vono? La haratu la sopo hiteau na matara, pani la tau na nora rasua hiniāu, enira natu, la pa avulahi tavera.”

### *Puku Nike*

<sup>30</sup> Iesu mo vai na mata-mata tavera matuvana tinapua na naho nona tamlohi usuri, pani enira mo isoiso la sopo ulira hin puku nike. <sup>31</sup> Pani na uli la haranike matan vara ha pa eři tau na nomim rasua hin Iesu vara enia Křisto atu, Natun God. Vara ha tau nomim rasua hiniā ha pa lavi na mauri vararuhu.

## 21

### *Iesu Mo Pala Isara Galilee*

<sup>1</sup> Hitahun haratu, sorasora matan Iesu mo vano sohen harihi: Iesu mo mele pala isana nona tamlohi usuri

na pahisa tasi sei la tovia Tiberias teni Galilee. <sup>2</sup> Simon Peter, Thomas la tovia ‘Havo’ enia Nathanael mara Cana atu Galilee la natun Zebedee, ale la vorai atu James enia John la lo toho atu peresi na nona tamlohi usuri mo rua tinapua. <sup>3</sup> Simon Peter mara, “Enau a sivo a tara maji!”

Tatuara lara, “Kama pa usuriho!” La vele na botira la sivo, pani hin vutepongi atu, la sopo tikeli te maji hatea.

<sup>4</sup> Mo mele rani sahe na řalavuhu jea, Iesu mo lo turu na pahisa tasi, pani nona tamlohi usuri la sopo hitevosahia vara enia hare. <sup>5</sup> Iesu mo ulo mara, “La tapala, ka tikeli te maji teni mo vono?”

La řaramia lara, “Mo vono!”

<sup>6</sup> Ale mo vereea isara mara, “Ha tuhu na nomim tara na matua botimim, ale ha pa tikeli te maji!”

La vaia sohena, ale tara mo mařivi na maji la sopo eři mele revea i unu na boti.

<sup>7</sup> Tamlohi usuri atu Iesu mo opoia, mo vereea isan Peter mara, “Eh, Moli sei!” Ale Simon Peter mara mo rongo vara Moli natu, mo mele ru na nona ruru sei mo lo talihia na pangena vara mo lo revereve, moiso mo kue na tasi. <sup>8</sup> La tamlohi usuri tinapua non Iesu atu na lolo boti la pa lo sua reve na tara mo mařivi na maji mo lo usuri na boti na hařina. Ale jara atu la lo toho hiniā mo mariviti 100 metre asau na jarauta.

<sup>9</sup> Ale la hoso na jarauta, la hite te pereti ea, ale la hite te maji la lo toho na valaje hapu.



<sup>10</sup> Iesu mo vereia isana nona tamlohi usuri mara, "Ha lavi te maji sei ka pa taraira nakerihi i sinai." <sup>11</sup> Simon Peter mo mele vele na boti, ale mo reve hosohi na tara. Evi maji mo tikeli 153, ale maji tatavera nakonako, pani tara atu mo sopo mařari.

<sup>12</sup> Iesu mo vereia mara, "Ha mai, ha hanhani!" Pani la matahu mo sopo te tamlohi usuri vonara hatea i usia vara enia hare matan la levosahia vara enia Moli. <sup>13</sup> Iesu mo lavi na pereti, ale mo asea isana nona tamlohi usuri, ale mo vaia sohena na maji. <sup>14</sup> Haranike enia hatolun nona pala isana nona tamlohi usuri hitahun rani atu, mo mele turu na nona mateia.

### *Iesu Enia Peter*

<sup>15</sup> Ale Iesu tolu na nona tamlohi lara la hanhani moiso, mo usia mara, "Simon natun John, engko ko opoiau mo jeu la tamlohi nike?"

Simon Peter mo řaramia mara, "He'e Moli, engko ko levosahia vara na opoiho."

Iesu mara, "O vahani na pulaku natu sipsip!"

<sup>16</sup> Iesu mo mele usia vaha rua isan Peter mara, "Simon natun John, ko opoiau?"

Peter mo řaramia mara, "He'e Moli, ko levosahia vara na opoiho."

Iesu mo řaramia mara, "O lo kilau na pulaku sipsip!"

<sup>17</sup> Iesu mo mele usia vaha tolu isan Peter mara, "Simon natun John, ko opoiau?"

Nake, Peter mo rongu mo sati matan Iesu mo usia vaha tolu isana vara mo opoia. Ale mo řaramia mara, "Moli,

engko ko levosahi na hinau tari. Ko levosahia vara na opoiho."

Iesu mo řaramia mara, "O vahani na pulaku sipsip."

<sup>18</sup> Varařuhu na vereho hinia, na pongi ko lo uluvou ko lo ruru hasem, ale ko lo vano na jara ko opoia, pani hin pongi atu vara o vajiaha, o pa sohai na limam, ale tamlohi tinapua la pa lihoho, ale la pa tiroma hiniho o vano na jara engko ko sopo opoia."

<sup>19</sup> Iesu mo vereia matan vara i vereulia vara Peter i pa mate sohena sava, ale sohena sava nona mate i pa tahe na hijan God aulu. Hitahun haratu Iesu mo mele vereia isan Peter mara, "O usuriau!"

### *Iesu Mo Vujangi Peter*

<sup>20</sup> Peter mo posi mo kilau sivo mo hite tamlohi usuri atu Iesu mo opoia mo lo usurira. Enia pa nona tamlohi usuri atu sei mo lo sakele na tavalun Iesu na hanhani Passover, ale mo lo usia vara, "Tija, hare natu, i pa turuposi hiniho?"

<sup>21</sup> Ale Peter mo hite nona tamlohi atu mo lo usurira, mo usi Iesu hinia mara, "Moli, enia i pa sohena sava?"

<sup>22</sup> Iesu mo řaramia mara, "Vara enau a opoia vara enia i mauri i tikeli pongi atu a mele mai, mo sopo te nom hinau hinia, pani engko o usuriau!"

<sup>23</sup> Ale sorasora atu la sorahia vara nona tamlohi usuri atu i pa sopo eři mate, pani Iesu mo sopo vereia vara i pa sopo mate, mo vono. Enia mo vereia purongo isan Peter mara, "Mo sopo te nom hinau hinia vara enau a opoia vara

enia i mauri i tikeli pongi atu  
a mele mai.”

<sup>24</sup> Enau sei nona tamlohi  
usuri atu, ale enau natu na  
lo vereuli la hinau sei. Na lo  
ulira vara ha pa efi levosahia  
vara enau na lo vereulia ale  
la varaʻuhū.

<sup>25</sup> Iesu mo vai na hinau  
tinapua matuvana, pani vara  
la uli vevuhira na puku, i pa  
sopo te masapa na varama  
mātara.

## Acts Vavahinau Non Tanume Tapu Puku Nike

Harihi enia tapala puku peresi na Retiruhu sei Luke mo ulia. Hinira Luke mo uli mamahuni na hinau tari Iesu mo lo vaira mo tikeli rani atu mo sahe na tuka (1.1-2). Na tapulo puku nike mariviti Iesu i pa sahe na tuka, ale mo retileu isana nona tamlohi mara la pa lo sasaovi Jerusalem mata Tanume Tapu (1.8).

Iesu mo sahe na tuka, ale vao kalesia la unu hin mauri atu God mo supe hinia na jara tari na varama hin pongi atu (2.1-35). Jew la lo romromia lara enira hasera purongo la tamlohi non God, pani puku akerihi mo vujangia vara Tanumen God mo mai mata tamlohi rofoha sohera.

Iesu mo pala isan Paul mata vironia vara i mai nona volitusi (9.1-22). Paul mo hahau mata lavi na Retiruhu i vano isana jara tamlohi rofoha ale tamlohi matuvana la mai la kalesia matana. Jew la opoia vara la pa vilimateia, pani na isoisona Paul mo lavi na Retiruhu mo kakau Rome (28.16-31).

### Hin Puku Akerihi

1. Retiruhu Mo Ulua Jerusalem (1.1-8.3)
2. Tanumen Tapu Mo Jovi Hinira Judea Peresi Samaria (8.4-12.25)
3. Tiroma Hahau Non Paul (13.1-14.28)

4. Council Tavera Nona Kalesia Jerusalem (15.1-35)
5. Harua Hahau Non Paul (15.36-18.22)
6. Hatolu Hahau Non Paul (18.23-21.16)
7. La Taurilati Paul Jerusalem (21.17-23.22)
8. La Lavi Paul Mo Sivo Caesarea (23.23-26.32)
9. Paul Mo Sahe Rome (27.1-28.31)

### *Retitauhi Mata Tanume Tapu*

<sup>1</sup> Theophilus, na noku puku tiroma na uli na hinau tari Iesu mo tapulo vaira, ale mo lo vujangira <sup>2</sup> mo kakau hin rani atu God mo lavi narihia, mo sahe aulu na tuka, sei tiromana mo sile na nona retileu hin Tanume Tapu isana nona vahaŕule sei mo viŕonira.

<sup>3</sup> Hitahun na nona rongohaji, mo mele hase vujangia isara vara mo mele mauri na malele tinatinapua matuvana hin la rani atu, mo ngavulu vati atu sei mo lo so-rahi mauri atu God mo aulu hinia isara. <sup>4</sup> Tiroma sei mo pa lo toho peresira mo vereea mara, "Ha sopo malue Jerusalem pani ha lo saovi tako mata sava na pete vereea isamim moiso sei vara Tama i pa ŕule na Tanume Tapu, i mai isamim. <sup>5</sup> Matan John tamlohi paptijo mo paptijo na wai, pani i pa sopo tuai ha pa paptijo na Tanume Tapu."

### *Iesu Mo Mele Sahe Na Tuka*

<sup>6</sup> Hin rani atu vahaŕule la lo toho peresi Iesu, tarea la

lo usia isana lara, “Moli, engko o pa turu na nom suiha mata supe aulu hin Israel pangisa?”

<sup>7</sup> Iesu mo vereia isara mara, “Mo sopo tinañihia vara ha levosahi na ranin hinau sei Tama hasena mo taua usuri na masalona. <sup>8</sup> Pani kamim ha pa lavi na suiha hin rani atu vara Tanume Tapu i mai hin kamim, ale kamim ha pa noku tuetueni hin Jerusalem, na jara tari Judea, Samaria, i tikeli na isoiso jara tari na varama.”

<sup>9</sup> Hitahun la hinau atu mo lo verera, ale lara la pa lo kilaua, palona mo tinañihi na lepa mo lo sahe aulu, ale telangi matea mo lavi nañihia mo tihai na nahora, <sup>10</sup> ale la pa lo taña la lo tañengia mo lo sahe na tuka, ale vahatea purongo, tamlohi mo rua la ru la ruru lulu jea la lo turu na pahisara, <sup>11</sup> ale la vereia lara, “Mara Galilee, mata sava ka lo turu nika, ka lo kilau sahe na tuka? Iesu akerihi sei God mo lavi nañihia isamim, mo sahe na tuka, i pa mele sinai sohen harihi ka lo hitea mo lo sahe na tuka.”

### *Matthias Mo Lavi Na Jaran Judas*

<sup>12</sup> Hin rani atu hinau atu mo masese vahañule la lo toho na Vuti talu Olive mariviti kilometre matea hin Jerusalem, ale la mele hilu la vano Jerusalem. <sup>13</sup> Ale lara la unu Jerusalem, la vele sahe aulu na jara tinapua matea hin ima atu sei la lo toho ea hin rani atu:

Peter  
John

James  
Andrew  
Philip  
Thomas  
Bartholomew  
Matthew  
James natun Alphaeus  
Simon sei, enia tamlohi matea mata valum mata jarana,  
peresi Judas natun James.

<sup>14</sup> Enira mo isoiso la tau na romira mata usiusi jara matea tolu na hañai tinatinapua hai peresi Mary tinan Iesu tolu na tasin Iesu.

### *La Viñoni Matthias*

<sup>15</sup> Hin rani atu, Peter mo lo turu na livuhan la tamlohi rasua atu, ale vao atu mariviti i ngav sangavulu ngavulu rua (120) la lo pulutahi hin jara atu, ale mo vereia isara mara, <sup>16</sup> “La vorai, sava Retitapu mo vereia vara i pa masese isan Judas, Tanume Tapu mo vereia tiroma moiso na jingon supe David mara, enia i pa tiroma hin la haratu la pa taurilati Iesu. <sup>17</sup> Matan enia mo viñonia peresiña, ale enia vonaña matea na noña vavahinau.

<sup>18</sup> Ale tamlohi akerihi mo voli na lepa matea na voli nona hehe. Mo vele mo sahe na pesapesa, ale mo jovi patuna mo tiroma mo vujahi ñañihi na pangena, ale tinena tari la mañava. <sup>19</sup> Mara Jerusalem tari la rongoa, ale la tau na hijan jara atu vara Akeldama: na leora mo vara, ‘Lepa Mata Rae’.

<sup>20</sup> Matan David mo ulia na nona puku na psalm mara, ‘Ha tinañihia vara jara nona

toho i puru, ale i sopo tea i toho hinia'. *Psa 69.25* Ale mo mele vereā mara, 'Ha viřoni te tamlohi tinapua i lavi na jarana'. *Psa 109.8*

<sup>21</sup> Ale nakerihi, řa pa mele viřoni te tamlohi tinapua hatea vara i lavi na jaran Judas, enia i pa tamlohi matea mo lo toho peresiřa tarea hin rani atu Moli Iesu mo lo toho peresiřa, <sup>22</sup> mo tapulo hin rani atu sei John tamlohi paptijo mo tapulo paptijo mo mai mo tikeli rani atu Iesu mo mele sahe na tuka — enia i pa vonařa matea sei mo hite na nona sauteterahi."

<sup>23</sup> La vere na tupra rua, matea enia Joseph la tovia Barsabbas teni Justus, ale haruana enia Matthias. <sup>24</sup> Ale la ususi lara, "Moli, engko ko levosahi na mapu tamlohi tari. O vujangi kamam hin haratu sei ko viřonia <sup>25</sup> vara enia i pa lavi na jaran Judas peresi na nona vavahinau, matan enia mo vano na nona talai." <sup>26</sup> Ale la reve na hijara, ale mo jovi isan Matthias, ale Matthias mo mai vahařule matea peresi la haratu mo sangavulu řomana matea.

## 2

### *Tanume Tapu Mo Mai*

<sup>1</sup> Ranin Pentecost mo pala, la lo toho na jara matea enira mo isoiso. <sup>2</sup> Ale vahatea purongo, la rongo na hināu matea sohena langi tavera matea mo lo sere, ale mo mařivisi ima atu la lo sakele hinia. <sup>3</sup> Ale hināu hai sohena pepe hapu, la pala isara la

sakele aulu na patura hate-hateahi. <sup>4</sup> Ale enira mo isoiso, Tanume Tapu mo sohonira, ale la tapulo retireti na leo tinatinapua sohen Tanumen God mo tinařihira hinia.

<sup>5</sup> Hin rani atu, Jew matu-vana na jara tari na varama sei řomira mo řilangi mata nora rasua la lo toho atu Jerusalem. <sup>6</sup> Ale vaore tavera atu, mo vai na vao tamlohi la mai jara matea, ale la hutura matan enira hatehateahi la rongora la lo retireti na leora.

<sup>7</sup> Ale la hutura, la mařurahi tavera lara, "Avei, la tamlohi nike, la sopo mara Galilee nakonako? <sup>8</sup> Ale mata sava natu řa lo rongora la lo retireti na leo jarařa hatehateahi sei řa vora hinira? <sup>9</sup> Enřa mara Pathian, Medes, Elamite ale mara Mesopotamia, Judea, Cappadocia, Pontus, Asia, <sup>10</sup> Phrygia, Pamphylia, Egypt ale jara hai Libya na lolon Cyrene, ale hai la tai Rome. <sup>11</sup> Tatuara Jew, tatuara enira la tamlohi řořoha sei la lo usuri Moses, ale mara Crete peresi na mara Arabia — řa rongora la lo retireti na leora. La lo vere na vavahinau řuhu mata suiha non God." <sup>12</sup> Ale enira mo isoiso, la mařurahi la hutura, la lo vereverera hinia lara, "Matamata mata sava nahai?" <sup>13</sup> Pani tatuara la kerehira lara, "Hara sei, la drong na waen meji!"

### *Peter Mo Retivujavujangi*

<sup>14</sup> Ale Peter peresi la tupu sangavulu řomana matea atu, la turu mai na nahora, ale mo ulo mo vereā isara mara, "Mara

Judea, ale mara Jerusalem tari, ha tapurongo! Ha levosahi mamahuni hinau nike! <sup>15</sup> Matan la tamlohi nike la sopo drong sohen ka lo řomřomia, matan mo pa lo řalavuhu purongo nahai. <sup>16</sup> Pani hinau nike přovet Joel mo verea moiso mara, <sup>17</sup> 'God mo verea mara: Na pongi hitahu, a pa surei na Tanumeku na tamlohi tari, ale natumim peresi na venatumim la pa retimangovi, ale uluvoumim lamane la pa hite na hinau sohena mavuho a pa vujangia isara, ale vajiahamim a pa silera na mavuho; <sup>18</sup> hin pongi atu sohena, a pa surei na Tanumeku isana noku slev lamane peresi na slev hařai, ale la pa retimangovi. <sup>19</sup> Ale a pa vujangi na matamata mařurahi tavera aulu na masapa, ale matamata mata řae, hapu peresi na asu hapu ataño na varama, <sup>20</sup> ale alo i pa posi i mai i řořoha, majhi vitu i pa hahara sohena řae, la pa pala tiroma hin rani atu Moli i pa mele mai, rani tavera atu i pa řuhufuhu jea. <sup>21</sup> Ale rani matea i pa mai vara sava tamlohi la tau na nora rasu na hian Moli la pa juri.'”  
*Joel 2.28-32*

<sup>22</sup> Ale Peter mo mele verea mara, “Tavtavin Israel, ha tapurongo! Iesu mara Nazareth, tamlohi matea God mo taua na nahomim, mo lo vai na vavahinau mata suiha, matamata řuhufuhu tavera, peresi na matamata mařurahi sei God mo vaira na nahomim hin Iesu, sohen kamim mo isoiso ka levosahi mamahunia — <sup>23</sup> tamlohi atu, ka taua na lima tamlohi sasati, matan vara la pa vosaea na talopeilopei vara i mate, pani haratu mo pa lo usuri na řomřomi tavera non God, ale enia mo levosahia tiroma moiso vara i pa sohena. <sup>24</sup> Pani God mo sauteterahia, mo teria na liman mateia, matan mateia i pa sopo eři tauria na suihana. <sup>25</sup> Matan supe David mo retireti matana mara, 'Tarea na lo hite Moli na nahoku, matan enia mo lo toho na matuaku, enau a pa sopo hisu. <sup>26</sup> Matan haratu mapuku mo avulahi, ale leoku mo uloulo na hasohasona! Epeku i pa toho na liman řomtoho, <sup>27</sup> matan engko God o pa sopo tinařihia vara a toho na varama mata mateia, teni vara o tinařihia vara nom tamlohi tapu i řovo na taptap. <sup>28</sup> Engko ko vujangiau moiso na malele mata mauri; engko o pa vaiau a avulahi tavera na nahom.'”  
*Psa 16.8-11*

29 La vorai, na levosahi mamahunia vara a efi vereia isamim, vara pua David mo mate ale la tavunia. Ale tapuna mo lo toho peresiira mo kakau nake. 30 Matan David enia pfovet matea, mo levosahia vara God mo vai na retitauhi matea peresia, vara mahapina matea, i pa sakele na nona jara sakele mata supe, 31 David mo hiteulia tiroma moiso, ale mo vereia mara Křisto i pa sauteterahi, ale vara i pa sopo taua vara i lo toho na varama mata mateia teni vara epena i řovo.

32 Iesu sei, God mo sauteterahia na mateia, ale kamam mo isoiso kama hitea. 33 Nake, God mo tahea mo sahe na matuana, vara i tauri na suiha tavera sei mo aulu jea mo jeu na tinapua na tuka, ale usuri na retitauhi non God Tama, mo lavi na Tanume Tapu, ale mo sureia hin kamam, sei ka lo rongoa ale ka lo hitea nakerihi. 34 Matan David mo sopo lo sahe aulu na tuka, pani enia mo vereia mara,

‘Moli, mo vereia isan noku Moli:

O sakele na matuaku,

35 i tikeli rani atu a vai na nom meresahi, la toho na ruhuruhu palom.’ *Psa 110.1\**

36 Matan haratu, mo řuhu vara tamlohi tari Israella levosahi mamahunia vara God mo vaia mo mai Moli! Ale mo vaia mo mai Křisto, pa Iesu atu sei ka lo vosaea na talopeilopei!”

37 Lara la rongoa na nona reti, řomira la jovi vahatea. Ale la vereia isan Peter tolu na vahařule tari atu lara, “La vorai, kama pa vai na sava?”

38 Ale Peter mo vereia isara mara, “Ha posi! Ale ha paptijo kamim mo isoiso na hijan Iesu Křisto, matan vara God i řomi na nomim hehe! Ale i pa sile purongoi kamim na Tanume Tapu. 39 Matan retitauhi nike, enia nomim peresi na natumim, ale nona tamlohi tari sei la lo toho asau řove, tamlohi mo isoiso sei Moli nořa God i pa tovara vara la mai isana.” 40 Ale Peter mo mele vujangira vavano, mo vereia řilangi isara mara, “Ha juri kamim hasemim hin pina lejileji nike!”

41 Ale evin la haratu sei la rasu na nona reti moiso la paptijo hin rani atu, la mai kalesia korong mariviti tari vaha tolu (3000).

42 Ale la hase taura na vujangi nona vahařule, ale la matavuhi mata hanhani tapu peresi na usiusi.

*Kalesia La Tapulo Matavuhi Jara Matea*

43 Ale matahu tavera mo sohoni na tamlohi tari matan vahařule la vai na hina mařurahi tavera matuvana peresi na matamata tavera.

44 Ale tarea, tamlohi rasua tari la lo pulutahi jara matea, ale hinau tari enia nora enira mo isoiso. 45 Ale la lo ařehi na jarara peresi na nora hinahinau, ale la lo asera isan la haratu la vejuveju hin te hinau. 46 Ale

\* 2:35: ruhuruhu palom: Iesu mo lavi na suiha tavera mo aulu jea hinira.

na rani hatehateahi, la lo matavuhi na Temple, ale la lo lavi na hanhani tapu na lolo imara, ale na nora hanhani la vaia na avulahi peresi na hansohai. <sup>47</sup> La hasohaso God, ale tamlohi tari la avulahi hinira. Ale na rani hatehateahi tamlohi tinatinapu sei Moli mo jurira, la lo pulutahi peresira.

### 3

#### *Tamlohi Hariju Matea*

<sup>1</sup> Peter enia John la lo sahe na Temple na rani mata ususi na matan alo mo tolu na ravravi. <sup>2</sup> Ale tamlohi hai, la lavi na tamlohi matea mo vora mo hariju moiso. La lavia matan vara la pa mele taua i juruvi sohen tarea na pahisa matarua matea na ropen Temple atu sei la tovia 'Matarua Ruhuruhu' vara i mele usi na mania isan la haratu la lo unu na Temple ea. <sup>3</sup> Mara mo hite Peter peresi John la lo unu na Temple, mo usi na mania isara.

<sup>4</sup> Ale Peter mo kilau tataholo sivo isana, ale John sohen a mo vaia ale Peter mara, "O kilau kamam."

<sup>5</sup> Ale tamlohi hariju atu mo taʻengira matan mo lo ʻromʻromia mara la pa sile te hinau isana. <sup>6</sup> Pani Peter mo vere a mara, "Mo sopo te noku silver teni gold, pani sava enia noku, a pa silea isam na hijan Iesu Kristo mara Nazareth. O turu o hahau!"

<sup>7</sup> Ale Peter mo sohai na matua limana mo tauria mo sau a, ale vahatea purongo, varango palona peresi na jue

palona la ʻrilangi. <sup>8</sup> Ale mo kue mo sahe aulu mo turu, ale mo tapulo hahau ʻralihi na palona, ale mo usurira la unu na lolo rope Temple. Mo lo hahau, mo lo kuekue ale mo lo hasohaso God.

<sup>9</sup> Ale tamlohi mo isoiso la hite a mo lo hahau mo lo hasohaso God, <sup>10</sup> ale la hitevosahia vara enia natu pa tamlohi atu sei mo lo sakele na 'Matarua Ruhuruhu' mata Temple tarea mo lo usi na mania. Ale la maʻurahi tavera na sava mo masese isana. <sup>11</sup> Mara mo pa lo keho hin Peter enia John, tamlohi tari la maro la mai isara hin jara atu sei la tovia Palapalan Solomon, ale la hutura tavera hinia.

#### *Peter Mo Retivujavujangi Na Temple*

<sup>12</sup> Ale Peter mara mo hitera la lo mai mo vere a isara mara, "Tavtavuin Israel, mata sava ka hutu kamim hin hinau nike, teni mata sava ka lo varoi kamam sohen a, vara kama vai tamlohi akerihi mo mele hahau na nomam suiha teni matan nomam posposi tataholo? <sup>13</sup> God non Abraham, God non Isaac, God non Jacob, God non noʻra pua, mo tahe nona volitusi sei Iesu, hara sei ka taua na liman noʻra tamlohi aulu, ale ka ʻrohu hinia na nahon Pilate hin rani atu mo opoia vara i teria. <sup>14</sup> Pani kamim, ka tipahi haratu sei mo tapu mo tataholo jea, ale ka usi Pilate vara i sile kamim na tamlohi vilimatei na tamlohi matea. <sup>15</sup> Ale ka vilimatei haratu enia pulo mauri, hara sei God mo sauteterahia na



mateia. Hinau sei kamam kama hitea na matamam.

<sup>16</sup> Ale tamlohi akerihi ka hitea ale ka levosahia, kama lo vereea vara nona rasua na hijan Iesu natu mo vaia mo řilangi. Rasua atu hin Iesu mo vai mamahuni na epena na nahomim mo isoiso.

<sup>17</sup> Ale la vorai, na levosahia vara ka sopo levosahi na sava ka vaira, sohen nomim tamlohi aulu la vaira. <sup>18</sup> Pani sava God mo vereea tiroma moiso na jingo pŗovet tari, sei vara nona Křisto i pa lavi na rongohaji sohena sava ale mo mařivisia. <sup>19</sup> Matan haratu, ha posi, ale ha posi mai isan God matan vara i jarai nařihi na nomim hehe,

<sup>20</sup> matan vara rani řuhuřuhu mata suiha paro la mai isamim la tai na nahon Moli, ale i pa mele řule Iesu vara i mele mai isamim sei God mo viřonia vara i nomim Křisto, <sup>21</sup> enia i pa toho na tuka i tikeli rani atu God i mele vai tataholoi na hinau tari sohen mo vereea na reti nona pŗovet tuai moiso. <sup>22</sup> Moses mara, 'Moli God i pa tahe na nomim pŗovet matea na voraimim soheku. Ha pa tapurongo na hinau tari i pa vereea isamim.' *Deut 18.15* <sup>23</sup> Ale mo mele vereea mara, 'Tamlohi tari sei la řohu vara la ololo hin pŗovet atu God i pa langahi nařihira na nona tamlohi ale i pa vilimateira.' *Deut 18.18-19*

<sup>24</sup> Ale pŗovet tari sei la sile na nora retireti, mo tapulo isan Samuel peresi la haratu la pa mai hitahuna, enira sohena la pete retivu-javujangi hin la rani nike

moiso. <sup>25</sup> Kamim, ka natun la pŗovet atu tuai, ale ka natun retitauhi atu God mo vaia peresi na nomim pua, sei mo vereea isan Abraham mara, 'Ale na mahapim, vao tamlohi tari na varama la pa avulahi tavera hinia'. *Gen 22.18; 26.4*

<sup>26</sup> Hin rani atu God mo sauteterahi nona volitusi mo řulea mo mai isamim tiroma tavitavin Israel, matan vara i leřuhu hin kamim i vai kamim ha posi na nomim posposi hehe."

## 4

### *Peter Enia John Na Naho Council Jerusalem*

<sup>1</sup> Ale Peter enia John la pa lo retireti isana tamlohi, pŗis peresi na patu tamlohi nona police mata Temple peresi na Sadducee hai la mai isara. <sup>2</sup> La lolokoru tavera hinira matan la lo vujangi na tamlohi, ale matan la lo retivujavujangia vara God mo sauteterahi Iesu na mateia. <sup>3</sup> Ale la taurilatira, la taura na ima řilangi mo tikeli na rani tinapua matan mo pete ravravi moiso. <sup>4</sup> Pani tamlohi matuvana hin la haratu la lo tapurongo isara, la rasua. Ale evin la tamlohi atu mariviti i tari vaha lima (5000). <sup>5</sup> Ale mo mele rani sahe, nora tamlohi aulu peresi na vajiahara peresi na tamlohi vujangi mata leu, la matavuhi jara matea Jerusalem, <sup>6</sup> peresi Annas sei pŗis aulu, ale Caiaphas, John, Alexander ale tamlohi tari sei la tai na vaon pŗis aulu. <sup>7</sup> Ale la vaira la turu na livuhara,

ale la tapulo usira lara, “Ka vai hinau atu na sava suiha teni na hijan hare?”

<sup>8</sup> Ale Tanume Tapu mo sohoni Peter mo vereā isara mara, “Tamlohi aulu peresi na vajiāha; <sup>9</sup> vara ka lo usi kamam vara kama vai na hina ŋuhu isan tamlohi hariju nike sohena sava, <sup>10</sup> ale a pa vereā i mera i ŋuhu isamim tari, ale isana tamlohi tari Israel, vara tamlohi nike mo ŋuhu na hija peresi na suihan Iesu Kŋisto mara Nazareth sei ka lo vosaea na talopeilopei, pani God mo sauteterahia na mateia.

<sup>11</sup> Iesu akerihi natu enia, ‘Vatu atu kamim tamlohi voro ima ka tipahia, enia mo mai pulo vatu mata ima.’ *Psa 118.22*

<sup>12</sup> Ale mo sopo mele te malele tinapua vara tea i eŋi juri hinia matan mo sopo mele te hija tinapua na varama vara God mo silea vara tamlohi la pa juri hinia.”

<sup>13</sup> Ale lara la hite na turu ŋilangi non Peter enia John, la maŋurahi tavera matan la levosahia vara la tamlohi nike la sopo lavi te lelevosahi isara, ale la vara enira la tamlohi purongo purongo, ale la pa hitevosahia vara enira la lo toho peresi Iesu tiroma. <sup>14</sup> Pani lara la hite tamlohi atu sei mo mele ŋuhu mo lo turu na pahisara, la sopo eŋi mele vere te hinau sati vano isara. <sup>15</sup> Ale lara la retileu vara la malue na nora matavuhi, ale la tapulo sorasarahia isara — <sup>16</sup> lara, “Ra pa vai na sava isan la tamlohi nike? Matan la vai na matamata tavera

matea na naho tamlohi tari Jerusalem, ale ŋa sopo eŋi vunvunia. <sup>17</sup> Pani matan vara ŋa opoia vara ŋa horora vara la sopo mele retivujavujangia isana tamlohi, ŋa pa retiŋoaŋoahaira vara la sopo mele vujangi hin Iesu isan tea.” <sup>18</sup> Ale la tovira la mele mai la turu na nahora, ale la silera na reti ŋilangi matea vara la sopo mele retireti teni la vujangi na hijan Iesu.

<sup>19</sup> Pani Peter peresi John la ŋaramira lara, “Vara ka hitea mo tataholo vara kama oloolo hin kamim, pani mo sopo hin God, ha to kilausuria; <sup>20</sup> matan kama sopo eŋi isoiso na nomam retireti na sava hina ŋuhu kama hitea, ale na sava kama rongoa moiso.”

<sup>21</sup> Matavuhi atu la mele sile na reti ŋilangi tinapua hai isara, pani la tinaŋihira la malue matan la sopo levosahia vara la pa sile na talai isara sohena sava matan vara la vaia vao tamlohi atu la pa lolokoru matan la lo hasohaso God matan matamata tavera atu. <sup>22</sup> Matan matamata tavera atu mo masese hin tamlohi atu mo hariju mata tauni mo jeu mo ngavulu vati moiso.

### *Kalesia La Usiisi Isan Moli God*

<sup>23</sup> Peter enia John lara la malue isara, la mele vano na vaora mata tamlohi rasua, ale la verera na hinau tari sei la pŋis aulu atu peresi na vajiāhara la vereā isara. <sup>24</sup> Lara la rongoa la hinau atu, enira mo isoiso la tahe na leora, la usiisi isan God na

řomřomi matea purongo ale lara, "Moli aulu na hinau tari, engko ko vai na tuka peresi na varama, na tasi ale hinau tari sei la lo toho na lolora.<sup>25</sup> ko verea tuai na Tanume Tapu na retireti non nom volitusi supe David nomam pua vara,

'Mata sava tamlohi řořoha la lo lolokoru patura, ale mata sava tamlohi la lo hatihia vara la pa vai na hinau rongorongo vono?

<sup>26</sup> Matan supe mata varama la turu jara matea, ale tamlohi aulu la matavuhi jara matea, matan vara la turuleji hin Moli God peresi na nona Křisto.' *Psa 2.1-2*

<sup>27</sup> Matan Herod enia Pontius Pilate, peresi na tamlohi řořoha, peresi na tavgavin Israel la matavuhi jara matea hin taon tavera nike, la turuleji hin nom volitusi tapu Iesu, haratu ko viřonia mata juri na tamlohi.<sup>28</sup> Varařuhu hinau tari la masese usuri na masalom, peresi na nom řomřomi tavera sei ko taua vara i pa sohena tiroma moiso.<sup>29</sup> Ale nake Moli, o tapurongo na nora retireti leji, ale o vai na nom volitusi la vere na nom retisohai i sopo te matahu hinira,<sup>30</sup> ale o sohai na suiha mata vai na rojoa i tihai, ale vara matamata tavera peresi na hinau mařurahi la pala na hijan nom volitusi tapu Iesu."

<sup>31</sup> La usiusi mo isoiso, ale jara atu sei la lo matavuhi ea mo hutehi, ale enira mo

isoiso Tanume Tapu mo sohonira, ale mo tapulo hin rani atu mo vano, la retivujavujangi na retisohai non God, ale mo sopo te matahu hinira.

*Kalesia La Tuetuenira Hasera*

<sup>32</sup> Vao tamlohi rasua atu řomira mo matea purongo, ale mo sopo tea isara i efi verea vara nona hinau enia nona hasena, pani nora hinau tari enira nora mo isoiso.<sup>33</sup> Retivujavujangi non la vahařule atu mata sauteterahi non Moli Iesu mo suiha. Ale God mo leřuhu hinira mo isoiso mo tavera jea<sup>34</sup> matan mo sopo tea isara i vejuveju hin te hinau, matan la haratu sei nora lepa teni imara, la ařehira ale la lavi na volira,<sup>35</sup> moiso la taura na lima vahařule, moiso la asera isan la haratu la vejuveju hin te hinau.

<sup>36</sup> Ale vonara matea enia Joseph, tapala hijana vahařule la silea isana enia Barnabas, řaramin hija sei enia 'Tamlohi mata Retituetueni', enia mara Cyprus matea mo tai na vao Levi na tavgavin Israel.<sup>37</sup> Ale mo ařehi na nona lepa matea, ale mo lavi na volina mo mai mo silea isana vahařule.

## 5

*Ananias Enia Sapphira*

<sup>1</sup> Tamlohi tinapua matea sohena hijana Ananias peresi narouna Sapphira, la ařehi na nora hinahinau.<sup>2</sup> Ananias mo taurilati na sope volin la nora hinau atu sei la lo ařehira, ale narouna

mo levosahia. Enia mo lavi na sopena mo silea isana vahaʻule, ale mo vereā mara volina enira mo isoiso natu.

<sup>3</sup> Pani Pēter mo vereā mara, “Ananias, mata sava ko tinaʻihi Setan mo sohoni na mapum mo vaiho ko halu Tanume Tapu moiso ko taurilati na sope voli lepa vara nom hasem? <sup>4</sup> Ko sopo lo aʻehia enia nom teni mo vono? Ale kora ko aʻehia moiso volina mo lo toho na limam vara o pa silea teni mo vono? Mata sava ko ʻromʻromia vara o vai na hināu matea sohen harihi? Ko sopo halu kamam, pani ko lo halu God!”

<sup>5</sup> Ananias mara mo rongo la reti atu, mo jovi sivo na lepa mo mate. Ale matahu mo sohoni enira mo isoiso sei la rongō hināu atu. <sup>6</sup> Ale uluvou hai la mai, la tatavua ale la alialia la vano la tavunia.

<sup>7</sup> Ale aoa mo tolu mo vano moiso, narouna mo pete pala mo unu pani mo sopo levosahi te hināu na sava mo masese moiso. <sup>8</sup> Peter mo vereā isana mara, “O to vereāu hinia, vara volin lepa atu enira mo isoiso nakerihi natu teni mo vono?”

Sapphira mara, “He'e, volina natu.”

<sup>9</sup> Ale Peter mo vereā isana mara, “Mata sava kamim tupra rua ka hatihia vara ha pa vaihite na Tanumen Moli? O to kilau sahe, la tamlohi atu sei la lo tavuni tuam la lo mele mai, ale nakerihi sohena la pa pete alialiho!”

<sup>10</sup> Vahatea purongo, mo jovi na palon Peter mo mate. Ale la uluvou atu lara la unu na lolo ima la hitea, la alialia

la vano la tavunia na pahisan tuana. <sup>11</sup> Matahu tavera mo sohoni na vao kalesia tari peresi na tamlohi tari sei la lo rongō hināu atu sei mo masese.

### *Vahaʻule La Vai Na Rojōa La Tihai*

<sup>12</sup> Matamata tavera matuvana peresi na hināu maʻurahi la pala na liman la vahaʻule atu na naho tamlohi. Ale enira mo isoiso la lo matavuhi jara matea na Palapalan Solomon. <sup>13</sup> Ale la haratu la sopo lo toho na lolo vaora, la matahu tavera vara la pulutahi peresira, pani tamlohi la sile na ololo tavera isara. <sup>14</sup> Ale rani hatehateahi, tamlohi la lo tau na nora rasua hin Moli, vao haʻai peresi na vao tamlohi la lo mai. <sup>15</sup> Ale tamlohi la lo tau na nora tamlohi rojōa na pahisa malele, la taura na vata teni na epa matan vara ʻroʻron Peter purongo i eʻi tikeli na epen te tatuara ale nora rojōa la tihai, vara i hahau i lo vano. <sup>16</sup> Vao tamlohi la lo tai na vanua varihi ʻralihi Jerusalem la lo lavi na nora tamlohi rojōa peresi la haratu tanume sasati mo sohonira la mai isara, ale enira mo isoiso nora rojōa la tihai.

### *La Taurilati Na Vahaʻule*

<sup>17</sup> Ale pʻris aulu peresi la haratu la lo toho peresia enira Sadducee, ale enira la maʻivi na mereimerei, ale mo vaira la lolokoru. <sup>18</sup> La taurilati la vahaʻule atu, la taura na ima ʻilangi. <sup>19</sup> Pani hin vutepongi atu, angelo non Moli matea mo

sinai mo roi na pelatin ima řilangi atu mo tiromara la malue, ale mo vereia isara mara, <sup>20</sup> “Ha vano, ale ha turu na lolo rope Temple, ale ha retivujavujangi na tamlohi na retisohai hin mauri nike!” <sup>21</sup> Ale lara la rongoa sohena, la vano la unu na rope Temple mo pa lo řari na rani ale la tapulo vujangi.

Ale pñis aulu peresi la haratu la lo toho peresia la pala na Temple, la tovi na council tavera nona tavgavuvin Israel sei la tovia Sanhedrin matan vara la pa sakele. Ale la řule na tamlohi hai la vano na ima řilangi vara la lavi la vahařule atu la mai isara. <sup>22</sup> Pani police mata Temple lara la pala na ima řilangi, la sopo hitera, ale la mele hilu la vano la vereulia isara lara, <sup>23</sup> “Kama hite na ima řilangi mo pa lo loko mo řuhu, ale tamlohi kilau na ima řilangi la lo turu na nora pelati, pani kamara kama roira, kama sopo hite tea na lolora.”

<sup>24</sup> Tamlohi tavera nona police mata Temple peresi na moli nona pñis lara la rongoa sohena, la hutura tavera hinia matan la sopo levosahia vara i pa isoiso epu. <sup>25</sup> Pani tamlohi matea mo mai mo vereulia isara mara, “Eh! La tamlohi atu ka lo taura na ima řilangi enira nahai la lo turu na lolo rope Temple, la lo vujangi na tamlohi!”

<sup>26</sup> Ale tamlohi tavera nona police mata Temple peresi na nona police, la vano la lavi

malumira la mai matan la matahu vara tamlohi la pa parura vara la vai na hinau řilangi isara.

<sup>27</sup> La lavira la mai la vaira la turu na nahon nora council tavera, ale pñis aulu mo usi na retusia isara <sup>28</sup> mara, “Kama retihoro kamim moiso vara ha sopo mele retivujavujangi na hijan tamlohi atu. Ka hitea, nake Jerusalem mo mařivi na nomim vujangi, ale ka opoia vara ha tau na řaen tamlohi nike isamam!”

<sup>29</sup> Pani Peter peresi na vahařule la řaramia lara, “Kama pa ololo hin God hasena, mo sopo na tamlohi.

<sup>30</sup> God non nořa pua tuai mo sauteterahi Iesu na mateia, mo vaia hitahu hin la rani atu sei ka vilimateia ka vosaea na talopeilopei. <sup>31</sup> God mo tahea aulu na matuana mo vaia mo pulon mauri nike ale Jujuri matan vara i sile na masapa isan Israel vara la posi, ale i řomi na nora hehe.

<sup>32</sup> Kamam kama hite vevuhi la hinau nike, ale Tanume Tapu sei God mo silea isan la haratu la lo ololo hinia enia sohen mo hitea.”

<sup>33</sup> Lara la rongoa sohena la lolokoru patura, ale la opoia vara la vilimateira.

<sup>34</sup> Pani Pharisee matea hijana Gamaliel, enia tamlohi vujangi mata leu matea. Tamlohi la lo sile na ololo isana matan la opoia, mo turu na naho council ale mo vereia vara la tau nařihira na jingoima tako. <sup>35</sup> Moiso

mo vereia isan council atu mara, “La tavgavuvin Israel, mo řuhu vara řa lo kilau i

řuhu na sava řa opoia vara řa vaia isan la tamlohi nike. <sup>36</sup> Matan tauni mo visa mo vano moiso nahai, Theudas mo turu mo vereea mara enia tamlohi tavera matea, ale korong tamlohi mo ngavulu sangavulu vati (400) la usuria. Pani hitahuna hai la vilimateia ale nona tamlohi la taskara, ale nona řomřomi atu mo mai hina purongo. <sup>37</sup> Ale hitahun haratu mara Galilee matea hijana Judas, mo turu hin rani atu la lo evi na tamlohi, ale mo vai na tamlohi la lo usuria mata valum. Enia sohena mo mate, ale nona tamlohi usuri tari la taskara.

<sup>38</sup> Ale matan haratu, noku retituetueni isamim enia mo sohen harihi: vara ha toho asau hinira ha tinařihira, matan vara řomřomi sei la lo vujangia teni hinau sei la lo vaia mo tai isana tamlohi purongo i pa mele mai hina purongo, <sup>39</sup> pani vara mo tai isan God, ha sopo eři horora, vara i vono ha pa hiteulia vara ka lo valum peresi God." Ale la tatauri na nona řomřomi, <sup>40</sup> ale la mele tovi na vahařule la mele unu, ale la tamajira, moiso la vereea isara vara la pa sopo mele retireti na hijan Iesu, ale la tinařihira. <sup>41</sup> La vahařule atu, la malue hin matavuhi tavera atu. La avulahi matan God mo hitea vara mo tataholo vara la lavi na rani řilangi mata hijan Iesu. <sup>42</sup> Ale na rani hatehateahi na lolo Temple peresi na imara, la lo vujangi ale la retivujavujangi na Retiřuhu vara Iesu enia Křisto atu tamlohi la lo kilau matana.

## 6

### *Deacon Mo Limaravrua*

<sup>1</sup> Hin rani atu evi tamlohi usuri non Iesu mo lo ulua, ale retireti matea mo malue isana Jew sei la retireti na leo mara Greek. Ale la sopo avulahi na Jew sei la lo retireti na leon tavgavuin Israel, matan tarea vara la ase na hanhani nora malepu la sopo lavi tea. <sup>2</sup> Ale la tupu sangavulu řomana mo rua atu la tovi matavuhi na tamlohi usuri la mai, ale lara, "Mo sopo tataholo vara kama tinařihi na vujangi mata reti non God mata kilau na hamim hinau. <sup>3</sup> Pani ha viřoni mamahuni te vorai kalesia i limaravrua isamim tamlohi tari sei ka levosahia vara Tanume Tapu peresi na lelevosahi mo mařivi hinira, ale řa pa taura la aulu hin la hinau sei. <sup>4</sup> Pani kamam kama pa tau na řomimam tari mata usiusi, ale na vavahinau mata Retiřuhu."

<sup>5</sup> Tamlohi tari la avulahi hin řomřomi atu, ale la viřoni Stephen, tamlohi matea sei mo jea na nona rasua ale Tanume Tapu mo mařivisia, la viřoni Philip, Prochorus, Nicanor, Timon, Parmenas peresi Nicolaus mara Antioch matea enia tamlohi řořoha matea pani mo usuri na nora rasua, moiso mo posi mo mai tamlohi kalesia matea. <sup>6</sup> La vao atu la vaira la turu na naho vahařule, ale la vahařule atu la tau na limara hinira, ale la usiusi matara.

<sup>7</sup> Reti non God mo lo vano, ale evi tamlohi usuri Jerusalem mo lo sahe aulu jea. Ale vao tavera matea

mata p̄ris la lavi pa rasua atu ale la ooloo hinia.

<sup>8</sup> Stephen, tamlohi matea sei mo mañivi na hina řuhuru peresi na suiha God mo silea isana, mo vai na matamata tavera na naho tamlohi. <sup>9</sup> Pani tamlohi hai Jew na vao matea la tovia 'Ima Lotu Nona Tamlohi Materi'. Hai la mara Cyrene, mara Alexandria, tatuara la tai Cilicia peresi Asia, la turu la vasi peresi Stephen. <sup>10</sup> Pani la sopo eñi retihoro na lelevosahi sei Tanume Tapu mo silea isana vara mo retireti.

<sup>11</sup> Ale la haluhalu na tamlohi hai vara la vere te hinau halu hin Stephen lara, "Kama rongoa mo retisati hin Moses enia God." <sup>12</sup> La halu na tamlohi, peresi na vajiahara tolu na tamlohi vujangi mata leu, moiso la mai isan Stephen, la tauria ale la vaia mo turu na naho council. <sup>13</sup> Pa la tuetueni halu atu lara, "Tarea tamlohi nike mo lo retisati hin jara tapu nike peresi na leu. <sup>14</sup> Matan kama rongoa mo vere mara Iesu mara Nazareth i pa komo jara nike, ale mo posi na posposi sei Moses mo lo silea mo sinai mo kakaur̄a nake." <sup>15</sup> Tamlohi tari hin matavuhi atu sei la lo sakele atu, la hite na nahon Stephen mo posi sohena naho angelo matea.

## 7

*Stephen Mo Sile Na Nona Reti*

<sup>1</sup> Ale p̄ris aulu mo vere isan Stephen mara, "La hinau atu la varařuhu?"

<sup>2</sup> Ale Stephen mara, "La vorai peresi na vajiaha, ha tapurongo na noku reti. God mata mera tavera mo pala isan nořa pua Abraham hin rani atu mo lo toho Mesopotamia, moiso mo pa vano mo toho Haran, <sup>3</sup> ale mo vere isana mara, 'O malue na jaram peresi na tahisam, ale o vano na jara matea enau a pa vujangia isam.' *Gen 12.1*

<sup>4</sup> Ale mo malue na jara mara Chaldea, mo vano mo lo toho Haran. Hitahu, tamana mo mate, ale God mo tinařihia atu mo taua hin jara nike nake řa lo toho hinia. <sup>5</sup> Pani mo sopo sile te tavaluna hatelete isana sohena koruna, pani mo retitauhi isana vara i pa silea isana sohena nona peresi na taniaa sei la pa usuria, hina purongo vara mo sopo te natuna. <sup>6</sup> Pani God mo mele retireti isana sohen harihi mara, 'Mahapim la pa vinano na jara tamlohi tinapua, ale tamlohi hin jara atu la pa vaira la slev, la pa vailejlejira mata tauni i ngavulu sangavulu vati. <sup>7</sup> Pani a pa sile na talai isan la haratu la lo slev nora, *Gen 15.13-14* moiso hitahu la pa malue hin jara atu la mai la lotuau nike.' *Exo 3.12* <sup>8</sup> Ale mo sile Abraham na retitauhi mata tairalihi, ale Abraham mo mai taman Isaac, ale mo tairalihia na halimaravtolu rani nona vora, ale Isaac mo mai taman Jacob, ale Jacob enia taman la pua atu tupu sangavulu řomana mo rua.

<sup>9</sup> Ale la pua atu, la mereimerei hin Joseph, la

añehia mo sivo Egypt; pani God mo lo toho peresia<sup>10</sup> matan vara i pa juria na nona rani ñilangi tari, ale i tuenia na lelevosahi na nahon Pharaoh, supe non Egypt matan vara Pharaoh i avulahi hinia ale mo tahea vara i aulu Egypt peresi na hinau tari nona.

<sup>11</sup> Hin rani atu marua tavera matea mo vili na jara tari Egypt peresi Canaan na rani ñilangi. Ale noña pua la sopo eñi hite te hanhani.<sup>12</sup> Pani na rani Jacob mo rongoa vara hanhani mo lo toho Egypt, mo ñule na noña pua la sivo, harihi enia nora tiroma hahau hin jara atu.<sup>13</sup> Ale na nora harua hahau la sivo atu, Joseph mo hase vuhesia isana voraina, ale Pharaoh mo pa levosahi na vaon Joseph natu.<sup>14</sup> Moiso Joseph mo ñulera la mele sahe, ale la usi Jacob tamana peresi na tamlohi tari na ruhuruhuna sei enira mo isoiso mo ngavulu limaravrua mo lima vara la sinai.<sup>15</sup> Ale Jacob mo sivo Egypt mo pa mate

atu, enia peresi na noña pua,<sup>16</sup> ale la lavi na suira la sahe la taura Shechem na papa sei Abraham mo volia isan natun Hamor atu Shechem.

<sup>17</sup> Pani rani mata retitauhi non God sei mo silea isan Abraham mo mai mariviti, tania Abraham la mañivi jea Egypt,<sup>18</sup> mo tikeli rani atu supe tinapua matea mo tauri na suiha Egypt, ale enia mo sopo opoia vara i levosahi na mahapin Joseph.<sup>19</sup> Mo haluhalu na tahisaña, ale mo

vere na noña pua vara la tau na natura la toho hasera na jara tavera matea matan vara la pa mate ea.

<sup>20</sup> Hin rani atu Moses mo vora, God mo avulahi hinia. Ale tamana la jarohia na ima mata vitu mo tolu,<sup>21</sup> ale hin rani atu la lavia mo pala na jara tavera venatun Pharaoh mo tapaia mo korohia sohena natuna.<sup>22</sup> Ale la vujangia na lelevosahi tari nona mara Egypt, ale enia mo mai tamlohi ñuhu matea mata retireti peresi na nona vavahinau.

<sup>23</sup> Na rani taunina mo ngavulu vati, ñomina mo mai vara i vano i hite na tasina, mahapin Israel.<sup>24</sup> Moses mara mo hite na mara Egypt matea mo lo vailejleji na tahisana matea, mo tueni tahisana atu mo vilimatei pa mara Egypt atu.<sup>25</sup> Moses mo lo ñomñomia vara tahisana la pa hitevosahia vara God mo ñulea mo mai isara vara i jurira, pani la sopo hitevosahi na sava mo lo vaia.

<sup>26</sup> Ale mo mele rani sahe mo mele pala, ale mo hite na tamlohi tavitavin Israel mo rua la lo vasvasi, ale mo vaihitea vara i tau na tamata isara mara, 'La tapala, kamim vorai matea purongo, mata sava ka lo vailejleji kamim?'

<sup>27</sup> Pani tamlohi atu sei mo lo vailejleji na tahisana purongo, mo sohai nañihi Moses, ale mo vereea mara, 'Hare mo vaiho ko aulu vara o eñi ari kamam?'<sup>28</sup> Ko opoia vara o mele viliau sohen ko vili mara Egypt atu nanovi teni?' *Exo*



2.14 <sup>29</sup> Tamlohi atu mara mo vereea sohena, Moses mo rovo mo vano mo vinano na jara mara Midia, ale hin jara atu mo mai tama matea natuna lamane mo rua.

<sup>30</sup> Ale mele tauni mo ngavulu vati tinapua angelo matea mo pala isana na jara hasetoho na vutin Sinai na pepe hapu na pulo pahai matea mo lo hani. <sup>31</sup> Moses mara mo hitea mo maʻurahi hinia, ale mara mo mai mariviti vara i hite mamahunia, leon Moli God mo malue hinia mara, <sup>32</sup> ‘Enau God non nom pua, God non Abraham, God non Isaac peresi Jacob’.

*Exo*

3.6 Ale Moses mo savaravara mo matahu vara i mele kilau vano.

<sup>33</sup> Ale Moli God mo vereea isana mara, ‘O lavi naʻihi na nom sabat matan jara sei ko lo turu hinia enia mo tapu. *Exo 3.5* <sup>34</sup> Enau na hite na rani ʻilangi nona noku tamlohi sei la lo toho Egypt, ale na rongo na nora tangi, ale na sinai vara a lavi naʻihira. Ale o mai, a pa ʻuleho o sivo Egypt.’ *Exo 3.7-10* <sup>35</sup> Moses akerihi natu sei la lo ʻrohu hinia lara, ‘Hare mo vaiho ko aulu vara o eʻi ari kamam? Tamlohi akerihi natu God mo ʻulea sohena tamlohi aulu matea, ale tamlohi juri na tamlohi matea na liman angelo atu sei mo lo pala isana hin pulo pahai atu mo lo hani. <sup>36</sup> Tamlohi akerihi natu mo tiromara la malue, mo vai na hinu maʻurahi peresi na matamata tavera na lolon Egypt, na Tasi Hahara, ale jara tano koru mata tauni mo ngavulu vati.

<sup>37</sup> Moses akerihi natu sei mo vereea isana tavitauin Israel mara, ‘God i pa turuhi na nomim ʻpovet matea isana voraimim soheku’. *Deut 18.15* <sup>38</sup> Tamlohi akerihi natu, mo lo toho na lolon vao atu na jara hasetoho peresi angelo atu sei mo lo retireti isana, peresi na noʻa pua na vutin Sinai. Ale enia mo lavi na reti sei mo sile na mauri vara i silea isaʻa.

<sup>39</sup> Pani noʻa pua la ʻrohu vara la ooloo hinia, la tau naʻihia, ale na mapura la opoia jea vara la mele sivo Egypt, <sup>40</sup> la vereea isan Aaron lara, ‘O vai te noʻa god matan la pa tiroma hiniʻa. Pa Moses atu sei mo lo tiroma hiniʻa ʻa malue Egypt, ʻa sopo levosahia vara mo sopo mele pala mata sava.’ *Exo 32.1*

<sup>41</sup> Ale hin rani atu la vai na hinu matea mo tovongi na natu buluk matea, ale la sile na malamalai isana, ale la lo avulahi na nora vavahinau sei. <sup>42</sup> Pani matana, God mo vahari isara ale mo tinaʻihira vara la lotu na hinahinau tinatinapu na masapa, mo sohen la ulia moiso na puku nona ʻpovet lara,

‘Varaʻuhu, kamim Israel

ka lo sile na malamalai isaku na jara tano koru hin la tauni atu mo ngavulu vati?

<sup>43</sup> Mo vono, ʻromimim tavera mo lo toho na nomim god na tent non Moloch,

peresi Rephan god nona vitusarasara,

peresi na tamasin te hinu ka vaira mata ha pa lotura.

Ale matana, a pa řule kamim ha vano ha toho asau na tavalun Babylon na ruhuruhura.’

*Amos 5.25-27*

<sup>44</sup> Ale nořa pua la lo toho peresi na Tabernacle na jara hasetoho, la vaia mo tataholo na sava God mo vereea isan Moses mo usuri na sava mo hitea. <sup>45</sup> Hitahuna nořa pua, la pete lavia hin la rani atu la lo usuri Joshua sei mo lo tiro-mara na vuro isana tamlohi la sopo levosahi God. Ale God mo tipahira na nahon nořa pua mo kakau na rani non supe David, <sup>46</sup> enia God mo avulahi hinia, ale David mo usi God vara i voro te iman God non Jacob hatea. <sup>47</sup> Pani Solomon natu, mo pa voro ima atu. <sup>48</sup> Pani God Aulu Jea mo sopo toho na ima tamlohi la vaira, sohena přovet mo ulia vara Moli mo vereea mara,

<sup>49</sup> ‘Moli mo vereea:

Tuka enia noku jara sakele mata suiha,  
ale varama enia jara paloku.

Sava ima natu o pa eři voroa vara i pa imaku,  
teni sava jara enia noku jara mapu?

<sup>50</sup> Ka řomi vara limaku mo sopo vai vevuhi la hinau nike?’ *Isa 66.1-2*

<sup>51</sup> Ka tamlohi patu řilangi, mapumim la řořoha, ale ka peropero na varařuhu. Ka lo řohu na Tanume Tapu tarea sohen nomim pua la lo vaia tiroma. <sup>52</sup> Sava přovet natu nomim pua la sopo tipahia? Ale la vilimatei la haratu

sei la lo vereuli na mai non haratu mo tataholo jea sei nake ka turuleji hinia moiso, ale ka vilimateia. <sup>53</sup> Kamim akerihi natu, ka sopo ooloo na leu non God sei mo silea isamim na lima angelo.”

<sup>54</sup> La tamlohi atu sei la lo tapurongo isan Stephen lara la rongo la hinau atu, la lolokoru patura, la hatihati na huřura matana. <sup>55</sup> Pani Tanume Tapu mo sohoni Stephen, ale mo tařa sahe aulu na tuka, ale mo hite na hasohason God, ale mo hite Iesu mo lo turu na matuan God. <sup>56</sup> Ale mo vereea mara, “Ka hitea, na hite tuka mo roi, ale na hite Natun Tamlohi mo lo turu na matuan God.”

<sup>57</sup> Pani la ulo na leo tavera matea ale la jongi na perora ale vahatea la kue la tauria. <sup>58</sup> Moiso, la lavi nařihia la vano na jingoiman taon tavera atu, la pulahia atano vara la pa parumateia. Ale la tamlohi atu sei la lo rongo na nona reti, la lanarhi na nora ruru tavera matan vara la eři paruparu, ale la taura na palo uluvou matea hijana Saul.

<sup>59</sup> Ale na rani la lo parua, Stephen enia mo lo usiusera mara, “Moli Iesu, o lavi na tanumeku.” <sup>60</sup> Ale mo jovi sivo na pauna mo ulo mara, “Moli, o sopo taurilatira matan hehe akerihi.” Mo vere hinau atu moiso, natu mo mate.

## 8

1 Ale Saul mo majinga na mateia non Stephen.

*La Tipahi Na Kalesia*

Ale mo tapulo hin rani atu tamlohi la tipahi na vao kalesia Jerusalem la levuti jalajalaira la vano na jara tari Judea peresi Samaria, pani vahaʻule purongo la pa lo toho atu. <sup>2</sup> Tamlohi hai sei ʻomira mo ʻilangi mata lotu God tarea la tavuni Stephen, ale la vai na tangi tavera matana. <sup>3</sup> Pani Saul, mo opoia vara i vaikomokomo na kalesia tari, mo lo unu jongi na tamlohi rasua na ima hatehateahi, mo reve tahitahi na tamlohi peresi na haʻai ale mo taura na ima ʻilangi.

#### *Philip Mo Retivujavujangi Samaria*

<sup>4</sup> Ale la kalesia atu sei la lo levuti jalajalaira, la vano la lo retivujavujangi na Retiʻruhu. <sup>5</sup> Philip mo sivo na taon tavera matan Samaria ale mo lo retivujavujangira hin Kʻristo. <sup>6</sup> Ale vao tamlohi tari atu la lo tapurongo mamahu na sava mo lo verera, ale matan la hite na maʻamata tavera mo lo vaira. <sup>7</sup> Matan tanume lumiha sasati la lo malue na tamlohi matuvana sei la lo toho hinira, ale lara la malue la lo ulo ʻilangi, ale la haratu la ʻira teni la papao la ʻruhu. <sup>8</sup> Ale avulahi tavera mo lo toho hin taon tavera atu Samaria.

<sup>9</sup> Tamlohi matea hijana Simon enia mo lo mahumahu na suiha tiapolo ale mo lo vai na hinau maʻurahi tavera hin jara atu mo tuai moiso, mo lo vereva vara enia tamlohi tavera matea. <sup>10</sup> Tamlohi tari la lo tapurongo hinia, mo tapulo na tamlohi purongo mo

tikeli la haratu la aulu lara, “Tamlohi akerihi enia mo lavi suiha atu non God sei la lo vereva vara mo tavera jea.” <sup>11</sup> Ale tamlohi la lo tapurongo mamahu isana matan la lo maʻurahi na nona mahumahu tuai moiso mo mai. <sup>12</sup> Pani lara la rasu Philip matan mo lo retivujavujangi na Retiʻruhu matan mauri atu God mo aulu hinia, tamlohi peresi na haʻai la tapulo lavi na paptijo na hijan Iesu Kʻristo. <sup>13</sup> Simon sohena mo rasua, ale hitahu na nona paptijo mo usuri Philip. Ale mara mo hite na matamata peresi na hinau maʻurahi tavera mo lo vaira, mo hutua.

<sup>14</sup> Ale la vahaʻule atu Jerusalem lara la rongoa vara mara Samaria la lo lavi na reti non God, la rule Peter enia John <sup>15</sup> la sivo isara la ususi nora matan vara la pa eʻi lavi na Tanume Tapu, <sup>16</sup> matan enia mo sopo lo jovi isan te vonara hatea, pani enira la lavi na paptijo na hijan Moli Iesu purongo. <sup>17</sup> Ale Peter enia John la tau na limara hinira, ale la lavi na Tanume Tapu.

<sup>18</sup> Simon mara mo hitea vara Tanumen God mo lo mai na tamlohi vara la vahaʻule atu la tau na limara hinira purongo, mo usia vara i eʻi silera hin te mania <sup>19</sup> mara, “Ha sileau hin suiha sei matan vara sava tamlohi na tau na limaku hinia enia sohena i pa lavi na Tanume Tapu.”

<sup>20</sup> Pani Peter mo vereva isana mara, “Mo ʻruhu vara nom mania i tihai peresiho

matan ko ŋomi vara o eŋi voli na otori non God na mania.

<sup>21</sup> Engko o sopo eŋi lavi te tavalun hinau nike matan mapum mo sopo tataholo na nahon God. <sup>22</sup> Matan haratu, o posi na nom ŋomŋomi hehe, ale o usiusi isan God matana, matan vara i avulahi, i pa ŋomiho matan nom ŋomŋomi sei. <sup>23</sup> Matan na hitea ko maŋivi na mereimerei ale hehe mo taurilatihu.”

<sup>24</sup> Ale Simon mo ŋaramia mara, “O usiusi matakū isan Moli matan vara sava sei ko vereā moiso tea i sopo masese isaku.”

<sup>25</sup> Ale hitahun la vereuli mamahuni la reti atu non Moli, Peter enia John la mele hilu sahe Jerusalem, ale la retivujavujangi na Retiŋuhu isana vanua mara Samaria matuvana na malelera la lo sahe.

### *Tamlohi Aulu Mara Ethiopia Matea*

<sup>26</sup> Ale angelo matea mo vereā isan Philip mara, “O turu o vano o sivo na malele sei mo tai Jerusalem mo lo vano Gaza.” Jara atu enia jara hasetoho matea. <sup>27</sup> Ale mo turu mo vano. Hin jara atu mo hite na mara Ethiopia matea mo povota, enia tamlohi aulu matea matan Candace, vesupe nona mara Ethiopia. Enia natu mo lo kilau na nona tavgav tari. Mo mai Jerusalem mata lotu, <sup>28</sup> ale mo lo mele mule, mo lo sakele na nona kati, hos la lo revea mo lo evi na reti non pŋovet Isaiah.

<sup>29</sup> Ale Tanumen God mo vereā isan Philip mara, “O

vano o hahau na pahisa nona kati.”

<sup>30</sup> Ale Philip mo maro mo vano isana, ale mo rongoa mo lo evi na reti non pŋovet Isaiah, ale mo usia isana mara, “Ko levosahi na sava ko lo evia?”

<sup>31</sup> Ale mo ŋaramia mara, “A pa levosahia sohena sava vara tea i sopo vujangiau hinia?” Ale mo usi Philip vara i vele i sahe i sakele peresia. <sup>32</sup> Jara rihirihī atu mo lo evia na Retitapu enia harihi,

‘La tiroma hinia sohena sipsip matea mo vano matan vara la vili-mateia,

ale sohena natu sipsip matea sei mo lo tapanono purongo vara tamlohi tai na vulu mo lo tai na vuluna,

ale mo sopo vere te hinau hatea.

<sup>33</sup> Na rani la vailejleja mo sopo tea i turu vara i tuenia.

Mo sopo te taniaa vara i eŋi lavi na koruna.

Matan la lavi narihi na maurina na varama.’  
*Isa 53.7-8*

<sup>34</sup> Ale pa tamlohi atu sei la votaia mo usi Philip mara, “Isaiah enia mo lo retireti hin enia hasena teni mo lo vere te tamlohi tinapua?”

<sup>35</sup> Ale Philip mo vereuli na Retiŋuhu hin Iesu isana mo tapulo hin jara rihirihī atu na Retitapu.

<sup>36</sup> Ale lara la lo vano la mai na pahisa wai matea, ale pa tamlohi atu sei la votaia mara, “O to kilau vano, wai

sevano! Mo sopo lo tataholo vara a lavi na paptijo?"

37-38 Ale mo verea mara nona kati i turu, ale enira rua la sevuti la sivo na wai, ale Philip mo paptijo hinia.

39 Ale mara mo malue na wai, Tanumen Moli mo lavi narihi Philip na nahona. Pa tamlohi atu mo sopo mele hitea pani na malelena mo lo vano mo avulahi tavera. 40 Ale Philip mo pa hutua purongo mo lo turu hin taon atu Azotus, ale mo retivujavujangi na Retiruhu atu peresi na taon tari sei na malelena vavano mo kakau Caesarea.

## 9

*Iesu Mo Horo Saul, Mo Viʻonia Nona*  
(Acts 22.6-16; 26.12-18)

1 Hin rani atu Jerusalem, Saul mo lo verea rilangi vara i pa vilimatei na tamlohi usuri non Moli, ale matana mo vano isan pris aulu. 2 Ale mo usia vara i uli te leta vara i lavira la sahe isana ima lotu nona Jew Damascus, mata usia vara la turu peresia vara la taurilati la haratu la lo usuri na malelen Kristo, hina purongo vara tamlohi teni haʻai. Ale vara i lihora i lavira la mele sahe Jerusalem.

3 Saul mo lo sahe Damascus, mo pa lo mai mariviti, mera tavera matea mo tai na tuka mo eʻi tuntunia. 4 Mo jovi sivo na lepa, ale mo rongo na leo matea mo verea mara, "Saul! Saul! Mata sava ko lo tipahiau?"

5 Ale Saul mo usia mara, "Tamlohi tavera, engko hare?"

Ale leo atu mo raramia mara, "Enau sei Iesu! Haratu sei ko lo tipahia. 6 Pani nakerihi o turu, o vano o unu na lolon taon tavera atu ko lo mai matana, ale tamlohi matea i pa vereho na sava o pa vaia."

7 La tamlohi atu sei la lo hahau peresi Saul la turu tapanono vahatea matan la rongo leo atu, pani la sopo hite na tamlohina. 8 Ale Saul mo mele turu, matana mo lo roi pani mo sopo eʻi hite te hinau. Nona tamlohi la tauri na limana la tiroma hinia la sahe Damascus. 9 Ale Saul mo matavuso mata rani mo tolu. Mo rohu na hanhani peresi na wai hin la rani atu.

10 Tamlohi usuri matea hijana Ananias mo lo toho atu Damascus. Moli mo pala isana na hinau matea sohena mavuho mara, "Ananias!"

Ananias mo raramia mara, "Enau sei Moli!"

11 Moli mo verea isana mara, "O turu o vano hin malele atu la tovia 'Tataholo' ale atu na iman Judas o usi na mara Tarsus matea hijana Saul, ale nakerihi mo lo ususi, 12 ale hinau matea sohena mavuho enia mo hite na tamlohi matea hijana Ananias mo mai mo tau na limana hinia matan vara i eʻi mele kilau."

13 Pani Ananias mo raramia mara, "Moli, tamlohi matuvana la vereau na sava hinau sasati tamlohi atu mo lo vaia isana nom tapuhi Jerusalem. 14 Ale nahai nike mo lo lavi na suiha isana pris aulu Jerusalem vara

i taurilati la haratu la lo rasuho vara engko Moli!”

<sup>15</sup> Pani Moli mo vereia isana mara, “O vano matan enau na viřonia mata vavahinau matea vara enia i pa lavi na hijaku i vano isana tamlohi řoroha, ale isana supe, ale isana Jew. <sup>16</sup> Matan enau a pa vujangia vara i pa lavi na rongohaji mata hijaku.”

<sup>17</sup> Ale Ananias mo malue mo vano mo unu hin ima atu. Mo tau na limana hinia, ale mara, “Voraiku Saul, Moli Iesu sei mo lo pala isam hin malele sei ko lo mai hinia, mo řuleu na mai isam matan vara o eři mele kilau, ale Tanume Tapu i mařivisiho.”

<sup>18</sup> Vahatea purongo hinia hai sohena langalanga maji la jovi na matan Saul, ale mo mele kilau, moiso mo turu ale la paptijo hinia; <sup>19</sup> ale mara mo hanhani, mo mele suiha. Saul mo lo toho peresi na tamlohi usuri non Moli makomona atu Damascus.

### *Saul Mo Mele Sahe Jerusalem*

<sup>20</sup> Ale vila řuhu purongo, Saul mo tapulo retivujavujangi Iesu na ima lotu nona Jew mara, “Varařuhu Iesu enia Natun God.”

<sup>21</sup> Ale tamlohi tari sei la rongoa la mařurahi tavera hinia lara, “Avei, mo sopo tamlohi nike natu sei mo lo vailejleji la haratu Jerusalem sei la lo vereia vara Iesu enia Moli? Ale nona mai nike nake mo sopo matan vara i mele vaia sohena, matan vara i liho kamam ale i lavi kamam kama vano isana moli nona pŕis Jerusalem?”

<sup>22</sup> Pani suihan Saul mata retivujavujangi mo mai mo mele řilangi jea, ale mo ari posposi na Jew sei la lo toho Damascus matan mo lo vujangi mamahunia vara Iesu enia Křisto atu la lo kilau matana. <sup>23</sup> Mo sopo tuai, tamlohi tavera nona Jew atu Damascus la hatihia vara la pa vilimateia, <sup>24</sup> pani Saul mo levosahi nora řomřomi luhu atu. La lo kilau na mataruan taon tavera atu na rani na vutepongi matan vara la pa eři vilimateia. <sup>25</sup> Pani na vutepongi matea, nona tamlohi usuri la tuhua na tanga matea na mařole matea na roro ropen taon atu.

<sup>26</sup> Ale hin rani atu, Saul mo pala Jerusalem mo vaihitea vara i pulutahi peresi na tamlohi usuri non Moli ea. Ale enira mo isoiso la matahunia matan la sopo rasua vara enia tamlohi usuri matea. <sup>27</sup> Pani Barnabas mo vano mo lavia mo mai isana vahařule, ale mo vereulia isara sohena sava Saul mo hite Moli na malele, ale mo vereuli na sava Moli mo vereia isana, ale sohena sava mo lo retivujavujangi řilangi na hijan Iesu Damascus. <sup>28</sup> Ale tamlohi usuri la pa avulahi hinia natu vara i lo toho peresira, ale nona retivujavujangi Jerusalem na hijan Moli mo řilangi jea. <sup>29</sup> Ale mo sorasora peresi na mara Jew atu sei la retireti na leo mara Greek, ale mo vasi peresira, pani la lo tiasia vara la vilimateia. <sup>30</sup> Ale vorai kalesia atu lara la levosahia, la lavia mo sivo Caesarea, ale la řule nařihia mo sahe

Tarsus.

<sup>31</sup> Matan haratu, kalesia na jara tari Judea, Galilee peresi Samaria la toho na tamata, la ulua la řilangi ale evira mo tavera. Ale na maurira la sile na oloolo isan Moli ale la lo toho na nanauhi non Tanume Tapu, ale la ulua mo tavera jea.

### *Peter Enia Dorcas*

<sup>32</sup> Ale, Peter mo lo hahau řalihi ale na malelena mo sivo isana tapuhi non Moli Lydda. <sup>33</sup> Hin jara atu mo tapai na tamlohi papao matea hijana Aeneas sei mo lo juruvi na vatana mata tauni mo limaravtolu moiso. <sup>34</sup> Ale Peter mo vere a isana mara, "Aeneas, Iesu Kristo mo vai mamahuniho; o turu o vai na vatam." Ale vahatea purongo mo turu. <sup>35</sup> Ale tamlohi tari Lydda peresi Sharon la hitea, ale la posi mai isan Moli.

<sup>36</sup> Hin rani atu tamlohi usuri hařai matea mo lo toho Joppa, hijana na leo Jew enia Tabitha, ale na leo mara Greek enia Dorcas. Tarea mo lo vai na vavahinau řuhu ale mo lo tueni na tilavono. <sup>37</sup> Hin la rani atu mo rojo ale mo mate. Ale lara la hoje na tarapena moiso la taua mo juruvi na jara tinapua matea aulu hin ima atu. <sup>38</sup> Pani matan Lydda mo lo toho mariviti Joppa, tamlohi usuri atu lara la rongoa vara Peter mo lo toho atu, la řule na tamlohi mo rua la vano isana vara la usia řilangi vara, "Kama opoia mo tavera jea vara o mai nakerihi purongo."

<sup>39</sup> Ale Peter mo turu mo usurira la vano. Ale mara mo pala, la lavia mo sahe aulu isan Dorcas. Malepu tari la lo turu na pahisana la lo tangi, ale la lo vujangi na ruru per-avu peresi te ruru tinatina-pua Dorcas mo vaira na rani mo pa lo mauri. <sup>40</sup> Pani Peter mo řulera enira mo isoiso vara la malue, ale mo pa-paohi mo usiisi, ale mo posi vano isan tarape atu mara, "Tabitha, o turu." Ale mo roi na matana, ale mara mo hite Peter, mo sakele tata-holo. <sup>41</sup> Ale mo sohai na limana vano isana ale mo saua. Moiso mo tovi na tapuhi peresi la hařai malepu atu vara la mai ale mo vujangia isara vara mo mele mauri.

<sup>42</sup> Ale sorasorahina mo řalihi na jara tari Joppa, ale tamlohi matuvana la tau na nora rasua hin Moli. <sup>43</sup> Ale Peter mo lo toho atu Joppa mata rani matuvana peresi na tamlohi matea hijana Simon mo lo vavahinau na huri maji.

## 10

### *Cornelius Mo Vahařule Matan Peter*

<sup>1</sup> Atu Caesarea tamlohi matea, hijana Cornelius, enia captain mata tamlohi vuro mo lo kilau na vao tamlohi vuro mara Rome matea evira mo ngavulu sangavulu mo limarave (600), <sup>2</sup> enia tamlohi matea řomina mo řilangi mata lotu God, ale mo lo sile na oloolo isana tolu na vao imana, ale nona silesilea mo řuhu jea isana tamlohi, ale mo lo usiisi tarea isan

God. <sup>3</sup> Matan alo mariviti i tolu na ravravi matea, mo hite na hinau matea sohena mavuho matea, ale mo hite na angelo non God matea mo mai mo vereea isana mara, "Cornelius!"

<sup>4</sup> Ale mo kilaua na matahu tavera ale mara, "Eh, sava tamlohi tavera?"

Ale mo vereea isana mara, "Nom usiusi peresi na nom silesilea la sopo sahe aulu purongo na nahon God. <sup>5</sup> Ale nakerihi, o řule te tamlohi la sivo Joppa la lavi Simon tapala hijana Peter. <sup>6</sup> Enia mo lo toho peresi na tamlohi matea hijana Simon sei mo lo vavahinau na huri maji, ale imana mo lo toho na pahisa tasi."

<sup>7</sup> Angelo atu mara mo lo retireti isana moiso mo malue, ale Cornelius mo tovi na nona volitusi mo rua peresi na tamlohi vuro matea sei mo rasua mo tavera jea ale mo řulera isan la haratu la lo volitusi isana, <sup>8</sup> mo vere na sava mo masese isana isara, ale mo řulera la sivo Joppa.

### *Sava God Mo Vujangia Isan Peter*

<sup>9</sup> Mo mele rani sahe la pa lo mai mariviti hin taon tavera atu, Peter mo sahe aulu na pusa ima na livuha rani mata usiusi. <sup>10</sup> Ale mo marohati, mo opoia vara i hani te hinau, pani la pa lo tatamahunia, hinau matea sohena mavuho mo taurilati na řomina, <sup>11</sup> ale mo hite tuka la roi ale hinau matea sohena tavalu ruru tavera jea matea mo lo sinai atano, la tuhua mo lo sinai atano

na varama hin la pingona atu mo vati. <sup>12</sup> Mo hite na maji tinatinapua matuvana, maji haraho peresi na maji avuavu la lo toho na lolona. <sup>13</sup> Ale leo matea mo malue mo vereea isana mara, "O turu Peter; o vilimatei tea o hania!"

<sup>14</sup> Pani Peter mara, "A sopo eři vaia sohena Moli; matan na sopo lo hani te hinau lumiha hatea sei leu mo horoa!"

<sup>15</sup> Ale leo atu mo mele mai isana haruana mara, "Sava God mo vaia mo vokevoke, o sopo vereea vara mo lumiha!"

<sup>16</sup> Ale hinau sei mo masese sohena vaha tolu moiso, ale vahatea purongo mo mele sahe aulu na tuka.

<sup>17</sup> Ale řomin Peter mara mo pa lo toho na řaramin hinau atu mo hitea, vahatea purongo, pa la tamlohi atu sei Cornelius mo lo řulera la kakau na iman Simon la turu na get.

<sup>18</sup> Ale la ulo la usia lara Simon matea tapala hijana Peter mo lo toho atu teni mo vono. <sup>19</sup> Peter mo pa lo řomřomi hinau atu mo lo hitea, ale Tanume Tapu mo vereea isana mara, "Nakerihi, tamlohi tupu tolu la lo aleho. <sup>20</sup> O turu, o sivo atano, řomim i sopo kaka hinira, ale o usurira matan enau sei na řulera."

<sup>21</sup> Ale Peter mo sevuti sivo isara ale mo vereea mara, "Enau natu haratu ko lo alea. Ka mai mata sava?"

<sup>22</sup> Ale la vereea lara, "Cornelius, enia captain mata tamlohi vuro matea, mo lo kilau na vao tamlohi vuro mara Rome matea, ale enia



tamlohi tataholo matea sei mo lo sile na oloolo tavera isan God. Ale Jew la lo vereea vara enia tamlohi űuhu matea; angelo tapu matea mo vereea isana mara i vahaűule matam matan vara o mai na imana ale i pa rongo na sava o pa vereea isana.”<sup>23</sup> Ale Peter mo usira vara la pa toho atu peresia hin rani atu.

Mo mele rani sahe mo turu mo usurira, ale tatua vorai sei mara Joppa la vano peresia.

<sup>24</sup> Mo mele rani sahe la unu Caesarea. Cornelius mo lo kilau matana moiso, ale mo tovi matavuhi na tahisana peresi na tavitavuina peresi na tapalana űuhuűuhu la lo saovia.<sup>25</sup> Peter mara mo unu, Cornelius mo tapaia, mo jovi sivo na palona ale mo lotua.<sup>26</sup> Pani Peter mo sau sahe aulu mara, “O turu, enau tamlohi matea sohem purongo!”<sup>27</sup> Mara mo lo retireti peresia mo unu mo hite na vao tavera la lo takonahi saovia.

<sup>28</sup> Ale mo vereea isara mara, “Kamim hasemim ka levosahia vara mo sopo tataholo vara Jew matea i pulutahi teni i rohi te tamlohi mara jara tinapua, pani God mo vujangia isaku vara a sopo tovi na tamlohi tinapua sohena tamlohi lumiha matea na nahon God.<sup>29</sup> Ale kara ka vahaűule matakū, na mai tataholo vahatea. Ale nake, na opoia vara a usia vara mata sava ka vahaűule matakū?”

<sup>30</sup> Ale Cornelius mara, “Rani mo vati mo vano moiso, korong matan alo mo tolu natu na ravravi, na lo

usiisi na imaku, ale vahatea purongo, tamlohi matea mo turu na nahoku mo ru na ruru la memera<sup>31</sup> ale mo vereea mara, ‘Cornelius, God mo sopo űomaliho na nom usiisi peresi na nom silesilea.<sup>32</sup> Ale matan haratu o űule tea la sivo Joppa la usi na tamlohi matea hijana Simon tapala hijana Peter. Enia mo lo toho na iman Simon, tamlohi vavahināu na huri maji matea na pahisa tasi.’<sup>33</sup> Ale na vahaűule matam vahatea, ale engko ko űoműuhu ko mai. Ale matana nakerihi, kamam mo isoiso kama lo toho na nahon God vara kama rongo vevuhi na sava mo retileu hinia isam vara o vereea isamam.”

### *Iman Cornelius La Rongo Na Retiűuhu*

<sup>34</sup> Ale Peter mo tapulo retireti mara, “Varaűuhu, nake natu na pa levosahia vara God mo sopo tametame tea,<sup>35</sup> pani sava tamlohi na sava jara sei mo lo sile na oloolo isana, ale mo vai na hināu tataholo, enia mo avulahi hinia.<sup>36</sup> Ale ka levosahi retisohai atu sei mo lo silea isana tavitavuin Israel, mo retivujavujangi na Retiűuhu mata tamata hin Iesu Kűristo enia Moli nona tamlohi tari.<sup>37</sup> Kamim ka levosahi vevuhi na sava mo masese Judea, mo tapulo Galilee hitahun paptijo atu John mo lo retivujavujangia<sup>38</sup> hin Iesu mara Nazareth sei God mo viűonia na Tanume Tapu ale peresi na suiha. Enia mo hahau űalihi mo lo vai na hina űuhu, mo vai na rojoa la tihai hin

la haratu tiapolo mo lo vailejlejira matan God mo lo toho peresia.

<sup>39</sup> Kamam kama hite vevuhi la hinau sei na mata-mam mo vaira Judea peresi Jerusalem. La vilimateia na talopeilopei matea, <sup>40</sup> pani God mo sauteterahia na hatolu rani, ale mo tinaʻihia vara i pala, <sup>41</sup> mo sopo isana tamlohi tari, pani isamam sei God mo pete viʻoni kamam moiso vara kama pa hitea. Hitahun haratu mo lo turu na mateia, kamam natu, kama hanhani ale kama inu peresia. <sup>42</sup> Mo retileu isamam vara kama retivujavujangi na tamlohi ale vara kama retiʻoʻaʻoahaira vara enia natu haratu God mo viʻonia vara i pa ari la haratu la mate peresi la haratu la lo mauri. <sup>43</sup> Provet tari la vereulia vara sava tamlohi sei mo tau na nona rasua hinia, God i pa ʻromi na nona hehe na hijana.

### *Tanume Tapu Mo Jovi Isara*

<sup>44</sup> Peter mo pa lo vere la hinau atu, Tanume Tapu mo jovi isan la haratu enira mo isoiso sei la lo tapurongo na nona reti. <sup>45</sup> Tamlohi ʻoroʻoha sei la lo usuri Peter, la maʻurahi tavera matan God mo surei na Tanume Tapu isana tamlohi ʻoroʻoha sohera. <sup>46</sup> Matan la rongora la lo retireti na leo tinatinapua la lo tahe na hijan God, moiso Peter mo verea mara, <sup>47</sup> “Hare natu i eʻi horo na wai vara la tamlohi nike la sopo paptijo hinia? Matan enira sohena la lavi na Tanume Tapu soheʻa moiso.”

<sup>48</sup> Ale mo retileu isara vara la pa paptijo na hijan Iesu Kʻristo. Hitahun haratu, la usia vara i lo toho peresira makomona tako.

## 11

### *Kalesia Jerusalem La Rongo Na Sorasorahin Cornelius*

<sup>1</sup> Ale, vahaʻule peresi la vorai atu la lo toho ʻalihi Judea la rongoa vara tamlohi ʻoroʻoha la lavi na reti non God. <sup>2</sup> Ale Peter mara mo sahe Jerusalem, Jew kalesia hai la verelejlejia lara, <sup>3</sup> “Avei, ko vano isana tamlohi ʻoroʻoha, ale ko hanhani peresira.”

<sup>4</sup> Pani Peter mo tapulo vereuli na sava mo masese mo tapulo na tapulona mara, <sup>5</sup> “Na lo toho na taon tavera matan Joppa na lo usiusi, ale hinau matea sohena mavuho matea mo pala isaku, ale na hite na hinau matea sohena tavalu ruru tavera jea matea mo lo sinai atano mo tai na tuka ale la tuhua hin la pingona atu mo vati mo sinai tataholo isaku. <sup>6</sup> Nara na kilau mamahunia, na hite na maji palo vati hai, maji jala hai, maji haraho hai peresi na maji avuavu tinatinapua hai sei la tapu mata hanira. <sup>7</sup> Ale na rongo na leo matea mo malue mo vere a isaku mara, ‘O turu Peter; o vilimatei tea, ale o hanira!’

<sup>8</sup> Pani na vere a nara, ‘A sopo eʻi vaia sohena Moli; matan na sopo lo hani te hinau lumiha hatea sei leu mo horoa.’

<sup>9</sup> Pani pa leo atu na tuka mo mele řaramiau haruana mara, ‘Sava na vaia mo vokevoke, o sopo eři vereea vara mo lumiha.’

<sup>10</sup> Hinau atu mo maseše sohena vaha tolu moiso, la hinau tari atu la pa mele sahe na tuka. <sup>11</sup> Vahatea atu, tamlohi mo tolu la pala hin ima atu na lo toho ea, la řulera Caesarea matakū. <sup>12</sup> Ale Tanumen God mo vereea isaku mara a usurira, ale na sopo mele řomřomia vara enira la tamlohi tinapua. La tamlohi tupu limarave nike natu, la usuriau kama sahe, ale kama unu na iman tamlohi matea Caesarea. <sup>13</sup> Ale mo vereulia sohena sava mo hite angelo atu mo turu na lolo imana, ale mo vereea isana mara, ‘O řule tea la sivo Joppa, ale la lavi Simon sei tapala hijana Peter; <sup>14</sup> ale i pa vereuli na retisohai matea sei o pa juri hinia, engko peresi na vao imam.’

<sup>15</sup> Nara na tapulo retireti, Tanume Tapu mo jovi hinira sohen mo vaia isařa tiroma. <sup>16</sup> Ale na mele řomřomi na reti non Moli sei mara, ‘John mo paptijo peresi na wai, pani God i pa paptijo hin kamim na Tanume Tapu.’ <sup>17</sup> Vara God mo řilera na otori sohen mo silea isařa hin rani atu řa rasu Moli Iesu Křisto, enau sava tamlohi vara a eři horoa?”

<sup>18</sup> Lara la rongo la hinau atu la sopo mele retireti, pani la hasohaso God lara, “Varařuhu, God mo tinarihia vara tamlohi řořoha la eři

posi, ale la lavi na mauri soheřa.”

*Vao Kalesia Matan Antioch Matan Syria*

<sup>19</sup> Ale hin rani atu, la haratu sei la lo tipahira Jerusalem usuri na mate non Stephen, la sahe asau la kakau na jara sohen Phoenicia, Cyprus peresi Antioch. La sopo vere retisohai sei isan te tinapua pani isana Jew sei la lo retireti na leon Israel purongo. <sup>20</sup> Pani tatuara enira mara Cyprus enia Cyrene sohena, ale lara la pala Antioch la vereea isana tamlohi řořoha sei leora enia mara Greek, la lo retivujavujangi Moli Iesu. <sup>21</sup> Suihan Moli mo lo toho hinira, ale vao tavera sei la tamlohi řořoha la rasua, ale la posi mai isan Moli.

<sup>22</sup> Sorasora atu mara mo pala na vao kalesia Jerusalem, ale la řule Barnabas mo sahe Antioch. <sup>23</sup> Mara mo pala mo hiteuli na vavahinau řuhuřuhu non God isara, ale mo avulahi mo retituetuenira vara la lo toho řilangi varařuhu isan Moli, <sup>24</sup> matan Barnabas enia tamlohi řuhu matea, Tanume Tapu mo mařivi hinia, ale nona rasua mo řilangi, ale matana, tamlohi matuvana la mele mai isan Moli.

<sup>25</sup> Matana, Barnabas mo vano Tarsus vara i ale Saul, <sup>26</sup> ale mara mo tapaia, mo lavia mo sinai Antioch. Barnabas peresi Saul la lo pulutahi peresi vao kalesia atu, ale la vujangi na tamlohi matuvana ea mata tauni matea. Antioch natu, enia

tiroma jara sei tamlohi rasua la lavi hija sei – kalesia ea.

<sup>27</sup> Ale hin la rani atu p̄rovet hai la tai Jerusalem la sahe Antioch. <sup>28</sup> Vonara matea hijana Agabus mo turu, ale mo retimangovi na suihan Tanumen God mara marua tavera matea i pa jovi na varama, ale hinau atu mo masese hin rani atu Claudius mo lo supe nona mara Rome. <sup>29</sup> Ale matana, tamlohi usuri Antioch la hatihia vara la pa sile te tuetueni isana voraira peresi na vevoraira sei la lo toho Judea, la pa silea sohena vara la efi silea. <sup>30</sup> Ale la vaia sohena, la sile na nora tuetueni isan Barnabas enia Saul vara la pa silea isan la haratu la lo kilau na kalesia Jerusalem.

## 12

### *La Vilimatei James*

<sup>1</sup> Hin la rani atu, supe Herod Agrippa mo taurilati na kalesia hai vara i pa vaikomokomora. <sup>2</sup> Mo retileu vara la vilimatei James, tasin John na sita vuro. <sup>3</sup> Ale mara mo hitea vara Jew la avulahi hinia mo mele taurilati Peter sohena, harihi mo masese na rani Passover. <sup>4</sup> Mara mo tauria mo taua na ima rilangi, mo taua na lima vao tamlohi vuro mo vati sei tupu vati na vao matea. Herod mo lo romromia vara i pa lavi Peter i malue vara i aria na naho tamlohi hitahu na Passover. <sup>5</sup> Ale Peter mo lo toho atu na ima rilangi, pani vao kalesia Jerusalem la lo usiisi rilangi isan God matana.

### *Angelo Matea Mo Tiroma Hin Peter*

<sup>6</sup> Ale hin vutepongi atu sei vara i rani sahe supe Herod i pa vaia i turu na aria, Peter mo lo juruvi na livuha tamlohi vuro mo rua, la liho na limana na jen, ale hai la lo turu na pelatin ima rilangi atu. <sup>7</sup> Vahatea purongo, angelo matea non Moli mo pala na pahisan Peter na lolon jara atu mo lo toho hinia na ima rilangi, ale mera matea mo merasahi jara atu. Mo hoti Peter na rorona, ale mo rohaia mara, “O turu vila.” Ale jen la jovi narihi na limana. <sup>8</sup> Ale angelo atu mo vereea isana mara, “O ruru ale o ru na nom sabat!” Ale mo vaia sohena. Ale mo mele vereea isana mara, “O tavuhoroho na nom ruru tavera, ale o usuriau.”

<sup>9</sup> Ale Peter mo malue mo usuria. Mo sopo levosahia vara hinau atu angelo atu mo lo vaia enia hina varaŕuhu, pani mo lo romromia vara mo lo hite na hinau matea sohena mavuho matea. <sup>10</sup> Ale lara la jeu na tiroma vao tamlohi vuro peresi na harua vao tamlohi vuro sei la lo kilau na ima rilangi, la sahe tataholo na pelati aen sei mata unu hin taon tavera atu. Pelati atu mo hasena roi matara, ale la malue la lo usuri na malele tavera matea, ale vahatea purongo, angelo atu mo tinarihia.

<sup>11</sup> Ale romin Peter mara mo mele mai mo hasena vereea mara, “Nakerihi na levosahi mamahunia vara Moli mo rule na nona angelo vara i

juriau na liman Herod peresi na hinau tari sei Jew la opoia vara i pa masese isaku.”

<sup>12</sup> Mara mo levosahia, mo vano na iman Mary tinan John sei tapala hijana Mark. Ale tamlohi matuvana la lo pulutahi ea la lo usiusi. <sup>13</sup> Ale mara mo řiringi na pelatin rope ima atu, hařarihi volitusi matea hijana Rhoda mo mai vara i roi. <sup>14</sup> Mara mo rongovosahi na leon Peter, na nona avulahi mo sopo roi na pelati pani mo maro mo mele unu na ima mo vereulia isara vara Peter mo lo turu na pelati.

<sup>15</sup> La vereea isana lara, “Ko to, ko putu teni?” Pani mo vereea mo řilangi mara mo varařuhu, ale enira la lo vereea vara, “Enia nona angelo!”

<sup>16</sup> Pani Peter mo lo řiringi ale enira lara la roi, la hitea ale la mařurahi tavera. <sup>17</sup> Pani mo vai na matamata na limana vara la toho malum, ale mo vereulia sohena sava Moli God mo nařihia hin ima řilangi atu. Ale mo vereea mara, “Ha vere la hinau nike isan James peresi na voraiřa.” Moiso mo malue mo vano na jara tinapua matea.

<sup>18</sup> Na nahonaho rani tamlohi vuro tari na ima řilangi atu la matahu tavera na sava mo masese isan Peter. <sup>19</sup> Supe Herod mo pala isara atu, ale mo alea pani mo sopo hitea, ale mo usi na retiusia hai isan la tamlohi vuro atu sei la lo kilaua moiso mo retileu vara nona tamlohi vuro tinapua la lavira la vano la vilimateira. Moiso Herod

mo sivo mo hahau roto Judea mo vano Caesarea vara i lo toho atu.

### *Herod Agrippa Mo Mate*

<sup>20</sup> Supe Herod Agrippa mo lolokoru tavera na mara Tyre peresi Sidon, ale la mai isana na řomřomi matea, ale na rani Blastus patu volitusi non Herod mara mo majinga na řomira moiso, la usia vara la eři sari tamata peresi Herod matan hara hinau mo lo tai na jaran Supe. <sup>21</sup> Ale hin rani atu sei Herod mo taua moiso, mo ru na nona ruru peravu mata supe, mo sakele na jara sakele mata supe, ale mo sile na nona retireti isara. <sup>22</sup> Tamlohi la lo ulo lara, “Aaah! Leo god matea nahai, mo sopo leo tamlohi!”

<sup>23</sup> Vahatea purongo, angelo matea non Moli mo vilijovia matan mo sopo sile na haso-haso isan God, ale hulesi la hania mo mate.

<sup>24</sup> Pani reti non God mo ulua mo vano mo vai na tamlohi matuvana tinapua la rasua.

<sup>25</sup> Barnabas enia Saul lara la vai vevuhi na sava la lo vano matana Jerusalem, la mele hilu matan Antioch la lavi John sei, tapala hijana Mark.

## 13

### *Tanume Tapu Mo Rule Barnabas Enia Saul*

<sup>1</sup> Harihi enia hija přovet hai peresi na tamlohi vujangi Antioch: Barnabas, Simon la tovia ‘tamlohi viriha’, ale Lucius mara Cyrene, Manaen enia vorain Herod Antipas matea, vaona la korohia,

ale Saul. <sup>2</sup> Na rani matea la tapuhoro na hanhani ale la pa lo lotu Moli, Tanume Tapu mo vereā mara, “Ha tauhasehi Barnabas enia Saul mata noku voko atu na tovira matana.” <sup>3</sup> Hitahu na nora tapuhoro na hanhani peresi na usiusi, la tau na limara hinira ale la řulera la vano na malelera.

### *Tiroma Hahau Non Saul*

<sup>4</sup> Ale Barnabas enia Saul, Tanume Tapu mo řulera la sivo Seleucia na pahisa tasi, ale la vele na boti hin jara atu, la sivo na Ureuren Cyprus. <sup>5</sup> Lara la hoso Salamis, la retivujavujangi na reti non God na ima lotu nona Jew. Ale John Mark mo lo usurira sohena nora tuetueni.

<sup>6</sup> Lara la hahau roto ureure atu la kakau Paphos, la tataholo na tamlohi matea mo lo mahumahu na suiħan tiapolo, enia Jew přovet haluhalu matea hijana Bar-Jesus, <sup>7</sup> enia mo lo toho peresi na tamlohi aulu matan Cyprus sei supe non Rome mo taua atu, hijana Sergius Paulus, enia tamlohi lelevosahi matea. Tamlohi aulu atu mo vahařule matan Barnabas enia Saul matan mo opoia vara i rongo na reti non God. <sup>8</sup> Pani Elymas tamlohi mahumahu atu mo retiħorora matan mo sopo opoia vara tamlohi aulu atu i rongo te reti na rasua non Saul enia Barnabas hin Iesu.

<sup>9</sup> Pani Saul sei tapala hijana Paul, Tanume Tapu mo mařivisia ale Paul mo kilau tataholo isana, <sup>10</sup> ale mara, “Engko natun Tiapolo,

ko mařivi na halu peresi posposi tope na leu, mere-sahi nona hināu tari sei la řuhu, o pa isoiso na nom vailejleji na malele varařuhu non Moli pangisa? <sup>11</sup> Ale nakerihi natu, liman Moli mo meresahi isam, ale o pa vuso, o pa sopo eři hite na mera alo matan te rani makomona.” Vahateā purongo, matana mo nini ale řořoha mo soħonia, ale mo aleale tamlohi vara tea i tauri na limana i tiroma hinia. <sup>12</sup> Tamlohi aulu atu mara mo hite hināu atu mo masese mo rasua, matan mo mařurahi tavera na vujangi matan Moli.

### *Paul Enia Barnabas La Sahe Antioch*

<sup>13</sup> Moiso, Paul peresi na tapalana la mele malue Paphos na boti matea la sahe matan Pamphylia. La hoso na taon matan Perga. John Mark mo tinařihira atu natu, ale mo mele hilu mo sivo Jerusalem. <sup>14</sup> La mele malue Perga la sahe la pala Antioch matan Pisidia, ale na rani Sabbath la vano la unu na ima lotu nona Jew la sakele. <sup>15</sup> Hitahun na evievi mata Leu non Moses peresi na reti nona přovet, patu tamlohi mata ima lotu mo soħai na retisoħai isara mara, “La vorai, vara te nomim retisoħai mata tueni na tamlohi, ha sinai ha silea.”

<sup>16</sup> Ale Paul mo turu mo tahe na limana vara la tapurongo ale mara, “La tavitavin Israel peresi kamim ka tamlohi řořoha sei ka lo sile na ololo isan God, ha tapurongo:

<sup>17</sup> God nona tavitauin Israel, mo viʻoni na noʻa pua, ale mo vaira la ulua ʻilangi hin rani atu la lo toho Egypt. Ale mo jurira na suihana la malue na mauri slev. <sup>18</sup> God mo lavi na rani ʻilangi isara na jara hasetoho mata tauni ngavulu vati (40).

<sup>19</sup> Ale hitahun haratu, mo vaikomokomo na mara jara tinatinapua mo limaravrua Canaan, ale mo sile na nona tamlohi hin jara atu sohena koruna. <sup>20</sup> La hinau atu mariviti vara i lavi na tauni mo ngavulu sangavulu vati mo ngavulu lima (450).

Hitahuna, mo silera na tamlohi ari mo tikeli na rani non pʻovet Samuel. <sup>21</sup> Moiso, tamlohi la tangi matan vara te nora supe, ale God mo silera hin Saul natun Kish, tavitauin Benjamin matea, ale enia mo aulu mata tauni mo ngavulu vati. <sup>22</sup> Pani God mo naʻihia sohena supe, ale mo tau David na jarana. God mo retireti matan David mara, 'Na hite David natun Jesse vara ʻomina mo usuri na ʻomiku matan enia i pa vai na hinau tari na masaloku.'

### 1 Sam 13.14

<sup>23</sup> Ale mahapin David, Iesu natu, enia haratu sei God mo sohaia usuri na nona retitauhi hinia sohena Jujuri non Israel! <sup>24</sup> Hin la rani atu la tiroma na nona pala, John tamlohi paptijo mo lo retivujavujangi na tavitauin Israel vara la vahaʻi na nora hehe, ale la posi mai isan God la paptijo. <sup>25</sup> Ale vavahinau non John mariviti vara i lo isoiso,

mo vere a vaha visa mara, 'Ka ʻomi vara enau hare? Enau mo sopo tamlohi atu, pani ha lo levosahia vara haratu mo lo mai hitahu hinia, enau na sopo tataholo vara a uli na asi eve palona.'

<sup>26</sup> La vorai, kamim sei natun Abraham peresi kamim tari sei ka tamlohi ʻoroʻoha sei ka lo sile na ooloo isan God non Israel, retisohai matan juri akerihi, mo mai isaʻa mo isoiso. <sup>27</sup> Tamlohin Jerusalem peresi na nora tamlohi aulu la maʻivisi na retimangovi hin haratu la sile na talai isan Iesu vara i mate. La sopo hitevosahia vara enia haratu sei pʻovet la lo uliuli matana, hina purongo vara la lo rongo na retireti nona pʻovet tarea na Sabbath. <sup>28</sup> La sopo eʻi tapai te malele vara i ori hinia, ale hina purongo hin haratu, la usi Pilate vara i vilimateia.

<sup>29</sup> Ale lara la maʻivisi vevuhi na retimangovi mata nona mateia, la juria na talopeilopei, la taua na papa matea. <sup>30</sup> Pani God mo sauteterahia na mateia! <sup>31</sup> Ale mo pala vaha visa isan la haratu sei enira tolu la tai Galilee la sahe Jerusalem, enira natu la vere la hinau sei la hitera isana tavitauin Israel.

<sup>32</sup> Ale kama lo retivujavujangi kamim hin Retiʻruhu atu matan retitauhi sei God mo vai isana noʻa pua, <sup>33</sup> vara retitauhi atu God mo maʻivisia isaʻa – natura hin haratu mo tahe Iesu sohen David mo ulia na harua psalm mara, 'Engko Natuku,

nahapani na vujangia  
vara enau Tamam.' *Psa*  
*2.7*

<sup>34</sup> Enia hina varaʻuhu matea  
sei God mo tahe Iesu na  
mateia matan vara i pa sopo  
ʻrovo, hinau atu mo vereia na  
Retitapu sei mara,  
'A pa sileho na leʻuhu tapu  
peresi na retitauhi sei  
na vaia isan David.'

*Isa 55.3*

<sup>35</sup> Matana, mo mele vereia na  
psalm tinapua matea mara,  
'O pa sopo tinarihia vara  
nom Tamlohi Tapu i  
hite na ʻrovo.'

*Psa 16.10*

<sup>36</sup> Matan David, hitahun  
haratu mo vai na masalon  
God na nona rani, mo mate  
ale la tavunia peresi na  
tahisana, epena mo ʻrovo.  
<sup>37</sup> Pani haratu sei God mo lo  
tahea na mateia, epena i pa  
sopo hite na ʻrovo.

<sup>38</sup> Matan haratu, la vorai ha  
levosahia vara hinia, kama lo  
retivujavujangia vara God i  
pa ʻromi na hehe, <sup>39</sup> ale vara  
sava tamlohi la tau na nora  
rasua hinia, la pa tataholo  
na nahon God, hinau sei Leu  
non Moses i sopo eʻi vaia  
hin te rani. <sup>40</sup> Ha lo kilau!  
Ha sopo tinarihia vara re-  
tireti nona pʻovet la lo vere  
kamim, matan la vereia lara,

<sup>41</sup> 'Ha hitea la tamlohi kerek-  
erehi,  
ha maʻurahi taverna  
hinia ale ha tihai!  
Matan na lo vai na  
vavahinau matea na  
nomim rani,  
vavahinau atu ha sopo eʻi ra-  
sua,  
hina purongo vara tea  
la vereulia isamim.'"  
*Hab 1.5*

<sup>42</sup> Paul enia Barnabas lara  
la lo malue na nora ima lotu,  
tamlohi la usia mo ʻrilangi  
isara vara la mele vere la  
hinau atu na tavalu wik na  
Sabbath. <sup>43</sup> Jew matuvana  
peresi la haratu sei la posi  
la lavi na rasua nona Jew la  
lo lotu na ima lotu la usuri  
Paul enia Barnabas, ale la  
tupra rua atu la vereia isara  
vara la turu ʻrilangi usuri na  
ʻromʻuhu non God.

*Paul Mo Vano Isana Tam-  
lohi Roʻroha*

<sup>44</sup> Sabbath atu mo usuria,  
mariviti tamlohi tari hin taon  
tavera atu la sinai vara la  
rongora la retivujavujangi  
na reti non Moli. <sup>45</sup> Pani  
Jew lara la hite vao atu,  
mereimerei mo maʻivisira,  
ale la tapulo vereleji na sava  
Paul mo lo vereia isara, la lo  
retisatihia.

<sup>46</sup> Paul enia Barnabas la  
ʻromʻilangi la ʻraramira lara,  
"God mo taua vara kama  
pa sile na Retiʻuhu isana  
tavgavin Israel tiroma,  
pani matan ka ʻrohu hinia,  
ale matan ka hitea vara  
ka sopo tataholo vara ha  
lavi na mauri tui, kama pa  
silea isana tamlohi roʻroha.  
<sup>47</sup> Matan Moli mo retileu  
hinia isamam hin haratu mo  
vereia mara,

'Enau na vai kamim sohena  
malarani  
isana tamlohi roʻroha,  
vara ha lavi na reti mata  
juri i vano na isoiso  
varama.'"  
*Isa 49.6*

<sup>48</sup> La haratu sei la tamlohi  
roʻroha lara la rongoa, la avu-  
lahi hinia ale la hasohaso na  
reti non Moli, ale la haratu sei  
God mo viʻonira mata mauri  
tui la rasua. <sup>49</sup> Ale reti non



Moli mo lo unu na jara tari hin jara tavera atu.

<sup>50</sup> Pani tamlohi tavera nona Jew la reve takonahi na haʻai aulu sei la lo sile na ooloo isan God peresi na tamlohi aulu matan taon tavera atu, ale la vai na vao matea la meresahi hin Paul enia Barnabas ale la tipahi naʻihira hin jara tavera atu. <sup>51</sup> Pani la saʻsaʻhi naʻihi na tangotango palora matara ale la vano na taon tavera matan Iconium. <sup>52</sup> Ale tamlohi rasua atu la maʻivi na avulahi peresi na Tanume Tapu.

## 14

### *Paul Enia Barnabas La Rohi Iconium*

<sup>1</sup> Na rani Paul enia Barnabas la lo toho Iconium, la unu na ima lotu nona Jew, ale la retivujavujangi peresi na suiha mo vaia vao tavera jea matea isana Jew peresi la haratu la tamlohi ʻoroʻoha la rasua. <sup>2</sup> Pani Jew sei la sopo rasua, la ari posposi la haratu la tamlohi ʻoroʻoha, ale la komo na ʻomira la meresahi isan Paul enia Barnabas.

<sup>3</sup> Mo vaia la toho mo peravu atu, ale la retivujavujangi mo sopo te matahu hinira, ale la vereuli na ʻomʻruhu non Moli. Ale Moli mo vujangia vara nona retisohai sei mo varaʻruhu matan mo sile na suiha isana nona vahaʻule vara la eʻi vai na matamata tavera peresi na hinau maʻurahi. <sup>4</sup> Pani tamlohi hin taon tavera atu la patumasa, hai la turu peresi la Jew atu, ale hai la turu peresi la vahaʻule atu.

<sup>5</sup> Vao matea mata Jew peresi la haratu la tamlohi ʻoroʻoha peresi na nora tamlohi tatavera la hatihia vara la pa vailelejira, ale la pa parura, <sup>6</sup> pani Paul enia Barnabas lara la levosahia, la rovo la vano na jara tavera Lycaonia, ale isan la taon tavera atu Lystra enia Derbe peresi na jara ʻalihi ea, <sup>7</sup> ale la retivujavujangi na Retiʻruhu ea.

### *Paul Enia Barnabas La Rohi Lystra Enia Derbe*

<sup>8</sup> La pa lo toho atu Lystra la mai tataholo na tamlohi papao matea, mo vora palona la sati ale mo sopo lo hahau na maurina. <sup>9</sup> Tamlohi atu mo lo tapurongo mo ruhu na retivujavujangi non Paul, ale Paul mo hitea, ale mo hitevosahia vara enia mo rasua vara enia i eʻi ruhu. <sup>10</sup> Ale Paul mo vereea isana na leo tavera matea mara, "O turu!" ale tamlohi atu mo turu tataholo mo tapulo hahau.

<sup>11</sup> Ale vao atu lara la hite hinau atu Paul mo vaia, la ulo na leon Lycaonia lara, "La tamlohi nike enira god sei la tai na tuka la pala na epe tamlohi!" <sup>12</sup> La tapulo tovi Barnabas vara Zeus sei god nona mara Greek, ale Paul enia god sei Hermes matan enia mo lo sile na retireti. <sup>13</sup> Temple non Zeus mo lo toho na jingoima ropen taon tavera atu. Ale nona pʻris peresi na vao la lavi na buluk peresi na ʻrongoʻrongo la vaira na vira pahai, ale la lavira la vano na mataruan taon tavera atu, ale la tatamahu vara la pa

vai na malamalai isan la vahaʻule atu.

<sup>14</sup> Pani Barnabas enia Paul lara la rongvosahi na sava lara lo vereā, la ʻrari na nora ruru ale la maro la vano na livuhan vao atu la lo ulo lara, <sup>15</sup> “La tapala, ka lo vai la hināu sei mata sava? Kamam tamlohi sohemim purongo. Kama mai matan vara kama sile na Retiʻuhu isamim matan vara ha pa vahaʻi na hināu la sopo ʻūhu, ale ha posi mai isan God sei mo mauri mo vai na tuka, varama, tasi peresi na hināu tari sei la lo toho hinira. <sup>16</sup> Tuai mo tinaʻihia vara la haratu la sopo levosahi God na jara tari la eʻi usuri na masalora, <sup>17</sup> pani mo vujangia vara enia mo lo mauri na hina ʻūhu mo lo vaira sohena usa mo jovi na masapa ale hanhāni la ʻūhu, ale ka masu na hanhāni ka avulahi matana.”

<sup>18</sup> Pani hina purongo hin haratu, Paul enia Barnabas mariviti la sopo eʻi horo la vao atu vara la sopo vai na malamalai isara.

<sup>19</sup> Pani Jew hai la tai Antioch peresi Iconium, la mai la posi na ʻromin la vao atu la meresahi hinira, ale la paru Paul ale la reve tahitahia mo malue hin taon tavera atu matan la ʻromi vara mo mate. <sup>20</sup> Pani tamlohi rasua lara la lo turu ʻralihia, Paul mo mele turu ale mo mele unu hin taon tavera atu. Ale na rani tinapua matana, Paul enia Barnabas la malue la vano matan Derbe.

*Paul Enia Barnabas La Sivo Antioch Matan Syria*

<sup>21</sup> Paul enia Barnabas lara la retivujavujangi na taon tavera matan Derbe la vai na tamlohi usuri matuvana. La mele hilu la sivo Lystra, Iconium ale la mele sahe Antioch matan Pisidia, <sup>22</sup> ale hin la jara atu la tueni na rasua nona tamlohi usuri. La retituʻetuenira vara la turu ʻrilangi na nora rasua, ale la vere mamahunia isara lara, “Ra pa unu hin mauri atu God mo aulu hinia na malele rani ʻrilangi matuvana.” <sup>23</sup> Paul enia Barnabas la viʻroni na patu tamlohi mata kilau na vao kalesia tari, ale na ususi peresi na tapuhoro hanhāni la taura na liman Moli sei la lo tau na nora rasua hinia. <sup>24</sup> Moiso la mele sivo roto Pisidia vavano la tikeli Pamphylia. <sup>25</sup> Hin jara atu la mele retivujavujangi Perga moiso la sivo Attalia.

<sup>26</sup> La malue hin jara atu la vele na boti la vano Antioch matan Syria, jara atu sei la lo tapulo na nora hahau ea, jara sei la taura na liman ʻromʻūhu non God ea matan voko sei la isoiso hinia natu. <sup>27</sup> Lara la pala, la tovi matavuhi na vao kalesia na jara matea, ale la vereuli vevuhi na sava God mo vaia isara ale sohena sava mo roi na malele mata rasua isan la haratu la tamlohi ʻroʻroha. <sup>28</sup> Ale la lo toho peresi na tamlohi usuri Antioch mo peravu makomona.

## 15

*Council Tavera Nona Kalesia Jerusalem*

<sup>1</sup> Pani tamlohi hai la tai Judea la sinai la tapulo vujangi na kalesia vara,

“Vara ha sopo taiřalihi sohen leu non Moses mo vereea, ha pa sopo eři juri!” <sup>2</sup> Paul enia Barnabas lara la rongoa la sopo avulahi, la vauriuri tavera peresira matana. Ale vao kalesia atu la viřoni Paul enia Barnabas peresi na nora tamlohi hai, vara la sivo Judea matan la sahe Jerusalem vara la sorahia peresi na vahařule tolu na tamlohi tatavera nona vao kalesia Jerusalem. <sup>3</sup> Vao kalesia Antioch la řulera la sivo, ale lara la lo sivo la rohi Phoenicia peresi Samaria, ale la sorahia sohena sava la haratu la tamlohi řořoha la posi, ale vorai kalesia hin la jara atu la avulahi tavera matana.

<sup>4</sup> Ale hin rani atu la kakau Jerusalem, kalesia tari, vahařule peresi na vajiahara, la lavi Paul enia Barnabas na avulahi. Ale la vere vevuhi na sava God mo vaia na nora vavahinau. <sup>5</sup> Pani tamlohi rasua hai sei la tai na vao Pharisee, la turu lara, “Ha vujangi la haratu la tamlohi řořoha vara la pa taiřalihi, ale la pa usuri na leu non Moses.”

<sup>6</sup> Vahařule peresi na vajiahara la pulutahi vara la sorahi hinau sei. <sup>7</sup> Retireti matuvana la vano moiso, Peter mo turu ale mara, “La vorai, ka levosahia vara tiroma God mo viřoniau vara a vano a retivujavujangi isan la haratu la tamlohi řořoha, matan vara la eři rongo na retisohai mata Retiřuhu, ale la rasua. <sup>8</sup> God sei mo levosahi na mapu tamlohi, mo vujangia vara enia mo avulahi hinira, matan enia

mo sile na Tanume Tapu isara sohen mo lo silea isařa nike. <sup>9</sup> Na nahon God, enřa řa sopo tinapua hinira, matan mo vai na mapura la vokevoke na rasua sohena. <sup>10</sup> Ale vara mo sohena, mata sava ka lo vaihite God, matan ka opoia vara ha tau na tetehi puhoni isana tamlohi usuri sei la tamlohi řořoha? Hinau sei, enřa teni nořa pua la sopo eři solotia! <sup>11</sup> Pani řa rasua vara God i pa juriřa na řomřuhu non Moli Iesu sohera.”

<sup>12</sup> Ale řomřomi atu mo moti, ale tamlohi tari la tapurongo isan Barnabas enia Paul, la sorahi na matamata tavera peresi na hinau mařurahi sei God mo lo vaira na naho tamlohi la tamlohi řořoha.

<sup>13</sup> La retireti mo isoiso, James mo turu mo vereea mara, “La vorai, ha tapurongo isaku. <sup>14</sup> Ka rongoa Simon Peter mo vereea moiso sohena sava God mo řulea isana tamlohi řořoha vara i lavi narihi na nona tamlohi isara. <sup>15</sup> Ale reti nona přovet la majinga hin hinau sei sohen la ulia na Retiulia lara,

<sup>16</sup> ‘Hitahun hinau sei a pa mele pala,

ale a pa mele voro na jaran supe David sei mo jovi.

A pa mele voroa hin la sopesopena sei la lo toho,

ale a pa mele turuhia,

<sup>17</sup> matan vara tamlohi tinatnapua na varama la pa hite Moli ea,

la haratu sei la tamlohi  
 ʔoʔoha sei,  
 na tovira moiso vara la  
 pa noku.  
 Harihi enia sava Moli mo  
 vereaa.’

*Amos 9.11-12*

<sup>18</sup> Haratu sei mo lo vereuli la  
 hinau nike tuai moiso.

<sup>19</sup> Matan haratu, noku  
 kilakilau ʔa sopo mele sile  
 te rani ʔilangi tinapua isana  
 tamlohi ʔoʔoha sei la lo posi  
 la mai isan God, <sup>20</sup> pani mo  
 ʔuhu vara ʔa uli te leta hatea  
 mata i vereaa isara vara i  
 horora vara la sopo hani na  
 mit sei la silea isana tamasi  
 moiso, ale vara la toho asau  
 na mauri maji, ale vara  
 la sopo hani te maji sei la  
 punia, ale la sopo inu na  
 ʔae.\* <sup>21</sup> Matan la leu nike non  
 Moses la retivujavujangira  
 na ima lotu nona Jew na taon  
 tavera tari na Sabbath mata  
 tauni mo visa moiso.”

*Leta La Ulia Isana Tamlohi  
 Roʔoha*

<sup>22</sup> Ale vahaʔule peresi  
 na vajiahara peresi na vao  
 kalesia Jerusalem, la viʔoni  
 na tamlohi hai, ale la ʔulera  
 la sahe Antioch matan Syria  
 peresi Paul enia Barnabas,  
 vara la vereuli na ʔaramin  
 ʔomʔomi atu la lo hahau  
 matana. La tamlohi atu la  
 viʔoni na patu tamlohi nona  
 vao kalesia mo rua, Judas  
 sei tapala hijana Barsabbas  
 peresi Silas. <sup>23</sup> Harihi enia  
 leta atu la lo lavia peresira:

“Retioloolo isamim la vorai  
 kalesia Antioch, Syria peresi  
 Cilicia sei ka tamlohi ʔoʔoha,  
 mo tai isana vorai kalesia

nike Jerusalem, peresi na va-  
 haʔule peresi na vajiaha sei  
 la aulu na vao kalesia nike.

<sup>24</sup> Kama levosahia vara  
 tamlohi hai la tai nike la  
 vano isamim ale la vai na  
 ʔomimim la kaka na nora  
 vujangi, pani kama sopo  
 ʔulera hin te hinau sohena.  
<sup>25</sup> Ale matana, kama hitea  
 vara mo tataholo vara kama  
 ʔule la vahaʔule sei Judas  
 enia Silas peresi la vorai  
 ʔuhuʔuhu sei Paul enia  
 Barnabas isamim usuri na  
 ʔomʔomi kamam tari nike  
 kama hatihia. <sup>26</sup> Paul enia  
 Barnabas sei mariviti la mate  
 matan Moli Iesu Kʔristo. <sup>27</sup> Ale  
 matana, kama lo ʔule Judas  
 enia Silas vara la pa vereuli  
 na sava kama ulia hin leta  
 nike na nahomim.

<sup>28</sup> Matan kama majinga  
 peresi na Tanume Tapu vara i  
 pa mele ʔuhu vara kama sopo  
 mele tau te retileu ʔilangi  
 isamim, pani la retileu nike  
 mo visaletu purongo:

<sup>29</sup> Vara ha sopo hanhahi na  
 mit sei la silea isana tamasi  
 moiso, ale vara ha sopo hani  
 te maji sei la punia, ale ha  
 sopo inu na ʔae, ale vara  
 ha toho asau na mauri maji.  
 Vara ha sopo vai la hinau atu,  
 i pa ʔuhu jea isamim. Enia  
 natu, enʔa vuhoo.”

<sup>30</sup> Ale la vahaʔule tupu vati  
 atu la malue, vahatea la sahe  
 Antioch. La tovi matavuhi  
 na kalesia tari la mai jara  
 matea atu, ale la evi leta atu  
 isara. <sup>31</sup> Ale avulahi tavera  
 mo jovi isana kalesia tari hin  
 rani atu, lara la rongo retiso-  
 hai ʔuhu atu.

\* **15:20:** maji sei la punia: mo sopo tataholo vara ʔa hani na maji la punia matan  
 ʔaena mo pa lo maʔivi na visihona.

<sup>32</sup> Ale Judas enia Silas enira tupra rua la p̄rovet, ale la retireti mo peravu isana kalesia vara la tueni na nora rasua vara i ulua i mele řilangi. <sup>33</sup> La lo toho atu mata makomo rani moiso, la řulera la mele sivo Jerusalem peresi na leřuhu nona kalesia isan la haratu sei la lo řulera. <sup>34-35</sup> Pani Paul enia Barnabas la lo toho Antioch, la lo vujangi, ale la retivujavujangi na reti non Moli peresi na tamlohi tinapua hai.

### *Paul Enia Barnabas*

<sup>36</sup> Rani hai la vano moiso, ale Paul mo vereea isan Barnabas mara, "Ra mele sahe řa rohi na vorai hin la taon tavera tari sei řa lo retivujavujangi na reti non Moli ea, ale řa hitea vara la lo sohena sava." <sup>37</sup> Barnabas mo avulahi ale mo opoia vara i lavi John Mark. <sup>38</sup> Pani Paul mo řohu řilangi, matan John Mark mo rovo hinira tiroma Pamphylia ale mo sopo tuenira na nora vavahinau. <sup>39</sup> La sopo eři mai na řomřomi matelete mo vaia Barnabas mo lavi John Mark peresia ale la vele na boti la sahe Cyprus, <sup>40</sup> pani Paul mo viřoni Silas ale la malue peresi na leřuhu nona vorai kalesia lamane peresi na hařai. <sup>41</sup> Mo sahe roto Syria peresi Cilicia mo tueni na vao kalesia tari ea vara la turu řilangi na nora rasua.

## 16

### *Timothy Mo Usuri Paul*

<sup>1</sup> Paul mo mele sahe mo mai Derbe, ale mo sahe

Lystra. Hin jara atu mo tapai na uluvou matea enia tamlohi usuri matea, hijana Timothy, enia natun hařai Jew matea enia kalesia, pani tamana enia mara Greek matea. <sup>2</sup> Vorai kalesia Lystra peresi Iconium la vereea vara enia tamlohi řuhu matea. <sup>3</sup> Paul mo opoia vara Timothy i usuria na nora hahau, ale mo lavia mo taiřalohia matan la Jew atu la lo toho hin jara atu la levosahia vara tamana enia mara Greek matea. <sup>4</sup> Lara la lo vano na taon tavera hatehateahi, la lo vereuli na sava sei vahařule peresi na vajiaha sei lo aulu na kalesia Jerusalem, la hatihia vara tamlohi řoroħa la pa oloolo hinira. <sup>5</sup> Matana, vao kalesia tari la mele ulua řilangi na nora rasua, ale evira mo lo sahe aulu na rani hatehateahi.

### *Tamlohin Macedonia Matea Mo Tovi Paul*

<sup>6</sup> Ale la sahe la hahau roto na jara tavera matan Phrygia peresi Galatia, matan Tanume Tapu mo horora vara la sopo sivo Asia mata la vere na retisohai non Moli ea. <sup>7</sup> Lara la mai Mysia, la vaihitea vara la sahe na jara matan Bithynia, pani Tanumen Iesu mo horora, <sup>8</sup> ale la mele hahau sivo roto Mysia moiso la sivo Troas.

<sup>9</sup> Hin vutepongi atu hinau matea sohena mavuho matea mo pala isan Paul. Mo hite na mara Macedonia matea mo lo turu atu mo lo usia řilangi mara, "O mai Macedonia, o tueni kamam!" <sup>10</sup> Paul mara mo hite mavuho atu moiso,

kama turu vahatea, ale kama aleale malelemam vara kama vano Macedonia, kama levosahia vara God mo tovi kamam vara kama vano kama retivujavujangi na Retiruhu isara.

### *Lydia Mo Rasu Na Retiruhu*

<sup>11</sup> Ale kama vele na boti Troas kama sahe tataholo Samothrace, ale mo mele rani sahe kama hoso Neapolis, <sup>12</sup> moiso kama malue atu kama lo sahe Philippi, enia taon tavera matan Macedonia, jara mara Rome matea. Kama toho atu mata makomo rani.

<sup>13</sup> Ale na Sabbath kama malue na mataruan taon tavera atu, kama vano makomona na pahisa wai matea. Kama ŋomi vara enia jara matea tamlohi la lo pulutahi mata usiusi ea, ale kama sakele hin jara atu ale kama lo sorasora peresi la haŋai atu sei la lo pulutahi atu. <sup>14</sup> Vonara matea, hijana Lydia enia mara Thyatira sei, enia taon tavera matea, enia mo lo vai na mania na ruru ŋuhu sei perpel, ale matan enia mo lo lotu God, mo lo tapurongo isamam. Ale God mo roi na mapuna vara i rasu na sava Paul mo lo vereaa. <sup>15</sup> Ale mo lavi na paptijo peresi na vao imana, ale hitahuna, mo usia ŋilangi isamam mara, "Vara na nomim kilakilau ka hitea vara enau na lo turu ŋilangi hin Moli, ha mai na imaku ale ha lo toho ea." Ale mo vereaa mo ŋilangi vavano kama majinga isana.

### *Paul Enia Silas Na Ima Rilangi*

<sup>16</sup> Kamara kama lo vano na jara mata usiusi, kama tapai na haŋarihi slev matea sei tanume sasati mata vereaa na hinau i pa masee mo lo toho hinia. Ale nona tamlohi tavera la lo lavi na mania tavera matana. <sup>17</sup> Mo lo usuri kamam peresi Paul, mo lo ulo aulu mara, "La tamlohi nike enira la volitusi non God sei mo Aulu Jea, enira la lo retivujavujangi kamim na malele mata juri."

<sup>18</sup> Ale mo lo vai hinau atu sohena mata rani matuvana moiso, ale Paul mo malokona, ale mo posi vano isana mo vereaa isan tanume sasati atu mara, "Na retileu isam na hijan Iesu Kŋisto vara o malue hinia." Ale vahatea purongo mo tinarihia.

<sup>19</sup> Pani nona tamlohi tavera lara la hitea vara malele mata nora mania mo pelati, la taurilati Paul enia Silas la reve tahitahira la sivo na jara maket, la vaira la turu na naho tamlohi aulu hin taon atu. <sup>20</sup> Lara la lavira la mai la turu na naho tamlohi aria atu, la vereaa lara, "La mara Jew nike, la lo vai na ŋom tamlohi hin taon tavera nike la sopo sakele, <sup>21</sup> ale la lo vujangi na tamlohi na posposi hai mo sopo tataholo vara enŋa mara Rome ŋa lavira teni vara ŋa vaira!"

<sup>22</sup> Vao atu la tapulo turuleji hinira, ale la tamlohi aria atu la ŋari naŋihi na ruru non Paul enia Silas, ale la retileu vara la hamajira na maja. <sup>23</sup> Hitahun haratu la hamaji komokomora, la pulahira na lolo ima ŋilangi, ale

la retileu vara tamlohi ima řilangi i lo kilaura vara la sopo mele malue. <sup>24</sup> Mara mo lavi retileu atu sohena, mo pulahira sivo na jara matea na lolona vahatea. Ale mo sohoni na palora na koko tapea mo pilatira.

<sup>25</sup> Na livuha vutepongi, Paul enia Silas la pa lo usiusi ale la lo lalavete isan God, ale tamlohi tinapua na lolo ima řilangi, la lo tapurongo hinira. <sup>26</sup> Vahatea purongo, mihi tavera matea mo hisu, mo hisuhi ima řilangi atu mo tikeli pulona vahatea, ale vahatea purongo pelati tari la roi, ale jen tari la jovi nařihi hinira enira mo isoiso. <sup>27</sup> Tamlohi kilau na ima řilangi mara mo turu mo hitea vara pelati tari la roi, mo reve nařihi na nona sita mo tatamahu vara i pa vilia enia hasena, matan mo řomi vara la haratu la lo toho na lolo ima řilangi la rovo moiso. <sup>28</sup> Pani Paul mo ulo aulu isana mara, "O sopo vaia! Matan kamam mo isoiso nahai kama lo toho!"

<sup>29</sup> Tamlohi atu mo ulo mata lamu ale mo maro matan lolon ima řilangi atu vahatea, ale mo jovi na palon Paul enia Silas na nona matahu. <sup>30</sup> Moiso mo lavira la malue ale mo usia isara mara, "La tamlohi tavera, a pa vai na sava vara a eři juri hinia?"

<sup>31</sup> La řaramia lara, "O tau na nom rasua hin Moli Iesu, ale o pa juri, engko peresi na vao imam." <sup>32</sup> Ale la vere na reti non Moli isana peresi la haratu sei la lo toho pearsira na lolo ima. <sup>33</sup> Ale hin

vutepongi atu purongo mo lavira la vano mo hoje na matara maja isara, ale enia peresi na vao tari na imana la paptijo vahatea. <sup>34</sup> Ale pa tamlohi atu mo lo kilau na ima řilangi mo lavira la sahe na imana, ale mo tau na hanhani na nahora ale mo avulahi tavera peresi na vao imana, matan enira la tau na nora rasua hin God.

<sup>35</sup> Pani na nahonaho rani, la tamlohi aria atu la řule na nora police vara la vere a isan tamlohi atu mata kilau na ima řilangi lara, "O tinařihira!"

<sup>36</sup> Pa tamlohi atu mata kilau na ima řilangi, mo vere retireti atu isan Paul mara, "Tamlohi aria, la vahařule vara a tinařihi kamim. Ale matana, ha malue ha vano na tamata."

<sup>37</sup> Pani Paul mo vere a isana police atu mara, "La tamlohi atu la hamaji kamam na naho tamlohi, la sopo usuri na posposi tataholo mata ari na tamlohi, hina purongo vara kama mara Rome, ale la pulahi kamam na ima řilangi. Ale nake, la opoia vara la tinařihi kamam tamlohi la sopo levosahia? Mo sopo te malele sohena. Ha vano ha verera hinia vara enira la pa mai nike, ale la nařihi kamam."

<sup>38</sup> La police atu la vere la retireti atu isan la tamlohi aria atu. Ale la tamlohi aria atu lara la rongoa vara Paul enia Silas enira mara Rome, la matahu tavera matana. <sup>39</sup> Ale la mai la řomtuhutuhu isara. Ale la lavi nařihira la usira řilangi vara la malue

hin taon tavera atu. <sup>40</sup> Lara la malue na ima řilangi, la vano la unu na iman Lydia, ale lara la hite na vorai kalesia atu la retituetuenira moiso la malue.

## 17

### *Paul Enia Silas La Kakau Thessalonica*

<sup>1</sup> Lara la hahau roto Amphipolis enia Apollonia moiso, la mai Thessalonica sei ima lotu nona Jew matea mo lo toho ea. <sup>2</sup> Ale usuri na posin Paul, mo lo matavuhi peresira mata Sabbath mo tolu, ale mo lo vereuli na Retitapu isana tamlohi ea. <sup>3</sup> Mo lo vereuli mamahuni na Retitapu na nona vujangi sohena sava Křisto i pa lavi na rongohaji, ale i pa mele turu na mateia, ale mo vereea mara, "Iesu akerihi natu sei na lo retivujavujangia isamim, enia Křisto atu." <sup>4</sup> Tatua Jew atu la rasua peresi na vao tavera mara Greek la lo lotu God peresi na hařai aulu matuvana, la avulahi vara la tapala peresi Paul enia Silas.

<sup>5</sup> Pani tamlohi aulu nona Jew la mereimerei hinira, ale la lavi na tamlohi sasati hai hin vao tavera atu na jara maket, ale la vaira la mai vao meresahi matea, ale taon tavera atu mo tapulo roroa na leora. <sup>6</sup> Ale lara la sopo eři hite Paul enia Silas, la reve tahitahi Jason peresi na vorai kalesia hai, la vaira la turu na naho tamlohi aulu matan taon tavera atu, la ulo lara, "La tamlohi nike sei la lo posileji na varama, enira nahai la pala nike sohen la pete

vaia na jara tinapua moiso, <sup>7</sup> ale Jason mo avulahi hinira mo taura na imana! Enira mo isoiso la lo turuleji na retileu non supe nona mara Rome matan la lo vere na supe tinapua matea hijana Iesu!"

<sup>8</sup> Ale tamlohi peresi na tamlohi aulu matan taon tavera atu lara la rongo la hinau sei, řomira la sopo sakele. <sup>9</sup> La tamlohi aulu atu matan taon tavera atu lara la lavi na mania mata volituhu non Jason peresi la vorai kalesia tinapua atu moiso, la tinařihira.

### *Paul Enia Silas La Kakau Berea*

<sup>10</sup> Hin vutepongi atu purongo, kalesia la řule Paul enia Silas la malue la vano Berea, ale lara la pala atu, la vano la unu na ima lotu nona Jew. <sup>11</sup> Ale Jew matan Berea enira tamlohi ale lelevosahi, la jeula haratu Thessalonica, matan la lo opoia jea vara la tapurongo hin retisohai atu na rani hatehateahi, ale la lo kilau usuri mamahuni na Retitapu matan vara la hitea vara mo sohena teni mo vono. <sup>12</sup> Ale matana, vao tavera isara la rasua peresi na mara Greek aulu hai lamane peresi na hařai. <sup>13</sup> Pani Jew matan Thessalonica lara la rongoa vara Paul mo lo retivujavujangi na retisohai mata reti non God Berea, la mai ea sohena, ale la vai na vao matea matan vara la vai na řomi tamlohi la sati. <sup>14</sup> Ale vahatea purongo la vorai kalesia atu la řule Paul mo sivo na tasi, pani Silas enia Timothy la lo toho atu Berea.



<sup>15</sup> La haratu la lo tiroma hin Paul la lavia mo sivo la tikeli Athens, ale Paul mo vereia isara mara la vere Silas enia Timothy la sinai isana vila, ale la vorai kalesia atu la malue la sahe matara.

*Paul Mo Retivujavujangi Athens*

<sup>16</sup> Ale na rani Paul mo lo saovira Athens, ņomina mo jovi tavera matan mo hite taon tavera atu mo maņivi na tamasi. <sup>17</sup> Ale mo lo vano na ima lotu nona Jew vara i retivujavujangi isara peresi na tamlohi ņoņoha sei la lo lotu God ea, ale na rani hate-hateahi mo lo vujangi na vao tamlohi sei la lo toho na jara maket.

<sup>18</sup> Ale Paul mo mele so-rasora peresi na tamlohi hai la lo usuri na vujangi non Epicurus peresi hai non Zeno sei la tovira Stoic,\* ale hai la lo usia lara, "Tamlohi rongorongono vono nike mo lo vere na sava nahai?" Tatuara lara, "Vara o tapurongo usuria, o pa hitea sohena vara mo lo vujangi na rasua paro matea." La pa vereia sohena matan Paul mo lo retivujavujangi na Retifuhu matan Iesu peresi na nona sauteterahi. <sup>19</sup> Ale la lavi Paul la vano na council nora sei hijana Areopagus,† lara, "O eņi vereuli kamam hin vujangi paro akerihi sei ko lo retivujavujangia? <sup>20</sup> Matan ko lo vere na hinau paro hai

nahai na peromam, ale kama opoia vara kama levosahi na ņaramira." <sup>21</sup> Mara Athens peresi na tamlohi mara jara tinatinapua sei la lo toho atu, tarea la lo opoia vara la lo sorahi na ņomņomi paro sei la pa pala purongo.

<sup>22</sup> Ale Paul mo turu na naho vao matan Areopagus atu ale mara:

"Mara Athens, na hitea vara kamim ka ņilangi na sava ka lo rasua, <sup>23</sup> matan nara na lo hahau ņalihi, ale na hite na nomim hinahinau mata lotu, ale na mele hite na uliuli matea mo lo toho na votavota vara,

**Isana god matea  
kama sopo levosahia**

Matan haratu a pa retivujavujangi kamim hin God atu sei ka lo lotua pani ka sopo levosahia.

<sup>24</sup> God atu sei mo vai na varama peresi na hinau tari hinia enia Moli matan na tuka peresi na varama, ale mo sopo toho na ima lotu sei tamlohi la lo vaira na limara, <sup>25</sup> teni tamlohi la sopo volitusi isana na limara sohena vara enia mo opoi te hinau isara, pani enia natu mo sile na mauri peresi na maromaro peresi na hinau tari isana tamlohi tari. <sup>26</sup> Ale na tamlohi matea mo vai na tamlohi mara jara tinatinapu tari vara la toho na jara tari na varama, mo tau na nora rani ale mo tau na jara sei

\* **17:18:** Epicurus / Zeno: Epicurus enia Zeno la vujangi na nora kilakilau mata mauri isana tamlohi. Ale hai la usurira, la haratu la lo usurira la lo vereia vara enira la tamlohi lelevosahi. Hija tamlohi usuri non Epicurus enia Epicurean, ale hija tamlohi usuri non Zeno enia Stoic. † **17:19:** Areopagus: Council akerihi enia mo lo kilau usuri na vujangi tari la lo unu Athens peresi na tamlohira.

vara la pa toho ea, <sup>27</sup> matan vara la pa ale God, ale la pa tarongo ale vara la tapaia, pani enia mo sopo toho asau hiniŕa hatehateahi. <sup>28</sup> Matan hinia, enŕa ŕa lo mauri, ŕa lo vavahinau ale ŕa lo toho, sohena nomim tamlohi lelevosahi hai la vereea moiso lara, 'Matan enŕa sohena enŕa taniaana.'

<sup>29</sup> Ale matan enŕa sei ŕa natun God, ŕa pa sopo ŕomŕomia vara God enia hinau matea la vaia na gold teni silver teni vatu, teni te niniu tamlohi la vai mamahunia usuri na ŕomira. <sup>30</sup> Matan haratu, hina purongo vara God mo lo kilau purongoi la haratu la lo toho na mauri ŕoŕoha, pani nake, mo lo retileu vara tamlohi tari na jara tari vara la pa vahari na nora hehe, <sup>31</sup> matan enia mo tau na rani matea moiso vara i pa ari na varama usuri na nona posposi tataholo jea na lima tamlohi matea enia mo viŕonia, ale mo vujangia mo memera isana tamlohi tari hin haratu mo sauteterahia na mateia."

<sup>32</sup> Ale lara la rongo na retireti matan sauteterahi atu, hai la tapulo vaivaia. Pani hai lara, "Kama pa mele tapurongo isam matan la hinau akerihi hin te rani."  
<sup>33</sup> Ale Paul mo malue na naho tamlohin Areopagus atu. <sup>34</sup> Pani tamlohi hai la usuria ale la rasu na sava mo lo verera. Vonara matea hijana Dionysius, enia tamlohi matea hin council tavera atu Areopagus, ale haŕai matea hijan Damaris, ale mele tamlohi tinapua hai

peresira.

## 18

*Paul Mo Tapai Priscilla Enia Aquila*

<sup>1</sup> Hitahun haratu, Paul mo malue Athens mo sivo Corinth. <sup>2</sup> Ale mo tapala peresi na Jew matea hijana Aquila mara Pontus matea sei mo pa tai Italy purongo peresi narouna Priscilla, matan Claudius, supe matan Rome, mo retileu vara Jew tari la malue Rome, <sup>3</sup> ale matan Paul, enia nona voko mo sohera la lo vai na tent, ale mo lo toho peresira mo lo voko peresira.

<sup>4</sup> Ale na Sabbath hatehateahi, Paul mo lo retivu-javujangi isana Jew peresi na mara Greek na nora ima lotu ale mo lo vaihitea vara la levosahia vara Iesu enia hare.

<sup>5</sup> Silas enia Timothy lara la tai Macedonia la pala, Paul mo tau vevuhi na nona rani mata retivujavujangi na reti non God, ale mo lo vereulia isana Jew tarea vara Iesu enia Kristo atu la lo kilau matana. <sup>6</sup> Pani Jew lara la ŕohu hinia, ale la verelejeleja. Paul mo vai na tovongi matea mo vujangi na nona ŕohu hinira hin haratu mo saŕsaŕhi naŕihi na tangotango na nona ruru ale mara, "Raemim i pa toho na patumim, mo sopo te noku hinau hinia! Mo tapulo nake, a pa vano isana tamlohi ŕoŕoha!"

<sup>7</sup> Moiso, Paul mo malue hin nora ima lotu atu mo vano mo unu na ima matea mo lo

toho na pahisan ima lotu atu, enia iman Titius Justus, tamlohi řořoha matea pani enia mo lo lotu God. <sup>8</sup> Pani Crispus, tamlohi aulu mata ima lotu atu, enia peresi na vao imana sohena la rasu Moli. Mara Corinth tinapua hai sei la rongo hinau atu, la rasua, ale la lavi na paptijo sohera.

<sup>9</sup> Ale Moli mo vujangi Paul na hinau matea sohena mavuho matea hin vutepongi atu, mo vere isana mara, "O sopo matahu, o retireti, o sopo puni na jingom, <sup>10</sup> matan enau na lo toho peresiho, ale tea i sopo efi tikeli na epem vara i komoho, matan noku tamlohi hin taon tavera nike la mařivi." <sup>11</sup> Matan haratu, Paul mo lo toho atu mata tauni matea vitu mo limarave, mo lo vujangi na reti non God isara.

### *Paul Mo Turu Na Nahon Gallio*

<sup>12</sup> Ale hin rani atu Gallio mo lo aulu hin Achaia, Jew la pulutahi jara matea la vai na vao tavera matea, ale la turuleji hin Paul, la taurilatia la vaia mo turu na naho jara aria vara la aria <sup>13</sup>lara, "Tamlohi akerihi mo lo vere isana tamlohi vara la lotu God na malele matea mo sopo usuri na posposi sei leu non Moses mo lo vere."

<sup>14</sup> Paul mo tatamahu vara i pa retireti pani Gallio mo vere isan la Jew atu mara, "Vara hinau akerihi enia mata tope na leu matea, teni matan te vařen sasati, i pa tataholo vara a tapurongo isamim Jew matana, <sup>15</sup> pani

matan enia mata nomim retireti peresi na hija tamlohi peresi na nomim leu, kamim purongo ha vai tataholoia. A pa sopo ari na hinau sohena."

<sup>16</sup> Ale mo vai na nona tamlohi la sohai nařihira na nona jara aria. <sup>17</sup> Ale vao atu la taurilati Sosthenes, tamlohi aulu mata ima lotu nona Jew, ale la tapulo tamajia na naho jara aria atu purongo, pani Gallio mo sopo kilaura hinia.

### *Paul Mo Mele Vano Antioch Matan Syria*

<sup>18</sup> Paul mo mele toho Corinth mata rani matuvana moiso natu mo vere enřa vuho isana vorai peresi na vevorai kalesia atu. Ale mo vele na boti matea peresi Priscilla enia Aquila matan vara la vano Syria. Paul mo hiri nařihi na vuluna hin rani atu la pa lo toho Cenchreae mata vujangia vara mo vai vevuhi na nona retitauhi. <sup>19</sup> Na rani la pala Ephesus, Paul mo tinařihi Priscilla enia Aquila la pa lo toho atu. Ale enia mo sahe mo unu na ima lotu nona Jew, ale mo retivujavujangi isara. <sup>20</sup> Mara Ephesus lara la usia vara i toho peravu isara, mo vere isara mara mo vono, <sup>21</sup> pani mo vere enřa vuho isara ale mara, "Vara na masalon God, a pa mele mai isamim." Moiso la mele vele hin boti atu, la malue Ephesus. <sup>22</sup> Ale lara la hoso Caesarea, Paul mo sahe Jerusalem vara i sile na retioloolo isana vao kalesia ea tiroma, moiso mo pa sahe Antioch matan Syria.

<sup>23</sup> Mo lo toho atu mata makomo rani, moiso mo mele malue mo sahe mo ralihi na jara matan Galatia enia Phrygia vara i vai na tamlohi usuri hin la jara atu la mele rilangi.

### *Apollos Mo Tapulo Na Nona Vavahinau*

<sup>24</sup> Hin pongi atu Jew matea hijana Apollos mara Alexandria mo pala Ephesus. Ale enia tamlohi sorasora ruhu matea mo levosahi mamahuni na Retitapu. <sup>25</sup> Mo lavi na nona levosahi matan Moli moiso, ale maurina mo lo vujangi na nona avulahi na nona retireti peresi na vujangi tataholo ruhu na hinahina vara ruhu hin Moli, pani nona levosahi mo tikeli na paptijo non John purongo. <sup>26</sup> Mo tapulo na nona retireti na lolo ima lotu nona Jew mo sopo te matahu hinia. Pani Priscilla enia Aquila lara la rongoa, la tovi rofohia vano hasena, ale la vere tataholoi na malelen God isana.

<sup>27</sup> Hitahu, Apollos mara mo opoia vara i sivo Achaia, vorai kalesia peresi na vevorai kalesia la retituetuenia vara i vaia. Ale la uli na leta matea isana vorai kalesia Achaia vara la lavia. Mara mo pala isan la haratu la rasua atu, mo tuenira mo tavera usuri na rom ruhu non Moli, <sup>28</sup> matan mo vilijovjovi vevuhi na rom romi nona Jew na naho tamlohi. Ale mo vujangira usuri na Retitapu vara Kristo atu enia Iesu.

## 19

### *Hatolu Hahau Mata Vavahinau Non Paul*

<sup>1</sup> Ale hin rani atu Apollos mo lo toho Corinth, Paul mo hahau roto na uratan Asia mo pala Ephesus. Ale hin jara atu mo tapai na tamlohi usuri hai, <sup>2</sup> ale mo vere isara mara, "Kamim ka lavi na Tanume Tapu hin rani atu ka tapulo rasua, teni mo vono?"

La raramia lara, "Mo vono, kama sopo lo rongoa vara te Tanume Tapu mo lo toho."

<sup>3</sup> Ale Paul mo vere mara, "Vara sohena, kamim ka paptijo na sava?"

Lara, "Paptijo atu John mo lo vaia." <sup>4</sup> Paul mara, "Paptijo atu John mo lo vaia, enia paptijo mata vahaŋi na hehe, ale mo lo vere isana tamlohi vara la pa tau na nora rasua hin haratu mo lo mai hitahu hinia, enia mo lo vere Iesu sei."

<sup>5</sup> Lara la rongo hinau atu, la paptijo na hijan Moli Iesu, <sup>6</sup> ale Paul mara mo tau na limana hinira, Tanume Tapu mo mai hinira ale la tapulo retireti na leo tinatinapua, ale la lo retimangovi. <sup>7</sup> Korong, enira tupu sangavulu romana mo rua.

### *Vavahinau Non Paul Ephesus*

<sup>8</sup> Ale Paul mo unu na ima lotu nona Jew, ale mo retivujavujangi mo sopo te matahu isana mata vitu mo tolu. Mo vere mamahunia vara mauri atu God mo aulu hinia mo sohena sava, ale mo vaira la hitevosahi na nona vujangi matan mauri atu. <sup>9</sup> Pani

tatuara la lo turu řilangi na řomira hasera, ale la řohu vara la rasu. La verelejeleji rasua atu na naho tamlohi. Ale Paul mo malue mo lavi la tamlohi usuri atu peresia. Na rani hatehateahi la lo pulutahi na ima matavuhi matan Tyrannus, ale mo lo retivujavujangira ea. <sup>10</sup> Paul mo vaia sohena mata tauni mo rua matan haratu tamlohi tari sei la lo toho Asia, Jew peresi na tamlohi řořoha, la rongo na reti non Moli.

*La Natun Sceva Atu Mo Limaravrua*

<sup>11</sup> God mo lo vai na mata-mata taverna tinatinapua na liman Paul. <sup>12</sup> Ale matana, hina purongo vara te ruru kamoti teni ruru mata voko purongo la tia na huřin Paul, ale vara la lavira la vano isana tamlohi rojoa, mo vai na nora rojoa la tihai, ale tanume sasati la malue hinira.

<sup>13</sup> Ale pani Jew hai sohena, la lo titiu nařihi na tanume sasati na taon la lo vano hinira, pani la vaihitea vara la vaia na hijan Moli Iesu isan la haratu sei tanume sasati la lo toho hinira, ale la vereahen harihi lara, "Na lo retileu řilangi isam na hijan Iesu sei Paul mo lo retivujavujangia vara o malue!" <sup>14</sup> Vorai mo limaravrua la natun Jew matea hijana Sceva, enia mo lo hase vereahen vara enia pris aulu matea, enira natu la lo vai la hinau nike. <sup>15</sup> Pani lara la vaia, tanume sasati matea mo řaramira mara, "Na levosahi Iesu, ale na levosahi Paul makomona, pani kamim sava tamlohi

hin kamim?" <sup>16</sup> Pa tamlohi atu sei tanume sasati mo lo toho hinia mo kue matara mo hamajira vavano la levosahi, ale la hitea sohena la sopo efi mele vai te hinau, la turu la maro la rovo malamala, pani la loso na řaera la vano.

<sup>17</sup> Jew tari peresi na tamlohi řořoha tari Ephesus la rongo sorasora akerihi, ale mo vaira la matahu enira mo isoiso. Ale hijan Moli Iesu mo lavi na hasohaso taverna matana. <sup>18</sup> Matuvana hin la haratu sei la rasu Iesu, la sinai la turu nahonaho, la taviti na sava hehe la vaira. <sup>19</sup> Vao taverna sei la lo mahumahu, la lavi na nora puku mata mahumahu la takonahira jara matea, ale la sulira na naho tamlohi tari. Lara la evi na volin la puku atu hatehateahi, evira mo isoiso mo tataholo na volvoli mata voko mata rani mo tari vaha ngavulu lima (50,000). <sup>20</sup> Matan haratu, retisohai hin Moli mo ulua, ale suihana mo posi na mauri tamlohi matuvana.

*Tamlohi Lotulotu Vono La Mai Jara Matea*

<sup>21</sup> Hitahun la hinau atu, Paul mo tau na řomina vara i sivo Jerusalem, ale vara i hahau roto Macedonia enia Achai. Mo vereahen mara, "Vara na sivo atu moiso, na opoia vara a vano a hite Rome." <sup>22</sup> Mo řule na nona tamlohi tuetueni mo rua, Timothy enia Erastus la vano Macedonia, pani enia mo mele toho atu Asia mata makomo rani.

<sup>23</sup> Hin la rani atu patumasa taverna matea Ephesus mo pala mata rasua hin Iesu.

24 Mo tapulo na tamlohi matea hijana Demetrius, enia tamlohi matea mo lo vai na tamasi varihi mata nora Temple sei la tovia Artemis na silver. Ale enia peresi la haratu la lo vaira, la lo vai na mania tavera matana. 25 Mo tovi matavuhi la tamlohi atu peresi la haratu la lo vavahinau na hinau mariviti i sohera, ale mara, “La tapala, ka levosahia vara noŋa mauri tavitavi mo lo mai na noŋa vavahinau. 26 Ale ka hitea ale ka rongoa vara Paul akerihi natu, mo lo vai na tamlohi vao tavera la lo rasua, ale nake la lo vahari hin noŋa god Artemis, matan mo lo vere a isara mara god sei tamlohi la lo vaira na limara purongo, la sopo god varaŋuhu, ale mo sopo vujangia nike Ephesus purongo, pani na jara tari Asia sei mo lo vano ea. 27 I pa sopo sati purongo na noŋa vavahinau mata tavitav, pani matan tamlohi la pa ŋomŋomi purongo na temple non god haŋai aulu sei Artemis, enia peresi na tamlohi na jara tari Asia peresi na varama sei la lo lotua, la pa rongo i sati matan hijana mo jovi.”

28 Lara la rongoa la lolokoru patura, ale la tapulo ngara lara, “Artemis nona mara Ephesus enia mo aulu jea!” 29 Taon tavera atu mo maŋivi na uloulo, ale vao tavera atu la maro la vano na nora jara tavera mata matavuhi, la lo reve tahitahi Gaius enia Aristarchus, tamlohi mo rua mara Macedonia sei la lo usuri Paul na nona

hahau. 30 Pani Paul mara mo opoia vara i unu hin jara matavuhi tavera atu, tamlohi usuri la horoa. 31 Mo sopo enira purongo pani tapalan Paul hai sohena, enira tamlohi aulu matan jara atu Asia, ale la sohai na retisoŋai matea isana la usia ŋilangi vara i sopo unu hin jara matavuhi atu.

32 Hin matavuhi atu, tamlohi hai la lo ngara mata hinau matea, hai la ngara na hinau tinapua matan matavuhi atu mo vaore hajavua, ale matuvana la sopo levosahia vara la lo matavuhi mata sava. 33 Tatuara hin vao atu la ŋomŋomia vara enia matan Alexander, matan Jew hai la sohaia mo sahe na nahon matavuhi atu. Ale Alexander mo lo tahe na limana matan mo opoia vara i vere mamahunia na nahon vao atu, vara hinau nike Jew la sopo vaia. 34 Pani vao atu lara la hitea vara enia Jew matea, la mele tapulo uloulo, ale la taurilati uloulo atu mata aoa mo rua lara, “Artemis nona mara Ephesus enia mo aulu jea!”

35 Ale hitahun haratu, tamlohi tavera matan taon atu mara mo vaira la toho malum mo vere mara, “Mara Ephesus, sava tamlohi natu mo sopo levosahia vara taon matan Ephesus mo lo kilau mamahuni na temple non Artemis aulu peresi na vatuna sei mo jovi na tuka? 36 Matan la hinau atu tea i sopo eŋi halu hinira, mo ŋuhu jea vara ha toho malum ha sopo rongorongono vono! 37 Matan ka lavi la tamlohi

nike la sinai nike, la sopo tamlohi mata vavanaho na temple teni la lo retisatihi noŕa god haŕai. <sup>38</sup> Ale, vara Demetrius peresi la haratu la lo vai voko akerihi, la rongo mo sati matan tea, ima aria mo lo roi, ale tamlohi aria la lo toho purongo, mo ŕuhu vara la usuri na malele leu ea. <sup>39</sup> Pani vara ka mele opoi te hinau aulu hinia, ha pa vai tataholoia na noŕa matavuhi tavera hitahu. <sup>40</sup> Matan vara i vono, tamlohi tavera matan Rome, la pa sile na talai isan matavuhi tavera nike matan mo vaore hajavua, ale mo sopo te retireti ŕuhu tea i eŕi vereea matan matavuhi nike.” <sup>41</sup> Mara mo vere la hinau atu mo isoiso, mo ŕulera la mule.

## 20

### *Paul Mo Mele Vano Macedonia Peresi Greece*

<sup>1</sup> Matavuhi tavera atu mara mo isoiso, Paul mo tovi na tamlohi usuri la mai jara matea. Ale mo retituetuenira moiso mo vere enŕa vuho isara ale mo malue mo vano Macedonia. <sup>2</sup> Na nona hahau mo lo vano mo retituetueni na kalesia na taon hatehateahi na malelena vavano mo pala Greece. <sup>3</sup> Mo lo toho vitu mo tolu atu, ale Paul mo tatamahu vara i vele na boti matea i sivo Syria, pani matan mo rongoa vara Jew la hatihi moiso vara la pa vai te hinau isana, mo posi na ŕomina ale mo mele sahe mo hahau roto Macedonia.

<sup>4</sup> Tamlohi hai la lo usuri Paul sohen: Sopater mara Berea natun Pyrrhus; Aristarchus enia Secundus mara Thessalonica, Gaius

mara Derbe; Timothy, Tychicus enia Trophimus matan Asia. <sup>5</sup> La tamlohi nike la vano Troas tiroma vara la lo saovi kamam ea. <sup>6</sup> Rani mata Passover la vano moiso, kama vele na boti matea Philippi, ale kama maro na tasi mata rani mo lima moiso, ale kama pa hoso isara Troas. Kama lo toho atu mata rani mo limaravrua.

### *Paul Mo Mele Vano Troas*

<sup>7</sup> Na Sunday, kamara kama pulutahi jara matea mata hanhani non Moli, Paul mo tapulo vujangi na tamlohi, pani matan mo tau na ŕomina moiso vara i mele rani sahe i pa malue, mo vujangira vavano mo livuha vutepongi. <sup>8</sup> Kama lo sakele na jara matea mo aulu makomona na lolon ima atu kama lo toho hinia, ale lamu matuvana la lo hani hin jara atu, <sup>9</sup> ale uluvou matea hijana Eutychus mo lo sakele na windowa matea, ale mo lo tapulo juruvi ŕomaliho, matan Paul mo retireti mo peravu. Ale mara mo juruvi ŕomaliho hin jara atu sei mo aulu sohena ima mo tolu, mo jovi sivo na lepa mo mate. <sup>10</sup> Pani Paul mo sivo isana mo rautoho, ale mo tapea na limana ale mara, “Ha sopo matahu, mo lo mauri.” <sup>11</sup> Moiso Paul mo mele vele sahe aulu hin jara atu, ale mara mo tope na pereti ale la hania moiso, mo mele tapulo retireti peresira vavano mo rani, moiso mo malue isara. <sup>12</sup> Ale la lavi uluvou atu mo mule, ale la avulahi tavera matan mo lo ŕuhu purongo.

*Patu Tamlohi Kalesia  
Matan Ephesus*

<sup>13</sup> Kama vano tiroma na boti ale kama malue kama sivo Assos, matan vara kama pa tapai Paul ea, matan enia mo vere a mara i pa hahau purongo i sivo atu, ale kama pa lingia atu. <sup>14</sup> Kamara kama tapai Paul Assos, mo vele na boti kama sivo Mitylene. <sup>15</sup> Kama malue atu ale mo mele rani sahe kama tikeli Chios, mo mele rani sahe kama pala Samos, ale mo mele rani sahe, kama tikeli Miletus.

<sup>16</sup> Matan Paul mo opoia vara i jeu Ephesus matan vara i sopo mele toho matan te rani atu Asia matan mo lo vaivila vara i sivo Jerusalem tiroma moiso i pa rani mata Pentecost. <sup>17</sup> Kama hoso Miletus ale Paul mo sohai na retisohai matea isana patu tamlohi mata vao kalesia Ephesus vara la sinai la tapai atu.

<sup>18</sup> Lara la pala mo vere isara mara, "Kamim ka levosahi na mauriku hin rani atu na lo toho peresi kamim mo tapulo hin rani atu na tau na paloku Asia. <sup>19</sup> Na volitusi non Moli na posposi romatano peresi na tangi ale peresi na rani rilangi sei la mai isaku na sava Jew la hatihia matakau. <sup>20</sup> Pani ka levosahi mamahunia vara hin la rani atu na sopo turu juha na noku retivujavujangi isamim matan te hinai sei vara i eri tueni kamim hinia. Ale na sopo turu juha hin te hinai na noku vujangi isamim na naho vao tamlohi teni na lolo ima hatehateahi, <sup>21</sup> ale na lo

retivuhesi isana Jew peresi na tamlohi ro-roha mata vahafi na hehe la mai isan God na rasua hin no-ra Moli Iesu.

<sup>22</sup> Ale nakerihi, Tanume Tapu mo lo sohaiu vara a sivo Jerusalem, ale na sopo levosahi na sava i pa masese isaku atu, <sup>23</sup> pani Tanume Tapu mo pete retiroa-roahaiu hinia moiso na taon tari sei na lo vano ea vara ima rilangi peresi na noku tipahi la lo saoviau ea. <sup>24</sup> Pani mauriku i pa sopo ruhu matan te hinai isaku vara a sopo vai vevuhi na sava Moli Iesu mo taua na limaku, enia vavahinau sei mata vereuli na Retiruhu mata rom-ruhu non God.

<sup>25</sup> Ale nakerihi na lo vere tataboloia kamim hinia vara i pa sopo te vonamim hatea sei na lo hahau ralihi na lo retivujavujangi mauri atu God mo aulu hinia isana, i pa mele hiteau. <sup>26</sup> Matan haratu, na lo vere a vara mo sopo te noku hinai hinia na raemim. <sup>27</sup> Matan na sopo turu juha vara a sopo vereuli kamim na rom-romi tavera tari non God.

<sup>28</sup> Ha hase kilau mamahuni kamim peresi na vao kalesia sei Tanume Tapu mo vai kamim ka aulu hinira, vara ha tiroma na vao kalesia non God sei mo volira na raena. <sup>29</sup> Na levosahia, vara a malue isamim, tamlohi sasati sohena viriu jala la pa mai isamim, la pa komo na vao kalesia, ale la sopo eri rom-romira. <sup>30</sup> Mo sopo haratu purongo pani na lolomim tatabolo te tamlohi la pa turu la vujangileji na retivarafuhu matan vara la



pa lavi te nora tamlohi usuri isamim. <sup>31</sup> Matan haratu, ha pa sopo peka, ha lo řomřomia vara, mata tauni mo tolu, tarea na lo retiřoãoahai kamim hatehateahi peresi na wai matakū.

<sup>32</sup> Ale nakerihi, na lo tau kamim na liman God matan vara ha pa sile na retisohai mata nona řomřuhu. Retisohai nike i eři tueni kamim vara ha řilangi, ale i sile kamim na koruna peresi la haratu sei God mo tapuhira.

<sup>33</sup> Ka levosahi mamahunia vara na sopo usi tea hin te sil-ver, gold teni ruru. <sup>34</sup> Kamim ka levosahi mamahunia vara enau peresi la haratu sei la toho peresiau, kama lo hanhani na masumasuku purongo. <sup>35</sup> Na noku tovongi na lo vujangi kamim hinia vara, vara ha lo vavahinau ha pa tueni la haratu la sopo řilangi, ale ha řomřomi na reti non Moli Iesu sei enia hasena mo vereã mara, 'Avulahi tãvera i pa vano isan haratu sei mo lo silea mo jeu haratu mo lavia.' "

<sup>36</sup> Mara mo vere la hinãu atu moiso, mo papaohi sivo atano peresira ale mo usi. <sup>37</sup> Enira mo isoiso la tapulo tangi aulu, la raho Paul ale la pungosia, <sup>38</sup> řomira mo pa sati jeã matan mo vereã mara la pa sopo eři mele hiteã, moiso la usuria la sivo vara la tauã na boti.

## 21

### *Paul Mo Sivo Jerusalem*

<sup>1</sup> Kamara kama tinařihira, kama malue vano na tãsi, ale kama sivo tataholo na

ureuren Cos, ale mo mele rani sahe kama pala Rhodes, ale kama malue atu kama hoso Patara. <sup>2</sup> Hin jara atu kama tapai na boti mateã, mo tatamãhu vara i sivo Phoenicia, kama vele hinia ale kama malue vano na tãsi. <sup>3</sup> Kama kilãu vano na ureuren Cyprus mo lo sale vara i tihãi na maraumã, ale kama lo sivo Syria, ale kama hoso Tyre matan boti atu i pa tinařihia na nona lavlãvi atu. <sup>4</sup> Ale kama ale na tamlohi usuri hin jara atu ale kama hitera, kama lo toho peresira mata rani mo limarãvruã. La lo řarea isan Paul lara Tanume Tapu mo vereã isara vara i sopo tau na palona Jerusalem. <sup>5</sup> Mo turu tetelehi na rani vara kama pa malue na boti, enira mo isoiso peresi na naroura, na natura, la usuri kamã kama malue hin taon tãvera atu, ale kamara kama papaohi na oneone kama usi. <sup>6</sup> Kama vere enã vuho isara hatehateahi moiso kama vele hin pa boti, ale enira la mele mule.

<sup>7</sup> Kama mele tapulo na nomã hãhãu atu Tyre kama sivo kama hoso Ptolemais, ale kamara kama tulãhi na vorãi kãlesia peresi na vevorãi kãlesia atu moiso, kama lo toho peresira mata rani mateã. <sup>8</sup> Mo mele rani sahe, kama malue kama sivo kama hoso Caesarea, ale kama unu na iman Philip. Enia evangelist mateã, enia deacon mateã hin la haratu mo limarãvruã, ale kama lo toho peresia. <sup>9</sup> Venãtuna mo vati la sopo lo lahi, ale la lo

retimangovi.

<sup>10</sup> Kama lo toho atu mata rani mo visa moiso, pŕovet matea hijana Agabus mo tai Judea mo sinai. <sup>11</sup> Mo mai isamam, mo lavi na otin Paul, mo liho na limana peresi na palona hinia ale mara, "Tanume Tapu mo verea mara, 'Hin malele akerihi natu, Jew matan Jerusalem la pa liho tamlohi atu sei otina nakerihi, ale la pa taua na lima tamlohi ŕoŕoha.'" <sup>12</sup> Kamam peresi la haratu la lo toho atu, kama rongo hinau atu sohena, kama verea ŕilangi isan Paul vara i sopo sahe Jerusalem.

<sup>13</sup> Moiso Paul mo verea mara, "Ka lo vai na sava nahai? Matan nomim tangi mo lo vaiau na lo rongo mo sati! Matan enau na tatamahu moiso vara la pa lihoau, ale vara a mate Jerusalem mata hijan Moli Iesu."

<sup>14</sup> Ale matan kama sopo eŕi horoa, kama sopo mele vere te hinau pani kamara, "Ra pa usuri na masolon Moli purongo."

### *Paul Mo Kakau Jerusalem*

<sup>15</sup> Hitahun la rani atu, kama tatamahu, ale kama sahe Jerusalem. <sup>16</sup> Tamlohi usuri mara Caesarea hai la usuri kamam, ale la lavi kamam la tau kamam na iman Mnason mara Cyprus, enia mo mai tamlohi usuri tuai moiso. <sup>17</sup> Hin rani atu kama pala Jerusalem, vorai peresi na vevorai kalesia la lavi kamam na avulahi tavera.

<sup>18</sup> Mo mele rani sahe, Paul mo usuri kamam kama vano vara kama hite James peresi na vajiaha aulu na vao kalesia atu sei la lo toho atu. <sup>19</sup> Ale Paul mara mo sile na retioloolo isara moiso, mo tapulo vereuli mamahuni na hinau tari God mo vaia isana tamlohi ŕoŕoha na nona vavahinau. <sup>20</sup> Lara la rongoa la hasohaso God moiso, la verea isana lara, "Ko levosahia vorai vara Jew mo tari vaha visa moiso la tau na nora rasu hin Iesu pani la pa lo turu ŕilangi na leu non Moses. <sup>21</sup> Ale la rongoa moiso vara ko lo verea isana Jew tari sei la lo toho na jara tamlohi ŕoŕoha vara la sopo mele usuri na leu non Moses, ale ko verea isara vara la sopo taiŕalihi na natura teni vara la sopo usuri na posifa matan tuai. <sup>22</sup> Vara mo sohena, ŕa pa eŕi vai na sava? La pa levosahia vara ko pala nike moiso.

<sup>23</sup> Ale matana, o pa vai na sava kama pa vere a isam nakerihi: nomam tamlohi tupu vati nahai, la vai na retitauhi isan God moiso matan vara la pa hiri pilopilo, <sup>24</sup> o lavira o vano peresira, o hase onehiho usuri na leu non Moses peresira, ale o voli na nora silesilea matan vara enira la eŕi hiri pilopilo. Moiso tamlohi tari la pa levosahia natu vara sava la lo rongoa matam enira hina purongo matan engko ko lo hahau usuri na leu.

<sup>25</sup> Pani isana tamlohi ŕoŕoha sei la rasua, kama pete sohai na leta moiso peresi na nomam ŕomŕomi

vara la sopo hani na mit sei la silea isana tamasi moiso, ale la sopo inu na ŕae, ale vara la sopo hani te maji sei la punia, ale vara la toho asau na mauri maji.”

### *La Taurilati Paul*

<sup>26</sup> Moiso mo mele rani sahe, Paul mo lavi la tamlohi atu, ale enia mo hase vaia mo vokevoke peresira, moiso mo vano na Temple mo vereuli na isoiso rani mata nora retitauhi mata vokevoke isana pŕis vara la pa sile na malamalai matara hatehateahi.

<sup>27</sup> La rani mo limaravrua atu mariviti vara la isoiso, Jew hai matan Asia la hite Paul na lolo rope Temple. La halu na vao matea matan vara la pa taurilati Paul. <sup>28</sup> La lo uloulo lara, “Tavtavuin Israel! Ha tueni kamam! Tamlohi nike natu mo lo vujangi na tamlohi tari na jara tari vara la ŕohu na noŕa tamlohi, noŕa leu ale jara tapu nike! Aulu hin haratu, mo lavi na tamlohi ŕoŕoha hai la unu na lolo rope Temple, ale mo vai jara tapu nike mo lumihia!” <sup>29</sup> Matan hin rani atu purongo la hite Trophimus, mara Ephesus matea, mo lo toho peresi Paul Jerusalem, ale la lo ŕomŕomia vara mo lavia mo unu na lolo rope Temple.

<sup>30</sup> Ale tamlohi tari hin taon tavera atu la sopo mele sakele malum, ale tamlohi la maro jara matea, la tauri Paul ale la reve tahitahia mo malue na lolo Temple, ale vahatea purongo mataruana la pelati. <sup>31</sup> Ale la pa lo vaihitea vara la vilimateia.

Pani retisohai matea mo tikeli na commander nona tamlohi vuro non Rome vara tamlohi tari la lo vai na vaore rongorongo vono Jerusalem. <sup>32</sup> Vahatea purongo commander atu mo lavi na tamlohi vuro peresi na captain la maro la sivo hin vao atu. Ale vao atu lara la hite commander atu mo mai peresi la tamlohi vuro atu, la sopo mele tamaji Paul.

<sup>33</sup> Moiso pa commander atu mo sinai mo taurilatia, ale mo retileu vara la lihoa na jen mo rua, moiso mo usia vara enia hare ale vara mo vai na sava mo sati. <sup>34</sup> Pani hai hin vao atu la lo ulo na hinau matea, hai la lo ulo na hinau tinapua, ale pa commander atu mara mo levosahia vara i pa sopo eŕi lavuti na retivaraŕuhu matan vaore atu, mo retileu vara la lavi Paul i unu na patu ima mata vuro Jerusalem. <sup>35</sup> Ale lara la mai na jara sevsevuti hin patu ima mata vuro atu, tamlohi vuro la tauri Paul aulu na pilira matan vao atu la lo vaihitea mo ŕilangi jea vara la vilimateia, <sup>36</sup> matan vao tamlohi atu la lo usuria la lo ngara lara, “Ha vilimateia!”

### *Paul Mo Retireti Isan Vao Tavera Atu*

<sup>37</sup> Ale lara la pa lo lavi Paul mo lo unu hin patu ima mata vuro atu, Paul mo vereea isan commander atu mara, “A eŕi vere na hinau matea isam?”

Commander atu mo hutua, mo ŕaramia mara, “Avei, engko ko levosahi na leo mara Greek? <sup>38</sup> Engko mo sopo pa mara Egypt atu sei mo lo

tiroma na vao mata valum naturihi, ale sei mo tiroma na tamlohi mata vili na tamlohi mo tari vaha vati (4000) la vano na jara tano koru?"

<sup>39</sup> Paul mo řaramia mara, "Mo vono! Enau Jew matea mara Tarsus hin Cilicia, enau matan taon aulu atu! O eři tinařihia vara a retireti isan la tamlohi nike?"

<sup>40</sup> Commander atu mara mo tinařihia, Paul mo turu hin jara sevsevuti atu, ale mo tahe na limana isan vao atu, ale lara la toho malum, mo retireti isara na leon tavitavin Israel.

## 22

### *Paul Mo Tapulo Retireti*

<sup>1</sup> Ale Paul mara, "La vorai peresi na vajiaha, ha tapurongo na sava a pa vereea mata noku vavahinau."

<sup>2</sup> Lara la rongoa vara mo lo retireti isara na leon tavitavin Israel, la mele toho malum jea, ale mo vereea mara, <sup>3</sup> "Enau Jew matea, na vora Tarsus hin Cilicia, pani na ulua hin taon tavera nike, na lavi na noku lelevosahi isan Gamaliel usuri na posposi tataholo mata leu nona nořa pua, ale na lo řilangi hin God sohen kamim nahapani. <sup>4</sup> Na lo tipahi na tamlohi hin rasua sei, hai la mate na noku vavahinau, na liho na lamane peresi na hařai na taura na ima řilangi, <sup>5</sup> sohen pñis aulu peresi na tamlohi tari mata council la eři vereea matakū. Na lavi na leta isara matan vara a lavia i vano isana voraiřa Jew, Damascus. Ale na pa lo vano na maleleku matan vara a taurilatira ale a tiroma

hinira la mai Jerusalem vara la lavi na talai nike, <sup>6</sup> ale na pa lo vano mariviti Damascus, korong alo mo posi moiso, ale vahatea purongo, memera tavera matea mo sasari řalihiau. <sup>7</sup> Ale na jovi sivo na lepa na rongō na leo matea mo vereea isaku mara, 'Saul, Saul, mata sava ko lo tipahiau?'

<sup>8</sup> Ale na řaramia nara, 'Tamlohi tavera, engko hare?'

Ale mo vereea isaku mara, 'Enau Iesu pa mara Nazareth atu sei ko lo tipahia!' <sup>9</sup> La haratu la lo toho peresiau la hite memera atu, pani la sopo rongovosahi na leon haratu mo lo retireti isaku.

<sup>10</sup> Ale na usia nara, 'A pa vai na sava Moli?'

Ale Moli mo vereea isaku mara, 'O turu o vano Damascus, hin jara atu la pa vereho na hinau tari sei na viřoniho vara o pa vaira.' <sup>11</sup> Ale matan na sopo mele eři kilau matan memera tavera atu, la haratu la lo toho peresiau la tiroma hiniau na vano Damascus.

<sup>12</sup> Tamlohi matea hijana Ananias, mo lo lotu God tarea usuri na leu, ale Jew Damascus la vereea vara enia tamlohi řuhu matea, <sup>13</sup> mo mai isaku, mo turu na pahisaku ale mo vereea isaku mara, 'Vorai Saul, o mele kilau!' Ale vahatea purongo na kilau sahe na hitea.

<sup>14</sup> Moiso mo vereea mara, 'God nona nořa pua mo viřoniho moiso, vara o pa levosahi na masalona vara o pa hite haratu mo Tataholo Jea, ale vara o pa eři rongō

na retileu matea na jingona,  
<sup>15</sup> matan engko, o pa nona  
 tuetueni isana tamlohi tari  
 na sava ko hitea ale sava ko  
 rongoa. <sup>16</sup> Ale nakerihi, ko lo  
 saovi na sava? O turu, o lavi  
 na paptijo, ale God i pa hoje  
 narihi na nom hehe, o tau na  
 nom rasua na hijan Moli.'

<sup>17</sup> Na rani na mele mai  
 Jerusalem, ale na lo usi  
 na lolo Temple, na hite na  
 hinau matea sohena mavuho  
 matea, <sup>18</sup> ale na hite Moli mo  
 lo vereea isaku mara, 'O vila, o  
 malue Jerusalem vila matan  
 la pa sopo efi lavi na nom  
 vereulia matakū.'

<sup>19</sup> Na vereea isana nara,  
 'Pani Moli, enira hasera la  
 efi vereea vara enau natu, na  
 lo tau la haratu la rasuho  
 na ima rilangi, ale na lo  
 hamajira na ima lotu nona  
 Jew tari. <sup>20</sup> Ale na rani  
 nom tuetueni Stephen mo  
 mate, na lo turu atu na  
 majinga hinia, ale na lo kilau  
 mamahuni na ruru non la  
 haratu la lo vilia.'

<sup>21</sup> Ale mo vereea isaku mara,  
 'O malue Jerusalem, matan a  
 pa ruleho o vano asau rove  
 isana tamlohi roroha!'

*La Ari Paul Na Lolo Patu  
 Ima Mata Vuro*

<sup>22</sup> Vao atu la lo tapurongo  
 hinia mo tikeli reti sei  
 Paul mo vereea mara, 'La  
 haratu la tamlohi roroha.'  
 Ale la ngaruhia lara, "Ha  
 vilimateia! Mo sopo tataholo  
 vara i lo mauri!" <sup>23</sup> La ngara  
 ngara, ale la lo lanarihi  
 na nora ruru peravu, ale  
 la lo pulahi na tangotango  
 aulu na masapa, <sup>24</sup> ale pa  
 commander atu mo retileu

vara la lavia i unu hin patu  
 ima mata vuro atu. Mo  
 vere na nona tamlohi vara  
 la pa rupia na asi maja  
 mata lavi na rarami nona  
 retiusia, matan mo opoia  
 vara i levosahia vara vao atu  
 mo lo ngarahia mata sava.

*Paul Enia Mara Rome  
 Matea*

<sup>25</sup> Lara la rirahi Paul na  
 jara mata tamaji na tam-  
 lohi moiso, Paul mo vereea  
 isana captain mata tamlohi  
 vuro matea mo lo turu na  
 pahisana mara, "Mo tataholo  
 vara ha rupi na mara Rome  
 matea na asi maja matea,  
 pani ka sopo lo aria?"

<sup>26</sup> Pa captain atu mara  
 mo rongoa sohena, mo  
 vano isan nona commander,  
 ale mo vereea isana mara,  
 "Ko levosahi na sava ko lo  
 tatamahu vara o vaia? Matan  
 tamlohi nika enia mara Rome  
 matea!"

<sup>27</sup> Pa commander atu mo  
 mai mo usia isan Paul mara,  
 "O to vereea isaku, varafuhu  
 vara engko mara Rome  
 matea?"

Ale Paul mo raramia mara,  
 "He'e."

<sup>28</sup> Ale commander atu mo  
 raramia mara, "Enau na  
 jalahi na mania tavera matan  
 vara a efi mai mara Rome  
 matea."

Paul mara, "Pani enau, na  
 vora mara Rome matea."

<sup>29</sup> Ale la haratu sei la lo  
 tatamahu vara la pa rupia  
 na asi maja, la turu juha  
 hinia vahatea. Pa patu  
 tamlohi vuro aulu atu mo  
 matahu matan mo levosahia  
 vara Paul enia mara Rome  
 tataholo matea, ale enia natu  
 mo vereea vara la lihoa.

<sup>30</sup> Mo mele rani sahe, ale matan pa patu tamlohi vuro aulu atu mo opoia vara i levosahia i űuhu vara Jew la lo tuvai Paul mata sava, mo uli naűihia ale mo retileu vara moli nona pűis peresi na tamlohi tari mata council matan Jerusalem la mai jara matea. Ale mo lavi Paul ale mo vaia mo turu na nahora.

## 23

### *Paul Mo Turu Na Naho Council Jerusalem*

<sup>1</sup> Ale Paul mo kilau tataholo isana tamlohi hin council atu, ale mara, “La vorai, na mauriku na nahon God mo tikeli nake, űomiku mo sopo kaka hin te hinau.”

<sup>2</sup> Ananias pűis aulu mara mo rongoa, mo vereia mara la haratu la lo turu na pahisana la vojahia na jingona. <sup>3</sup> Ale Paul mo vereia isana mara, “God i pa vojahiho, ko tapnetano! Ko sakele atu vara o ariau usuri na leu, moiso ko lo tope na leu na nom retileu vara la vojahiau.”

<sup>4</sup> La haratu la lo turu mariviti la vereia lara, “Ko űom vara mo tataholo vara o reti isan pűis aulu non God sohen haratu?”

<sup>5</sup> Ale Paul mara, “La vorai, na sopo lo levosahia vara enia pűis aulu. Matan na levosahia vara Retiulia mo vereia vara, ‘Ha sopo vere-sati na nomim tamlohi aulu.’” *Exo 22.28*

<sup>6</sup> Moiso, Paul mo hitea vara sopen vao atu enia Sadducee, ale sopera enira Pharisee, ale mo ulo aulu isana tamlohin council atu mara, “La vorai, enau Pharisee matea, enau

natu Pharisee. Na lo turu na aria matan na lo űomtoho na sauteterahi!”

<sup>7</sup> Mara mo vereia sohena, vasvas matea mo malue isana Pharisee peresi na Sadducee ale vao atu la patumasa. <sup>8</sup> Matan Sadducee la vereia vara mo sopo te sauteterahi, teni te angelo teni te tanume, pani Pharisee la rasu la hinau sei. <sup>9</sup> Ale vao atu la vaore tavera, tamlohi vujangi mata leu na vao Pharisee la turu ale la vereia mo űilangi lara, “Kama sopo hite te hinau i sati isan tamlohi nike. I pa sohena sava vara te tanume űuhu teni te angelo mo lo retireti isana?” <sup>10</sup> Ale commander atu mara mo hitea, mo matahu vara la pa űariűari Paul, ale mo retileu vara nona tamlohi vuro la sivo la lavi naűihia na nora suiha, ale la mele lavia i vano i unu na patu ima mata vuro.

<sup>11</sup> Hin vutepongi atu Moli mo turu mariviti isan Paul ale mo vereia mara, “O sopo matahu! Matan sohena nakerihi ko lo vereuliau nike Jerusalem, o pa vereuliau sohena Rome.”

### *La Hatihia Vara La Pa Vilimatei Paul*

<sup>12</sup> Mo mele rani sahe, vao Jew matea la mai jara matea, la lihora na retitauhi matea vara la pa sopo tikeli te hanhahi teni te wai vavano, la vilimatei Paul. <sup>13</sup> Vao atu sei la vai retitauhi atu mo jeu mo ngavulu vati (40).

<sup>14</sup> La vano isana pűis aulu peresi na vajiahara, ale lara, “Kama liho kamam na retitauhi matea vara

kama pa sopo mele tikeli te hanhani teni te wai vavano kama vilimatei Paul. <sup>15</sup> Ale nakerihi kamim peresi na tamlohi council ha vahaŕule matana isan patu tamlohi vuro aulu atu, vara i lavia i sinai isamim. Ale ha vaia sohena vara ha pa mele kilau usuri mamahuni na nona aria. Ale kama pa tatamahu vara kama vilia na malele, ale i pa sopo eŕi kakau nike.”

<sup>16</sup> Pani natun vetasin Paul mara mo rongoa vara la pa luhu hinia, mo mai mo unu hin patu ima mata vuro atu mo vereulia isan Paul <sup>17</sup> Ale Paul mo tovi na captain matea hin la captian atu mara, “O lavi uluvou nike i sahe isan nom commander, ale uluvou nike i pa vere na hinau matea isana.”

<sup>18</sup> Ale captain atu, mo lavia mo sahe isan nona commander ale mara, “Paul mo toviau mo usiau vara a lavi uluvou nike i mai isam, matan enia mo lavi na retisohai matea vara i pa silea isam.”

<sup>19</sup> Pa commander atu mo tauri na limana, ale mo lavia la sivo enira hasera, ale mo usia mara, “Sava natu ko opoia vara o vereia isaku?”

<sup>20</sup> Mo ŕaramia mara, “Jew la majinga moiso vara pavuho, la pa usiho vara o lavi Paul i sivo na council, vara la pa mele kilau usuri mamahuni na nona aria. <sup>21</sup> Pani o sopo tinafiŕhia vara la haluhaluho matana! Matan tamlohi mo jeu mo ngavulu vati (40) la pa luhu la lo saovia. La lihora na retitauhi matea moiso vara la pa sopo tikeli te hanhani teni

te wai vavano la vilimateia. Ale nakerihi la tatamahu moiso, la lo saovi na nom majinga purongo natu.”

<sup>22</sup> Moiso, commander atu mo ŕule uluvou atu mo mele malue, ale mo vereia isana mara, “O sopo mele vere tea hin hinau akerihi ko vereia isaku.”

*La Lavi Paul Mo Sivo Caesarea*

<sup>23</sup> Moiso, pa commander atu mo tovi na nona captain mo rua, ale mo vereia isara mara, “Ha tatamahuni te tamlohi vuro i ngavulu sangavulu rua (200) vara la sivo Caesarea nohorihhi na matan alo i limaravati na vutepongi, peresi te hos i ngavulu limaravrva (70) peresi na tamlohira, ale peresi te tamlohi vuro mata sari i ngavulu sangavulu rua (200). <sup>24</sup> Ha tatamahuni te hos non Paul vara i pa vele hinia, ale ha lavi mamahunia i sivo isan Felix tamlohi aulu matan Palestine.”

<sup>25</sup> Moiso mo uli leta nike isan Felix mara,

<sup>26</sup> “Leta nike enau Claudius Lysias na lo uli na noku retioloolo mo vano isam Felix tamlohi aulu ŕuhuŕuhu.

<sup>27</sup> Tamlohi akerihi, Jew hai la taurilatia ale la tatamahu vara la pa vilia ale na sinai peresi na noku tamlohi vuro ale kama naŕihia, ale matan na levosahia vara enia mara Rome matea na lo matahia.

<sup>28</sup> Na lavia mo sivo na nora council matan na opoia vara a levosahi mamahunia vara la lo aria mata sava. <sup>29</sup> Na hitaulia vara la lo tuvaia matan te hinau usuri na leu mata nora rasua, pani mo sopo

matan te hināu vara i pa toho na ima rīlāngi teni i mate matana. <sup>30</sup> Pani nara na levosahia vara la lo vai na malele matea vara la pa vili-mateia, na rīlea mo mai nike isam vahatea. Ale na vereā isan la haratu la lo aria vara la pa lavi na nora retiaria sei la lo aria hinia la vereā isam.”

<sup>31</sup> Ale la tamlohi vuro atu la vaiā usuri na nona retileu. La lavi Paul mo sivo Antipatris hin vutepongi atu. <sup>32</sup> Mo mele rani sahe, la tinārihia vara tamlohi vuro na hos purongo la sivo peresia. Ale enira la mele hilu la sahe na nora patu ima mata vuro Jerusalem. <sup>33</sup> La tamlohi vuro na hos atu lara la pala Caesarea, la lavi Paul peresi pa leta atu la silea isan tamlohi aulu atu Felix. <sup>34</sup> Tamlohi aulu atu mara mo evi leta atu moiso, mo usi Paul vara mo tai na sava jara, ale mara mo levosahia vara mo tai Cilia, <sup>35</sup> mo vereā mara, “A pa sileho na masapa vara o retireti hin rani atu vara nom meresahi la pala nike.” Moiso, mo retileu vara la pa pelati horo Paul na jara matea na lolo ima tavera, iman Herod Agrippa.

## 24

*Paul Mo Turu Na Nahon Felix*

<sup>1</sup> Ale rani mo lima la vano moiso, Ananias pa p̄ris aulu atu mo sinai peresi na vaji-aha hai peresi na tamlohi retireti na leu matea hijana Tertullus, ale matan vara la sile na nora retiaria matan Paul isan tamlohi aulu atu Felix. <sup>2</sup> Ale lara la tovi Paul mo sinai

moiso, Tertullus mo tapulo aria mara:

“Tamlohi aulu Felix, kama lo toho na tamata mo peravu jea na ruhuruhum, ale hina paro rīhu hai la malue na jaramam usuri na nom kilakilau. <sup>3</sup> Kama lo vere la hināu nike na jara tari, ale na malele tari na nomam vere meje. <sup>4</sup> Pani matan vara a sopo mele taurilatihu i peravu, na lo usia isam vara o tapurongo isamam makomona purongo usuri na nom rōm rīhu. <sup>5</sup> Matan kama tapaia vara tamlohi nike enia tamlohi lejileji matea, enia tamlohi matea mo lo vai na tamlohi la lo matavuhi mata vai na hina sati na jara tari Jew la lo toho ea na varama, ale enia patu tamlohi nona vao haluhalu matea la lo tovia lara vao mara Nazareth. <sup>6</sup> Mo sopo haratu purongo, pani kama tauria hin rani atu mo lo vaihitea vara i vai na Temple i lumihā. <sup>7-8</sup> O pa efi tapai na retivara rīhu mata nomam aria isana hasena vara o usia.”

*Paul Mo Raramira*

<sup>9</sup> Ale, la Jew atu sei la lo tapurongo usuria, la tapulo verelejeleja, ale lara hināu tari sei Tertullus mo lo verera la vara rīhu.

<sup>10</sup> Pa tamlohi aulu mara mo tahe na limana vara Paul i efi retireti, Paul mo raramia mara: “Matan na levosahia vara engko ko lo toho sohena tamlohi aria matea matan jara nike tuai moiso mo mai, mo vaiāu na sopo matahu vara a vere na noku retireti. <sup>11</sup> Ale vara ko poia, o pa efi



levosahia vara rani mo sopo lo jeu sangavulu řomana mo rua na sahe Jerusalem mata lotu. <sup>12</sup> La sopo tapaiiau vara a lo vasvas peresi tea teni vara a lo tovi matavuhi na tamlohi matan vara la vai te hina sasati na lolo rope Temple, teni hin te ima lotu hatea teni na malele matan taon tavera atu Jerusalem. <sup>13</sup> Ale la tamlohi nike, la sopo eři pisuhiau hin te hinau hatea hin la hinau nike la lo ariau vara na vaira.

<sup>14</sup> Pani na taviti vara na lo lotu God non nomam pua usuri na malele rasua hara sei la lo vereea vara enia rasua haluhalu matea. Ale na lo rasu na hinau tari sei Moses peresi na pŗovet la ulia na Leu. <sup>15</sup> Enau na lo tau na noku řomtoho isan God sohen la tamlohi nike vara i pa sauteterahi na tamlohi tari, la haratu la tataholo peresi la haratu la sopo tataholo. <sup>16</sup> Matan hinau atu natu, mo lo vaiiau na lo vaihitea tarea vara řomiku i pa sopo kaka hin te hinau isan God teni isana tamlohi.

<sup>17</sup> Tauni mo visa la vano moiso na sopo mele toho Jerusalem, ale na mele sinai ea peresi na otori nona noku tamlohi vara a silea isan la haratu la tilavono, ale vara a sile na noku silesilea mata malamalai, <sup>18</sup> sei na lo vaira hin rani atu la tapaiiau na lolo rope Temple. Na pete vokevoke moiso usuri na nomam posposi, ale mo sopo te vao teni tea i lo vai na valum. <sup>19</sup> Pani Jew hai matan Asia, i pa řuhu jea vara la lo toho akerihi na

nahom nakerihi matan vara la tuvaiiau hin te retiaria matan te hinau sati vara la eři vereea matakū. <sup>20</sup> O to usi la tamlohi nike vara sava hina sati natu, la hitea hiniau hin rani atu na lo turu na nahon council atu, <sup>21</sup> pani hinau matea purongo na ulo na vereea na nahora nara, na lo turu nike na aria nahapani matan na rasu na sauteterahi nona mateia.”

<sup>22</sup> Moiso Felix, matan enia mo levosahi mamahuni na malele nora rasua mo řuhu, mo vereea mara nora masapa mata sile na nora retireti mo isoiso, ale mo vereea isara mara, “Sava rani vara patu tamlohi vuro aulu atu Lysias i sinai nike, a pa sile na noku řomřomi mata nomim aria.” <sup>23</sup> Ale mo retileu vara captain atu, i lo kilau mamahuni Paul na ima tavera atu purongo. Ale vara i sopo horoa na masalona, ale vara i sopo horo na tapalan Paul vara la opoia vara la mai la tuenia.

### *Felix Mo Tapurongo Isan Paul*

<sup>24</sup> Rani mo visa la vano moiso, Felix enia narouna Drusilla sei enia Jew matea, la pala. Ale mo vahařule matan Paul vara la tapurongo hinia vara i verera hin rasua atu hin Iesu Křisto. <sup>25</sup> Ale Felix mara mo rongo Paul mo lo sorahi na mauri tataholo, ale mata hase taurilatihō peresi na rani ari tavera sei mo lo mai, enia mo matahu tavera, ale mara, “O vano tako, ale vara te masapaku a pa mele vahařule matam.” <sup>26</sup> Mo lo tapurongo hinia, pani mo

lo řomtau vara Paul i pa silea hin te mania na haři tamlohi, ale matan haratu, mo vahařule mařana vaha visa vara i mai i sorasora peresia.

<sup>27</sup> Tauni mo rua la vano sohen haratu moiso, natu Porcius Festus mo pete lavi na jaran Felix, pani matan Felix mo opoia vara i vai na Jew la avulahi, mo tau Paul na ima řilangi.

## 25

### *Paul Mo Turu Na Nahon Festus*

<sup>1</sup> Festus mo pala Caesarea ale rani mo tolu tinapua la vano moiso, ale mo sahe Jerusalem. <sup>2</sup> Ale moli nona přiš peresi na tamlohi aulu nona Jew la lavi na nora retiaria hin Paul la vano isana. <sup>3</sup> La usia isana vara i vai na sava la opoia matan Paul, la usi Festus mo řilangi vara i vahařule vara i mai Jerusalem matan la hatihia moiso vara la pa luhu na malele vara la vilimateia. <sup>4</sup> Moiso Festus mo řaramia mara la lo taurilatia Caesarea, ale enia i pa mele sivo atu i sopo tuai. <sup>5</sup> Mo vereea mara, "Ale, mo řuhu vara nomim tamlohi tatavera la sivo atu peresiau, ale vara tamlohi akerihi mo vai te hinau mo sati, la pa eři sile na nora retiaria."

<sup>6</sup> Ale Festus mo mele toho Jerusalem mariviti rani i sangavulu, moiso mo pa sivo Caesarea. Ale mo mele rani sahe mo sakele na jara sakele mata aria, ale mo retileu vara la lavi Paul i mai isana. <sup>7</sup> Paul mara mo pala, la Jew atu sei

la lo tai Jerusalem la lo sinai, la turu řalihia la lo tuvaia na hinau sasati hai sei la sopo eři vujangira vara la varařuhu. <sup>8</sup> Paul mo sile na nona retireti mata horora mara, "Na sopo vai te hinau i sati mata i vaiau a meresahi na leu nona Jew, teni na Temple, teni isana supe matan Rome."

<sup>9</sup> Pani Festus mo opoia vara i vai na Jew la avulahi, mo usia mara, "O pa avulahi vara o sahe Jerusalem vara o turu na aria na nahoku matan la hinau nike?"

<sup>10</sup> Paul mo řaramia mara, "Nakerihi na lo turu na jara tataholo moiso mata aria na naho jara sakele mata ari non supe matan Rome. Na sopo vai te hinau i sati isana Jew sohen engko ko levosahi mamahunia. <sup>11</sup> Vara na vai te hinau mo tataholo vara a mate matana, na sopo řohu na mate. Pani vara na lo vokevoke purongo, engko teni te hatea i sopo eři tauau na liman la tamlohi nike sei la opoia vara la vilimateiau. Na opoia vara a turu na nahon supe matan Rome!"

<sup>12</sup> Festus mo sorasora peresi na nona tamlohi tuetueni sei vara la sile te řomřomi hatea isana, moiso mo řaramia mara, "Ko opoia vara o turu na nahon supe matan Rome, ale isan supe matan Rome o pa vano."

### *Festus Mo Sorahi Paul Peresi Harua Supe Agrippa*

<sup>13</sup> Rani mo visa la vano moiso, harua supe Agrippa mo pala Caesarea peresi vetasina Bernice, matan vara la sile na nora oloolo isan

Festus. <sup>14</sup> Hin la rani atu la lo toho peresia, Festus mo vereuli na sorasora matan Paul isan supe atu matan vara i sile te retireti matana mara:

“Felix mo tau na tamlohi matea mo lo toho na ima řilangi. <sup>15</sup> Na rani na lo toho Jerusalem, moli nona prís peresi na vajiaha nona Jew la vereau hinia, la usiau vara a sile na talai isana. <sup>16</sup> Na vereau isara nara, mo sopo usuri na posposi nona mara Rome vara a sile te tamlohi na talai vara mo sopo lo lavi te masapa vara i turu nahonaho peresira, ale i řarami na retireti non la haratu la lo tuvaia.

<sup>17</sup> Ale hitahuna, la mele usuriau la sinai nike, na sopo mele toho i peravu, pani mara mo mele rani sahe na sakele vara a aria. Ale na tovia vara i mai na nahoku. <sup>18</sup> Pani la haratu la lo tuvaia lara la turu, la sopo tuvai Paul hin te hinau sasati sohen na lo řomřomia. <sup>19</sup> Mo vono, la sopo turu jara matea na nora řomřomi matan te hinau mata nora rasua, ale mata tamlohi matea hijana Iesu sei mo mate, hara sei Paul mo lo vereau vara mo mele mauri. <sup>20</sup> Matan na sopo levosahia vara a pa vileiuli la hinau nike sohena sava, na usia isana vara mo ayulahi vara i sahe Jerusalem ale i pa turu na aria ea. <sup>21</sup> Pani Paul mo opoia vara i lo toho tako na ima řilangi, i lo saovi na řomřomi non nořa tamlohi tavera supe matan Rome. Matan haratu, na retileu vara la lo kilaua i tikeli rani atu a eři řulea i vano isan supe

matan Rome.”

<sup>22</sup> Moiso Agrippa mo vereau isan Festus mara, “Enau na opoia vara a tapurongo hin tamlohi atu.”

Mo řaramia mara, “Pavuho o pa tapurongo isana.”

### *Paul Mo Turu Na Nahon Supe Agrippa*

<sup>23</sup> Ale mo mele rani sahe, supe Agrippa peresi Bernice la mai na nora pohapoha, ale la unu na jara tavera atu mata matavuhi peresi na nora patu tamlohi aulu mata vuro, peresi na tamlohi aulu matan taon tavera atu. Moiso Festus mara mo retileu, la lavi Paul mo unu.

<sup>24</sup> Ale Festus mara, “Supe Agrippa peresi kamim mo isoiso sei ka lo toho peresi kamam nakerihi, ka hite tamlohi nike natu sei tamlohi aulu nona Jew tari la lo usiau mo řilangi Jerusalem peresi nike Caesarea, vara a taua na mateia. <sup>25</sup> Pani na noku kilakilau na hitea vara mo sopo vai te hinau vara i lavi na mateia matana. Ale mara mo opoia vara i turu na nahon nořa tamlohi tavera, supe matan Rome, na majinga vara a pa řulea i sahe isana. <sup>26</sup> Pani na sopo levosahia vara a pa uli na sava isan noku supe matana. Matan haratu, na revea mo sinai na nahomim tari, pani na nahom supe Agrippa, matan vara na isoison retireti akerihi, korong a pa eři lavi te retireti vara a ulia. <sup>27</sup> Matan na hitea vara mo sopo tataholo isaku vara a řule te tamlohi hatea sei mo lo toho na ima řilangi vara la

sopo vere mamahuni na nora tuvai matana.”

## 26

*Paul Mo Sile Na Nona Retireti*

<sup>1</sup> Ale supe Agrippa mo vere a isan Paul mara, “O efi turu natu, o retireti.”

Ale Paul mo turu mo tahe na limana ale mo tapulo retireti mara, <sup>2</sup> “Enau na avulahi jea supe Agrippa matan engko natu o pa tapurongo na noku retireti matan la hinau nike tamlohi tatavera nona Jew la lo tuvaiau hinira.

<sup>3</sup> Matan na levosahia vara engko ko levosahi mamahuni na posposi nona Jew peresi na retiusia sei tamlohi la lo sorahira tarea. Ale matan haratu, na lo usia isam vara o romperavu mata tapurongo isaku.

<sup>4</sup> Jew tari la levosahi mamahuni na mauriku, mo tapulo na lo uluvou peresi na tahisaku tataholo ale na rani na lo toho Jerusalem. <sup>5</sup> Vara la majinga la efi vere a vara enau Pharisee matea, vao matea sei la rilangi jea mata nofa rasua. <sup>6</sup> Ale nakerihi na lo turu na aria, na lo romtoho matan retitauhi atu God mo vaia isana nofa pua vara i masese. <sup>7</sup> Supe Agrippa, noku tamlohi tavera, retitauhi atu natu mo vai la tavitavi tupu sangavulu romana mo rua atu la lo volitusi isan God tarea matana. Matan romtoho atu natu, la Jew nike la lo tuvaiau matana. <sup>8</sup> Mata sava natu, mo rilangi vara tea i rasua vara God mo lo sauteterahi na tamlohi mate?

<sup>9</sup> Varaŕuhu, tiroma enau haseku na levosahi mamahunia vara mo tataholo vara a komo na tamlohi usuri non Iesu mara Nazareth. <sup>10</sup> Ale hinau atu natu, na vaia Jerusalem. Na sopo tau na tapuhi na ima rilangi na suiha na lavia isana moli nona pris purongo, pani na majinga vara la pa vilimateira. <sup>11</sup> Vaha visa na rupira na asi maja matea na ima lotu nona Jew, ale na vaihitea vara la retisati hin Kŕisto. Matan na lo lolokoru sasati hinira, na vano vara a tipahira na taon tavera na jara tinapua sohena.

<sup>12</sup> Na lo vai hinau atu natu hin rani atu na lo sahe Damascus, moli nona pris la sileau na suiha vara a efi vaia, <sup>13</sup> moiso na pa lo toho na maleleku korong alo mo posi noku tamlohi tavera, na hite na memera tavera matea mo tai na tuka, mo mera mo jeu na alo, mo sasari ralihiau peresi la haratu la lo hahau peresiau. <sup>14</sup> Kamara kama jovi sivo na lepa moiso, na rongo na leo matea mo retireti isaku na leomam tavitaviuin Israel mara, ‘Saul, Saul, mata sava ko lo tipahia? Ko lo hasem hotiho!’

<sup>15</sup> Ale nara, ‘Engko hare tamlohi tavera?’

Ale Moli mo vere a isaku mara, ‘Enau sei Iesu haratu ko lo tipahiau. <sup>16</sup> Pani o turu! Matan na pala isam vara a viŕoniho vara engko volitusi matea. Ale o pa vereuli na hinau ko hitera ale hin te hinau a pa mele vujangira isam. <sup>17</sup> A pa juriho isana tavitaviim peresi la tamlohi

řořoha sei na lo řuleho vano isara, <sup>18</sup> matan vara o pa roi na matara vara la pa vahaři na řořoha la mai na malarani, ale vara la malue na suihan Setan la mai isan God matan vara i eři řomi na nora hehe, ale la pa lavi na řungara peresi la haratu sei God mo tapuhira mata nora rasua hiniau.’

<sup>19</sup> Matan haratu supe Agrippa, enau na ololo hin hinau atu Moli na tuka mo vujangia isaku, <sup>20</sup> ale matana, na vereulia isana mara Damascus tiroma, moiso isan la haratu la lo toho Jerusalem ale na jara tari Judea, ale isana tamlohi řořoha matan vara la pa vahaři na nora hehe la mai isan God, ale la vujangia vara varařuhu la posi moiso na nora vavahinau řuhu la lo vaira. <sup>21</sup> Matan hinau atu natu, Jew la tauriau na lolo rope Temple, ale la lo vaihitea vara la vilimateiau. <sup>22</sup> Pani, na lo lavi na tuetueni isan God tarea mo tikeli nahapani, ale na lo turu na lo vereulia isan la haratu la tamlohi purongo, peresi la haratu la aulu, na sopo vere te hinau tinapua, pani haratu purongo sei přořet peresi Moses la lo vereia vara i pa masese; <sup>23</sup> vara Křisto i pa lavi na nona rani řilangi, ale i pa tiroma hin la haratu la turu na mateia sohena malarani matea isana Jew peresi na tamlohi řořoha.”

<sup>24</sup> Vahatea purongo, Festus mo ulo mara, “Paul, nom lelevosahi tavera mo vaiho ko putu!”

<sup>25</sup> Pani Paul mo řaramia mara, “Noku tamlohi tavera Festus, na sopo putu, pani na lo vere na varařuhu na hinau na levosahi mamahunira. <sup>26</sup> Matan supe Agrippa mo levosahi la hinau nike, ale na lo vere la hinau nike isana matan a sopo eři rasua vara enia mo sopo levosahi la hinau nike, matan la hinau nike la sopo masese hin te tavalu jara rihirihi hatea.

<sup>27</sup> Supe Agrippa, engko ko rasu na přořet teni mo vono? Na levosahia vara ko rasura.”

<sup>28</sup> Agrippa mo vereia isan Paul mara, “Ko řom vara o eři vaiau na mai kalesia matea vila sohen harihi?”

<sup>29</sup> Paul mo řaramia mara, “Vara i vila teni mo vono, pani na lo usiusi isan God vara engko peresi la tamlohi sei ka lo tapurongo isaku nakerihi, vara ha pa mai soheku – pani i sopo peresi na jen.”

<sup>30</sup> Moiso, pa supe atu mo turu ale Festus, Bernice peresi la haratu la lo sakele peresira la usuria, <sup>31</sup> ale lara la lo malue, la lo vereverea isara lara, “Tamlohi nike mo sopo vai te hinau vara i tataholo mata i mate matana, teni vara i vano na ima řilangi matana.”

<sup>32</sup> Agrippa mo vereia isan Festus mara, “Tamlohi akერიhi i eři malue purongo vara i sopo lo usia vara i turu na nahon supe matan Rome.”

## 27

*Paul Mo Malue Vara I Sahe Rome*

<sup>1</sup> Lara la hatihia vara kama pa malue matan vara kama sahe Italy, la tau Paul peresi na tatua tamlohi tinapua na ima řilangi na lima captain mata tamlohi vuro matea hijana Julius. Enia mo lo kilau na vao tamlohi vuro matea, ale vao tamlohi vuro atu la lavi na hijan nora supe matea matan Rome tuai sei Augustus. <sup>2</sup> Kama vele na boti matea mo malue Adramyttium sei mo tatamaha vara i pa maro usuri na vusalean Asia, ale kama malue. Aristarchus mara Macedonia matea mo tai Thessalonica mo usuri kamam.

<sup>3</sup> Mo mele rani sahe kama hosu Sidon, ale Julius mo kilau mamahuni Paul na posposi řuhu, ale mo tināfihia vara i eři sahe i hite na tapalana matan vara la eři tuenia na nona vejuveju. <sup>4</sup> Kama mele malue atu kama sivo na tasi, ale kama maro na maumau ureuren Cyprus matan kama lo songai na langin hapuara hařua. <sup>5</sup> Kama maro roto na tasi tavera moiso, kama sahe usuri vusalean Cilicia ale Pamphylia. Ale kama hosu Myra hin Lycia. <sup>6</sup> Hin jara atu captain mata tamlohi vuro atu mo tapai na boti tinapua matea matan Alexandria mo lo sahe Italy, ale mo tau kamam hinia.

<sup>7</sup> Kama maro malum na tasi mata rani matuvana, mo řilangi pani kama mai mariviti Cnidus, pani langin hapuara hařua atu mo horo kamam, kama pa sopo eři mele vano. Ale kama posi

sivo kama maro usuri na maumau ureuren Crete kama jeu na jingon Salmone.

<sup>8</sup> Kama maro usuri na vusaleana, kama lavi na rani řilangi. Ale kama mai na jara matea la tovia Fair Havens, enia mo lo toho mariviti na taon matan Lasea.

*Kama Ori Na Langi Tavera*

<sup>9</sup> Matan rani řuhu mo visa la vano purongo moiso, nomam hahau nakerihi mo pa mele sati jea matan taro hamariri tavera peresi na langi sati matan October mo pala moiso, ale rani mata tapuhoro na hanhani nona Jew mo isoiso tuai moiso. Ale Paul mo vereia isara mara,

<sup>10</sup> “La tamlohi tavera, na hitevosahia vara nořa hahau i pa isoiso na rani sati vara řa malue akerihi nakerihi. Ale mo sopo hinahinau na lolo boti purongo la pa tihai, pani mauriřa sohena.” <sup>11</sup> Pani pa captain atu, mo tapurongo na retireti non captain nona boti atu peresi na tamlohin boti atu, ale mo sopo tapurongo na sava Paul mo lo vereia. <sup>12</sup> Matan jara atu enia mo sopo řuhu vara tea i eři toho atu na taro hamariri teni na taro langi, vaora la hatihia vara la malue atu. La lo řomtaua vara la eři tikeli Phoenix, mo naho sivo Malahařua enia jara matea matan Crete ale jara řuhu mata luhu na langi, ale la pa toho atu na taro hamariri.

*Langi Tavera Mo Vilira Na Tasi*

<sup>13</sup> Langin tahuna matea mara mo tapulo ivi malum, la lo řomřomia vara la pa

eři tikeli Phoenix. Ale kama reve narihi na matalalavo, kama hapahapani usuri na vusalean Crete. <sup>14</sup> Pani mo sopo tuai, langi sati tavera matan Tokalau mo jovi mo malue hin ureure atu mo vili kamam. <sup>15</sup> Boti atu mara mo kali hinia, i sopo eři mele songaia, kama tavuti kama tinarihia mo sere kamam.

<sup>16</sup> Kama sivo kama tikeli na maumau ureuren Cauda. Mo rilangi pani kama taurilati boti rihirihia atu sei boti tavera atu mo lo revea. <sup>17</sup> Tamlohi voko mata boti lara la sau narihia moiso, la talihi na tali na pangen boti tavera atu ale la liholatia. Ale matan la matahu vara langi i pa pulahi kamam kama hoso na rataratan Syrtis, la tuhu na timlen boti atu matan vara i taurilatira, ale la pa sivo malum purongo.

<sup>18</sup> Mo mele rani sahe, matan langi atu mo tapulo rari boti atu, tamlohi voko la tapulo pulahi na lavilavi sivo na lolo tasi. <sup>19</sup> Mara mo mele rani sahe la tapulo pulahi na hinahinaun boti atu peresi te hinau sei la hitera la lo toho toho purongo. <sup>20</sup> Ale matan kama sopo mele hite na alo teni te vitusarasara mata rani matuvana moiso, ale langi atu mo sopo moti, kama sopo mele romtoho vara kama pa juri hinia.

<sup>21</sup> Matan vao tavera la rohu na hanhani, Paul mo turu sahe na livuhara, ale mara:

“La tamlohi, vara ha pa lo tapurongo isaku, vara ra sopo lo malue Crete, ra pa sopo eři lavi na rani rilangi sohen harihi, teni vara ra

pulahi tihai te hinau na tasi. <sup>22</sup> Pani nakerihi, na lo vere kamim hinia vara ha sopo matahu, matan tea i pa sopo eři mate, pani boti akerihi purongo i pa tihai. <sup>23</sup> Matan na vutepongi na hite na angelo matea non God sei enau nona volitusi, mo turu na pahisaku <sup>24</sup> ale mo vere isaku mara, ‘Paul, o sopo matahu! O pa turu na nahon supe matan Rome, ale God mo tinarihia vara tamlohi tari sei la lo toho peresiho la pa mauri.’

<sup>25</sup> Matan haratu, ha romrilangi la tamlohi, matan enau na tau na noku rasua hin God vara i pa sohen haratu mo vere isaku. <sup>26</sup> Pani na levosahia vara boti akerihi i pa takosa hin te ureure hatea.”

### *Boti Mo Mai Mariviti Na Jarauta*

<sup>27</sup> Na sangavulu romana mo vati vutepongi matan langi atu, langi atu mara mo lo pulahi kamam, kama lo sivo roto na tasin Adria. Tamlohi voko hin boti atu la levosahia vara kama lo mai mariviti na jarauta. <sup>28</sup> Matana, la tuhu na asihai ale la hiteulia vara puahana mo tikeli na metre mo ngavulu vati (40). Ale la mele sahe makomona la mele tuhu pa asihai atu, ale la mele hiteulia vara nakerihi natu puahana mo tikeli na metre mo ngavulu tolu moiso (30).

<sup>29</sup> Ale matan la matahu vara kama pa kali hin te paranga, la tuhu na matalalavo mo vati na pulo boti, ale la opoia vara i rani vila.

<sup>30</sup> Moiso tamlohi voko la vaihitea vara la rovo hin boti atu, la tuhu pa boti rihirihi atu, ale lara la lo vaia, o hitea sohena vara la pa tuhu na matalalavo na patun boti tavera atu. <sup>31</sup> Pani Paul mo vereea isan nora captain mata tamlohi vuro atu peresi la tamlohi vuro atu mara, “Vara la tamlohi akerihi la malue hin boti akerihi, ha pa sopo efi juri!” <sup>32</sup> Moiso la tamlohi vuro atu la tai roto na asin pa boti rihirihi atu, la tinafihia mo sale.

<sup>33</sup> Mo pa lo nahonaho rani, Paul mo vereea rilangi isara vara la hani te hinau mara, “Nahapani enia harau wik natu sei ka sopo hani te hinau matan ka sopo levosahia vara ha pa mauri teni mo vono. <sup>34</sup> Matan haratu, na lo vereea rilangi vara ha hani te hinau matan enia i pa tueni kamim vara ha pa sopo mate. Matan te vulun te vonamim hatea i pa sopo efi tihai na patuna.” <sup>35</sup> Mara mo vere hinau atu mo isoiso, Paul mo lavi na pereti ale mo vere meje isan God na nahora mo isoiso matana, mo topea ale mo tapulo hania. <sup>36</sup> Matan haratu, enira mo isoiso romira mo mele rilangi ale la hanhani. <sup>37</sup> Evimam hin boti atu mo tikeli ngavulu sangavulu rua mo ngavulu limaravrua mo limarave (276).

<sup>38</sup> Lara la hanhani la masu, la pulahi na tanga wit mo sivo na lolo tasi matan vara i vai na boti i salesale.

*Boti Mo Kali Na Paranga*

<sup>39</sup> Rani mara mo pala, la sopo hitevosahi jara atu, pani la hite na jara luhu matea peresi na oneone, ale la hatihia vara la efi vaia vara boti atu i hosohinia. <sup>40</sup> Ale la tai roto na asi mata matalalavo sei la lo toho na lolo tasi, ale la uli nafihi asihai atu sei mo lo tauri la stian boti atu jara matea, moiso la tahe na hapanin patu boti atu mo sahe na langi, la haloa mo sahe na oneone. <sup>41</sup> Pani la tia na jara matea tasi mo lo maro leji hinia, ale patun boti atu mo kali na ratarata mo rilangi i sopo efi mele hisu, pani loloputu la lo tapulo kauti na pulo boti moiso.

<sup>42</sup> La tamlohi vuro atu la hatihia vara la pa vilimatei la tamlohi atu mata ima rilangi matan vara tea i sopo olo i rovo. <sup>43</sup> Pani pa captain mata tamlohi vuro atu matan mo opoia vara i juri na maurin Paul, mo horora vara la sopo vai na sava la hatihia moiso. Mo retileu mara la haratu la efi olo la kue nafihi tiroma ale la olo sahe na jarauta, <sup>44</sup> ale sopera la pa lo hitahu, tea la pa keho hin te tavalu tapea teni te hinau i efi sale hin boti atu. Hin malele akerihi natu, tamlohi tari hin boti atu la jelu la sahe na jarauta hinia.

## 28

*La Hosohinia Na Ureuren Malta*

<sup>1</sup> Kama hosohinia na jarauta mo ruhu moiso, kama pa levosahia vara kama lo toho na Ureuren Malta. <sup>2</sup> Tamlohin jara atu la ruhuruhu isamam hajavua, matan mo lo usa



ale hamariri tavera. Ale la avulahi vara la lavi kamam, matan la polo na hapu tavera matea matan vara kama pa marijo hinia.

<sup>3</sup> Paul mara mo rako na oti rangaranga hapu matea, ale mo lo taua na hapu, mata sasati matea mo malue matan hapu atu ale mo katoho na limana. <sup>4</sup> Tamlohin jara atu lara la hite maji atu mo lo keho na liman Paul, la lo vereverea isara lara, “Mo sopo te retiusia vara tamlohi akerihi enia tamlohi vili tamlohi matea teni mo vono, hina purongo vara mo juri na tasi, pani noŕa god haŕai sei Justice, mo sopo tinaŕihia vara i mauri.” <sup>5</sup> Pani Paul mo pulapulahi naŕihi maji atu mo sivo na lolo hapu, ale mo sopo rongō i sati. <sup>6</sup> Pani la tamlohi atu la lo kilau vara epena la pa sosohi teni i pa jovi i mate vahatea. Ale la lo saovi mo peravu moiso ale lara la sopo hite te hinau i vaia, la posi na ŕomira lara enia god matea.

<sup>7</sup> Ale ŕalihi hin jara atu lepa enia non patu tamlohi matan Malta, hijana Publius; ale enia mo avulahi hin kamam, mo lavi kamam mo lo kilau mamahuni kamam mata rani mo tolu. <sup>8</sup> Taman Publius mo rojo mo lo juruvi na vatana. Mo lo rongohaji na seserei peresi na jimajima. Paul mo unu mo sivo mo hitea, ale mo usi isana, moiso mo tau na limana hinia ale mo vai na nona rojoa la tihai. <sup>9</sup> Hinau atu mara mo masese mo isoiso, tamlohi matuvana

hin ureure atu sei la rojo, enira sohena la mai isan Paul ale la mele ŕuhu. <sup>10</sup> Matan haratu, la sile kamam na hinau matuvana, ale kama lo tatamahu vara kama pa mele malue, la sile na hinau tari kama pa vejuveju hinira na boti.

### *Paul Mo Kakau Rome*

<sup>11</sup> Vitu mo tolu la vano moiso, kama pa mele malue sivo na tasi na boti tinapua matea matan Alexandria sei mo lo luhu hin ureure atu. Ale na patuna la tai na patu god mo rua sei la tovara ‘Havo Matan Tuka’. <sup>12</sup> Kama maro kama hoso Syracuse na ureuren Sicily, ale kama lo toho atu mata rani mo tolu. <sup>13</sup> Kama malue atu kama hapahapani kama vano na jara tinatinapua, ale kama sahe kama hoso Rhegium, ale mo mele rani sahe, langin tahuna mo sere, ale na harua rani kama hoso Puteoli. <sup>14</sup> Hin jara atu kama hite na vorai kalesia hai, ale la usi kamam vara kama pa toho peresira, ale kama lo toho atu mata rani mo limaravrua. Kama usuri na malele atu kama hahau kama sahe kama pala Rome.

<sup>15</sup> Vorai kalesia ŕalihi hin jara atu lara la rongoa vara kama lo sahe Rome, la tai Rome la sinai vara la hite kamam. La jara atu la hahau matara la asau ŕove sohen na taon sei Forum matan Appius peresi Ima Mo Tolu atu mata tamlohi hahau. Paul mara mo hitera, mo vere meje isan God ale mo mele ŕilaŕilangi.

<sup>16</sup> Kamara kama unu Rome, la tinaŕihia vara Paul i eŕi toho enia hasena peresi

na tamlohi vuro matea mo lo kilaua.

*Paul Mo Retivujavujangi Isana Jew Rome*

<sup>17</sup> Rani mo tolu la vano moiso, Paul mo tovi na tamlohi tavera nona Jew hin jara atu la mai jara matea. Lara la sakele matavuhi moiso, mo vereea isara mara:

“La vorai, hina purongo vara na sopo vai te hinau i sati isana noŋa tamlohi teni na posposi nona noŋa pua, la taurilatiau Jerusalem ale la tauau sohena tamlohi sasati matea na lima mara Rome.

<sup>18</sup> Tamlohi tavera atu lara la kilau usuri na sava la tuvaiau hinira, la opoia vara la tinaŋihiau matan la sopo lavuti te hinau vara a pa mate matana. <sup>19</sup> Pani Jew lara la sopo avulahi hinia, mo vaiau na mele usia vara a pa turu na nahon supe matan Rome, mo sopo matan vara a pa tuvai na tahisaku hin te retireti.

<sup>20</sup> Matan hinau atu natu, mo vaiau na opoia vara a hite kamim ale a retireti isamim. Matan enau na lo toho hin jen nike matan na lo tau na noku rasua hin ŋomtoho atu nona tavitavin Israel matan Tamlohi Jujuri.”

<sup>21</sup> La ŋaramia lara, “Kama sopo lo lavi te leta Judea matam, teni te vorai atu mo sopo lo sinai nike vara i vere te hina sasati matam. <sup>22</sup> Pani kama opoia vara kama rongo na ŋomim hin rasua nike sei tamlohi na jara tari la lo verelejeleja.”

<sup>23</sup> La tau na rani matea vara la pa matavuhi peresia. Ale la mai na jara mo lo toho ea, enira vao tavera,

mo tapulo na ralavuhō mo tikeli na ravravi mo lo vere mamahunia, ale mo vereuli mauri atu God mo aulu hinia, ale mo vaihitea vara la tau na nora rasua hin Iesu hin na leu non Moses peresi na pŋovet.

<sup>24</sup> Tatuara la rasu na sava mo lo vereea, pani hai la ŋohu vara la rasua. <sup>25</sup> Ale la tapulo malmalue, matan ŋomira mo sopo matea. Hitahuna, Paul mo sile na isoiso reti isara mara, “Tanume Tapu mo vereea mo tataholo mata nomim pua na sava sei pŋovet Isaiah mo vereea mara:

<sup>26</sup> ‘O vano isan la tamlohi nike,

ale o vereea vara,

Ha pa rongoa vavano,

pani ha sopo eŋi rongovosahia,

ale ha pa lo kilaua vavano,

pani ha sopo eŋi hitevosahia.

<sup>27</sup> Matan mapun la tamlohi nike

la mate,

ale perora la sopo rongo,

ale la pelati na matara moiso,

matan vara la pa sopo kilau,

ale perora la pa sopo rongo,

ale mapura la pa sopo rongovosahi,

vara i vono la pa posi

ale a pa vai mamahunira.’

*6.9-10*

*Isa*

<sup>28</sup> Matan haratu, ha lo levosahi mamahunia vara vavahinau sei God mo vaia mata juri na tamlohi, enia mo sohaia mo vano isana tamlohi ŋoŋoha: ale enira la tapurongo hinia!”

<sup>29-30</sup> Paul mo lo toho atu mata tauni mo rua na ima

matea mo pakaia, ale mo avulahi na tamlohi tari sei la lo mai isana. <sup>31</sup> Mo lo retivujavujangi mauri atu God mo aulu hinia, ale mo lo vujangi hin Moli Iesu Kristo mo sopo te matahu hinia, ale mo sopo tea i horoa.

**Romans**  
**Leta**  
**Paul Mo Ulia**  
**Isana Mara**  
**Rome**  
**Puku Nike**

Paul mo uli leta nike isana mara Rome. Rome enia taon tavera na varama hin pongi atu. Mo levosahi na kalesia ea (15.22–16.21). Mo vereia isara mara Iesu mo vironia vara enia i pa nona volitusi isara (1.1) mo lavi na retiso-hai matea ‘— matan enia sui-han God mata juri na tamlohi tari sei la rasua, tiroma isana Jew moiso i pa isana tamlohi řořoha.’ (1.16). Paul mo vereia mara tamlohi tari la hehe (3.23). Pani mo vai na malele mata vai na tamlohi la tataholo na nahona:

‘Matan tamlohi tari la vai na hehe, la lo toho asau na hina řuhuruhi sei non God hasena, ale God mo avulahi vara i vai na tamlohi la tataholo na nahona na nona řomřuhu purongo, mo vaia na malele mata volituhu hin Křisto Iesu, enia sei, God mo taua na nahořa, řaena mo volituhu na talai lolokoru non God mata hehe, ale rasua enia malele sei tamlohi la eři lavi na vuan vavahinau sei. God mo vujangia vara posina mo tataholo matan enia mo sopo sile na talai mata hehe tari isana tamlohi sei la vaira tuai.’ (3.23–25).

Paul mo vujangia vara rasua nike mo sohen rasua atu non Abraham tuai (4.13). Ale nake vara tamlohi la mai kalesia, la pa mauri usuri

na suiha Tanumen God (8.1–27). God mo sile na suiha hai isana nona tamlohi mata hahau usuri na masalona (12.1–13).

**Hin Leta Nike**

1. Paul Mo Vujangi Na Retiřuhu (1.1–17)
2. Tamlohi Tari La Ori Na Hehe (1.18–3.20)
3. God Mo Vai Na Tamlohi La Tataholo Na Nahona (3.21–4.25)
4. Mauri Paro Nona Tamlohi (5.1–8.39)
5. Vujangi Mata Tavtavin Israel (9.1–11.36)
6. Mauri Paro Nona Kalesia (12.1–15.13)
7. Vavahinau Non Paul, Isoiso Retireti (15.14–16.27)

*Paul Mo Sile Na Nona Retiřooloo*

<sup>1</sup> Enau Paul, volitusi non Křisto Iesu matea, enia mo toviau vara a vahařule, mo tapuhiau vara a retivujavujangi na Retiřuhu non God.

<sup>2</sup> Mo retitauhi hin Retiřuhu sei tuai moiso na reti nona přovet na Retitapu mo tapu,

<sup>3</sup> mo lo vereuli Natuna, enia mahapin Supe David usuri na malele tamlohi, <sup>4</sup> ale God mo vujangia vara enia Natun God na suihan Tanume Tapu na nona mele turu na mateia, Iesu Křisto nořa Moli,

<sup>5</sup> ale hinia, kama lo lavi na řomřuhu peresi na hija řuhu mata vahařule matan vara kama eři tiroma na tamlohi vara la ooloo usuri na mauri rasua, matan vara hijana i pa aulu na tamlohi řořoha, <sup>6</sup> kamim sohena, God mo tovi kamim vara ha mai tamlohi non Iesu Křisto.

<sup>7</sup> Isan la haratu tari la lo toho Rome sei God mo opoira, ale mo tovera vara la mai nona tapuhi:

Romŕuhu peresi na tamata non God Tamaŕa peresi Moli Iesu Kŕisto la mai isamim.

### *Retiŕuhu Non God*

<sup>8</sup> Tiroma, na opoia vara a vere meje isan noku God matamim hin Iesu Kŕisto, matan tamlohi na jara tari na varama la lo sorahi na nomim rasua. <sup>9</sup> Matan God sei na lo volitusi isana na mauriku usuri na Retiŕuhu matan Natuna, enia noku tuetueni sei mo levosahia vara na lo vere kamim tarea <sup>10</sup> na noku usiisi, tarea na lo usia vara te masapa na masalon God vara a eŕi mai isamim. <sup>11</sup> Matan tuai moiso, ŕomiku tavera na opoia vara a hite kamim, vara Tanume Tapu i eŕi sile kamim hin te otori na limaku matan vara i eŕi ŕilangi na maurimim hinia, <sup>12</sup> na lo ŕaramia vara, enŕa ŕa eŕi ŕomŕomi ŕilangi mata noŕa rasua, nomim peresi na noku.

<sup>13</sup> La vorai peresi na vevorai, na opoia vara ha levosahia vara na opoia vaha visa moiso vara a mai, pani mo tikeli nake, mo sopo lo te masapa, matan vara a eŕi hite na vua nomim rasua sohen na hitea moiso isana tamlohi ŕoŕoha tinatinapua. <sup>14</sup> God mo tauau moiso vara a pa tueni la haratu la lo retiŕeti na leo mara Greek peresi la haratu la tamlohi ŕoŕoha, ale isan la haratu la lelevosahi peresi la haratu la rongorongono vono. <sup>15</sup> Matana, enau na opoia mo tavera jea

vara a retivujavujangi na Retiŕuhu isamim sei ka lo toho Rome.

<sup>16</sup> Matan enau na sopo mahanuhanu na Retiŕuhu, matan enia suihan God mata juri na tamlohi tari sei la rasua, tiroma isana Jew moiso i pa isana tamlohi ŕoŕoha.

<sup>17</sup> Matan hin Retiŕuhu sei, malelen God mo vaia vara tamlohi la mai la tataholo na nahona, mo malue na jara tavera, enia mata rasua purongo, matan la ulia moiso vara, 'Haratu mo tataholo na nahon God la pa mauri usuri na malele rasua purongo'.  
*Hab 2.4*

### *Lolokoru Non God Mata Hehe*

<sup>18</sup> Matan God mo lo vujangi na nona talai lolokoru mata hehe na tuka mo sinai na varama mata posposi varama tari peresi na posposi hehe tari nona tamlohi, ale matan nora posposi hehe sei mata turuhoro na retivaraŕuhu vara i malue na jara tavera.

<sup>19</sup> Matan sava hinau tamlohi la eŕi levosahia hin God mo memera isara, matan God mo vujangia isara moiso.

<sup>20</sup> Matan ŕuhuŕuhun God sei nona hasena la lo luhu sohen harihi; nona suiha matan tui tui peresi mauri atu sei enia non God hasena. Ale la hinau sei tamlohi la eŕi hitevosahira matan la memera purongo hin la hinau atu God mo vaira na tapulo rani sei mo vai na varama. Ale matan haratu, tamlohi la sopo eŕi vereva vara God mo sopo toho.

21 Matan hina purongo vara la levosahi God moiso, pani la sopo hasohasoa vara enia God teni la sopo vere meje isana, ale řomira la mai la putu, ale mapura la rongorongono vono la mai la řoroĥa, 22 la vere lara la lelevosahi, pani la mai la rongorongono vono, 23 la sopo lotu na řuhuruhun God sei i sopo eři tihai, pani la lo lotu na hinau sohena tamasi sei la vaira sohena tamlohi peresi na maji avuavu, peresi na maji palo vati, peresi na maji haraho sohena mata teni malupa, enira mo isoiso la pa tihai!

24 Ale matana, God mo silera la vano na masalo mapura, ale la usuri na posposi lumiĥa, la vai na hina mahanuhanu na epera hasera, 25 matan la jeni na retivararuhu hin God mata ĥalu, ale la lo lotu ale la volitusi nona hinau God mo vaira, pani mo sopo isan God sei mo vaira, enia hasena mo tataholo vara tamlohi la hasohasoa na rani tui tui tarea! Amen.

26 Matan hariĥi, God mo silera la vano na nora opoia mata posposi mahanuhanu, matan nora ĥarai la jeni na posposi tataholo nona ĥarai matan la lo hase lavilavira. 27 Ale lamane sohena la tinarĥi na posposi tataholo peresi na ĥarai, matan posposi mata opoi na lamane mo jeu na masalora tinatinapua, lamane la vai na hina mahanuhanu peresi na lamane, ale la hani na vua pulara vetali mata nora

lejileji.

28 Ale matan la řoĥu vara la řomřomi God, ale God mo silera na řomřomi nona maji matan vara la vai na hinau mo sopo tataholo vara tamlohi la eři vaira. 29 La mařivi na posposi tari la sopo tataholo, la lo vaivaileu, la lo řomusuri, la sasati, la mařivi na mereimerei, la lo vilimatei na tamlohi, la lo ĥitesatiĥi, la lo ĥalu, la lo vaisatiĥi na tinapua, la lo sorasora tamlohi, 30 la lo retireřen, la řoĥu hin God, la lo vatařa, la lo mangisi, la lo retihapahapa, la lo řomřomi, ale la aleale malele paro mata la vai na hina sasati ĥinia, la sopo ooloo hin tamara teni tinara, 31 řomira mo vono, la lo tope na nora retitauĥi, mo sopo te nora opoia, la sopo řomopoi te tinapua. 32 Hina purongo vara la levosahia mo řuhu moiso vara God mo pete tau na retileu moiso vara tea mo topea i pa mate matana, enira la sopo vaira purongo, pani la retituetueni la ĥaratu la lo vaira.

## 2

### *God I Pa Ari Na Nom Heĥe*

1 Ale nake, mo sopo te hinau ĥatea vara o eři ĥalu ĥinia tapala, kamim mo isoiso sei ka lo ari na tinapua. Matan vara ko lo ari na tinapua, ko lo hasem ariĥo matan engko ko lo vai la hinau atu na lo vere moiso vara tamlohi la lo vaira. 2 Ra levosahia vara talai non God mo lo jovi isan la ĥaratu la lo vai la hinau sei, ale enia mo

tataholo. <sup>3</sup> Tapala, engko sei ko lo ari la haratu la lo vai la hinau sei, ko řom vara o pa eři jelu na talai non God, pani i pa sohena sava matan engko sohena ko lo vaira? <sup>4</sup> Ko lo řomřomi purongo na nona řomřuhu peresi na nona řompurongo peresi na nona řomperavu tavera isam, pani ko sopo levosahia vara nona řomperavu mo lo sileho na masapa vara o posi na nom hehe.

<sup>5</sup> Pani matan mapum mo řilangi, ale ko řohu vara o posi, ko lo hasem takonahi na nom talai matan rani aria atu sei God i pa vujangi na nona talai lolokoru mata hehe usuri na nona posposi tataholo hinia. <sup>6</sup> God i pa ari na tamlohi i tataholo na nora vavahinau: <sup>7</sup> God i pa sile na mauri tui isan la haratu la lo řomperavu vara la vai na vavahinau řuhu, ale la lo ale na hasohaso peresi na ololo tavera peresi mauri atu sei i pa sopo eři tihai hin te rani; <sup>8</sup> pani isan la haratu la lo vai na masalora purongo, ale la sopo ololo na retivarařuhu, pani la lo ololo na posposi mo sopo tataholo na nahon God, enira la pa lavi na talai lolokoru non God mata hehe peresi na nona lolokoru sasati. <sup>9</sup> Ale tamlohi tari sei la lo vai na vavahinau hehe la pa lavi na rani řilangi peresi na rani sasati, isana Jew tiroma moiso i pa isana tamlohi řořoha, <sup>10</sup> pani God i pa sile na hasohaso, ololo peresi na tamata isana tamlohi tari sei la lo vai

na vavahinau řuhu, isana Jew tiroma moiso i pa isana tamlohi řořoha, <sup>11</sup> matan God mo sopo tametame tea.

<sup>12</sup> God i pa sile na talai isana tamlohi la sopo Jew vara la hehe, hina purongo vara la sopo lo lavi na nona leu. Ale i pa sile na talai isana Jew vara la hehe matan nona leu mo lo pisuhi na nora hehe. <sup>13</sup> Matan mo sopo la haratu sei la lo rongo na leu purongo mo vaira la tataholo na nahon God, pani la haratu sei la lo vai na sava leu mo vereea, enira natu la tataholo na nahon God. <sup>14</sup> Matan vara la tamlohi řořoha sei la sopo lavi na leu, pani la lo vai na sava leu mo vereea, mo vujangia vara leu mo lo toho hinira moiso, hina purongo vara la sopo lo lavi na leu. <sup>15</sup> La lo vujangia vara sava hinau leu non God mo vereea, mo lo toho na mapura moiso, matan řomira sohena mo vereulia isara vara la lo vai na hina řuhu teni te hina hehe, <sup>16</sup> hin rani atu usuri noku Retiřuhu sei mo lo vereea vara God mo ari na hina luhu nona tamlohi hin Křisto Iesu.

### *Leu Non God Mo Reti Isana Jew*

<sup>17</sup> Pani vara ko lo vereea vara engko Jew matea, ale ko lo turu na leu, ale ko lo hapahapa vara ko levosahi God, <sup>18</sup> ale vara ko levosahi na masalona, ale ko lo avulahi na sava hinau la řuhuřuhu jea matan ko lo lavi na lelevosahi na leu, <sup>19</sup> ale vara ko levosahi mamahunia vara engko

tamlohi tiroma na matavuso matea, ale lamu matea isan la haratu na ŋoŋoha,<sup>20</sup> ale vara engko tamlohi matea mata vujangi la haratu la sopo rongovosahi, ale tamlohi vujangi na natuvarihi matan ko lavi vevuhi na lelevosahi peresi na retivaraŋuhu na leu,<sup>21</sup> ale vara ko lo vujangira sohena, mata sava ko sopo hasem vujangiho? Ko lo retivujavujangi vara tamlohi la pa sopo vavanaho, pani engko, ko lo vavanaho teni mo vono?<sup>22</sup> Engko sei ko lo vereea vara mo sopo tataholo vara tamlohi la vaivaileu peresi na tinapua mo lahi moiso, ko lo vaivaileu peresi na tinapua mo lahi moiso teni mo vono? Ko lo vereea vara ko sopo lotulotu vono, pani ko lo vanaho na hinau na lolo temple nona tamasi teni mo vono?<sup>23</sup> Engko sei ko lo hapahapa na leu, ko lo topea, ale ko lo komo na hijan God matana.<sup>24</sup> Matan sohen la ulia vara, 'Tamlohi ŋoŋoha matuvana na varama la lo veresatihi na hijan God matamim'.

*Isa 52.5*

<sup>25</sup> Matan posposi taiŋalihi mo ŋuhu purongo vara ko ololo na leu, pani vara ko lo tope na leu, nom taiŋalihi enia hina purongo.<sup>26</sup> Ale matana, vara tamlohi matea mo sopo taiŋalihi, pani mo lo tauri na vujangi mata leu, ko hitea vara God i pa hitea vara posina mo tataholo hin la haratu la taiŋalihi teni mo vono?<sup>27</sup> Ale matana, tamlohi atu mo sopo taiŋalihi, ale mo

lo tauri na leu, enia i pa vereea vara talai i pa jovi isam sei ko taiŋalihi sei ko lavi na leu, matan engko natu ko lo tope leu atu.

<sup>28</sup> Matan engko mo sopo Jew matea tataholo vara tamam enia tinam enira Jew teni matan engko ko lavi na taiŋalihi na epem.<sup>29</sup> Mo vono. Jew tataholo matea enia haratu mapuna mo tataholo na nahon God. Ale taiŋalihi varaŋuhu enia mo sopo taiŋalihi na epe, pani sava Tanume Tapu mo vaia na mapum. Tamlohi sohena, mo lo ale hasohaso atu God mo lo silea, mo sopo hasohaso sei tamlohi la lo silea.

### 3

*Retitauhi Non God La Varaŋuhu*

<sup>1</sup> Vara mo sohen haratu, sava mo ŋuhu natu vara engko Jew matea? Teni sava natu mo ŋuhu na taiŋalihi?<sup>2</sup> Varaŋuhu, God mo leŋuhu na Jew na malele matuvana, tiromara enia God mo sile na nona vereulia isara.<sup>3</sup> Varaŋuhu, tatuara la tope na nora retitauhi, pani nora posposi mata tope na retitauhi i pa vai na retitauhi non God i vano hina purongo teni i vono?<sup>4</sup> I vono! Tamlohi tari enira tamlohi halu, pani God mo lo varaŋuhu, sohen la ulia vara, 'Nom reti la vujangia vara engko ko tataholo, ale engko o pa jeu na nora retituvai na court'.

*Psa 51.4*

<sup>5</sup> Pani vara hai la lo vereea lara nora hehe mo sile God na masapa vara i pa vujangi na



nona posposi tataholo, řa pa řarami řomřomi atu sohena sava? Vara mo sopo tataholo vara God i sile na nona talai lolokoru mata hehe isara teni mo vono? Na lo retireti usuri na řomřomi tamlohi nahai. <sup>6</sup> I vono! Vara sohena, God i pa eři ari na varama sohena sava? <sup>7</sup> Pani tea la pa vereea vara, 'Vara noku halu mo lo vujangia vara reti non God mo varařuhu sohena sava, ale mo lo lavi na hasohaso matana, mata sava natu, na lo lavi na talai sohena tamlohi hehe matea?' <sup>8</sup> Ale mata sava řa sopo eři vereea vara, 'Mo řuhu vara řa vai na hina řasati matan vara hina řuhu i eři mai matana.' Matan tea la lo retireřen hin kamam lara kama lo vujangia sohena. Pani hara talai sei God i pa silea isara matana i pa tataholo.

### *Tamlohi Tari La Hehe*

<sup>9</sup> Nake i pa sohena sava? Kamam Jew kama řuhu kama jeu na tinapua teni mo vono? I vono, matan řa pete vujangia moiso vara tamlohi tari, Jew teni tamlohi řořoha, la lo toho na ruhuruhi suiha hehe, <sup>10</sup> mo sohen la ulia vara,

'Mo sopo tea i tataholo,  
mo vono, mo sopo te  
hatelete.

<sup>11</sup> mo sopo tea i lelevosahi;  
mo sopo tea i lo ale God.

<sup>12</sup> Tamlohi tari la vahaři  
hinia,  
enira mo isoiso la sopo  
mele řuhu matan te  
hinau;  
mo sopo tea i vai te hina  
řuhu,

mo vono, mo sopo te  
hatelete.'

*Psa 14.1-3; 53.1-3*

<sup>13</sup> 'Nora retireti mo řanga  
sohena pona taptap roi  
matea;

la vai na memera la halu.'

*Psa 5.9*

'Nora reti mo sohena poi-  
son mata  
mata sasati mo lo toho  
na jingora.'

*Psa 140.3*

<sup>14</sup> 'Jingora mo mařivi na lesati  
peresi na lolokoru.'

*Psa 10.7*

<sup>15</sup> 'La tamlohi akerihi la  
tatamahu moiso mata  
vili na tamlohi;

<sup>16</sup> Sava jara la vano hinia,  
la vaikomokomoa,  
ale rongohaji mo vora,

<sup>17</sup> ale malele mata tamata  
enira la sopo levosahi te  
hinau hinia.'

*Psa 59.7-8*

<sup>18</sup> 'Mo sopo te matahu matan  
God  
na nora vavahinau.'

*Psa 36.1*

<sup>19</sup> Ale nake řa levosahia  
vara sava hinau leu mo  
verea, mo vereea isan la  
haratu la lo toho na leu  
matan mo vai na tamlohi tari  
la tapanono, ale mo vujangia  
vara tamlohi tari na varama  
la pa toho na ruhuruhi talai  
non God. <sup>20</sup> Matana, mo sopo  
te tamlohi vara i eři tataholo  
na nahon God matan enia mo  
lo usuri na leu. Matan leu mo  
sile na lelevosahi mata hehe.

### *Křisto Mo Lavi Na Nořa Talai*

<sup>21</sup> Pani nake, malele tam-  
lohi mata la mai la tataholo  
na nahon God mo lo toho na  
jara tavera, pani leu mo sopo  
toho na lolona, o pa hitea  
vara Leu non Moses peresi  
na retireti nona přovet la

lo vereulia <sup>22</sup> sohena sava God mo lo vujangi na nona posposi tataholo na malele rasua. Tamlohi tari la tau nora rasua hin Iesu Kristo la mai la tataholo na nahon God matan God mo sopo ase na tamlohi, <sup>23</sup> matan tamlohi tari la lo vai na hehe, la toho asau na hina ruhuŕuhu sei non God hasena, <sup>24</sup> ale God mo avulahi vara i vai na tamlohi la tataholo na nahona na nona ŕomŕuhu purongo, mo vaia na malele mata volituhu hin Kristo Iesu, <sup>25</sup> enia sei, God mo taua na nahora, ŕaena mo volituhu na talai lolokoru non God mata hehe, ale rasua enia malele sei tamlohi la eŕi lavi na vuan vavahinau sei. God mo vujangia vara posina mo tataholo matan enia mo sopo sile na talai mata hehe tari isana tamlohi sei la vaira tuai. <sup>26</sup> Nake mo vaia matan vara i vujangia vara nona aria mo tataholo, ale mo tataholo vara enia i vai na tamlohi la tau na nora rasu hin Iesu, ale la mai la tataholo na nahona.

<sup>27</sup> Ale, hare natu i eŕi reŕihapahapa i verea vara mo tataholo mata nona vavahinau? I pa sopo tea! Mo mai mata sava leu? Matan ŕa lo ololo na leu? Mo vono, pani matan ŕa usuri na leu mata rasua. <sup>28</sup> Matan kama lo verea vara tamlohi la mai la tataholo na nahon God mata rasua, mo sopo matan la lo ololo na leu.

<sup>29</sup> Pani God enia God nona Jew purongo teni mo vono? Enia God nona tamlohi ŕoŕoha teni mo vono? Enjora, enia God nona tamlohi ŕoŕoha, <sup>30</sup> matan God enia

mo matelete. Enia i pa vai la haratu la taiŕalihi peresi la haratu la sopo taiŕalihi la tataholo na nahona mata rasua. <sup>31</sup> Ale, vara mo sohena, rasua mo vai na suihan leu atu mo isoiso teni mo vono? Mo vono, matan kama lo verea vara leu mo tataholo.

## 4

### *Rasua Non Abraham*

<sup>1</sup> Ale vara mo sohena, ŕa pa vere na sava matan hinau sei piŕa Abraham mo vileia tuai?

<sup>2</sup> Matan, vara Abraham mo tataholo na nahon God mata nona vavahinau, enia i pa hapahapa matana. Pani i sopo eŕi hapahapa na nahon God.

<sup>3</sup> Retitapu mo vere na sava matana? 'Abraham mo rasu God, ale God mo verea vara enia mo tataholo na nahona matana'. *Gen 15.6*

<sup>4</sup> Ale isana tamlohi voko matea, volina mo sopo hina silesilea matea, pani enia voli nona voko. <sup>5</sup> Pani isan haratu mo sopo vai te voko, pani mo tau na nona rasu hin God sei mo eŕi vai na tamlohi varama la mai la tataholo na nahona, ale God mo verea vara rasua non tamlohi atu mo vaia mo mai mo tataholo na nahona.

<sup>6</sup> Mo sohen supe David mo verea matan avulahi tavera non haratu sei God mo hitea vara mo tataholo na nahona, mo sopo matan te hinau enia mo vaia:

<sup>7</sup> 'Avulahi tavera isan la haratu  
God mo ŕomi na nora vaivaileu,  
ale mo tatavuhi na nora hehe;

<sup>8</sup> avulahi tavera isan tamlohi sei

Moli i pa sopo evi na  
nona hehe hin te rani.’  
*Psa 32.1-2*

<sup>9</sup> Avulahi tavera nike enia non la haratu la taiʻralihi purongo? Mo vono, avulahi sei enia non la haratu la sopo taiʻralihi peresi la haratu la taiʻralihi, matan kama lo vereea vara, ‘God mo vereea vara Abraham mo tataholo na nahona mata nona rasua purongo’. *Gen 15.6*

<sup>10</sup> God mo pa vaia sohena isan Abraham sohena sava? Mo vaia tiroma teni hitahu moiso mo pa taiʻralihi? Mo sopo hitahu, pani tiroma na nona taiʻralihi.

<sup>11</sup> Mo lavi na taiʻralihi sohena matamata matea mata vujangia vara enia mo tataholo mata nona rasua hin rani atu mo sopo lo taiʻralihi. Enia matan vara God i vaia i tama tamlohi tari sei la rasua, pani la sopo taiʻralihi, matan vara God i pa vaira la tataholo na nahona sohen Abraham, <sup>12</sup> ale mo vai Abraham mo taman la haratu la taiʻralihi, mo sopo mata taiʻralihi purongo, pani matan la lo hahau usuri na malele rasua non tamaʻra Abraham hin rani atu mo sopo lo taiʻralihi.

<sup>13</sup> Matan retitauhi sei God mo silea isan Abraham peresi na taniana mo vereea vara varama i pa nora, mo sopo mai mata leu, pani mata rasua sei mo vai na tamlohi la tataholo na nahon God.

<sup>14</sup> Matan, vara la haratu la lo usuri na leu la lavi na vuan retitauhi sei, rasua enia mo sopo te suihana, ale retitauhi atu mo vano hina purongo.

<sup>15</sup> Matan leu mo lavi na talai lolokoru non God mata hehe

mo mai isana tamlohi, pani vara i sopo lo te leu, i pa sopo te hehe.

<sup>16</sup> Mo pa sohena matan mo turu na rasua purongo, matan vara sava retitauhi mo vereea, mo mai mata romʻruhu, mo turu rilangi mata taniana tari, mo sopo isan haratu mo lo usuri na leu purongo pani isan haratu mo rasua sohen Abraham mo lo rasua, enia tamaʻra enʻra mo isoiso, <sup>17</sup> sohena la ulia vara, ‘Enau na viʻroniho vara engko o pa tama tamlohi jara matuvana’. *Gen 17.5* Ale God mo hitea vara Abraham mo rasua vara enia i eri sile na mauri isana mate, ale mo retireti purongo ale hinau sei la sopo lo toho la pala.

<sup>18</sup> Abraham mo lo romtoho, hina purongo vara mo sopo levosahia vara i pa sohena sohena sava, pani mo lo romtoho vara i pa tama mara jara matuvana usuri na sava God mo vereea isana mara, ‘Ale taniem la pa matuvana sohena vitusarasara’. *Gen 15.5*

<sup>19</sup> Nona rasua mo sopo jovi, hina purongo vara epena mo vajiaha mariviti i pa mate purongo matan taunina mo lo lavilavi na tauni mo ngavulu sangavulu (100), ale hina purongo vara Sarah mo aroaro.

<sup>20</sup> Mo sopo romkaka na retitauhi non God, pani mo ulua rilangi na nona rasua, ale mo lo sile na oloolo isan God, <sup>21</sup> mo levosahi mamahunia vara God i eri vai na sava mo retitauhi hinia. <sup>22</sup> Ale matan nona rasua atu, ‘God

mo vereia vara enia mo tataholo na nahona.'

<sup>23</sup> Pani reti sei akerihi, 'God mo vereia vara enia mo tataholo...' la sopo ulia matan Abraham hasena, <sup>24</sup> pani matan noŋa rasua sohena. God i pa vereia sohena isan la haratu la lo tau nora rasua hin God sei mo sauteterahi Iesu noŋa Moli na mateia. <sup>25</sup> Enia, God mo silea mata noŋa hehe, ale mo sauteterahia matan vara i vaiŋa ŋa tataholo na nahona.

## 5

### *Rasua Mo Sile Na Avulahi*

<sup>1</sup> Ale matan nake ŋa tataholo moiso na nahon God na rasua, ŋa toho na tamata peresi God hin noŋa Moli Iesu Kŋisto. <sup>2</sup> Hinia, ŋa eŋi unu na ŋomŋuhu sei ŋa lo turu hinia mata rasua, ale ŋa lo avulahi tavera matan ŋa lo ŋomtoho vara ŋa pa toho peresi God na hasohasona.

<sup>3</sup> Aulu hin haratu, ŋa avulahi na noŋa rani ŋilangi, matan ŋa levosahia vara noŋa rani ŋilangi, vuana enia posposi mata turu ŋilangi, <sup>4</sup> ale posposi mata turu ŋilangi, vuana enia jelu na hinau vaihite, ale posposi mata jelu na hinau vaihite, vuana enia ŋomtoho, <sup>5</sup> ale noŋa ŋomtoho sei i pa sopo eŋi vano ŋomŋomi purongo matan Tanume Tapu sei God mo silea isaŋa mo surei na opoia non God na mapuŋa.

<sup>6</sup> Matan na rani mo sopo lo te noŋa suiha, na ranina tataholo, Kŋisto mo mate mataŋa tamlohi sei ŋa lo usuri na posposi varama. <sup>7</sup> I pa ŋilangi vara o eŋi vilei tea

vara i mate mata tamlohi tataholo matea, pani korong, tea i pa eŋi ŋomŋilangi vara i mate matan te tamlohi ŋuhu hatea; <sup>8</sup> pani God mo vujangia vara nona opoia mataŋa mo sohena sava matan, hin rani atu ŋa pa lo tamlohi hehe, Kŋisto mo mate mataŋa. <sup>9</sup> Matan ŋa mai ŋa tataholo na nahon God mata ŋaen Iesu moiso, ale nake, mo sopo te retusia hatea vara Iesu i eŋi juriŋa na talai lolokoru non God mata hehe. <sup>10</sup> Matan, vara God mo sari tamata peresiŋa na mateia non Natuna na rani ŋa pa lo nona meresahi, nake matan ŋa turu na tamata peresia moiso, mo sopo te retusia hatea vara ŋa pa eŋi juri na maurina teni i vono. <sup>11</sup> Aulu hin haratu, ŋa avulahi tavera hin God hin noŋa Moli Iesu Kŋisto, ale hinia, nake ŋa lavi na nona sari tamata, ŋa mai ŋa tapalana.

### *Mateia Mo Mai Matan Adam*

<sup>12</sup> Ale matana, sohena hehe mo mai na varama na tamlohi matea purongo, ale mateia mo mai mata hehe, ale sohena, mateia mo tikeli na tamlohi tari matan enira mo isoiso la vai na hehe, <sup>13</sup> matan hehe mo lo toho na varama moiso God mo pa sile na leu, ale mo sopo te hehe vara i sopo te leu hatea i pisuhia. <sup>14</sup> Hina purongo matana, mateia mo lo aulu na tamlohi mo tapulo hin Adam mo tikeli Moses, hina purongo vara la sopo vai na hehe sohena hehe non Adam, mateia mo lo aulu hinira. Ale

Adam enia tovongi matea hin harasei mo lo mai hitahu.

*Mauri Tui Mo Mai Matan Iesu*

<sup>15</sup> Pani hehe non Adam mo sopo sohen řomřuhu sei God mo sile purongoia, matan hehe nona tamlohi matea purongo, mateia mo vano isana tamlohi matuvana, pani hin na tamlohi tinapua matea, Iesu Křisto, God mo sile purongoi na otori řuhu mata řomřuhu mo masurere isana tamlohi matuvana. <sup>16</sup> Ale otori řuhu sei God mo sile purongoia, mo sopo sohena vua hehe non tamlohi atu, matan vua aria matan hehe atu enia matea purongo, mo lavi na talai mo mai, pani otori řuhu sei God mo sile purongoia, mo mai hitahun na hehe matuvana, mo roi na malele vara God i eři vereia vara tamlohi la mai tataholo na nahona. <sup>17</sup> Varařuhu, mateia mo aulu na tamlohi tari matan hehe atu matea non tamlohi atu matea purongo, pani la haratu la lo lavi řomřuhu sei mo mařivi savulevule peresi na otori sei God mo sile purongoia mata i vai na tamlohi la tataholo na nahona, enira natu, maurira la pa aulu na mauri nake ale hitahu hin tamlohi atu matea, enia Iesu Křisto.

<sup>18</sup> Ale matana, sohena hehe nona tamlohi matea purongo mo vai na talai mo mai isana tamlohi tari, ale vavahinau tataholo matea purongo, mo vai na malele vara God i vereia vara tamlohi la tataholo na nahona, ale matan vara i eři sile na mauri isana tamlohi tari. <sup>19</sup> Ale

sohena lejileji nona tamlohi matea purongo mo vai na tamlohi matuvana la hehe, ale mo sohena oloolo nona tamlohi matea purongo mo vai na tamlohi matuvana la tataholo na nahon God. <sup>20</sup> Ale nakerihi natu, leu mo mai vara i vai na hehe i memera i řuhu, pani vara hehe mo mai mo mele tavera, řomřuhu natu, mo mai mo mele mařivi savulevule jea, <sup>21</sup> matan vara sohena mateia mo vujangi na suiha nona hehe, řomřuhu i pa eři vujangi na nona suiha hin malele sei God mo vai na tamlohi la tataholo na nahona hinia, ale vuana, enia mauri tui hin Iesu Křisto nořa Moli.

## 6

*Suihan Hehe Mo Moti*

<sup>1</sup> Ale nake řa pa vere na sava vara mo sohena? Mo tataholo vara řa lo vai na hehe i lo vano matan vara řomřuhu i pa lo mařivi savulevule matana, teni mo vono? <sup>2</sup> Mo vono! I pa sohena sava natu vara enřa sei řa mate na hehe moiso, řa lo toho hinia? <sup>3</sup> Teni ka sopo levosahia vara enřa sei řa lavi na paptijo hin Křisto Iesu, řa paptijo hin na nona mateia? <sup>4</sup> God mo tavuniřa peresi Iesu na nona mateia na rani řa paptijo hinia, matan vara enřa sohena, řa eři hahau na mauri paro sohen Křisto sei mo turu na mateia na mauri paro na suihan God Tama.

<sup>5</sup> Matan, vara enřa řa sořotahi peresia na nořa mate sohen na nona mate, řa levosahia vara řa pa sořotahi

peresia na sauteterahi sohen na nona sauteterahi. <sup>6</sup> Ra levosahia vara noña mauri tuai mo mate peresia na talopeilopei matan vara i tope na suihan hehe na mauriña, matan vara ña pa sopo mele slev isan hehe. <sup>7</sup> Matan haratu mo mate moiso, mo pete materi moiso na hehe. <sup>8</sup> Ale vara ña mate peresi Kristo, ña rasua vara ña pa mauri peresia. <sup>9</sup> Ra levosahia vara God mo sauteterahi Kristo na mateia moiso, ale i pa sopo efi mele mate; mate mo sopo te suihana vara i efi aulu hinia. <sup>10</sup> Matan mateia atu mo mate hinia, mo mate vara i jeu na hehe, vahatea mata rani tari, pani mauri atu mo mauri hinia nake, mo mauri matan God. <sup>11</sup> Ale kamim sohen ha levosahia vara kamim sohen ka mate isan hehe, ale ka mauri matan God hin Kristo Iesu.

<sup>12</sup> Matan haratu, ha sopo tinañihia vara hehe i aulu na epemim nike na varama, vara i vai kamim ha oloolo na masalora. <sup>13</sup> Ha sopo tinañihia vara te epemim la mai volitusi na hehe mata posposi mo sopo tataholo na nahon God, pani ha sile kamim isan God sohen la haratu sei God mo vaira la malue na mateia la mauri, ale ha sile na epemim isan God sohen volitusi mata posposi tataholo na nahon God. <sup>14</sup> Matan hehe i sopo efi te suihana vara i aulu hin kamim, matan kamim ka sopo toho na ruhuru leu, pani ka lo toho na ruhuru ñomñuhu.

### *Ra Eñi Oloolo Hin God*

<sup>15</sup> I pa sohen sava natu? Matan ñomñuhu non God mo vaira ña materi moiso, mo tataholo vara ña hahau na hehe matan nake ña sopo toho na ruhuru leu teni mo vono? Mo vono! <sup>16</sup> Ka levosahia vara, vara ka sile kamim isan tea sohen slev matea, ha pa oloolo hinia ale ka slev isan haratu sei ka lo oloolo hinia. Vara ka slev na hehe, vuana enia mateia, vara ka slev mata oloolo hin God, vuana enia posposi tataholo na nahona. <sup>17</sup> Pani ña vere meje isan God matamim sei tuai ka lo slev non hehe, pani nake ka mai ka oloolo na mapumim na vujangi tataholo sei la silea isamim moiso, <sup>18</sup> ale nake, ka materi na hehe, ale ka mai slev non posposi atu mo tataholo na nahon God.

<sup>19</sup> Na lo vere na tovongi na slev sohen matan vara i tueni na nomim lelevosahi. Matan sohen tiroma ka lo sile na epemim sohen slev mata hina lumiha teni vaivaileu sei vuana mo mele vaivaileu jea, ale nake ha sile na epemim sohen slev isan posposi sei mo tataholo na nahon God sei vuana mo lo vai kamim vara ha tapu na maurimim.

<sup>20</sup> Na rani ka pa lo slev non hehe, ka sopo ñomñomi na posposi sei mo tataholo na nahon God. <sup>21</sup> Pani vuana enia sava? Vuana mo sopo ñuhu matan nake ka lo mahanuhanu matan la hinau sei ka lo vaira tiroma, matan isoison la hinau sei, enia mate. <sup>22</sup> Pani matan nake ka materi moiso na

hehe, ale ka mai slev non God, vua ka lavia matana mo vai kamim vara ha pa tapu na maurimim, ale isoisona, enia mauri tui. <sup>23</sup> Matan voli hehe enia mateia, pani otori non God sei mo lo sile purongoia, enia mauri tui hin Kristo Iesu noŋa Moli.

## 7

### *Leu Mo Sopo Mele Aulu Hiniŋa*

<sup>1</sup> Teni, ka levosahia la vorai peresi na vevorai vara, vara leu mo lo suiha purongo vara tamlohi mo lo mauri? Na lo retireti isan la haratu la levosahi na leu. <sup>2</sup> Mo sohena haŋai lahi matea, leu mo lo tauria vara tuana mo lo mauri, pani vara tuana mo mate, haŋai atu mo materi na leu mata lahi. <sup>3</sup> Ale vara tuana mo lo mauri, pani mo mele juruvi peresi na tamlohi tinapua, la pa vereea vara enia haŋai vaivaileu matea. Pani vara tuana mo mate, haŋai atu i pa materi na leu, vara i vano isana tamlohi tinapua matea, enia mo sopo haŋai vaivaileu.

<sup>4</sup> Mo sohena natu, la vorai peresi na vevoraiku, kamim sohena, ka mate na leu peresi Kristo matan vara ha pa mai tamlohi non tinapua, haratu non Kristo sei God mo sauteterahia na mateia matan vara ŋa eŋi vua ŋuhu isan God. <sup>5</sup> Matan tiroma ŋa lo usuri na masalo varama, leu mo lo ŋohai na masaloŋa sei mo lo vua hehe, ale vuana enia mateia. <sup>6</sup> Pani nake ŋa materi na leu, matan ŋa mate peresi Kristo moiso, ale ŋa sopo mele toho na

ruhuruhu suiha leu, matan vara ŋa eŋi volitusi isan God, mo sopo na malele mata oloolo na retileu la ulia tuai, pani na malele paro, hin mauri atu Tanumena mo lo silea.

### *Leu Non God Mo Vujangi Na Hehe*

<sup>7</sup> Ra pa vereea sohena sava natu? Ra pa vereea vara leu enia hehe teni mo vono? Mo vono! Pani vara leu i sopo lo mai a pa sopo eŋi levosahi na hehe. A pa sopo eŋi levosahia vara ŋomusuri enia sava, vara leu mo sopo vereea vara, 'O sopo ŋomusuri'. *Exo 20.17; Deut 5.21*

<sup>8</sup> Pani hehe mo lavi na masapa hin retileu atu, mo vaiau na vua na ŋomusuri tinatinapua matuvana. Vara leu i sopo lo toho, hehe i pa sopo mauri. <sup>9</sup> Tiroma na lo toho hin mauri atu na sopo levosahi na leu hinia, pani na rani leu mo pala mo pisuhi na hehe ale mo mera purongo vara hehe mo lo mauri hiniau, <sup>10</sup> ale mo tauau na ruhuruhu talai mata mate. Matan na vileia vara retileu atu sei mo lo retitauhi na mauri mo sopo silea, pani mo sile na mateia isaku. <sup>11</sup> Matan hehe mo lavi na masapa matea na retileu, hehe mo halhaluau, ale retileu atu mo viliau, <sup>12</sup> hina purongo vara ŋa levosahia vara leu tari la tapu, ale retileu enia mo tapu mo tataholo ale mo ŋuhu.

<sup>13</sup> Ale ka hitea vara mo tataholo vara leu sei mo ŋuhu mo sile na mateia isaku? Mo vono! Hehe mo tauau na malele mata mate usuri na sava retileu sei mo ŋuhu mo

vujangiau, matan vara hehe i pa pala hehe varaʻuhu, ale hin retileu sei, hehe mo pala mo sasati jea.

### *Suiha Hehe Na Mauriʻa*

<sup>14</sup> Matan ʻa levosahia vara leu enia mata i vujangi mauri atu God mo opoia, pani enau na lo toho hin mauri atu nona tamlohi sei mo lo toho na ruhuruu suiha hehe. <sup>15</sup> Na sopo levosahia mata sava na lo vai na hinau na lo vaia. Matan na sopo vai na sava na opoia, pani na lo vai pa hinau sei na lo ʻoʻu vara a vaia. <sup>16</sup> Na levosahi mamahunia vara sava hinau na lo vaia mo sopo tataholo, enia mo vujangia vara na lo majinga vara leu enia mo ʻuhu. <sup>17</sup> Pani nake, mo sopo enau sei na lo vaia, pani hehe sei mo lo toho isaku.

<sup>18</sup> Matan na levosahia vara mo sopo te hinau ʻuhu na loloku, na lo vere na masalo varama na loloku. Matan na opoia vara a vai na hinau mo tataholo, pani na sopo eʻi vaia. <sup>19</sup> Matan na sopo vai na sava hinau ʻuhu na opoia, pani tarea na lo vai na hina sasati sei na sopo opoia. <sup>20</sup> Ale, pani vara enau na lo vai na hinau na sopo opoia, enia mo sopo enau sei na lo vaia, pani hehe na loloku.

<sup>21</sup> Ale na mauri na hitea vara na opoia vara a vai na hina tataholo, sasati mo lo kilau ʻoʻoia. <sup>22</sup> Matan na loloku, enau na avulahi mo tavera jea na leu non God, <sup>23</sup> pani na hite na leu tinapua matea mo lo voko na epeku, mo lo valum peresi na leu mata ʻomiku, mo opoia vara

a lo toho na ruhuruu suiha leu mata hehe na epeku.

<sup>24</sup> Enau tamlohi sasati matea! Hare i pa eʻi juriau na epeku sei mo tauau na ruhuruhun talai matan mateia nike? <sup>25</sup> Pani ʻa vere meje isan God hin Iesu Kʻristo noʻa Moli matan malele mo roi! Ale nake, enau na lo volitusi isan leu non God na ʻomiku, pani na loloku, na lo volitusi isana leu mata hehe.

## 8

### *Mauri Atu Tanumen God Mo Lo Silea*

<sup>1</sup> Ale matan sava God mo vaia hin Kʻristo Iesu, nake natu, mo sopo te talai non la haratu sei la lo toho hin Kʻristo Iesu. <sup>2</sup> Matan suiha non Tanume mata mauri hin Kʻristo Iesu mo teriho na suiha mata hehe peresi na mateia. <sup>3</sup> Matan leu mo sopo te suiha vara i eʻi posi na masalo varama na loloku, pani God mo vaia hin Natuna sei mo ʻulea mo mai vara i tamlohi, matan vara i mai sohena malamalai mata hehe, pani mo sopo te hehe hinia, ale hinia, God mo komo na suiha hehe sei mo lo aulu hiniʻa, <sup>4</sup> matan vara sava hinau tataholo sei leu mo lo vere la pa toho na mauriʻa sei ʻa sopo mele hahau usuri na masalo varama, pani ʻa lo hahau usuri na Tanume Tapu.

<sup>5</sup> Matan la haratu la lo usuri na masalo varama, la lo tau na ʻomira na hinau mata masalon mauri atu, pani la haratu la lo usuri na Tanume Tapu na mauriʻa, la lo tau na ʻomira na hinau non Tanume Tapu. <sup>6</sup> Matan



vua řomřomi mata masalo varama, enia mateia, pani vua řomřomi mata Tanume Tapu enia mata mauri peresi na tamata. <sup>7</sup> Matan řomřomi atu mo lo usuri na masalo varama, enia meresahi isan God, matan enia mo sopo oloolo na leu non God, matan i pa sopo eři oloolo hinia. <sup>8</sup> La haratu la lo usuri na masalo varama, la pa sopo eři vai na sava God mo avulahi hinia.

<sup>9</sup> Pani kamim sei, ka sopo toho na ruhuruhu suihan masalo varama, matan ka lo toho na ruhuruhu suihan Tanume Tapu, varařuhu vara Tanumen God mo lo toho isamim. Vara tea mo sopo lavi na Tanumen Křisto, enia mo sopo nona. <sup>10</sup> Pani vara Křisto mo lo toho hin kamim, hina purongo vara epemim la pa mate mata hehe, Tanumena mo sile kamim na mauri matan mo vai kamim ka tataholo na nahona. <sup>11</sup> Vara Tanumen haratu sei mo lo sauteterahi Iesu na mateia mo lo toho hin kamim, haratu mo sauteterahi Křisto Iesu na mateia i pa sile na mauri na epemim na Tanumena sei mo lo toho hin kamim.

<sup>12</sup> Matan haratu, la vorai peresi na vevorai enřa tamlohi ave, pani mo sopo isana masalo varama, řa sopo usuri na masalon mauri atu. <sup>13</sup> Matan, vara ha lo usuri na masalo varama, ha pa mate, pani vara hin Tanume Tapu ka lo tau nařihi na vavahinau sasati nona epemim, ha pa mauri. <sup>14</sup> Matan tamlohi tari sei Tanume Tapu mo lo tiroma hinira, enira natun God.

<sup>15</sup> Matan ka sopo lavi na Tanumena vara ha lo sohena slev sei la lo juhajuha mata matahu, pani ka lavi na Tanumena vara i korohi kamim sohena natuna, ale hinia, řa lo ulo vara, 'Tata, Tamaku!' <sup>16</sup> Tanume Tapu hasena mo lo vujangi mamahuni na mapuřa hinia mara enřa řa natun God, <sup>17</sup> ale vara enřa řa natuna, enřa řa pa lavi na hinau God mo silea isan Natuna Křisto, vara řa lavi na rani řilangi peresia matan vara řa pa eři lavi na hija aulu peresia.

#### *Mauri Pongi Hitahu*

<sup>18</sup> Matan enau na levosahia vara rani řilangi mata mauri nake, enira hina purongo na hina hasohaso řuhuřuhu sei God i pa vujangia isařa. <sup>19</sup> Matan hinau tari God mo vaira la lo sasaovi vara la hite rani atu natun God la pa pala hinia. <sup>20</sup> Matan God mo tau na lesati isana hinau tari na varama tuai tuai jea, mo sopo matan la opoia vara la sohena, pani matan God mo taura sohena, ale la lo kilau matan rani atu, <sup>21</sup> hinau tari na varama peresi na natun God la pa lavi materi sei mo řuhuřuhu jea. La pa malue hin mauri atu mata mate peresi na mauri mata řovo. <sup>22</sup> Matan řa levosahia vara hinau tari God mo vaira, la lo ngutu na rongohaji mata vasusu mo tikeli nake. <sup>23</sup> Ale mo sopo hinau God mo vaira purongo, pani enřa sohena sei řa lavi na tiroma asitauni isan Tanume Tapu, řa lo ngutu na lolořa, řa lo saovi matan rani atu sei řa pa

mai sohena natuna tataholo, ale řa lavi na epeřa paro. <sup>24</sup> Matan hin řomtoho sei, God mo juriřa. Vara řa lo hite na sava řa lo řomtoho hinia, mo sopo řomtoho varařuhu natu. Matan hare mo lo řomtoho na hinau mo eři hitea? <sup>25</sup> Pani vara řa lo řomtoho na hinau řa sopo hitea, řa pa lo kilau matana na nořa řomperavu.

<sup>26</sup> Mo sohena natu, Tanume Tapu mo lo tueniřa na nořa vejuveju, matan řa sopo levosahia vara řa pa usiusi mata sava hinau sohen God mo opoia, pani Tanume Tapu hasena mo lo usiusi nořa na malele matea mo sopo te reti vara i eři vere na řaramina. <sup>27</sup> Pani haratu sei mo levosahi na mapu tari, mo levosahi na sava mo lo toho na řomin Tanume Tapu, matan Tanume Tapu mo lo usiusi nona tapuhi usuri na masalon God. <sup>28</sup> Ale řa levosahia vara la haratu la opoi God, hinau tari la voko jara matea mata řuhu non la haratu God mo tovira usuri na nona řomřomi tavera. <sup>29</sup> Matan la haratu mo viřonira tiroma, mo pete tapuhira moiso vara la pa mai sohen Natuna, matan vara enia i pa vora tiroma na vorai matuvana. <sup>30</sup> Ale la haratu mo pete tapuhira moiso, mo tovira, ale la haratu mo tovira, mo vaira la tataholo na nahona, ale la haratu mo vaira la tataholo na nahona, mo taħera aulu na hasohasona.

### *Opoia Non God*

<sup>31</sup> Ra pa vereā sohena sava natu? Vara God enia nořa, hare i pa eři komořa?

<sup>32</sup> Vara God mo sopo horo Natuna tataholo, pani mo silea matařa enřa mo isoiso, sohena sava natu, God sei mo sile Křisto isařa i pa sopo eři sile na hinau tari isařa?

<sup>33</sup> Hare i eři pisuhi na viřoni non God matan te hinau? God natu, mo vaira la tataholo na nahona. <sup>34</sup> Hare natu i pa vereā vara i pa eři sile na talai isařa? \* Křisto Iesu enia haratu mo mate, aulu hin haratu, enia mo turu na mateia, ale mo lo toho na suiħa na matuan God, ale enia natu mo lo usiusi nořa. <sup>35</sup> Hare i pa aseřa na opoia non Křisto? Rani řilangi, teni rani sasati, teni tipahi, teni mařua, teni malamala, teni hinau mo eři komo na mauri, teni vuro? <sup>36</sup> Varařuhu la uli la hinau sei moiso na Retiulia vara, 'Matan, mateia mo lo toho na nahomam tarea, ale la hite kamam sohen natu sipsip sei la pa vilimateira'. *Psa 44.22*

<sup>37</sup> Mo vono, hina purongo hin la hinau tari sei matan řa eři jeura hin Křisto sei mo opoiřa. <sup>38</sup> Matan na levosahi mamahunia vara řa mate teni řa lo mauri, teni angelo, teni tamlohi aulu, teni hinau nake la lo toho, teni hinau la pa mai, teni haratu la řilangi, <sup>39</sup> teni te hinau aulu na masapa teni na puaha atano na lolo tasi teni varama, teni te hinau tinapua na varama, i pa sopo

\* **8:34:** sile na talai: tamlohi teni Tiapolo la pa vaiħitea pani God mo sile na talai isan Křisto matařa.

eři aseřa na opoia non God hin Křisto Iesu nořa Moli.

## 9

### *Tapuhi Non God Hin Israel*

<sup>1</sup> Na lo vere na reti-  
varařuhu na hijan Křisto,  
na sopo halu; řomiku mo  
levosahia vara Tanume Tapu  
mo levosahia <sup>2</sup> vara řomiku  
mo jovi tavera, ale mapuku  
mo tangi, <sup>3</sup> vara te malele  
vara voraiku sei tahisaku  
Israel, la eři juri hinia, a  
pa hase tai nařihiau hin  
Křisto, a mai hina lesati  
mata malelera. <sup>4</sup> Enira la  
tavgavin Israel, ale enira  
korohi non God, mo vujangi  
na nona matamata tavera  
isara la řuhuřuhu jea, peresi  
na nona retitauhi isara tuai,  
la lavi na nona leu, la lavi na  
posposi mata lotua, ale nona  
retitauhi mata jurira. <sup>5</sup> Ale  
pira tuai enira tamlohi aulu  
non God, ale Křisto vara řa  
usuri na malele tamlohi, enia  
mo tai isara, enia God sei mo  
aulu na hinau tari, ale i pa  
lavi na hasohaso tarea tui tui,  
amen.

<sup>6</sup> Pani mo sopo sohena vara  
God mo řomalicho na nona  
retitauhi isan tavgavin Is-  
rael, matan mo sopo tam-  
lohi tari sei la tai isan Is-  
rael la tavgavin Israel, <sup>7</sup> ale  
mo sopo vara enira mo isoiso  
natun Abraham vara enira  
taliana, pani matan la ulia  
vara, 'Tanium la pa lavi na  
hijam hin Isaac'. *Gen 21.12*

<sup>8</sup> Enia mo řaramia vara na  
nahon God mo sopo taliana  
tari la tai isan Abraham la  
natun God, pani natuna tari

na nona retitauhi, enira ma-  
hapin Abraham. <sup>9</sup> Matan reti-  
tauhi mo verea sohen har-  
ihi mara, 'Sohen harakerihi  
tavul tauni a pa mele mai, ale  
Sarah i pa vasusui na lamane  
matea'. *Gen 18.10, 14*

<sup>10</sup> Mo sopo haratu purongo,  
pani Rebecca sohena mara  
mo vasusui na havo isan  
tamlohi matea purongo pira  
Isaac, <sup>11</sup> pani tiroma la pa  
vora, teni tiroma la pa vai  
te hinau mo řuhu teni mo  
sati, matan vara řomřomi  
non God mata viřoni na nona  
tamlohi i pa turu, <sup>12</sup> mo sopo  
mata nora vavahinau, pani  
matan God mo tovia, mo  
verea isan Rebecca mara,  
'Vora tiroma i pa volitusi isan  
vora hitahu'. *Gen 25.23*

<sup>13</sup> Sohen la ulia vara God mo  
verea mara, 'Na opoi Jacob,  
pani na řohu hin Esau'. *Mal*  
*1.2-3*

<sup>14</sup> Vara sohena, řa pa vere  
na sava? God mo tametame  
tea teni mo vono? Mo vono!  
<sup>15</sup> Matan God mo verea isan  
Moses mara,

'A pa řomřuhu hin  
haratu sei na řomřuhu  
hinia,

a pa řomopoi hin haratu  
sei na řomopoia.' *Exo*  
*33.19*

<sup>16</sup> Matan haratu, mo sopo  
turu na masalon te tamlohi  
teni te nona vavahinau, pani  
mo turu hin God sei mo lo  
řomopoi.

<sup>17</sup> Matan na Retitapu God  
mo verea isan Pharaoh mara,  
'Na taheho sahe aulu matan  
hinau akerihi natu, vara a pa  
eři vuhesi na suiaku hiniho,  
ale matan vara tamlohi la pa

hasohaso na hijaku na jara tari na varama'. *Exo 9.16*

<sup>18</sup> Ale matan haratu mo vujangia vara God mo lo řomopoi na sava tamlohi enia mo opoia, ale enia mo lo pelati na mapun hare enia mo opoia.

<sup>19</sup> Korong tea i pa vereia isaku vara, "Avei, vara God mo vai na masalona sohena, mata sava natu mo pa lo hite na hehe? Matan hare natu, i pa eři horo na masalona?"

<sup>20</sup> Pani engko sava tamlohi natu, vara o pa eři reti isan God sohena? 'Mo tataholo vara hinau sei God mo vaia, i eři vereia isan God sei mo vaia vara, "Mata sava ko vaiau sohen harihi?"' *Isa 29.16; 45.9* <sup>21</sup> Teni vara tamlohi sei mo lo vai na jilivi na lepa, ko hitea vara mo sopo tataholo vara i vai na jilivi i rua na vořoli lepa matea vara matea mata jara lakolako, ale matea mata jara utauta? <sup>22</sup> Ko hitea mo tataholo vara God mo opoia vara i lo řomperavu tako hin la haratu mo viřonira mata komo moiso, matan vara i eři vujangi na nona talai lolokoru mata hehe peresi na suihana isana tamlohi, <sup>23</sup> matan vara i eři vujangia vara řuhuruhuna mo řuhuruhu jea sohena sava isan la haratu sei i pa řomopaira, enira sei mo viřonira moiso mata lavi na řuhuruhuna, <sup>24</sup> enřa sohena, enia mo toviřa, pani mo sopo toviřa isana Jew purongo, pani isana tamlohi řořoha sohena.

<sup>25</sup> Sohen God mo vereia na Retiulia non Hosea mara, 'La haratu sei la sopo noku tamlohi, nake a pa toviřa "noku tamlohi" ale a pa opoi hařai sei mo sopo tea i opoia.' *Hos 2.23*

<sup>26</sup> Ale, 'Tiroma mo vereia isara mara, "Ka sopo noku tamlohi", pani nake i pa vereia vara, "Kamim ka natun God sei mo mauri".' *Hos 1.10*

<sup>27</sup> Ale Isaiaħ mo lo ulo aulu matan Israel mara, 'Hina purongo vara evi natun Israel la sohena oneone vavar-ihia na tasi, tupu visalete purongo la pa juri.

<sup>28</sup> Matan Moli i pa sile vevuhi na nona talai i vila, řomina i pa sopo rua hinia.' *Isa 10.22-23*

<sup>29</sup> Ale sohen Isaiaħ mo vereia tiroma moiso mara, 'Vara Moli Suiha Tavera Jea na tuka i sopo lo tinařihia vara te mahapimam la mauri, korong kama pa tihai sohen Sodom peresi Gomorraħ moiso.' *Isa 1.9*

### *Israel La Sopo Rasu God*

<sup>30</sup> Ra pa vereia sohena sava natu? Ra pa eři vereia vara haratu la tamlohi řořoha la mai la tataholo na nahon God pani mo sopo matan la lo tunguia pani matan la rasu God, <sup>31</sup> pani Israel sei la lo tungui na leu vara i pa vaira la tataholo na nahon God, pani la sopo eři vai vevuhi leu

atu. <sup>32</sup> La sopo eři vaia mata sava? Matan la sopo tutunguia na malele rasua, pani la hitea vara la pa vaia na nora vavahinau. La tialahalahi hin vatu atu mata tialahalahi, <sup>33</sup> sohenala ulia vara, 'Ka hitea? Na lo tau na vatu matea hin Zion mata tialahalahi,\*  
ale na tau na vatu matea matan i pa vaira la jovi, pani haratu mo tau na nona rasua hinia, i pa sopo tea i eři vaia i mahanuhanu.' *Isa 8.14; 28.16*

## 10

### *God Mo Juri Na Tamlohi Mata Rasua*

<sup>1</sup> La voraiku peresi na vevoraiku, noku ususi isan God peresi na opoia na mapuku mata tadvavuiku Israel, enia vara la pa juri. <sup>2</sup> Na lo vereulia matara, vara la lo řomjea hin God, pani la sopo usuria na malele mata lelevosahi. <sup>3</sup> Matan, la sopo rongovosahi na malele sei God mo taua vara tamlohi la pa mai la tataholo na nahona hinia, ale la lo ale na malelera purongo sei vara la pa tataholo na nahon God hinia, la řohu vara la usuri malele atu God mo lo vai na tamlohi la mai la tataholo na nahona hinia. <sup>4</sup> Matan hin Křisto mo vai vevuhi na leu, matan hinia, tamlohi tari sei la rasua la mai la tataholo na nahon God.

### *Israel La Jalio Na Malele*

<sup>5</sup> Matan Moses mo ulia mara te tamlohi mo opoia

vara i mai i tataholo na nahona na malele mata leu, enia i pa usuri vevuhi na nona retileu na maurina. *Lev 18.5*

<sup>6</sup> Pani vujangi atu mo vujangia vara tamlohi la mai la tataholo na nahon God na rasua mo vereea mara, 'O sopo vereea na mapum vara, "Hare natu i pa sahe na tuka?" ' *Deut 30.12* vara i tapai Křisto, ale i lavia i sinai vara i vujangiho. <sup>7</sup> Ale vujangi atu mo vereea mara, 'Hare natu i pa sivo hin koko tavera jea atu sei mo sivo atano jea na lolo varama mata mateia?' *Deut 30.13* vara i lavi Křisto i mele mauri na mate. <sup>8</sup> Malele mata juri mo mai mata rasua hin Křisto, enia natu, Retiruhu sei kama lo retivujavujangia, mo mariviti isam purongo, pani mo lo vere na sava? 'Retisohai sei mo mariviti, mo lo toho na huřurivim, ale mo lo toho na mapum'.

### *Deut 30.14*

<sup>9</sup> Matan, vara o taviti na jingom vara Iesu enia Moli, ale o rasua na mapum vara God mo sauteterahia na mateia, o pa juri. <sup>10</sup> Matan rasua na mapum purongo, enia natu, mo vaiho ko tataholo na nahon God, ale ko pa juri matan ko taviti na jingom. <sup>11</sup> Matan Retitapu mo vereea mara, 'Tamlohi tari sei la tau na nora rasua hinia, i pa sopo tea i vaira la mahanuhanu'. *Isa 28.16*  
<sup>12</sup> Ale nake God mo sopo mele vereea vara Jew teni mara Greek matan enia Moli matelete nora Moli enira mo isoiso, enia mo sile na nona

\* 9:33: Zion: Zion enia Jerusalem.

řuhuřuhuna isana tamlohi tari sei la lo kilau isana. <sup>13</sup> Matan Retiulia mo vara, 'Tamlohi tari sei la tovi na hijan Moli God la pa juri'. *Joel 2.32*

<sup>14</sup> Sohená sava natu, la haratu la sopo lo rasua la pa eři tovia? Ale sohená sava natu, la pa tau na nora rasua hinia matan la sopo lo levosahia? Ale la pa rongoa sohená sava vara tea i sopo retivujavujangi isara?

<sup>15</sup> Ale sohená sava natu la pa retivujavujangi isara vara tea mo sopo řulera? Mo sohen la ulia vara, 'Rani řuhu mata avulahi matan la haratu la lo retivujavujangi na Retiřuhu la pala!'

*Isa 52.7; Nah 1.15*

<sup>16</sup> Pani mo sopo tamlohi tari la rasu na Retiřuhu, sohen Isaiah mo vereá mara, 'Moli, hare mo rasu na sava mo rongoa isamam?'

*Isa 53.1*

<sup>17</sup> Ale haratu mo vujangia vara rasua mo vora na sava la rongoa, ale sava la rongoa mo mai na retivujavujangi na reti non Křisto.

<sup>18</sup> Pani na lo usia vara korong, Jew la sopo lo rongoa? Mo vono, la rongoa, matan Retiulia mo vereá vara,

'Leora mo vano na jara tari na varama,

nora reti la vano na jara mo isoiso na varama.'

*Psa 19.4*

<sup>19</sup> Pani na mele usia vara, korong Israel mo sopo levosahia? Matan na rani non Moses, God mo vereá mara,

'A pa vai kamim ha mereimerei

na mara jara tinatinapua,

a pa vai kamim ha lolokoru

na tamlohi řořoha mara jara tinatinapua.' *Deut 32.21*

<sup>20</sup> Ale hitahu Isaiah mo řomřilangi vara i vereá vara, 'La haratu la sopo aleau la hiteau.

Na hase vuhesiau isan la haratu

la sopo usia isaku.' *Isa 65.1*

<sup>21</sup> Pani isan Israel God mo vereá mara,

'Tarea na roi na limaku matara,

pani tarea la sopo ololo hiniau,

ale la lo lejiau.' *Isa 65.2*

## 11

*God Mo Tipahi Israel Teni?*

<sup>1</sup> Ale na lo usia nara, korong God mo tipahi na nona tamlohi teni mo vono? Mo vono! Matan enau sohená matea na vora Israel, mahapin Abraham, tavgavuín Benjamin.

<sup>2</sup> Mo vono, God mo sopo tipahi na nona tamlohi sei mo levosahira tiroma moiso. Ka lo řomřomi na sava Retitapu mo vereá matan Elijah sohená sava mo usia řilangi isan God mata posposi nona tavgavuín Israel sei mara, <sup>3</sup> Moli, la vilimatei na nom přovet, la viliroiroi na nom votavota, enau haseku na pa lo toho, ale la lo aleau vara la vilimateiau'.

*1 Kings 19.10, 14*

<sup>4</sup> Pani God hasena mo řaramia isana sohená sava? Enia mara, 'Enau na tapuhi nařihi na tamlohi mo tari vaha limaravrua (7000)

moiso sei la sopo popovitoho isan Baal'. *1 Kings 19.18*

<sup>5</sup> Mo sohena nake, tupu visaletē purongo God mo viʻonira na nona ʻomʻruhu. <sup>6</sup> Ale vara mo usuri na nona ʻomʻruhu, mo sopo matan te vavahinau, vara i vono, ʻomʻruhu atu i pa sopo ʻomʻruhu.

<sup>7</sup> I pa sohena sava natu? Israel la jovi na sava la lo alea, la alea vara la mai la tataholo na nahon God. Tatuara God sei mo tapuhira la lavia, pani mo pelati na ʻomin la haratu mo sopo tapuhira,

<sup>8</sup> mo usuri na sava la ulia vara, 'God mo vai na ʻomira la mate mo tikeli nake, mo pelati na matara, ale la sopo hitevosahi, mo pelati na perora, ale la sopo rongovosahi.'

*Deut 29.4; Isa 29.10*

<sup>9</sup> Ale David mo vereva mara, 'God o vai na hināu la opoira sohena vuna teni tara matea,

la sohena hināu mata tialahalaha isara, hināu mata sile na talai isara.

<sup>10</sup> O vai na matara la ʻoroʻoha matan vara la sopo hitevosahi,

ale o vai na haʻira la hoho na hina puhoni la lo lavira.'

*Psa 69.22-23*

*Matan Israel Romʻruhu Non God Mo Mai*

<sup>11</sup> Na lo usia vara korong, enira la tialahalaha matan vara la pa jovi vevuhi? Mo vono! Pani matan na nora jovi, God mo juri na tamlohi

ʻoroʻoha, mo vaia matan vara i vai Israel i mereimerei. <sup>12</sup> Ale vara vua nora hehe matan la tipahi nora Jujuri mo vai na nona tavgav mo mai isana tamlohi tari, ale vara vua nora jovi enia tavgav nona tamlohi ʻoroʻoha, ʻa sopo levosahia vara i pa mele ʻruhu jea sohena sava hin rani atu vara la mele pulutahi vevuhi isan God!

<sup>13</sup> Na lo vere la hināu tari nike matamim ka tamlohi ʻoroʻoha, God mo viʻoniau vara a vahaʻule isana tamlohi ʻoroʻoha, na tahe na noku vavahinau isamim na nahora, <sup>14</sup> vara a hite te malele hatea vara a vai na Jew la opoi na sava kamim ka tamlohi ʻoroʻoha ka lo lavia, ale hin malele atu a pa eʻi juri te tatuara. <sup>15</sup> Matan, vara vua nora tipahi enia God mo sari tamata mata tamlohi tari, i pa mele ʻruhu jea na varama sohena sava vara la mele hīlu, korong i pa sohen la haratu la mele turu na mateia. <sup>16</sup> Vara sope silesilea atu mata flaua sei la lo silea isan God tiroma mo tapu, sope flaua tari la pa tapu, ale vara wari vipahai atu la pa tapu, rangarangana sohena la tapu.

*Israel Enia Pulo Olive Atu God Mo Lavoa*

<sup>17</sup> Pani vara God mo tai naʻihi na tatua rangaranga pulo olive atu, ale God mo soʻotahi kamim olive urata, ka vano na livuhara, ale ka ulua na hanhani ʻruhu na pulon olive atu, <sup>18</sup> ha sopo hapahapa mata rangarangana. Pani vara ha hapahapa, ha lo ʻomʻromia vara kamim ka

sopo tueni na warina, pani warina mo lo tueni kamim.

<sup>19</sup> Ale vara ka lo vereva vara, 'La rangaranga atu God mo tai na'ihira vara i vai na masapa matakū.'

<sup>20</sup> Vara'uhū, mo vaia, pani ha lo ņomņomia, la rangaranga atu enira Jew, God mo tai na'ihira matan la sopo rasua, ale kamim ka lo toho atu matan ka rasua. Ha sopo ņomaulu hin kamim, pani ha matahuni na sava i efi masese isamim. <sup>21</sup> Vara God i sopo ņomi na rangaranga tataholo matan la tipahi nora Jujuri, i pa sopo ņomi kamim.

<sup>22</sup> Ha hitevosahia, vara posin God mo sohena sava, mo ņomņuhu ale mo ņilangi jea. Mo ņilangi jea isan la haratu la tipahi na nora Jujuri, pani mo ņomņuhu isamim, ale i pa ņomņuhu isamim vara ka lo tau na nomim rasu hinia, pani vara ka sopo mele tau na nomim rasua hinia, kamim sohena i pa tai na'ihira kamim. <sup>23</sup> Ale vara Jew la posi mai la tau na nora rasua hinia, God i pa mele soņotahira vano na pulon olive atu, matan God i efi mele soņotahira.

<sup>24</sup> Matan, vara mo avulahi vara i lavi kamim olive urata purongo, ale i soņotahi kamim ha vano na pulo pulana olive ņuhu, enia hina maņurahi matea, i pa mele malum isan God vara i mele tau na rangaranga tataholo i mele soņotahia na jarana tataholo na pulon olive atu.

### *Jujuri I Pa Tai Jerusalem*

<sup>25</sup> Matana, la voraiuku peresi na vevoraiuku, na opoia vara ha levosahi hina luhu nike matan vara ha sopo ņomaulu, God mo vai na mapun tatua tavgavu in Israel la ņilangi i pa tikeli rani atu evi tamlohi ņoņoha la unu vevuhi. <sup>26</sup> Ale vaon Israel tari la pa juri hin malele atu, sohen la ulia moiso vara,

'Tamlohi Jujuri matea i pa tai

Zion,\*

ale i pa posi na tavgavu in Israel

na nona posposi varama.

<sup>27</sup> Ale harihi enia noku retitauhi peresira, hin rani atu na lavi na'ihira na nora hehe.' *Isa 59.20-21*

<sup>28</sup> Jew matuvana nake la meresahi na Retiņuhu matamim, pani enira la pa lo toho viņoni non God mata nona retitauhi isan Abraham, Isaac peresi Jacob.

<sup>29</sup> Matan silesilea peresi na tovi non God la sopo efi jovi. <sup>30</sup> Sohen tuai ka sopo oloolo hin God, pani nake ka lavi na nona ņomopoia matan la sopo oloolo, <sup>31</sup> enira nake sohena, la sopo oloolo matan vara God i pa ņomopoi kamim, pani enira sohena, la pa efi lavi na nona ņomopoia.

<sup>32</sup> Matan mo sohen God mo pelatihoro na tamlohi tari na nora hehe matan la sopo oloolo, matan vara nona ņomopoia i efi toho isara isoiso.

*Paul Mo Hasohaso God*

\* **11:26:** Zion: Zion enia Jerusalem.



<sup>33</sup> Hare natu i eři vereea vara nona lelevosahi peresi na sava mo levosahia la řuhufuhu sohena sava! Mo sopo tea i eři levosahi na sava mo hatihia moiso, ale mo sopo tea i eři hitevosahia vara sava mo lo vaira mo vaira sohena sava.

<sup>34</sup> Matan hare i eři levosahia vara God mo lo řomřomi na sava? Hare mo tataholo vara i eři pisuhi na malele isana? *Isa 40.13*

<sup>35</sup> Teni hare natu, mo sile te hina silesilea isana matan vara i pa mele spaia? *Job 41.11*

<sup>36</sup> Matan God enia pulo hinau tari matan enia mo vaira, mo vaira la lo toho vara la pa sile na hasohaso isana. Mo tataholo vara tamlohi tari la sile na ololo isana tarea mata rani tui tui. Amen.

## 12

### *Mauri Paro Peresi Křisto*

<sup>1</sup> Matan la hinau sei God mo vaira moiso la vorai peresi na vevorai, na lo usia řilangi vara ha sile na epemim isan God sohena hina malamalai matea mo mauri mo tapu isana, haratu God i pa avulahi hinia. Har- ihi enia nomim lotu tataholo vara ha lo vaia isana. <sup>2</sup> Ha sopo hahau usuri na posposi non varama nike, pani ha tinařihia vara God i posi kamim matan vara ha eři levosahi na malele paro mata řomřomi, ale hin malele sei ha pa eři levosahia vara masalon God mo opoia vara ha pa vai na sava mo řuhu, ale mo tataholo, ale sava natu, mo vaia mo avulahi.

<sup>3</sup> Matan usuri na řomřuhu sei God mo silea isaku na lo vereea vara ha sopo hase řomaulu hin kamim i jeu na sava mo tataholo vara ha řomřomia, pani ha hase řomvosahi kamim i usuri na silesilea mata rasu atu God mo lo silea isamim. <sup>4</sup> Sohen epeřa

sopesopena mo mařivi, ale nora vavahinau la tinatinapua, <sup>5</sup> ale mo sohena na epen Křisto. Enřa mo isoiso řa sopesope epena, pani epena enia matelete, ale enřa hatehateahi nořa vavahinau la tinatinapua vara řa vaia. Ale matan enřa mo isoiso řa matea na epe hin Křisto, enřa řa nořa hatehateahi.

<sup>6</sup> Romřuhu non God mo silea isařa mo vaira řa eři vai na hinau hai, ale vara nom enia mata o retiman- govi, o vereuli na sava ko rasua vara God mo lo vereea isam, <sup>7</sup> vara nom enia mata o tueni na tinapua, o tueni mamahunira, vara nom enia mata o vujangi, o vujangi i řuhu, <sup>8</sup> vara nom enia mata o retituetueni, o vaia, vara nom enia mata o silesile, o silea na avulahi, vara nom enia mata o tiroma na tam- lohi, o vai mamahunia, vara nom enia mata o řomopoi hin te tinapua, o vaia na avulahi.

### *Posposi Tataholo Nona Mauri Kalesia*

<sup>9</sup> O sopo halu na nom opoia mata tinapua, pani o opoira varařuhu, ha řohu na sava mo hina sasati, ha turu na hinau mo řuhu. <sup>10</sup> Ha opoiopoi kamim na opoia varařuhu, ha lo kilau mata masapa vara ha sile na ololo

isana tinapua tiroma. <sup>11</sup> Ha sopo malokovari, pani ha vañileñile na vavahinau non Moli.

<sup>12</sup> Ha avulahi matan hinau sei ka lo ñomtoho hinia vara God i pa vaia isamim, ha ñomperavu na rani ñilangi, ha lo usiusi tarea. <sup>13</sup> Vara te tapuhi non God mo veju-veju hin te hinau, ha tuenira na nomim hinahinau, ale ha avulahi vara ha lavi na tamlohi na imamim.

<sup>14</sup> Ha usi God vara i vaia i ñuhu isan la haratu la lo tipahi kamim, ha leñuhu hinira, ha sopo lesati hinira.

<sup>15</sup> Ha avulahi peresi la haratu la avulahi, ha tangi peresi la haratu la rongo mo sati.

<sup>16</sup> Ha ñomñomi na tinapua i tataholo hin kamim, ha sopo haruharu matan vara tamlohi aulu la pa tametame kamim, pani ha avulahi vara ha lo toho peresi na tamlohi purongo, ale ha sopo ñomaulu hin te rani.

<sup>17</sup> Ha sopo kelekele. Ha hahau na malele matea sei tamlohi tari la hitevosahia vara mo ñuhu. <sup>18</sup> Vara ha eñi vaia, ha mauri usuri na malele mata tamata peresi na tamlohi tari.

<sup>19</sup> La tapala ñuhuruñuhu, ha sopo kelekele hin te rani, pani ha sile na masapa isan God vara i eñi sile na nona talai lolokoru mata hehe matan la ulia na Retiulia vara,

‘Enau a pa kelea,  
 enau a pa volira,  
 enau Moli na lo vereaa.’  
*Deut 32.35*

<sup>20</sup> Ha vaia sohen harihi:  
 ‘Vara nom meresahi mo marohati,

o vahania,  
 vara mo mañohu,  
 o sile te wai isana,  
 ale matana, i pa mahanuhanu  
 mata sava mo vaia isam.’

*Prov 25.21-22*

<sup>21</sup> Ha sopo tinañihi na hehe vara i jeu kamim, pani ha jeu na hehe na vavahinau ñuhu.

## 13

*Ha Oloolo Hin La Haratu La Lo Tauri Na Suiha*

<sup>1</sup> Tamlohi rasua tari ha oloolo hin la haratu la lo tauri na suiha, matan mo sopo tea vara i lo toho na suiha vara God mo sopo tinañihira, ale la haratu la lo turu, la turu matan God mo turuhira.

<sup>2</sup> Matana, sava tamlohi mo leji la haratu God mo taura la tauri na suiha, la lo leji na sava God atu mo vaia, ale la pa lavi na nona talai.

<sup>3</sup> Matan tamlohi aulu na jara, la sopo matan vara tamlohi la pa matahunira vara la lo vai na posposi tataholo, pani tamlohi sei la lo vai na sasati la pa matahunira. Vara o vai na hinau tataholo, la pa ñuhu isam. <sup>4</sup> God mo tau la haratu la lo aulu matan vara la tuenihio. Pani vara ko lo vai na hehe, o pa matahu, matan God mo taua na limara vara la pa sileho na nom talai.

<sup>5</sup> Matana, mo tataholo vara o oloolo, mo sopo mata talai purongo, pani matan vara ñomim i tataholo na nahon God.

<sup>6</sup> Matan hinau sei, mo tataholo vara ha voli na nomim takis. Mania atu i pa tueni la haratu la lo tauri na suiha vara la vai voko atu God mo taua na limara. <sup>7</sup> Ha sile na

sava ka ave hinia isara, ale ha voli na takis tinatinapua isan la haratu la lo toho vara ha pa volia isara, ha sile na oloolo isan la haratu mo tataholo vara la lavi na oloolo.

### *Opoia Mo Maʻivisi Na Leu*

<sup>8</sup> Ha sopo ave isan tea, pani ave atu enia vara ha pa volia tarea enia vara ha opoiopoi kamim, matan haratu mo opoi na tinapua mo lo maʻivisi na leu non God. <sup>9</sup> Na leu non God, retileu matuvana la lo toho sohen harihi: o sopo vaivaileu peresi na tinapua mo lahi moiso, o sopo vilimatei na tamlohi, o sopo vavanaho, o sopo romusuri, peresi te mele retileu tinapua la pisuhi na retileu matelete purongo sei mara, 'O opoi na tinapua sohen ko lo hasem opoiho!' *Lev 19.18*

<sup>10</sup> Opoia mo sopo vai te hina sati isana tinapua, ale matana, opoia enia mo maʻivisi na leu.

<sup>11</sup> Varaʻuhu ha levosahia vara nake mo sopo rani mata juruvi romaliho, matan rani mata juri mo vejuveju, mo mele mariviti mo jeu rani atu ʻra pa tau na noʻa rasua hinia tiroma sei. <sup>12</sup> Pongi mariviti vara i isoiso, rani juri mariviti vara i pala, ale ʻra sopo toho na roʻroha, ʻra pulahi na noʻa posposi sasati, ale ʻra ru na posposi tataholo sei mo tai isan God. <sup>13</sup> Ra hahau na posposi tataholo sohen ʻra lo hahau na malarani, mo sopo hin na matavuhi mata lavilavi na tinapua, peresi na putu mata

wai, teni posposi viriu, teni romromi na hina lumiha, teni vasvas teni mereimerei. <sup>14</sup> Pani ha ru Moli Iesu Kristo na maurimim, ha sopo sile na masapa vara ha vahani na maurimim na masalo varama.

## 14

### *Haratu La Sopo Rilangi Na Nora Rasua*

<sup>1</sup> Ha lavi la haratu romira la lo kaka vara sava natu mo tataholo na posposi rasua, ale ha sopo arera na hinau la rasua. <sup>2</sup> Tamlohi hai la romromia vara mo tataholo vara la hani na hinau tari, pani hai romira la sopo rilangi sohera, la lo hani na pere pahai purongo. <sup>3</sup> Haratu mo hani na hinau tari i pa sopo hiteʻesi haratu mo tapuhoro te hanhahi, ale haratu mo tapuhoro te hanhahi, i pa sopo ari haratu mo lo hani na hinau tari, matan God mo lavia nona moiso. <sup>4</sup> Engko hare vara o eʻri ari na volitusi nona tinapua? Nona tamlohi tavera purongo i pa vereva vara enia mo tataholo teni mo vono, ale i pa turu matan Moli i pa eʻri vaia i turu na rani aria.

<sup>5</sup> Tamlohi hai la romromia vara na nahon God rani matea mo mele tapu mo jeu na tinapua mata lotu God, pani tamlohi hai la hitea vara rani tari la sohesohera purongo. Mo tataholo vara tamlohi hatehateahi la hatihia vara sava mo tataholo na romira. <sup>6</sup> Haratu mo sile na oloolo isana rani matea, mo vaia matan vara i sile na oloolo isan Moli. Haratu mo

lo hani na hinau tari, mo sile na ooloo isan Moli na nona vere meje matana, ale haratu mo tapuhoro na hanhani, mo tapuhoroa matan vara i sile na ooloo isan Moli, ale mo vere meje isan God. <sup>7</sup> Matan mo sopo tea vara i mauri nona hasena, ale mo sopo tea vara i mate nona hasena. <sup>8</sup> Vara řa mauri, řa mauri non Moli, vara řa mate, řa mate řa sahe isan Moli, matan haratu, vara řa mauri teni řa mate, enřa non Moli. <sup>9</sup> Matan harakerihi natu Křisto mo mate ale mo mele mauri, matan vara i eři Moli non la haratu la mate peresi la haratu la mauri.

<sup>10</sup> Engko, mata sava ko ari na voraim, teni vara ko hiteřesia? Matan enřa tari řa pa turu na nahon God mata aria, <sup>11</sup> matan la ulia vara,

‘Moli mo vereea mara:

Matan enau na lo mauri, tamlohi tari la pa popovi-toho isaku, ale meme tari la pa taviti isan God.’

*Isa 45.23*

<sup>12</sup> Matan haratu mo mera purongo vara enřa tari řa pa turu na nahon God vara řa řarami na nona aria mata nořa vavahinau. <sup>13</sup> Matan hinau atu, řa sopo mele sile na talai isařa hatehateahi, pani i pa mele řuhu vara řa hatihia vara řa sopo mele vai te hinau vara i vai na voraiřa tinapua i tialahalaha teni i ori hinia.

<sup>14</sup> Usuri na řomřomi non Moli Iesu, na lo levosahia mo řuhu vara mo sopo te hanhani mo lumiha vara řa sopo eři hania, pani enia

mo lumiha isan haratu mo řomřomia vara mo lumiha. <sup>15</sup> Vara voraim řomina mo lo sati na sava ko lo hania, ko sopo mele hahau na opoia. O sopo komo haratu Křisto mo mate matana, mata ham hinau purongo. <sup>16</sup> Ale matana, o sopo sile na masapa isan tea vara i jovi na hehe mata sava ko levosahia vara la pa retisasati hiniho matana, hina purongo vara ko levosahia vara mo tata-holo.

<sup>17</sup> Matan sava ko lo hania teni ko lo inua, la sopo aulu hin mauri atu God mo aulu hinia, pani posposi tata-holo, tamata peresi avulahi atu la tai isan Tanume Tapu la aulu na mauri. <sup>18</sup> Hare sei, mo volitusi isan Křisto hin malele sei, God i pa avulahi hinia, ale tamlohi sohena la pa avulahi hinia. <sup>19</sup> Matan haratu, mo řuhu vara řa tungui na sava i pa vai na tamata, ale na sava i pa tueni na tamlohi la ulua na nora rasua.

<sup>20</sup> O sopo komo na vavahinau non God mata hanhani purongo, vara řuhu hinau tari la vokevoke, pani mo sopo tataholo vara o hani te hinau vara i pa vai na tinapua i jovi matana. <sup>21</sup> I pa mele řuhu vara o sopo hani te mit teni o inu te wai řilangi vara i pa vai na voraim i jovi na nona rasua. <sup>22</sup> Nom rasua enia nom hasem peresi God. Haratu mo vai na hinau matan mo levosahia vara mo tataholo vara i vaia, i pa avulahi matan mo levosahia vara i pa sopo lavi na talai

matana. <sup>23</sup> Pani haratu mo sopo levosahi mamahunia vara sava mo lo hania mo tataholo na nahon God teni mo vono, enia i pa lavi na talai vara i hania matan mo sopo hania usuri na nona rasua, ale sava mo sopo vora na rasua enia hehe.

## 15

### *Ha Vai Na Tovongi Ruhu*

<sup>1</sup> Enra sei noŋa rasua mo ŋilangi, mo tataholo vara ŋa tueni la haratu ŋomira mo sopo ŋilangi, mo sopo tataholo vara ŋa hase kilauŋa purongo. <sup>2</sup> Mo tataholo vara enra hatehateahi ŋa vaia i ŋuhu isana tavgavuiŋa, ŋa tuenira la ulua na nora rasua, <sup>3</sup> matan Kŋisto mo vai na tovongi matea isaŋa mo sopo hase kilaua purongo, pani sohen la ulia vara Kŋisto mo vereea isan God mara, 'Na rani tamlohi la vere-satiho, enau na rongo mo sati matana.' *Psa 69.9*

<sup>4</sup> Matan sava la ulia tuai la ulia matan vara i pa vujangiŋa, la lo sileŋa na ŋomtoho, la tahe na ŋomiŋa na noŋa saovi na ŋomperavu mata Retitapu non God.

<sup>5</sup> Ale nake na lo usiusi vara God mata ŋomperavu peresi na tuetueni, i tinaŋihia vara ha ŋomŋomi na tinapua i tataholo hin kamim sohen Kŋisto Iesu mo lo vaia, <sup>6</sup> matan vara kamim mo isoiso na leo matea, ha pa sile na hasohaso tavera isan God Taman noŋa Moli Iesu Kŋisto.

<sup>7</sup> Matana, ha avulahi hin kamim hatehateahi sohen Kŋisto mo avulahi hin kamim matan vara God i lavi na

hasohaso matana. <sup>8</sup> Ka levosahia vara Kŋisto mo sinai sohena volitusi isana Jew, vara i vujangia vara God mo sopo tope na nona reti mo retitauhi hinia isana tama Jew tuai, <sup>9</sup> ale matan vara tamlohi ŋoŋoha la pa hasohaso God mata nona ŋomopoia sohen la ulia vara, 'A pa hasohasoho isana tamlohi mara jara tinatinapua, a pa lalavete a tahe na hijam i aulu.'

*Psa 18.49*

<sup>10</sup> Mo mele vereea na jara tinapua vara, 'Kamim tamlohi ŋoŋoha! Ha avulahi peresi na nona tamlohi, tavgavu in Israel.' *Deut 32.43*

<sup>11</sup> Ale mo mele vereea vara, 'Kamim tamlohi sei ka tamlohi ŋoŋoha, ha hasohaso Moli, ale tamlohi tari ha tahe na hijana i aulu.'

*Psa 117.1*

<sup>12</sup> Ale mele vahatea, Isaiah mara, 'Mahapin Jesse matea i pa turu, enia sei i pa aulu na tamlohi ŋoŋoha, ale enira la pa lo ŋomtoho isana.'

*Isa 11.10*

<sup>13</sup> Ale nake na lo usiusi vara God sei mo lo sile na ŋomtoho, i maŋivisi kamim na avulahi peresi na tamata na nomim rasua, matan vara na suihan Tanume Tapu nomim ŋomtoho i pa maŋivi savulevule.

*Paul Mo Verera Na Nona Vavahinau*

<sup>14</sup> Ale la voraiku peresi na vevoraiku, na hase levosahia

mo ŋuhu vara ka lo vai na posposi ŋuhu isana tinapua, matan ka pete levosahi na sava God mo opoia moiso, ale ha pa eŋi vere tataholoia isamim hasemim. <sup>15</sup> Pani hin te hinau, na lo uliuli ŋilangi isamim vara ha mele ŋomŋomira, na vaia matan ŋomŋuhu non God enia mo viŋoniau, <sup>16</sup> matan vara a volitusi non Kŋisto Iesu isana tamlohi ŋoŋoha, vara a lavi na Retiŋuhu non God isara sohena vavahinau nona pŋis matea matan vara haratu la tamlohi ŋoŋoha la eŋi tau na nora rasua hin Kŋisto, la mai sohena malamalai ŋuhu matea God mo avulahi hinia, ale matan vara i pa vaira la vokevoke na suiha Tanume Tapu. <sup>17</sup> Hin Kŋisto Iesu enau a eŋi hapahapa na noku vavahinau na vaia non God, <sup>18</sup> matan a pa sopo vere te hinau, pani sava Kŋisto mo vaia hiniau matan vara haratu la tamlohi ŋoŋoha la ololo na Retiŋuhu na noku retireti peresi na noku vavahinau, <sup>19</sup> ale hiniau la ololo mata suiha mata matamata peresi na hina maŋurahi tavera na suiha Tanumen God, matan vara i tapulo Jerusalem i ŋalihi i tikeli Illyricum, enau na maŋivisi vevuhi na vavahinau mata Retiŋuhu non Kŋisto; <sup>20</sup> ale na tau na ŋomiku vara a retivujavujangi na Retiŋuhu, pani mo sopo na jara sei la pete rongo na hijan Kŋisto ea moiso, mo sopo ŋuhu vara a voro na jara nona tamlohi tinapua enia mo pete tapulo voro na vao kalesia tiroma ea moiso,

<sup>21</sup> pani mo lo usuri na sava la ulia vara,  
'La haratu mo sopo tea la so-  
rahia  
isara hin te rani, la pa  
hitevosahia,  
ale la haratu la sopo lo  
rongo  
na sorasarahina hin te  
rani,  
la pa rongovosahia.' *Isa*  
*52.15*

<sup>22</sup> Vavahinau atu natu, mo horoau vaha visa moiso vara a mai isamim.

*Paul Mara I Pa Sivo Jerusalem*

<sup>23</sup> Pani nake, matan mo sopo te mele masapa vara a vavahinau hin la jara atu na lo vano hinira moiso, ale matan tuai moiso na opoia vara a pa mai isamim, <sup>24</sup> na lo ŋomtoho vara na malele vara a sivo Spain a pa rohi kamim, na opoia vara a pa toho peresi kamim mata makomo rani, ale na rani vara a malue, ha pa tueniau na maleleku.

<sup>25</sup> Pani nake, na lo sivo Jerusalem, na lavi na sile-silea mata mania vara i pa tueni na tapuhi non God atu.

<sup>26</sup> Matan tamlohin Macedonia peresi Achaia la avulahi vara la sile te silesilea matan vara i pa tueni na tapuhi tilavono Jerusalem.

<sup>27</sup> Enira la avulahi vara la tuenira, ale mo tataholo vara la vaia isara, matan haratu tamlohi ŋoŋoha sei la lavi na hina ŋuhuŋhun Tanumen God mo silea, i pa tataholo vara la ase na nora silesilea mata mania isara Jerusalem.

<sup>28</sup> Hin rani atu vara a tau pa mania atu isan la haratu

Jerusalem, moiso vara na maleleku vara a sivo Spain a pa rohi kamim. <sup>29</sup> Na levosahia vara a mai isamim, a pa mai na leʻruhu non Křisto sei i pa ʻruhu jea matamim.

<sup>30</sup> La voraiku peresi na vevoraiku, na lo usia řilangi isamim na hijan Moli Iesu Křisto, ale na opoia non Tanumen God, ha turu peresiau na nomim usiusi isan God matakū, <sup>31</sup> ha usiusi vara i juriau na liman la haratu Judea sei la sopo rasua, ale vara noku vavahinau Jerusalem i pa tataholo na naho tapuhi non God ea, <sup>32</sup> matan vara na masalon God, a pa mai isamim na avulahi, ale řa pa rongo i řuhu jara matea matan a pa toho peresi kamim.

<sup>33</sup> God mata tamata i pa toho isamim mo isoiso, amen.

## 16

### *Retioloolo Non Paul*

<sup>1</sup> Ale na tau vevoraifā nike na nahomim, Deacon Phoebe volitusi mata vao kalesia mata vanuan Cenchrēae, <sup>2</sup> na opoia vara ha avulahi vara ha lavia hin Moli usuri posposi sei mo tataholo isana tapuhi non God, ale ha tuenia na nona opoia tari, matan enia hařai tuetueni řuhu matea mo tueni na tamlohi matuvana, ale mo lo tueniau sohera.

<sup>3</sup> Ha sile na retioloolo isan Priscilla enia Aquila, tapalaku na vavahinau non Křisto Iesu, <sup>4</sup> enira mariviti la mate matan la lo tueniau, mo sopo enau haseku na lo

vere meje isara, pani vao kalesia tari non la haratu la tamlohi řořoha la vere meje isara. <sup>5</sup> Ha sile na retioloolo isan la haratu la lo matavuhi na imara, ha sile na retioloolo isan Epaenetus tamlohi řuhu matea sei tamlohi la řomřuhu hinia, enia mo tamlohi tiroma matan Asia sei mo posi mo mai isan Křisto mata noku vavahinau. <sup>6</sup> Ha sile na retioloolo isan Mary, enia sei mo voko řilangi matamim. <sup>7</sup> Ha sile na retioloolo isan Andronicus peresi narouna Junias tadvavin Israel, na rani na lo toho na ima řilangi enira la lo toho peresiau. Vahařule non Iesu la levosahi mamahunira, enira la mai isan Křisto tiroma hinia. <sup>8</sup> Ha sile na retioloolo isan Ampliatas, tamlohi řuhu matea na opoia hin Moli. <sup>9</sup> Ha sile na retioloolo isan Urbanus, tapalařa na vavahinau non Křisto, peresi Stachys na opoia.

<sup>10</sup> Ha sile na retioloolo isan Apelles, mo turu řilangi na rani řilangi moiso, ale Křisto mo avulahi hinia. Ha sile na retioloolo na iman Aristobulus. <sup>11</sup> Ha sile na retioloolo isan tadvavuiku na vaon Herodion, ha sile na retioloolo isan la haratu non Moli na iman Narcissus. <sup>12</sup> Ha sile na retioloolo isan la hařai atu la lo vavahinau non Moli, Tryphaena peresi Tryphosa. Ha sile na retioloolo isan hařai řuhu sei Persis, enia mo vavahinau mo řilangi non Moli. <sup>13</sup> Ha sile na retioloolo isan Rufus, viřoni non Moli, peresi tinana sei, enia mo kilauau

sohena natuna matea.

<sup>14</sup> Ha sile na retioloolo isan Asyncritus, Phlegon, Hermes, Patrobas, Hermas, peresi la vorai atu la lo toho peresira. <sup>15</sup> Ha sile na retioloolo isan Philologus, Julia, Nereus peresi vetasina Olympas, peresi na tapuhi tari sei non God la lo toho peresira. <sup>16</sup> Ha tapatapai kamim na pungosi mata ooloo, vao kalesia tari non Křisto la sile na nora retioloolo isamim.

### *Isoiso Reti Non Paul*

<sup>17</sup> La voraiuku peresi na vevoraiuku, na lo usia řilangi isamim vara ha lo kilau matan la haratu la pulo patumasa, ale haratu la lo posileji na vujangi tataholo ka lavi moiso, ale ha vahaři hinira, <sup>18</sup> matan tamlohi sohen haratu la sopo volitusi non nořa Moli Křisto, pani mata pangera purongo, ale na nora haruharu peresi na nora retimemeji la lo halu na řomin haratu la sopo lelevosahi. <sup>19</sup> Matan tamlohi tari la levosahi na nomim ooloo, ale mo vaiau na avulahi hin kamim, pani na opoia vara ha lelevosahi na sava mo řuhu, ale vara ha sopo tia na hina sasati. <sup>20</sup> Ale i pa sopo tuai God mata tamata i pa putputi Setan na ruhuruhi palomim. Ale řomřuhu non Moli Iesu Křisto i pa toho isamim.

<sup>21</sup> Timothy, tapalaku na vavahinau, mo sile na retioloolo isamim; enia peresi Lucius enia Jason, peresi

Sosipater, enira tavgavuiku Israel.

<sup>22</sup> Enau Tertius, na uli leta nike usuri na sava Paul mo vereia isaku, enau sohena, na lo sile na noku retioloolo isamim hin Moli.

<sup>23</sup> Enau Paul na lo toho na iman Gaius, mo lo sile na nona retioloolo isamim, enia sei tamlohi tavera sei mo lo tueni na vao kalesia tari nike, ale Erastus, treasurer mata taon tavera nike peresi voraiřa Quartus, la sile na nora retioloolo isamim.

<sup>24-25</sup> Ra hasohaso God, enia i eři vai kamim ha řilangi i usuri na noku Retiřuhu peresi na retivujavujangi hin Iesu Křisto, i usuri na vujangi mata hina luhu sei God mo jarohia tuai tuai jea, <sup>26</sup> pani nake mo pala, ale na Retiulia sohena přovet la ulia tuai la vujangia mo mera isana mara jara tinatinapua tari, mo usuri na retileu non God sei mo lo toho rani tui tui, matan vara i vai na tamlohi la ooloo usuri na malele rasua, <sup>27</sup> isan God enia hasena mo lelevosahi, i pa lavi na hasohaso mata rani tui tui hin Iesu Křisto. Amen.



# 1 Corinthians

## Tiroma Leta

### Paul Mo Ulia Isana

### Mara

## Corinth

## Leta Nike

Leta akerihi mo usuri leta na tinapua matea Paul mo ulia isana mara Corinth moiso (5.9), hin leta nike Paul mo rarami na nora retiusia sei la sohaia isana moiso (7.1). Corinth enia taon tavera jea matea na pahisa tasi Greece. Vao kalesia Corinth la patumasa, la lo aseasera (1.10–4.21). Mo rarami na retiusia mata lahi (7.1–40), mata hanhani sei la silea isana tamasi (8.1–13), mata posposi tataholo mata lotu (10.1–14.40), peresi na sauteterahi non Iesu peresi na nona tamlohi usuri (15.1–58). Paul mo vereea isara mara opoia mo aulu jea, mo jeu na rasua peresi na romtoho matan enia i pa toho jejeu (13.13).

### Hin Leta Nike

1. Tiroma Retireti Non Paul (1.1–9)
2. Paul Mo Vereea Mara La Turu Jara Matea (1.10–4.21)
3. Mauri Na Vao Kalesia (5.1–7.40)
4. Posposi Tataholo Mata Vao Kalesia (8.1–11.1)
5. Posposi Tataholo Mata Lotu God (11.2–14.40)
6. Křisto Mo Aulu Na Mateia (15.1–58)
7. Silesilea Nona Kalesia Jerusalem (16.1–4)
8. Paul Mo Hahau Corinth Mata Sava (16.5–12)
9. Retioloolo Non Paul (16.13–24)

### Retioloolo Non Paul Isana Kalesia

<sup>1</sup> Enau Paul, na vahařule non Křisto Iesu usuri na masalon God, peresi voraiřa Sosthenes, <sup>2</sup> kama sohai leta nike isana vao kalesia non God Corinth, isana tapuhi hin Křisto Iesu, God mo tovi kamim tapuhi peresi la haratu na jara tari sei la lo lotu Moli Iesu Křisto, nora Moli, ale enia nořa Moli,

<sup>3</sup> řomřuhu peresi na tamata la tai isan God Tamařa, peresi Moli Iesu Křisto, la vano isamim.

### Paul Mo Vere Meje Isan God

<sup>4</sup> Na lo vere meje isan God terea matamim matan řomřuhu sei God mo silea isamim hin Křisto Iesu, <sup>5</sup> matan enia mo vai kamim ka ulua mo řuhu hinia na retireti tari peresi na lelevosahi tari, <sup>6</sup> harihi mo vujangia vara sava na vereea isamim matan Křisto mo varafuhu na maurimim, <sup>7</sup> matan vara ka sopo vejeveju hin te otori sei Tanumen God mo lo silea, ale ka lo kilau matan rani atu nořa Moli Iesu Křisto i pa mele pala hinia, <sup>8</sup> enia i pa vai na nomim rasua i řilangi i kakau na isoisona, i pa sopo tea i eri tuvai kamim hin te hinau hin rani atu non nořa Moli Iesu Křisto. <sup>9</sup> God enia i sopo eři tope na nona retitauhi, God mo tovi kamim vara ha tapala peresi Natuna, Iesu Křisto, nořa Moli.

### Patumasa Na Lolo Vao Kalesia

<sup>10</sup> Na lo usia řilangi isamim la voraiķu peresi na vevo-raiķu, na hijan nořa Moli Iesu

Křisto, vara kamim mo isoiso nomim reti i matea, ale i sopo te patumasa isamim, pani ha matea na řomřomi matea, ale ha matea na nomim ari. <sup>11</sup> Matan la voraiku peresi na vevoraiku, na rongo na reti matea mo tai na vaon Chloe vara, kamim ka lo vasvas isamim. <sup>12</sup> Na lo vereea matan vonamim hai la lo vereea lara, “Enau na usuri Paul!” tea la vara “Enau na usuri Apollos!” tea la vara “Enau na usuri Peter!” moiso tea la vara “Enau na usuri Křisto!” <sup>13</sup> Ha eři topetope Křisto? Paul mo mate na talopeilopei matamim? Teni ka lavi na paptijo na hijan Paul? <sup>14</sup> Enau na lo vere meje isan God matan enau na sopo paptijo hin te vonamim hatea, pani Crispus peresi Gaius purongo, <sup>15</sup> matan vara i pa sopo te vonamim hatea i eři vereea vara enia mo lavi na paptijo na hijaku. <sup>16</sup> Varařuhu, na paptijo na vao iman Stephanas, pani korong na sopo mele paptijo hin te tinapua. <sup>17</sup> Matan Křisto mo sopo řuleau vara a paptijo, pani vara a retivujavujangi na Retiřuhu ale mo sopo hin te reti mo řilangi mata levosahia, vara i vono talopeilopei non Křisto i pa sopo te řaramina.

### *Lelevosahi Non God*

<sup>18</sup> Matan reti mata talopeilopei enia hina rongorongo vono isan la haratu la lo vano na komokomo, pani isařa sei řa juri hinia, enia suihan God. <sup>19</sup> Matan Isaiah mo ulia vara,

‘Enau a pa komo na lelevosahi nona tamlohi lelevosahi, ale a pa vai na řomřomi nona tamlohi lelevosahi i mai hina purongo.’ *Isa 29.14*

<sup>20</sup> Nene tamlohi lelevosahi? Nene tamlohi vujangi mata leu non God? Nene tamlohi mo eři retireti na varama nake? Ra eři vereea vara God mo vai na lelevosahi nona tamlohi mata varama la mai hina rongorongo vono purongo. <sup>21</sup> Matan usuri na lelevosahi non God, God mo taua vara tamlohi na varama, la sopo eři lavutia na nora lelevosahi purongo. God mo avulahi vara i juri la haratu la rasu na hina rongorongo vono sei kama lo retivujavujangi hinia, <sup>22</sup> matan Jew la lo usia řilangi vara God i vai te matamata vara la hitea ale la pa rasua, ale tamlohi řořoha la opoi vara la ale na lelevosahi vara la rasua, <sup>23</sup> pani kamam kama lo retivujavujangi na mateia non Křisto na talopeilopei, enia hina tialahalaha matea isana Jew, ale enia hina rongorongo vono isana tamlohi řořoha sohena mara Greek. <sup>24</sup> Pani isařa sei God mo toviřa, hina purongo vara enřa Jew teni tamlohi řořoha, enřa řa eři hitevosahi na suihan God peresi na nona lelevosahi řuhu hin Křisto. <sup>25</sup> Matan hina rongorongo vono non God enia mo jeu na lelevosahi nona tamlohi, ale hinau non God sei tamlohi la vereea vara mo sopo te suiha

hinia, enia mo jeu na suiha nona tamlohi.

<sup>26</sup> Ale la voraiku peresi na vevoraiku, ha to řomřomia vara hin rani atu God mo tovi kamim, mo sopo te matuvana isamim ka tamlohi lelevosahi na naho tamlohi, mo sopo te matuvana ka tauri na suiha, mo sopo te matuvana ka vora tamlohi aulu. <sup>27</sup> Pani God mo viřoni na hinau la rongorongo vono na varama matan vara i vai na tamlohi lelevosahi la mahanuhanu; ale God mo viřoni na hinau sei mo sopo te suiha hinira na varama vara i vai na tamlohi suiha la mahanuhanu. <sup>28</sup> God mo viřoni na hinau la atano na varama, tamlohi la hiteřesira, hinau mo sopo te hinau hinira, mo vaira matan vara i vai la hinau sei tamlohi la lo vereva vara la hina aulu, la mai hina purongo, <sup>29</sup> matan vara tea i pa sopo eři retihapahapa na nahon God.

<sup>30</sup> Enia pulo maurimim hin Křisto Iesu. God mo vai Křisto enia nořa hina lelevosahi, enia natu, mo vaira řa tataholo na nahon God, ale enia malele mata vaira řa tapu, enia mo hase silea vara i volituhuřa. <sup>31</sup> Ale matan haratu sohen la ulia vara,

‘Mo řuhu vara haratu mo lo retihapahapa,  
i pa hapahapa hin Moli.’  
*Jer 9.24*

## 2

### *Talopeilopei Non Křisto*

<sup>1</sup> La voraiku peresi na vevoraiku, hin rani atu na mai isamim, na sopo mai

vara a retivujavujangi na hina luhu mata juri non God na retitavera teni na retilelevosahi. <sup>2</sup> Matan enau na tau na řomiku vara a pa sopo vujangi te hinau tinapua pani Iesu Křisto purongo, ale hin na nona mateia na talopeilopei. <sup>3</sup> Ale hin rani atu na lo toho peresi kamim mo sopo te suihaku, na matahu, ale na savaravara tavera matan na sopo levosahia vara sava i pa masese isaku, <sup>4</sup> ale noku retireti peresi na noku retivujavujangi la sopo reti-haluhalu mata lelevosahi, pani na limaku Tanumen God mo vujangia isamim na matamata peresi na suiha, <sup>5</sup> matan vara nomim rasua i pa sopo turu na lelevosahi nona tamlohi, pani na suihan God purongo.

### *Lelevosahi Mo Tai Isan God*

<sup>6</sup> Pani isan la haratu la jea, kama lo retireti na hina lelevosahi, pani mo sopo na hina lelevosahi mata varama nake, teni hina lelevosahi nona tamlohi aulu mata varama nake, enira la haratu sei la lo vano na nora komokomo. <sup>7</sup> Pani kama lo vereva na lelevosahi non God matea sei mo lo luhu, enia God mo taua matařa tuai moiso varama mo sopo lo toho, matan mauri řuhuřuhu atu na tuka. <sup>8</sup> Mo sopo te tamlohi aulu na varama nake i levosahia matan, vara la pa lo levosahia la pa sopo vili matei Moli mata řuhuřuhu hin talopeilopei atu. <sup>9</sup> Pani sohen la ulia mo vereva vara,

'Sava te mata mo sopo lo hitea,  
 teni te pero i rongoa,  
 teni tea i řomřomia,  
 sava God mo tau mamahunia moiso,  
 matan la haratu mo lo opoira.' *Isa 64.4*

<sup>10</sup> La hinau nike, God mo vujangia isařa hin Tanumena. Matan Tanumena mo levosahi na hinau tari peresi na lolo řomřomi non God.

<sup>11</sup> Matan hare mo levosahi na řomřomi non tamlohi tinapua matea pani tanumen tamlohi atu purongo sei mo lo toho na lolona? Ale mo sohena purongo, mo sopo tea i eři levosahi na řomřomi non God pani Tanumen God purongo.

<sup>12</sup> Ale nake, enřa řa sopo lavi na tanume mo tai na varama, pani řa lavi Tanume atu mo tai isan God matan vara řa pa eři levosahi na hinau God mo sile purongoia isařa. <sup>13</sup> Ale kama vujangi la hinau sei mo sopo usuri na lelevosahi nona tamlohi, pani na retireti Tanumena mo vujangia isamam, kama lo sořotahi na řomřomi non Tanumena peresi na retivararuhu non Tanumena, ale kama vereulira isan la haratu Tanumena mo lo toho isara. <sup>14</sup> Tamlohi purongo i sopo eři lavi na hinahinai non Tanumen God, matan enira hina rongorongo vono isana, ale enia i sopo eři levosahira matan Tanumen God purongo i eři vujangira isana. <sup>15</sup> Tamlohi atu Tanumen God mo lo toho isana, i eři ari mamahuni na hinai tari, pani tinapua i pa sopo

eři mele ari tamlohi atu. <sup>16</sup> Matan reti non God mo vereava,

'Hare mo levosahi na řomin Moli?

Hare i pa eři pisuhi na malele isana?' *Isa 40.13*

Pani enřa řa lavi na řomin Křisto.

### 3

#### *Volitusi Non Křisto*

<sup>1</sup> Pani, la vorai peresi na vevorai, hin rani atu enau na lo toho peresi kamim, na sopo retireti isamim sohena tamlohi rasua la jea. Mo vono. Na lo retireti isamim sohena natuvarihimatan ka pa lo usuri na posi tamlohi varama, ka pa lo pipi na maurin Křisto.

<sup>2</sup> Na vahani kamim na wai susu, mo sopo na hanhani řilangi, ale mo tikeli nake, ka sopo lo tatamahu matana,

<sup>3</sup> matan ka pa lo toho na suiha masalomim. Matan ka mereimerei hin kamim hatehateahi, ale ka lo vasvas hin kamim hatehateahi. Matan posposi sei mo vujangia vara kamim ka pa lo toho na suiha masalomim. Ka lo hahau sohena tamlohi varama. <sup>4</sup> Matan vonamim matea mara, 'Enau na usuri Paul!' moiso tinapua mo vereava mara, 'Enau na usuri Apollos!' mo vujangia vara ka lo hahau sohena tamlohi purongo.

<sup>5</sup> Apollos enia mo řuhu mata sava? Paul mo řuhu mata sava? Kamam volitusi, ale hin kamam kamim ka mai na rasua, sohena Moli mo taua moiso vara hare i pa vai na sava. <sup>6</sup> Enau na

lavo, Apollos mo tau na wai, pani God natu, mo vaia mo ulua. <sup>7</sup> Haratu mo lo lavo teni haratu mo lo tau na wai, mo sopo te hinau ŋuhu hinia, pani God purongo sei mo lo vaia mo ulua. <sup>8</sup> Haratu mo lo lavo, ale haratu mo lo tau na wai, enira la matea, ale la pa lavi na volira i tataholo na sava la lo vaira hatehateahi. <sup>9</sup> Matan kamam kama tapala na vavahinau non God. Kamim lovuhai non God, ale ka iman God.

<sup>10</sup> Enau tamlohi tavera mata voro ima usuri na ŋomŋuhu non God, ale na tau na pulo ima, ale tamlohi tinapua matea mo lo voro aulu hinia. Mo ŋuhu vara tamlohi hatehateahi i kilau mamahunia vara sohena sava i pa voro na ima hinia. <sup>11</sup> Matan mo sopo tea i eŋi tau te pulona tinapua hin haratu mo lo toho moiso. Enia sei, Iesu Kŋisto. <sup>12</sup> Vara tea i voro hin pulona atu na gold teni silver, teni vatu angiangi ŋuhu, teni mo lo voro hin te vipahai teni rato teni ere, <sup>13</sup> voko nona tamlohi hatehateahi, i pa mera purongo matan rani aria i pa vaia i mera, matan suiha hapu i pa vaihite na voko nona tamlohi hatehateahi vara mo sohena sava. <sup>14</sup> Vara te voko atu sei tea mo voro aulu hin pulo ima atu mo jeu na hapu, enia i pa lavi na nona otori matana. <sup>15</sup> Vara hapu mo hani vevuhi na voko non tea, nona otori i pa tihai, ale tamlohi atu i pa juri, pani

i pa sohena tamlohi matea la juri naŋihia na hapu mo lo turu lekoleko purongo.

<sup>16</sup> Ka sopo levosahia vara kamim ka temple non God, ale Tanumen God mo lo toho na lolomim? <sup>17</sup> Vara tea i komo na temple non God, God i pa komoa, matan temple non God enia mo tapu, ale kamim natu, ka temple atu.\*

<sup>18</sup> Tea i sopo eŋi hase halua hasena. Vara te vonamim mo lo ŋomŋomia vara enia tamlohi lelevosahi matea hin varama nike nake, i pa mele ŋuhu jea isana vara i mai tamlohi rongorongo vono, matan vara i pa mai tamlohi lelevosahi varaŋuhu. <sup>19</sup> Matan lelevosahi matan varama nike, enia rongorongo vono isan God matan la ulia mo vereea vara, 'Enia mo vunai na tamlohi lelevosahi na nora posposi mata lelevosahi.'

*Job 5.13*

<sup>20</sup> Ale mo mele vereea vara, 'Moli mo levosahia vara ŋomŋomi nona tamlohi lelevosahi la sopo ŋuhu matan te hinau hatea.'

*Psa 94.11*

<sup>21</sup> Matan mo sohena, i pa sopo tea i eŋi hapahapa hin te hinau nona tamlohi. Matan hinau tari enira mata tueni kamim, <sup>22</sup> vara Paul, teni Apollos, teni Peter, teni varama, teni mauri, teni mateia, teni hinau nake, teni hinau la pa mai, enira mo isoiso nomim, <sup>23</sup> ale kamim

\* **3:17:** temple: Paul mo lo vere temple nike, ale ŋaramina enia matavuhi nona kalesia hin jara atu, mo sopo vereea na epe tamlohi matea.

non Křisto, ale Křisto enia non God.

## 4

### *Vavahinau Nona Vahařule Non God*

<sup>1</sup> Kamim mo tataholo vara ha kilau kamam sohena volitusi non Křisto, volitusi sei mata tauri na hina tatalanghi non God. <sup>2</sup> Ale aulu hinia, mo tataholo vara la haratu la lo tauri na hinau sohena, la pa turu řilangi na sava la lo vaia. <sup>3</sup> Pani enia hina rihirihi purongo isaku vara te vonamim teni te court nona tamlohi hatea i ariau. Varařuhu, matan enau haseku na sopo ariau. <sup>4</sup> Na sopo řomřomi te hinau vara na vaia mo sati, pani mo sopo haratu natu vara mo vaiau na tataholo na nahon Moli, matan Moli hasena i pa ariau. <sup>5</sup> Matan hinau sei, ha sopo sile te talai i tiroma hin rani atu mata aria, i tiroma na mele mai non Moli sei i pa lavi na hina luhu na řořoha nake la mai na malarani, ale i pa vujan-gia vara tamlohi la lo vai na nora vavahinau mata sava. Ale hin rani atu, God i pa sile na nona reti řuhu isara hatehateahi.

<sup>6</sup> La voraiuku, na lo vereea enau Apollos sohen tovongi matea isamim mo usuri na noku vujangi nike. Ale vara ha turu na sava la ulia na Retitapu moiso, ha pa sopo eři retihapahapa hin te tamlohi hatea matan mo pa aulu na vavahinau non tinapua. <sup>7</sup> Sava mo vai

kamim ka řomřomia vara ka řuhu ka jeu na tinapua? Sava enia nomim sei God mo sopo silea isamim? Ale vara hinau tari nomim mo tai isan God, mata sava ka lo retihapahapa sohena vara ka sopo lavi te hinau isana?

<sup>8</sup> Ka pete lavi vevuhi na hinau tari ka opoira moiso. Ka pete tavgav moiso. Ka jeu kamam matan ka pete supe moiso, ale i pa řuhu vara ka pete tauri suiha atu moiso matan kama pa tauri na suiha peresi kamim. <sup>9</sup> Matan na hitea sohena vara God mo tau kamam vahařule sohen tovongi matea, mo tau kamam hitahu jea na tamlohi,\* sohena tamlohi la lo vano na nora mateia, kama mai sohena hinau matea varama peresi na angelo peresi na tamlohi la pa varoia.

<sup>10</sup> Kamam kama tamlohi rongorongono vono matan Křisto, pani kamim ka tamlohi lelevosahi hin Křisto. Kamam kama tamlohi malum, pani kamim ka tamlohi řilangi. Kamim, tamlohi la sile na ololo isamim, pani kamam, la hitelehilehi kamam. <sup>11</sup> Mo mai nake, kama pa lo marohati, ale kama pa lo mařohu, nomam ruru la sopo řuhu, tamlohi la vailehilehi kamam, ale mo sopo te imamam. <sup>12</sup> Ale kama kalvono, kama voko na limamam, vara la veresatihi kamam, kama leřuhu hinira,

\* **4:9:** hitahu jea na tamlohi enia mo lo řarami rani atu tamlohi vuro la lavi la tamlohi atu mata vilimateira la taura na isoiso vao atu sei la tiroma hinira na naho tamlohi tari na rani la mele pala na jarara tataholo.

ale vara la tipahi kamam, kama turu řilangi tarea, <sup>13</sup> vara la vereřesiřesi kamam, kama reti řuhu isara. Kama mai sohena, ale kama pa lo toho sohena utauta na varama, sohena tapahuri.

<sup>14</sup> Na sopo uli la hinau nike, matan vara a vai kamim ha mahanuhanu, pani vara a retiřoařoahai kamim sohena natuku řuhuru. <sup>15</sup> Matan hina purongo vara nomim tamlohi vujangi mo matuvana hin Křisto, tamamim mata rasua la tupu visalete purongo. Matan enau na mai tamamim hin Křisto Iesu na Retiřuhu. <sup>16</sup> Ale matana, na lo usia řilangi isamim vara ha usuri na noku tovongi.

<sup>17</sup> Matan hinau sei natu, na pa řule Timothy natuku řuhuru isamim, ale enia mo řomturu řilangi tarea hin Moli, i pa mai vara i mele vere kamim na noku posposi hin Křisto, i pa vujangi kamim sohen enau na lo vujangi na vao kalesia tari na jara tari.

<sup>18</sup> Tatuamim nake la lo mangisi tavera jea matan la lo řomřomia vara a pa sopo mele mai isamim. <sup>19</sup> Pani vara masalon Moli, a pa mele mai isamim vila, ale a pa vileiulia vara la tamlohi mangisi nike la lo vaore purongo teni vara nora suiha mo tai isan God. <sup>20</sup> Matan mauri atu God mo aulu hinia mo sopo turu na retireti nona tamlohi purongo, pani na suihan God. <sup>21</sup> Ka opoi na sava? A pa mai isamim peresi na hamim maja, teni a pa mai

isamim peresi na opoia na posposi řomatano?

## 5

*Tau Nařihi Haratu Mo Hehe*

<sup>1</sup> Sorasora mo lo vano vara posposi maji mo lo toho isamim, ale posposi maji sei mo sopo te tamlohi řořoha i eři majinga hinia vara tea i eři vaia sohena, matan tamlohi matea mo lo lavi na naroun tamana, <sup>2</sup> ale kamim ka řomaulu pani řomimim mo sopo sati mata sava? Ha tau nařihi tamlohi atu mo lo vai posposi atu na livuhamim.

<sup>3</sup> Matan hina purongo vara na sopo toho peresi kamim nake, noku řomřomi mo lo toho isamim, na pete sile na talai moiso isan haratu sei mo vai posposi atu. <sup>4</sup> Vara ha matavuhi na hijan Moli Iesu, ale noku řomřomi i pa lo toho peresi kamim na suihan nořa Moli Iesu, <sup>5</sup> ha pa sile tamlohi nike na liman Setan matan vara i komo na epena, matan vara maurina i pa juri na rani aria non Moli.

<sup>6</sup> Nomim hapahapa mo sopo tataholo. Ka sopo levosahia vara ha tau na makomo isi na flaua, i pa vai na flaua i sosohi vevuhi? <sup>7</sup> Ha tau nařihi na flaua tuai isi mo lo toho hinia, matan vara ha pa mai flaua paro, matan kamim ka flaua paro varařuhu. Matan la sile Křisto nořa natu sipsip mata Passover, Křisto, enia malamalai atu mo mate matařa. <sup>8</sup> Mo řuhu vara řa matavuhi mata hanhani

Passover, mo sopo peresi na flaua tuai isi mo lo toho hinia, isi atu enia posposi vaisatihi na tinapua, ale enia hina sasati, pani řa pa hani pereti atu mo sopo te isi hinia, pereti atu enia mauri vokevoke peresi na retivarařuhu.

### *Hehe Na Lolo Vao Kalesia*

<sup>9</sup> Na uliuli isamim moiso na noku leta vara ha pa sopo tapala peresi na tamlohi la lo vai na posposi maji, <sup>10</sup> na sopo řarami la haratu non varama la sopo tatuara sei la lo vai na posposi maji, teni la haratu řomřomi hařivi mo lo vilira, teni la haratu la lo vavanaho, teni la haratu la lo lotulotu vono. Matan, vara na lo vereea sohena, ha pa malue hin varama nike vara ha eři toho asau hinira. <sup>11</sup> Pani nakerihi na lo uliuli isamim vara ha sopo pulutahi peresi tea sei mo vereea vara mo vorai rasua vara mo jovi na posposi maji, teni na řomřomi hařivi, teni mo lotulotu vono, teni mo lo hiteřesiřesi na tinapua, teni mo lo putu na wai řilangi tarea, teni mo tamlohi halu, ale ha pa sopo sakele vara ha hanhani matavuhi peresi tea vara mo sohena.

<sup>12</sup> Matan mo sopo noku hinau vara a ari na tamlohi la sopo rasua. Pani enia nomim hinau mata ari la haratu na lolo vao kalesia. <sup>13</sup> God i pa ari la haratu la sopo tamlohi rasua ale mo vereea mara, 'Ha tipahi nařihi na tamlohi hehe sasati na livuhamim!' *Deut 17.7; 19.19*

## 6

### *Nomim Vauriuri*

<sup>1</sup> Vara te vonamim mo vauriuri peresi na vonamim matea, mo pa hitea sohena sava vara i vano isana tamlohi ari na jingoima, ale mo sopo taua na lima tapuhi non God? <sup>2</sup> Teni ka sopo levosahia vara tapuhi non God la pa ari na varama? Ale vara ha pa ari na varama, mo toma, ka sopo navu vara ha ari na nomim vauriuri vavarihi? <sup>3</sup> Ka sopo levosahia vara enřa řa pa ari na angelo? Matan haratu, mata sava ka sopo eři tau na tamata na vauriuri vavarihi nike na varama? <sup>4</sup> Vara te hinau isamim mo sohena, mata sava natu, ka lo vano isana tamlohi varama, haratu sei mo sopo te nora hinau vara la eři reti matana na lolo vao kalesia? <sup>5</sup> Na lo vere hinau nike, vara a vai kamim ha mahanuhanu. Varařuhu, mo sopo tea na lolo vaomim kalesia vara mo sopo lo jea na lelevosahi vara i eři tau na tamata na vauriuri nona vorai kalesia? <sup>6</sup> Pani kamim, ka hitea vara mo tataholo purongo vara te voraimim i tau na voraina kalesia tinapua matea na aria nona tamlohi varama! <sup>7</sup> Ka lo vauriuri peresi kamim hasemim na naho tamlohi aria mata varama, enia mo vujangia mo memera moiso vara ka lo toho asau hin mauri atu God mo opoia. I pa mele řuhu vara ha tinařihi purongoia, i pa mele řuhu vara ha tinařihira la jeu kamim. <sup>8</sup> Pani kamim purongo kamim hasemim, ka lo vai



na hehe isamim, ale ka lo haluhalu na voraimim kalesia!

*Ha Toho Asau Na Posposi Lumihā*

<sup>9</sup> Ka sopo levosahia vara la haratu la lo vai na hehe la pa sopo efi lavi mauri atu God mo aulu hinia? Ha mera hinia, la haratu la lo vai na posposi viriu, teni la haratu la lotulotu vono, teni la haratu la lo vaivaileu peresi na tinapua, teni tamlohi la juruvi peresi na tamlohi teni haʻai la juruvi peresi na haʻai purongo, <sup>10</sup> teni tamlohi vavanaho, teni la haratu la lo fomusuri na hināu non te tinapua, teni la haratu la opoi jea na wai ʻilangi tarea, teni la haratu la lo veresatihi na tinapua, teni la haratu la lo uri na tamlohi mata vavanaho na nora hināu, enira mo isoiso atu la pa sopo lavi mauri atu God mo aulu hinia. <sup>11</sup> Ale tuai tatuamim ka sohenā, pani nake God mo hoje naʻihi na nomim hehe moiso, ale mo tapuhi kamim, mo vai kamim ka tataholo na nahon God na hijan Moli Iesu Kʻristo peresi na Tanumen noʻa God.

*Hahau Mo Tataholo*

<sup>12</sup> Hai la lo vereā lara, “Matan enāu kalesia matea, mo tataholo purongo vara a usuri na masaloku tari.” Pani a efi vereā vara hināu tari la pa sopo efi tueni kamim, pani hina purongo vara, “Enāu kalesia matea, mo tataholo purongo vara a usuri na masaloku tari.” A pa sopo tinaʻihia vara a toho na ruhuruhun te

hināu hatea. <sup>13</sup> Ale hai la lo vereā vara, “Hanhani mo lo toho mata pangeʻa, ale pangeʻa mo lo toho mata hanhani!” Mo varaʻuhu pani ko hitea, God i pa komora enira mo rua. Epeʻa mo sopo toho mata posposi viriu, mo vono! Epeʻa la lo toho mata non Moli, ale Moli mo aulu na epeʻa. <sup>14</sup> Ale God mo sauteterahi Moli na mateia, ale i pa sauteterahi na epeʻa sohenā na suihana. <sup>15</sup> Ka sopo levosahia vara epemim enira vonara matea na epen Kʻristo? Mo tataholo vara a lavi te vonara hatea na epen Kʻristo, ale a vaia i soʻrotahi isana haʻai malele matea? I vonovono ʻuhu! <sup>16</sup> Teni ka sopo levosahia vara haratu mo soʻrotahi peresi na haʻai malele matea mo mai epe matelete peresia? Matan sohen la ulia mo vereā vara, ‘Enira rua, la pa mai epe matelete’.

*Gen 2.24*

<sup>17</sup> Pani haratu sei mo soʻrotahi isan Moli, enia mo mai matelete peresi na Tanumena.

<sup>18</sup> Ha rovo asau na posposi viriu. Hina sasati tinapua tari tamlohi la lo vaira mo sopo komo na epenā, pani haratu mo lo vai na posposi viriu mo lo hase hehe na epenā. <sup>19</sup> Teni ka sopo levosahia vara epemim enia temple non Tanume Tapu sei mo lo toho na lolomim sei God mo silea isamim? Ka sopo nomim hasemim, <sup>20</sup> matan sava God mo volituhu kamim hinia vara i juri kamim mo tavera

jea. Ale na epemim tari ha vaira na posposi űuhu vara la tahe na hijan God i aulu.

## 7

### *Vujangi Mata Lahi*

<sup>1</sup> Ale nakerihi, usuri na sava ka usia na nomim leta, ka usia vara, “Mo tataholo vara tamlohi la sopo juruvi peresi na haűai teni mo vono?” Ale noku űarami nahai, <sup>2</sup> mo űuhu, pani matan posposi viriu mo maűivi hajavua, i pa mele űuhu jea vara tamlohi matea i lahi, ale i lo toho peresi narouna purongo, ale haűai matea i toho peresi tuana purongo. <sup>3</sup> Mo sopo tataholo vara tamlohi lahi matea i horo narouna vara mo opoia vara i juruvi peresia, matan mo tataholo vara i usia, ale narouna sohena i pa sopo horo tuana. <sup>4</sup> Haűai lahi matea i sopo eűi vai na sava tarea enia hasena mo opoia, matan tuana mo aulu na epena, ale tuana sohena i sopo eűi vai na sava tarea enia hasena mo opoia, matan narouna mo aulu na epena. <sup>5</sup> Ha sopo horohoro kamim, pani matan te hinau purongo sohen harihi: vara engko peresi naroum ka majinga hinia matan vara ha hase tau kamim mata usiusi matan te makomo rani purongo. Pani vara mo isoiso, ha mele juruvi jara matea matan vara Setan i sopo eűi vaihite kamim vara ha vano isana tinapua matan ka sopo eűi hase taurilati kamim.

<sup>6</sup> Sava na lo vereea matana mo tataholo, pani enia mo sopo retileu matea. <sup>7</sup> Enau na opoia vara tamlohi tari la soheku, pani tatua tamlohi God mo vaira la tataholo vara la lahi, ale tatuara God mo vaira la tataholo matan la sopo lahi.

<sup>8</sup> Ale isan la haratu la sopo lahi teni la haűai malepu, na vereea vara mo mele űuhu jea vara la sopo lahi soheku. <sup>9</sup> Pani vara la sopo eűi hase taurilatira, mo űuhu vara la lahi. Matan enia mo mele űuhu jea vara la lahi mo jeua vara la sopo eűi taurilati na masalo epera.

<sup>10</sup> Ale isan la haratu la lahi mo sopo enau na lo vereea pani Moli mo lo vereea vara, haűai lahi i pa sopo rovo hin tuana, <sup>11</sup> pani vara i vaia, i pa sopo eűi mele lahi, pani vara mo űohu hin űoműomi atu, mo sopo te mele malele tinapua, i pa vai na tamata peresi tuana i mele mai isana, ale tamlohi lahi sohena i sopo űohu hin narouna.

<sup>12</sup> Isana tamlohi tinapua enau na lo vereea mo sopo Moli mo vereea vara te vorai kalesia hatea sei narouna mo sopo kalesia, pani űomina mo űilangi vara i toho peresi tuana, i pa sopo űohu hinia. <sup>13</sup> Vara te haűai kalesia hatea tuana mo sopo kalesia matea, pani vara űomina mo űilangi vara i lo toho peresi narouna, narouna i pa sopo űohu hinia. <sup>14</sup> Matan God mo tapuhi na tamlohi mo sopo rasu matan narouna enia haűai kalesia matea, ale God mo tapuhi na haűai mo sopo rasu matan

tuana enia tamlohi kalesia matea. Vara i vono, natumim la pa lumiha na nahon God, pani matan mo sohen haratu, enira la tapu na nahona. <sup>15</sup> Pani vara vonara matea sei na lahi mo sopo kalesia, ale mo rovo, ha tinañihia vara i sohena. Hin posposi sei vorai kalesia atu i sopo eñi tia hin lahi atu, matan God mo tovi kamim vara ha toho na tamata. <sup>16</sup> Hañai lahi, ko pa levosahia sohena sava vara o eñi juri tuam? Tamlohi lahi, ko pa levosahia sohena sava vara o eñi juri naroum?

<sup>17</sup> Mo řuhu vara tamlohi kalesia hatehateahi la toho hin mauri atu sohen Moli mo silea isara, hara sei God mo tovera matana, harihi enia noku retileu isana vao kalesia tari. <sup>18</sup> Vara tea mo taiñalihi tiroma moiso hin rani atu God mo pa tovia, i pa sopo vaihitea vara i vaitihai na hapila nona taiñalihi! Vara tea mo sopo taiñalihi hin rani atu God mo tovia, i pa sopo ale na taiñalihi! <sup>19</sup> Matan mo sopo te hinau hinia vara ko taiñalihi teni ko sopo taiñalihi, hina aulu enia vara ha oloolo na retileu non God.

<sup>20</sup> Mo řuhu vara tamlohi hatehateahi la lo toho hin mauri atu God mo tovera hinia. <sup>21</sup> Vara te vonamim mo lo slev hin pongi atu God mo tovia, i pa sopo řomřomi te hinau vara i pa lo toho sohena slev teni mo vono. Pani vara nona tamlohi tavera mo opoia vara i teria, mo řuhu vara i vano. <sup>22</sup> Matan hara sei Moli mo tovia na rani mo pa lo toho sohena slev matea, enia mo

materi hin Moli, ale sohen haratu, haratu sei mo materi hin rani atu Moli mo tovia, enia mo slev non Křisto. <sup>23</sup> Volimim atu God mo volia mata juri kamim mo tavera jea, ha sopo mai slev nona tamlohi. <sup>24</sup> Ale la voraiku peresi na vevoraiku, na sava mauri vara God mo tovi kamim hatehateahi hinia, mo řuhu vara ha lo toho atu, ale God i pa toho peresiho.

<sup>25</sup> Ale isana kalesia sei la sopo lo lahi, na sopo lavi te retileu isan Moli matara, pani na sile na noku kilakilau sohena tamlohi matea sei Moli mo řomopoia, hinau sei ha eñi rasua. <sup>26</sup> Ale na řomiku na sava mauri mo lo toho nake, mo řuhu vara haratu mo lo toho na sava mauri, i lo toho hinia. <sup>27</sup> Vara ko lahi moiso, o sopo rovo hin naroum. Vara ko sopo lo lahi, mo mele řuhu jea vara o sopo aleale naroum. <sup>28</sup> Pani vara ko lahi, ko sopo vai na hehe, ale vara te hañai matea la tapuhoroa moiso mo lahi, mo sopo vai na hehe. Pani la haratu la lahi la pa lavi na rani řilangi matana, na vereea matan na opoia vara a horo kamim na rani řilangi mata lahi.

<sup>29</sup> La voraiku peresi na vevoraiku, řarami noku reti mo sohen harihi: rani sei God mo taua matan varama nike mo vejuveju sati moiso. Ale matana, mo tapulo nake, la haratu sei naroura, la pa toho sohena mo sopo te naroura, <sup>30</sup> ale la haratu sei la lo tangtangi la pa vaia sohena la sopo tangtangi, ale

la haratu sei la lo avulahi, la pa vaia sohena la sopo avulahi, ale la haratu sei la lo volvoli, la pa sopo taurilati na sava la volia, <sup>31</sup> ale la haratu la lo vai na voko hin varama nike, la pa sopo tia hin varama nike, matan varama nike mo lo vano vara i tihai. <sup>32</sup> Na opoia vara řomimim la sopo tiatia na hina tinatinapua matuvana, matan haratu mo sopo lo lahi i pa eři tau na řomina na vavahinau non Moli vara i pa vai Moli i avulahi hinia. <sup>33</sup> Pani tamlohi atu mo lahi moiso, mo lo tau na řomina na hinahinau mata varama matan vara i pa vai narouna i avulahi hinia, <sup>34</sup> ale řomina mo lo masanga, ale hařai mo sopo lo lahi, teni hařai la tauhoroa moiso vara i pa lahi, enira la tau na řomira na vavahinau non Moli vara la pa hahau na mauri vokevoke na epera peresi na řomira. Pani hařai atu mo lahi moiso mo lo tau na řomina na hinahinau mata varama mata i vai tuana i avulahi hinia.

<sup>35</sup> Na lo retireti sohena vara a tueni kamim, mo sopo matan vara a horo kamim hin te hinau, pani vara hinau tari isamim la pa maro tataholo, moiso vara i vai na řomimim i řilangi isan Moli matan vara i sopo masanga. <sup>36</sup> Vara tea isamim mo lo hase tapuhoroa vara i sopo lahi isan tapalana, ale nake mo řomřomia vara mo sopo řomřomi řuhu natu, ale vara řomina mo řilangi vara i lahi, ha tinařihia vara i vaia sohena, ha tinařihira

vara la lahi, enia mo sopo vai na hehe. <sup>37</sup> Pani haratu sei řomina mo řilangi vara i hase tapuhoroa na lahi, mo sopo matan te hinau tinapua, pani matan mo hase eři taurilatia, ale vara řomina mo turu řilangi hinia, mo lo řuhu purongo vara i sopo lahi. <sup>38</sup> Ale matana, haratu mo lahi isan tapalana, enia mo vai na hina řuhu matea, ale isan haratu mo lo hase tapuhoroa na lahi, mo vai na hinau mo mele řuhu jea.

<sup>39</sup> Hařai lahi matea mo lo toho na ruhuruhun tuana i tikeli rani atu tuana mo mate. Pani vara mo mate, enia mo materi vara i eři mele lahi vara mo opoia, pani isana tamlohi kalesia matea purongo. <sup>40</sup> Pani na noku kilakilau, hařai malepu atu i pa mele avulahi jea vara i lo toho hasena purongo. Ale na levosahia vara enau na lo usuri na řomin Tanumen God matana.

## 8

### *Hanhani La Silea Isana Tamasi*

<sup>1</sup> Ale nakerihi na opoia vara a mele retireti makomona na hinau matea na nomim leta sei mata hanhani sei tamlohi la silera isana tamasi moiso. Enřa mo isoiso řa levosahia vara: Enřa řa lavi na lelevosahi. Pani 'lelevosahi' sei la lo vereva mo lo vai na tamlohi la řomaulu, pani opoia mo lo vai na tamlohi la ulua na posposi řuhu. <sup>2</sup> Vara tea, řomina mo řomřomia vara mo levosahi te hinau, tamlohi atu mo sopo lo levosahi te hinau na sava

vara i pa levosahia. <sup>3</sup> Pani vara tea mo opoi God, God mo levosahi tamlohi atu.

<sup>4</sup> Matan haratu, na řomřomi mata hani na hanhani sei la silea isana tamasi, řa levosahia vara tamasi la sopo mauri, ale řa levosahia vara mo sopo te God tinapua, pani matelete purongo. <sup>5</sup> Matan hina purongo vara hinau hai na tuka teni na varama la tovara god la lo toho, varařuhu god matuvana peresi na moli matuvana la lo toho, <sup>6</sup> pani isařa, God mo matelete enia Tamařa, hinau tari la tai isana, enira mo isoiso nona, ale Moli matelete enia Iesu Křisto, ale hinia, hinau tari la pala, ale hinia, enřa řa lo mauri.

<sup>7</sup> Pani, mo sopo tamlohi tari la lavi lelevosahi nike. Pani matan tamlohi kalesia hai tiroma la lo pulutahi peresi na tamasi moiso vara la hani na hanhani la silea isana tamasi moiso, la pa řomřomia vara la lo vai na hehe, ale la pa rongoa vara la lumiha matana. <sup>8</sup> Pani hanhani i sopo eři vaiřa řa tataholo na nahon God. Ra sopo eři vejuveju hin te hinau vara řa sopo hania, ale vara řa hania i pa sopo eři tueniřa. <sup>9</sup> Pani ha lo kilau i řuhu vara nomim materi sohen harihi i sopo vai te voraimim kalesia hatea i jovi matan řomina mo sopo lo řilangi hinia.

<sup>10</sup> Matan, vara tea řomina mo sopo lo řilangi mo hiteho ko lo hanhani na lolo temple nona tamasi matea, ale ko sopo levosahia vara nomim materi sei i pa vai tamlohi atu

mo sopo lo řilangi vara i hani hanhani atu la silea isana tamasi moiso i pa jovi? <sup>11</sup> Ale matan nom lelevosahi sei, voraim kalesia sei řomina mo sopo lo řilangi, i pa jovi nařihi na nona rasua, vorai sei Křisto mo mate matana. <sup>12</sup> Ale matana, ko lo vai na hehe isan Křisto vara ko lo řulerule te vorai kalesia tinapua hin te hinau la rasua vara mo sopo tataholo. <sup>13</sup> Matan haratu vara te hanhani na lo hania mo vai te vorai ku kalesia mo jovi, a pa sopo eři mele hani mit atu vara i vai vorai ku kalesia atu i jovi matana.

## 9

### *Mauri Nona Vahařule Tataholo Matea*

<sup>1</sup> Enau mo sopo tamlohi materi matea? Teni enau mo sopo vahařule matea? Enau mo sopo haratu sei mo hite Iesu nořa Moli na matakū? Kamim mo sopo noku vua vavahinau hin Moli? <sup>2</sup> Vara isana tinapua enau mo sopo vahařule matea, pani isamim, enau vahařule matea, matan kamim ka mai kalesia mata noku vua vavahinau, ale mo vujangia vara enau tamlohi vahařule non Moli.

<sup>3</sup> Hinau sei enia noku řarami isan la haratu la lo aleau mata noku vavahinau.

<sup>4</sup> Ka řomi vara mo sopo tataholo vara ha vahani kamam? <sup>5</sup> Ka řomi vara mo sopo tataholo vara kama lavi na naroumam sei la kalesia la usuri kamam, sohen la vahařule tinapua sei la lo vaia, ale sohen tasin Moli peresi Peter la

lo vaia? <sup>6</sup> Teni, enia matan enau Barnabas purongo vara mo sopo tataholo vara kama isoiso na nomam voko mata mania? <sup>7</sup> Sava tamlohi viro mo lo hasena volia? Sava tamlohi isa mo lavo na isa matea, ale mo sopo hani te vuana? Teni hare mo lo korohi te nani pani mo sopo inu te wai susuna?

<sup>8</sup> Ka ŋomi vara na lo vere la hinai nike usuri na noku ŋomŋomi purongo? Ka ŋomi vara leu mo sopo vereea sohena? <sup>9</sup> Matan la ulia na Leu non Moses moiso, vara 'O sopo pesihoro na jingo buluk vara mo lo varasi naŋihi na piri wit'.

*Deut 25.4*

Ka ŋomi vara God mo lo ŋomŋomi na buluk purongo?

<sup>10</sup> Ka ŋomi vara mo sopo vere reti sei mataŋa? La ulia mataŋa, matan haratu mo lo ŋule na lepa mo lo ŋule na nona ŋomtau, ale haratu mo lo pete na piri wit mo lo petera na nona ŋomtau vara i pa lavi na ŋungana hin la piri wit atu?

<sup>11</sup> Vara kamam vahaŋule kama lo lavo na piri ŋuhu mata mauri isamim, ka ŋomi vara mo sopo tataholo vara kama lavi te hinai mata i tueni na maurimam nake isamim? <sup>12</sup> Vara tinapua la opoia vara la lavi na ololo isamim, ka ŋomi vara kamam mo sopo tataholo vara kama lavia i jeu na vahaŋule tinapua? Hina purongo, kama sopo ngurunguru hin kamim vara ha sile na ololo isamim, pani kama hitea vara i pa mele ŋuhu jea vara kama sopo mele tau te hinai i vai kamim ha

tialahalaha hinia, ale ha ŋohu na Retiŋuhu non Kŋisto matana.

<sup>13</sup> Kamim ka sopo levosahia vara la pŋis atu la lo kilau na Temple nona Jew, la lo lavi na hara hinai na hanhani mata silesilea nona tamlohi? Ale ka sopo levosahia vara pŋis sei la lo volitusi na votavota mata malamalai atu la lo asease na silesilea mata malamalai? <sup>14</sup> Hin malele akerihi natu, Moli mo retileu hinia vara la haratu la lo vereuli na Retiŋuhu non Kŋisto la pa lavi na hara hinai mata nora vavahinai na Retiŋuhu.

<sup>15</sup> Mo tataholo vara a usi kamim vara ha tuenai, pani na sopo usia. Na sopo uliuli isamim nake vara a usia isamim. Mo vono. I pa mele ŋuhu isaku vara a mate i jeua vara a usi kamim mata nomim tuetueni! <sup>16</sup> Vara a lo retivujavujangi na Retiŋuhu, mo sopo sile te masapa isaku vara a pa mangisi matana. Matan God mo taua na limaku vara a pa vaia. Rani sati i pa mai isaku vara a sopo retivujavujangi na Retiŋuhu.

<sup>17</sup> Vara na lo vaia usuri na masaloku a pa lavi na noku otori matana, pani God mo viŋoniau, ale mo sileau hin voko tapu nike, ale enau, a sopo eri vai te hinai tinapua. <sup>18</sup> Sava natu enia noku otori? Enia masapa vara a retivujavujangi purongoi na Retiŋuhu, ale na sopo usi na sava sei mo tataholo mata tamlohi retivujavujangi na Retiŋuhu matea i eri lavia.

<sup>19</sup> Matan hina purongo vara enau tamlohi materi,

na sopo toho na ruhuruhun tea, pani na hase vaiau vara a volitusi isana tamlohi tari vara a pa efi lavi te vaora isara la mai isan Křisto.

<sup>20</sup> Isana Jew, na mai sohena Jew matea matan vara a lavi na Jew la mai isan Křisto. Isan la haratu la lo toho na ruhuru leu, na mai isara sohena tamlohi matea sei mo lo toho na ruhuru leu, pani na sopo toho na ruhuru leu matan vara a lavi la haratu la lo toho na ruhuru leu la mai isana. <sup>21</sup> Isan la haratu la sopo toho na ruhuruhun te leu, na mai sohena tamlohi matea mo sopo toho na ruhuruhun te leu, mo sopo vara na sopo toho na ruhuru leu non God, pani na lo toho na ruhuru leu non Křisto, matan vara a efi lavi la haratu la sopo toho na ruhuruhun te leu la mai isan Křisto.

<sup>22</sup> Isan la haratu la sopo lo řomřilangi na retivarařuhu, na mai sohera, matan vara a lavi la haratu la sopo lo řomřilangi la mai. Isana tamlohi tari tinatinapua na mai sohera na malelera tari matan vara a efi juri tea. <sup>23</sup> Na lo vai la hinaiu tari sei mata Retiřuhu purongo, matan vara hinira enau pesisira a pa efi lavi na hina řuhuřuhu sei Retiřuhu mo retitauhi hinira.

<sup>24</sup> Korong ka levosahia vara na rani maromaro matea, tamlohi maromaro tari la maro, pani tamlohi matelete purongo i pa mai tiroma. Ale matana, ha maro matan vara ha efi mai tiroma. <sup>25</sup> Tamlohi maro-

maro hatehateahi tari, la tau na řomira vara la hase taurilatira na hinahinaiu matuvana. La lo vaia matan vara la efi lavi na řongořongo rau vipahai purongo sei i pa řovo. Pani enřa, řa lo vaia matan vara řa pa lavi na hinaiu i pa sopo efi řovo. <sup>26</sup> Matan hinaiu sei, enau na sopo maromaro purongo; na sopo tutuhi sohen tamlohi matea mo lo tutuhi purongoi na masapa. <sup>27</sup> Pani na lo taurilati na epeku, ale na aulu hinia matan vara i vono, hitahu na noku retivujavujangi isana tinapua, enau haseku purongo na mele tau nařihiau na noku vujangi.

## 10

### *Rongorongono Vono Nona Tavtavuin Israel Tuai*

<sup>1</sup> La voraiuku peresi na vevoraiku, na opoia vara ha levosahia vara tamařa la lo toho na ruhuruhun telangi atu, ale enira mo isoiso la hahau roto na tasi hin masapa atu God mo vaia, <sup>2</sup> ale enira mo isoiso la mai tamlohi usuri non Moses ale la paptijo hinia hin telangi atu ale hin tasi atu, <sup>3</sup> enira mo isoiso la hani hanhiani atu God mo silea, <sup>4</sup> enira mo isoiso la inu hin wai atu God mo silea. Matan la inu hin vatu mauri atu sei mo lo usurira, ale vatu atu enia Křisto. <sup>5</sup> Pani God mo sopo avulahi na sope vaora tavera, matan God mo vilimateira, ale mo pla hau na tarapera na jara hasetoho atu.

<sup>6</sup> La hinaiu sei la masese sohena tovongi matea isařa,

matan vara řa pa sopo opoi na hina sasati sohera. <sup>7</sup> Ha pa sopo lotulotu vono sohena tatuara la lo vaia tuai, sohen la ulia moiso vara, ‘Tamlohi la sakele vara la hanhani, la inu, ale hitahu, la turu la velu’. *Exo 32.6* <sup>8</sup> Ra pa sopo usuri na posposi maji sohena tatuara sei la lo vaia tuai, rani matelete purongo vao sei la mate, evira mo tikeli tari vaha ngavulu rua mo tolu (23,000). <sup>9</sup> Ra sopo vaihite Moli sohen la tatuara atu la lo vaihitea tuai sei ale mata la hati matemateira, <sup>10</sup> teni řa sopo reti vavarihi sohen la tatuara atu la lo vaia tuai, ale angelo mata mateia mo vilimatemateira. <sup>11</sup> La hinau sei la mai isara tuai sohena tovongi matea isařa, ale la ulira mata retiřoaroahai isařa nake, enřa sei řa lo toho na pongi hitahu.

<sup>12</sup> Matan haratu, sava tamlohi mo lo řomřomia vara enia mo lo turu řilangi, i lo kilau mamahunia vara i sopo jovi sohera. <sup>13</sup> Mo sopo te vaihite hatea vara ko jovi hinia mo tinapua hin la haratu la lo tikeli na tamlohi tari. God mo lo turu řilangi tarea, ale i pa sopo tinařihia vara te hinau hatea i vaihite kamim i jeu na vaihite sei ha eři horora, pani hin vaihite atu God i pa sile te malele mata rovo hinia matan vara ha pa eři jelu hinia.

### *Leřuhu Non Moli Na Hanhani Tapu*

<sup>14</sup> Matan hinau sei, la voraiku řuhuřuhu, ha rovo na lotulotu vono. <sup>15</sup> Noku reti mo lo vano isana tamlohi

la tamlohi tapurongo, ha ari na sava na lo vereea isamim. <sup>16</sup> Paniken mata leřuhu non God sei řa lo vere meje isana matana, enia matan vara enřa mo isoiso řa eři lavi na leřuhu na řaen Křisto hinia. Ale pereti atu řa lo topea, enia matan vara enřa mo isoiso řa eři lavi na leřuhu na epen Křisto hinia. <sup>17</sup> Matan pereti atu enia pereti matelete purongo, enřa sei řa vao matuvana, řa mai epe matelete, matan enřa mo isoiso řa hani na pereti matelete purongo. <sup>18</sup> Ha to řomřomi na tavgavin Israel. Ka hitea vara la haratu sei la lo hani na malamalai, la sopo mai matelete matana?

<sup>19</sup> Ka řomi vara na lo vere na sava? Na sopo vereea vara tamasi teni te hanhani sei la silea isara enira hinau purongo. <sup>20</sup> Mo vono! Na lo vereea vara malamalai atu tamlohi řořoha la lo silea, la lo silea isana tanume sasati, mo sopo isan God. Na sopo opoia vara kamim ha matavuhi peresi na tanume sasati. <sup>21</sup> Ha sopo eři inu na paniken non Moli, ale ha inu na paniken nona tanume sasati! <sup>22</sup> Mo toma? Mo tataholo vara řa vaivai Moli i lolokoru? Ka řomi vara enřa řa řilangi řa jeu Moli?

### *Materi Nona Kalesia*

<sup>23</sup> Tamlohi hai la lo vereea lara, ‘A eři vai na hinau tari na opoia!’ Mo řuhu pani hinau tari la pa sopo řuhu hiniho ale hai lara, ‘A eři vai na hinau tari na opoia!’ Mo řuhu pani hinau tari la pa sopo tueniho vara o ulua.



<sup>24</sup> I pa sopo tea i řomřomi na sava mo řuhu isana purongo. Ha řomřomi na tinapua, ale sava i pa řuhu isara.

<sup>25</sup> Ha hani na mit la ařehira na jara maket, i sopo te retusia vara la silea isana tamasi moiso teni mo vono matan vara řomimim i sopo řomkaka hinia. <sup>26</sup> Matan Retitapu mo vereea vara, 'Varama enia non Moli, ale hinau tari la lo toho hinia enira nona'. *Psa 24.1*

<sup>27</sup> Ale vara te tamlohi řořoha mo tovi kamim vara ha hanhani peresia, ale ka avulahi vara ha vano, ha hani na sava hinau la taua na nahomim, i sopo te retusia hinira vara la tataholo vara ha eři hanira teni mo vono. <sup>28</sup> Pani vara tea mo vereea isamim vara, "Hinau sei la silea sohen malamalai moiso!" vara mo sohena, ha sopo hania matan enia mo vere kamim hinia, ale matan vara i sopo komo te řomina. <sup>29</sup> Pani na sopo vere na řomimim, pani řomin tamlohi atu. Matan mata sava natu, noku materi i pa isoiso mata řomřomi non te tinapua? <sup>30</sup> Vara na lavia peresi na vere meje isan God, mata sava natu, tea la eři tuvaiau matan hinau sei na vere meje matana moiso?

<sup>31</sup> Ale matana, sava ka hania teni ka inua teni ka vaira, ha vaira matan vara hasohaso i pa vano isan God matana. <sup>32</sup> Ha sopo vai te hinau mata vaivai na Jew, teni na tamlohi řořoha teni isana vao kalesia non God, <sup>33</sup> sohen enau sei na vaihitea

vara a vai na tamlohi tari la avulahi na hinau tari sei na lo vaira. Na sopo vaia mata i pa řuhu isaku, pani na lo alea vara a vaia i tueni na tamlohi matuvana matan la pa eři juri.

## 11

### *Vujangi Mata Tamlohi Peresi Na Hařai*

<sup>1</sup> Ha usuri na noku tovongi sohen enau na lo usuri na tovongi non Křisto.

<sup>2</sup> Ale nakerihi, na lo hasohaso kamim matan ka lo řomřomiau na hinau tari, matana ka lo tauri mamahuni na mauri kalesia, sohen enau na lo vujangi kamim hinia. <sup>3</sup> Pani na opoia vara ha pa levosahia vara patu hařai lahi matea enia tuana, patu lamane tari enia Křisto, ale patun Křisto enia God. <sup>4</sup> Lamane tari sei la ropoi na patura, ale vara la lo usiusi teni la lo retimangovi, enira la lo vai mahanuhanu na patura sei, enia Křisto. <sup>5</sup> Pani hařai lahi tari sei, vara la sopo ropoi na patura ale la lo usiusi teni la lo retimangovi, enira la lo vai mahanuhanu na patura sei tuara, mo sohena vara la hiripilopiloia.\* <sup>6</sup> Vara hařai lahi matea mo řohu vara i ropoi na patuna, mo řuhu vara i tai na vuluna i vejuveju. Pani matan enia hina mahanuhanu matea vara te hařai lahi i tai na vuluna teni la hiripilopilo na patuna, mo řuhu vara i ropoi na patuna. <sup>7</sup> Matan mo sopo tataholo vara lamane

\* **11:5:** La lo hiripilopilo i na hařai sohen tuai matan la tope na nora retitauhi mata lahi.

matea i ropoi na patuna, matan enia niniun God, enia mo lo vujangi na řuhuřuhun God, pani hařai enira la vujangi na řuhuřuhu nona tamlohi. <sup>8</sup> Matan God mo sopo vai na lamane na hařai, pani mo vai na hařai na lamane. <sup>9</sup> Ale mo sohena purongo, God mo sopo vai na lamane mata hařai, pani hařai mata lamane. <sup>10</sup> Matan haratu natu, mo řuhu vara hařai la ropoi na patura sohena matamata matea mo vujangia vara la lo toho na ruhuru suiha tinapua, matan angelo la lo kilau matana.

<sup>11</sup> Pani na vao kalesia non Moli, hařai mo sopo matan i toho hasena, teni tamlohi i toho hasena, <sup>12</sup> matan God mo vai na hařai na lamane, ale nake lamane mo vora isan hařai, ale hinau tari la tai isan God.

<sup>13</sup> Kamim hasemim ka hitea vara mo tataholo vara hařai matea i ususi isan God, ale i sopo ropoi na patuna? <sup>14</sup> Mauri mo sopo vujangi kamim moiso i mera vara lamane matea vuluna mo peravu, enia hina mahanuhanu isana? <sup>15</sup> Pani vara vulu hařai mo peravu, enia hina řuhuřuhun hařai atu teni mo vono? Matan God mo sile na vuluna mata ropoi na patuna. <sup>16</sup> Vara tea řomina mo sopo opoi hinau sei, pani mo sohen haratu natu isamam peresi na lolo vao kalesia non God.

### *Posposi Tataholo Mata Hanhani Tapu*

<sup>17</sup> Pani sava a pa vereea nakerihi, na sopo hasohaso

kamim matara, matan ka lo pulutahi jara matea, enia mo sopo matan ha pa vai te hinau i mele řuhu, pani ka vaia mo mele sati jea sivo. <sup>18</sup> Matan tiroma hinau na rongoa, enia vara ka lo pulutahi mata lotu ale patumasa mo lo toho isamim. Ale na rongoa vara mo varařuhu, <sup>19</sup> matan řa levosahia vara patumasa la pa vora isamim, matan vara i memera vara hare nakonako isamim la jea na mauri rasua.

<sup>20</sup> Matan ka lo pulutahi jara matea, mo sopo hanhani tapu sei ka lo hania. <sup>21</sup> Matan, na nomim hanhani, tamlohi hatehateahi la hasera hani na hara hinau. Matea mo marohati, ale tinapua mo drong! <sup>22</sup> Mo toma? Mo sopo te imamim vara ha efi hanhani teni ha inu hinira? Teni ka lo hitelehilehi na vao kalesia non God, matan ka vai la haratu mo sopo te nora hinau la mahanuhanu? Na sopo levosahia vara a pa vere na sava isamim! Ka řomi vara a pa hasohaso kamim matana? Mo vono!

### *Isoiso Hanhani* (Mt 26.26-29; Mk 14.22-25; Lk 22.14-20)

<sup>23</sup> Matan sava na silea isamim na lavia isan Moli. Hin vutepongi atu sei Judas mo turuposi hinia, Moli Iesu mo lavi na pereti, <sup>24</sup> ale mo vere meje matana moiso mo topea mo vereea mara, "Harihi enia epeku sei na silea matamim. Ha vai harihi řomřomi na sava na vaia matamim." <sup>25</sup> Mo mele vaia sohena purongo na isoison hanhani atu, enia mo lavi

paniken atu, mo vereā mara, "Harihi enia retitauhi paro na ƀaeku. Vara ha inua, ha vai harihi ƀomƀomi na sava na vaia matamim." <sup>26</sup> Matan sava rani ka lo hani pereti atu, ale ka inu hin paniken atu, ka lo vujangi na mateia non Moli, ale ha lo vaia soheña i tikeli na rani i mele mai hinia.

<sup>27</sup> Sava tamlohi vara mo hani pereti atu teni mo inu hin paniken atu non Moli na malele matea mo sopo tataholo, enia mo lo vai na hehe matan mo lo kilau purongoi na epen Moli peresi na ƀaena. <sup>28</sup> Tamlohi hatehateahi hasera la pa kilau usurira matan te hehe na maurira la pa vahaƀi hinia, moiso la pa eƀi hani pereti atu, ale la inu hin paniken atu. <sup>29</sup> Matan, vara tea mo hani teni mo inu, pani mo sopo ƀomƀomi na kalesia tinapua, enia mo hase hani teni mo inu na nona talai.† <sup>30</sup> Hinau sei natu, mo vai kamim matuvana mo sopo te suihamim, ale ka rojo, ale hai la mate.

<sup>31</sup> Pani vara ƀa hasera kilau usuri mamahuniƀa, God i pa sopo ariƀa matana. <sup>32</sup> Pani vara Moli i ariƀa, mo vaia matan vara i vai tataholoira matan vara ƀa pa sopo lavi na talai peresi na tamlohi tinapua na varama na pongi hitahu. <sup>33</sup> Matana, la vo-raiku peresi na vevoraiku, vara ha pulutahi mata hanhahi tapu, ha saovi kamim hatehateahi. <sup>34</sup> Vara tea mo marohati, i pa hanhahi na

ima purongo, matan vara ka pulutahi, i sopo mata lavi na talai. Ale mata hinau tinatinapua a pa vere na malelera tataholo isamim vara a mai.

## 12

### *Silesilea Non Tanume Tapu*

<sup>1</sup> Ale nakerihi, la vorai peresi na vevorai, enau na opoia vara ha mera na hinau sei Tanumen God mo lo silera. <sup>2</sup> Ka levosahia vara hin pongi atu ka lo toho na ƀoroaha, suihan Tiapolo mo lo tikauleji kamim usuri na malele mo tiroman kamim ka vano isana tamasi mengo. <sup>3</sup> Matan haratu, na opoi vara ha levosahia vara mo sopo te tamlohi mo lo reti na suihan Tanumen God, i eƀi vereā hin te rani vara, "Na lesati hin Kƀisto!" Moiso i sopo tea i eƀi vereā, i vara "Iesu enia Moli!" vara Tanume Tapu mo sopo toho isana.

<sup>4</sup> Ale, otori tinatinapua matuvana la lo toho, pani pulora matelete purongo, enia Tanume Tapu. <sup>5</sup> Ale vavahinau mata tuetueni tinatinapua matuvana, pani Moli matelete purongo; <sup>6</sup> ale malele mata vavahinau tinatinapua mo matuvana, pani God matelete purongo sei mo lo voko hinira hatehateahi. <sup>7</sup> Tanume Tapu mo vuhesi na suihana isara hatehateahi mata tueni na tinapua.

<sup>8</sup> Isana tamlohi matea, Tanume Tapu mo silea na retireti mata lelevosahi, ale isana tinapua mo sile na

† 11:29: Mt 5.23-26

retireti mata levosahi matan te hinau. <sup>9</sup> Isana tinapua pa Tanume Tapu atu mo sile na rasua, ale isana tinapua mo sile na otori mata na vai rojoa i tihai, <sup>10</sup> isana tinapua suiha mata vai na hinau maʻurahi, isana tinapua retimangovi, isana tinapua eʻia mata eʻi hitevosahi na sava tanume enia pulo retireti matea, isana tinapua i eʻi retireti na leo tinatinapua, isana tinapua i eʻi rongovosahi na leo tinatinapua.

<sup>11</sup> Enia pa Tanume Tapu atu sei enia hasena mo lo aseasehi la otori sei. Enia hasena mo hatihia vara sava tamlohi i pa lavi na sava otori.

<sup>12</sup> Matan epe tamlohi matea enia matelete, ale tavgavaluna matuvana, ale tavgavaluna matuvana pani la vai na epe matelete, mo sohen harihi peresi Kʻristo. <sup>13</sup> Matan hin Tanume Tapu matelete purongo, enʻa mo isoiso ʻa paptijo na epe matelete, vara tamlohi ʻoroaha teni Jew, slev teni tamlohi materi, mo vaiʻa enʻa mo isoiso vara ʻa inu isana Tanume Tapu matelete purongo.

<sup>14</sup> Matan epe tamlohi, tavaluna mo sopo matelete purongo, pani matuvana. <sup>15</sup> Vara palona i vereea vara, “Enau na sopo tavalu epe matea matan enau na sopo limana!” ʻromʻromi sohena haratu mo sopo vaia vara enia mo sopo tavalu epe matea. <sup>16</sup> Vara perona i vereea vara, “Enau na sopo tavalu epe matea, matan enau na

sopo matana!” ʻromʻromi sohen haratu mo sopo vaia vara enia mo sopo tavalu epe matea. <sup>17</sup> Vara tavalu epe tari enira matana matea i pa rongo te hinau na savana? Vara tavalu epe tari enira perona matea, i pa ngusahi te hinau na savana?

<sup>18</sup> Pani mo sohen haratu natu, God mo tau mamahuni na tavalu epe tari na jarara usuri na masalona. <sup>19</sup> Vara enira mo isoiso tavaluna matelete purongo, epena i pa toho epu? <sup>20</sup> Pani mo sohen haratu natu, tavgavaluna matuvana, pani epe matelete. <sup>21</sup> Matam i sopo eʻi vereea isana limam vara, “Ko sopo ʻuhu matan te hinau!” teni vara patum i vereea isana palom vara, “Ko sopo ʻuhu matan te hinau.”

<sup>22</sup> Varaʻuhu, la tavalu epe atu sei ka lo hitera vara la sopo ʻrilangi teni la sopo ʻuhu, pani nora vavahinau la aulu jea mata tueni na epe, <sup>23</sup> ale la tavalu epe atu ka lo ʻrompurongo hinira, enira pa la haratu sei ka lo ru mamahunira matan vara tea i pa sopo eʻi hitera, <sup>24</sup> pani tatua tavalu epe ʻa sopo ʻromʻromia vara ʻa rurura sohera. Pani God mo vai na epe na malele matea vara ʻa sile na oloolo isana tavalu epe sei ʻa hitera vara la sopo eʻi lavi te oloolo. <sup>25</sup> Mo vaia matan vara la sopo patumasa na epe, pani vara tavgavalu epe tari atu la kilau mamahuni na tatuara tinatinapua. <sup>26</sup> Vara te tavalu epe hatea mo rongohaji, enira mo isoiso la rongohaji.

Vara tavalu epe matea mo lavi na oloolo, enira isoiso la avulahi matana.

<sup>27</sup> Ale kamim epen Křisto, ale kamim hatehateahi ka tavitavaluna. <sup>28</sup> Ale God mo viřoni na tamlohi mata vavahinau na lolo vao kalesia sohen harihi:

tiromara enia vahařule,  
haruana enia přovet,  
hatoluna enia tamlohi vujangi mata reti non God,  
moiso la haratu la lo vai na hinau mařurahi tavera,  
moiso la haratu la lo vai na rojoa la tihai,  
moiso tamlohi tueni,  
moiso tamlohi tiroma na vavahinau,  
moiso mata retireti na leo tinatinapua.

<sup>29</sup> Enira mo isoiso la vahařule teni mo vono? Enira mo isoiso la přovet teni mo vono? Enira mo isoiso la tamlohi vujangi teni mo vono? Enira mo isoiso la eři vai na hina mařurahi tavera teni mo vono? <sup>30</sup> Enira mo isoiso la eři vai na rojoa i tihai teni mo vono? Enira mo isoiso la eři retireti na leo tinatinapua teni mo vono? Enira mo isoiso la eři vereuli na řarami leo tinatinapua teni mo vono? Mo vono!

*Opoia Mo Aulu Na Hinahinau Tari*

<sup>31</sup> Pani ha tau na řomimim mata otori la mele aulu hinira. Ale enau a pa mele vujangi kamim na malele tinapua matea mo řuhuřuhu jea.

## 13

*Opoia Mo Aulu Jea*

<sup>1</sup> Vara a eři reti na leo nona tamlohi tinatinapua, teni na

leo nona angelo na tuka, pani vara mo sopo te opoia isaku, enau na lo vaore purongo sohena belo sei mo lo tangi teni mo lo kolekole roro purongo.

<sup>2</sup> Vara a lavi na suiha mata retimangovi, ale a levosahi na hina luhu tari peresi na lelevosahi tari, ale vara noku rasua mo řilangi vara a eři juhati te vutivuti, pani vara mo sopo te opoia isaku, enau hina purongo matea. <sup>3</sup> Vara a lo sile na noku hinau tari isana tinapua, teni vara a sile na epeku vara la sulimateia, pani vara i sopo te opoia isaku, enau na sopo řuhu hin te hinau.

*Opoia*

<sup>4</sup> Opoia na mauriřa mo sohen harihi:

Opoia enia řomperavu, ale enia řomřuhu.

Opoia mo sopo mereimerei, teni mo sopo retihapahapa.

<sup>5</sup> Opoia enia mo sopo vai na hina mahanušanu na naho tamlohi.

Opoia enia mo sopo opoi na masalona purongo.

Opoia enia mo sopo lolokoru vila.

Opoia enia mo sopo evi na hehe nona tinapua isana.

<sup>6</sup> Opoia enia mo sopo avulahi na posposi hehe, pani mo avulahi na reti-varařuhu.

<sup>7</sup> Opoia enia mo tatamahu mata hina řilangi tari.

Opoia enia mo lo kilau mata hina řuhu purongo.

Opoia enia řomřilangi mata hina řuhu la pa mai.

Opoia enia turu řilangi tarea.

<sup>8</sup> Opoia, i pa sopo te isoisona hin te rani pani retimangovi la pa tihai, leo tinatinapua la pa isoiso, ale lelevosahi la pa tihai.

<sup>9</sup> Matan enŕa řa levosahi makomona purongo, ale řa lo retimangovi makomona purongo, <sup>10</sup> pani vara haratu sei mo sopo vejuveju hin te suiha hatea i pala, řa pa sopo mele opoi la hinau sei řa lo vejuveju hinira nake, matan la pa tihai.

<sup>11</sup> Hin pongi atu na lo natirihī, na retireti sohena natirihī. Na lo řomřomi sohena natirihī, noku kilakilau mo sohena natirihī. Hin pongi atu na mai tamlohi, na tau nařihī na posposi nona natuvarihi. <sup>12</sup> Matan nake nořa kilakilau mo pa lo vusovusoha, pani na pongi hitahu nořa kilakilau i pa mera i řuhu. Nake na lo levosahi na makomona purongo, pani hitahu a pa levosahi vevuhia tataholo sohena God mo pete levosahi vevuhiau moiso.

<sup>13</sup> La hinau akerihī mo tolu natu, la pa lo toho jejeu:

rasua, řomtoho, peresi  
na opoia,  
pani hinau aulu hinira, enia  
opoia.

## 14

### *Otori Sei Tanume Tapu Mo Lo Silera*

<sup>1</sup> Ha tau na opoia hina tiroma na maurimim, ale ha tau na řomimim i řilangi mata lavi la otori řuhuřuhu sei Tanume Tapu i eři silea isamim, ale hinau atu mo řuhu jea hinira, enia matan

vara ha eři vere na retiman-govi sohena God mo mangovi kamim hinia. <sup>2</sup> Matan haratu mo lo retireti na leo tinapua matea Tanume Tapu

mo silea, mo sopo retireti isana tamlohi, pani isan God, matan mo sopo tea i rongovosahia, matan enia mo lo vere na hina luhu hin Tanume Tapu. <sup>3</sup> Pani haratu mo lo retimangovi sohen God mo mangovia hinia, enia mo lo tueni na tamlohi vara la eři ulua hin Moli, ale mo lo retituetuenira, ale mo lo retinanauhira. <sup>4</sup> Haratu mo lo retireti hin te leo matea Tanume Tapu mo silea isana, enia mo lo tuenia hasena vara i ulua, pani haratu mo lo retimangovi sohen God mo mangovia hinia, enia mo lo tueni na vao kalesia vara la ulua.

<sup>5</sup> Ale, a pa avulahi vara kamim mo isoiso ha eři retireti hin la leo tinatinapua atu sei Tanume Tapu mo lo silea, pani i pa mele řuhu jea vara ha eři retimangovi sohena God mo mangovi kamim hinia. Retimangovi enia mo mele aulu jea na retireti na leo tinapua matea sei Tanume Tapu mo lo silera, i pa mele řuhu jea vara tea i eři posi leo atu matan vara vao kalesia la eři levosahi na řaramina, ale la pa eři ulua matana.

<sup>6</sup> Ale la voraiiku peresi na vevoraiku, vara a mai isamim, ale a retireti isamim hin te leo tinapua hatea sei Tanume Tapu mo lo silera, i pa tueni kamim sohena sava? Pani vara a lavi te reti hin te hinau God mo vuhesia isaku,

teni te hina lelevosahi, teni te retimangovi matea God mo mangovia isaku, teni te vujangi matea, ale haratu io, i pa tueni kamim. <sup>7</sup> Mo sohena pue tangtangi teni te potikevu matea, mo sopo te mauri hinira, enira sohena, vara tea mo sopo soro tataholoi te vete hinira, hare i pa rongovosahi vete atu mo lo soro hinia? <sup>8</sup> Ale vara tea mo tiv na trumpet, ale roroana mo sopo tataholo, hare i pa tatamahunia hasena mata vuro? <sup>9</sup> Ale mo sohena isamim, vara mememim mo lo retireti na leo matea tea i sopo efi rongovosahia, tea i pa efi levosahi na sava ka lo vereea sohena sava? Matan ka lo vaore purongo.

<sup>10</sup> Varaŕuhu, leo tinatinapua la lo toho na varama, ale mo sopo tea vara mo sopo te ŕaramina. <sup>11</sup> Pani vara na sopo levosahi na ŕaramin te reti hatea a pa sohena vinano isan haratu mo lo vereea, ale haratu mo lo retireti enia i pa sohena vinano isaku. <sup>12</sup> Ale matan ka lo opoia jea vara ha lavi te otori isan Tanume Tapu, mo ŕuhu vara ha usi God matan la haratu sei la efi tueni na vao kalesia tari vara la ulua.

<sup>13</sup> Matan haratu, haratu mo lo retireti na leo tinapua matea Tanume Tapu mo silea isana, mo tataholo vara i usiuseri vara i efi lavi na suiha mata i vereuli na ŕaramin la retireti atu. <sup>14</sup> Matan vara na lo usiuseri na leo tinapua matea Tanume Tapu mo silea isaku, mapuku mo lo usiuseri usuri na suihan otori atu, pani ŕomiku mo sopo

rongovosahi na sava na lo vereea.

<sup>15</sup> Vara mo sohen haratu a pa vai na sava? A pa usiuseri usuri na suihan otori atu na mapuku, ale a pa usiuseri usuri na sava mo lo toho na ŕomiku sohena; a pa lalavete usuri na suihan otori atu na mapuku, ale a pa lalavete usuri na reti enau na levosahi na ŕaramira. <sup>16</sup> Matan vara ko lo hasohaso God usuri na suihan otori atu na mapum, sohena sava natu, te tamlohi mo sopo tahisam i efi vere 'amen' vara mo sopo rongovosahi na sava ko lo vereea na nom vere meje isan God? <sup>17</sup> Matan korong, nom vere meje mo tataholo purongo, pani i pa sopo efi tueni pa tamlohi atu vara i ulua.

<sup>18</sup> Na vere meje isan God matan enau na lo retireti hin leo atu Tanume Tapu mo silea isaku mo tavera, mo jeu kamim mo isoiso. <sup>19</sup> Pani na naho vao kalesia, i pa mele ŕuhu jea vara a vere te reti i lima isara vara la efi rongovosahira matan vara i efi tuenira, mo jeua vara a vere na reti mo tari vaha sangavulu (10,000) na leo tinapua matea la sopo rongovosahia.

<sup>20</sup> La voraiuku peresi na vevoraiku, ŕomŕomi nona natuvarihi i sopo toho isamim. Ha pipi mata vai na hehe, pani ha tamlohi na nomim ŕomŕomi. <sup>21</sup> La ulia na Leu lara, Moli mo vereea vara:

'A pa retireti isan noku tamlohi na leo tinatinapua, ale na jingo vinano.

Pani isoisona,  
la pa sopo tapurongo  
isaku.'

*Isa 28.11-12*

<sup>22</sup> Ale matan reti atu, retireti na leo tinatinapua, enira matamata matea mo sopo nona tamlohi rasua, pani nona tamlohi la sopo rasu. Ale retimangovi sei God mo mangovira enia matamata matea mo sopo nona tamlohi la sopo rasua, pani nona tamlohi la rasua. <sup>23</sup> Ale vara tamlohi kalesia tari la lo pulutahi jara matea, ale la lo retireti na leo tinatinapua Tanume Tapu mo silea isara, ale vara te vinano teni te tamlohi la sopo rasu la unu atu, řa levosahia vara la pa vereva vara kamim ka putu. <sup>24</sup> Pani vara kamim mo isoiso ka lo retimangovi, ale vara te vinano teni te tamlohi mo sopo rasu mo unu atu, i pa levosahia vara enia tamlohi hehe matea matan God i pa pisuhi na hehe na maurina, ale i pa rongovosahia na mapuna vara mo pete tia moiso mata talai non God. <sup>25</sup> Hina luhu na mapuna la mavuhesi, ale i pa jovi popovitoho, ale i pa lotu God i pa vereva vara, "Vararuhu purongo! God mo lo toho na livuhamim."

*Posposi Tataholo Mata Lotu*

<sup>26</sup> La voraiuku peresi na vevoraiuku, i pa sohena sava natu? Vara ha pulutahi jara matea, te hatea i pa lavi te vete, te tinapua i vujangi, te tinapua i vereuli te hinau paro God mo vujangia isana,

te tinapua i pa retireti na leo tinapua matea Tanume Tapu mo silea isana, ale te tinapua i pa posposi reti atu matan vara vao kalesia la eři levosahia. Hinau tari ka lo vaira, ha pa vaira matan vara tamlohi la pa ulua matara. <sup>27</sup> Vara tea la eři retireti na leo tinapua matea Tanume Tapu mo silea isana, ha sopo tinarihia vara i jeu i rua teni i tolu la retireti, ale te hatea i retireti moiso, ale te tinapua i pa pete retireti, ale te hatea i pa vere na řarami nora retireti. <sup>28</sup> Pani vara mo sopo tea vara i eři posi na nora retireti, la pa sakele malum purongo, ale la retireti isara hasera peresi God.

<sup>29</sup> Ha tinarihia vara te pŗovet i rua teni i tolu la retireti, ale tatua pŗovet la pa tapurongo usuri na sava la lo vereva. <sup>30</sup> Vara God i vuhesi te hinau isan te tinapua mo lo sakele atu, haratu mo lo reti tiroma i pa sopo reve na nona retireti i peravu, pani i sile na masapa isana vara i eři retireti. <sup>31</sup> Matan kamim mo isoiso ha eři sile te reti God mo mangovia isamim, matea i retireti moiso ale matea, matan vara kamim mo isoiso ha eři lavi te lelevosahi atu, ale ha ulua na nomim rasua. <sup>32</sup> Ha levosahia vara la haratu la lo vere na retimangovi God mo silea isara, enira la eři hase taurilatira, la sasaovi mata masapa vara la eři retireti hinia, <sup>33</sup> matan God enia mo sopo God mata kojokojohi, mo vono, enia God mata tamata, ale posposi tataholo akerihi sei la lo vaia



na vao kalesia mata tapuhi tari non God.

<sup>34</sup> Haʻrai la pa toho malum na lolo ima lotu, matan mo tapu isara vara la eʻri retireti ea, ale la pa tapurongo sohena leu mo vereā. <sup>35</sup> Vara la opoia vara la levosahi mamahuni te hināu, la pa usi na tuara hinia na imara, matan mo sopo tataholo vara te haʻrai i retireti na naho vao kalesia.

<sup>36</sup> Ka ʻromi vara lelevosahi mata reti non God mo tapulo isamim, ale ka ʻromi vara mo isoiso isamim purongo?

<sup>37</sup> Vara tea mo lo ʻromʻromia vara enia pʻrovet matea, teni enia mo tapu, enia i pa ʻromʻromi mamahuni na sava na lo ulia isamim vara enira retileu non Moli. <sup>38</sup> Vara tea mo lo kilau purongoi hināu nike, tamlohi atu mo sopo ʻruhu matan te hināu.

<sup>39</sup> Ale matan hināu tari atu la voraiku peresi na vevoraiku, ha opoia jea vara ha eʻri vere na retimangovi God mo silea isamim. Ale ha sopo horo na retireti na leo tinapua sei Tanume Tapu mo silera. <sup>40</sup> Pani ha vai na hināu tari usuri na posposi tataholo na malelera tataholo.

## 15

*Vujangi Mata Sauteterahi Non Kʻristo*

<sup>1</sup> Ale la voraiku peresi na vevoraiku, na opoia vara ha mele ʻromʻromi pa Retiʻruhu sei na lo retivujavujangi kamim hinia sei ka lavia moiso, ale mo tikeli nake, ka pa lo turu ʻrilangi hinia. <sup>2</sup> Ale ka lo juri hinia nake, vara ha lo taurilati ʻrilangi reti atu sei

na retivujavujangia isamim, vara i vono, korong nomim rasua enia hina purongo.

<sup>3</sup> Matan na pete sile kamim hin vujangi aulu atu hin la haratu Moli mo lo silera isaku moiso, enia vara Kʻristo mo mate mata noʻra hehe, sohena Retitapu mo vereā, <sup>4</sup> ale usuri na noku vujangi, enia la tavunia, ale na hatolu rani God mo sauteterahia sohena Retitapu mo vereā. <sup>5</sup> Ale hin rani atu enia mo pala isan Peter, moiso isan la nona tamlohi usuri atu tupu sangavulu ʻromana mo rua. <sup>6</sup> Moiso, mo mele pala isana vao vorai kalesia matea na rani matea, evira mo jeu mo ngav sangavulu lima, (500) vao tavera hinira la pa lo mauri mo tikeli nake, pani tatuara la mate moiso. <sup>7</sup> Ale moiso mo pala isan James, moiso mo pa isana vahaʻrūle tari. <sup>8</sup> Hitahu mo pala isaku, mo sohena vara na sopo vora na noku rani vora tataholo. <sup>9</sup> Matan na nona vao vahaʻrūle enāu na atano jea, ale mo sopo tataholo vara la toviau vara a vahaʻrūle matea, matan na lo levuti na vao kalesia non God.

<sup>10</sup> Pani ʻromʻruhu non God mo vaiāu na mai sava tamlohi nake, ale nona ʻromʻruhu isaku mo sopo vano hina purongo. Mo vono, matan enāu na voko ʻrilangi mo jeu na vahaʻrūle tari, pani mo sopo enāu haseku na lo voko, pani ʻromʻruhu non God sei mo lo toho hinia. <sup>11</sup> Mo sopo te hināu hinia vara hare natu mo retivujavujangia isamim vara enāu teni enira, hina

aulu hinia enia matan ka rasu na sava kama retivujavujangia isamim.

### *Mele Turu Na Mateia*

<sup>12</sup> Ale ha to vereea isaku, mata sava natu, tatuamim la lo vereea vara i pa sopo te sauteterahi na mateia? Na lo usia sohena matan kama lo retivujavujangia vara Křisto mo turu na mateia. <sup>13</sup> Matan, vara i sopo te sauteterahi na mateia, mo vereea vara Křisto mo sopo mele turu na mateia. <sup>14</sup> Ale vara Křisto mo sopo turu na mateia, nomam retivujavujangi enira la vano hina purongo, ale nomim rasua mo vano hina purongo. <sup>15</sup> Ale vara sohena, kamam nona vahařule kama lo retihalu hin God matan kama lo vereea vara God mo sauteterahi Křisto na mateia, pani vara reti atu mo varařuhu, mo vereea vara God i pa sopo sauteterahi na tamlohi. <sup>16</sup> Matan, vara la haratu la mate la sopo mele turu na mateia, Křisto sohena mo sopo turu na mateia. <sup>17</sup> Ale vara Křisto mo sopo mele turu na mateia, nomim rasua enia hina purongo, ale kamim ka pa lo toho na nomim hehe. <sup>18</sup> Ale la haratu la mate hin Křisto la tihai jejeu. <sup>19</sup> Vara nořa řomtoho hin Křisto enia matan mauri nike nake purongo, tamlohi tinapua la pa řomřomia vara enřa řa rongorongono vono.

<sup>20</sup> Pani mo vono! Enia hina varařuhu matea vara Křisto mo turu na mateia, enia vua tiroma hin la haratu la mate moiso.

<sup>21</sup> Matan sohen mateia mo mai na tamlohi matea, ale

mele turu na mateia mo mai na tamlohi matea. <sup>22</sup> Matan hin Adam, tamlohi tari la mate, ale tamlohi tari hin Křisto la pa mele mauri. <sup>23</sup> Pani usuri na malele tataholo mata sauteterahi, Křisto mo tiroma, moiso la haratu nona na nona mele mai.

<sup>24</sup> Moiso pongi hitahu i pa pala hin rani atu vara Křisto i komo na suiha meresahi tari sei la aulu teni la lo tauri na suiha peresi na řilangi, moiso i pa sile na nona suiha mata aulu na hinau tari isan God Tama. <sup>25</sup> Matan enia i pa tauri na suiha i tikeli rani atu vara mo tau vevuhi na nona meresahi tari na ruhuruhu palona. <sup>26</sup> Isoiso meresahi vara i pa komoa, enia mateia. <sup>27</sup> Matan Retitapu mo vereea vara, 'God mo tau vevuhi na hinau tari vara la pa toho na ruhuruhu palona'.

*Psa 8.6* Reti atu mo vereea vara, 'hinau tari vara la pa toho na ruhuruhu palona' mo memera purongo vara God Tama i pa sopo toho na ruhuruhuna. <sup>28</sup> Hin rani atu hinau tari la mai na ruhuruhun Natuna, ale Natun God sohena i pa hase taua i toho na ruhuruhun God Tama sei mo tau na hinau tari na ruhuruhun, ale God i pa aulu na hinau tari na jara tari.

<sup>29</sup> Vara tamlohi la pa sopo turu na mateia, sava natu mo lo toho na řomin la haratu la lo lavi na paptijo matan la haratu la mate moiso? Vara tamlohi la pa sopo turu na mateia, mata sava natu tamlohi la lo lavi na paptijo matara?

<sup>30</sup> Sava natu mo űuhu na nomam vavahinau nike, matan mo lo tau na mateia na nahomam tarea? <sup>31</sup> Matan na lo vere tataholoia isamim la voraiuku peresi na vevoraiuku, noku hapahapa hin Kristo enia kamim sei, matan rani mo visa moiso, mariviti a lo mate matamim. <sup>32</sup> Sava hina űuhu i pa malue na noku valum peresi maji jala sei, la tamlohi atu Ephesus, vara i pa sopo te sauteterahi na mateia? Vara mo sopo te sauteterahi, mo űuhu vara űa vaia usuri retireti nike vara, 'Ra vai na hanhani tavera, ale űa inu, matan pavuho űa pa mate.' *Isa 22.13*

<sup>33</sup> Ha sopo tinaűihia vara tea i halu kamim hin haratu la lo vereaa lara, "Posposi nona tamlohi sasati i eűi posi na posposi tataholo nona tamlohi űuhu."

<sup>34</sup> Ha rovo na nomim posposi sasaruho, ale ha isoiso na hehe, matan tatuamim la sopo levosahi te hinau hin God. Na vereaa matan vara a vai kamim ha mahanuhanu.

### *Epe Tuai Peresi Na Epe Paro*

<sup>35</sup> Pani tea i pa usia vara, 'Tamlohi mate la pa mele turu sohena sava? Ale epera la pa sohena sava?' <sup>36</sup> Kamim tamlohi rongorongo vono! Sava ka lavoa i pa sopo eűi mauri vara i sopo mate tiroma. <sup>37</sup> Ale sava ka lavoa, mo sopo enia natu mo mele tuvu, matan enia piri matea purongo, hina purongo vara piri wit teni te piri vipahai tinapua. <sup>38</sup> Ale God mo silea na epena usuri

na masalona, ale mo sile na piri hatehateahi na epe tinatinapua. <sup>39</sup> Matan epe tari la sopo sohesohera, pani epe tamlohi enira la sohesohera, epe maji palo vati la tinatinapua, epe maji avuavu mo mele tinapua, ale epe maji tasi mo tinapua.

<sup>40</sup> Epe hinau na tuka la tinapua na epe hinau na varama, pani memera epe na tuka la tinapua, ale memera epe na varama la tinapua. <sup>41</sup> Memera alo enia hinau matea, memera vitu enia mo tinapua, memera vitusarasara la mele tinapua, matan memera vitusarasara matea matea la tinatinapua.

<sup>42</sup> Ale mo sohena natu na sauteterahi nona mateia. Sava la tavunia enia i pa űovo, sava mo mele turu enia i sopo eűi űovo. <sup>43</sup> Sava la tavunia enia hina purongo, ale sava mo turu enia mo űuhuűuhu jea. Sava la tavunia enia mo talekoleko, ale sava mo turu enia mo űilangi. <sup>44</sup> Sava la tavunia enia epe mata varama, ale sava mo turu enia epe matan na tuka. Vara epe matea matan varama nike, i pa epe matea matan na tuka.

<sup>45</sup> Sohen la ulia lara, 'Tamlohi tiroma atu Adam mo mai tamlohi mo lo mauri'. *Gen 2.7* Harua Adam atu mo pa mai hitahu, enia mo sile na mauri mata Tanumen God. <sup>46</sup> Sava mo mai tiroma, mo sopo haratu matan na tuka, pani haratu mata varama, haratu matan na tuka mo pa usuria hitahu. <sup>47</sup> Tamlohi tiroma, enia mo tai na varama, mo

malue na lepa, pani harua tamlohi enia mo tai na tuka. <sup>48</sup> Tamlohi tari na varama la lavi na epe varama sohen Adam, pani epeŕa matan na tuka i pa sohen epen Kŕisto. <sup>49</sup> Nake ŕa sohen Adam, tamlohi mata varama, ale hitahu ŕa pa sohen Kŕisto sei mo tai na tuka.

<sup>50</sup> La voraiku peresi na vevoraiku, na vere a isamim, vara epe peresi na ŕae matan varama nike la pa sopo eŕi unu hin mauri atu na tuka, teni haratu i pa ŕovo i pa sopo eŕi unu hin mauri atu i sopo eŕi ŕovo.

<sup>51</sup> Ha tapurongo, a pa vere kamim na hina luhu matea. Enŕa mo isoiso ŕa pa sopo mate, pani enŕa mo isoiso ŕa pa posi, <sup>52</sup> vahatea purongo na isoiso roroa trumpet non God. Matan roroan trumpet atu i pa roroa, ale la haratu la mate la pa turu la sopo eŕi mele ŕovo. Enŕa mo isoiso ŕa pa posi. <sup>53</sup> Matan epe mata ŕovo nike, i pa ru epe atu i sopo eŕi ŕovo, ale epe mata mate nike, i pa ru na epe i sopo eŕi mate.

<sup>54</sup> Hin rani atu vara hinau mata ŕovo mo ru na hinau i sopo eŕi ŕovo, ale epe mata mate i ru na epe i sopo eŕi mate, ha pa levosahia vara sava la ulia tuai moiso i pa masese natu vara, 'Suiha mata mauri mo ŕolomi na mateia.' *Isa 25.8*

<sup>55</sup> 'Eh mateia! Suiham enia epu?

Eh mateia! Suiham mata sile na rongohaji enia epu?' *Hos 13.14*

<sup>56</sup> Suiha mata sile na rongohaji non mateia enia hehe,

ale suiha mata hehe enia leu non God. <sup>57</sup> Pani ŕa vere meje isan God sei mo lo sileŕa na suiha matan vara ŕa jeu na noŕa meresahi tari hin noŕa Moli Iesu Kŕisto.

<sup>58</sup> Matan hinau sei, la voraiku kalesia ŕuhufuhu, ha turu ŕilangi, ale ha sopo hisuhisu, tarea ha vai na vavahinau non Moli matan ka levosahia vara hin Moli nomim vavahinau i sopo eŕi vano hina purongo.

## 16

### *Silesilea Mata Kalesia Jerusalem*

<sup>1</sup> Ale usuri na hinau na nomim leta mata silesilea mata mania nona tapuhi, sava na vere a isana mara Galatia, kamim sohena, ha pa vaia sohera. <sup>2</sup> Na tiroma rani na wik hatehateahi, kamim hatehateahi ha pa tauhasehi te mania na volimim, ale ha tau mamahunia, sohen ka hitea mo tataholo isamim, matan vara hin pongi atu vara a mai isamim, ka pete tatamahunia moiso vara a lavia. <sup>3</sup> Ale hin rani atu vara a pala, a pa ŕule la haratu ka viŕonira moiso peresi na leta vara i vereulia vara enira la tai epu peresi na nomim silesilea i sivo Jerusalem. <sup>4</sup> Vara ka hitea vara mo tataholo vara a sivo peresira, mo lo ŕuhu purongo, la pa usuriau.

### *Romromi Mata Rorohi Corinth*

<sup>5</sup> A pa rohi kamim vara a hahau roto Macedonia, matan na lo ŕomŕomia vara a pa hahau roto Macedonia.

<sup>6</sup> Korong a pa toho isamim

makomona, vara i vono, a pa toho isamim na pongi hamariri, matan vara ha efi tueniau na maleleku na sava jara vara a vano ea. <sup>7</sup> Matan na sopo opoia vara a hite kamim mata makomo rani purongo. Na lo romtoho vara a pa toho peresi kamim i peravu makomona vara Moli mo avulahi. <sup>8</sup> Pani a pa toho Ephesus i tikeli na pongin Pentecost, <sup>9</sup> matan masapa mata vavahinau matea mo roi isaku vara a efi vai te vavahinau non Moli nike, ale noku meresahi enira matuvana.

<sup>10</sup> Vara Timothy i mai isamim, ha kilau mamahunia, enia mo lo vai na vavahinau non Moli soheku. <sup>11</sup> Ha sopo tinafihia vara tea i hitelehilehia. Ha rulea na malelena peresi na nomim leruhu vara i mai isaku. Na lo kilau vara a pa hitea peresi na tatua vorai kalesia tinapua i sopo tuai.

<sup>12</sup> Ale voraira atu Apollos, na lo usia rilangi isana vara i rohi kamim tolu na voraira kalesia tinapua nike. Pani mo sopo opoia vara i mai nake, i pa mai hitahu vara i hite te masapana.

<sup>13</sup> Ha lo kilau, ha lo turu rilangi na rasua, ha romrilangi, ha rilarilangi. <sup>14</sup> Na hinou tari ka lo vaira, ha vaira na opoia.

<sup>15</sup> Ka levosahi Stephanas peresi na vao imana enira la mai kalesia tiroma nike Greece, ale la sile na maurira matan vara la vavahinau la tueni na kalesia tinapua. Na lo usia rilangi isamim la

voraiku peresi na vevoraiku, <sup>16</sup> vara ha sile na oloolo isara peresi la haratu sei mapura la lo toho na nora vavahinau sohera. <sup>17</sup> Na lo avulahi tavera na mai non tahisamim Stephanas, Fortunatus peresi Achaicas, matan enira la lavi na jaramim nike peresiau. <sup>18</sup> Matan la vai na romiku mo mele ruhu sohen la lo vaia na maurimim. Ha sile na oloolo isana tamlohi sohen harihi.

*Isoiso Retioloolo Non Paul*  
<sup>19</sup> Vao kalesia nike Asia, la sohai na nora retioloolo isamim. Aquila enia Priscilla peresi na vao kalesia na imara la sohai na retioloolo ruhuruhu isamim hin Moli. <sup>20</sup> La vorai kalesia tari nike, la sohai na nora retioloolo isamim. Ha tapatapai kamim hatehateahi na pososi tataholo nona tapuhi non God.

<sup>21</sup> Enau Paul na uli la retioloolo nike na limaku. <sup>22</sup> Vara tea mo sopo te opoia non Moli isana, lesati i pa toho isana. Noa Moli, o mai. <sup>23</sup> Romruhu non Moli Iesu i pa toho isamim. <sup>24</sup> Noku opoia i pa toho isamim mo isoiso, hin Kristo Iesu. Amen.

## 2 Corinthians

### Harua Leta

### Paul Mo Uliā Isana

### Mara

### Corinth

### Leta Nike

Paul mo ƀarami na retiusia nona kalesia Corinth, vara Pauli pa pala sohen mo vereā isara moiso teni mo vono. Mo sopo opoia vara i rohira matan mo levosahia vara i pa arira mata nora hehe (1.23). Paul mo opoia vara i sile na masapa isara vara i eƀi hitea vara la pa hahau usuri na mauri rasua sohena sava (2.5–11).

Paul mo vereā isara mara posin God mo ƀuhu isan la haratu la vejveju, ale mo lo kilau vara la pa tueni na kalesia la tilavono Jerusalem peresi Judea (8.1–9.15).

Paul mo vereā mara enia volitusi mata retitauhi paro non God (3.1–17). Mo lo turu ƀilangi mata lavi na tamlohi la mai isan God, hina purongo vara mo lo lavi na rani ƀilangi matana. (4.1–6.13; 10.1–12.10).

‘La hinau tari nike la tai isan God sei mo sara tamata peresi na tamlohi na varama hin Kƀisto, ale enia natu mo sile kamam na vavahinau mata tau na tamata.

Matan ƀa eƀi vereā vara hin Kƀisto, God mo sari tamata non varama vara i mele tapala peresia. Mo sopo mele evi na hehe nona tamlohi, ale mo sile kamam na retisohai mata sari tamata.’ (5.18–19)

**Hin Leta Nike**

1. Paul mo vere meje isan God (1.1–11)
2. Vavahinau nona vahaƀule non God (1.12–2.17)
3. Opoia non Kƀisto mo haloa (3.1–7.16)
4. Otori nona tilavono (8.1–9.15)
5. Vahaƀule varaƀuhu (10.1–13.10)
6. Isoiso Retioloolo (13.11–13)

### *Retioloolo Non Paul*

<sup>1</sup> Enau Paul na uli leta nike peresi voraiƀa Timothy, enau vahaƀule non Kƀisto Iesu matea usuri na masalon God. Kama lo uliuli mo vano isana vao kalesia non God Corinth peresi na tapuhi sei la lo toho ƀalihi na jara tavera matan Achaia. <sup>2</sup> Romƀuhu peresi na tamata la mai isamim la tai isan God Tamaƀa peresi Moli Iesu Kƀisto.

### *God Mo Tahe Na Romi Nona Tamlohi*

<sup>3</sup> Hasohaso tavera i vano isan God sei Tamaƀa noƀa Moli Iesu Kƀisto, enia God mo lo ƀomopoi na tamlohi, ale God mata tahe la haratu ƀomira la jovi. <sup>4</sup> Enia mo lo tahe na ƀomimam na nomam rani ƀilangi tari matan vara kama eƀi tahe na ƀomin tinapua na nora rani ƀilangi hin nanauhi sei God mo silea isamam. <sup>5</sup> Ale sohena kamam kama lo lavi na rani ƀilangi matuvana matan Kƀisto, ale hin Kƀisto sohena nomam nanauhi mo maƀivi savulevule. <sup>6</sup> Pani vara kama lo lavi na mauri ƀilangi, ka levosahia vara kama lavira mata i tahe na ƀomimim ale mata maurimim la juri; ale vara God mo tahe na

řomimam, enia matan vara kama eři tahe na řomimim na nomim rani řilangi. Ale matana, ha eři řom peravu ha turu řilangi na rani řilangi sei sohen kama lo lavira. <sup>7</sup> Kama levosahi mamahunia vara ka lavi na rani řilangi peresi kamam, God i pa tahe na řomimim sohen mo lo vaia isamam.

<sup>8</sup> Matan, la vorai peresi na vevorai, kama opoia vara ha levosahi mamahuni na rani řilangi sei kama lavira na jara tavera matan Asia. La lo puhoni kamam la jeu na suihamam tari, ale kama řom vara kama pa mate. <sup>9</sup> Varařuhu, kama řom vara talai mata mateia mo jovi isamam moiso hin la rani řilangi atu, ale matana, kama sopo mele rasu na suihamam pani kama tau na nomam rasua hin God sei mo sauteterahi la haratu la mate. <sup>10</sup> God mo sau narihi kamam na liman mateia, ale i pa juri kamam, ale kama tau na nomam řomtoho isana vara i pa mele juri kamam. <sup>11</sup> Kamim sohen, ha pa tueni kamam na nomim ususi matamam, ale vuana, tamlohi matuvana la pa vere meje isan God matamam matan enia mo juri kamam na ususi nona tamlohi matuvana.

### *Paul Mo Posi Na Romina*

<sup>12</sup> Kama lo retihapahapa sohen matan kama eři vere tataholoia vara řomimam la sopo pisuhi kamam hin te nomam vavahinau mo sati kama lo vaıra na naho tamlohi tari teni isamim. Kamam kama lo turu na

řomřuhu non God, mo sopo na lelevosahi nona tamlohi, kama řomatano kama lo hahau sohen natirihi na naho tamlohi, ale kama lo vaia nike isamim mo jeu na jara tinatinapua. <sup>13</sup> Matan kama lo uli na sava mo lo toho na řomimam hin leta nike matan vara ha eři levosahi mamahunia, ale na lo řomtau vara ha pa levosahi mamahuni kamam, <sup>14</sup> hina purongo vara nake ka sopo lo levosahi mamahuni kamam. Hin rani atu vara nořa Moli Iesu i mele pala, kamim ha pa hapahapa matamam sohen nake kamam kama lo hapahapa matamim.

<sup>15</sup> Ale matan na levosahi hinatu, na lo vere isamim tiroma vara a pa rohi kamim mata a sile na leřuhu vaha rua isamim vara a toho peresi kamim. <sup>16</sup> Hin rani atu na řomi vara a pa toho peresi kamim na maleleku na lo vano Macedonia, ale vara a lo mele mule ha pa tueniau na maleleku vara a sivo Judea.

<sup>17</sup> Korong ka řomřomia vara na posi na řomiku vara a pa rohi kamim matan na sopo mele pala isamim sohen na vere moiso. Korong kara na lo halu sohen tamlohi varama sei lara "io" pani řarami nora retireti tataholo enia "mo vono". <sup>18</sup> Sohen God mo lo varařuhu tarea, nomam retisohai isamim mo sopo "io" ale hitahu "mo vono". <sup>19</sup> Matan Natun God, Iesu Kristo, haratu sei enau, Silas peresi Timothy, kama lo retivujavujangia isamim enia mo sopo "io" ale hitahu

“mo vono”, pani hin Iesu enia “io” tarea. <sup>20</sup> Matan retitauhi tari non God hin Iesu enira mo isoiso “io”, ale matan haratu natu řa lo vere “amen” na rani řa lo hasohaso God hin Křisto. <sup>21</sup> Pani God natu mo vai kamam kama řilangi peresi kamim na rasua hin Křisto, ale enia natu mo viřoniřa mata nona vavahinau, <sup>22</sup> ale enia mo tapuhiřa, ale mo tau na Tanumena na mapuřa mo sohena vara mo tau na sope voliřa tiroma na hinau tari la pa mai hitahu.

<sup>23</sup> Ale na nahon God, na sopo halu, na sopo mele mai isamim Corinth matan na sopo opoia vara a vere komokomo kamim. <sup>24</sup> Na sopo opoia vara kama aulu na nomim rasua, pani vara kama tapala peresi kamim na vavahinau matan vara nomim avulahi i pa mařivi na nomim turu řilangi na nomim rasua.

## 2

<sup>1</sup> Ale mo vaia na tau na řomiku vara a pa sopo rohi kamim ale ha mele rongo i sati matana. <sup>2</sup> Matan, vara a vai kamim ha rongo i sati, hare natu i pa vaiau a avulahi pani la haratu sei na lo vaira la rongo mo sati? <sup>3</sup> Ale na uli hinau akerihi isamim matan vara a mai, a pa sopo rongo i sati hin la haratu sei mo tataholo vara la vai na noku avulahi i tavera jea. Ka sopo levosahia vara noku avulahi mo lo turu na nomim avulahi? <sup>4</sup> Na rongo mo sati hajavua hin rani atu na uli leta atu isamim, řomiku mo jovi

tavera ale na tangi matana. Na sopo opoia vara a vai kamim ha řom sasati, pani na opoia vara ha levosahia sohena sava na lo opoi kamim.

### *God Mo Romi Na Tamlohi Hehe*

<sup>5</sup> Vara tamlohi atu mo vaiau na rongo mo sati, mo sopo vaiau haseku vara a rongo i sati, pani na malele tinapua mo vai kamim mo isoiso ka rongo mo sati. <sup>6</sup> Enia mo lavi na rani řilangi tavera mata talai atu sei ka lo silea isana moiso hin rani atu kamim mo isoiso ka pulutahi jara matea mata aria. <sup>7</sup> Ale nake mo tataholo vara ha řomia, ale ha mele tahe na řomina, vara i vono, řomina i pa sati jea ale i jovi nařihi na nona rasua vevuhi. <sup>8</sup> Ale nakerihi, i pa řuhu jea vara ha vujangia vara ka pa lo opoia.

<sup>9</sup> Hin rani atu na lo uliuli sohena isamim matan vara a pa hitea vara ha pa oloolo hiniau i tikeli epu. <sup>10</sup> Vara ha řomi tamlohi akerihi hin te hinau, enau sohena a pa řomia vara te hinau mata řomia mo lo toho mo tikeli nake, ale na vaia na suihan Křisto matamim, <sup>11</sup> matan vara Setan i pa sopo jeuřa, matan enřa řa levosahi mamahuni na malelen Setan.

### *Volitusi Mata Retitauhi Paro*

<sup>12</sup> Hin rani atu nara na pala Troas vara a retivujavujangi na Retiřuhu hin Křisto, hina purongo vara Moli mo sileau na masapa tavera matea, <sup>13</sup> řomiku mo sopo sakele matan na sopo lo hite voraiku Titus ea matan vara i vereau



vara kamim ka lo toho sohena sava. Ale matana, na enŕa vuho isara Troas ale na malue na vano Macedonia.

*Vavahinau Nona Vahaŕule*

<sup>14</sup> Pani ŕa vere meje tavera isan God sei hin Kŕisto, mo lo tiromaŕa ŕa lo jeu na noŕa meresahi tarea. Ale na sava jara ŕa lo vano hinira, enia mo vaiŕa ŕa lo vere na tinapua hin Moli, ale ŕa lo sohai na Retiŕuhu sohena hasori ponaha ŕuhu matea.

<sup>15</sup> Matan enŕa ŕa hasori ponaha ŕuhu non Kŕisto isan God isan la haratu sei God mo lo jurira, ale isan la haratu sei la pa tihai — <sup>16</sup> enŕa hasori ponaha ranga matea mata i sile na mate isara, pani isan vao atu la rasua enŕa hasori ponaha ŕuhu matea mata i sile na mauri. Ale hare natu mo tataholo mata i vai la vavahinau nike? <sup>17</sup> Matan kamam kama sopo sohen la vao tamlohi vujangi tinapua sei la lo vere na reti non God na nora halu mata lavi na mania. Mo vono, kamam kama lo retivujavujangi na retisohai non God mo sopo te halu hinia na nahon God, ale peresi na suihan Kŕisto usuri na posposi tataholo nona vahaŕule non God.

**3**

<sup>1</sup> Ka ŕomi vara kama lo mele tapulo tahe kamam hasemam teni mo vono? Korong ka lo ŕomŕomia vara kama pa lavi te leta isamim teni i mai isamim vara i vere a vara kamam sava tamlohi, sohena tamlohi tinapua la lo lavira matan tamlohi la sopo levosahira? <sup>2</sup> Kamim ka

nomam leta sei God mo ulia na mapumam, tamlohi tari la levosahia ale la eŕi evia, <sup>3</sup> mo vujangia vara kamim ka leta matea non Kŕisto sei kamam kama lo lavia mo mai isana, tea mo sopo ulia na pepa na limara pani Tanumen God sei mo mauri mo ulia, mo sopo sohena leu mo ulia na tavalu vatu, pani na mapu tamlohi.

<sup>4</sup> Kama levosahi mamahuni la hinau nike nomam rasua hin God hin Kŕisto mo tavera. <sup>5</sup> Enia mo sopo vara kama ŕomŕomia vara kama eŕi vai te hinau kamam hasemam, pani nomam eŕieŕi mo tai isan God, <sup>6</sup> sei mo vaiŕa ŕa tataholo mata eŕi vai na vavahinau non retitauhi paro mata mauri sei mo sopo usuri na leu la ulia na pepa, pani na Tanumena, matan leu mo sile na mateia, pani Tanumena mo sile na mauri.

*Ruhuŕuhu Retitauhi Paro*

<sup>7</sup> Pani, vara vavahinau atu tuai mata leu la ulia na tavalu vatu mo sile na mateia, hina purongo mo pala peresi na mera tavera ale mo vaia tavtavuin Israel atu la sopo eŕi kilau tataholo na nahon Moses mata meran God mo mera na nahona pani mera atu mo lo majara, <sup>8</sup> ŕa levosahi mamahunia vara mera vavahinau non Tanumena i pa mele ŕuhu jea! <sup>9</sup> Matan, vara mera ruhuŕuhu mo lo toho hin retitauhi tuai atu mata leu sei mo sile na talai, ŕa levosahia vara retitauhi paro sei mo lo vai na tamlohi la tataholo na nahon God mo mele ŕuhu jea. <sup>10</sup> Varaŕuhu, sava retitauhi tuai mata leu mo vere a vara mo mera mo ŕuhu tiroma,

nake mo sopo mele mera i űuhu matan retitauhi paro mo pete lavi na jarana moiso, ale mo mera mo űuhuűuhu jea. <sup>11</sup>Matan, vara sava mo lo majara tiroma mo mai peresi na mera űuhuűuhu, meran retitauhi paro i pa toho jejeu i pa mele űuhuűuhu jea.

<sup>12</sup>Ale matan retitauhi paro nike mo vai na űomira mo űilangi, mo sopo te matahu na nomam vavahinau, <sup>13</sup>ale mo sopo sohen Moses sei tuai mo lo ropoi na nahona na tavalu ruru matea matan vara tavitavin Israel la sopo eűi varoi mera atu mo lo majara na nahona. *Exo 34.30-35*

<sup>14</sup>Pani űomira mo pelati, ale mo kakau nake, tavalu ruru atu mo pa lo toho vara la rongo tea mo evi retitauhi tuai atu. Tea i sopo eűi lavi naűihia hasena matan hin Kűisto hasena tavalu ruru atu i eűi malue. <sup>15</sup>Pani űomira mo pa lo pelati mo kakau nake vara la tapurongo na sava Moses mo ulia tuai, tavalu ruru atu mo pa lo ropoi na űomira.

<sup>16</sup>Pani vara tea mo posi mo mai isan Moli, Moli mo la-naűihi tavalu ruru atu. <sup>17</sup>Ale Moli enia Tanumen God, ale na sava jara Tanumen Moli mo lo toho hinia, tamlohi la pa materi. <sup>18</sup>Ale enűa mo isoiso nahoűa mo lo toho na jara tavera, ale la mera na meran Moli, ale mo lo posira űa mai sohena na merana makomakomona na suiha Moli sei enia Tanumen God.

## 4

### *Hina űuhuűuhu Na Loloűa*

<sup>1</sup>Matan haratu, matan kama lavi vavahinau nike usuri na űomopoia non God, űomimam la sopo eűi jovi.

<sup>2</sup>Pani kama űohu na hina luhu mata mahanuhanu, ale kama sopo vaihitea vara kama halu tea teni kama sopo posileji na reti non God.

Pani kama lo retivujavujangi na retivaraűuhu na jara tavera matan vara tamlohi la pa hitevosahia vara kama lo varaűuhu na nahon God.

<sup>3</sup>Pani hina purongo vara God mo tavuhoro na noűa Retiűuhu, mo tavuhoro purongo isan la haratu sei la pa tihai sei, <sup>4</sup>Setan, god matan varama nike, mo vuűohi na űomin la haratu sei la sopo rasu, ale la pa sopo eűi hitevosahi na meran Retiűuhu sei non Kűisto — enia niniun God tataholo.

<sup>5</sup>Kama sopo retivujavujangi hin kamam hasemam, pani hin Iesu Kűisto sei enia Moli, ale kama vereea vara kamam nomim slev mata sava Iesu mo vaia matamam.

<sup>6</sup>Matan God sei mo vereea mara, 'Malarani i mera na űoűoha.'

### *Gen 1.3*

enia haratu sei mo lo mera na mapuűa matan vara i sileűa na mera mata lelevosahi űuhuűuhu non God űa hitea na maurin Iesu Kűisto.

### *Hasohaso Tavera Mo Lo Mai*

<sup>7</sup>Pani kama lo lavi la hina űuhuűuhu nike na jilivi lepa purongo, matan vara suiha tavera sei tamlohi la eűi hitea mo lo malue hin kamam mo sopo nomam pani non God hasena.

<sup>8</sup> Kama lo lavi na rani řilangi na malele tari, pani la sopo lomolomo kamam. Kama sopo levosahia vara kama pa vai na sava, pani kama sopo hilu atu,<sup>9</sup> la tipahi kamam, pani God mo sopo rovo hin kamam, la vili sati kamam, pani kama mele turu. <sup>10</sup> Kama lo lavi na rani řilangi tarea na epemam hin mauri nike, ale la lo lavi na řungara mata mateia non Iesu matan vara tamlohi la pa eři hite na maurin Iesu na epemam.

<sup>11</sup> Varařuhu kama lo toho tarea na matarua mateia matan kama lo volitusi isan Iesu matan vara maurin Iesu i pa mera na jara tavera na epemam sei mata mate. <sup>12</sup> Matana, kama lo nahoi na mateia, pani vuana enia nomim mauri tui tui.

<sup>13</sup> Pani kama pa lo retivu-javujangi matan nomam rasua mo tataholo na sava la ulia na psalm mara, 'Na rasua, ale matana, na pa retireti.'

*Psa 116.10*

Ale kamam sohena, kama rasua, ale matana, kama pa retireti.

<sup>14</sup> Kama pa vaia sohena matan kama levosahia vara God sei mo sauteterahi Iesu, i pa lavi kamam peresi kamim řa turu na nahona. <sup>15</sup> Hinau řilangi kama lo lavira na maurimam nake enira mata la tueni kamim. Ale sohen řomřuhu non God mo lo lavi na tamlohi matuvana la lo mai isan Křisto, tamlohi la pa mele hasohaso God i tavera jea.

<sup>16</sup> Enia matan haratu natu mo vaia kama sopo hilu

taleu. Hina purongo vara suiha epemam mo lo majara, pani maurimam la lo ulua na rani hatehateahi. <sup>17</sup> Hina purongo vara řa hite na nořa rani řilangi matan nake sohena hina tavera, pani enira la varihi purongo matan enira mata makomo rani purongo. Ra levosahia vara nořa rani řilangi nake la pa sileřa na hasohaso tavera sei i pa toho jejeu hin mauri atu mo lo mai. <sup>18</sup> Ale řa sopo řomřomi na nořa rani řilangi matan nake, mo vono, pani řa lo kilau toho mata hinau řa sopo eři hitera. Matan sava sei řa eři hitera, enira la pa toho mata makomo rani purongo, pani sava řa sopo eři hitera la pa toho jejeu.

## 5

### *Epe Paro Matan Tui Tui*

<sup>1</sup> Matan řa levosahia vara epeřa nike na varama řa lo toho hinia mo řovo – vara řa mate řa pa malue hinia – řa levosahia vara jarařa matea mo lo toho na tuka na epe matea matan tui tui sei tamlohi la sopo voroa na limara, pani God hasena mo vaia matařa. <sup>2</sup> Ra lo malokoloko hin epeřa nike nake, ale řa lo kilau toho matan rani atu sei God i pa ru na epe matan tuka hiniřa sohena ruru paro. <sup>3</sup> Matan řa pa sopo toho sohena tanume mo sopo te epera, pani řa pa ru na epe paro matan tuka. <sup>4</sup> Epeřa nike nake la lo mate, la vaiřa řa rongohaji ale la puhoniřa, pani mo sopo matan vara řa opoia

vara řa mate ale řa sopo lavi te epe hatea. Ra opoia vara řa unu na epeřa paro matan vara mauri tui atu i řolomi epeřa tuai nike. <sup>5</sup> God hasena mo tatamahuniřa matan la hinau akerihi, ale mo sileřa na Tanumena sohena sope voliřa tiroma na hinau tari i pa silera hitahu.

<sup>6</sup> Ale matana, tarea řa lo řomřilangi, hina purongo vara řa levosahia vara řa lo toho nike na varama na epeřa nakerihi, řa sopo lo toho peresi Moli, <sup>7</sup> matan nake, řa lo mauri na rasua, mo sopo na sava řa lo hitera. <sup>8</sup> Varařuhu řa řomřilangi, ale řa levosahia vara i pa mele řuhu vara řa eři malue hin la epe nike matan vara řa pa toho na jarařa na tuka peresi Moli. <sup>9</sup> Hina purongo vara řa lo mauri hin epe nike teni vara řa mate řa malue hinia, řa lo tau na řomiřa hinia mata i lo vai Moli i avulahi tarea. <sup>10</sup> Matana enřa tari řa pa turu na nahon Křisto na nona jara sakele mata aria vara i ariřa. Ra pa lavi na sava mo tataholo isana usuri na sava řa vaia mo řuhu teni mo sati hin epeřa nike na varama.

### *Vahařule Non Retitauhi Paro*

<sup>11</sup> Matan kama levosahi matahu tavera akerihi mata aria non Křisto, enia mo vai kamam kama voko řilangi vara kama reve na tinapua isana. God mo levosahia vara kama lo varařuhu, ale na lo řomtoho vara kamim sohena ka levosahia. <sup>12</sup> Kamam kama sopo mele vaihitea vara kama hase tahe kamam,

mo vono. Kama lo vere kamim hin la hinau nike matan vara ha eři hapahapa hin kamam, ale matan vara ha eři řarami la tamlohi vujangi haluhalu atu sei la lo reti mangisi na nora vavahinau purongo, pani la sopo verea varařuhu vara enira la sava tamlohi. <sup>13</sup> Matan vara tea la hitea vara kama rongorongo vono, enia matan vara kama pa sile na hasohaso isan God hinira. Ale vara kama lo vai na hinau tataholo, enia matan vara i tueni kamim. <sup>14</sup> Matan opoia non Křisto mo lo halo kamam, matan kama levosahi mamahunia vara Křisto mo mate mata tamlohi tari: ale matan hinia tamlohi tari la mate. <sup>15</sup> Ale enia mo mate mata tamlohi tari matan vara la haratu la lo mauri la pa sopo mauri nora hasera, pani la pa mauri non haratu sei mo mate matara, ale God mo sauteterahia na mateia.

<sup>16</sup> Matan haratu nake, kama sopo mele kilau na tamlohi usuri na řom tamlohi. Tuai na lo řomřomia sohena hin Křisto vara enia tamlohi matea purongo. Pani nake noku kilakilau mo sopo mele sohena. <sup>17</sup> Mo řaramia vara la haratu la mai kalesia hin Křisto la mai tamlohi paro. La sopo mele sohen tuai, matan mauri tuai mo tihai, ale mauri paro mo tapulo moiso.

<sup>18</sup> La hinau tari nike la tai isan God sei mo sari tamata peresi na tamlohi na varama hin Křisto, ale enia natu mo sile kamam na vavahinau mata tau na tamata. <sup>19</sup> Matan řa eři verea vara hin Křisto,

God mo sari tamata non varama vara i mele tapala peresia. Mo sopo mele evi na hehe nona tamlohi, ale mo sile kamam na retisohai mata sari tamata. <sup>20</sup> Matan haratu, kamam kama vahaŕule non Křisto, ale hin kamam, God mo lo usi kamim řilangi sohen Křisto hasena mo lo usia vara ha sari tamata peresi God! <sup>21</sup> Matan God mo vai Křisto sei mo sopo hehe hin te rani, mo mai noŕa malamalai mata hehe, matan vara hinia, řa pa eři mai řa tataholo na nahon God.

## 6

<sup>1</sup> Ale matan enŕa řa tapala na vavahinau non Moli, kama lo usi kamim mo řilangi vara ha sopo řomřomi purongo na retisohai řuhuŕuhu mata řomřuhu non God. <sup>2</sup> Matan God mo vereea mara, 'Na ranina tataholo na rongoho,

Na rani mata juri na tueniho.' *Isa 49.8*  
Varaŕuhu, God mo lo tatamahu mata i tueni kamim nakerihi. Nakerihi enia rani mata juri.

### *Rani Rilangi Non Paul*

<sup>3</sup> Kama sopo sile na masapa vara tea i pa řohu hin Moli na sava kama lo vaia, matan vara tea i sopo eři hite te hina sati na nomam vavahinau. <sup>4</sup> Matan hinau tari kamam vahaŕule kama lo vaira, kama vaihitea vara tamlohi la hitea vara varaŕuhu kamam vahaŕule varaŕuhu non God. Kama lo řomperavu tarea na rongohaji peresi na rani řilangi peresi na

rani sasati tinatinapua, <sup>5</sup> ale na rani tamlohi la tamaji kamam, teni vara la pulahi kamam na lolo ima řilangi, teni vara vao tamlohi la meresahi hin kamam, teni vara kama voko mate, ale kama kilau rani vaha visa, ale kama marohati. <sup>6</sup> Kama lo hahau na posposi vokevoke, kama lo vujangi na nomam lelevosahi hin Křisto, ale na nomam řomperavu, na nomam řomřuhu, na nomam opoia varaŕuhu, ale na suihan Tanume Tapu. <sup>7</sup> Kama lo turu řilangi na retivu-javujangi mata retivaraŕuhu. Suihan God mo lo voko hin kamam. Nomam posposi tataholo mo soheņa sita vuro matea mata i taijovjovi na hehe na matua limamam, ale tingting matea mata i turuhoro na meresahi na marau limamam. <sup>8</sup> Kama lo volitusi isan God, hina purongo vara tamlohi la sile na oloolo isamam teni vara la řohu hin kamam, hina purongo vara la vereřesřesi kamam teni la hasohaso kamam. Kama lo varaŕuhu, pani hai la vereea lara kama tamlohi halu! <sup>9</sup> Tamlohi la levosahi mamahuni kamam, pani la vai kamam sohena la sopo levosahi kamam. Kama lo toho na matarua mateia, pani ka hitea kama pa lo mauri nahai! La hamaji komokomo kamam pani kama sopo mate, <sup>10</sup> ale řomimam la sati, pani kama avulahi, kama sohena tilavono, pani kama vai na mauri tamlohi matuvana la mele řuhu jea, ale sohena mo

sopo te nomam hinahinau, pani hinau tari enira nomam.

<sup>11</sup> La tapala ruhuŕuhu matan Corinth, kama lo retireti tataholo peresi kamim, kama avulahi tarea mata kama tueni kamim. <sup>12</sup> Mo sopo te hinau i turuhoro na nomam opoia isamim, pani matan kamim purongo ka horo na nomim opoia isamam. <sup>13</sup> Ale ka levosahia vara na lo retireti isamim na opoia sohena natuku tataholo, ale kamim sohena, ha avulahi vara ŕa mele tapala.

*Temple Non God Mo Mauri*

<sup>14</sup> Ha sopo turu jara matea na vavahinau non la haratu la sopo usuri na mauri rasua, matan i pa sohena sava vara tea i vai na posposi tataholo i eŕi tapala peresi la haratu la lo tope na leu? Teni sohena sava natu malarani i eŕi tapala peresi na ŕoŕoha? <sup>15</sup> Kŕisto enia Tiapolo la eŕi turu jara matea hin te hinau teni mo vono? Ka levosahia vara la haratu la rasu God la lo lotua, pani la haratu la sopo rasua la lo lotulotu vono. <sup>16</sup> Ale sohena sava natu hinau mata lotulotu vono i eŕi turu jara matea na lolo Temple non God? Matan enŕa ŕa temple non God sei mo lo mauri, mo sohen God mo retitauhi hinira moiso mara,

'A pa toho hinira  
ale a pa lo hahau na livuhara.  
Enau a pa nora God,  
ale enira la pa noku tamlohi.'

*Lev 26.12; Ezek 37.27*

<sup>17</sup> 'Matana, ha malue hinira  
ale ha turu hasemim  
hinira,  
Moli mo vereea.  
Ha sopo tikeli na nora  
hina lumiha,  
ale a pa avulahi hin  
kamim.'

*Isa 52.11; Ezek 20.34*

<sup>18</sup> 'A pa Tamamim,  
ale kamim ha pa natuku,  
peresi na venatuku,  
Moli God Suiha mo  
vereea.' *2 Sam 7.14*

**7**

<sup>1</sup> La tapala ruhuŕuhu, matan ŕa lavi la retitauhi nike, ŕa tau naŕihi na posposi tari sei la eŕi vai na epeŕa peresi na mauriŕa la lumiha, matan vara ŕa eŕi lavi mauri atu mo tapu matan ŕa lo lotu God na noŕa matahu.

*Paul Mo Avulahi*

<sup>2</sup> Ha avulahi vara ŕa mele tapala! Kama sopo vai te hinau i sati isan tea, kama sopo tikauleji tea, kama sopo haluhalu tea. <sup>3</sup> Na sopo vere harihi matan vara i vai na ŕomimim i sati, matan na pete vereea isamim moiso vara kamim ka lo toho na mapumam, ale vara ŕa mate jara matea, ŕa pa mauri jara matea. <sup>4</sup> Enau na rasu kamim, ale noku hapahapa matamim mo tavera jea. Ka tahe na ŕomiku, ale ka vaiu na avulahi hina purongo na nomam rani ŕilangi nake.

<sup>5</sup> Na rani kama kakau Macedonia, kama sopo mapu matan ŕalihi hin kamam rani ŕilangi la lo mai na jara tari, ale na lolomam, matahu mo lo malue matana. <sup>6</sup> Pani God atu sei mo lo tahe na ŕomin la

haratu ņomira la jovi mo tahe na ņomimam na rani Titus mo pala. <sup>7</sup>Kama sopo avulahi purongo na nona pala pani na retisohai ņuhuņuhu sei ka silea isana. Noku avulahi mo tavera na nona pala matan mo vereau hinia sohena sava ka lo kilau toho matan rani atu vara a pa mele rohi kamim hinia, ale sohena sava ņomimim mo sati, ale sohena sava ņomimim mo sati matan hehe atu, ale vara nomim opoia hiniau mo sohena sava.

<sup>8</sup> Romiku mo sopo mele sati matan leta atu na sohaia, hina purongo vara ņomiku mo sati mata makomo rani, matan na levosahia vara ka rongo mo sati matana mata makomo rani. <sup>9</sup> Nake na lo avulahi matan na sohaia, mo sopo matan mo vai kamim ka rongo mo sati, pani matan nomim ņomi ņati mo vai kamim ka posi na nomim hehe. Romi sati atu natu God mo lo opoi na nona tamlohi vara la lavia, ale na isoisona, kama sopo komo kamim hin te hinau matana. <sup>10</sup> Matan God i eņi vai na ņomi sati mata hehe na mauriņa i tuenņa, mata i vaiņa ņa posi na noņa hehe, ale vuana enia ņa pa juri. Ale mauriņa i sopo eņi sati na ņomi sati sohen harihi. Pani ņomi sati sei mo sopo te posi matana mata hehe, enia pa haratu sei vuana enia mateia.

<sup>11</sup> Ka hite na sava ņomi sati ņuhuņuhu nike mo vaia na maurimim? Mo vujangia vara ka tatamahu varaņuhu mata ooloo sohena sava, ale mata vai na hijamim la vokevoke, ale vara lolokoru

matan hehe akerihi sei mo vai na matamim mo lo roi matana, ale sohena ka lo kilau toho mata ha mele hiteau, ale sohena ka ņomjea vara ha sile na talai isan tamlohi atu mo lo hehe. *1Co 5.1-2*

Ka lo vujangia vara ka vaihitea vara ha vai na hinau tari ka eņi vaira mata vai na hinau la tataholo. <sup>12</sup> Ale matana, hina purongo vara na uliuli isamim, pani mo sopo matan haratu mo lo vai na hehe, teni isan haratu sei hehe atu mo vai na ņomina mo sati, pani matan vara a vujangi kamim sohena sava ka lo tatamahu mata usuri na nomam reti na nahon God. <sup>13</sup> Ale kama avulahi tavera matana, mo sopo matan haratu purongo, pani matan kama avulahi tavera matan kama hite na avulahi non Titus mata nomim posposi ņuhu sei ka lavia hinia, ale sohena sava ka vai na ņomina mo sakele matan hinau akerihi. <sup>14</sup> Enau na vereah isana sohena sava na hapahapa hin kamim, ale kamim ka sopo vai na ņomiku i jovi. Tarea na lo reti varaņuhu isamim, ale nakerihi na levosahia vara noku reti hapahapa isan Titus matamim mo varaņuhu. <sup>15</sup> Ale nake mo lo opoi kamim mo tavera jea vara mo lo ņomņomi na nomim ooloo, ale sohena sava ka lavia na ooloo tavera. <sup>16</sup> Nake na avulahi tavera matan noku rasua mo ņilangi hin kamim.

## 8

1 Ale nakerihi na opoia vara a vereā isamim la vorai peresi na vevorai, na sava God na nona řomřuhu mo vaia na nona vao kalesia tari Macedonia. <sup>2</sup> Hina purongo vara nora rani řilangi peresi na rani sasati mo matuvana, nora avulahi řuhuřuhu peresi na mauri tilavono mo vaira la avulahi jea mata tueni na tinapua na nora hansohai. <sup>3</sup> Matan a eři vereā vara la sopo sile purongoi na sava la eři silea pani mo jeu haratu, matan la silea na nora řomavulahi purongo. <sup>4</sup> La usia vaha visa moiso vara la eři sořotahi peresi na tinapua mata la sile te tuetueni mata i tueni na kalesia tilavono Jerusalem ale na jara tavera matan Judea. <sup>5</sup> Ale aulu hin haratu, la vai na hināu mo jeu na nomam řomtau, matan la hase silera isan Moli tiroma, moiso la tatamahu mata vai na sava kama vereā usuri na masalon God.

6 Ale kamim vao kalesia sei Corinth, ka levosahia vara kama mele uși Titus sei mo lo vereā isamim tiroma moiso vara i pa mele vano isamim, ale i usi kamim vara ha vai mařivisi na nomim silesilea. <sup>7</sup> Ale matan usuri na posimim ka lo vaia mo řuhuřuhu jea na hināu tari – nomim rasua mo tavera jea, nomim tamlohi hai la eři retireti mo řuhu, ka lelevosahi, řomimim mo řilangi mata ha vai na hināu, ale nomim opoia hin kamam mo tavera jea – pani nake na opoia vara ha mařivisi na nomim vavahināu mata

sile na silesilea sohen ka lo vaia na hināu tinatinapua mo řuhu. <sup>8</sup> Na sopo vereā vara ha pa sile na silesilea nike sohena retileu matea, pani na lo vaihite na nomim opoia. Matan na opoia vara a hitea vara i pa sohena opoia nona vao kalesia tinapua Macedonia teni mo vono.

<sup>9</sup> Matan kamim ka levosahi na řomřuhu non nořa Moli Iesu Křisto, vara hina purongo vara enia mo tavgav sohen God mo tavgav, enia mo mai tamlohi tilavono matamim, matan vara na nona tilavono kamim ha pa tavgav na mauri.

<sup>10</sup> Ale mo řuhu vara ha vai vevuhi na silesilea sei ka tapulona na tauni sei mo vano moiso, matan kamim natu ka vereā řomřomi sei, ale kamim natu ka tapulo mata ha vaia. <sup>11</sup> Mo tataholo mata ha vai vevuhia sohen ka řomjea hinia na tapulona. Ha sile na sava ha eři silea. <sup>12</sup> Vara ka avulahi jea mata ha sile na silesilea, mo sopo te hināu hinia vara ha eři sile i visa. God mo opoia vara ha sile na sava ha eři silea, mo sopo usi na hināu mo sopo te nomim. <sup>13</sup> Na sopo vereā vara ha pa silea hajavua matan vara i vai kamim ha vejuveju. Na lo vereā matan na sopo opoia vara tea i eři vereā vara kama lo tametame te tatua vao kalesia purongo. <sup>14</sup> Nake nomim tavgav mo mařivi, ale ha eři tuenira Judea na nora vejuveju. Ale hin te rani vara ka vejuveju, enira sohena la pa eři tueni kamim. Hin malele akerihi natu vao kale-



sia tari la pa sopo eʻri vejuveju hin te hināu hinia. <sup>15</sup> Mo sohen la ulia tuai na Retitapu vara, 'Haratu mo takonahi na mana mo maʻivi, nona mo sopo maʻivi hajavua, ale haratu mo takonahi makomona, nona mo sopo makomona hajavua'. *Exo 16.18*

### *Titus Tolu Na Tapalana*

<sup>16</sup> Pani na lo vere meje isan God sei mo tau na ʻromʻromi matea hin Titus sohen mo taua hiniāu mata kama kilau kamim. <sup>17</sup> Kama usia vara i mele rohi kamim, ale mo avulahi matana, aulu hin haratu, enia mo lo tatamahu moiso vara i mele vano i hite kamim. <sup>18</sup> Kama pa ʻrule na vorai tinapua matea vara i usuri Titus. Vao kalesia tari la majinga vara vorai sei enia tamlohi ʻruhu matea mata retivujavujangi na Retiʻruhu. <sup>19</sup> Aulu hin haratu vao kalesia nike Macedonia la viʻroni vorai sei vara i pa usuri kamam na rani kama sivo Jerusalem mata sile silesilea nike isana kalesia tilavono ea — enia vavahināu matea i pa sile na hasohaso isan Moli, ale mo vujangia vara kama tatamahu mata tuetueni. <sup>20</sup> Kama pa hahau jara matea matan vara i pa sopo sile te masapa vara tea la ʻromʻromia vara kama lo roro hin silesilea avulahi nike. <sup>21</sup> Ale matana, kama lo vaihitea tarea vara kama vai na hina tataholo na nahon God peresi na naho tamlohi.

<sup>22</sup> Ale kama lo mele ʻrule na vorai kalesia tinapua matea peresira Corinth, enia mo jeu na nomam hina

vaihite moiso, ale mo mera purongo vara mo avulahi na hināu matuvana, pani nake mo mele jeu tiroma matan mo rasu kamim mo tavera jea. <sup>23</sup> Vara te retiusia matan Titus, ha vere isara vara enia tapalaku mata i vai na vavahināu non Moli matamim. Ale la vorai tinapua sei la lo usuria enira vahaʻrule ʻruhu nona vao kalesia nike, ale nora tovongi mo vai na tamlohi la haso-haso Kʻristo matara. <sup>24</sup> Ale matana, ha turu peresira matan vara vao kalesia la pa eʻri hitevosahi na nomim opoia, ale vara i vujangia vara nomam reti hapahapa matamim mo varaʻruhu.

## 9

### *Silesilea Nona Kalesia Jerusalem*

<sup>1</sup> Na levosahia vara mo sopo te hināu hinia vara a sopo uliuli matan silesilea nike nona tapuhi Jerusalem, <sup>2</sup> matan na levosahia vara ka lo tatamahu mata ha tuenira moiso. Ale na reti hapahapa moiso isan tapalaʻa nike Macedonia vara kamim kalesia Corinth ka tatamahu hin tauni sei mo vano moiso vara ha sohai na silesilea matea, ale nomim avulahi mo vai na vao kalesia tinapua ʻromira mo ʻrilangi mata la tapulo na tuetueni. <sup>3</sup> Pani na lo ʻrule la vorai kalesia nike vara la hitea vara varaʻruhu ka tatamahu sohen na vere isara vara ha pa tatamahuni na mania moiso. Na sopo opoia vara la pa hitea vara noku reti hapahapa nike hin kamim i

vano hina purongo. <sup>4</sup> Matan, vara te mara Macedonia i mai peresiau ale vara i hitea vara ka sopo tatamahu, kama pa mahanuhanu ale kamim sohena, matan kama vere moiso vara kama lo rasu kamim. <sup>5</sup> Matan na sopo opoia vara a mahanuhanu, na romromia vara a usi la vorai kalesia nike vara la mai isamim tiroma mata la tatamahuni na nomim silesilea tavera sei ka lo retitauhi hinia moiso. Ale mo sopo hinau matea mata ngurunguru matana, pani enia silesilea matea usuri na nomim romavulahi.

*Ha Hansohai Matan God Mo Hansohai Tiroma*

<sup>6</sup> Ha lo levosahia vara tamlohi isa matea vara mo lavo na piri mo visaletē, i pa vua makomona purongo. Pani haratu mo lavo na piri matuvana, i pa lavi na vuana matuvana. <sup>7</sup> Kamim hatehateahi ha pa silesile usuri na romimim hasemim, mo sopo matan ka sopo romavulahi teni matan tea mo ngurunguru hin kamim, pani matan God mo opoi haratu sei mo sile na nona silesilea na avulahi. <sup>8</sup> Ale God i efi sile kamim na hinau tari ka opoira, matan vara ha sopo efi vejuveju hin te hinau ka opoia, ale matana, ha efi mele tueni na tinapua na sopena. <sup>9</sup> Mo sohena Retitapu mo vere vara,

‘Haratu la tataholo na nahon God,

la lo hansohai tarea isana tilavono.

Ale God i pa sopo romaliho

na nora vavahinau ruhu sei hin te rani.’ *Psa 112.9*

<sup>10</sup> Matan God enia haratu sei mo lo sile na piri wit isana tamlohi isa, moiso mo vai na pereti mata hanhani hinia. Hin malele akerihi natu God i pa sile na masapa matuvana isamim mata ha vai na vavahinau ruhu, ale enia i pa vai na nomim hansohai i vua tavera isamim.

<sup>11</sup> Enjora, ha pa marivi savulevule matan vara ha efi hansohai i jeu tiroma. Ale na rani vara kama lavi na nomim silesilea i vano isan la haratu la vejuveju, la pa ulo na vere meje isan God matana. <sup>12</sup> Hinau mo rua vahatea la pa masee matan silesilea atu, i pa marivisi na vejuveju nona tapuhi Jerusalem, ale la pa hasohaso God na nora vere meje matana. <sup>13</sup> Kamim ha pa tahe na hijan God na nomim silesilea na avulahi. Matan nomim hansohai isara i pa vujangia vara kamim ka lo oloolo na Retiruho nona Kristo, ale la kalesia atu la pa hasohaso God matamim. <sup>14</sup> Ale la pa usiusi matamim na opoia tavera mata romruhu ruhu ruhu nona God sei mo lo malue hin kamim.

<sup>15</sup> Ha vere meje isan God matan Natuna – matan nona otori ruhu ruhu sei mo sopo te reti i efi vere vara mo ruhu sohena sava.

## 10

*Suiha Nona Vaharule Vararuho Non God*

<sup>1</sup> Enau Paul haseku, na lo usia rilangi isamim vara

ha tapurongo isaku. Na lo vaia usuri na řommalum peresi na posposi malum non Křisto, enau sei tamlohi hai Corinth la lo verea vara enau na malum vara na lo toho isamim pani vara na malue na lo řilangi isamim na noku leta! <sup>2</sup> Na lo řomtau vara i pa sopo sohena, pani korong vara na mai a pa řilangi isan la haratu sei la řom vara kama lo vavahinau usuri na posposi tamlohi purongo. <sup>3</sup> Hina purongo kamam kama tamlohi varama, pani kama sopo vai na vuro usuri na řomřomi nona tamlohi, <sup>4</sup> matan nomam hinahinau mata vai na vuro mo sopo matan varama nike, pani God mo vai na retivararuhu mo suiha mata vilijovjovi na řomřomi řilangi non Tiapolo sei la lo taurilati na tamlohi. Ale la suiha mata la vilijovjovi na řomřomi <sup>5</sup> peresi na řomaulu tari sei la lo turuhoro na tamlohi na lelevosahi hin God. Ale kama taurilati na řomřomi tari na retivararuhu, ale kama vaira la ololo hin Křisto. <sup>6</sup> Ale kama lo tatamařu mata kama sile na talai isana tamlohi lejileji tari sei atu, ale kama pa vaia hin rani atu vara kamim mo isoiso ka lo ololo hin Křisto moiso.

<sup>7</sup> Kamim ka lo kilau na huri tamlohi purongo. Kamim ka hitevosahia moiso vara kamam kama tamlohi non Křisto, sohen la haratu sei la lo reti hapahapa lara enira non Křisto. <sup>8</sup> Korong, ha pa hitea vara na lo pohapoha na suiha sei Moli mo silea isamam. Pani suiha nike enia matan vara i turuhi kamim,

mo sopo matan vara i vilijovjovi kamim. Ale a pa sopo tinařihia vara tea i vaiau a mahanuhanu, vara i vai na noku vavahinau isamim i mai hina purongo.

<sup>9</sup> Na sopo opoia vara tea i řomřomia vara na lo řilangi na noku leta purongo ale i vai na tamlohi la matahuniau matana, <sup>10</sup> matan hai la lo verea lara, "Paul enia hare? Nona leta la řilangi pani enia mo sopo te suihana, ale mo sopo tamlohi matea mata retireti i řuhu." <sup>11</sup> La haratu la lo retireti sohen harihi, la levosahia moiso vara kamam kama lo řilangi na nahomim sohen kama lo řilangi na nomam leta.

<sup>12</sup> Matan kamam kama sopo řomřomia vara kama pa verea vara kama tamlohi řuhu i tikeli la tamlohi sei la lo verea vara enira io. Pani ka hitea, enira la lo hase kilau usurira na tatuara purongo vara hare natu mo řuhu sohena sava. Hinau akerihi enia rongorongono vono purongo!

<sup>13</sup> Pani kama pa sopo reti hapahapa hin te hinau sei mo sopo nomam. Mata kama tau na řomimam mata vai na vavahinau sei God mo taua na limamam purongo, ale mo taua vara kama pa vavahinau na jaramim mara Corinth. <sup>14</sup> Matan mo tataholo purongo vara kama lo verea vara kama aulu hin kamim na mauri rasua, matan kamam natu, kama tiroma tamlohi sei mata lavi na Retiruhu non Křisto isamim. <sup>15</sup> Ale kama sopo lavi na hasohaso mata

vavahinau nona tinapua, mo vono, kama lo řomtau vara nomim rasua i pa ulua, ale vara nomam vavahinau isamam i pa ulua i mele tavera jea, <sup>16</sup> matan vara kama pa retivujavujangi na jara tinapua sei tele vano na jaramim. Ale kama pa sopo reti hapahapa hin te vavahinau tamlohi tinapua la vaira hin la jara tinapua atu. <sup>17</sup> Pani Retitapu mo vereva vara,

‘Vara tea mo opoia vara i reti hapahapa,  
i pa reti hapahapa na sava Moli mo vaia purongo.’ *Jer 9.24*

<sup>18</sup> Matan hina aulu mo sopo haratu sei mo hase vereva hasena, pani haratu Moli mo vereva vara mo vaia mo řuhu.

## 11

### *Vahařule Haluhalu*

<sup>1</sup> Na opoia vara ha řomperavu mata makomo rani peresiau, ale a pa retireti sohena tamlohi rongorongo vono matea mo lo retireti, pani na levosahia vara varařuhu ka lo řomperavu isaku. <sup>2</sup> Enau na mereimerei matamim na mereimerei non God. Matan na retitauhi vara kamim ha pa sohena hařai lahi vokevoke matea tuana matelete, enia Křisto. <sup>3</sup> Pani na lo matahu vara sohen tuai mata sasati atu Tiapolo mo halu Eve na nona haluhalu, ale vara tinapua sohena i posi na řomimim ale i tiroma hin kamim ha malue na malele mata lotu Křisto na mapumim tari sei mo varařuhu. <sup>4</sup> Matan vara te

tamlohi vujangi tinapua mo mai ale mo retivujavujangi na vujangi tinapua matea hin Iesu hin haratu kama lo vujangi kamim hinia moiso, teni hin te tanume tinapua hin Tanume Tapu atu ka lo lavia moiso, teni te Retiřuhu tinapua hin haratu ka lo rasua, ale mo mera purongo vara kamim ka hitea mo řuhu purongo. <sup>5</sup> Matan na sopo řomřomia vara enau na vejuveju hin la haratu Corinth sei la lo vereva vara la vahařule aulu jea, enira la jeuau. <sup>6</sup> Hina purongo vara na sopo levosahi na malele mata retireti sohera, pani enau a eři vereva vara na sopo vejuveju na lelevosahi. Varařuhu kamim ka levosahia vara kama lo vujangi na lelevosahi mo mera isamim moiso na malele tinatinapua matuvana.

<sup>7</sup> Ka řom vara na vai te hehe hin haratu na hase tauau atano matan vara a tahe kamim na olořlo matan na lo retivujavujangi na Retiřuhu non God isamim, ale na sopo usi te hinau hatea matana? <sup>8</sup> Korong ka řom vara na lo vanaho na vao kalesia tinapua matan na avulahi mata a lavi na nora mania matan vara a eři mai a lo volitusi purongo isamim. <sup>9</sup> Ale na rani na lo toho peresi kamim, na noku vejuveju na sopo usi te tuetueni isan te vonamim hatelete, matan la vorai kalesia atu sei la tai Macedonia, la lavi na tuetueni tinapua matea mo mařivisi vevuhi na noku vejuveju. Noku retihapahapa sei enia matan na hase

taurilatiau vara a pa sopo tau te tetehi puhoni hatea isamim hin te malele, ale a pa sopo efi vaia hin te rani. <sup>10</sup> Sohen retivarafuhu non Křisto mo lo toho hiniau, a pa sopo efi isoiso na noku retihapahapa matan hinau atu na jara tari matan Achaia. <sup>11</sup> A pa reti hapahapa mata sava? Matan na sopo opoi kamim teni mo vono? God mo levosahia vara na opoia kamim.

<sup>12</sup> Ale sava na lo retihapahapa hinia, a pa lo retihapahapa hinia, matan vara a lanarhi na masapa tari mata retihapahapa isan la haratu sei la lo vereea lara enira la sohemam na nomam vavahinau tari. <sup>13</sup> Matan, la tamlohi nike enira la vahařule haluhalu, la tamlohi haluhalu, ale la lo vaia sohena vara enira la vahařule non Křisto na nora halu. <sup>14</sup> Pani enau na sopo marurahi hinira matan Setan i efi hase vaia i mai sohena angelo mata malarani. <sup>15</sup> Matan haratu, mo sopo hinau marurahi matea vara volitusi non Setan la lo hase vaira sohen la volitusi tataholo non God, pani na isoisona, nora talai i pa tataholo i řuhu na nora vavahinau.

### *Paul Mo Sopo Avulahi Hinira*

<sup>16</sup> A mele vereea vara ha sopo řomřomia vara enau na rongorongo vono matan na lo retireti sohen harihi, pani hina purongo vara na lo vaia, ha lo tapurongo tako matan a pa mele retihapahapa makomona. <sup>17</sup> Ra

levosahia vara Moli mo sopo avulahi na retihapahapa sohen harihi, pani na lo vaia sohena vara enau na tamlohi rongorongo vono matea. <sup>18</sup> Matan tamlohi tinatinapua la lo retihapahapa usuri na vavahinau nona tamlohi, enau sohena a pa vaia. <sup>19</sup> Ka řom vara nomim lelevosahi sei mo tavera jea, i pa tataholo vara ha tapurongo isana tamlohi rongorongo vono teni mo vono! <sup>20</sup> Avei, nomim lelevosahi mo sohena sava matan mo sopo te hinau hinia vara te vonara mo vai kamim ka slev, teni vara ka levosahia vara mo lo haluhalu kamim mata nomim tavgav, teni vara la lo hani na masumasumim, teni vara la lo řomaulu hinira hasera, teni vara la lo varasi na patumim. <sup>21</sup> Na hitea mo sati matan kamam kama sopo efi vaia sohera!

### *Paul Mo Lo Retihapahapa*

Pani vara tea mo řomřilangi vara i retihapahapa na nona rongorongo vono, enau sohena a efi vaia. <sup>22</sup> La tamlohi halu nike, la lo retihapahapa lara enira hasera la Hebrew, pani enau na Hebrew. Enira, la řom vara enira hasera la tavgavin Israel, pani enau sohera. Enira, la řom vara enira hasera la mahapin Abraham, pani enau sohera. <sup>23</sup> Na levosahia vara na lo retireti sohen na tamlohi rongorongo vono matea, pani na levosahia vara ka lo řomřomia vara enira la lo volitusi non Křisto, pani enau na jeura, noku vavahinau

mo jeura, la tauriau na vano na ima řilangi vaha visa, la rupi lejilejiau na asi maja vaha visa, mariviti vara a mate vaha visa. <sup>24</sup> Vaha lima moiso, Jew la rupiau mo vaha ngavulu tolu mo limaravati (39).

*Deut 25.1-3*

<sup>25</sup> Vaha tolu, la hamajiau na vipahai. Na rani matea la parauu vara a mate. Na pute na lanis vaha tolu. Na rani matea, na lo sale na pahai matea na tasi masapa mata rani matea ale pongi matea. <sup>26</sup> Na hahau řalihi mata jara la asau řove vaha visa, ale na lavi na rani sasati na wai tavei, rani sasati mata tamlohi sei la lo vili na tamlohi mata mania, ale rani sasati isana Jew, rani sasati isana tamlohi řořoha, rani sasati na lolo taon tavera, rani sasati na rani na lo toho na jara hasetoho, rani sasati na tasi, rani sasati isana vorai kalesia haluhalu. <sup>27</sup> Na lo mauri peresi na noku malokoloko, noku rongohaji, ale na sopo eři juruvi vaha visa moiso mata marohati peresi na mařohu, ale vaha visa moiso mo sopo te haku hinau. Vaha visa moiso na lo toho na jara hamariri sati pani mo sopo te noku ruru hamariri.

<sup>28</sup> Ale aulu hin la hinau sei, na rani hatehateahi, řomiku mo lo puhoni matan na sopo levosahia vara vao kalesia tari la lo toho sohena sava. <sup>29</sup> Hare natu vara mo rongoa vara mo sopo te suišana, vara enau sohena na sopo rongoa, enjora. Hare natu vara i malue na malele rasua matan tea mo tikaulejia

pani enau a pa sopo lolokoru matana, enjora.

<sup>30</sup> Vara a eři retihapahapa hin te hinau, a pa retihapahapa na hinau sei na sopo eři vaia haseku. <sup>31</sup> God, Taman Moli Iesu, enia i pa lavi na hasohaso mata rani tui tui. Enia mo levosahia vara enau na sopo halu, <sup>32</sup> ale hin rani atu na lo toho Damascus, tamlohi aulu na ruhuruhun Supe Aretas, mo sile na retileu matea isana tamlohi la lo kilau na matarua tavera matan taon tavera atu vara la pa taurilatiau, <sup>33</sup> pani kalesia hai atu la tuhuau na windoa na sivo atano na tanga tavera matea na ropen taon atu, matan vara a eři malue a rovo!

## 12

*Paul Mo Hite Na Tuka Na Mamavuhu Matea*

<sup>1</sup> Na levosahia vara noku reti hapahapa nike mo rongorongono vono, pani a pa mele vere te makomona hin te hinau sei Moli mo vujangia isaku mo sohena mamavuhu matea. <sup>2</sup> God mo sauau na sahe aulu na hatolu tuka na rani matea tauni mo sangavulu řomana mo vati la vano moiso, na sopo levosahia vara na lo toho na epeku teni mo vono, pani God mo levosahia. <sup>3</sup> Ale na levosahia vara enau vara na epeku teni mo vono na sopo levosahia pani God mo levosahia, <sup>4</sup> na sahe aulu na toho Paradise na tuka, ale na rongono te hinau la tapu jea vara tea i eři mele verera isan tea na varama. <sup>5</sup> Matan la hinau atu natu

God mo vujangira isaku a eři retihapahapa. A pa sopo eři retihapahapa hin na sava na vaia, pani hin haratu purongo sei na sopo eři vaia haseku. <sup>6</sup>Matan, vara a opoia vara a retihapahapa, a pa sopo tamlohi rongorongo vono matea matan na lo retivararuhu. Pani a pa sopo vaia matan na sopo opoia vara tea i řomaulu hiniau i jeu na hinau mo eři hitea hiniau moiso teni na sava mo rongora isaku, <sup>7</sup> hina purongo vara God mo vujangiau na hinau řuhuru jea. Matan haratu, God mo tinařihia vara a lavi na rani řilangi na lima angelo matea non Setan, ale mo vailejeleji na epeku matan vara a pa sopo retihapahapa hin la hinau sei God mo vujangiau hinira.

<sup>8</sup> Na usi Moli vaha tolu vara i lanarihia isaku. <sup>9</sup> Pani mo vereaa isaku mara, "Noku řomřuhu enia mo tataholo matam. Mata suihaku mo lo voko na hinau ko sopo eři hasem vaia."

Ale matana, nake na avulahi purongo vara a reti hapa-hapa na hinau na sopo eři vaira haseku vara suihan Křisto i sopo lo toho hiniau. <sup>10</sup> Matan haratu, enau na avulahi vara na sopo eři vai te hinau haseku, ale matan haratu a eři lavi na retisasati nona tinapua peresi na rani řilangi, teni vara tamlohi la tipahiau, peresi na hina puhoni na lo lavia matan Křisto. Matan hin rani atu natu na sopo eři vai te hinau haseku, suihan Křisto mo lo

tueniau.

*Paul Mo Romřomi Na Kalesia Corinth*

<sup>11</sup> Kamim ka vaiau na vaia sohena tamlohi rongorongo vono matea, matan na lo retihapahapa sohen harihi. I pa tataholo vara ha vereaa tataholo isara vara enau tamlohi matea tamlohi la eři rasua. Matan enau na sopo vejuveju hin te hinau hatelete sohen la 'vahařule aulu jea' sevano, hina purongo vara enau hina purongo matea. <sup>12</sup> Varařuhu na vai na matamata tataholo nona vahařule varařuhu. Na noku řomperavu na vai na matamata tavera peresi na hinau mařurahi peresi na vavahinau mata suiha na nahomim. <sup>13</sup> Ale, hinau matea purongo sei na sopo vaia na lo vaia isana vao kalesia tinapua, enia vara na sopo usi te tuetueni isamim. Ha řomiau matan na sopo usia!

<sup>14</sup> Ka hitea, na tatamahu moiso vara a mele rohi kamim na hatolu noku hahau. Ale na sopo opoia vara a mai tetehi puhoni matea isamim. Na sopo opoia vara a lavi te nomim hinau, na opoi kamim purongo! Matan natuvarihi varihi la sopo sile na mania isana tamara peresi na tinara mata hara hinau, pani tamara peresi na tinara la vaia mata natura. <sup>15</sup> Ale a pa avulahi jea vara a hase jalahi na mauriku peresi na noku hinau tari mata maurimim. Ka řom vara mo tataholo vara hina purongo vara noku opoia mo tavera matamim, kamim

ha pa opoiau makomona purongo?

<sup>16</sup> Vara mo sohen haratu, na sopo lo tau te tetehe puhoni isamim. Pani hai la pa lo vereva vara enau na mai luhu isamim vara a tikauleji kamim na noku haluhalu. <sup>17</sup> Pani vara mo sohena, a pa halu kamim sohena sava? Mo toma, na vaia hin te vonan la tamlohi atu sei na lo řulera la vano isamim? <sup>18</sup> Na rani na usi Titus vara i rohi kamim ale na mele řule na vorai tinapua matea vara i usuria, korong Titus mo haluhalu kamim? Mo vono! Matan kamam rua kama hahau na posposi matelete purongo. Korong ka hitea vara kamam rua kama sopo vaia sohena teni mo vono?

<sup>19</sup> Korong ka lo řomřomia vara tarea kama lo vere la hinau nike enira, matan vara kama hase vereva vara kama tataholo mata vaira, pani mo vono. Kamam volitusi non Křisto, ale kama lo vere la hinau nike isamim na nahon God, ale na hinau tari kama lo vaira, enira matan vara la tueni kamim ha ulua. <sup>20</sup> Matan na levosahia vara a mai isamim, a pa sopo avulahi na sava a pa hitea isamim, ale ha pa sopo opoi na sava a pa vereva matana. Na levosahia vara a pa vileia vara kamim ka lo vasvas, ka lo mereimerei, ka lo lolokoru patumim, ka lo hanmarua, ka lo verelejeleji na tinapua, ka lo sorasora tamlohi, ka lo mangisi ale mo sopo te ololo isamim. <sup>21</sup> Enjora, na levosahia vara

a mai isamim God i pa vaiau a mahanuhanu mata nomim posposi natuvarihi, ale řomiku i pa sati matan matuvana isamim sei la hehe tiroma moiso, la sopo lo vahaři na nora posposi lumihia, teni na nora posposi maji peresi na nora marohati mata posposi sohen haratu.

## 13

*Isoiso Retituetueni Non Paul*

<sup>1</sup> Harihi enia noku hatolu mai vara a rohi kamim. Ale sohena Retitapu mo vereva vara, 'Ha pa turu na retireti non te tupra rua teni te tupu tolu matan te hinau tea mo vaia mo sati'. *Deut 19.15*

<sup>2</sup> Na pete retiřoãoahai la haratu la lo hehe na harua noku rohi sei moiso. Ale nakerihi, na lo mele retiřoãoahaira peresi na tamlohi tari, sohen na pete vaia tiroma moiso, vara hin harakerihi, a pa sopo řom tea vara i sopo lavi na talai mata nona hehe, <sup>3</sup> matan ka lo opoia vara ha levosahia vara varařuhu, Křisto mo lo retireti hiniau. Křisto mo sopo kilau purongoi na sava ka lo vaira, pani hin kamam, enia suiha tavera jea matea na livuhamim. <sup>4</sup> Hina purongo vara mo mate na talopeilopei sohena mo sopo te suihana, pani nake mo lo mauri mata suihan God. Ale, kamam sohena mo sopo te suihamam, pani kama pa toho peresi kamim na suihan God. Suiha atu sei kama lo vavahinau hinia matamim.

<sup>5</sup> Ha hase vaihite kamim hasemim vara varařuhu



nomim rasua mo varaŕuhu. Ha haŕe kilau uŕuri kamim hasemim! Vara ha sopo eŕi hitevosahia vara Iesu Kŕisto mo lo mauri hin kamim, mo ŕaramia vara ka jovi na nomim vaihite. <sup>6</sup> Ale na lo ŕomtau vara kamim ka hitevosahia vara kamam kama jeu vaihite nike moiso.

<sup>7</sup> Ale kama lo usiusi iŕan God vara ha pa sopo vai te hinau sasati. Mo sopo matan vara tamlohi la pa hitea vara kama jeu vaihite atu moiso, pani matan vara ha pa vai na hinau tataholo, hina purongo vara ka lo ŕomŕomia vara kama sopo lo jeu vaihite atu. <sup>8</sup> Matan kama sopo eŕi vai te hinau vara i turuleji na retivaraŕuhu, pani kama pa lo turu ŕilangi mata retivaraŕuhu tarea. <sup>9</sup> Matan enia hina purongo vara mo sopo mele te suihamam, pani kama pa avulahi vara kamim ka ŕilangi varaŕuhu. Nomam usiusi enia vara ha jea i ŕuhu na mauri rasua.

<sup>10</sup> Matan haratu, na lo uli la hinau nike Macedonia isamim vara ha lo vai tat-alohoi na maurimim, matan vara na rani vara a pala, a pa sopo vai na posposi ŕilangi hajavua na noku suiha sei Moli mo ŕileau hinia mata vai na kalesia la ulua, pani mo sopo mata vilijovjovira.

### *Isoiso Retireti*

<sup>11</sup> Ale isoiso hinau la vorai peresi na vevorai, enia vara ha avulahi, ha mele vai mamahuni na maurimim la tataholo, ha ŕomŕilangi, ha turu jara matea na ŕomimim hatehateahi, ha toho na

tamata, ale God mata opoia peresi na tamata i pa toho peresi kamim.

<sup>12</sup> Ha tapatapapai kamim na posposi mo tataholo mata kalesia. Tapuhi tari nike la sile na nora retioloole isamim.

<sup>13</sup> Romŕuhu non Moli Iesu Kŕisto peresi na opoia non God peresi na tapala ŕuhu nona Tanume Tapu i pa toho peresi kamim mo isoiso. Amen.

# Galatians

## Leta

### Paul Mo Ulia Isana Mara Galatia

## Leta Nike

Na rani tiroma leta nike mo vano isana kalesia hin jara atu Galatia, Paul mo lo vereia mo memera isara moiso vara enia mo silera hin Retiruhu tataholo atu sei Iesu mo lo silea isana tiroma. Retiruhu sei hasena, enia hina varaŕuhu (1.1-10). Haranike enia hina aulu matan te tamlohi la lo vereia vara reti non Paul mo halu na Retiruhu non God matan enia tamlohi halu.

Paul enia vahaŕule varaŕuhu non Iesu. Iesu mo ŕulea isana tamlohi la sopo levosahi God. Patu tamlohi na vao kalesia matan Jerusalem la lo avulahi hin Paul peresi na nona Retiruhu (1.18-2.10). Paul mo reti isan Peter na rani matea Antioch, matan mo vaileji na vujangi non Retiruhu, matan mo lo tametame na tadvavin Israel la lo toho peresia (2.1-18).

Paul mo vujangia vara rasua hin Kŕisto, enia hasena malele tataholo vara tamlohi la lavi na mauri mo materi hinia. Enia malele sei God mo silea isan Abraham tuai (3.1-4.31).

‘Matan hin leu atu na lo usuria, na mate matan leu atu, matan vara a pa mauri hin God, enau na mate peresi Kŕisto na nona talopeilopei. Nake mo sopo enau sei na lo mauri, pani

Kŕisto enia mo lo mauri hiniu.’ (2.19-20)

### Hin Puku Nike

1. Vahaŕule Varaŕuhu, Retiruhu Varaŕuhu (1.1-10)
2. God mo viŕoni Paul vara i nona vahaŕule (1.11-24)
3. Paul mo mele tahe na Retiruhu (2.1-21)
4. Rasua enia malele varaŕuhu mata tamlohi la juri (3.1-4.31)
5. Tanumen God mo reveŕa na opoia (5.1-6.10)
6. Isoiso retireti (6.11-18)

### Retireti Tiroma Non Paul Isara

<sup>1</sup> Leta nike, enau Paul na ulia, enau vahaŕule matea, pani mo sopo na ŕomŕomi tamlohi teni tea la viŕoniu vara a vahaŕule, mo vono. Iesu Kŕisto hasena peresi God Tama la toviau, God sei mo lo sauteterahi Iesu na mateia.

<sup>2</sup> Ale la vorai nike peresiau, kama sohahi na nomam retioloolo isamim kamim vao kalesia na jara tari Galatia. <sup>3</sup> Na lo usiusi vara God Tamaŕa enia Moli Iesu Kŕisto vara la sile na nora ŕomŕuhu peresi na nora tamata isamim. <sup>4</sup> Iesu mo hase silea vara i mate mata noŕa hehe vara i juriŕa ŕa materi na suihan sasati na varama nake, usuri na masalon noŕa God Tamaŕa, <sup>5</sup> hasohaso tavera enia nona, mata rani tui tui tarea. Amen.

### Retiruhu Enia Matelete

<sup>6</sup> Na maŕurahi jea, matan vila ŕuhu purongo, ka rovo isan haratu mo tovi kamim na nona ŕomŕuhu non Kŕisto, ale ka lo posi vano na retiruhu tinapua,

<sup>7</sup> mo sopo mele te retiřuhu tinapua, pani na levosahia vara tamlohi hai la vai na řomimim la lo kaka. La opoia vara la vai na retiřuhu non Křisto i mele tinapua.

<sup>8</sup> Pani vara kamam teni te angelo na tuka i lo retivujavujangi na retiřuhu matea mo sopo tataholo hin haratu kama lo retivujavujangi kamim hinia moiso, talai tavera non God i pa toho isana. <sup>9</sup> Sohena kama pete vereea tiroma moiso, ale na mele vereea vara, tea mo lo retivujavujangi na retiřuhu tinapua isamim, ale mo sopo na retiřuhu sei ka lavia tiroma moiso, talai tavera non God i pa toho isana.

<sup>10</sup> Ka řom vara na lo reti sohena matan vara tamlohi, teni God la avulahi hiniau matana? Teni ka hitea vara na lo vaihitea vara a vai na tamlohi la avulahi hiniau? Vara a lo vaihitea vara a vai na tamlohi la avulahi hiniau, i pa vujangia vara enau na sopo slev varařuhu matea non Křisto.

### *Vujangi Non Paul Mo Tai Isan Křisto*

<sup>11</sup> La vorai peresi na vevorai, na opoia vara ha levosahia vara Retiřuhu atu na lo retivujavujangi hinia, enia mo sopo tai isana tamlohi. <sup>12</sup> Matan na sopo lavia isan te tamlohi teni tea mo sopo vujangiau hinia, pani na lavia matan Iesu Křisto mo vujangia isaku.

<sup>13</sup> Matan ka rongoa moiso, vara mauriku mo sohena sava tiroma, na lo usuri na posposi rasua nona Jew.

Ale sohena sava hin pongi atu na lo tipahi řilangi na vao kalesia non God, ale na vaihitea vara a komora. <sup>14</sup> Hin pongi atu, na lo sahe aulu jea na posposi rasua nona Jew, mo jeu na tamlohi tinapua la tautauuniku na tahisamam, matan na lo turu řilangi na posposi nona tamamam.

<sup>15</sup> Pani na rani na sopo lo vora, God mo tapuhiau moiso, ale mo toviau na nona řomřuhu, <sup>16</sup> ale enia mo avulahi vara i vujangi Natuna isaku, matan vara a pa retivujavujangi Iesu isana tamlohi řořoha. Ale na sopo vano vahatea vara a usi rongorongo isan tea, <sup>17</sup> teni vara a sahe Jerusalem isan la haratu la vahařule tiroma hiniau, pani na vano Arabia, moiso na mele mai Damascus.

<sup>18</sup> Ale tauni mo tolu la vano moiso na sahe Jerusalem vara a hite Peter, ale na lo toho isana mata rani mo sangavulu řomana mo lima (15).

<sup>19</sup> Hin rani atu, na sopo hite te vahařule tinapua, pani James purongo, tasin nořa Moli. <sup>20</sup> La hiniau sei na lo ulia isamim na nahon God na sopo halu hinira.

<sup>21</sup> Moiso na vano na lolon la jara tavera sei mo rua, Syria enia Cilicia. <sup>22</sup> Hin rani atu, vao kalesia hin Křisto la lo toho na vao kalesia tari Judea, la sopo lo levosahiau i řuhu. <sup>23</sup> Pani la lo rongoa purongoi na sorasora la lo vereea lara, "Tamlohi nike natu, tiroma mo lo tipahiřa, pani nake mo

lo retivujavujangi pa rasua sei, tiroma mo vaihitea vara i komoa.” <sup>24</sup> Matan hinau atu, la lo sile na hasohaso tavera isan God matakū.

## 2

*Vahaʻule Jerusalem La Avulahi Hin Paul*

<sup>1</sup> Moiso, tauni mo sangavulu ʻōmana mo vati mo vano moiso, enau Barnabas peresi Titus, kama sahe Jerusalem. <sup>2</sup> Na sahe matan God mo vujangia isaku vara a sahe. Enau tolu na tamlohi tatavera mata rasua kama hasemam sorasora matavuhi atu matan na opoia vara la levosahi mamahuni na sava na lo retivujavujangi hinia isana tamlohi ʻōroha, matan vara a levosahi tataholoia vara la majinga hinia vara i vono, noku vavahinau i pa vano hina purongo.

<sup>3</sup> Pani hina purongo vara la levosahia vara Titus enia mara Greek matea, la sopo ngurunguru hinia vara i taiʻalihi, <sup>4</sup> mo sopo matan vara ʻōmʻōmi atu i pa malue, pani matan hin matavuhi atu, matea mo lavi na vorai hai la sopo vorai varaʻuhu na noʻa rasua, la mai sohena tanume luhu, matan vara la eʻi levosahia vara nomam materi hin Kristo Iesu mo sohena sava, matan vara la eʻi tau kamam sohena nora slev na ruhuruhun nora posposi rasua, <sup>5</sup> pani kama sopo usuri na ʻōmira, hina purongo vara enia mata makomo rani purongo, matan vara hina varaʻuhu mata Retiʻuhu i pa toho jejeu matamim.

<sup>6</sup> Ale patu tamlohi mata vao kalesia atu, la sopo vere te hinau aulu na sava na lo retivujavujangi hinia. Ale na vere tataholoia vara na sopo ʻōmʻōmi na nora hija tavera sohena patu tamlohi, matan God mo sopo tametame tea. <sup>7</sup> Pani la hitevosahia vara God mo tauau vara a pa retivujavujangi na Retiʻuhu, isan la haratu la sopo Jew, sohena mo tau Peter vara i pa retivujavujangi na Retiʻuhu isana Jew. <sup>8</sup> Matan haratu mo lo voko hin Peter mata nona vavahinau sohena vahaʻule isana Jew, enia haratu sei mo lo voko hinia na nona vavahinau mata tamlohi ʻōroha. <sup>9</sup> Ale hin rani atu James, Peter, John, enira la lo kilaura sohena viʻa mata vao kalesia, enira la hitevosahia vara God mo tau na vavahinau ʻuhu na limaku usuri na nona ʻōmʻōmi. La tulahi enau Barnabas vara kama voko matea peresira, ale lara kama pa vano isana tamlohi ʻōroha, ale enira, isana Jew. <sup>10</sup> Hinau matea purongo la usia lara kama pa lo ʻōmʻōmi na tamlohi tilavono, hinau atu natu na lo opoia mo tavera jea vara a vaia.

### *Paul Mo Vujangi Peter*

<sup>11</sup> Pani na rani Peter mo mai Antioch, na reti isana na naho vao. Na reti ʻilangi isana mata sava mo lo vaia, matan sava mo lo vaia mo sopo tataholo. <sup>12</sup> Matan, tiroma moiso tamlohi hai Jerusalem, la pa pala la tai isan James, enia mo lo hanhani tolu na voraiʻa

la tamlohi řořoha, pani na rani la pala, Peter mo turujuha hinira mo toho asau, matan mo matahuni la haratu la lo reti na taiřalihi. <sup>13</sup> Ale tamlohi rasua Jew tari tinapua atu, la usuri na posposi tapnetano non Peter, ale Barnabas sohena, la tikaulejia mo usurira na nora tapnetano.

<sup>14</sup> Pani nara na hitea vara la sopo usuri tataholoi na retivarařuhu mata Retiřuhu, na vereaa isan Peter na nahora enira mo isoiso nara, "Vara engko ko vora Jew matea, ale ko sopo mele usuri na posposi nona Jew, ale nake ko lo toho sohen na tamlohi řořoha, mata sava natu, ko lo vaihitea vara o vai la tamlohi řořoha nike vara la ooloo na posposi nona Jew sei, engko ko tinařihira moiso?" <sup>15</sup> Enřa řa vora řa Jew, řa sopo tai isana 'tamlohi hehe' sei la tamlohi řořoha, <sup>16</sup> pani enřa řa levosahia vara tamlohi mo sopo tataholo na nahon God matan vara mo lo ooloo na Leu non Moses, pani matan nona rasua hin Iesu Křisto purongo. Ale enřa sohena, řa rasu Křisto Iesu matan vara řa pa tataholo na nahon God matan nořa rasua, mo sopo matan řa lo vai na Leu. Matan tea i sopo eři tataholo na nahon God vara mo lo vai na leu.

<sup>17</sup> Pani i pa sohena sava, vara řa lo aleale malele vara řa tataholo na nahon God mata rasua hin Křisto, ale řa vileiulia vara enřa řa pa lo tamlohi hehe? Korong Křisto mo vaiřa řa mai so-

hena 'tamlohi hehe'? Mo vono! <sup>18</sup> Matan, vara a mele turuhi na sava na vilijovjovia moiso, i pa vujangiau vara enau tamlohi tope leu matea. <sup>19</sup> Matan hin leu atu na lo usuria, na mate matan leu atu, matan vara a pa mauri hin God, enau na mate peresi Křisto na nona talopeilopei. <sup>20</sup> Nake mo sopo enau sei na lo mauri, pani Křisto enia mo lo mauri hiniau. Ale nake na mauriku na lo toho hinia na epeku, na lo mauri usuri na rasua hin Natun God sei mo opoiaiu, ale mo hasena silea matakau. <sup>21</sup> Enau na sopo von-avonan la haratu sei, la lo vai na řomřuhu non God sohena hiniau purongo matea. Matan vara řa eři juri vara řa ooloo na leu, mo řaramia vara mateia non Křisto, enia mo sopo te hiniau hinia!

### 3

#### *La Jalio Na Malele Mata Rasua*

<sup>1</sup> Kamim mara Galatia, ka rongorongo vono! Sava tamlohi natu, mo mahuhi kamim? Na levosahia vara na vujangi mamahuni na řarami mateia non Iesu Křisto na nona talopeilopei, mo memera isamim moiso. <sup>2</sup> Na opoia vara a usi na retiu-sia matea isamim tiroma. Ka lavi na Tanumen God matan ka vai na vavahinau mata leu, teni matan ka rongo na Retiřuhu, ale ka rasua? <sup>3</sup> Varařuhu, ka rongorongo vono sohen haratu natu? Ka tapulo na mauri rasua na Tanumen God, pani nake ka řomřomia vara ha pa

tataholo na nahon God na nomim vavahinau? <sup>4</sup> Ka lavi na rani řilangi tavera moiso mata retiřuhu, mo sopo matan vara i pa vano hina purongo teni ka lo řomřomi purongo hinia?

<sup>5</sup> Ale, haratu sei mo lo sile kamim na Tanumena, mo vai na hinau mařurahi matuvana na nahomim matan ka lo vai na vavahinau mata leu, teni matan ka lo rasu na retiřuhu sei ka rongoa?

<sup>6</sup> Hin malele nike Abraham sohena mo 'rasu God, ale God mo vereea vara enia mo tataholo na nahona'. *Gen 15.6* <sup>7</sup> Ha levosahi mamahunia vara la haratu la rasu God, enira natun Abraham tataholo. <sup>8</sup> Ale Retiulia mo retitauhi hinia tuai mara, God i pa vai na tamlohi řořoha la tataholo na nahona mata rasua. Retitapu sei mo retivujavujangi na Retiřuhu tuai isan Abraham mara, 'Hiniho a pa leřuhu na mara jara tinatinapua tari'. *Gen 12.3; 18.18; 22.18* <sup>9</sup> Ale mo sohena natu, la haratu la rasu Křisto, la lavi na leřuhu peresi Abraham, tamlohi rasua sei tuai.

<sup>10</sup> Matan tamlohi tari sei la lo turu řilangi na nora vavahinau mata leu, la lo toho na ruhuruhi lesati moiso, matan Retiulia mara, 'Lesati i pa toho isana tamlohi tari sei la sopo usuri vevuhi na hinau tari na lolo Puku mata Leu la ulia'. *Deut 27.26*

<sup>11</sup> Nake mo memera purongo, vara tea i sopo eři mai tataholo na nahon God, matan vara mo lo oloolo na Leu,

matan 'Tamlohi sei la tataholo na nahon God, la pa mauri na rasua'. *Hab 2.4*

<sup>12</sup> Pani malele leu mo sopo sohena malele mata rasua, matan Retiulia mo vereea mara, 'Vara tea mo opoia vara i tapai na mauri matan mo lo usuri na leu, i pa oloolo vevuhi na leu tari na maurina'. *Lev 18.5*

<sup>13</sup> Křisto mo volituhura hin lesati atu leu mo lo silea, ale enia mo mai lesati matařa, sohena Retiulia mo vereea mara, 'Lesati mo lo toho na tamlohi tari sei la taua mo sevu aulu na vipahai mata talai'. *Deut 21.23* <sup>14</sup> Matan vara hin Křisto Iesu leřuhu God mo retitauhi hinia isan Abraham, i pa pala isana tamlohi řořoha, matan vara řa eři lavi na Tanume Tapu sei God mo retitauhi hinia na rasua.

### *Retitauhi Mo Lo Toho Tiroma Na Leu*

<sup>15</sup> La vorai peresi na vevorai, a pa vai na tovongi matea na posposi tamlohi. Vara te tamlohi la retitauhi hin te hinau moiso, mo sopo tea i eři topea teni i mele tau te hinau aulu hinia. <sup>16</sup> Ale la retitauhi atu God mo vereea, mo vereea isan Abraham peresi na mahapina. Mo sopo vereea vara, 'peresi te mahapina tinapua' sei mo lo řarami na vao matuvana, mo vono, mo lo řarami matea purongo mo vereea mara 'peresi na mahapim' enia Křisto. *Gen 12.7*

<sup>17</sup> Rarami noku reti sei mo sohen harihi: Leu sei, mo pa pala tauni mo ngavulu sangavulu vati mo sangavulu tolu (430) mo usuri

la retitauhi sei, i sopo efi tope la retitauhi sei God mo vaia tiroma moiso isan Abraham vara la mai hina purongo. <sup>18</sup> Matan, vara ra efi lavi na vua retitauhi non God mata ra lo usuri na leu, ale vua retitauhi mo sopo mele mai mata retitauhi, pani God mo silea isan Abraham na malele retitauhi matea.

<sup>19</sup> Vara sohena, God mo sile na Leu mata sava? God mo pa tau na leu mata hehe, vara i toho i tikeli rani atu mahapin Abraham sei God mo retitauhi hinia i pala. Ale God mo sile na leu isana angelo vara la pa silea isan Moses, enia haratu mo lo turu na livuhan God peresi na tamlohi. <sup>20</sup> Ale ra levosahia vara tamlohi matea i pa turu na livuha tamlohi mo rua sei la opoia vara la vai na retitauhi matea, pani nike, God hasena mo vai na retitauhi isan Abraham.

#### *Vavahinau Mata Leu*

<sup>21</sup> Vara sohena leu mo horo na retitauhi non God? Mo vono, matan vara te leu hatea la silea vara i efi sile na mauri, ale tamlohi la pa efi mai tataholo na nahon God matan vara la lo oloolo hin leu atu. <sup>22</sup> Pani Retitapu mo vereulia vara, enra mo isoiso, ra lo toho na ruhuruhi suiha hehe, matan vara vua retitauhi mata rasua hin Iesu Křisto, i pa mai isan la haratu la rasua.

<sup>23</sup> Ale rasua mo pa mai isařa sei, leu mo lo taurilatiřa moiso, mo tapoviřa mo tikeli rani atu God mo vujangi na malele mata rasua. <sup>24</sup> Ale matana, leu atu mo lo kilaurā mo sinai mo tikeli rani

atu Křisto mo mai, matan vara ra efi mai tataholo na nahon God na rasua. <sup>25</sup> Pani nake, matan rasua mo mai moiso, ra sopo mele toho na ruhuruhun tea, <sup>26</sup> matan hin Křisto Iesu, kamim mo isoiso ka natun God mata rasua. <sup>27</sup> Matan kamim matuvana ka paptijo hin Křisto, ka ru Křisto na maurimim. <sup>28</sup> Matan haratu, mo sopo te Jew teni te tamlohi řořoha, teni slev, teni te tamlohi purongo teni te lamane teni te hařai, matan kamim mo isoiso ka matea hin Křisto Iesu. <sup>29</sup> Ale vara kamim non Křisto, kamim ka mahapin Abraham, la haratu sei la pa lavi na vua retitauhi.

## 4

### *Enra Ra Natun God*

<sup>1</sup> Rarami noku reti enia vara natun tamlohi matea enia i pa lavi na korun tamana, enia mo sopo tinapua na slev matea, hina purongo vara hinu tari enia nona. <sup>2</sup> Pani natirihi atu, i pa lo toho na ruhuruhi lima tamlohi matea mata i pa kilaua peresi na volitusi non tamana i tikeli rani atu tamana mo taua moiso.

<sup>3</sup> Mo sohen haratu isařa, na rani ra pa lo natuvarihi, nořa řomřomi mo lo toho na ruhuruhi liman vui varama nike.

<sup>4</sup> Pani rani tataholo mo pala, God mo řule Natuna, mo vora isana hařai matea, mo vora na ruhuruhi leu, <sup>5</sup> vara i volituhu la haratu la lo toho na ruhuruhi leu, matan vara God i pa korohiřa ra mai natuna tataholo. <sup>6</sup> Ale matan ka natun God, enia mo řule na Tanumen Natuna mo

mai na lolo mapuŕa, mo vaiŕa ŕa eŕi tovi God sohena, "Tata, Tamaku". <sup>7</sup> Matan haratu, ko sopo mele slev, pani ko natun God, ale vara natun God, o pa lavi na vua retitauhi non God.

*Paul Mo Romi Na Mara Galatia*

<sup>8</sup> Tuai ka sopo lo levosahi God, ka lo toho na ruhu-ruhu lima vui varama sei tamlohi hai la vereea vara enira god, pani enira la sopo god. <sup>9</sup> Pani nake, matan ka levosahi God, pani vara a reti tataholo, God mo levosahi kamim tiroma, ale mata sava ka opoia vara ha mele slev nona vui varama sei, la sopo eŕi vai te hinau, ale la sopo ŕuhu hin te hinau hatelete? <sup>10</sup> Ka lo oloolo hin te rani tapu, teni te vitu tapu, teni te taro, teni te tauni mata sava?

<sup>11</sup> Enau na lo ŕomŕomia vara korong vara i vono, na lo kalvono purongo matamim. <sup>12</sup> La vorai peresi na vevorai, na usia isamim vara ha materi soheku, matan na sohemim kamim mo sopo Jew, ka materi na leu. Hin rani atu na lo toho peresi kamim, ka sopo vai te hinau i sati isaku. <sup>13</sup> Ka levosahia vara hin rani atu, na pa tapulo retivujavujangi na retiŕuhu isamim, na rojo makomona. <sup>14</sup> Hina purongo vara epeku mo sati sohena vaihite matea isamim, pani kamim ka sopo hitelehilehiau teni tipahiau. Ka kilauau sohena enau angelo non God matea teni sohen Kŕisto Iesu. <sup>15</sup> Pani nake nomim avulahi mo haipu?

Na levosahi mamahunia vara hin rani atu, vara ha eŕi vaia, korong ka julai naŕihi na matamim moiso vara ha silera isaku vara i tueniau na noku rojoa. <sup>16</sup> Korong na mai sohena nomim meresahi matan na lo vere na retivaraŕuhu isamim?

<sup>17</sup> La tamlohi vujangi haluhalu atu sei la lo vaihitea vara ha usurira, mo sopo matan vara la pa tueni kamim. La vaihitea vara ha ŕohu hiniau matan vara ha tapurongo isara purongo. <sup>18</sup> Tarea mo ŕuhu vara ha turu ŕilangi mata vai na vavahinau ŕuhu, mo mele ŕuhu jea na rani na sopo toho peresi kamim. <sup>19</sup> La natuku ŕuhuŕuhu, enau na sohena haŕai matea mo rongohaji vara i mele lavilavi, ale i pa lo sohena isaku i tikeli rani atu, maurin Kŕisto i jea isamim. <sup>20</sup> Vara a pa lo toho peresi kamim nakerihi, a pa retireti malum peresi kamim, matan na sopo levosahia vara a pa mele vai na sava isamim.

*Hagar Enia Sarah*

<sup>21</sup> Ha to vereea isaku kamim sei ka opoia vara ha lo toho na ruhuru leu, ka levosahi na sava leu mo lo vereea? <sup>22</sup> Matan la ulia na Retiulia, vara Abraham natuna lamane mo rua, matea isana haŕai slev matea, moiso matea isana haŕai materi matea, narouna. <sup>23</sup> Pani natun haŕai slev atu, mo vora na masalo tamlohi purongo, ale natun narouna, mo vora usuri na retitauhi non God. <sup>24</sup> Ale la haŕai atu mo rua la tovongi la retitauhi atu mo



rua sei God mo vaira. Haʻrai sei Hagar, mo sohena retitauhi sei God mo vaia na vutivutin Sinai, hin jara atu natu, tamlohi la tapulo mai slev mata leu ea. <sup>25</sup> Ale Hagar enia vutivutin Sinai atu Arabia; enia mo sohen Jerusalem sei matan nona tamlohi la lo toho na ruhuruhu leu, la sohena slev mo kakau nake.

<sup>26</sup> Pani Sarah, haʻrai materi atu mo sohen Jerusalem aulu na tuka, enia tinaʻa. <sup>27</sup> Ale Isaiah mo ulia na Retiulia mo vereea mara,

‘Haʻrai aroaro, o avulahi,  
o avulahi tavera, o ulo  
aulu,

hina purongo ko sopo vasusui te natum,  
matan nake, haratu mo  
aroaro mo vasusui  
mo jeua na haʻrai lahi  
tinapua.’ *Isa 54.1*

<sup>28</sup> Ale nake la vorai peresi na vevorai, kamim ka sohen Isaac, ka natuvarihia mata retitauhi. <sup>29</sup> Pani nake, mo pa lo sohen rani atu, haratu sei mo vora usuri na masalo tamlohi, mo lo tipahi haratu sei mo vora usuri na Tanumen God.

<sup>30</sup> Pani Retitapu mo vere na sava? Mo vereea mara, ‘O tipahi naʻihi na haʻrai slev enia natuna, matan natuna i sopo lavi na korum, matan korum enia non natun haʻrai materi purongo.’ *Gen 21.10*

<sup>31</sup> Ale la vorai, mo sohena natu, enʻa ʻa sopo natun haʻrai slev atu, pani enʻa natun haʻrai materi atu.

## 5

### *Ka Materi Na Leu*

<sup>1</sup> Kʻristo mo teriʻa vara ʻa materi jejeu. Ale ha turu ʻilangi hinia, ha sopo tinaʻihia vara ha mele mai slev nona leu.

<sup>2</sup> Ka hitea, enau Paul na vereea isamim, vara ha lavi na taiʻralihi matan vara ka ʻromʻromia vara i pa vai kamim ha tataholo na nahon God, vavahinau non Kʻristo i sopo eʻi tueni kamim. <sup>3</sup> A mele vereulia isamim tari sei ka lavi na taiʻralihi vara kamim ha pa oloolo vevuhi na leu tari matana. <sup>4</sup> Kamim sei ka lo opoia vara ha oloolo na leu, matan vara i vai kamim ha tataholo na nahon God, ka lo hase langahi naʻihi kamim isan Kʻristo, ale ka jovi naʻihi na ʻromʻruhu non God.

<sup>5</sup> Matan enʻa sei Tanume Tapu mo lo mauri isaʻa mata rasua, ʻa lo kilau toho mata retitauhi sei vara God i pa vaiʻa ʻa tataholo na nahona. <sup>6</sup> Matan hin Kʻristo Iesu, taiʻralihi teni tea vara mo sopo taiʻralihi, enia hina purongo. Pani hina aulu mata rasua, enia vara opoia i vujangi na vavahinau tari.

<sup>7</sup> Tiroma ka lo vano mo ʻruhu moiso. Hare mo posi na ʻromimim, mo vai kamim ka sopo mele usuri na retivararuʻu? <sup>8</sup> God sei mo tovi kamim, mo sopo posi na ʻromimim sohena. <sup>9</sup> Ha levosahi retireti sei la vereea lara, ‘Wai vahona makomona purongo, i pa eʻi vai na mit tari la hohona.’ *1Co 5.6*

<sup>10</sup> Hin Moli, na levosahi mo ʻruhu vara, ʻromiʻa i pa matea na hinau tari, ale vara ha levosahia vara sava tamlohi natu mo lo tikauleji kamim, i pa lavi na talai non God.

<sup>11</sup> La vorai peresi na vevorai, vara a pa lo retivujavujangi vara ha pa taiřalihi sohena hai la vereā vara na lo vaia, mata sava natu Jew la lo tipahiau? Matan la lo řohu hiniau, mo vujangia vara na lo retivujavujangi na talopeilopei non Křisto. <sup>12</sup> Na opoia vara la haratu sei la lo vai na řomimim la lo kaka, la lo opoi jea vara ha taiřalihi, mo řuhu vara la hase votaira.

<sup>13</sup> La vorai peresi na vevorai, God mo tovi kamim moiso vara ha materi, pani ha lo kilaua, ha sopo usuri na masalo varama, pani na nomim opoia, ha lo kilau mata masapa vara ha tueni na tamlohi rasua tinapua. <sup>14</sup> Matan leu tari řa eři verera vara la vere na leu matea purongo,

‘O opoi na tinapua sohen ko lo hasem opoiho.’ *Lev 19.18*

<sup>15</sup> Pani vara ka lo hatihati kamim hasemim, ale ka lo řolomi kamim hasemim, ha lo kilau matan posposi sei i pa eři vaikomokomo kamim hasemim.

### *Masalo Tamlohi Mo Rohu Hin Tanume Tapu*

<sup>16</sup> Pani na vereā vara ha hahau usuri na Tanume Tapu matan vara ha sopo mele usuri na masalo varama. <sup>17</sup> Matan masalo varama mo řohu hin la hināu atu Tanume Tapu mo opoia. Ale Tanume Tapu sohena, mo řohu hin la hināu atu, masalo varama mo opoia, matan enira la meresahi isara hatehateahi, ale matana, mo vaia mo řilangi vara ha vai na

sava ka opoia. <sup>18</sup> Pani vara Tanume Tapu mo lo tiroma hin kamim, kamim ka sopo toho na ruhuruhu leu.

<sup>19</sup> Vavahināu mata masalo varama la memera purongo sohen harihi: mauri maji, řomřomi hina lumiha, posposi mo lumiha jea, <sup>20</sup> lotulotu vono, majaputu, valum lolokoru, vasvas, mereimerei, lolokoru patum, řomřomi hasem na hināu tari, patumasa, řomřomia vara vaom hasena purongo la tataholo, <sup>21</sup> řomusuri, putu na wai řilangi, la matavuhi mata lavilavi na tinapua, ale mele hināu tinatinapua sohera. Na lo mele retiřoařoahai kamim sohen na retiřoařoahai kamim tiroma moiso, vara haratu mo lo vai la hināu sei, enia i pa sopo unu hin mauri atu God mo aulu hinia.

<sup>22</sup> Pani, vua Tanume Tapu mo sohen harihi: opoia, avulahi jea, tamata, řomperavu, řomřuhu, posposi mo řuhu, o vai na sava ko retitauhi hinia, <sup>23</sup> posposi malum, o hase taurilatihu i řuhu. Mo sopo te leu mata i pisuhi na posposi sohera.

<sup>24</sup> Ale la haratu la tamlohi rasu non Křisto Iesu, la vořae na masalo varama peresi na nona opoia sasati, peresi na nona řomřomi lumiha na talopeilopei. <sup>25</sup> Vara řa lavi na Tanume Tapu, řa pa hahau usuri na Tanume Tapu. <sup>26</sup> Ra sopo pohapoha, teni řa lo vaivaiřa teni řa lo mereimerei hiniřa.

*Tueniŕa Tarea*

<sup>1</sup> La vorai peresi na vevorai, vara tea mo jovi hin te hehe, kamim sei ka lo usuri Tanume Tapu, na posposi malum, ha tuenia vara i mele turu. Ha hase kilau mamahuni kamim, vara tea i sopo jovi hin hehe atu tamlohi atu mo vaia. <sup>2</sup> Ha tuetueni kamim tarea na nomim rani řilangi, ale vara ha lo vaia sohena, ka lo vai mařivisi na leu non Křisto. <sup>3</sup> Matan vara te vonamim mo řomřomia vara enia te hinau hinia, pani mo sopo te hinau hinia, mo lo hasena halua.

<sup>4</sup> Pani mo řuhu vara o hasem vaihite na nom vavahinau, ale vara mo řuhu, o pa eři mangisi matana, pani mo sopo mata vavahinau nona tinapua. <sup>5</sup> Matan enřa hatehateahi řa pa hase lavi na nořa tetehi.

<sup>6</sup> Mo řuhu vara haratu la lo lavi na vujangi mata reti non God, la voli la haratu la lo vujangira.

<sup>7</sup> Ha sopo tinařihia vara tea i halu kamim. Ha sopo řomřomia vara God mo lo kilau purongoi na sava ka lo vaia, sava ka lo lavoa, ha pa hani na vuana. <sup>8</sup> Matan haratu mo lavo na masalo varama, hin masalo varama atu i pa lavi na vua mata komokomo. Pani haratu sei mo lavo isan Tanume Tapu, i pa lavi na vua mauri tui.

<sup>9</sup> Ale mo řuhu vara řa sopo maloko mata vai na posposi řuhu, matan na pongina tataholo vara řa sopo maloko, řa pa lavi na vuana. <sup>10</sup> Ale, nake matan masapařa, mo řuhu vara řa vai na hina řuhu

isana tamlohi tari, ale i pa mele řuhu jea vara řa vaia isan la haratu la rasua.

*Isoiso Reti*

<sup>11</sup> Ha hitevosahia vara na lo uliuli hin leta nike na leta hatehateahi tatavera isamim. <sup>12</sup> La haratu la lo vaihitea vara la vai kamim ha taiřalihi, la lo vaia mata hinau matelete purongo, la matahu vara tea la pa tipahira matan vujangi sei vara talopeilopei non Křisto hasena, i eři juri na tamlohi. <sup>13</sup> Ale la haratu sei la lo vere na taiřalihi, la sopo ololo tataholo na leu tari. Pani la opoia purongo vara ha taiřalihi matan la pa eři retipohapoha matana, ale la pa vere vaia vara kamim nora tamlohi.

<sup>14</sup> Pani enau, mo sopo te hinau vara a eři mangisi matana, pani talopeilopei non nořa Moli Iesu Křisto purongo. Nona talopeilopei mo vai na masalo varama la mate hinia, ale mo vai au na sopo mele řomřomi na masalo varama. <sup>15</sup> Mo sopo te hinau hinia vara te tamlohi mo taiřalihi teni i vono. Pani hina aulu enia vara mauri paro sei mo posi na mauri tamlohi. <sup>16</sup> Na lo ususi vara řomopoia non God peresi na nona tamata, la toho isan la haratu la lo usuri mauri nike. Enira natu, Israel vara řuhu non God.

<sup>17</sup> Ale mo tapulo nake mo vano, na sopo opoia vara te tamlohi i vai na rani řilangi isaku, matan na lavi na matara maja na epeku mo vujangia vara enau tamlohi non Iesu.

18 La vorai peresi na  
vevorai, noku usiusi vara  
řomřuhu non nořa Moli Iesu  
Křisto i toho isamim tarea.  
Amen.

# Ephesians

## Leta

### Paul Mo Ulia Isana

## Mara

### Ephesus

## Leta Nike

'Ra hasohaso God sei enia Taman Moli Iesu Křisto, matan enia mo leřuhu hiniřa na leřuhu tari matan tuka sei la tai isan Tanumena matan Křisto.' (1.3). Paul mo tapulo uli na hina aulu hin nona retisohai sei, vara Křisto mo mate na talopeilopei mo vaiřa řa materi řa mai natun God (1.7-8). Ale nake mo lo sakele aulu na tuka na matuan God, mo aulu na hinau tari nake i pa aulu tui tui (1.20-21).

Křisto mo vilijojovi vořa tavera sei mo lo turu na livuhařa sei mo lo vaiřa řa lo meresahi (2.14) mo vaiřa řa mai matea na Tanume Tapu (2.22) usuri na masalon God (3.11).

Moli matalete, Tanume Tapu matalete, God matalete mo aulu na hinau tari (4.4-5). Mo vereā mara kalesia la pa hahau na tamata usuri na Tanumen God (4.3).

Ephesus mo lo toho mariviti na pahisa tasi Asia Minor (nake la tovia Turkey). Hin rani atu enia havati taon tavera hin jara atu na ruhuruhun Rome. Enia jaran Artemis, god hařai atu tamlohi řořoha la lo lotua ea (Acts 19).

Paul mo vujangia vara na natun God la pa hahau hin mauri paro nike sohena sava (4.17-5.20). Tamlohi usuri non Moli la lo toho na opoia

non God, ale la pa usuri na masalona (5.1). La malue na řořoha, la pa hahau na malarani, ale maurira la pa merasahi na tinapua (5.8-9).

Paul mo vujangia vara tamlohi, hařai lahi peresi na natura, ale slev peresi na nora tamlohi tavera la pa hahau sohena na maurira hin Křisto (5.21-6.9).

Paul mo levosahi mamahuni na řomopoia non God:

'Pani God, na nona řomopoia tavera jea, mo opoiřa mo tavera jea, mo sořotahiřa peresi Křisto ale mo sileřa na mauri paro, hina purongo vara enřa řa pa lo toho na mate mata nořa lejileji - God mo juri kamim usuri na nona řomřuhu - Matan kamim ka lo juri usuri na nona řomřuhu na rasua, kamim hasemim ka sopo vaia, enia otori non God isařa.' (2.4-5, 8)

### Hin Leta Nike

1. Retioloolo (1.1-2)
2. Otori non Křisto hin Tanume Tapu (1.3-3.21)
3. Mauri paro hin Křisto (4.1-6.20)
4. Isoiso Retioloolo (6.21-24)

### *Retioloolo Non Paul Isana Mara Ephesus*

<sup>1</sup> Enau Paul, enau vahařule matea non Křisto Iesu usuri na masalon God. Na lo uli leta nike isana tapuhi Ephesus, la haratu la lo turu řilangi hin Křisto Iesu.

<sup>2</sup> Na lo usiusi vara God Tamařa peresi nořa Moli Iesu Křisto la sohā na nora

řomřuhu peresi na tamata isamim.

*God Mo Leřuhu Hiniřa Hin Křisto*

<sup>3</sup> Ra hasohaso God sei enia Taman Moli Iesu Křisto, matan enia mo leřuhu hiniřa na leřuhu tari matan tuka sei la tai isan Tanumena matan Křisto. <sup>4</sup> Matan God na nona opoia mo viřoniřa hin Křisto tiroma moiso mo pa vai na varama, vara řa pa tapu ale řa vokevoke na nahona. <sup>5</sup> God mo taua tiroma moiso vara i pa laviřa sohena nona korohi řa mai natuna tataholo hin Iesu Křisto, usuri na nona řomavulahi peresi na masalona.

<sup>6</sup> Matan haratu, řa hasohaso God matan nona řomřuhu tavera sei mo sureia hiniřa, matan enřa non Natuna sei mo opoia mo tavera jea. <sup>7</sup> Křisto mo volituhuřa na řaena, ale God mo řomiřa mata nořa hehe usuri na řuhuřuhu mata nona řomřuhu, <sup>8</sup> ale mo surei tavuniřa na nona řomřuhu usuri na nona lelevosahi.

<sup>9</sup> God mo vaia hin haratu mo vuhesia na jara tavera. Mo vuhesi na nona hina luhu mata masalona usuri na nona řomavulahi sei mo taua hin Křisto, <sup>10</sup> ale řomřomi tavera atu non God sei mo taua moiso i pa masese na ranina tataholo sei vara Křisto i pa aulu na hinau tari na tuka peresi na varama. <sup>11</sup> Ale God mo vai na hinau tari la masese usuri na masalona, mo taua tiroma moiso vara i pa viřoniřa nona vara řa pa vao matea hin Křisto. <sup>12</sup> Matan vara kamam Jew sei kama lo tau na nomam řomtoto tiroma

hin Křisto, God i pa lavi na hasohaso tavera matana. <sup>13</sup> Ale kamim sohena, ka sořotahi peresi na vaon Křisto hin rani atu ka rongo na reti mata varařuhu sei Retiřuhu mata nomim juri. Kamim ka tau na nomim rasua hin Křisto ale ka lo sořotahi peresia, ale matan ka sořotahi peresi Křisto, God mo sile kamim na Tanume Tapu sei mo retitauhi hinia tiroma moiso isana nona tamlohi. God mo vujangia vara ka nona matan mo sile kamim na Tanumena Tapu. <sup>14</sup> Tanume Tapu sei mo sohena retitauhi matea sei mo vujangia vara God i pa sileřa na hina řuhuřuhu sei mo retitauhi hinira moiso, vavano i tikeli rani atu God i mařivisi na nona vavahinau mata volituhu na nona tamlohi tari, ale matan haratu, řa pa hasohaso nořa God.

*Usiusi Mata Lelevosahi Varařuhu*

<sup>15</sup> Matan hinau akerihi natu, mo tapulo hin rani atu nara na rongo na nomim rasua hin Moli Iesu peresi na nomim opoia isana tapuhi tari, <sup>16</sup> na sopo lo isoiso na noku vere meje isan God matamim na rani na lo usiusi vara na řomřomi kamim. <sup>17</sup> Na lo usiusi vara God non nořa Moli Iesu Křisto sei memerana řuhuřuhu mo tavera jea, vara Tanumena i sile kamim na nona lelevosahi peresi na hitevosahi matan vara ha eři ulua na nomim levosahi hin God, <sup>18</sup> matan enia mo vai na mapumim mo mařivi na memera, matan vara ha eři hitevosahi na řomtoto

řuhuřuhu sei mo tovi kamim matana, ale matan vara ha eři hitevosahia vara nona leřuhu řuhuřuhu sei la řuhuřuhu jea la sohena sava isana nona tamlohi.

<sup>19</sup> Ale na lo usiusi vara ha pa tapulo hitevosahi na tavera suihana řuhuřuhu sei enia nořa, enřa sei řa rasua. Suiha nike enia pa suiha tavera jea atu <sup>20</sup> sei mo sauteterahi Křisto na mateia ale mo sakelehia na jara ooloo tavera na matuan God na tuka aulu hinia, <sup>21</sup> God mo tahea mo aulu jea mo jeu la haratu la aulu, teni la haratu la lo tauri na suiha, teni la haratu la lo řilangi, teni la haratu la lo tiroma hin tea, teni na hija tari sei la lo toho, mo sopo hin pongi akerihi purongo pani hin pongi atu mo lo mai sohena. <sup>22</sup> Ale God mo tau na hinau tari na ruhuruhi palon Křisto, ale mo vai Křisto sei mo aulu na hinau tari vara i patu nona kalesia tari, <sup>23</sup> ale nona vao kalesia tari enira epena, ale maurin Křisto natu mo lo mařivisi na hinau tari.

## 2

### *Mauri Paro Hin Křisto*

<sup>1</sup> Tiroma ka mate mata nomim lejileji peresi na hehe sei <sup>2</sup> ka lo toho hinira usuri na malelen varama nike nake, usuri na masalon Setan, enia supe rihirihiri řilangi atu sei mo aulu na masapa, natu mo lo voko na mapun la haratu sei la řohu vara la ooloo hin God. <sup>3</sup> Enřa řa sohera tiroma, řa lo hahau usuri na masalořa, ale řa loloso na masalořa sei mata epeřa peresi na řomiřa, ale

řa vora řa natu talai lolokoru non God mata hehe sohena tamlohi tari tinapua.

<sup>4</sup> Pani God, na nona řomopoia tavera jea, mo opoiřa mo tavera jea, <sup>5</sup> mo sořotahiřa peresi Křisto ale mo sileřa na mauri paro, hina purongo vara enřa řa pa lo toho na mate mata nořa lejileji – God mo juri kamim usuri na nona řomřuhu. <sup>6</sup> Matan God mo sauteterahiřa na mateia peresi Křisto, ale mo sakelehiřa peresia na tuka matan enřa řa matea peresi Křisto Iesu, <sup>7</sup> mo vaia matan vara hin la pongi sei la pa mai, i pa vujangia vara nona řomřuhu mo tavera jea sohena sava isařa usuri na nona řomřuhu tari hiniřa hin Křisto Iesu.

<sup>8</sup> Matan kamim ka lo juri usuri na nona řomřuhu na rasua, kamim hasemim ka sopo vaia, God sei mo sile purongoi otori nike isařa; <sup>9</sup> mo sopo juri kamim mata nomim vavahinau, mo vono matan vara tea i sopo eři mangisi matana. <sup>10</sup> Matan enřa vavahinau non God, mo vaiřa řa mai hina paro matea hin Křisto Iesu matan vara řa pa vai na vavahinau řuhu sei God mo tatamahunira tiroma moiso matan vara řa pa hahau hinira.

### *Enřa Ra Matea Hin Křisto*

<sup>11</sup> Matan haratu, na opoia vara kamim sei ka vora tamlohi řořoha, ha to řomřomia sohena sava ka lo toho tiroma, ale Jew la lo verea vara kamim ka sopo tatuara matan ka sopo taiřalihi sohera, hinau sei

tamlohi la lo vaia na epera purongo pani mo sopo tueni na mapura, <sup>12</sup> ale ha sopo řomaliho vara hin la rani atu ka lo toho pani mo sopo te nomim Křisto, ka lo toho ka sopo tatua vao tavgavuvin Israel, ale ka vinano na nora retitauhi mata leřuhu non God, ale mo sopo te nomim řomtoho, ka lo toho na varama pani ka sopo levosahi God. <sup>13</sup> Pani nake hin Křisto Iesu, kamim sei tiroma ka lo toho asau řove isan God, God mo lavi kamim ka mai mariviti isana na řaen Křisto Iesu. <sup>14</sup> Matan Křisto natu, mo tau na tamata isamam Jew peresi kamim tamlohi řořoha, mo vaiřa řa mai vao matea. Nona mateia mo vilijojovi vořa tavera mata hitesatihi na tinapua sei mo lo turu na livuhařa, ale mo lo vaiřa řa lo meresahi, <sup>15</sup> na nona mateia mo vai na leu tari nona Jew la isoiso. Mo vaia matan vara i vai na vao tamlohi paro matea i malue hin la haratu mo rua mata nona sari tamata, <sup>16</sup> ale Křisto mo vaira la epe matea, mo sořotahira jara matea isan God na nona mateia, ale hinia, mo vilimatei na nořa hitesatisatihiřa. <sup>17</sup> Ale mo mai ale mo retivujavujangi na tamata isamim sei tiroma ka lo toho asau řove hin God, ale tamata isan la haratu la lo toho mariviti, <sup>18</sup> matan vara hin Křisto enřa tolu řa pa eři mai isan God Tama na Tanumena sei mo matelete purongo.

### *Ra Mai Iman God Paro*

<sup>19</sup> Ale nake ka sopo mele vinano teni tamlohi mata

jara tinapua. Pani ka tamlohi hin jara atu tolu na nona tapuhi, ka tamlohi lolo iman God. <sup>20</sup> Enřa řa imana, řa lo turu na pulon ima sei God mo vaia na nona vahařule peresi na přovet matan nake, ale Křisto Iesu natu enia pulo vatu matan ima atu. <sup>21</sup> Hinia, ima tari la lo sořotahi mamahu mo řuhu, la ulua la mai temple tapu matea hin Moli sei <sup>22</sup> kamim sohena, God mo lo voro kamim ka mai jara matea vara ha mai jara toho matea non Tanumen God.

## 3

### *Romřomi Luhu Non God*

<sup>1</sup> Matan řomřuhu non God sei natu, enau Paul na lo toho na ima řilangi matan noku vavahinau non Křisto Iesu matamim la tamlohi řořoha. <sup>2</sup> Na levosahia vara ka levosahi moiso sohena sava God mo sileau hin vavahinau řuhu nike mata vereuli na sava hinau řuhu mo vaia mata juri kamim.

<sup>3</sup> Sohena na ulia makomona tiroma moiso hin leta nike vara God hasena mo vuhesi na nona řomřomi luhu isaku moiso. <sup>4</sup> Vara ha lo evia, ha pa eři hitevosahi na sava na levosahia moiso hin hina luhu atu hin Křisto. <sup>5</sup> Hina luhu nike, God mo sopo vuhesi isan te pina tamlohi na varama tuai sohena Tanumena mo vuhesia nake isana nona vahařule tapu peresi na přovet.

<sup>6</sup> Hina luhu atu enia harihi: enia vara tamlohi řořoha tolu na Jew tari enira la pa lavi na hina řuhuřuhu sei God i pa silea isana natuna. Enira



tupra rua la pa juri matan la rasu na Retiřuhu, ale la sopesope tavalu epe matea purongo, ale enira tupra rua la pa lavi na vua retitauhi hin Křisto Iesu. <sup>7</sup> Enau na mai volitusi matea non Retiřuhu nike usuri na otori řuhuřuhu mata řomřuhu non God sei mo silea isaku usuri na nona vavahinau na suišana.

<sup>8</sup> Hina purongo vara enau na atano jea na tapuhi non God, enia mo řomřuhu isaku vara a pa retivujavujangi na řuhuřuhun Křisto isana tamlohi řoroħa na sava tea i sopo eři levosahi te hinau matana, <sup>9</sup> ale vara a vai na tamlohi tari la memera na řomřomihuhu non God sei mo vai na hinau tari sei mo jarohia tuai moiso.

<sup>10</sup> Romřomi tavera non God enia mata vujangi na nona lelevosahi na malele tinatinapua tari na lima nona tamlohi isana vui varama sei la lo aulu peresi la haratu la lo tauri na suiha na masapa peresi na tuka. <sup>11</sup> Haratu natu mo usuri na nona řomřomi sei mo taua matan tuai tiroma moiso vara Křisto Iesu nořa Moli i pa vai mařivisia.

<sup>12</sup> Matan hin Křisto řa eři turu řilangi, ale enia mo vaira řa eři řomřilangi na nořa rasua řa sopo matahu vara řa mai na nahon God. <sup>13</sup> Matan haratu, na lo usi kamim vara mapumim la sopo jovi mata noku rani řilangi matamim, ha lavia soħena hina řuhu matea isamim.

### *Usiusi Non Paul*

<sup>14</sup> Matan hinau nike, na lo papaohi atano na nahon

God Tama, <sup>15</sup> enia haratu sei mo tau na hija vao tari na tuka peresi na varama. <sup>16</sup> Na lo usiusi vara God na nona leřuhu řuhuřuhu matuvana, i tinařihia vara i vai na lolomim la suiha hin suiha atu Tanume Tapu mo lo silea. <sup>17</sup> Na lo usiusi vara Křisto i pa toho na lolo mapumim na nomim rasua, na lo usiusi vara na nomim wariha i řilangi na opoia řuhuřuhu non God, <sup>18</sup> na lo usiusi vara ha pa eři hitevosahia peresi na tapuhi tari vara nona opoia mo tavera soħena sava, mo peravu soħena sava, mo aulu soħena sava, ale mo puaha soħena sava, <sup>19</sup> ale matana, na lo usiusi vara řa eři levosahi na opoia non Křisto sei mo jeu na lelevosahi, matan vara ha pa mařivi savulevule na mauri peresi na suiha tari sei la lo tai isan God.

<sup>20</sup> Na lo usiusi isan God sei suišana tavera jea mo lo voko hiniřa sei i eři vai na hinau la jeu na sava řa lo usia teni řa lo řomřomia, <sup>21</sup> vara i lavi hasohaso tavera na vao kalesia tari, ale hin Křisto Iesu na rani tari, tui tui, amen.

## 4

### *Enřa Epe Matea Hin Křisto*

<sup>1</sup> Matan haratu, enau prisoner matea non Moli, na lo usia řilangi vara ha hahau na malele mo tataholo na nahon God usuri mauri atu mo tovi kamim matana. <sup>2</sup> Ha řomatano, ha řuhu isana tinapua, ha řomperavu isamim hatehateahi, na opoia ha řomřomi purongo

na hinau sei tinapua la jovi hinira. <sup>3</sup> Tanume Tapu mo soʔotahi kamim moiso, ale ha hahau na tamata matan vara ha pa matea.

<sup>4</sup> Enʔa mo isoiso ʔa epe matea, ale enʔa mo isoiso ʔa lavi na Tanume Tapu matelete purongo, ale enʔa mo isoiso God mo toviʔa matan mauri ʔuhufuhu atu na rani mo lo mai. <sup>5</sup> Moli enia matelete purongo, rasua matea, paptijo matea, <sup>6</sup> ale God matelete purongo, enia Tamaʔa sei enia mo aulu hiniʔa mo isoiso, ale mo lo toho hiniʔa mo isoiso, ale mo lo vavahinau hiniʔa mo isoiso.

<sup>7</sup> Pani Kʔisto mo sileʔa hatehateahi na vavahinau ʔuhu usuri na masalona ʔuhufuhu. <sup>8</sup> Matan Retitapu mo vere tuai moiso vara, 'Rani atu mo sahe aulu na tuka,

mo tiroma na vao matea mo terira,

ale mo sile na otori isana nona tamlohi.' *Psa* 68.18

<sup>9</sup> Reti sei 'mo sahe aulu' mo lo ʔarami na sava? Mo ʔaramia vara enia mo sivo na lolo varama tiroma. <sup>10</sup> Haratu sei mo lo sivo atano na lolo varama enia haratu sei mo sahe aulu vara i aulu na hinau tari na tuka.

<sup>11</sup> Enia haratu sei mo sile na tamlohi hai isana vao kalesia sohena vahaʔule, hai sohena pʔovet, hai la evangelist, hai la tavui kalesia, ale hai la tamlohi vujangi.

<sup>12</sup> Nora vavahinau enia matan vara la pa eʔi vujangi mamahuni na tapuhi, matan vara la eʔi vai na vavahinau non God, ale enia vara la

vai na epen Kʔisto sei enʔa kalesia tari, la ulua i ʔilangi, <sup>13</sup> vavano i tikeli na rani enʔa mo isoiso ʔa matea na rasua peresi na lelevosahi hin Natuʔ God. Ale ʔa mai tamlohi jea na ʔomʔomi, ale ʔa ulua ʔa sohen Kʔisto vevuhi.

<sup>14</sup> Moiso ʔa pa sopo mele sohena natuvarihi sei tarea ʔomira la sopo levosahi mamahuni na sava la lo rasua. Ale la ʔomkaka matan tea mo vere te hinau tinapua isara teni te reti nona tamlohi vujangi haluhalu sei mo vai halu atu la rongoa sohena retivaraʔuhu matea isara. <sup>15</sup> Ra pa sopo sohera pani ʔa lo taurilati na retivaraʔuhu na opoia, ale na hinau tari ʔa pa ulua hin Kʔisto sei enia patu epena. <sup>16</sup> Epena tari la lo ulua na limana purongo, la lo soʔotahi mo ʔuhu matan manmanina tari la lo taurilatira jara matea. Vara kalesia hatehateahi la vai na ʔungara vavahinau, pa epena mo ulua na opoia.

### *Mauri Paro Hin Kʔisto*

<sup>17</sup> Ale na lo vere ʔilangi isamim na hijan Moli vara ha sopo mele hahau sohena tamlohi ʔoʔoha sei nora ʔomʔomi mo rongorongo vono. <sup>18</sup> Nora ʔomʔomi ʔoʔoha, mo lo toho asau ʔove na maurin God matan mapura mo ʔilangi ale mo horora vara la sopo eʔi lelevosahi. <sup>19</sup> Matan la sopo eʔi mele mahanuhanu hin te nora hehe, la pute na nora mauri maji, ale la lo ʔomʔomjea vara la vai na posposi lumihia sasati tari.

<sup>20</sup> Pani hin rani atu ka tau na nomim rasua hin Křisto, la sopo vujangia vara ha mauri sohena, <sup>21</sup> na levosahia mo řuhu vara ka pete rongo te hinau matana moiso, ale ka sořotahi peresi Iesu usuri na retivararuhu sei la vujangia isamim moiso. <sup>22</sup> La vujangia isamim tiroma moiso vara ha tau narĳhi na nomim mauri tuai mata hehe sei la posposi lumiha sasati sei mata halu la vaia mo lo ranga jea, <sup>23</sup> ale ha tinarĳhia vara Tanumen God i posi na řomimim peresi na nomim kilakilau la paro. <sup>24</sup> La vujangia isamim vara ha ru na mauri paro sei God mo vaia usuri na masalona, mo tataholo, mo tapu ale mo vararuhu.

<sup>25</sup> Matan haratu, ha isoiso na halu sohen přovet matea mo vere a mara, 'kamim hatehateahi ha retireti tataholo isana tahisamim' *Zec 8.16* matan enřa řa nořa hatehateahi. <sup>26</sup> 'Vara ka lolokoru, ha sopo hehe!' *Psa 4.4* Ha sopo tinarĳhia vara pulo nomim lolokoru i aulu hin kamim i peravu, <sup>27</sup> vara i vono, ha pa sile na masapa isan Tiapolo vara i aulu hin kamim.

<sup>28</sup> Vara engko tamlohi vanaho matea, o isoiso na vanaho. O tapulo hani na masumasum, ale o hansohai isan la haratu la vejuveju. <sup>29</sup> Ha sopo tinarĳhia vara te reti sasati hatea i malue na jingomim, pani ha pa lo vere na reti řuhu purongo matan vara la eři tueni la haratu la lo rongora.

<sup>30</sup> Ale ha sopo vai na

Tanume Tapu non God i rongo i sati na sava ka lo vaia, matan enia natu mo tapuhi kamim moiso matan rani atu God i pa juri kamim hinia.

<sup>31</sup> Ha pulahi narĳhi na nomim posposi hohona, lolokoru sati, lolokoru, ngarui na tinapua, retifeřesi na tinapua, ale ha pulahi narĳhi na posposi sasati tari la sopo toho na maurimim.

<sup>32</sup> Pani ha vai na posposi řuhu isamim hatehateahi, ha řomopoi, ha řomi kamim hatehateahi sohen God hin Křisto mo řomi kamim.

## 5

### *Ha Hahau Na Malarani*

<sup>1</sup> Matan haratu, ha usuri na tovongi non God na hinau tari ka lo vaira sohena natuna tataholo sei mo opoira mo tavera jea, <sup>2</sup> ale ha toho na opoia sohen Křisto mo opoira sei mo sile na maurina matařa sohena malamalai matea asuna mo ponaha mo řuhu isan God.

<sup>3</sup> Ha sopo tinarĳhia vara te mauri maji teni te řomřomi lumiha, teni te hanmarua i toho isamim. Matan la hinau nike la sopo eři toho isana tapuhi non God. <sup>4</sup> Ha sopo vere na hina lumiha teni retireti rongorongono vono, teni sorahi sati na harai teni tamlohi — la hinau tari sei enira la sopo tataholo isamim. Pani na jarara, ha vere meje isan God. <sup>5</sup> Matan ha levosahi mamahunia vara haratu mo lo vai na mauri maji, teni řomina mo lumiha, teni mo hanmarua matan tamlohi hanmarua matea

enia tamlohi lotulotu vono matea, i pa sopo efi unu hin mauri atu Křisto enia God la supe hinia. <sup>6</sup> Ha sopo tinařihia vara tea i halu kamim i vereea vara sava na lo vereea akerihi la retireti purongo, matan talai lolokoru non God mata hehe i pa jovi isana tamlohi lejileji tari. <sup>7</sup> Ha sopo vai la hinau sei la lo vaira, <sup>8</sup> matan na pongi matea kamim ka lo toho na řořoha, pani nake kamim ka lo toho na malarani matan Moli. Ha hahau sohena natu malarani, <sup>9</sup> matan vua malarani enia mo vai na hina řuhuruhi tari sei la tataholo ale la varařuhu la pala.

<sup>10</sup> Ha vaihitea vara ha levosahi na sava God mo avulahi hinia. <sup>11</sup> Ha sopo sořotahi peresi tea mata vai na hina sasati mata řořoha, pani na jarara ha vai na tamlohi la levosahia vara la hinau atu la sati. <sup>12</sup> Matan enia hina mahanuhanu matea vara ha lo efi sorahi na hinau tamlohi lejileji la lo vai luhu hinira. <sup>13</sup> Pani hinau tari, malarani mo merasahira la mera mo řuhu vara la sasati sohena sava. <sup>14</sup> Matan hinau tari sei la pala na jara tavera malarani mo vaira la memera, ale Retitapu mo vereea vara,

‘O turu o kilau na nom řommate!

O turu na mateia,  
ale Křisto i pa merasahiho,  
ale ha pa lelevosahi.’

*Isa 26.19; 51.17; 52.1;  
60.1*

*Ha Mauri Na Suihan  
Tanume Tapu*

<sup>15</sup> Matan haratu, ha lo kilau mamahunia vara ka lo

hahau sohena sava, i sopo sohena tamlohi rongorongono vono pani sohena tamlohi lelevosahi. <sup>16</sup> Ha sopo toho purongo pani ha vai na hina řuhu matan la rani nike hehe mo mařivi hinira. <sup>17</sup> Matan haratu ha sopo rongorongono vono, pani ha tamlohi lelevosahi mata levosahi na masalon Moli. <sup>18</sup> Ale ha sopo drong na wai řilangi sei i pa komo na maurimim, pani ha tinařihi na Tanumen God i mařivisi kamim, <sup>19</sup> ale ha lalavete na psalm, na hymn peresi na vete Tanume Tapu mo silera, ale ha sohai na vete sei la lo toho na mapumim la sahe isan God. <sup>20</sup> Tarea ha vere meje isan God Tama matamim hatehateahi na hijan nořa Moli, Iesu Křisto.

*Reti Mata Lahi Nona Kalesia*

<sup>21</sup> A mele vereea vara ha ooloo hin kamim hatehateahi matan ka lo lotu Křisto na ooloo. <sup>22</sup> Kamim hařai lahi, ha ooloo na tuamim sohena ka lo ooloo hin Moli. <sup>23</sup> Matan tamlohi lahi matea enia patun narouna, mo sohen Křisto enia patu epena sei vao kalesia tari, enia hasena mo sile na maurina vara i jurira. <sup>24</sup> Sohena vao kalesia tari la lo ooloo hin Křisto, ale kamim hařai lahi sohena ha pa ooloo na tuamim na hinau tari.

*Tamlohi Lahi La Sohen Křisto*

<sup>25</sup> Tamlohi lahi ha opoi na naroumim sohen Křisto mo opoi na nona vao kalesia

ale mo hase sile na maurina matana, <sup>26</sup> matan vara i tapuhia ale Tanumena mo vaia mo vokevoke na paptijo peresi na nona reti. <sup>27</sup> Mo vaia matan vara i tatamahuni na vao kalesia vara i nona hasena sei mo ruhu ruhu jea, mo sopo te hina lumihia hinia, teni te hehe teni te hina sasati tinapua hatea, pani mo tapu mo sopo te hinau vara tea i eri tuvaia hinia. <sup>28</sup> Mo sohena purongo, tamlohi lahi la pa opoi na naroura sohen la lo opoi na epera hasera. Matan tamlohi lahi sei mo lo opoi narouna, mo lo hasena opoia. <sup>29</sup> Matan tea mo sopo hasena rohu na epena, pani mo vahania na nona reti ale mo kilau mamahunia, sohen Křisto mo lo vaia isana vao kalesia. <sup>30</sup> Ale enra ra sopesope epena. <sup>31</sup> Sohena Retitapu mo vereva vara, 'Matan hinau atu, tamlohi matea i pa tinarihi tamana enia tinana, ale i sořotahi isan narouna, ale enira tupra rua la mai matea'. *Gen 2.24*

<sup>32</sup> Hinau nike enia vujangi puhoni matea, matan enia mo lo vujangia sohena sava Křisto mo lo sořotahi isana vao kalesia, ale la matea. <sup>33</sup> Matana, a mele vereva vara tamlohi hatehateahi i pa opoi narouna sohen mo lo hase opoia, ale narouna i pa sile na oloolo isan tuana.

## 6

### *Reti Mata Natuvarihia Peresi Na Tamara*

<sup>1</sup> Natuvarihia tari, ha oloolo na tamamim peresi na tinamim, matan enia mo

tataholo. <sup>2</sup> 'Ha oloolo hin tamamim peresi na tinamim' – matan harihi enia tiroma leu sei retitauhi matea mo lo toho hinia, <sup>3</sup> ale sopena mo lo vereva mara vara ha oloolo hinira – 'maurim i pa peravu, ale i pa mařivi na leřuhu'. *Deut 5.16*

<sup>4</sup> Tama, ha sopo vaivai na natumim vara la lolokoru, pani ha vaira la ulua na oloolo peresi na vujangi hin Moli.

### *Reti Mata Slev Peresi Na Nora Tamlohi Tavera*

<sup>5</sup> Kamim slev, hin mauri nike ha tatamahu tarea vara ha oloolo na nomim tamlohi tavera, ha lo oloolo hinira na mapumim tari mo sopo te halu hinia, sohen ka lo vaia isan Křisto. <sup>6</sup> Ha sopo sohen la haratu sei la lo voko matan tamlohi la lo kilaura – sohen la haratu la opoia vara tamlohi la pa avulahi hinira purongo – pani ha sohena slev non Křisto sei la lo vai na masalon God na mapura, <sup>7</sup> ale ha avulahi hinia ha vaia sohen ka lo volitusi isan Moli mo sopo isana tamlohi. <sup>8</sup> Kamim ha lo levosahia vara Moli i pa sile na voliřa hatehateahi usuri na hina ruhu ra lo vaira, hina purongo vara enra ra materi teni ra lo slev.

<sup>9</sup> Ale usuri posposi nike, kamim tamlohi tavera ha pa vaia isana nomim slev sohena, ha isoiso na nomim reti řilangi isara matan ha lo levosahia vara kamim rua nomim tamlohi tavera matea purongo na tuka, ale enia mo sopo tametame tea.

### *Ruru Mata Vuro Non God*

<sup>10</sup> Isoiso noku reti nahai: ha řilariangi hin Moli na řilangi nona suihana. <sup>11</sup> Ha ru na ruru mata vuro tari non God matan vara ha eři turu řilangi mata turuhoro na vavahinau non Tiapolo sei la lo mai la lo haluhalu na tamlohi na malele matuvana. <sup>12</sup> Matan nořa vuro mo sopo peresi na tamlohi sei řa eři hitera, pani peresi na angelo sasati sei la aulu, peresi la haratu la řilangi, peresi la haratu sei la aulu na řořoha hin varama nike, peresi na suiha vui sasati na masapa.

<sup>13</sup> Matan haratu, ha ru na ruru vuro tari non God matan vara ha eři turu na jaramim hin rani sasati nike, ale ha vai na hinau tari ha eři vaira, ale ha turu řilangi. <sup>14</sup> Ha turu řilangi ha sopo juha, ha otioti na oti mata retivararuhu, ale ha ru na řumamim na ruru vuro mata posposi tataholo non God. <sup>15</sup> Ale sohena nomim sabat mata palomim, ha ru na Retiřuhu sei mo lo sile na tamata matan vara ha pa tatamahu tarea mata ha hahau peresia. <sup>16</sup> Ha tauri řilangi na nomim rasua sohena tingting matea sei i eři tinghoro na evine hani non Tiapolo. <sup>17</sup> Ha ru na hati vuro mata juri sei mo lo matahi na maurimim, ale ha taurilati na sita vuro non Tanume Tapu sei enia reti non God. <sup>18</sup> Ha usiusi ale ha usi God vara i tueni kamim tarea. Tarea ha usiusi usuri na Tanumen God, ale matana, tarea ha lo kilau i řuhu, ale ha tau na řomimim mata usiusi mata tapuhi tari

non God.

<sup>19</sup> Ha usiusi matakū matan vara God i pa sileau na retiso-hai sei mo opoia vara a vereā, ale vara a sopo matahu mata vere mamahuni na hina luhu mata Retiřuhu i memera i řuhu vara enia mata tamlohi tari. <sup>20</sup> Enau na lo toho na jen nakerihi matan na lo retivu-javujangi retisohai nike sohen God mo řuleau matana.

### *Isoiso Reti Non Paul*

<sup>21</sup> Tychicus, vorai řuhuřuhu sei mo lo turu řilangi mata volitusi na vavahinau non Moli, enia i pa vere kamim na hinau tari vara ha levosahira, matan ha pa levosahia vara na lo toho sohena sava. <sup>22</sup> Na lo řulea mai isamim matan haratu natu, vara ha pa eři levosahia vara kamam kama lo toho sohena sava nike, ale vara i eři retituetueni na mapumim.

<sup>23</sup> Noku usiusi vara tamata, opoia peresi na rasua la tai isan God Tama peresi Moli Iesu Křisto, la pa toho isamim la vorai peresi na vevorai. <sup>24</sup> Na lo usiusi vara řomřuhu non God i pa toho isan la haratu sei la opoi nořa Moli Iesu Křisto na opoia sei mo sopo te isoisona.

**Leta  
Paul Mo Uli Isana  
Mara  
Philippi**

**Leta Nike**

Paul mo uli leta nike na ima řilangi (1.7) vara i vere meje isana kalesia Philippi mata nora otori peresi nora usiusi matana (1.5; 4.10–19). Mo lo kilau toho vara i pa materi matan vara i eři mele retivu-javujangi na Retiřuhu (3.17–19). Pani mo levosahia vara korong la pa vilimateia hin ima řilangi atu (1.21; 2.17; 3.10).

Philippi mo lo toho auta Greece hin jara atu la tovia Macedonia. Paul mo tapulo na vao kalesia atu Philippi usuri na nona retivujavujangi ea (Acts 16). Ale mo retiřoãroahaira vara la pa lavi na rani řilangi sohen Paul mo lo lavia moiso. Pani mo vereã isara mara vara i sohena, leřuhu non God i pa toho isara matana (1.28–30).

Paul mo vereã isara mara la pa lo kilau matan la tamlohi atu la lo posi na vujangi tataholo non Křisto (3.2–11). Paul mo avulahi tavera, hina purongo mo lo toho na ima řilangi matan Křisto. Paul mo vereã mara la pa hahau jara matea (2.2; 4.2–3) ale vara la pa usuri na řomřomi non Křisto Iesu sohen harihi: 'Romimim i pa sohena řomin Křisto Iesu,

hina purongo vara  
tiroma enia God tata-  
holo,

enia mo sopo řomřomia vara i taurilati řomřomi atu vara enia God,  
pani mo hasena taua sivo atano  
mo mai sohena volitusi matea tataholo,  
ale mo vora mo mai mo sohena tamlohi purongo,  
ale mo hasena taua sivo atano,  
ale mo ololo mo kakau na nona mateia,  
mateia atu enia mateia sasati mata talai na talopeilopei matea.' (2.6–8)

**Hin Leta Nike**

1. Retiololo (1.1–11)
2. Maurin Paul (1.12–30)
3. Maurin Iesu (2.1–18)
4. Retisohai Hin Te Tapalan Paul (2.19–30)
5. God Mo Lavifa (3.1–4.9)
6. Paul Mo Vere Meje Isara (4.10–20)
7. Isoiso Reti (4.21–23)

1 Enau Paul peresi Timothy, kamam kama slev non Křisto Iesu, kama uli leta nike isana tamlohi viřoni non God hin Křisto Iesu la lo toho Philippi, peresi la haratu la lo tiroma na tamlohi peresi la haratu la lo deacon ea.  
2 Romřuhu peresi na tamata non God Tamařa peresi Moli Iesu Křisto i pa toho isamim.

*Usiusi Non Paul*

3 Vara na lo řomřomi kamim, tarea na lo vere meje isan God matamim.  
4 Ale na rani na lo usiusi matamim sohena, na lo usiusi na noku řomavulahi,  
5 matan kamim ka tapala na vavahinau mata Retiřuhu, mo tapulo na tiroma rani mo tikeli nake, 6 Na levosahia

mo řuhu vara haratu mo lo tapulo na vavahinau řuhu na maurimim, i pa lo vaia i tikeli rani atu Iesu i mele mai, ale i pa mai na isoisona.

<sup>7</sup> Mo tataholo vara a řomřomia sohena matamim matan noku opoia matamim mo tavera jea, hina purongo vara na lo toho nike na ima řilangi teni vara a lo matahi na Retiřuhu sei ka lavia, teni vara a lo vujangia vara enia mo retivararuhu, ale mata řomřuhu non God, enřa mo isoiso řa tapala matana. <sup>8</sup> God mo levosahia vara na lo opoi kamim, mo tataholo na opoia non Křisto Iesu isamim. <sup>9</sup> ale harihi enia noku usiusi: vara nomim opoia i pa lo ulua i tavera tarea, na lo usiusi vara ha ulua na nomim levosahi řuhu tari peresi na rongvosahi na hinau mo vararuhu, <sup>10</sup> matan vara ha pa eři rongvosahi na sava natu, mo tataholo vara ha vaia, ale matan haratu, ha pa eři toho vokevoke i pa sopo tea i tuvai kamim i tikeli rani atu Křisto i mele mai, <sup>11</sup> ale ha pa mařivi na vua mata mauri tataholo sei mo tai isan Iesu Křisto, i pa vai na tamlohi la tahe na hijana, ale la pa sile na hasohaso isan God.

### *Retivujavujangi Hin Křisto*

<sup>12</sup> Ale la vorai peresi na vevorai, na opoia vara ha pa levosahia vara sava rani řilangi mo mai isaku nike, mo mai matan vara tamlohi matuvana la eři rasu na Retiřuhu. <sup>13</sup> Ale matan haratu, tamlohi vuro tari non Supen Rome sei la lo kilauau nike,

peresi na tamlohi tari la levosahia vara enau na lo toho na ima řilangi matan Křisto. <sup>14</sup> Matan na lo toho na ima řilangi nike, Moli mo vai na řomřomi nona vorai kalesia nike la řomřilangi vara la pa vereuli na Reti non God la sopo matahu matana.

<sup>15</sup> Vararuhu tamlohi hai la lo retivujavujangi hin Křisto na nora mereimerei, na nora řomaulu, pani hai la lo vaia na posposi tataholo. <sup>16</sup> La haratu hitahu, la lo vaia na nora opoia matan la levosahia vara enau na lo toho na ima řilangi matan na lo matahi na Retiřuhu. <sup>17</sup> La haratu tiroma la lo retivujavujangi hin Křisto na řomaulu, řomira la sopo tataholo, la lo řomtau vara la pa mele vai na noku rongohaji i mele tavera nike na ima řilangi matana. <sup>18</sup> Pani mo sopo te hinau hinia. Hinau aulu hinia, enia vara tamlohi la retivujavujangi Křisto, hina purongo vara la lo vaia na nora tapnetano teni la vararuhu. Matan haratu na avulahi, ale a pa lo avulahi, <sup>19</sup> matan na levosahia vara nomim usiusi peresi na tuetueni sei Tanumen Iesu Křisto mo silea, sava mo masese isaku, isoisona God i pa juriau.

### *Paul Mo Mauri Matan Iesu*

<sup>20</sup> Na levosahia mo řuhu, ale na lo řomtoho vara a pa sopo vai te hinau vara i eři vau a mahanuhanu matana, pani na noku řomřilangi nake sohena tarea, a pa lo sile na ololo isan Křisto na hinau tari na lo vaira,



vara a mauri teni a mate.  
<sup>21</sup> Matan isaku, mauri enia matan Křisto, ale mate, i pa mele řuhu. <sup>22</sup> Vara a lo mauri hin epe nike, enia masapa vara noku vavahinau řuhu la pa vuaha. Pani na sopo levosahia vara sahara mo mele řuhu, <sup>23</sup> řomiku mo opoira enira rua. Na opoia vara a malue a toho peresi Křisto matan haratu mo řuhu jea, <sup>24</sup> pani i pa mele řuhu jea isamim vara a lo mauri.

<sup>25</sup> Matan na levosahia mo řuhu vara a lo mauri, a eři tueni kamim mo isoiso, ale ha pa ulua na avulahi na nomim rasua, <sup>26</sup> matan vara ha pa hasohaso Křisto Iesu mata mo tinarihia vara a mele toho peresi kamim.

### *Ra Pa Tamlohin Tuka*

<sup>27</sup> Hinau aulu enia harihi: vara ha hahau na malele mo tataholo na Retiřuhu non Křisto, matan vara a mai a hite kamim teni vara a rongo te sorasorahimim, a pa levosahia vara ka lo turu řilangi jara matea sohena tamlohi matelete, mata matahi na sava Retiřuhu mo vujangia, <sup>28</sup> ale ha sopo matahuni la haratu sei la nomim meresahi, matan nomim rasua enia i pa matamata mera matea isara mata vujangira vara maurira la pa sopo juri, pani kamim ha pa juri, harihi God i pa vaia. <sup>29</sup> Matan God mo taua vara ha pa sopo rasu Křisto purongo, pani vara ha pa lavi na rani řilangi matan Křisto, <sup>30</sup> matan na levosahia vara ka lo lavi na rani řilangi sohen ka hitea isaku hin rani atu na lo toho peresi kamim, ale

nakerihi sohena na lo lavia na ima řilangi.

## 2

### *Tarea Ra Pa Usuri Na Posin Křisto*

<sup>1</sup> Matan ka lo sořotahi hin Křisto, vara te nomim retituetueni, teni ka nanau matan nona opoia mo lo toho isamim, teni ka tapala peresi na Tanumena, teni te opoia na mapumim teni te řomopoia, <sup>2</sup> ha mařivisi na noku avulahi sohen harihi: řomimim i matea, ha opoiopoi kamim, mapumim peresi na řomimim i matea na sava ha pa vaia, <sup>3</sup> ha sopo vai te hinau matan ka opoia vara ha pa jeu na tinapua, teni ha vai na hinau na řomaulu, pani na posposi řomatano, ha řomřomi na tinapua i jeu kamim. <sup>4</sup> Kamim hatehateahi, ha sopo řomřomi kamim hasemim purongo, pani na hinau i pa řuhu isana tinapua. <sup>5</sup> Romimim i pa sohena řomin Křisto Iesu, <sup>6</sup> hina purongo vara tiroma enia God tataholo, enia mo sopo řomřomia vara i taurilati řomřomi atu vara enia God, <sup>7</sup> pani mo hasena taua sivo atano mo mai sohena volitusi matea tataholo, ale mo vora mo mai mo sohena tamlohi purongo, <sup>8</sup> ale mo hasena taua sivo atano, ale mo oloolo mo kakau na nona mateia, mateia atu enia mateia sasati mata talai na talopeilopei matea. <sup>9</sup> Matan haratu, God mo tahea hin jara atu mata lavi na oloolo tavera jea,

mo silea hin hija atu mo aulu jea mo jeu na hija tari, <sup>10</sup> matan vara na hijan Iesu, tamlohi tari la pa papaohi, la haratu la lo toho na tuka, na varama peresi na jaran la haratu la mate na lolo varama, <sup>11</sup> ale meme tari la pa taviti vara Iesu Křisto enia Moli, hasohaso tari i pa sahe isan God Tamařa matana.

*Kamim Ka Malarani Na Varama*

<sup>12</sup> Matana, la tapalaku řuhuruhi hin rani atu na lo toho peresi kamim ka lo ololo tarea, ale nake, matan na sopo toho peresi kamim, i pa mele řuhu vara ha lo kilau mamahu vara ha vai na vavahinau nona tamlohi sei God mo jurira na posposi matahu peresi na savaravara, <sup>13</sup> matan God hasena sei mo lo vavahinau hin kamim, mo vai kamim vara ha avulahi vara ha vavahinau i usuri na sava mo opoia.

<sup>14</sup> Na vavahinau tari ka lo vaira, ha sopo ngutungutu teni ha vasvas, <sup>15</sup> matan vara i pa sopo te hinau vara tamlohi tinapua la eři tuvai kamim hinia. Ha toho na mauri vokevoke, i sohena natun God na livuhan pina haluhalu sei mo hehe, ale kamim ka lo mera sohena majou na varama. <sup>16</sup> Ha taurilati reti atu mo sile na mauri, matan vara a pa eři retihapahapa hin pongi atu non Křisto, vara noku vavahinau isamim la sopo vano hina purongo, <sup>17</sup> pani hina purongo vara mauriku i sohena wai malamalai

matea, ale i vano peresi na nomim rasua isan God, enau na avulahi vara a silea vara enřa tolu řa pa avulahi jara matea. <sup>18</sup> Ale mo řuhu vara ha avulahi matana sohena, ale ha avulahi peresiau.

*Paul I Pa Rule Timothy Isara*

<sup>19</sup> Na lo řomtoho vara a pa řule Timothy i vano isamim i pa sopo tuai, vara Moli Iesu i tinařihia, matan vara enau sohena a pa rongo i řuhu vara a rongo te sorasorahimim. <sup>20</sup> Matan mo sopo tea nike, řomina i tavera matamim sohen Timothy, matan enia mo opoia vara ha lo toho i řuhu. <sup>21</sup> Matan tamlohi tinapua mo isoiso la lo ale na masalora purongo, mo sopo masalon Iesu Křisto. <sup>22</sup> Pani kamim ka levosahi mamahuni na posposi řuhu non Timothy moiso, matan enia mo lo tueniau sohen natuku matea tataholo na vavahinau mata Retiřuhu. <sup>23</sup> Matana, na lo řomtoho vara a pa řulea nohorihi, pani a pa hitea vara i pa sohena sava isaku tako. <sup>24</sup> Ale hin Moli, na levosahia mo řuhu vara i sopo tuai enau sohena a pa mai.

*Paul Mo Rule Epaphroditus*

<sup>25</sup> Pani na lo řomřomia vara a pa mele řule Epaphroditus vano isamim. Enia voraike, tapalaku na vavahinau, ale tapala tamlohi vuro matea mata rasua, ale nomim vahařule, haratu ka lo řulea isaku vara i tueniau nike. <sup>26</sup> Matan enia mo opoia vara i mele hite

kamim, ale mo rongo mo sati matan ka rongoa vara enia mo rojo, <sup>27</sup> vara řuhu enia mo rojo, mariviti vara i mate, pani God mo řomopoia, mo sopo isana hasena, pani enau sohena, mo sopo opoia vara i vaiiau a rongo i sati aulu na noku rongo sati. <sup>28</sup> Matan haratu, na avulahi vara a mele řulea vano isamim, matan vara ha pa avulahi vara ha mele hitea, ale enau řomiku i sopo mele kaka hajavua hinia. <sup>29</sup> Ale, ha mele lavia mai isamim na hijan Moli na avulahi tavera. Ale mo tataholo vara ha sile na ololo isana tamlohi sohena, <sup>30</sup> matan mariviti i mate mata vavahinau non Křisto, matan mo hařehi na maurina vara i vai vevuhi na nomim vavahinau sei ka sopo eři vaia isaku.

### 3

#### *Vara A Levosahi Křisto Peresi Na Suihana*

<sup>1</sup> Mele hina tinapua la vorai peresi na vevorai, ha avulahi tavera matan Moli. Mo sopo te hinau hinia vara a mele uli la hinau sei na pete vereea isamim tiroma moiso matan la pa turuhoro kamim.

<sup>2</sup> Ha lo kilau la viriu sei, la tamlohi sasati atu la lo tai komokomo na epe tamlohi na taiřalihi.\* <sup>3</sup> Matan enřa natu, taiřalihi varařuhu, řa lo lotu na suihan Tanumen God, ale řa lo retihasohaso Křisto Iesu na sava mo vaia matařa, ale řa sopo mele tau na rasua na nořa vavahinau,

<sup>4</sup> hina purongo vara enau a eři tau na noku rasua na noku vavahinau sohera. Vara tea mo řomřomia vara i eři tau na nona rasua na nona vavahinau, enau na jeua, <sup>5</sup> enau na taiřalihi na rani mo limaravtolu na noku pongi vora, enau na tavgavuın Israel, tavgavuın Benjamin, enau Jew tataholo, usuri na Leu, enau Pharisee matea. <sup>6</sup> Ale na řilařilangi na noku rasua, na tipahi na vao kalesia non Iesu. Ale usuri na leu tataholo řuhu, tea i sopo eři tuvaiiau hin te hinau matana, <sup>7</sup> pani na noku kilakilau mata hinau vara la pa tueniau tiroma, nake matan hin Křisto, na hitera sohen hina purongo. <sup>8</sup> Aulu hin haratu, na levosahia vara hinau tari enira hina purongo na rani na lo kilau usurira peresi na hinau mo mele řuhu jea, enia vara a levosahi Křisto Iesu noku Moli, ale matan Křisto, na sopo mele tau na noku rasua na noku vavahinau tari, na hitera sohena utauta matan vara a lavi Křisto, <sup>9</sup> ale vara a pa toho isana, mo sopo matan na vai te hinau mo tataholo matan na lo usuri na Leu, pani vara a mai a tataholo na nahona mata noku rasua hin Křisto, hinau sei, God hasena mo vereea vara enau na tataholo mata noku rasua hinia, <sup>10</sup> matan vara a levosahi Křisto peresi na suiha nona sauteterahi, ale na opoia vara a sořotahi peresia na nona rani řilangi, ale a sohena na nona mateia,

\* **3:2:** viriu: Paul mo lo vere vara Jew enira viriu, enira haratu sei la řilangi vara la taiřalihi na tamlohi.

<sup>11</sup> ale, matan la hinau tari sei vara enau sohena, a pa lavi na sauteterahi na mateia.

<sup>12</sup> Na sopo vereā vara na pete lavi la hinau tari atu moiso, teni vara God mo vaiaua na tataholo vevuhi moiso, pani na lo tutunguia vara a lavi la haratu sei Křisto Iesu mo viřoniau matara. <sup>13</sup> La vorai peresi na vevorai, na sopo vereā vara na lavira noku moiso, pani hina aulu matea na lo tau na řomiku vara a vaia enia harihi: na sopo mele tauri na hinaun tuai, pani na lo kilau na hinau mo lo mai, <sup>14</sup> ale na lo tutunguia vara a kakau na isoisona, matan vara a lavi otori atu na tuka God mo toviau matana hin Křisto Iesu.

<sup>15</sup> Mo řuhu vara enřa sei řa jea na malele rasua, řa lo řomřomi sohena. Pani vara kilakilau non tea mo sopo sohena, God i pa vujangia vara sava na lo vereā mo tataholo isamim. <sup>16</sup> Hina aulu hin la hinau sei řa lavira moiso enia vara řa usuri na sava řa pete levosahia moiso vara la tataholo.

### *Tunguhi Na Palon Paul*

<sup>17</sup> La vorai peresi na vevorai, ha pulutahi ha tutungui na paloku, ale ha kilau mamahuni la haratu la lo hahau usuri tovongi sei kama lo sile kamim hinia. <sup>18</sup> Matan sohen na pete vereā isamim moiso, ale nake na lo mele vereā isamim na řomsati, vara tamlohi matuvana la lo hahau sohena meresahi na sava Křisto mo vaia na nona talopeilopei. <sup>19</sup> Isoisona enia la pa hase komora, nora god enia

masalora, la retihapahapa na nora vavahinau mata mahanuhānu, la lo tau na řomira na hinau mata varama purongo. <sup>20</sup> Pani enřa tamlohin tuka, ale řa lo kilau matan nořa Jujuri i pa tai ea, enia Moli Iesu Křisto, <sup>21</sup> enia i pa posi na epeřa la mai la tataholo na epena sei mo řuhuruhu jea, i pa vaia hin suiha atu sei mo lo vai na hinau tari la toho na ruhuruhuna.

## 4

<sup>1</sup> Matan haratu, la vorai peresi na vevorai, na lo opoi kamim, ale na opoia vara a mele hite kamim, matan ka vaiaua na avulahi, kamim sohena noku otori, ha turu řilangi hin Moli, la tapalaku řuhuruhu.

### *Romin Paul*

<sup>2</sup> Na usia řilangi vara Euodia enia Syntyche la avulahi hinira rua hin Moli. <sup>3</sup> Io, ale na lo usiho tapalaku řuhuruhu, o tueni la hařai atu, enira la lo voko jara matea peresiaua hin rani atu na lo vavahinau atu mata Retiřuhu peresi Clement peresi la tatua tapalaku atu mata vavahinau, la haratu sei hijara la lo toho na Puku mata Mauri.

<sup>4</sup> Ha avulahi hin Moli tarea, a mele vereā, ha avulahi jea! <sup>5</sup> Ha vujangi na nomim posposi řuhu isana tamlohi tari. Moli mo lo mai mariviti.

<sup>6</sup> Ha sopo řomkaka hin te hinau hatea, pani na hinau tari na nomim usiua isan God matan te hinau, ha vere meje isana, ale ha vere na

nomim opoia. <sup>7</sup> Ale vara ha lo vaia sohena, tamata non God atu tamlohi la sopo levosahia, i pa matahi na mapumim peresi na romimim hin Křisto Iesu. <sup>8</sup> Isoiso hinau la vorai peresi na vevorai, sava mo varařuhu, sava la tataholo mata sile na ooloo hinira, sava mo tataholo, sava mo vokevoke, sava mo řuhu, sava mo tataholo vara řa opoia, vara te posposi řuhu teni te hinau mata hasohaso, ha tau na romimim hinira. <sup>9</sup> Ale sava hinau, ka levosahia, ka lavia, ka rongoa, ale ka hitea hiniau, ha hahau hinira, ale God mata tamata i pa toho peresi kamim.

*Paul Mo Vere Meje*

<sup>10</sup> Na avulahi tavera hin Moli matan nake ka lo mele romromiau. Na levosahia vara ka romromiau, pani mo sopo te masapa vara ha eři vujangia. <sup>11</sup> Na sopo vere a haranike matan te noku opoia, matan na levosahi na malele vara a avulahi na sava mo masese na mauriku. <sup>12</sup> Na levosahi na mauri tilavono, na levosahi na mauri tavgav, na levosahi na hina luhu mata avulahi na hinau tari la mai na mauriku, vara a masu teni a marohati, vara tanga mo lo masurere, teni te rani na vejuveju. <sup>13</sup> A eři vai na hinau tari matan Křisto mo lo tueniau. <sup>14</sup> Pani ka meje tavera isamim matan ka lo tueniau na noku rani řilangi.

<sup>15</sup> Kamim mara Philippi ka levosahia vara na pongi tiroma ka rongoa na Retiřuhu, ale na rani na malue

Macedonia, mo sopo te vao kalesia tinapua vara i tueniau na silesilea, pani kamim hasemim purongo. <sup>16</sup> Matan na rani na lo toho Thessalonica, ka sohai na hinau vaha visa vara i tueniau. <sup>17</sup> Na sopo vere a matan na lo kilau mata silesilea, pani na opoia vara ha mele lavi na vua řuhuřuhu mata nomim posposi řuhu.

<sup>18</sup> Pani na lavi la otori sei ka sohaira mo mai isaku peresi Epaphroditus, ale hinau tari sei la marivi savulevule la jeu na noku opoia. Hinau sei ka vaia isaku mo sohena malamalai matea ponana mo řuhu, mo tataholo na nahon God, ale mo avulahi hinia. <sup>19</sup> Ale noku God, i pa sile kamim na hinau tari ka opoia i usuri na nona tavgav řuhuřuhu hin Křisto Iesu. <sup>20</sup> Isan God Tamařa, hasohaso i sahe isana mata rani tui tui, amen. <sup>21</sup> Ha sile na retiolooolo i vano isana tapuhi tari non God hin Křisto Iesu. La vorai kalesia nike, la lo toho peresiau, la sohai na nora retiolooolo isamim. <sup>22</sup> Tapuhi tari nike, la sohai na nora retiolooolo isamim, la haratu la lo vavahinau na lolo iman supe matan Rome sohena la opoia mo tavera vara ha levosahi na nora retiolooolo isamim. <sup>23</sup> Romřuhu non nořa Moli Iesu Křisto i pa lo toho na maurimim.

# Colossians

## Leta

### Paul Mo Ulia Isana

## Mara

### Colossae

## Leta Nike

Colossae enia taon tavera mo aulu na jara matan Asia Minor, mo lo toho Opae na vanuan Ephesus ale la asa asau. Paul mo sopo lo vano ea hin te rani, pani mo avulahi matan mo levosahia vara rasua nona kalesia ea hin Křisto mo lo mauri (1.3-7; 2.6-7). Epaphras mo vujangi na Retiřuhu isara tiroma, enia mara Colossae, pani enia mo pa lo toho na ima řilangi peresi Paul hin rani atu Paul mo uli leta nike. (1.14;4.3, 10, 18).

Tamlohi řořoha la mařivi hin jara atu (1.27), ale hai la lo lavi na řomřomi tinapua la sopo varařuhu (2.16-23). La jalio na retivarařuhu, la lo řomřomia lara tamlohi i pa mai i tataholo na nahon God vara i horo na masalo epena. La lo hasohaso na angelo peresi na suiha tinapua na tuka, pani Paul mo opoia vara la levosahi mamahunia vara Křisto mo aulu jea na suiha tari na jara tari, mo lo toho na tuka peresi God Tamana (3.1). Moiso matan vara la pa haso Iesu Křisto purongo.

### Hite Leta Nike

1. Reti Tiroma (1.1-2)
2. Usiisi Mata Vere Meje (1.3-8)
3. Křisto Peresi Na Nona Vavahinau (1.9-2.19)

4. Mauri Paro Hin Křisto (2.20-4.6)
5. Isoiso Retireti (4.7-18)

<sup>1</sup> Enau Paul, enau vahařule matea non Křisto Iesu na masalon God, peresi Timothy, enia voraiřa, <sup>2</sup> enau na lo uli leta nike isana tapuhi non God la vorai kalesia sei la řomturu řilangi hin Křisto atu Colossae, řomřuhu isamim peresi na tamata mo tai isan God Tamařa.

### Usiisi Non Paul

<sup>3</sup> Tarea kama lo vere meje isan God, Taman nořa Moli Iesu Křisto na rani kama lo usiisi matamim, <sup>4</sup> mo tapulo na rani kama rongo na sorasora mata nomim rasua hin Křisto Iesu peresi na nomim opoia isana tapuhi non God, <sup>5</sup> ka lo vaia sohena matan ka řomtoho na hinau God mo taua na tuka matamim, hara sei ka rongoa moiso na retivarařuhu na Retiřuhu, <sup>6</sup> Retiřuhu sei mo mai isamim, enia mo vano řalihi na varama, mo lo vua mo posi na tamlohi, ale mo talulu, sohen mo vaia isamim mo tapulo hin rani atu ka rongoa, ale ka levosahi mamahuni na řomřuhu non God, <sup>7</sup> sohen ka hitevosahia moiso isan Epaphras, voraiřa volitusi tinapua sei na nona vujangi na Retiřuhu isamim, enia mo lo řomturu řilangi na vavahinau non Křisto matamim, <sup>8</sup> ale mo vereia isamam sohena sava opoia non Tanumen God mo lo toho isamim.

<sup>9</sup> Ale matana, mo tapulo hin rani atu kama rongoa, kama lo usiusera tarea matamim, kama lo usia vara,

Tanumen God i sile kamim, na lelevosahi peresi na levosahi tari, matan vara ha pa levosahi mamahuni na masalon God, <sup>10</sup> matan vara ha pa hahau na mauri ŋuhu, sohena God mo avulahi hinia, ale ha vua na nomim vavahinau ŋuhu tari, moiso matana, ha pa levosahi God i mele ŋuhu jea.

<sup>11</sup> Kama lo usiusera vara ha pa ŋilangi na suiha tari na nona suiha tavera ŋuhuhuhu jea matan vara ha pa turu ŋilangi na nomim ŋomperavu peresi na nomim rani ŋilangi, ale na posposi mo avulahi ŋuhu, <sup>12</sup> ha vere meje isan Tama matan enia mo vai kamim ka tataholo vara ha lavi hinau atu God mo taua moiso mata nona tapuhi, haratu la mauri hin malarani atu retivaraŋuhu mo lo silea, <sup>13</sup> God enia mo jurifa na suihan ŋoŋoha, ale mo lavifa ŋa mai hin mauri atu non Natuna sei God mo aulu hinia,

#### *Kristo Enia God Tataholo*

<sup>14</sup> Ale hinia, God mo volituhua, mo ŋomi na noŋa hina sasati.

<sup>15</sup> Natun God enia niniun God, haratu ŋa sopo efi hitea, enia mo vora tiroma non God, ale mo aulu na vavahinau tari non God, <sup>16</sup> matan Kristo mo vai na hinau tari la pala, hinau tari na tuka peresi na varama, la haratu ŋa efi hitera peresi la haratu ŋa sopo efi hitera, suihan supe aulu teni suihan

moli, teni tamlohi aulu, teni la haratu la lo tauri na suiha, hin Natuna, hinau tari la pala na nona suiha matan vara la ololo hinia, <sup>17</sup> ale enia mo tiroma na hinau tari, ale hinia, hinau tari la lo toho la soŋotahi mo ŋuhu.

<sup>18</sup> Enia patu epena, epena enia vao kalesia tari, enia mo tiroma, enia mo tiroma hin la haratu la pa turu na mateia, matan vara enia i pa tiroma i aulu na hinau tari, <sup>19</sup> matan God mo avulahi vara enia i lo toho vevuhi hin Natuna, <sup>20</sup> ale hinia, God mo sari tamata na hinau tari na tuka peresi na varama na ŋaena na nona talopeilopei matan vara la pa toho na ruhuruhuna. <sup>21</sup> Ale tiroma moiso kamim ka vinano isan God, ale ka nona meresahi mata ŋomimim la vai kamim ka vai na vavahinau sasati, <sup>22</sup> ale nake natu, mo sari tamata na epena na nona mateia, ale mo vai kamim ka tapu ka vokevoke, ale tea i sopo efi tuvai kamim na nahon God, <sup>23</sup> vara tarea ha lo tauri ŋilangi na nomim rasua, vara ha sopo tinaŋihi na nomim ŋomtoho na retitauhi mata Retiŋuhu sei ka rongoa moiso, hara sei la lo retivujavujangia isana tamlohi tari na varama, hara sei enau na mai na volitusi matana.

#### *Vavahinau Non Paul*

<sup>24</sup> Nake na lo avulahi matan vara na epeku a lavi na rani ŋilangi matamim, na lo maŋivisi na sava mo vejuveju na rongohaji non Kristo na noku vavahinau na lo vaia mata epena, epena enia vao kalesia tari, <sup>25</sup> hara

sei God mo tauau vara a mai nona volitusi matana, mo viŕoniau matamim vara a vereuli vevuhi na Reti non God isamim, <sup>26</sup> ale řomřomi luhu atu God mo jarohia tuai tuai isana mahapi tamlohi, pani nake mo vujangia isana nona tapuhi, <sup>27</sup> isana tapuhi natu, God mo hatihia vara i vujangi na nona řomřomi luhu mata nona řomřuhu i malue na jara tavera matan vara tamlohi řořoha la pa levosahia vara mo řuhuřuhu jea sohena sava, řomřomi luhu sei enia harihi: Křisto mo lo toho hin kamim, enia pulo řomtoho atu mo vereva vara ha pa lavi na oloolo tavera jea peresia, <sup>28</sup> na lelevosahi atu Tanumena mo lo silea, kama lo retivujavujangi hin Křisto, ale kama lo retiřoaroahai isana tamlohi tari, ale kama lo vujangi na tamlohi tari, matan kama opoia vara kama pa sile na tamlohi tari isan God la jea hin Křisto. <sup>29</sup> Matan harihi, enau na lo vavahinau řilangi na malele tari a eři vaia, pani na lo vaia na suihan Křisto mo lo vavahinau řilangi hiniau.

## 2

### *Hasohason Křisto*

<sup>1</sup> Na opoia vara ha levosahi na noku kalvono tavera vara a matahi na řomimim peresi la haratu la lo toho Laodicea, moiso la haratu la sopo lo hite na nahoku hin te rani, <sup>2</sup> matan vara a eři retituetueni na mapura vara la mai na vao matea na nora opoia, matan vara la pa mařivi na levosahi řuhu sei

mo tai na levosahi mata hina luhu non God sei, enia natu, Křisto, <sup>3</sup> ale God mo jarohi na nona tavgav mata lelevosahi peresi na levosahi tari hin Křisto hasena.

<sup>4</sup> Na lo vere reti sei isamim matan vara tea i sopo halu kamim na nora retimemeji. <sup>5</sup> Hina purongo vara na sopo toho peresi kamim, pani řomiku mo lo toho isamim, ale na avulahi matan na hitea vara ka lo hase kilau kamim, ale ka lo turu řilangi na nomim rasua hin Křisto.

### *Křisto Mo Vairā Ra Materi*

<sup>6</sup> Matan haratu, sohen ka lavi Křisto Iesu sohena nomim Moli, ha hahau sohena nona tamlohi la lo hahau, <sup>7</sup> ha tau na warimim hinia, ha ulua hinia vara ha pa toho jejeu na nomim rasua usuri vujangi sei ka lo lavia moiso, ale tarea ha tatamahu mata vere meje isan God matana. <sup>8</sup> Ha lo kilau, mo sopo řuhu vara tea i tikauleji kamim na nora řomřomi purongo teni na nora retireti halu usuri na posposi tamlohi peresi na posposi mata tau na rasua na vui varama, pani la sopo usuri na vujangi hin Křisto, <sup>9</sup> matan hin Křisto, God mo lo toho vevuhi na epen tamlohi purongo, <sup>10</sup> ale mo vai kamim ka mařivi hinia, enia haratu mo patun la haratu la aulu tari peresi la haratu la lo tauri na suiha. <sup>11</sup> Ale hin Křisto, kamim ka taiřalihi, pani mo sopo taiřalihi atu na epemim, pani haratu Tanumena mo vaia sei mo tai nařihi na



nomim hehe na maurimim, <sup>12</sup> hinau atu mo masese hin rani atu ka paptijo hin Křisto, mo sohen God mo tavuni kamim peresia, ale ka mele turu na mauri paro peresia matan ka rasu na suiha tavera non God, haratu mo lo sauteterahi Křisto na mateia. <sup>13</sup> Tiroma ka lo mate mata nomim hehe matan mo sopo lo tai nařihi na masalo varama na maurimim, moiso nake God mo vai kamim ka mauri peresi Křisto matan enia mo řomi na nořa hehe tari, <sup>14</sup> Ale mo sohen nořa hehe la lo toho na pepa matea la lo tuvaiřa mo usuri na leu non Moses, pani God mo jarai nařihira mo lavi pepa atu mo vosaea na talopeilopei, <sup>15</sup> varařuhu, Křisto mo lavi nařihi na suiha isan la haratu la lo aulu tari peresi la haratu la lo tauri na suiha na varama, ale mo vaira la mahanuhanu na naho tamlohi hin rani atu na nona talopeilopei.

<sup>16</sup> Matan hinau sei ha sopo majinga vara tea i ari kamim mata hanhani teni na sava ka lo inua, teni matan te rani tavera, teni matan te rani tavera mata vitu paro teni te rani tapu hatea, <sup>17</sup> matan la hinau sei enira řořo hinau purongo mata hinau i pa pala, pani hinau atu mo mai moiso, enia Křisto. <sup>18</sup> Ha sopo majinga vara tea mo opoia vara i tau nařihi kamim na nomim rasua, matan enia mo lo vereea vara ka sopo hase tauhoro kamim hin te hinau, ale vara ka sopo lotu na angelo mo lo vereea vara mo hitera na nona

mavuhu, matan enia mo lo mangisi mata nona řomřomi varama purongo, <sup>19</sup> ale mo sopo sořotahi hin Křisto, enia natu, patu epena tari, pani enřa manmanina řilangi peresi na sořosořo epena, řa ulua řa sořotahi hinia matan řa lavi na ulua mo tai hin suiha atu God mo lo silea.

### *Mauri Paro Hin Křisto*

<sup>20</sup> Ale matan hin Křisto ka mate moiso, ale mo vai kamim ka materi na suiha vui sasati mata varama, ale mata sava ka pa lo řomřomi sohena tamlohi varama, ale ka lo ololo na leu sohen harihi: <sup>21</sup> "Ha sopo eři tauri hinau sei! Ha sopo eři hani hinau sei!" Ha sopo tikeli hinau sei!" <sup>22</sup> La retileu sei enira vujangi nona tamlohi purongo, ale i pa sopo tuai la hinau sei la pa tihai. <sup>23</sup> Varařuhu, tamlohi la pa hitea vara la retileu sei enira la hina lelevosahi na malele rasua tataholo, na posposi řomatano, peresi na hase tauhoro, pani la hinau sei la pa sopo eři tueni tea vara i horo na nona řomřomi hehe teni masalona.

## 3

### *Ha Kilau Matan Tuka*

<sup>1</sup> Matan God mo pete sau kamim na mauri paro peresi Křisto moiso, ha tau na řomimim hin mauri atu na tuka, hin jara atu Křisto mo lo sakele na jara suiha tavera atu na matuan God, *Psa 110.1.*

<sup>2</sup> ha tau na řomimim na hinau matan tuka, pani i sopo na hinau mata varama,

<sup>3</sup> matan kamim ka mate moiso, ale maurimim la lo jaro hi peresi Křisto hin God. <sup>4</sup> Maurimim la lo toho hin Křisto, ale hin rani atu i pa mai, kamim sohena, ha pa pala peresia na nona hasohaso tavera.

<sup>5</sup> Ale matan haratu, ha vilimatei na hina hehe mata varama na lolomim sohen harihi: mauri maji, posposi lumiha, řomusuri harai, masalo sasati, ale posposi hanmarua sei enia pulo hin au mata lotulotu vono, <sup>6</sup> matan talai lolokoru non God mata hehe mo lo mai isan la haratu la lo vai la hin au atu. <sup>7</sup> Kamim sohena, ka lo vaira na maurimim tuai hin rani atu ka pa lo toho na mauri varama. <sup>8</sup> Pani nake, ha tau narhi la hin au sei na vere a moiso, ale la hin au sohen harihi: lolokoru, lolokoru patumim, vaisatihi na tinapua, retisasati hin God, teni vara jingomim la retisasati teni varikali. <sup>9</sup> Ha sopo haluhalu kamim matan ka pete tau narhi mauri tuai atu moiso peresi na nona posposi hehe na maurimim, <sup>10</sup> ale ka pete lavi na mauri paro moiso sei tarea mo lo mele ulua na levosahi, ale mo lo mele posi mai tataholo na niniun haratu mo vai mauri paro sei. *Gen 1.26.*

<sup>11</sup> Nake, mo sopo te hin au vara tamlohi řořoha, teni Jew, teni haratu mo taiřalihi, teni haratu mo sopo taiřalihi, teni tamlohi řořoha, teni

tamlohi sasati mara Scythia,\* teni slev, teni tamlohi teri, pani Křisto enia patu hin au tari, ale enia mo lo mauri hinira mo isoiso.

### *Posposi Tamlohi Rasu*

<sup>12</sup> Ale matan kamim ka haratu sei God mo opoira, God mo viřonira, God mo tapuhira, ha ruru na řomopoia, řomřuhu na tamlohi tinapua, řomatano, řommalum, řomperavu, <sup>13</sup> Ale vara te vorai tinapua mo vai te hin au mo hehe isamim, ha řomperavu isana, ale vara tea mo vai te retireti matan te vonamim, ha řomia, matan Moli mo řomi kamim moiso, kamim ha pa hase řomi kamim. <sup>14</sup> Ale aulu hin la hin au nike, ha ruru na opoia matan enia mo lo sořotahi na hin au tari, ale ha pa eři turu jara matea. <sup>15</sup> Ale ha tutungui na tamata non Křisto i aulu na mapumim, matan God mo vai kamim ka vao epe matea, ale mo tovi kamim vara ha toho na tamata, ale vara tarea ha lo vere meje. <sup>16</sup> Ha lavi vevuhi na reti non Křisto na lolo mapumim, matan vara tarea ha eři tau na řomimim hinira. Ale ha vujangira isamim hasemim, ale ha vai-tataholoi kamim hatehateahi na malele lelevosahi tari, ale na lolo mapumim ha avulahi vara ha lalavete na vete mata psalm, ale vete la sile na hasohaso isan God peresi na vete Tanumena mo silera na řomimim. <sup>17</sup> Ale vara sava

\* **3:11:** teni tamlohi řořoha, teni tamlohi sasati mara Scythia: Tamlohi řořoha la tamlohi sei la sopo levosahi na leon mara Greek, ale mara Scythia la lavi na hija mata vilimatei na tamlohi.

ka lo vaia teni ka lo vereā, ha sopo řomaliho vara kamim ka tamlohi non Moli Iesu, ale tarea ha vere meje isan God Tama hinia.

*Retireti Mata Posposi Oloolo*

<sup>18</sup> Hařai lahi, ha oloolo na tuamim matan enia mo tataholo na nahon Moli, <sup>19</sup> tamlohi lahi, ha opoi na naroumim, ale ha sopo vai na hināu řilangi isara. <sup>20</sup> Natuvarihi, ha oloolo na tamamim peresi na tinamim na hināu tari, matan haratu enia God mo avulahi hinia. <sup>21</sup> Tama, ha sopo plele na natumim, vara i vono, la pa maloko vara la tapurongo isamim.

<sup>22</sup> Kamim slev, tarea ha lo oloolo na nomim tamlohi tavera nike na varama, ha sopo vaia mata tamlohi purongo, teni ha vaia mata řom tamlohi tinapua i avulahi hin kamim, pani, ha vaia varařuhu na mapumim matan ka lo sile na oloolo tavera isan Moli. <sup>23</sup> Sava vavahināu ka lo vaia, ha vaia na mapumim sohena vara non God, mo sopo nona tamlohi, <sup>24</sup> matan ka levosahia vara Moli i pa sile na korumim sohena nomim otori. Ka lo volitusi isan Moli Křisto, <sup>25</sup> matan ka levosahia vara haratu mo lo vai na hina sasati i pa lavi na voli hina sasati mo vaia, matan God mo sopo tametame tea.

*Deut 10.17; Eph 6.9*

**4**

<sup>1</sup> Kamim la tamlohi tavera, ha kilāu mamahuni na nomim slev na posposi

řuhu, matan kamim sohena, ka levosahia vara nomim tamlohi tavera sei, Moli na tuka, mo lo kilāu kamim.

*Usiusi Matan Paul*

<sup>2</sup> Ha turu řilangi na nomim usiusi, ha řomřomi mamahuni na sava ka lo usiusi matana, ale ha vere meje na mapumim i vano isana, <sup>3</sup> ha usiusi matamam sohena, ha usiusi vara God i sile te masapa matan vara kama pa vereuli na nona retisohai sei mo lo vujangi na nona řomřomi luhu hin Křisto, haratu natu, na lo toho na ima řilangi matana, <sup>4</sup> ha usiusi matakū vara a pa vereulia i pa memera i řuhu na malele God mo opoia. <sup>5</sup> Ale mo řuhu vara ha sopo toho purongo na nahon tamlohi atu la sopo rasua, pani ha lo usuri na posposi tataholo non Moli. <sup>6</sup> Mo řuhu vara tarea na nomim retireti, ha retiholoholo, ha řomřomi na sava reti ka vereā, ale ha pa tatamahu vara ha pa řarami mamahuni na tamlohi hatehateahi sohena sava.

*Retioloolo Isan Tapalan Paul*

<sup>7</sup> Tychicus voraiřa atu enřa řa opoia, enia tapalaku volitusi matea non Moli, tarea mo lo řomturu řilangi na vavahināu non Moli, enia i pa sorahi na sava na lo vaia isamim, <sup>8</sup> ale na lo řule Tychicus isamim matan haratu, vara ha pa levosahia vara kama lo toho sohena sava, ale vara i eři retituetuēni na mapumim, <sup>9</sup> moiso Onesimus

mo lo usuri Tychicus, enia voraiŕa matea, ŕa opoia mo ŕomturu ŕilangi, enia vonamim matea, ale la pa sorahi na sava hinau kama lo vaira nike.

<sup>10</sup> Aristarchus, enia mo lo toho peresiau na ima ŕilangi nike, mo sile na nona retioloolo isamim, moiso Mark atu vorain Barnabas, korong ka lavi te reti moiso vara i pala isamim, ale ha pa lavia, <sup>11</sup> peresi na tamlohi matea hijan Iesu la lo tovia Jastas. La harihi tupu visaletе purongo na Jew tari la lo vavahinaiu matan mauri atu God mo aulu hinia peresiau nike, ale na avulahi tavera mata enira la lo tuenaiu. <sup>12</sup> Epaphras, enia vonamim matea, enia volitusi non Kŕisto Iesu, mo sile na retioloolo isamim, mo lo usiisi ŕilangi tarea matamim na nona usiisi matan vara ha pa mai ha pa jea, ale ha levosahi mamahuni na masalon God. <sup>13</sup> Enau a eŕi vereia isamim vara enia mo lo vavahinaiu ŕilangi matamim peresi la haratu Laodicea peresi la haratu Hierapolis. <sup>14</sup> Doctor Luke voraiŕa sei ŕa opoia, peresi Demas, enira la sile na nora retioloolo isamim. <sup>15</sup> Ha sile na noku retioloolo isana vorai kalesia atu Laodicea, ale isan haŕai atu Nympha peresi na vao kalesia la lo matavuhi na imana. <sup>16</sup> Ale vara ka evi leta nike isamim mo isoiso, ha mele evia isana vao kalesia la lo matavuhi Laodicea. Ale mo ŕuhu vara ha evi leta atu na pete sohaia tiroma moiso isan la haratu

Laodicea. <sup>17</sup> Ale ha vereia isan Archippus vara, “O vaihitea vara o vai maŕivisi na vavahinaiu non Moli sei mo lo silea isam.” <sup>18</sup> Enau Paul na lo uli la retioloolo nike na limaku haseku.

Ha sopo ŕomaliho vara enau na lo toho na ima ŕilangi, ale ŕomŕuhu non God i pa toho isamim.

# 1 Thessalonians

## Tiroma Leta

### Paul Mo Ulia Isana

### Mara

## Thessalonica

### Leta Nike

Paul mo tapulo na vao kalesia Thessalonica (2.13-14), ale mo sopo kilau matan te mania, pani mo lo hani na masumasuna (2.9). Tiroma, la kalesia atu la lo lotulotu vono (1.9), pani nake la turu řilangi hin Moli, ale mata nora ooloo, Retiřuhu mo vano řalihi hin jara atu (1.8).

Tamlohi hai atu, la turuleji hin Paul, ale mo rovo mo vano Athens, pani mo řule Timothy mo vano vara i rohira Thessalonica (3.1-5). Timothy mara mo mele hilu, mo vereea isan Paul mara la lo turu řilangi ale vara la lo hahau na opoia (3.6-10).

Kalesia hai Thessalonica la sopo voko, la lo toho purongo matan la lo řomřomia vara i pa sopo tuai Moli i pa mele pala na varama (4.11-12). Hai la lo řomkaka matan te vonara la mate moiso pani Křisto mo sopo lo pala, la pa mele turu teni mo vono? (4.13-15), Paul mo retinanauhira, mo vereea mara la lo hahau usuri na masalon God tarea (5.1-11).

Mo řuhu vara tarea řa lo řomřomi na sava Paul mo vereea akerihi:

‘Ha avulahi tarea, ha lo tatamahu mata usiusi tarea, ha vere meje mata hinu tari, matan harihi enia masalon God hin

Křisto Iesu matamim.’  
(5.16-18)

### Hin Leta Nike

1. Retioloolo (1.1-3)
2. Tovongi mata rasua nona Kalesia Thessalonica (1.4-3.13)
3. Mauri atu God mo avulahi hinia (4.1-12)
4. Vara Moli i mele pala (4.13-5.11)
5. Isoiso Retioloolo (5.12-28)

1 Enau Paul na uli leta nike isamim vao kalesia sei Thessalonica, na hijan God Tama peresi Moli Iesu Křisto, Silas peresi Timothy la lo toho peresiau nike.

Romřuhu peresi na tamata i pa toho isamim.

### Nora Rasua

2 Kama lo vere meje isan God tarea matamim mo isoiso na nomam usiusi, 3 kama lo vere kamim isan nořa God Tamařa, mata nomim voko sei ka lo vaira mata nomim rasua, ale mata nomim vavahinau sei ka lo vaira mata nomim opoia, peresi na nomim turu řilangi tarea sei ka lo vaia matan ka lo řomtoho matan nořa Moli Iesu Křisto.

4 La voraiiku peresi na vevoraiku řuhuru, God mo opoi kamim, ale kama levosahia mo řuhu vara God mo viřoni kamim, 5 matan nomam Retiřuhu mo mai isamim, mo sopo mai na retireti purongo, pani mo mai peresi na suiha matan Tanume Tapu mo tueni kamim matan vara ha pa levosahia i řuhu vara Retiřuhu enia mo varařuhu. Kamim ka levosahia mo řuhu vara

posimam hin rani atu kama lo toho isamim mo sohena sava matamim, <sup>6</sup> ale ka lo tovongi kamam peresi Moli matan kamim ka lavi na Retiruhu, hina purongo vara ka lavi na rongohaji sasati matana, pani ka avulahi na avulahi non Tanume Tapu, <sup>7</sup> matan ka mai sohena tovongi matea isana tamlohi rasua tari Macedonia peresi Achaia. <sup>8</sup> Mata reti non Moli sei mo lo malue isamim mo roroa Macedonia peresi Achaia, ale nomim rasua hin God mo roroa na jara tari, ale mo vaia kama sopo efi mele vere te hinau mata nomim rasua isara. <sup>9</sup> Matan enira hasera la lo mele vere vara ka lavi kamam na posposi ruhu sohena sava na nomam hahau. La vere sohena sava ka vahaŋi na tamasi, ale ka posi ka vano isan Moli matan vara ha volitusi isan God varaŋuhu sei mo lo mauri, <sup>10</sup> ale ka lo saovi matan Natuna sei i pa tai na tuka, God mo sauteterahia na mateia, Iesu, enia mo juriŋa na talai lolokoru non God mata hehe sei mo lo mai.

## 2

<sup>1</sup> Kamim ka levosahia mo ruhu la voraiku peresi na vevoraiku ruhuŋuhu, vara nomam mai isamim mo sopo vano hina purongo. <sup>2</sup> Pani hina purongo vara kama lavi na rongohaji moiso na nora vailejleji hin kamam Philippi, sohen ka levosahia, pani kama lo turu ŋilangi hin noŋa God vara kama lo vereuli na Retiruhu non God isamim na livuha rani

ŋilangi. <sup>3</sup> Matan nomam ngurunguru matamim, mo sopo malue na hinau mo sopo tataholo teni na hina lumiha, teni vara kama vaihitea vara kama halu, <sup>4</sup> pani matan kama lo retireti sohena vahaŋule sei God mo majinga hin kamam vara kama lavi na Retiruhu. Kama sopo vaia matan vara tamlohi la pa avulahi hin kamam, pani vara God i avulahi, enia natu, haratu mo lo ariŋa vara ŋa lo vai te vavahinau mata sava. <sup>5</sup> Matan kama sopo mai isamim mata haruharu sohen ka levosahia, teni vara kama tapala peresi kamim mata mania, haratu God mo levosahia, <sup>6</sup> ale kama sopo ale na hasohaso nona tamlohi, mo sopo isamim teni isan te tinapua, <sup>7</sup> hina purongo vara mo tataholo vara kama usi te hinau isamim matan kamam kama vahaŋule non Kŋisto. Pani kama mai isamim na posposi malum sohena haŋai vasusu matea mo lo susui na natuna, ale mo lo kilaura. <sup>8</sup> Ale matan kama opoi kamim mo tavera, mo vai kamam kama avulahi vara kama sile kamim na Retiruhu non God, ale maurimam sohena, kama silera isamim, matan ka mai ka vorai ruhuŋuhu isamam.

<sup>9</sup> Matan ka levosahia la voraiku peresi na vevoraiku ruhuŋuhu, vara na rani kama lo retivujavujangi isamim, kama voko ŋilangi na rani peresi na vutepongi mata mania matan vara kama sopo tau te tetehi isan te vonamim. <sup>10</sup> Kamim ka levosahia, ale God mo levosahia

vara nomam posposi mo tapu isamim sei ka rasua, ale mo tataholo sohena sava, ale mo sopo te hinau i sati vara tea i pa efi pisuhi kamam hinia. <sup>11</sup> Matan ka levosahia vara mo sohena sava isana tata matea peresi natuna, <sup>12</sup> kama lo ngurunguru hin kamim, ale kama lo retituetueni kamim, ale kama lo verea rilangi vara ha hahau na mauri sei God i pa avulahi hin kamim hinia, enia natu, mo tovi kamim vara ha mai hin nona mauri atu enia mo supe hinia peresi na hasohasona.

<sup>13</sup> Ale kama lo vere meje isan God tarea matan hin rani atu ka lavi na reti non God isamam, ka sopo lavia sohena retireti nona tamlohi purongo, pani reti non God varaŕuhu, ale mo lo vai na nona vavahinau hin kamim sei ka rasua.

<sup>14</sup> Matan kamim ka vorai kalesia ruhuŕuhu, ka tovongi na vao kalesia tinatinapu hin Křisto Iesu non God hin Judea, matan ka lavi na rani rilangi isana tahisamim mo sohena tamlohi rasua Judea la lo lavia isana Jew.

<sup>15</sup> Enira la haratu sei la vilimatei Moli Iesu peresi na pŕovet, la levuti naŕihi kamam, ale God mo sopo avulahi hinira, ale enira la lo turuleji na tamlohi tari, <sup>16</sup> matan la turuhoro kamam vara kama sopo retireti isana tamlohi ŕoŕoha matan vara la pa juri. Hin posposi akerihi tarea la lo takonahi na nora hehe mo sahe vara i maŕivi, pani talai lolokoru non God

mata hehe i pa jovi vevuhi isara.

### *Romŕomi Non Paul*

<sup>17</sup> Pani la vorai peresi na vevorai ruhuŕuhu, mo tapulo hin rani atu la lavi naŕihi kamam isamim mata makomo rani – ka sopo mele hite na nahomam, pani mapumam la lo toho isamim. Ale matan kama opoia mo tavera vara kama efi mele mai isamim, kama vaihitea mo rilangi matan vara kama mele mai. <sup>18</sup> Matan kamam kama opoia vara kama mele mai isamim, varaŕuhu enau, Paul na opoia vaha visa, pani Setan mo lo turuhoro kamam. <sup>19</sup> Matan sava natu, enia nomam ŕomtotoho teni avulahi teni ŕongoŕongo nona supe kama pa avulahi tavera hinia na nahon Moli Iesu hin rani atu vara i pala? Enia kamim. <sup>20</sup> Varaŕuhu, kamim ka nomam hasohaso peresi na nomam avulahi.

## **3**

<sup>1</sup> Matan haratu, kama sopo efi mele taurilatia i peravu, ale kama hatihia vara kamam hasemam, kama pa lo toho Athens, <sup>2</sup> Ale hitahu kama ŕule Timothy voraimam enia mo tapala na vavahinau non God mata sohahi na Retiŕuhu non Křisto, vara i vai kamim ha rilangi i retituetueni kamim na nomim rasua, <sup>3</sup> matan vara i pa sopo tea i ŕomkaka na rani mata vaihite. Ka levosahi mamahunia vara God mo viŕoni na rani mata vaihite vara la pa vaihiteŕa. <sup>4</sup> Ka levosahia, na rani kama lo

toho peresi kamim, kama lo vereā isamim moiso vara řa pa lavi na nora tipahi, ale ka levosahia vara la pala.

<sup>5</sup> Matan haratu, na sopo eři mele taurilatiau i peravu, ale na lo řulea vara i pa to hitea vara nomim rasua mo lo so-hena sava. Na matahu vara korong hin te malele Tiapolo mo halu kamim moiso, ale nomam kalvono korong la vano hina purongo. <sup>6</sup> Pani Timothy mo pa pala isamam nakerihi, mo tai isamim, ale mo lavi na reřiruhu mo vereā mara, nomim rasua peresi na nomim opoia la lo řilangi. Mo vere kamam hinia vara tarea ka lo řomřomi na nořa rani řuhu, ale vara kamim ka opoia jea vara ha mele hite kamam, sohen kamam kama opoia vara kama mele hite kamim. <sup>7</sup> Matan haratu la voraiku peresi na vevoraiku řuhuřuhu, hina purongo vara kama lo lavi na rani řilangi řavera peresi na rongohaji, nomim rasua mo vai kamam kama avulahi. <sup>8</sup> Ale nake, mauri mo mele řuhu isamam matan kama levosahia vara kamim ka lo turu řilangi hin Moli.

<sup>9</sup> Kama pa vere meje isan God i tataholo sohena řava matamim, matan ka vai kamam kama avulahi na nahon nořa God matamim. <sup>10</sup> Tarea kama lo usiusi řilangi vara kama pa eři mele hite kamim, ale kama řile kamim na řava ka vejuveju hinia na nomim řasua. <sup>11</sup> Nake nomam usiusi vara nořa God Tamařa hasena, peresi nořa Moli Iesu i vai na malele tataholo vara kama mai isamim.

<sup>12</sup> Kama lo usiusi vara Moli i vai na nomim opoia i ulua, ale i mařivi savulevule matamim hatehateahi peresi na tamlohi tari tinapua, sohen nomam opoia mo vaia matamim. <sup>13</sup> God i pa vai na mapumim la řilangi matan vara tea i pa sopo eři tuvai kamim hin te hinau, ale ha tapu na nahon nořa God enia Tamařa hin rani atu nořa Moli Iesu i pa mai peresi na nona tamlohi tapu.

## 4

### *Posposi Atu God Mo Opoia*

<sup>1</sup> La voraiku peresi na vevoraiku řuhuřuhu, mele hinau matea, hin rani atu kama lo toho peresi kamim, kama vujangi kamim vara ha pa hahau sohena sava na maurimim vara ha vai God i avulahi, ale ka lo usuria sohena. Ale nake na hijan Moli Iesu, kama vere kamim vara ha lo ulua i řavera hinia. <sup>2</sup> Matan ka levosahi vujangi atu kama lo taua na limamim moiso na suiha non Moli Iesu. <sup>3</sup> Matan masalon God mo sohen harihi, vara maurimim la vokevoke, ale ha toho asau na mauri maji, <sup>4</sup> ale vara kamim hatehateahi ha levosahi na malele mata hase kilau mamahuni na epemim na malele tapu vara tamlohi la pa hasohaso kamim matana, <sup>5</sup> mo sopo na masalo epemim sohena tamlohi řořoha la lo vaia.

<sup>6</sup> Ha sopo vai te hehe sei isan te voraimim kalesia hatea, teni ha halua hin malele akerihi, matan God i pa sile na talai isana tamlohi



sohena, vara la lo vai na hina sati sohen harihi, sohen kama pete sile na nomam retireti řilangi isamim matara moiso.

<sup>7</sup> Matan God mo sopo toviřa mata mauri mo lumiha, pani vara řa hahau na mauri vokevoke řuhu. <sup>8</sup> Matan haratu, vara tea mo řohu hin la vujangi nike, mo sopo řohu na tamlohi, pani mo lo řohu hin God sei mo lo sileřa na nona Tanume Tapu.

<sup>9</sup> Nake, na posposi vorai la opoiopaira, kama sopo opoia vara kama mele uli te hinau isamim matana, matan kamim God mo vujangi kamim moiso vara ha opoiopoi kamim.

<sup>10</sup> Ale varařuhu, kamim ka opoi na vorai kalesia tari řalihi Macedonia. Ale la voraiiku peresi na vevoraiku řuhuřuhu, sava ka lo vaia mo řuhu, pani ha mele ulua i tavera hinia.

<sup>11</sup> Ha tau na řomimim vara ha usuri na mauri malum, ha sopo sohai na ngalsumim na hinau non tinapua, ha hani na masmasumim hasemim sohena kama vereaa isamim, <sup>12</sup> matan vara la haratu la sopo rasua la pa hitevosahia na nomim hahau, ale la hasohaso kamim matana, matan vara ha pa sopo řomtoho na tinapua.

### *Rani Sei Moli I Pa Mele Mai Hinia*

<sup>13</sup> La voraiiku peresi na vevoraiku řuhuřuhu, kama sopo opoia vara ha sopo levosahia vara i pa sohena sava isan la haratu la mate moiso teni vara ha tangi sohen la haratu sei mo sopo te nora řomtoho. <sup>14</sup> Ra rasua

vara Iesu mo mate, ale mo mele turu, ale řa rasua vara God i pa vai la haratu la mate moiso hin Iesu, la pa mai peresi Iesu.

<sup>15</sup> Sohen Moli mo hase vereaa, kama vereaa isamim vara enřa sei řa pa lo mauri, vara řa pa toho i tikeli rani atu Moli i mele mai, řa pa sopo tiroma hin la haratu la mate moiso, <sup>16</sup> matan Moli hasena, i pa tai na tuka i sinai i ulo na retileu, peresi na leo supe nona angelo matea, ale peresi na roroa trumpet non God, ale la haratu la mate hin Křisto la pa turu tiroma.

<sup>17</sup> Ale hitahun haratu, enřa sei řa pa lo mauri, ale řa pa lo toho, řa pa sahe peresira aulu na telangi vara řa pulutahi peresi Moli na masapa, ale řa pa toho peresi Moli tui tui.

<sup>18</sup> Matana, ha retituetueni kamim hatehateahi hin la reti nike.

## 5

### *Isoiso Rani*

<sup>1</sup> Ale nake, la voraiiku peresi na vevoraiku řuhuřuhu, kama sopo opoia vara kama uliuli isamim matan la rani sei, <sup>2</sup> matan ka levosahia mo řuhu moiso vara rani atu vara Moli i pa mele mai hinia i pa sohena tamlohi vavanaho matea mo mai na vutepongi.

<sup>3</sup> Vara tamlohi la lo vereaa lara, 'Tamata mo lo toho, ale řa tatamahu!' Vahatea purongo, komokomo i pa jovi isara, sohena haři varihaji isana hařai mata lavilavi. La pa sopo eři rovo.

<sup>4</sup> Pani kamim la voraiku peresi na vevoraiku űuhufuhu, ka sopo toho na űoűoűa matan vara rani atu i vai kamim ha pa hutu kamim sohena ka hutu kamim na tamlohi vavanaho matea. <sup>5</sup> Kamim mo isoiso ka natun malarani, ale nomim hahau enia mata rani. Enűa űa sopo mata vutepongi teni mata űoűoűa. <sup>6</sup> ale matana, űa sopo sohena tatuara sei la lo juruvi, pani űa tatamahu, ale űa hase taurilatira. <sup>7</sup> Matan la haratu la lo juruvi, la juruvi na vutepongi, ale la haratu la lo putu na wai űilangi, la putu hinia na vutepongi. <sup>8</sup> Pani matan enűa űa tamlohi mata malarani űa hase taurilatira tarea, űa ru na rasua peresi na opoia sohena ruru mata tingting matea, ale nomim űomtoho mata juri i pa sohena hat matea mata vuro. <sup>9</sup> Matan God mo sopo viűoniűa vara i pa sile na nona talai lolokoru mata hehe isaűa, pani matan vara űa lavi na juri hin noűa Moli Iesu Kűisto. <sup>10</sup> Enia mo mate mataűa matan vara hina purongo vara űa lo kilau teni űa juruvi, űa pa toho peresia. <sup>11</sup> Matan haratu, ha retituetueni, ale ha tueni kamim hatehateahi sohen ka lo vaia nake.

### *Isoiso Retireti*

<sup>12</sup> Nake kama lo usi kamim la vorai peresi na vevorai űuhufuhu vara ha sile na ololo isan la haratu la lo voko űilangi isamim, haratu la aulu hin kamim hin Moli, ale la lo retiűoűoűahai kamim. <sup>13</sup> Matan sava la lo vaia ha silera na ololo

tavera na opoia mata nora voko. Ale ha sopo vasvas peresi na tinapua. <sup>14</sup> Ale kama lo usia űilangi isamim la voraiku peresi na vevoraiku űuhufuhu vara ha retiűoűoűahai la haratu la maloko, ha retituetueni la haratu la matahu, ha tueni la haratu la sopo suiha, ha űomperavu isan tamlohi tari. <sup>15</sup> Ha lo kilau matan tea i sopo kele na hehe peresi na hehe, pani tarea ha vaihite vara ha vai na posposi űuhu isamim hatehateahi, ale isana tamlohi la sopo rasua.

<sup>16</sup> Ha avulahi tarea, <sup>17</sup> ha lo tatamahu mata usiusera tarea, <sup>18</sup> ha vere meje mata hinai tari, matan harihi enia masalon God hin Kűisto Iesu matamim.

<sup>19</sup> Ha sopo vuni na hapu Tanumen God, <sup>20</sup> ha sopo hitelehilehi na sava tamlohi rasua tinapua mo vere vara Tanumen God mo vujangia isana. <sup>21</sup> Pani ha tapurongo hinia, ale ha vaihite na sava mo vere vara la varaűuhu teni, ale ha taurilati na sava mo űuhu. <sup>22</sup> Ha toho asau na hinai tari la sasati.

### *Usiusera Non Paul*

<sup>23</sup> Nake God mata tamata, enia hasena i pa vai kamim ha tapu vevuhi, God i pa vai mamahuni na tanumemim, na maurimim peresi na epemim matan vara la pa toho vokevoke, ale tea i sopo eűi tuvai kamim hin te hinai na mele mai nona noűa Moli Iesu Kűisto. <sup>24</sup> Haratu sei mo tovi kamim enia i pa sopo eűi tope na nona retitauhi, varaűuhu enia i pa vaia.

<sup>25</sup> La voraiku peresi na vevoraiku řuhuřuhu, ha usiusi matamam.

<sup>26</sup> Ha sile na retioloolo mata opoia isana vorai peresi na vevorai řuhuřuhu tari.

<sup>27</sup> Na lo retileu isamim na nahon Moli vara ha evi leta nike isana vorai kalesia mo isoiso.

<sup>28</sup> Romřuhu non nořa Moli Iesu Křisto i pa lo toho isamim.

## 2 Thessalonians

### Harua Leta

### Paul Mo Ulia Isana

### Mara

### Thessalonica

### Leta Nike

Hin leta nike Paul mo lo vere meje isan God matan nora rasua mo lo ulua (1.3), hina purongo vara la lo lavi na rani řilangi, pani Paul mo vere mara God mo lo vaihite na nora rasua (1.4-5).

Kalesia hai Thessalonica la lo řomřomia lara Paul mo sohai na leta isara moiso mara Moli mo mele pala moiso (2.2). Pani mo vono, Paul mo retiřoãroãhaira vara la sopo tinařihia vara tea i řalura sohena matan Iesu i pa sopo pala matan te hinau la pa masese tako (2.3-12).

Paul sohena mo lo retiřoãroãhaira matan vara la sopo toho purongo (3.6-10), ale vara la lo kilau vara tea i řohu vara i oloolo na nona reti hin leta nike.

Paul mo vere mara God i pa sile na talai tavera isan la haratu sei la řohu vara la rasu na nona reti hin pongi atu mo lo mai:

‘Ale matana, God i pa sohai na hina haluhalu isara, matan vara la pa rasu la hinau haluhalu atu. Matan vara enira mo isoiso la pa lavi na talai matan la sopo rasu na retivararũhu, matan la lo avulahi na hehe la lo vaira.’ (3.11-12)

#### Hin Leta Nike

1. Retioloolo (1.1-2)
2. Moli i pa ari na varama (1.3-12)

3. Moli mo sopo mele pala (2.1-12)
4. Turu řilangi tarea (2.13-17)
5. Ha usiusi, ha voko (3.1-15)
6. Isoiso usiusi (3.16-18)

#### *Tiroma Reti*

<sup>1</sup> Enau Paul na uli leta nike isamim vao kalesia Thessalonica hin God Tamařa peresi Moli Iesu Křisto, Silas peresi Timothy la lo toho peresiau nike.

<sup>2</sup> Romřuhu peresi na tamata mo tai isan God Tama peresi Moli Iesu Křisto i pa toho isamim.

#### *Paul Mo Vere Meje*

<sup>3</sup> La vorai peresi na vevorai, tarea mo tataholo vara kama vere meje isan God matamim, ale mo tataholo matan nomim rasua mo lo ulua mo tavera, ale nomim opoia isamim hatehateahi mo lo tavera jea. <sup>4</sup> Mo vai kamam kama lo retihapahapa matamim isana vao kalesia tinapua sei la rasu God mata nomim turu řilangi peresi na nomim rasua na rani tipahi tari peresi na rani řilangi ka lo lavira. <sup>5</sup> Harihi mo vujangi na aria tataholo non God, matan vara i vai kamim ha tataholo mata ha lavi mauri atu God mo aulu hinia, sei ka lo lavi na rani řilangi matana. <sup>6</sup> Matan mo tataholo vara God i sile na rani řilangi isan la haratu sei la lo sile na rani řilangi isamim, <sup>7</sup> ale God i pa sile na mapu isamim sei ka lo lavi na rani řilangi sohemam hin rani atu Moli Iesu i pala na tuka. Enia i pa mai peresi na nona angelo

suiha jea, <sup>8</sup> na pepe hapu tavera jea vara i lavi na talai tavera i silea isan la haratu la sopo levosahi God peresi la haratu sei la lo ōhū vara la oloolo na Retiŕuhu non noŕa Moli Iesu. <sup>9</sup> Nora talai i pa vaikomokomora i sopo te isoisona, la pa toho mata rani tui tui hasera asau na nahon God peresi na mera suihana tavera jea, *Isa 2.10* <sup>10</sup> hin rani atu vara Iesu i mele mai vara i lavi na hasohaso isana nona tapuhi sei la tau na nora rasua hinia, la pa maŕurahi tavera matana, matan ka lo rasu na nomam retisohai isamim.

<sup>11</sup> Matan haratu kama lo usiusi tarea vara noŕa God i pa vai kamim ha tataholo mata lavi mauri atu mo tovi kamim matana, ale matan vara i tueni kamim na suihana mata vai vevuhi na nomim hinau ŕuhu tari peresi na vavahinau ka lo vaira mata rasua, <sup>12</sup> matan vara hijan noŕa Moli Iesu i pa lavi na hasohaso hin kamim, ale kamim hinia, i usuri na ŕomŕuhu non noŕa God peresi Moli Iesu Kŕisto.

## 2

### *Tamlohi Enia Meresahi Nona Leu*

<sup>1</sup> Ale nake, mata mele mai non noŕa Moli Iesu Kŕisto peresi na noŕa pulutahi isana, la vorai peresi na vevorai, kama lo usi kamim <sup>2</sup> vara ha sopo hisuhisu na ŕomimim teni ha matahu matan ka rongo te reti non

te tanume, teni te sorasora, teni te leta la vereea vara mo tai isamam, mo lo vereea vara rani non Moli mo mai moiso. <sup>3</sup> Ha sopo tinaŕihira vara tea i halu kamim hin te malele, matan rani atu i pa sopo efi mai, i tiroma hin rani tavera atu tamlohi la pa vahaŕi hin God hinia, ale rani pala nona tamlohi vaivaileu atu i pa usuria. Tamlohi atu, God i pa vaikomokomoa. <sup>4</sup> Enia i pa hase tahea aulu, ale i pa turuleji isana hinau tari sei tamlohi la tovira vara God teni te hinau mata lotu. Enia i pa sakele na lolo Temple, ale i vereea vara enia God. *Dan 11.36; Ezek 28.2*

<sup>5</sup> Ka ŕomaliho vara na vere kamim hin la hinau atu hin rani atu na pa lo toho peresi kamim? <sup>6</sup> Ale nake natu, ka levosahi na sava mo lo turuhoroa matan i pa sopo eŕi malue na jara tavera i tikeli rani atu God mo viŕonia matana. <sup>7</sup> Matan, suiha luhu atu mata vaivaileu mo pete voko moiso, pani i pa lo luhu i tikeli rani atu God i pa lavi naŕihi haratu sei mo lo turuhoroa nake.\* <sup>8</sup> Ale nake natu, haratu sei mo lo vaivaileu i pa pala, ale Moli Iesu i pa vilimateia na maromarona purongo, ale i pa vaikomokomoa na sasarami tavera hin rani atu vara i mele mai. *Isa 11.4* <sup>9</sup> Rani non tamlohi vaivaileu atu i pa pala na vavahinau non Setan, i pa pala na suiha tavera peresi na matamata halu tavera peresi na hina

\* **2:7:** God i lavi naŕihia: Tamlohi vujangi la sopo levosahia vara Paul mo lo vereea hare mo lavi naŕihia teni hare mo lo turuhoroa, fomfomi enia vara Paul mo lo vereea God mo turuhoroa hin te malele.

maʻurahi, <sup>10</sup> ale enia i pa vai na hina halu sasati tari matan vara i eʻri halu la haratu la lo vano na nora komokomo matan la ʻohu vara la rasu na retivaraʻuhu sei i eʻri jurira. <sup>11</sup> Matana, God i pa sohai na hina haluhalu isara, matan vara la pa rasu la hinau haluhalu atu. <sup>12</sup> Matan vara enira mo isoiso la pa lavi na talai matan la sopo rasu na retivaraʻuhu, pani matan la lo avulahi na hehe la lo vaira.

### *Kamim Ha Turu Rilangi Tarea*

<sup>13</sup> Pani mo tataholo vara tarea kama lo vere meje isan God matamim vorai peresi na vevorai sei Moli mo opoi kamim, matan God mo viʻroni kamim vara kamim ha pa juri tiroma hin malele sei Tanume Tapu mo lo vaiʻa ʻa tapu hinia, ale matan ka lo rasu na retivaraʻuhu. <sup>14</sup> God mo tovi kamim hin na nomam Retiʻuhu matan vara ha pa lavi na hasohason noʻa Moli Iesu Kʻristo.

<sup>15</sup> Ale matana, la vorai peresi na vevorai, ha turu ʻrilangi, ale ha taurilati vujangi sei kama lo vujangi kamim hinia moiso, na retireti teni hin te nomam leta. <sup>16</sup> Ale noʻa Moli Iesu Kʻristo hasena, God Tamaʻa sei mo opoiʻa, ale na nona ʻromʻuhu mo sileʻa na nanau matan tui tui peresi na ʻromtoho ʻuhu, <sup>17</sup> i pa nanau na mapumim, ale i turuhi ʻrilangi kamim na vavahinau tari peresi na retireti ʻuhu.

## 3

### *Paul Mo Usia Vara La Lo Usiusi Matana*

<sup>1</sup> Ale isoiso hinau la vorai peresi na vevorai, ha usiusi matamam, vara reti non Moli i pa vano i vila na jara tari, ale vara tamlohi la pa hasohasoa sohen ka lo hasohasoa, <sup>2</sup> ale matan vara God i pa juriʻa isana tamlohi lejileji la sasati, matan mo sopo tamlohi tari la rasua. <sup>3</sup> Pani Moli i pa sopo tope na nona retitauhi, enia i pa turuhi kamim, ale i pa lo matahi kamim matan tamlohi sasati atu Tiapolo. <sup>4</sup> Ale nomam ʻromʻromi mo ʻrilangi hin Moli matamim vara ka lo vai na sava kama retileu hinira isamim moiso, ale vara ha pa lo vaira. <sup>5</sup> Kama usia vara Moli i vujangi kamim vara nona opoia isamim vara mo sohena sava, ale ha turu ʻrilangi hin Kʻristo.

### *Retiʻoaʻoahai Mata Maloko*

<sup>6</sup> La vorai peresi na vevorai, na hijan Moli Iesu Kʻristo na retileu isamim vara ha toho asau isan te vorai tinapua sei mo tamlohi maloko, mo sopo hani na masmasuna usuri na posposi sei kama lo vere a isamim moiso. <sup>7</sup> Matan kamim ka levosahia vara ha pa usuri na nomam tovongi ʻuhu, matan kama sopo toho purongo hin rani atu kama lo toho peresi kamim. <sup>8</sup> Ale kama sopo hani te pereti sei vara kama sopo volia, ale kama lo voko mo ʻrilangi tarea, matan vara kama sopo tau te tetehi isan te vonamim hatea. <sup>9</sup> Mo sopo matan mo

sopo tataholo vara kama usia isamim, pani matan kama opoia vara kama pa sile kamim na tovongi řuhu matea mata usuria. <sup>10</sup> Matan hin rani atu kama lo toho peresi kamim, kama sile retileu akerihi, mara vara tea mo sopo avulahi vara i vai na voko, ha sopo vahania.

<sup>11</sup> Matan kama lo rongoa vara tamlohi hai isamim la lo toho purongo, la sopo hahau i tataholo, pani la lo sanga hau.

<sup>12</sup> Ale nake, kama lo retileu, ale kama lo retituetueni na tamlohi sohen harihi hin Moli Iesu Křisto vara la pa vai na nora voko na posposi malum matan vara la pa hani na masmasura purongo. <sup>13</sup> Pani isamim la vorai peresi na vevorai, ha pa sopo malokoloko mata vai na hina řuhu. <sup>14</sup> Vara tea mo řohu vara i ololo na sava kama lo vereha hin leta nike, ha lavi na hijana, ale ha sopo mele pulutahi peresia matan vara i pa vaia i mahanuhanu. <sup>15</sup> Ale, pani, ha sopo kilaua vara enia meresahi matea, pani ha retiřoarõahaia sohena vorai vonamim matea.

### *Isoiso Reti*

<sup>16</sup> Nake, kama lo usiusi vara Moli mata tamata hasena, i pa sile na tamata tarea isamim na malele tari. Moli i pa toho peresi kamim mo isoiso. <sup>17</sup> Enau Paul, na lo uli retiololo nike na limaku haseku. Na vaia sohena matamata vararõuhu vara ha pa hitevosahia vara enau na lo uli na noku leta sohena.

<sup>18</sup> Romřuhu non Moli Iesu Křisto i lo toho isamim mo isoiso.

**Tiroma Leta  
Paul Mo Ulia Isan  
Timothy  
Leta Nike**

Timothy mo lo usuri Paul na nona voko (Rom 16.21; 1Co 16.10; Php 2.19) mata nora rasua hin Iesu. Paul mo hitea sohena natuna matea (1.2). Timothy mo mai patu tamlohi na nona rani peresi Paul, enia tapalan Paul. Paul mo sohai leta sei isan Timothy, pani vujangi hinia mo tueni na mauri vao kalesia non God. Mo vujangi na malele tataholo vara řa viřoni na patu tamlohi hinia, deacon la vai na vavahinau non God (3.1-7; 8-13; 5.17-20).

Reti non Paul akerihi řa eři rasua tarea:

‘Reti nike, o eři rasua ale mo tataholo vara o lavi vevuhia, vara, ‘Křisto Iesu mo mai na varama vara i juri na tamlohi hehe.’ Enau na sasati jea hinira. Pani God mo řomopoiau matan hinau sei, matan enau na sasati jea hinira, ale Iesu Křisto mo tauau vara a mai tovongi matea vara i vujangi na nona řomperavu isan la haratu la pa rasua mata mauri tui.’ (1.15-16)

**Hin Leta Nike**

1. Retioloolo (1.1-2)
2. Retivujangi mata mauri kalesia (1.3-3.13)
3. Hina aulu na nořa lotu (3.14-4.5)
4. Paul mo retituetueni Timothy (4.6-6.21)

<sup>1</sup> Enau Paul, vahařule matea non Křisto Iesu God mo viřoniau na nona suiha, Křisto Iesu nořa Jujuri enia nořa řomtoho. <sup>2</sup> Timothy, natuku hin nořa mauri rasua, na lo ususi matam vara God Tamařa enia Křisto Iesu nořa Moli, la sileho na řomřuhu, na řomopoia peresi na tamata.

*Retiřoařoahai Mata Vujangi Haluhalu*

<sup>3</sup> Sohen na vereia řilangi isam hin rani atu na tauho Ephesus vara a vano Macedonia, na vereia vara o pa toho vara o sile na reti isan la tamlohi atu vara la sopo vujangi te vujangi tinapua, <sup>4</sup> teni vara la sopo usuri te sorasora halu teni te sorasora vono mata sava pina tuai la tataholo hinira, vuana enia řomřomi vono purongo, la hinau sei la sopo tueni te tamlohi na mauri mata rasua hin God. <sup>5</sup> Pani nořa řomřomi tavera hinia, enia opoia, opoia mo tai isana mapu vokevoke peresi na rongovosahi na hinau tataholo, peresi na rasua varařuhu. <sup>6</sup> Tamlohi hai, la jalio, la posi la usuri na sorasora vono, <sup>7</sup> la opoia vara la mai tamlohi vujangi mata leu, pani la sopo levosahi na sava la lo vereia teni na hinau sei la vereia vara la levosahira mo řuhu vara la tataholo teni mo vono.

<sup>8</sup> Ale řa levosahia vara Leu mo řuhu, pani vara tea mo lavia na posposi tataholo purongo, <sup>9</sup> ha levosahi harih: God mo sopo sile na leu mata tamlohi tataholo, pani isan la haratu la lo vaivaileu,



la haratu la sopo oloolo hin te tamlohi hatea, la haratu la lo usuri na posposi varama, la haratu la lo hehe, la haratu la sopo sile na oloolo isan te hinau mata oloolo, la haratu la lo vilimatei na tamara teni tinara, la haratu la lo vilimatei na tamlohi tinapua, <sup>10</sup> ale la haratu la lo vai na posposi lumiha, tamlohi la vaivaileu peresi na tamlohi, haʻai la vaivaileu peresi na haʻai, la haratu la lo tauri vanaho na tamlohi mata la haʻehira, ale la haratu la lo retihalu tarea, la haratu la lo taviti halu na lolo court, ale na posposi lejileji tari sei la lo turuleji na vujangi ruhu sei, <sup>11</sup> mo lo usuri na Retiʻruhu ruhuʻruhu non God sei enia avulahi tavera, ale Retiʻruhu sei mo taua isaku.

<sup>12</sup> Na vere meje isan Křisto Iesu noʻa Moli, mo sile na řilarilangi isaku, matan mo hitea sohena vara a eři vai na masalona, ale mo viřoniuu vara a volitusi isana, <sup>13</sup> hina purongo vara tiroma na lo verelejeleji Křisto, na lo unuhi na nona tamlohi vara a komora, ale na kerekerera, pani God mo řomopoiu mata na sopo lo levosahi na sava na lo vaia matan na sopo rasua, <sup>14</sup> Ale řomřuhu non noʻa Moli mo mařivi savulevule matakū na rasua peresi na opoia hin Křisto Iesu. <sup>15</sup> Reti nike, o eři rasua mo tataholo vara o lavi vevuhia vara: Křisto Iesu mo mai na varama vara i juri na tamlohi hehe. Enau na sasati jea hinira. <sup>16</sup> Pani God mo řomopoiu matan hinau sei, matan enau na sasati jea

hinira, ale Iesu Křisto mo tauau vara a mai tovongi matea vara i vujangi na nona řomperavu isan la haratu la pa rasua mata mauri tui. <sup>17</sup> Nake, isan Supe mata tauni tari, i sopo eři tihai, tea i sopo eři hitea, enia God matelete, řa pa silea na oloolo tavera peresi na hasohaso na rani tui tui tarea. Amen.

### *Vavahinau Non Timothy*

<sup>18</sup> Timothy natuku, reti nike na lo vere a isam, mo lo usuri na retimangovi sei la vere a matam moiso, la pa tueniho vara o eři vai na vuro řuhu, <sup>19</sup> tarea o tauri řilangi na nom rasua peresi na nom rongovosahi na hinau mo tataholo, ale tamlohi hai la tau nařihira, la komo na nora rasua sohena boti mo vujahi kosahia na paranga. <sup>20</sup> Tatuara sei, Hymenaeus enia Alexander, enau na taura la vano na liman Setan vara i pa vujangira vara la pa sopo mele turuleji hin God na nora vujangi haluhalu.

## 2

### *Vujangi Mata Lotu*

<sup>1</sup> Tiroma, na lo vere a řilangi vara tamlohi na nora usiisi mata tamlohi tari, la usi God mata tuetueni, la usiisi mata tinapua, ale vara la vere meje isan God. <sup>2</sup> Mata supe peresi la haratu sei la lo tauri na suiha, matan vara řa pa eři mauri na mauri mo tamata, ale mo malum vara řa eři usuri na mauri tataholo, ale řa sile na oloolo isan God. <sup>3</sup> Usiisi sohena, mo řuhu na nahon God,

noña Jujuri, ale mo avulahi hinia, <sup>4</sup> matan God mo opoia vara i juri na tamlohi tari, ale vara la pa levosahi na retivarañuhu.

<sup>5</sup> Matan God enia matelete purongo, ale tamlohi tuetueni matelete purongo sei enia mo malele tamlohi la mai isan God, tamlohi atu enia Křisto Iesu, <sup>6</sup> mo hase silea sohena volituhu mata tamlohi tari, reti sei enia vereulia sei God mo silea na rani tataholo.

<sup>7</sup> Matana, God mo viřoniau vara a mai vahañule matea, ale vara a mai tamlohi retivujavujangi matea, na lo vere na varañuhu na sopo halu, God mo řuleau vara a vujangi na tamlohi řořoha na malele rasua peresi na reti-varañuhu.

### *Posposi Mata Hañai*

<sup>8</sup> Moiso, na opoia vara tamlohi na jara tari la ususi, ale la tahe na limara tapu isan God, i pa sopo te lolokoru teni vasvas hinira. <sup>9</sup> Sohena, na opoia vara tarea hañai la ruru na ruru na řomřomi řuhu i tataholo na naho tamlohi. Mo řuhu vara la sopo peri na vulura na malele tinatinapua peresi na hinau mata gold teni huřutavila teni ruru volina mo sahe aulu jea, <sup>10</sup> pani hin haratu purongo, mo tataholo mata hañai sei mo lo vereva vara enia mo lo usuri posposi atu God mo opoia, peresi na vavahinau řuhu. <sup>11</sup> Hañai la pa toho malum la tapurongo, ale la tatamahu

vara la oloolo matan vara la eři lelevosahi. <sup>12</sup> Tarea, enau na sopo majinga vara hañai la vujangi teni la mai patu tamlohi la tiroma la aulu na tamlohi. Mo vono, enira la pa toho malum purongo, <sup>13</sup> matan God mo vai Adam tiroma moiso mo pa vai Eve. *Gen 2.7, 21-22*

<sup>14</sup> Ale Tiapolo mo sopo halu Adam, mo halu na hañai, ale mo tope na retileu non God. *Gen 3.1-6*

<sup>15</sup> Pani God i pa juri na hañai na tapetape, vara la lo turu řilangi na rasua, opoia, la hahau na mauri vokevoke peresi na posposi hasera tauřilatira.

## 3

### *Patu Tamlohi Na Vao Kale-sia*

<sup>1</sup> Reti nike o eři rasua, vara tea mo tau na řomina vara i pa patu tamlohi rasua matea mata tamlohi rasua, mo opoi na vavahinau řuhu matea.\* <sup>2</sup> Ale matana, o kilau vara mo sopo te hinau na maurina, mo lahi na hañai matelete, mo hase taurilatia, enia tamlohi řomřomi, o hitea vara tamlohi la lo sile na oloolo isana moiso, enia mo avulahi vara i lavi na tamlohi tinapua na imana, ale enia mo levosahi na posposi mata vujangi mo řuhu, <sup>3</sup> Ale, enia mo sopo tamlohi inu hajavua, mo sopo tamlohi valum, pani řomina mo malum, mo sopo tamlohi vasvas, ale mo sopo tamlohi řomjea na mania,

\* **3:1:** patu tamlohi rasua: řamin reti sei, patu tamlohi enia tamlohi atu mo lo kilau na tamlohi rasua na jara matea.

<sup>4</sup> ale mo lo kilau mamahuni na lolo imana, ale natuna la sile na oloolo isana, ale la oloolo hinia. <sup>5</sup> Matan vara tea mo sopo efi kilau mamahuni na imana, i pa kilau mamahuni na vao kalesia non God sohena sava? <sup>6</sup> Enia i pa sopo tamlohi matea mo pa mai purongo na mauri kalesia, matan patuna i pa sosohi na mangisi tavera, ale i jovi sivo na talai non Tiapolo. <sup>7</sup> Moiso aulu hin haratu, tamlohi na jingoima la vereea vara maurina mo tataholo, ale matan i sopo efi jovi hin te vuna non Tiapolo, ale i mahanuhanu matana.

#### *Malele Viʻoni Na Deacon*

<sup>8</sup> Deacon sohena, o hitea vara tamlohi la lo sile na oloolo isara moiso, ale enira la sopo meme masanga, la sopo tamlohi inu hajavua, la sopo ʻomtutuni na mania. <sup>9</sup> Ale la tauri ʻirilangi na hinau luhu mata rasua na posposi sei tarea ʻomira la tataholo na nahon God. <sup>10</sup> Ale o vaihitera tiroma vara ko sopo hite te hinau na maurira, ale o pa majinga hinira vara la volitusi sohena deacon.

#### *Haʻai Deacon*

<sup>11</sup> Haʻai sohena, vara la deacon, o hitea vara tamlohi la lo sile na oloolo isara moiso, la sopo sorosora tamlohi, la lo hase taurilatira, tarea la lo usuri na masalon God na hinau tari la lo vaira.†

<sup>12</sup> Deacon la lahi na haʻai matelete, la lo kilau mamahuni na natura peresi na imara.‡ <sup>13</sup> Matan la haratu

la lo volitusi ʻruhu sohena deacon la pa lavi na hija ʻruhu nora, ale la pa lavi na ʻomʻirilangi na nora rasua hin Kʻristo Iesu.

#### *Posposi Tataholo Na Vao Kalesia*

<sup>14</sup> La hinau sei na lo ulia isam, na lo ʻromtoho vara a pa vano isam vila, <sup>15</sup> pani vara te hinau mo tauriau, leta nike i pa tueniho vara o levosahi na posposi mo tataholo na vaon God. Vaona enia vao kalesia non God mauri, vao kalesia enia peri, ale enia lapiti re-tivaraʻruhu. <sup>16</sup> Hina tavera matea kama taviti hinia, pulo noʻra rasua enia hina luhu matea:

Kʻristo, mo pala mo mai tamlohi,

Tanume Tapu mo vujangia vara enia natu Kʻristo,

angelo la hitea,

ale tamlohi la vereulia na mara jara tinatina-pua tari,

moiso tamlohi na varama la rasua,

ale God mo lavia mo sahe aulu na hasohaso na tuka.’

## 4

#### *Vujangi Nona Tanume Sasati*

<sup>1</sup> Pani, Tanumen God mo vere mamahunia vara na pongi hitahu tamlohi hai la pa vahari na malele rasua matan la pa tapurongo isana tanume haluhalu peresi na vujangi non tanume sasati, <sup>2</sup> ale retihaluhalu sei la pa

† **3:11:** haʻai: hai la vereea vara haʻai mo opoia vara i mai deacon, teni narou deacon. ‡ **3:12:** haʻai matea: mo sopo tipahi na narouna hin te rani.

tai isana tamlohi tapnetano, řomira la sulimateira, ale la sopo mele levosahia vara sava mo tataholo,<sup>3</sup> ale enira la tapuhoro na lahi, moiso la horo na tatua hanhahi sei God mo vaira matan vara la haratu la rasua la levosahi na retivarařuhu la pa lavira na vere meje,<sup>4</sup> matan hinau tari God mo vaira la řuhu, ale mo sopo te hinau vara tamlohi la řohu hinia vara la lavia la vere meje matana moiso,<sup>5</sup> matan reti non God peresi na usiusi mo lo vai na hanhahi la řuhu na nahon God.

*Paul Mo Retituetueni Timothy*

<sup>6</sup> Vara o vujangi la hinau sei isana vorai peresi na vevorai, o pa volitusi řuhu non Křisto Iesu, matan ko hase vahaniho na Retiřuhu peresi na vujangi řuhu sei ko lo usuria.<sup>7</sup> Pani o toho asau na sorasora vono la rongorongono vono, ale o hase vujangiho na posposi sei God mo opoia,<sup>8</sup> matan řa levosahia vara, vara ko vai na epem mo řilangi, haratu mo řuhu makomona purongo, pani vara tarea o lo usuri na posposi God mo opoia, i pa řuhu jea na maurim tari, mo řuhu mata maurin nake peresi na mauri atu i pa mai hitahu.<sup>9</sup> Reti nike o eři rasua, ale mo tataholo vara tamlohi la pa usuri vevuhia.<sup>10</sup> Matan harihi, řa lo tau na řomira

mo řilangi na vavahinau matana, řa řomtoho hin God sei mo mauri, enia Jujuri nona tamlohi tari, pani isan la haratu la rasua enia mo Jujuri varařuhu.\*

<sup>11</sup> O reileu, ale vujangi na hinau nike. <sup>12</sup> O sopo tinařihia vara tamlohi la hite-satihiho matan ko uluvou purongo, pani tarea o vai na tovongi řuhu isana tamlohi rasua na nom retireti, na nom vavahinau, na nom opoia, na nom rasua peresi na nom posposi vokevoke. <sup>13</sup> Ale i pa tikeli na rani a mai isam, o lo tau na řomim vara tarea o lo evievi na Retitapu na naho tamlohi rasua, o lo vere mamahunira na malele tari mata mauri rasua, ale o lo vujangi na retivarařuhu. <sup>14</sup> O sopo řompurongo hin nom silesilea atu God mo silea isam na retimangovi atu hin rani atu la patu tamlohi rasua na vao kalesia la usiusi la tau na limara na patum.† <sup>15</sup> Tarea o lo hahau usuri la vujangi atu, o tau vevuhi na řomim hinira matan vara tamlohi la pa hitea vara ko lo ulua na mauri rasua. <sup>16</sup> O hase kilauho, o kilau mamahuni sava ko lo vujangia. O turu řilangi hin la hinau sei matan vara o vaia o pa eři juriho peresi la haratu la lo tapurongo isam.

## 5

*Vavahinau Nona Patu*

\* **4:10:** reti sei: God enia Jujuri nona tamlohi tari mata enia hasena i pa eři juri na tamlohi, pani i pa sopo tamlohi tari la pa mauri matan la pa sopo rasua, pani isan la haratu la rasu God nora Jujuri, enira la pa mauri. † **4:14:** patu tamlohi rasua: la posia mo tinapua sohen harihi: patu tamlohi, elda teni bishop. O hite: 5.17, 19

*Tamlohi Rasua*

<sup>1</sup> O sopo hapuhi na tamlohi taunina mo jeu na taunim, pani o usia i řilangi isana sohen ko lo vaia isan tamam, ale o retireti isan la haratu taunira mo sopo lo jeu na taunim sohena tasim.

<sup>2</sup> Isana hařai taunira la jeu na taunim, o retireti isara sohen ko lo retireti i řuhu isan tinam, ale o retireti i řuhu isana hařai taunira la sopo jeu na taunim sohena vetasim, ale o sopo sile na masapa isam hasem mata o řomlumiha hinira.

*Ha Lo Kilau Na Hařai Malepu*

<sup>3</sup> O sile na oloolo isana hařai malepu la haratu la hařai malepu varařuhu, harasei mo sopo te tinapua vara la pa lo kilaura. <sup>4</sup> Pani vara te hařai malepu te natura teni nona vajiaha mo lo toho, mo řuhu vara enira la vujangi na nora rasu na vavahinau mata la kilaua sohen hařai atu mo lo tapna kilaura tiroma, matan God mo avulahi hin posposi sei. <sup>5</sup> Hařai malepu varařuhu mo sohen harihi, mo lo toho hasena, ale enia matea mo tau na řomina isan God tarea, ale posina enia mata usiisi mata tuetueni na rani teni na vutepongi, <sup>6</sup> pani vara te hařai malepu mo lo řomřomia enia hasena, mo lo mauri, pani mo mate moiso. <sup>7</sup> O retileu hin la hinou nike isara matan i pa sopo te masapa vara tamlohi

la pa pisuhira. <sup>8</sup> Pani vara tea mo sopo kilau na tahisana, ale aulu hin haratu, mo sopo kilau la haratu na lolo imana, mo vahaři na posposi rasua, posina sei mo sati mo jeu la haratu la sopo rasu God.

<sup>9</sup> O tau na hija hařai matea na pepa sei mo vereea vara sava hařai malepu natu, vao kalesia i pa tuenira, hijan haratu purongo mo lahi vahatelete, ale taunina mo jeu mo ngavulu limarave.

<sup>10</sup> Hařai atu tamlohi la lo vereea tarea vara enia hařai matea mo lo vai na vavahinau řuhu, ale vara te natuna, mo kilau mamahunira la mai la tavera, ale tarea mo avulahi vara i lo lavi na vinano la mai na imana, ale posina mo lo sile na oloolo isana tapuhi tinatinapua non God, mo avulahi vara i hoje na palora, ale mo tau na řomina vara i vai na vavahinau řuhu tari.\* <sup>11</sup> O sopo uli na hija hařai malepu la sopo vajiaha matan masalora mata lahi mo jeu na řomira vara la usuri Křisto, ale la pa rovo hinia matana.

<sup>12</sup> Matana, talai i pa mai isara matan la tope na nora retitauhi isan Křisto vara la pa sopo mele lahi. <sup>13</sup> Mo sopo haratu purongo, pani la hařai maloko vari purongo, la lo hahau řalihi na jara la vavano na ima tinatinapua matan vara la aleale retireti. Enira la sopo vai na posposi mata maloko vari purongo, la

\* **5:10:** Leon Greek mo vereea sohen harihi: vara mo hoje na palo tamlohi viřoni. Mo vereea matan tuai la lo tau nora Sabbath na jingoima, ale posposi tataholo enia vara engko teni nom volitusi i pa hoje na palora.

lo sorasora tamlohi, ale la lo tau na ngalsura hin te hinau mo sopo te nora hinau hinia, ale la lo vereea te hinau la sopo tataholo vara la verera. <sup>14</sup> Ale na lo vereea vara i pa mele ŋuhu jea vara haŋai malepu la sopo vajiaha la mele lahi, la mele vasusu moiso, la kilau mamahuni na imara, ale la sopo sile na masapa isan noŋa meresahi teni te masapa vara tea i retiŋeren hiniŋa matara. <sup>15</sup> Matan hai la vano la posi moiso, la usuri Setan. <sup>16</sup> Pani vara te haŋai rasua te haŋai malepu la lo toho na vaona, i pa lo kilau mamahunira vara la sopo tau na tetehi isana vao kalesia atu, matan vao kalesia la pa lo kilau la haratu la haŋai malepu varaŋuhu.

### *Volin Patu Tamlohi Rasu*

<sup>17</sup> Na tavaluna, patu tamlohi rasua la ŋuhu mata tiroma na vao kalesia, mo tataholo vara ha volira i vaha rua, sohen la haratu la lo voko ŋilangi na nora retivujavujangi peresi na vujangi. <sup>18</sup> Matan, Retitapu mo vereea vara, 'Na rani buluk mo lo savahi na patu wit, ha sopo lasi na jingona vara i sopo eŋi hani te wit makomo atu'.

*Deut 25.4*

Ale mo mele vereea vara 'Mo tataholo vara tamlohi voko i lavi na volina'.

*Lk 10.7*

<sup>19</sup> Ale, o sopo tapurongo tiroma isan tea vara mo tuvai na patu tamlohi rasua matea, pani vara tamlohi mo rua teni mo tolu, la levosahia mo ŋuhu vara tuvai atu mo tataholo, ale nake o eŋi tapurongo hinira. <sup>20</sup> Vara

te patu tamlohi rasua hatea mo lo usuri na nona hehe, o hapuhia na naho tamlohi rasua tari matan vara enira mo isoiso la pa matahu matana. <sup>21</sup> Na nahon God peresi na nahon Kŋristo Iesu peresi na angelo God mo viŋonira, na lo sile na retileu isam vara o taurilati la retileu tari sei na lo vereea isam vara o sopo opoi na tatuara purongo, ale o sopo vai te hinau na posposi tametame! <sup>22</sup> Ale o sopo vilavila vara o tau na limam hin te tamlohi matan vara o tahea vara i vai na vavahinau non Moli, o pa levosahi mamahuni na posina tako, vara i vono engko o pa hase komoho na nona hehe. O lo toho na mauri vokevoke. <sup>23</sup> Ale o sopo inu na wai purongo, pani o lo inu na waen makomona matan pangem peresi na nom rojoa sei la lo toho isam. <sup>24</sup> Hehe nona tamlohi hai la malue na jara tavera la tiromara na rani mata aria, pani te hehe nona tamlohi tinapua, la pa pala hitahu. <sup>25</sup> Mo sohen haratu isana vavahinau ŋuhu nona tamlohi, la memera purongo, pani vara la sopo pala tako, pani la pa pala hitahu.

## 6

### *Vavahinau Nona Slev*

<sup>1</sup> Haratu la rasua, pani la lo slev, mo tataholo vara la sile na oloolo isana nora tamlohi tatavera tarea matan vara tea i sopo eŋi retisatihi na hijan God teni na vujangi ŋuhu. <sup>2</sup> Vara slev te nora tamlohi tatavera la vorai rasua, la pa sile na oloolo isara,

matan enira la vorai rasua sohera, mo řuhu vara la vai na vavahinau řuhu isara, i jeu na tamlohi tatavera tinapua matan, enira la vorai rasua, ale God mo opoira.

*Reti Haluhalu Peresi Na Tavitav Varařuhu*

Timothy o vujangi la hinau sei isana tamlohi, o vereā řilangi vara la pa ololo hinira. <sup>3</sup> Vara tea mo lo vujangi te vujangi tinapua, ale mo sopo majinga na reti tataholo non nořa Moli Iesu Křisto, peresi na vujangi sei mo lo usuri na mauri God mo opoia, <sup>4</sup> tamlohi sohena, mo mangisi jea, mo sopo levosahi te hinau hatea. Mo opoia hajavua vara i lo sorasora hin te hinau tamlohi la sopo levosahia vara mo varařuhu teni mo vono, ale mo lo retireti na hinau matuvana mata vasi purongo. Posposi atu mo lo vaia mo vai na tamlohi la lo mereimerei, la patumasa, la retireřen, la řomřomi sati hinira, <sup>5</sup> ale tarea la vasvas peresi haratu řomira la lejileji, mo sopo te retivarařuhu hinira, ale la řomřomia vara posposi mata mauri rasua mo sile na masapa isara vara la tavitav, <sup>6</sup> varařuhu, posposi mata mauri rasua i pa vai na maurim i tavitav, pani isan la haratu purongo sei tarea la sopo řomusuri te hinau tinatinapua, <sup>7</sup> matan řa vora lekoleko na varama, ale vara řa mate, řa pa malue lekoleko. <sup>8</sup> Pani vara te hařa hanhāni teni te nořa ruru, řa pa avulahi matara, <sup>9</sup> pani

la haratu la opoia vara la tavitav, la pa jovi na hina vaihite, ale masalora mo lihora na hinau rongorongono vono peresi na hinau mata komora purongo, ale hinau sei mo putehi na tamlohi na komokomo tavera. <sup>10</sup> Matan, opoia mata mania enia pulo hinau mata hina sasati tari. Matan masalo sohena, mo reve nařihi na tamlohi hai na malele rasua moiso, ale la hase sarihira hin te rongosati matuvana.

*Isoiso Reti Non Paul Isan Timothy*

<sup>11</sup> Pani isam, tamlohi non God, o rovo hin la hinau sei. O tutungui na malele mata mauri tataholo, o tutungui na posposi atu God mo opoia, rasua, opoia, řomperavu peresi na řommalum. <sup>12</sup> O vai na valum řuhu mata rasua, o taurilati mauri tui atu God mo toviho hinia, peresi taviti řuhu atu ko vaia na naho tamlohi matuvana. <sup>13</sup> Na lo vereā na nahon God sei mo lo sile na mauri isana hinau tari la mauri, peresi nahon Křisto Iesu sei mo vere na taviti řuhu mata retivarařuhu na nahon Pontius Pilate, ale na lo vereā vara <sup>14</sup> engko o pa taurilati retileu nike, o sopo malue nařihi hinia i tikeli rani atu Iesu Křisto nořa Moli i mele pala:

<sup>15</sup> na nona rani tataholo,  
           enia haratu mo avulahi  
           mo tavera jea,  
 ale enia hasena mo aulu na  
           hinau tari,  
           enia Supe nona supe,  
 enia Moli nona moli.  
<sup>16</sup> Enia hasena, mo lo toho  
           jejeu,

mo lo toho hin memera  
 tavera atu  
 tamlohi la sopo eři mai  
 mariviti hinia,  
 mo sopo lo tea i hitea,  
 teni tea i eři hitea.  
 Isana, řa pa sile na oloolo,  
 ale enia i pa lo tauri  
 na suiha tui tui tarea.  
 Amen.

*Haratu La Tavgav*

<sup>17</sup> Isan la haratu la tavgav  
 nake na varama, o verea  
 isara vara la sopo tau na  
 řomira i sahe aulu teni vara  
 la řomtoho na nora tavgav,  
 matan řa sopo levosahia vara  
 la pa toho i tikeli pangisa.  
 Pani o verea isara vara la  
 lo řomtoho hin God hasena,  
 matan enia mo lo sile na  
 hinau tari isařa matan vara  
 řa avulahi hinira. <sup>18</sup> O verea  
 isara vara la lo vai na hinau  
 la řuhu, o verea isara vara  
 la tavgav na nora vavahinau  
 řuhu, la pa hansohai, ale  
 na nora řomavulahi la  
 tatamahu vara la asease  
 na nora hinau. <sup>19</sup> Hin  
 malele sei, la lo takonahi na  
 tavgav tavera matara hasera,  
 sohena pulo řuhu matea  
 matan mauri atu mo lo mai,  
 ale o verea isara matan vara  
 la eři taurilati mauri atu, enia  
 mauri varařuhu.

*Isoiso Reti Non Paul*

<sup>20</sup> Timothy o matahi la  
 hinau sei God mo lo silea  
 isam moiso. O sopo usuri  
 na sorasora vono teni  
 te řomřomi sei la verea  
 vara enia 'hina lelevosahi'  
<sup>21</sup> matan tamlohi hai la lo  
 turu hinia la lo vano malue  
 na malele rasua moiso.

Noku usiisi vara řomřuhu  
 non God i pa toho isamim  
 isoiso.



**Harua Leta  
Paul Mo Ulia Isan  
Timothy  
Leta Nike**

Harua leta nike isan Timothy, mo lo reti sohena vara enia taman Timothy, mo lo řomřomia na nona usiusi (1.2-3) matan mo opoia vara Timothy i mai tamlohi vuro řuhu matea non Křisto ale i tatamahu mata lavi na rani řilangi (2.1, 3).

Paul mo vereā mara tamlohi rasua hai la jovi na hehe, ale matana, Tiapolo mo lo taurilatira na nona vuna, ale mo retiřoāřohai Timothy vara i rovo na vaihite sei uluvou la lo tia hinira (2.20-26; 3.1-9). Mo vereā vara i retivujavujangi na retisohai non God, hina purongo vara tamlohi la opoia teni mo vono (4.2). I pa lo kilau mata tamlohi vujangi haluhalu.

Paul mo levosahia vara i pa sopo tuai i pa mate, mo levosahia vara i pa lavi otori mata mauri sei God i pa silea mata nona turu řilangi (4.6-8), ale mo mele vereā vara Timothy i levosahi retivararūhu akerihi:

Harihi enia retivararūhu:  
Vara řa mate peresia,  
řa pa mauri peresia;  
vara řa turu řilangi,  
řa pa tauri na suiha pere-  
sia;  
vara řa vunvunia,  
i pa vunvuniřa,  
vara hina purongo vara řa  
sopo řomturu řilangi,  
enia mo lo řomturu řilangi,

matan enia i sopo eři posi na řomina. (2.11-13)

**Hin Leta Nike**

1. Retioloolo (1.1-2)
2. Ha sopo mahanuhanu hin Moli (1.3-18)
3. Mauri tamlohi vuro řuhu (2.1-26)
4. Posi tamlohi na pongi hitahu (3.1-9)
5. Ha turu řilangi tarea (3.10-4.8)
6. Retituetueni peresi na isoiso retioloolo (4.9-22)

*Reti Tiroma*

<sup>1</sup> Enau Paul, vahařule non Křisto Iesu usuri na masalon God mo usuri na retitauhi mata mauri sei mo lo toho hin Křisto Iesu.

<sup>2</sup> Na lo uliuli isam Timothy natuku řuhuřuhu; God Tama peresi Křisto Iesu nořa Moli la sile na nora řomřuhu, řomopoia peresi na tamata isam tarea.

*Paul Mo Vere Meje Isan God*

<sup>3</sup> Timothy, na vere meje isan God matam. Enia God sei na lo volitusi isana sohen piku tuai la lo vaia, na vaia, ale řomiku mo sopo tuvaiau hin te hinau, ale tarea na lo řomřomiho na noku usiusi vara na rani teni na vutepongi. <sup>4</sup> Na opoia mo tavera vara a mele hiteho, matan na lo řomřomi rani atu ko lo tangisiau, ale a pa avulahi tavera hin rani atu vara řa mele tapatapairā. <sup>5</sup> Na levosahi na nom rasua vararūhu, mo lo usuri na rasua non nom pua Lois peresi non nom nana Eunice. <sup>6</sup> Matan haratu, na lo mele vereho hin pa silesilea atu God mo lo silea isam hin

rani atu na tau na limaku hiniho\* na lo vereā vara o iriiria vara i lo pepe, <sup>7</sup> matan tanume atu God mo sileā hiniā mo sopo mata matahu, pani mata suiha, opoia peresi na posposi mata hase taurilatiho. <sup>8</sup> Ale matana, o sopo mahanuhanu na vereulia non noā Moli, teni hiniā, matan na lo toho na ima řilangi, pani o pa tatamahu vara o lavi na rani řilangi mata Retiřuhu hin suiha atu God mo silea.

<sup>9</sup> Enia mo juriā moiso, mo viřoniā vara řa hahau na mauri tapu tarea. Mo sopo mata noā vavahinau, pani mata masalona peresi na nona řomřuhu mo silea isaā hin Křisto Iesu tiroma moiso, varama mo pa tapulo, <sup>10</sup> pani nake masalon God atu, mo mera na maurin noā Jujuri, Křisto Iesu, enia mo komo na suihan mateia, ale mo vuhesi mauri atu i pa sopo eři tihai hin te rani, sohena Retiřuhu mo vereā, <sup>11</sup> God mo viřoniau matan vara a mai tamlohi retivujavujangi matea, a vahařule, ale a tamlohi vujangi matan Retiřuhu atu.

<sup>12</sup> Matana, na lo lavi na rani řilangi nike na ima řilangi. Pani enau na sopo mahanuhanu matana, matan na levosahi haratu na lo rasua, ale na levosahi mamahunia vara enia i pa eři tau mamahuni na sava mo retitauhi vara a pa lavia, i tikeli rani tavera atu a pa lavia. <sup>13</sup> O usuri mamahuni tovongi řuhu atu mata noku

vujangi sei ko lo rongora isaku, mo usuri na tovongi mata rasua peresi na opoia hin Křisto Iesu. <sup>14</sup> na suihan Tanume Tapu atu mo lo toho hiniā, o matahi mamahuni retivarāřuhu řuhuřuhu atu God mo silea isam.

<sup>15</sup> Timothy ko levosahia moiso vara tamlohi tari nike na province matan Asia la vahaři hiniā, ale Phygelus peresi Hermogenes enira tatuara. <sup>16</sup> Na lo usi God vara i pa řomopoi na vao iman Onesiphorus, matan tarea mo lo vai na řomiku mo avulahi, ale matan mo sopo matahu vara i mai isaku na ima řilangi, <sup>17</sup> ale hin rani atu mo pala Rome mo lo aleau vavano mo pa tapaiau, <sup>18</sup> na lo usi Moli vara i řomopoia hin rani tavera atu. Ale ko levosahi mamahuni na nona vavahinau tari sei mo lo vaira matakū sei Ephesus.

## 2

### *Tamlohi Vuro Non Iesu Křisto*

<sup>1</sup> Natuku Timothy, řomřuhu sei mo lo toho isan Křisto Iesu, i pa tueniho na nona suiha, <sup>2</sup> ale sava vujangi ko rongoa isaku moiso na naho tamlohi matuvana, o mele silea isana tamlohi sei, la taurilati na nora retitauhi tarea, ale la eři vujangi mamahunia na tinapua hiniā, <sup>3</sup> o tatamahu mata lavi na nom rani řilangi sohena tamlohi vuro řuhu matea non Křisto Iesu. <sup>4</sup> Mo sopo te tamlohi vuro i lo usuri

\* **1:6:** hin rani atu na tau na limaku hiniho: Patu tamlohi mata vao kalesia, la tau na limara hin la haratu la pa lavi te vavahinau non Moli matea. Hite 1 Tim 4.14.

na mauri tamlohi purongo matan nona řomřomi enia vara i vai haratu mo viřonia i avulahi. <sup>5</sup> Tamlohi roro matea i pa sopo eři lavi na otori mata roro vara mo sopo usuri na leu mata roro. <sup>6</sup> Mo tataholo vara tamlohi řilarilangi mata voko na isa i lavi na vua asitauni tiroma. <sup>7</sup> O lo řomřomi na řava na lo vereea, matan Moli i pa sileho na lelevosahi matan la hinau tari atu.

<sup>8</sup> O tau na řomim hin Iesu Křisto, tahisan Supe David tuai, enia mo mele turu na mateia sohen na lo retivu-javujangi hinia na noku Retiřuhu, <sup>9</sup> matan na lo retivu-javujangi hin Retiřuhu sei, na lo lavi na rani řilangi, la pesiau na jen sohen tamlohi sasati matea. Pani tea i sopo eři taurilati na reti non God! <sup>10</sup> Ale matana, na lo turu řilangi hin la hinau atu matan vara la haratu God mo viřonira la pa eři juri, ale la lavi mauri atu hin Křisto Iesu peresi na hasohasona tavera sei mo sopo te isoi-sona. <sup>11</sup> Harihi enia reti-varařuhu:

Vara řa mate peresia,  
řa pa mauri peresia;  
<sup>12</sup> vara řa turu řilangi,  
řa pa tauri na suiha peresia;  
vara řa vunvunia,  
i pa vunvuniřa;  
<sup>13</sup> vara hina purongo vara řa sopo řomturu řilangi,  
enia mo lo řomturu řilangi,  
matan enia i sopo eři posi na řomina.

<sup>14</sup> O mele verera hin la hinau nike, ale o retileu isara na nahon God vara la sopo vauriuri mata retireti, matan posposi sei mo sopo vai te hinau i řuhu, pani i pa komo na rasua non la haratu la lo tapurongo hinira. <sup>15</sup> O lo kilau mamahu vara o lo hahau tataholo na nahon God na posposi mo opoia, sohen tamlohi voko matea mo sopo te hinau vara i pa mahanuhanu matan enia mo vujangi mamahuni na retivarařuhu. <sup>16</sup> Pani o toho asau na retireti vono nona tamlohi varama purongo, matan enia i pa vai la haratu la lo usuria la mele sati jea na posposi varama, <sup>17</sup> ale nora retireti la pa varhasahi sohen řanga sola sohen Hymenaeus peresi Philetus, <sup>18</sup> enira la lo jalio na malele mata retivarařuhu la vujan-gia lara rani sauteterahi mo pete masese moiso, retireti sohen mo komo na rasua nona tamlohi hai.

<sup>19</sup> Pani retivarařuhu non God mo sohen pulo vatu matea mo lo turu řilangi, ale uliuli hinia mo vereea vara, 'Moli mo levosahi na nona tamlohi' ale 'la haratu la lo vereea lara enira la tamlohi non Moli, la pa vahaři na posposi sasati tari'. *Num 16.5*

<sup>20</sup> Na iman tamlohi tavera matea, o pa sopo hite na pesin la vaia na gold teni silver purongo, pani o pa hite te pesin la vaia na pahai teni lepa. Hai la tauhasehira mata hanhani tavera purongo, hai mata hanhani purongo.

<sup>21</sup> Matana, vara tea mo

*Tamlohi Ruhu Mata Voko*

lo toho asau na posposi sasati, i pa sohena pesin la tauhasehia mata vavahinau ōuhu purongo, la tapuhia mata vavahinau ōuhu non tamlohi tavera matan ima atu, mo lo tatamahu mata vavahinau ōuhu tari. <sup>22</sup> Ale matana, o rovo na masalo uluvou, ale o tutungui na posposi tataholo, rasua, opoia peresi na tamata peresi la haratu sei la lo tovi Moli la haratu mapura la vokevoke.

<sup>23</sup> O toho asau na ōmōmōi sei la rongorongō vono, ale sorasora vono, ko levosahia vara vuan hinau atu enia vasvas purongo. <sup>24</sup> Ale volitusi non Moli i pa sopo tamlohi vasvas, pani posina i pa ōuhu na tamlohi tari, i pa eŋi vujangi, i pa ōmperavu, <sup>25</sup> i pa vaitataholoi la haratu la turuposi hinia na ōmmalum. Korong God i pa silera na masapa teni i vono vara la eŋi vaŋai na nora hehe, ale la levosahi na retivaraŋuhu, <sup>26</sup> ale vara ōmira la mele mai, la eŋi rovo na vuna non Tiapolo, matan tiroma enia mo taurilatira matan vara la pa vai na masalona.

### 3

#### *Na Pongi Hitahu*

<sup>1</sup> Pani o lo levosahi harihi: na pongi hitahu, rani ŋilangi sasati la pa mai. <sup>2</sup> Matan tamlohi la pa hase opoira, la pa opoi na mania, la pa hase taura aulu, la pa hapahapa, la pa retiretileji, la pa sopo ooloo na tamara teni tinara, la pa sopo vere meje matan te hinau, la pa sopo sile na ooloo isan te hinau mata

ooloo, <sup>3</sup> mo sopo te ōmopoia hinira, ōmira la pa sopo jovi matan te hina ōuhu tea mo vaia isara, la pa verelejeleji na hija tamlohi tinapua, la pa usuri na masalora purongo, la pa ōmpurongo na mauri, la pa ōuhu na hina ōuhu, <sup>4</sup> la pa tamlohi turuposi, la rongorongō vono, la ōmvono, la ōmaulu, la pa opoia vara la rongo i ōuhu purongo, pani la pa ōuhu vara la opoi God, <sup>5</sup> o pa hitera la vaia sohena la lo usuri na posposi God mo opoia, pani la pa sopo levosahi na suiha matan mauri sei God mo lo silea. Ale o sopo tapala peresi na tamlohi sohen haratu, <sup>6</sup> matan vonara hai la lo unu na ima tamlohi vara la haluhalu na haŋai rongorongō vono sei hehe nona haŋai la puhonira, ale masalora sasati tinatina-pua la lo revera, <sup>7</sup> tarea la haŋai atu la opoia vara la lavi na lelevosahi, pani la pa sopo eŋi tikeli na levosahi mata retivaraŋuhu. <sup>8</sup> Mo sohen Jannes enia Jambres sei la turuleji hin Moses tuai, ale la tamlohi nike sohena la turuposi na retivaraŋuhu, ale la lo vaikomokomo na ōmira, ale na mauri rasua, God mo tipahira.

*Exo* 7.11 <sup>9</sup> Pani la pa sopo eŋi turu i tuai, matan tamlohi la pa hitevosahia vara nora rongorongō vono mo sohen la tamlohi tupra rua atu tuai.

<sup>10</sup> Pani engko, ko lo usuri na noku vujangi, posiku, ōmiku mata mauri, noku rasua, noku ōmperavu, noku opoia, posiku mata turu

řilangi, <sup>11</sup> ale ko levosahia sohena sava tamlohi la pa tipahiau, ale rani řilangi sei tamlohi la lo silea isaku hin la jara sei Antioch, Iconium peresi Lystra, la rani tipahi atu la sati jea, pani noku Moli mo juriau hin la hinau tari atu! <sup>12</sup> Varařuhu, na lo vereja vara tamlohi la pa tipahi na tamlohi tari sei la opoia vara la usuri mauri atu God mo opoia hin Křisto Iesu. <sup>13</sup> Pani tamlohi sasati peresi na tamlohi halu la pa mai la mele sasati jea, la pa lo halu, ale tamlohi la pa halura.

<sup>14</sup> Pani engko o lo turu řilangi na hinau tari ko lavira moiso, ale ko levosahia mo řuhu vara enira reti-varařuhu, matan ko levosahi hare mo vujangiho hinira, <sup>15</sup> ale mo tapulo na rani engko ko pa lo natirihi ko pa levosahi na Retiulia tapu, enira natu purongo la eři vaiho o lelevosahi mata juri na malele rasua hin Křisto Iesu. <sup>16</sup> God mo mangovi na Retitapu tari, enira la řuhu mata vujangi, mo řuhu mata i vaitataholoi na řomřomi mo sopo tataholo, mo řuhu mata i mele vaitataholoi na posposi tamlohi, ale mo řuhu mata vujangi na malele matan mauri atu mo tataholo, <sup>17</sup> matan vara tamlohi non God i mai tamlohi eři eři matea matan mo tatamahu moiso mata vavahinau řuhu tari.

#### 4

<sup>1</sup> Na nahon God peresi Křisto Iesu, enia haratu sei i pa ari la haratu la lo mauri

peresi la haratu la mate hin rani tavera atu i pa pala, ale i pa Supe na varama, enau na lo vere harihi isam, <sup>2</sup> o retivujavujangi na Reti non God; o tatamahu tarea vara o vaia, hina purongo vara tamlohi la opoia teni la řohu hinia, o pisuhi na hehe nona tamlohi, o vere mamahunia na posposi lejileji, o retituetueni, ale o řomřomi peravu hin la hinau sei.

<sup>3</sup> Matan rani mo lo mai vara tamlohi la pa sopo tapurongo na vujangi řuhu, pani la pa takonahi la tija atu sei la lo vujangi la hinau sei mo lo usuri na masalora purongo. La pa usuri na vujangi purongo sei mo memeje na perora. <sup>4</sup> La pa pelati na perora la vaharı na retivarařuhu, ale la pa usuri na sorasora halu mata hinau matan tuai.

<sup>5</sup> Pani engko, tarea řomim i lo mera, o turu řilangi na rani řilangi, o vai na vavahinau nona evangelist, o vai vevuhi na nom vavahinau. <sup>6</sup> Matan nake mauriku la sureia mo sohena wai silesilea matea isan God, noku rani mate mo mai moiso. <sup>7</sup> Na pete vai na valum řuhu peresi na maromaro moiso, matan na turu řilangi hin retivarařuhu atu na lo vujangia mo tikeli nake. <sup>8</sup> Ale nake, God mo tau mamahuni na řongořongo nona supe matakua mata noku mauri tataholo. Moli sei enia haratu mo lo ari tataholo, i pa silea isaku hin rani tavera atu, ale mo sopo isaku haseku, pani isan la

haratu řomira mo tavera la lo kilau mata nona mele pala na varama.

*Retireti Mata Tueni Timothy*

<sup>9</sup> Timothy, o vaihitea vara o mai isaku vila. <sup>10</sup> Matan Demas mo opoi varama nike, ale mo rovo hiniau mo vano Thessalonica, ale Crescens mo vano Galatia, ale Titus mo vano Dalmatia. <sup>11</sup> Luke hasena mo lo toho peresiau.

Mo řuhu vara o lavi Mark i mai matan i pa eři tueniau tavera na vavahinau non Moli. <sup>12</sup> Na řule Tychicus mo vano Ephesus. <sup>13</sup> Vara ko mai, o lavi na noku ruru hamariri sei na taua na iman Carpus na vanua Troas. O lo řomřomia vara o pa lavi na puku atu, ale o sopo řomaliho na viriviri pepa.\*

<sup>14</sup> Alexander tamlohi atu mo lo voko na aen kopa, enia mo vaisatihiau, pani Moli i pa volia i tataholo na sava mo vaia. <sup>15</sup> O lo kilauho hasem matan Alexander, matan enia mo lo turuleji řilangi na nořa retisohai. <sup>16</sup> Tiroma na noku vaihite na nahon Supe matan Rome, tea mo sopo turu peresiau, pani enira mo isoiso la rovo hiniau, i pa řuhu vara God i řomira matana. <sup>17</sup> Pani Moli mo lo turu na pahisaku, mo sileau na suiha matan vara a eři retivujavujangi vevuhi na nona retisohai isana tamlohi řořoha, matan vara la eři rongovosahia. Pani Moli mo juriau, vara i vono, la viliau moiso. <sup>18</sup> Moli i pa juriau na

vavahinau sasati tari vara la pa sopo komoau, ale i pa laviau a unu hin mauri atu mo supe hinia na tuka. Isana, hasořaso tavera i vano mata rani tui tui, tarea. Amen.

*Isoiso Reti*

<sup>19</sup> O sile na noku retioloolo isan Priscilla enia Aquila peresi na vao iman Onesiphorus. <sup>20</sup> Erastus mo lo toho Corinth, Trophimus na taua mo rojo na taon Miletus. <sup>21</sup> O to vaihitea vara o mai tiroma moiso i pa taro hamariri. Eubulus, Pudens, Linus, Claudia peresi na vorai tari na rasua la sohai na nora retioloolo isam.

<sup>22</sup> Noku usiusi vara Moli i pa lo toho na maurim, nona řomřuhu i pa lo toho isamim.

\* **4:13:** viriviri pepa: Hijan hinau sei tuai la lo uli na Retiulia non God hinia la vaia na huri nani, teni pepa.

**Titus**  
**Leta**  
**Paul Mo Ulia Isan**  
**Titus**  
**Puku Nike**

Paul mo lo vere na hijan Titus na nona leta mara mo lo usuria hin rani atu mo lo vavahinau Asia Minor peresi Greece (2Co 2.13; 7.6, 13; 8.6, 16, 23; 12.18; Gal 2.3). Paul mo vere va va i pa viřoni na patu tamlohi nona kalesia atu na Uren Crete.

Pani Paul mo vere Titus vara te hinau la pa tataholo tiroma sohen harihi: hijara la pa řuhu (1.5-9) ale i pa tataholo vara la sopo hase vaira la lumiha na posposi sei la sopo tataholo nona tamlohi non God moiso (1.10-2.9).

Paul mo vere va va mauri paro nike mo mai matan sava God mo vaia hin Iesu Křisto: God mo jurira, mo hojera na nona reti na suihan Tanume Tapu matan vara la pa tau na nora řomtoho na mauri tui:

‘Mo juriřa, pani mo sopo matan te posposi tataholo řa vaia, pani mata nona řomopoa, mo juriřa na malele vora paro, ale mo hoje nařihi na nořa hehe, mo vaiřa řa turu na mauri paro, la hinau sei mo vaira na suihan Tanume Tapu. God mo sile purongoi na Tanume Tapu isařa hin Iesu Křisto nořa Jujuri.’ (3.5-6)

**Hin leta nike**

1. Retioloolo peresi na usiusi matan Titus (1.1-4)

2. Retileu mata patu tamlohi kalesia (1.5-16)
3. Retileu mata tamlohi kalesia (2.1-3.11)
4. Retituetueni peresi na isoiso retioloolo (3.12-15)

*Retioloolo Isan Titus*

<sup>1</sup> Leta nike, enau Paul na ulia, enau volitusi matea non God, ale vahařule non Iesu Křisto, matan vara a tueni na rasua non la haratu God mo viřonira, vara la pa levosahi na hina varařuhu mo lo tuenira vara la pa hahau na malele God mo avulahi hinia, <sup>2</sup> i usuri řomtoho atu mata mauri tui, haratu God mo sopo halu mo retitauhi hinia na pongi tiroma. <sup>3</sup> Na rani tataholo God mo taua moiso, mo vuhesi na nona reti na malele retivujavujangi, haratu God nořa Jujuri mo silea isaku usuri na nona retileu. <sup>4</sup> Leta nike, mo vano isam Titus, natuku tataholo na nořa rasua, řomřuhu peresi na tamata non God Tamařa peresi Křisto Iesu nořa Jujuri la mai isam.

*Vavahinau Non Titus*

<sup>5</sup> Hin rani atu na malue na ureuren Crete, na tauho matan vara o pa vai vevuhi tataholoi na sava na sopo isoiso hinia, ale vara o pa viřoni na patu tamlohi mata vao kalesia na taon tari atu, sohen na vere va isam. <sup>6</sup> Patu tamlohi matea mo sopo te hinau na maurina vara tea i eři pisuhia matana, narouna matea purongo, natuna la rasu Moli, ale la sopo lavi na hija sati mata lejileji teni matan la sopo ooloolo. <sup>7</sup> Patu

tamlohi atu mata kilau na vavahinau non God, i pa sopo tea i efi pisuhia hin te hinau na maurina, enia i pa sopo tamlohi matea mo lo rompurongo na tinapua, i pa sopo tamlohi lolokoru vila, i pa sopo tamlohi inu hajavua matea, i sopo tamlohi valvalum matea, moiso enia i pa sopo tamlohi haluhalu matea mata mania.\* 8 Pani i pa tamlohi matea imana mo roi isana tamlohi tari, mo opoia vara i tueni na hinau mo ruhu, romromi ruhu mo lo toho isana, nona aria mo tataholo, mo vokevoke, moiso romina mo rilangi vara i taurilati na masalona. 9 Enia i pa tauri rilangi reti atu ra efi rasua sei haratu la vujangia moiso matan vara i efi tueni na tinapua na vujangi tataholo, ale i turuhoro la haratu la lo turuleji hinia.

### *Ha Lo Kilau Mata Vujangi Haluhalu*

10 Matan, tamlohi matuvana la rohu vara la oloolo na tamlohi la lo tauri na suiha, la lo verevere vono, ale la tamlohi halu, na lo vere la haratu na vao tairalihi. 11 O sopo tinarihia vara la vujangi matan la lo komo na vao ima matan la lo vujangi na hinau mo sopo tataholo vara la vujangia, la lo vaia matan vara la pa lavi na mania. 12 Tuai, vonara matea nora p'rovet matea mara Crete, mo vereea vara, 'Mara Crete la lo retihalu tarea,

la tamlohi sasati, la maloko vari, la lo sohena poi.'

13 Retivuhesi sei mo lo vereea mo vara'ruhu. Matan haratu, o hapuhira i rilangi matan vara nora rasua i mauri i ruhu, 14 ale la pa sopo mele tapurongo na sorasora vono nona Jew teni na retileu non la haratu la lo rohu na retivararuhu. 15 Isana tamlohi romira la vokevoke, hinau tari la ruhu, pani isana tamlohi romira la hehe, ale la sopo rasua, hinau tari la vaia mo sopo ruhu. Tarea hehe mo tavuni na romira, la sopo mele levosahia vara sava mo tataholo teni sava mo sati. 16 La lo vereea vara la levosahi God, pani nora vavahinau mo lo vujangia mo memera vara enira la sopo levosahia, la sasati, la sopo oloolo hin God, ale la sopo ruhu matan vara la vai te hinau i ruhu.

## 2

### *Vujangi Tataholo*

1 Pani engko, o pa vujangi na sava hinau mo usuri na retivararuhu purongo. 2 O vujangi na vajiaha vara la pa hase taurilatira, ale posira i tataholo matan vara la lavi na oloolo matana, na nora vavahinau tari, la pa vaira i usuri na posposi lelevosahi, ale nora rasua i rilangi vararuhu peresi na nora opoia, ale nora turu rilangi tarea. 3 Harai jea sohena, o vujangira vara la vai na posira i tataholo matan vara la pa lavi na oloolo matana, la

\* 1:7: tamlohi mo kilau na tamlohi rasua: Greek mara bishop - patu tamlohi mata tamlohi rasua.



sopo sorasora tamlohi, moiso la sopo slev nona wai řilangi, pani la pa vujangi na sava hinau mo řuhu, <sup>4</sup> moiso la pa tatamahu vara la vujangi na hařai lahi vara la pa opoi na tuara peresi na natura i řuhu, <sup>5</sup> vara nora vavahinau tari la pa vaira i usuri na posposi lelevosahi, ale řomina i řilangi hin tuana purongo, ale la pa hařai řuhu na posposi kilau mamahuni na lolo imara tarea, la řomřuhu, tarea la ooloo hin tuara, matan vara i pa sopo sile te masapa vara te tamlohi i veresatihi na reti non God matara. <sup>6</sup> Uluvou sohena o pa retituetueni isara vara la vai na posira i tataholo matan vara la lavi na ooloo matana, <sup>7</sup> na vavahinau tari la lo vaira, engko o pa vujangira na tovongi řuhu na nom vavahinau vara la eři usurira, ale na nom vujangi o sopo vaia mata masalom, pani mata masalon God na posposi tataholo, <sup>8</sup> ale nom reti i pa tataholo varařuhu matan vara i pa sopo sile na masapa vara nom meresahi la pa veresatiho matan vara la haratu la meresahi isam, la pa mahanuhanu matan mo sopo te hinau sasati vara la pa vereea matařa. <sup>9</sup> O vujangi na slev vara la ooloo hin nora moli na hinau tari, la pa vaihitea vara la vaira la avulahi tarea, la sopo talai vara nora moli, <sup>10</sup> ale la sopo vavanaho isara, pani la vujangia isana nora moli vara la eři rasura, matan posira i pa vai na tamlohi

la opoia vara la tapurongo na retisohai non God nořa Jujuri.

<sup>11</sup> Matan God mo vujangi na nona řomřuhu mata juri isana tamlohi tari. <sup>12</sup> Mo vujangira vara řa isoiso na posposi hehe peresi na nořa masalo varama, ale nake na varama řa lo toho na mauri řa hase taurilatira, řa tataholo, ale řa usuri posposi atu God mo opoia, <sup>13</sup> enřa řa pa usuri la hinau atu nake řa lo sasaovi matan nořa řomtoho atu, rani atu nořa God sei nořa Jujuri Iesu Křisto i pa mele pala na hasohasona tavera hinia, <sup>14</sup> enia sei mo hasena silea matařa vara i volituhuřa na suiha vaivaileu tari, ale vara i onehiřa matan vara řa mai nona tamlohi, ale matan vara řa řomjea tarea mata řa vai na vavahinau řuhu. *Psa 130.8; Exo 19.5* <sup>15</sup> Enira natu, la hinau atu o pa vujangira. O retituetueni, ale o retitataholoira na nom suiha mata aulu. O sopo tinařihia vara tea i hitelehilehi na nom reti.

### 3

#### *Mauri Tataholo*

<sup>1</sup> O mele vere na tamlohi rasua vara la sile na ooloo isana tamlohi aulu peresi la haratu la lo tauri na suiha, ale vara la pa ooloo hinira, la tatamahu vara la vai na hina řuhu tarea. <sup>2</sup> O vujangira vara la sopo veresatihi na tinapua, la vahari na vasvas, ale la řomřuhu, ale posira la vujangi na řommalum isana tamlohi tari, <sup>3</sup> matan tiroma moiso enřa sohera, řa rongorongono vono, řa lejileji,

tamlohi la haluŕa, řa slev na masalo varama peresi na hinau řa opoira jea, řa lo usuri na posposi vaisatihi na tinapua peresi na posposi mereimerei moiso tamlohi la řohu hiniŕa, ale řa řohu hinira. <sup>4</sup> Pani na rani God noŕa Jujuri mo vujangi na nona řomřuhu peresi nona opoia isaŕa, <sup>5</sup> mo juriŕa, pani mo sopo matan te posposi tataholo řa vaia, pani mata nona řomopoia, mo juriŕa na malele vora paro, ale mo hoje naŕihi na noŕa hehe, mo vaiŕa řa turu na mauri paro, la hinau sei mo vaira na suihan Tanume Tapu. <sup>6</sup> God mo sile purongoi na Tanume Tapu isaŕa hin Iesu Křisto noŕa Jujuri, <sup>7</sup> matan vara řa pa eři mai natuna, ale matan vara řa levosahi mamahunia vara řa pa mauri jejeu, matan nona řomřuhu mo vaiŕa řa tataholo na nahona.

<sup>8</sup> Reti nike, ha eři rasua, ale na opoia vara o vere mamahuni la reti nike, matan vara la haratu la tau na nora rasua hin God la pa tatamahu vara la tau na řomira vara la vai na sava mo řuhu. La reti nike, la řuhu mata tuetueni isana tamlohi tari. <sup>9</sup> Pani o vahaři na sorasora vono peresi na sorasora mata mahapira, ale o vahaři na vasvas peresi na vauriuri mata Leu, matan la sopo eři tueni tea, ale enira la sopo řuhu hin te hinau. <sup>10</sup> Isana tamlohi mo patumasa, o pa retiŕoaŕoahai vaha rua, pani vara mo sopo tapurongo, o tipahia, <sup>11</sup> o pa eři levosahi mamahunia

vara tamlohi sohena, enia mo vahaři na retivarařuhu, mo hehe, mo hase tau na talai isana.

### *Isoiso Reti*

<sup>12</sup> Titus, vara a řule Artemas teni Tychicus isam, na opoia vara o vaihitea vara o mai isaku Nicopolis matan enau a pa toho atu na taro hamariri. <sup>13</sup> O tueni Zenas tamlohi lelevosahi mata leu atu peresi Apollos na malelera, o silera na sava la opoia mata malelera. <sup>14</sup> Mo řuhu vara noŕa tamlohi la levosahia vara la tau řomira mata tueni na tinapua, isan la haratu la vejeveju, ale o vere a isara vara la sopo toho purongo. <sup>15</sup> Tamlohi tari nike peresiau, la sohai na retioloolo isam. O sile retioloolo sei isan la haratu la opoi kamam na rasua. Romřuhu non God i toho isamim mo isoiso.

## Philemon Leta Paul Mo Ulia Isan Philemon Leta Nike

Philemon enia tamlohi tavitavu matea, nona slev la lo kilau na nona ima tavera, ale kalesia matuvana la lo matavuhi ea (1.2). Korong mo lo toho Colossae, matan leta Paul mo ulia isana mara Colossae mo vere na hijan nona slev sei Onesimus (Col 4.9, 17).

Paul mo lo uliuli na ima rilangi, mo uliuli matan Onesimus mo rovo na iman Philemon. Onesimus mo mai kalesia matea na rani mo tapai Paul, ale Paul mo uliuli isan Philemon vara i mele lavi Onesimus na imana sohena tapala matea hin Moli.

### Hin leta nike

1. Retioloolo isan Philemon (1-3)
2. Paul mo vere Philemon hin Onesimus (4-22)
3. Isoiso retioloolo peresi na nona usiisi (23-25)

### Tapulo Reti Isan Philemon

<sup>1</sup> Enau, Paul peresi voraiŕa Timothy nike, kama uli leta nike isam Philemon. Nike Rome, na lo toho na lolo ima rilangi, mata noku vavahinau na lo vaia matan Kŕisto Iesu. Ale engko tapalamam, kama lo hiteho sohena voraimam matea na vavahinau non Moli. <sup>2</sup> Ale leta nike, mo vano isan vevoraiŕa Apphia sohena, ale isan Archippus tamlohi vuro matea mata rasua sohemam

hin Iesu, ale isana vao kalesia la lo matavuhi na imam. <sup>3</sup> Romŕuhu peresi na tamata non God Tamaŕa peresi Moli Iesu Kŕisto i pa toho isamim.

### Opoia Rasua Non Philemon

<sup>4</sup> Tarea na noku usiisi na lo vere meje isan noku God matam, <sup>5</sup> mata na rongoa vara nom rasua hin Moli Iesu peresi na nom opoia isan la haratu la tapuhi non God, mo rilangi. <sup>6</sup> Enau na lo usiisi vara nom mauri rasua sei ko lo vujangia isana tamlohi rasua tinapua, i pa ulua, matan vara o pa levosahi mamahuni na hina ŕuhu matuvana na mauriŕa matan Kŕisto. <sup>7</sup> Voraiku, nom opoia mata tamlohi tinapua mo vaiiau na avulahi mo tavera jea, ale mo tahe na ŕomiku matan ko lo tueni na ŕom tapuhi non God la mele rilangi.

### Paul Mo Usi Philemon Matan Onesimus

<sup>8-9</sup> Ale matan ko opoi na tapuhi non God, enŕa rua ŕa levosahia vara i pa tataholo vara a vereho vara o vai na hinau tataholo purongo, pani na posposi opoia, na lo usiho vara o vai na hinau matea. Enau Paul na vajiaha nake, ale na lo toho na ima rilangi matan Kŕisto Iesu, <sup>10</sup> ale na lo retireti matan nom slev sei Onesimus, enia mo mai natuku na rani sei mo lo rohiau nike na ima rilangi. <sup>11</sup> Tiroma mo sopo ŕuhu matan te hinau hatea isam, pani nake mo ŕuhu isaŕa, enŕa rua. <sup>12</sup> Hina purongo vara na opoia mo

tavera jea, na lo řulea vara i mele hilu mai isam. <sup>13</sup> Na pa lo opoia vara i lo toho peresiau matan vara i lavi na jaram nike, vara i tueniau na noku rani řilangi mata Retiřuhu na ima řilangi. <sup>14</sup> Pani na sopo opoia vara a vai te hinau ko sopo avulahi hinia, teni matan vara te hina řuhu o pa vaia, o pa vaia i usuri na masalom purongo, pani mo sopo matan na lo ngurunguru hinia. <sup>15</sup> Korong Onesimus mo royo hiniho mata makomo rani purongo, matan vara i mele mai isam i pa toho jejeu, <sup>16</sup> pani nake, enia mo sopo slev purongo, pani mo jeu na slev, isaku enia vorai řuhuru matea, ale varařuhu enia i pa sohena isam, i pa mele hilu isam sohena tamlohi tuetueni matea, ale vorai matea hin Moli. <sup>17</sup> Ale vara ko lo řomřomia vara enřa řa tapala, o mele lavi Onesimus i mai isam sohena ko laviau. <sup>18</sup> Vara Onesimus mo lejiho teni mo ave hin te hinau isam, enia i pa noku ave. <sup>19</sup> Enau Paul, na lo hase uliuli isam, na sopo halu, enau a pa voli na nona ave, ale a pa sopo mele vereea vara maurim enia noku, matan ko pa lavi na mauri paro mata Retiřuhu isaku. <sup>20</sup> Ale voraiku, mo řuhu vara, o pa vai te hina řuhu hatea isaku matan Moli, o vaiau a avulahi, <sup>21</sup> na lo uliuli isam, na lo levosahia mo řuhu, vara o pa vai na sava na lo vereea. <sup>22</sup> Moiso, mele hinau matea, o tatamahuni te jaraku hatea, matan na lo

řomtoho vara a pa malue na ima řilangi nike, a pa mele mai isam matan ko lo usiusi matana.

*Isoiso Reti Non Paul Isan Philemon*

<sup>23</sup> Epaphras enia soheku mo lo toho na ima řilangi matan Křisto Iesu, enia mo sohai na retioloole isam. <sup>24</sup> Ale, Mark, Aristarchus, Demas peresi Luke, la haratu la lo vavahinau peresiau sohena, la sohai na nora retioloole isam, <sup>25</sup> Ale řomřuhu non Moli Iesu Křisto i pa toho na mapumim mo isoiso.

## Hebrews Leta Mo Vano Isana Tavgavu Israel Leta Nike

Leta nika, enia mo vano isana tavgavu Israel sei la tau nora rasua hin Iesu Křisto. Hija sei Hebrew enia hija atu Israel la hase tovira hasera hinia. Tatuara la lo řomkaka vara la pa usuri Iesu teni vara la mele usuri na leu non Moses. Puku akerihi mo vujangia vara Iesu mo jeu na hinau tari sohena angelo, Moses, přočet tari tuai, teni te přis aulu tuai, vao přis matan Israel. Ale enia mo mařivisi na hinau tari na Retitauhi Tuai (Old Testament). Mo vereia vara enřa řa pa sopo řomkaka na mauri rasua matan, Iesu enia nořa tovongi řuhu (Heb 12.2-3).

### Hin puku nika

1. Natun God mo aulu jea (1.1-4)
2. Iesu mo jeu na angelo (1.5-2.18)
3. Iesu mo jeu Moses (3.1-4.13)
4. Iesu enia Přis Aulu (4.14-7.28)
5. Retitauhi řuhu mo mai (8.1-9.22)
6. Mo mate vahatea mata rani tari (9.23-10.31)
7. Tovongi řuhu mata rasua (11.1-40)
8. Tovongi řuhu non Iesu (12.1-13.19)
9. Isoiso ususi (13.20-25)

*Iesu Křisto Enia Natun  
God*

<sup>1</sup> Tuai tiroma, God mo retireti vaha visa moiso, ale na malele matuvana isana nořa pua na nona přočet, <sup>2</sup> pani hin la pongi hitahu nika, enia mo pete retireti moiso isařa hin Natuna tataholo, God mo viřonia vara hinau tari enia koruna, ale hinia sei God mo vai na varama. <sup>3</sup> Natuna enia sasarami meran God, ale enia tovongina tataholo řa eři hitea, ale enia suiha sei mo vai na hinau tari la lo toho na nona reti suiha. Ale hin rani atu mo isoiso na nona vavahinau mata vaiřa řa vokevoke na hehe, mo sahe mo sakele na tavalu li-man God mata suiha tavera jea aulu na tuka.

### *Křisto Enia Mo Jeu Na An- gelo*

<sup>4</sup> Harihi mo vujangia vara Natun God enia mo aulu mo jeu na angelo, sohen hija atu sei God mo silea isana sei mo aulu jea na hijara. <sup>5</sup> Matan God mo sopo vereia isan te angelo na sava mo vereia isan Iesu sei mara:

‘Engko natu, natuku.

Nahapani enau na mai  
Tamam.’

*Psa 2.7*

Ale God mo mele vereia mara, ‘Enau a pa tamana, ale enia i pa natuku.’ <sup>2</sup>

*Sam 7.14*

<sup>6</sup> Ale hin rani atu mara mo lavi Natuna vora tiroma mo unu na varama mo vereia mara,

‘Angelo tari la pa lotua!’ *Deut 32.43*

<sup>7</sup> Ale mo retireti mata angelo mara,

‘Mo vai na nona angelo la sohena langi,

ale enira la volitusi  
purongo sei  
mo vaira na pepe hapu.' *Psa*  
*104.4*

<sup>8</sup> Pani isan natuna mo vere  
na reti matea mo aulu jea  
matana mara,  
'God, nom jara sakele mata  
suiha,  
enia i pa toho tui tui  
tarea.

Nom suiha mata Supe Aulu  
mo pala na hinau mo  
tataholo.

<sup>9</sup> Engko ko opoi na sava mo  
tataholo,  
ale ko rohu na sava mo  
sasati.

Matan haratu God, enau nom  
God na viřoniho,  
na surei na wel mata  
noku avulahi isam mo  
jeu na angelo.' *Psa*  
*45.6-7*

<sup>10</sup> Ale mo mele vereea mara,  
'Moli, na tapulo vavahinai  
na varama,  
engko ko tau na pulon  
varama nike,  
ale tuka enira vua nom  
vavahinai.

<sup>11</sup> Hina purongo vara enira la  
pa tihai,  
pani engko o pa toho je-  
jeu.

Enira la pa rovo sohena ruru  
tuai.

<sup>12</sup> O pa virivirira sohena  
tavalu ruru tuai,  
enira la pa posi,  
pani engko o pa lo sohena  
tarea,  
o pa sopo eři vajiaha.'  
*Psa 102.25-27*

<sup>13</sup> Ale God mo sopo retireti  
isana angelo sohen mo vereea  
isan Natuna mara,  
'O sakele na jara suiha na  
matuaku

vavano a vai na nom  
meresahi  
la toho na ruheruhu palom!'  
*Psa 110.1*

<sup>14</sup> Pani mo vereea mata  
angelo vara enira volitusi  
purongo sei mo lo řulera vara  
la lo matahi la haratu sei God  
i pa jurira.

## 2

*Retiřoařoahai Mata Va-  
hari Hin God*

<sup>1</sup> Matan haratu řa pa  
tapurongo mamahu na  
Retiřuhu sei řa pete rongoa  
moiso matan vara řa pa sopo  
sale nařihi hinia. <sup>2</sup> Retisohai  
matan leu atu God mo lo silea  
na lima angelo isan Moses  
mata tamlohi enia mo lo  
varařuhu tarea, ale mo vai  
na tamlohi la lavi talai atu  
mo tataholo mata nora tope  
na leu peresi na nora lejileji.

<sup>3</sup> Ra pa sopo eři rovo na talai  
tavera vara řa lo řomřomi  
purongo na vavahinai God  
sei mo vaia mata i juriřa  
hinia. Retisohai mata juriřa  
sei Moli mo vereulia isana  
nona tamlohi usuri tiroma,  
moiso enira la pa vereulia  
isařa. <sup>4</sup> God mo tueni na nora  
retisohai sei na matamata  
tavera, peresi na hinai  
tamlohi la hutura hinira,  
peresi na hinai mařurahi  
tinatinapua peresi na otori  
sei Tanume Tapu mo asera  
usuri na masalona isana  
nona tamlohi.

*Iesu Mo Mai Tamlohi*

<sup>5</sup> Matan sava kama lo  
vereulia nakerihi matan  
varama paro sei i pa mai,  
i pa sopo toho na lima  
angelo. <sup>6</sup> Matan hin te jara

na Retitapu, tamlohi matea  
mo vereia isan God mara:  
'Tamlohi enia sava hinau  
vara o lo řomřomia,  
ale Natun Tamlohi  
vara o lo kilaua?  
7 Matan ko vaia mo atano  
mo jeu na angelo

mata makomo rani,  
ale ko mele tahea aulu na  
hasohaso tavera  
mata lavi na oloolo tavera.

8 Ko tau na hinau tari na li-  
mana.'

*Psa 8.4*

Ale reti sei mo vereia vara  
mo aulu 'na hinau tari' mo  
řaramia vara mo sopo te  
hinau hatea vara mo sopo  
toho na ruhuruhu limana,  
pani nakerihi řa sopo lo  
hitera vara la lo toho na  
ruhuruhu limana enira mo  
isoiso.

9 Pani řa lo hite Iesu sei  
God, 'mo vaia mo atano jea na  
angelo mata makomo rani'.  
Nake mo mele, 'tahea aulu  
na hasohaso tavera mata lavi  
na oloolo tavera' matan enia  
mo vano na mateia matařa,  
matan vara na řomřuhu  
non God enia i pa lavi na  
mateia mata tamlohi tari.

10 Matan mo tataholo vara  
God sei mo lo vai na hinau  
tari, ale hinau tari enira  
nona, mo tataholo mata i  
lavi na natuna matuvana  
la unu na hasohasona. Hin  
la rani řilangi atu Iesu mo  
lavira, God mo vaia mo  
tataholo mo řuhu mata  
tiroma na tamlohi, enia natu  
mo tataholo vara i jurira.

11 Ale nakerihi Iesu peresi  
la haratu mo vaira la tapu,  
enira Tamara matelete.  
Matan hinau atu natu, Iesu  
mo sopo mahanuhanu vara  
i toviřa tasina teni vetasina,

12 ale mo vereia isan God  
mara:

'A pa vereulia vara hijam  
mo řuhuřuhu jea sohena  
sava

isana tasiku peresi na ve-  
tasiku.'

*Psa 22.22*

Ale mo mele vereia mara,

'A pa hasohasoho na livuha  
vao nom tamlohi.'

13 Mo mele vereia mara,  
'A pa rasu God!' *Isa 8.17*

ale usuri haratu mara,  
'Enau nahai peresi la  
natuvarihi atu sei God  
mo lo silera isaku.' *Isa*  
*8.18*

14 Matan haratu, matan  
natuna la vora tamlohi, enia  
sohena mo mai tamlohi  
tataholo, matan vara na nona  
mateia i pa komo na suihan  
Tiapolo sei mo lo tauri na  
suiha mata mateia, 15 ale i  
teri la haratu sei tarea la lo  
slev isana nora matahu mata  
mateia.

16 Ra levosahi mamahunia  
vara Iesu mo sopo mai vara i  
tueni na angelo, pani matan  
vara i tueni na mahapin  
Abraham. 17 Matan haratu,  
God mo vai Iesu mo mai  
soheřa tasina peresi na  
vetasina na malele tari,  
matan vara i eři mai nořa  
Přis Aulu na řomopoia,  
ale mo turu řilangi vara i  
vai na vavahinau isan God  
mata i voli nařihi na hehe  
nona tamlohi. 18 Matan  
enia sohena mo lavi na rani  
řilangi na vaihite sei la lo mai  
isana tamlohi tari, ale nake  
enia i eři tueniřa na nořa  
vaihite.

## 3

*Iesu Mo Aulu Mo Jeu Moses*

<sup>1</sup> Matan kamim ka vorai peresi na vevorai sei God mo tapuhiŕa matan na tuka, ha to ŕomŕomi Iesu, enia Vahaŕule, ale Pŕis Aulu sei ŕa lo tau na noŕa rasua hinia. <sup>2</sup> Enia mo lo turu ŕilangi na hinau tari God mo viŕonia matana, sohen Moses mo lo turu ŕilangi mata vao iman God. <sup>3</sup> Matan mo tataholo vara Iesu i lavi na hasohaso tavera i jeu Moses, sohena tamlohi voro ima matea i pa lavi na hasohaso tavera i jeu ima atu mo lo voroa. <sup>4</sup> Matan ima tari tamlohi matea mo vorora, pani God enia haratu sei mo voro na hinau tari.

<sup>5</sup> Moses mo turu ŕilangi na hinau tari God mo taua na limana vara i pa kilaura, pani enia volitusi matea purongo, ale sava mo lo vaira enira tovongi matea mata vujangi na hinau sei God i pa vuhesia hitahu. <sup>6</sup> Pani Kŕisto mo lo turu ŕilangi jea na hinau tari God mo taua na limana vara i pa vaira, matan enia Natuna tataholo sei mo aulu na iman God. Ale enŕa ŕa vao iman God, vara varaŕuhu vara ŕa lo turu ŕilangi na ŕomŕilangi peresi na noŕa ŕomtoho hin Kŕisto.

*Mapu Tataholo Non God*

<sup>7</sup> Matan hinau atu natu, Tanume Tapu mo vereea matana mara:

‘Nohorihi vara ha rongo na leoku,

<sup>8</sup> ha sopo vai na mapumim i ŕilangi isaku sohen Israel la lo vaia hin rani atu la turuleji hiniau,

hin rani atu la lo vaihite na noku ŕomperavuna tano koru.

<sup>9</sup> Hin jara atu tamamim la vaivaiau la vaihiteau, hina purongo vara la lo hite

na noku hinau maŕurahi tavera

mata tauni mo ngavulu vati moiso (40).

<sup>10</sup> Ale matana na lolokoru hinira, ale na vereea nara:

Tarea mapura mo lo kaka, ale la sopo levosahi na masaloku.

<sup>11</sup> Ale na noku lolokoru tavera mata nora hehe,

na vai na retitauhi matea nara:

La pa sopo eŕi unu na noku mapu hin te rani.’ *Psa 95.7-11*

<sup>12</sup> Ale matana, la vorai peresi na vevorai ruhuŕuhu, ha lo kilau mamahu vara te vonamim i sopo lavi te ŕomŕomi sati mata vai na mapuna i sopo mele rasu

God sei mo mauri. <sup>13</sup> Pani ha retituetueni kamim hatehateahi na rani hatehateahi tari sei ŕa lo tovira ‘nohorihi’, matan vara i pa sopo tea isamim i jovi na hehe, ale mapuna i mai i ŕilangi isan God. <sup>14</sup> Matan ŕa mai ŕa tapala peresi Kŕisto na nona vavahinau, vara varaŕuhu ŕa lo turu ŕilangi hin noŕa rasua atu tiroma i tikeli na isoisona. <sup>15</sup> Pani ha sopo ŕomaliho hin retiŕoaŕohai nike hin te rani:

‘Ha tapurongo na sava mo lo vereea nakerihi!

Ha sopo vai na mapumim i ŕilangi isan



God sohen Israel mo  
vaia hin rani atu la  
turuleji

hinia na jara tano koru.'

*Psa 95.7-8*

<sup>16</sup> Ale la tamlohi atu sei la lo turuleji hin God enira hare, hina purongo vara la rongo na leona? Enjora, enira pa la tamlohi atu sei Moses mo tiroma hinira la malue Egypt.

<sup>17</sup> Ale hare natu mo vai God mo lolokoru mata tauni mo ngavulu vati? Enjora, enira pa la tamlohi atu sei la lo hehe ale la mate na tano koru. <sup>18</sup> Ale God mo retitauhi isan hare natu vara la pa sopo efi unu na nona mapu hin te rani? Mo lo retireti isan la haratu la sopo ooloo hinia. <sup>19</sup> Ale matana, ra levosahia vara la sopo efi unu na nona mapu matan la sopo rasua.

## 4

### *Mapu Nona Tamlohi Non God*

<sup>1</sup> Matan haratu, ra lo kilau mamahu i ruhu matan, vara i vono, ha pa sopo efi lavi na vua nona retitauhi mata nona mapu sei mo lo turu. <sup>2</sup> Matan la retivujavujangi na Retiruhu isara sohen la vaia isan Israel tiroma moiso. Pani retisohai atu sei la rongoa mo sopo tuenira matan la sopo lavi na vuana peresi la haratu la rasu na sava la lo rongora. <sup>3</sup> Matan enra purongo sei ra rasua ra lo toho na nona mapu. Pani isan la haratu la sopo rasua, God mo vereea mara, 'Matan na noku lolokoru tavera na vere na retitauhi matea nara:

La pa sopo efi unu na  
noku mapu!'

*Psa 95.11*

Hina purongo vara nona mapu mo tatamahunia moiso mo tapulo hin rani atu mo pa vai na varama. <sup>4</sup> Ra levosahia vara mo tatamahu moiso matan Retitapu mo retireti na halimaravrua rani sohen harihi vara, 'Ale God mo mapu na halimaravrua rani na nona vavahinau tari'. *Gen 2.2*

<sup>5</sup> Pani hin pa reti atu tiroma sei God mo lo vereea mara, 'La pa sopo efi unu na noku mapu'. *Psa 95.11*

<sup>6</sup> Matan haratu mapu non God atu enia mo lo turu vara tamlohi la unu hinia. Pani la haratu la lo rongo na Retiruhu tiroma la sopo unu hinia matan la sopo ooloo. <sup>7</sup> Ale matana, God mo mele tau na rani tinapua matea mata unu na nona mapu, ale rani atu enia nakerihi. God mo mele vere rani mapu tinapua atu na sava David mo vereea hin rani atu hitahu hin reti atu na vereea isamim moiso sei nara:

'Ha tapurongo nakerihi na sava mo lo vereea.

Ha sopo vai na mapumim i rilangi isan God.' *Psa 95.7-8*

<sup>8</sup> Mapu paro nike la sopo lo lavia hin rani atu sei Joshua mo tiromara la lo toho Canaan, matan God mo pa vere nona mapu paro nike hitahu. <sup>9</sup> Ale matana, rani mapu tataholo matea mata tamlohi non God mo lo turu. <sup>10</sup> Matan tamlohi tari sei la unu hin Sabbath nike sei rani mapu non God atu, la

pa mapu na nora vavahinau sohen God mo vaia na nona vavahinau. <sup>11</sup> Ale matana, řa vaihitea vara řa unu hin mapu atu. Matan vara tea i usuri na tovongi mata lejileji atu, nona tavgavuin Israel tuai, i pa jovi sohera.

<sup>12</sup> Matan reti non God mo lo mauri, ale enia mo suiha. Enia mo voro mo jeu te sita vuro tavalu rua, mo unu na lolořa mo ase na řomiřa na masalořa, mo ariřa ale mo vujangiřa vara enřa řa sava tamlohi. <sup>13</sup> Mo sopo te hina mauri hatea i eři luhu hin God. Enia mo lo hite na hinau tari. Ale enřa mo isoiiso řa pa turu na nahona, ale řa pa vereuli na sava řa lo vaira isana.

*Křisto Enia Nořa Přis Aulu*

<sup>14</sup> Matana, řa lo taurilati na nořa rasua hin nořa přis aulu sei Iesu, Natun God sei mo sahe na tuka moiso. <sup>15</sup> Matan nořa přis aulu nike mo levosahi na nořa vejuveju, ale na varama enia mo lavi na vaihite tari sei řa lo lavira, pani mo sopo hehe. <sup>16</sup> Matan řaratu, řa řomřilangi mata mai na naho jara sakele non nořa God řuhuřuhu jea. Atu řa pa lavi na nona řomopoia, ale i pa tueniřa usuri na nona řomřuhu mata nořa vejuveju na mauriřa.

## 5

<sup>1</sup> Matan přis aulu tari la viřonira na vao tamlohi matan vara la pa turu na nahon God mata tamlohi, enia i pa lo sile na nora silesile isan God, peresi na malamalai mata hehe. <sup>2</sup> Enia i eři řomopoia la haratu la

sopo lelevosahi teni la jalio na retivarařuhu, matan enia sohena mo sohera. <sup>3</sup> Ale matan haratu, enia i pa sile na silesile mata hehe nona tamlohi peresi na nona hehe. <sup>4</sup> Ale tea i sopo eři mai přis aulu matea usuri na masalona hasena, pani vara God mo tovia purongo sohen mo tovi Aaron tuai. <sup>5</sup> Ale Křisto sohena, mo sopo hase tahea aulu vara i mai Přis Aulu, pani God natu mo tahea aulu, sohen reti nike sei mo lo vereea isana mara,

‘Engko natuku,

nahapani na mai  
Tamam.’ *Psa 2.7*

<sup>6</sup> Ale na jara tinapua matea na Retiulia God mo mele vereea isana mara,

‘Engko přis matea usuri na  
pin  
Melchizedek sei i pa toho  
jejeu.’

*Psa 110.4*

<sup>7</sup> Hin rani atu Křisto mo pa lo toho na varama, mo lo sohai na usiusi peresi na nona tangi na řomina peresi na tangi tavera, ale wai matana la lo jovi, ale nona usiusi mo sahe isan haratu sei i eři juria na mateia. Ale God mo lo rongoa matan Křisto mo tau na řomina mata lotua na ooloo. <sup>8</sup> Hina purongo vara enia natun God, enia mo pa levosahi na ooloo na malele rani řilangi. <sup>9</sup> Ale hin malele sei God mo vai-tataholoia mo mai Přis Aulu matea, ale mo mai pulon juri atu mata rani tui tui isana nona tamlohi tari sei la lo ooloo hinia. <sup>10</sup> Ale God mo taua vara i Přis Aulu usuri na pin Melchizedek.

*Ha Ulua Na Mauri Rasua*

<sup>11</sup> Hinau mo maʻivi mo pa lo toho sei kama opoia vara kama mele vereulira, pani kama hitea vara peromim la sopo rongo, ale mo řilangi vara kama eři vai kamim ha lelevosahi. <sup>12</sup> Kamim ka kalesia mo tuai moiso, ale i pa tataholo vara kamim ha lo vujangi na tinapua moiso, pani kama hitea vara kama lo mele vujangi kamim sohen la haratu la pa tapulo purongo na levosahi mata Retitapu. Ka mele sivo leji ka opoi na wai susu, mo sopo hanhahi řilangi. <sup>13</sup> Matan tamlohi tari sei la lo mauri na wai susu, la sopo lo levosahi na vujangi mata posposi tataholo matan enira la pa lo pipi. <sup>14</sup> Pani hanhahi řilangi enia hani la haratu la jea sei la lo hasera vujangira vara la eři hitevosahi na sava mo tataholo ale sava mo sasati.

**6**

<sup>1</sup> Matana haratu, řa ulua i jeu vujangi atu řa lavia na nořa mai paroparo na tapulo mauri rasua, ale řa vano řa jea, mo sopo matan vara řa pa mele vano na vujangi mata posi na vaivai vono, teni mata tau na rasua hin God, <sup>2</sup> teni na vujangi mata paptijo, teni tau na limařa mata ususi na tamlohi, teni mata sauteterahi nona mate, ale mata aria tavera non God. <sup>3</sup> Ale vara na masalon God, řa pa mele ulua řa vano na lelevosahi mata hinau tinatinapua.

<sup>4</sup> Matan mo sopo mele te malele tinapua hatea vara

tea i eři mele posi na nona hehe hinia, la haratu sei tiroma moiso la lavi na levosahi hin God, teni la hatiřoro na otori řuhu sei God mo lo silera, teni la tapala peresi na Tanume Tapu moiso, <sup>5</sup> ale la hatiřoro moiso na reti řuhu non God peresi na hinau mařurahi matan pongi atu mo lo mai, <sup>6</sup> ale na isoisona la vahari hin God. Mo sopo te malele hatea isara vara la eři mele posi na nora hehe, matan la lo mele vosae Natun God na talopeilopei na nora tipahia, ale la lo vaia na naho tamlohi.

<sup>7</sup> Ha lo levosahi harihi: vara lepa sei mo lo himi na wai usa mo lo jovi hinia, mo sile na vuana řuhu isan tamlohi isa matea, lepa atu mo lavi na leřuhu isan God. <sup>8</sup> Pani vara lepa atu mo vua na pahai ngařngařiha teni piko, mo sopo řuhu matan te hinau, ale tamlohi isa atu i pa řohu hin isa atu ale i pa sulia.

<sup>9</sup> Pani isamim la tapala řuhuřuhu, hina purongo vara řa lo retireti sohen harihi, kama sopo rasua vara reti sei mo lo pisuhi kamim sohen lepa sati atu. Kama levosahia vara kamim ka lo toho mata hina řuhuřuhu sei la lo mai peresi na nomim juri. <sup>10</sup> Matan God mo sopo tametame tea. I pa sopo řomaliho sohena sava ka lo voko řilangi nona, ale sohena sava ka lo vujangi na nomim opoia isana na nomim kilau řuhu na kalesia tinapua, sohen ka pa lo vaia nake. <sup>11</sup> Kama opoia mo tavera vara ha lo opoi na

tinapua i tikeli na isoiso maurimim, matan vara sava ka lo ņomtoho hinia i pa masese nomim. <sup>12</sup> Ale kama sopo opoia vara ņomimim la mate, pani ha pa usuri na tovongi non la haratu sei la pa lavi na retitauhi non God mata nora rasua peresi na nora ņomperavu.

### *Romtoho Mo Tai Na Retitauhi Non God*

<sup>13</sup> Sohen rani atu God mo retitauhi isan Abraham, God mo retitauhi na hijana purongo matan mo sopo te hija tinapua vara i mele aulu jea hinia mara:

<sup>14</sup> 'Varaņuhu a pa leņuhu hiniho i tavera jea, ale a pa vai na mahapim la maņivi savulevule.'

*Gen 22.17*

<sup>15</sup> Ale Abraham mo lo sasaovi peresi na ņomperavu, ale mo lavi na sava God mo retitauhi hinia.

<sup>16</sup> Vara tamlohi la vai na retitauhi matea, la pa vereaa na hijan tea sei mo mele aulu jea hinira, hija atu mo lihora vano hin retitauhi atu mo sopo te retiusia hinia vara i pa turu teni i vono. <sup>17</sup> God sohena, mo lihoa na retitauhi matea matan vara la haratu sei la lavi retitauhi atu la pa levosahi mamahunia vara i pa sopo eņi posi na ņomina.

<sup>18</sup> Ale God mo sileņa na nona retitauhi ale mo tau na hijana hinia. La hinau atu mo rua la sopo eņi posi matan God enia i sopo eņi halu. Matan haratu, enņa sei ņa rovo vano isana mata luhu, ņa eņi mele lavi na ņomņilangi paro, matan ņa eņi taurilati na nona retitauhi mata noņa rasua hinia.

<sup>19</sup> Noņa rasua hin retitauhi nike mo sohena matalalavo matea sei mo puhoni ale ņa eņi rasua mata mauriņa. Rasua nike natu mo vaiņa ņa eņi unu hin jara tapu sei non God na tuka. <sup>20</sup> Iesu mo pete unu atu tiroma moiso mataņa. Enia mo mai noņa Pņis Aulu matan tui tui usuri na pin Melchizedek.

## 7

### *Melchizedek Peresi Abraham*

<sup>1</sup> Melchizedek nike enia supe mata taon tavera matan Salem, ale enia Pņis Aulu non God sei mo aulu jea. Hin rani atu Abraham mo lo mele mule na vuoro tavera matea mo vaia peresi na supe matuvana, ale matan mo jeua, Melchizedek mo malue mo vano vara i tapaia ale mo leņuhu hinia. <sup>2</sup> Ale Abraham mo sile na sangavulu hinau tari sei mo lavira na vuoro isan Melchizedek. Rarami hijana enia 'Supe Mata Ari Tataholo'. Ale enia sohena mo supe mata tamata matan ņaramin Salem enia 'tamata'. <sup>3</sup> Tea mo sopo levosahi tamana teni tinana teni te tahisana, mo sopo te tapulo teni isoiso maurina. Enia mo lo toho jejeu sohena pņis matea, mo sohen Natun God.

### *Melchizedek Mo Aulu Hin Abraham*

<sup>4</sup> Ha to ņomņomia vara Melchizedek mo aulu sohena sava, matan Abraham hina purongo vara enia mo pulo vaon Israel, mo hitevosahia sohena sava Melchizedek mo mele aulu hinia, ale Abraham mo silea na sangavulu hinahinau sei mo lavira na

vuro isan Melchizedek. <sup>5</sup> Ale p̄ris matan Israel la tai na vaon Levi, Leu non Moses mo retileu vara la pa lavi na sangavulu hinau isana tahisara, hina purongo vara la mahapin Abraham sohera.

<sup>6</sup> Pani Melchizedek, hina purongo mo sopo tahisan Levi, mo lavi na sangavulu hinahinau isan Abraham. Ale Melchizedek mo tau na leʔuhu matea isan Abraham, Abraham mo pete lavi na retitauhi isan God moiso. <sup>7</sup> Ale mo sopo te retiusia hatea vara hare mo mele aulu: haratu mo lo sile na leʔuhu enia mo aulu mo jeu haratu mo lo lavi na leʔuhu.

<sup>8</sup> Ra levosahia vara tamlohi la lo sile na sangavulu hinahinau isana p̄ris nona tavitavin Israel sei la tamlohi purongo ale la pa mate hin te pongi. Pani Melchizedek mo mele aulu mo jeura matan ʔa rasua vara mo pa lo mauri. <sup>9</sup> Ale aulu hin haratu ʔa eʔi vereva vara mahapin Levi, la haratu sei la lo lavi na sangavulu hinahinau, la lo sile na sangavulu nora hinahinau isan Melchizedek hin nora pua Abraham. <sup>10</sup> Hina purongo vara Levi mo sopo lo vora hin rani atu, enia mo lo toho na epen Abraham moiso hin rani atu sei Melchizedek mo lo lavi na sangavulu hinahinau isan Abraham.

*Kristo Mo Sohen Melchizedek  
Tuai*

<sup>11</sup> Ale vara p̄ris na vaon Levi la eʔi vai vevuhi na masalon God, ale enira la p̄ris usuri na leu, mata sava natu God mo mele sohai na

p̄ris tinapua matea mo sohen Melchizedek, ale mo sopo lavia isana mahapin Levi sohen Aaron sei tasin Moses?

<sup>12</sup> Ale vara la haratu la lo tauri na vavahinau nona p̄ris la sopo mele tauria matan God mo mele viʔoni na tinapua, leu sohena i pa posi matan vara i majinga hinia.

<sup>13</sup> Matan haratu sei ʔa lo retireti hinia, enia mo malue na tavitavi tinapua matea, mo sopo isan Levi sei la lo volitusi na votavota na lolo Temple.

*Kristo Enia P̄ris Aulu*

<sup>14</sup> Ale mo memera vara noʔa Moli Iesu enia tavitavin Judah matea, pani ʔa levosahia vara Moses mo sopo vereva vara te tavitavin Judah matea i eʔi mai p̄ris matea.

<sup>15</sup> Ale nakerihi mo memera vara Kristo enia natu p̄ris tinapua atu i pa pala mo sohen Melchizedek. <sup>16</sup> Mo mai p̄ris matea mo sopo tai na tavitavin Levi usuri na Leu, pani mo usuri na suihin mauri atu non God sei i pa sopo eʔi mate hin te rani.

<sup>17</sup> Ale David sei mo lo uli na psalm mo pisuhia hin rani atu God mo lo retireti hin Kristo mara,

‘Engko o pa p̄ris matea tui tui, sohen Melchizedek.’ *Psa*

*110.4*

<sup>18</sup> Enjora, leu atu matan tuai mata p̄ris, God mo tau pahipahia matan i sopo eʔi mele vai te hinau matan mo sopo mele ʔuhu matan te hinau hatelete. <sup>19</sup> Matan leu mo sopo eʔi vai tea i mai i tataholo na nahon God, ale nake ʔomtoho matea mo

mele řuhu jea mo pete lavi na jarana moiso, matan hin Křisto řa eři mai mariviti isan God.

<sup>20</sup> God mo retitauhi na hijana hasena vara Křisto i pa pñis jejeu, pani mo sopo vereea isan te pñis tinapua.

<sup>21</sup> Pani isan Iesu hasena purongo God mo vereea mara, 'Moli God mo vai na retitauhi matea na hijana hasena,

ale i pa sopo eři tope na nona retitauhi nike:

Engko o pa pñis matea matan tui tui.'

*Psa 110.4*

<sup>22</sup> Matan God mo vai retitauhi atu na hijana hasena, ale matan Iesu mo lo toho hinia, retitauhi řuhu nike mo mele řuhu mo jeu retitauhi tuai atu mata Leu, matan i pa vai na sava God mo taua matana.

<sup>23</sup> Ale mele hinau tinapua matea hin hinau nike, enia vara tuai pñis mo mařivi, ale vara matea mo mate nona vavahinau mo hilu atu, ale tinapua i pa mele lavi na jarana. <sup>24</sup> Pani Iesu i pa lo toho sohena pñis jejeu; matan nona vavahinau mata pñis i pa sopo isoiso hin te rani.

<sup>25</sup> Matan haratu enia i eři juri na tamlohi tari sei la lo mai isan God mo vaia vahatelete purongo matan tui tui. Enia mo lo mauri jejeu matan vara i pa lo turu na nahon God mata i ususi matara.

<sup>26</sup> Iesu enia Pñis Aulu tataholo sei řa opoia matan enia mo tapu ale tea i sopo eři tuvaia hin te hinau, mo sopo te hehe isana. Nake God mo tauhasehia isana tamlohi

hehe, ale mo silea na jara aulu mata oloolo mo jeu na tinapua na tuka. <sup>27</sup> Ale enia i pa sopo sile na malamalai na rani hatehateahi sohena pñis aulu tinapua la lo vaia. Enira la vaia mata nora hehe tiroma moiso la pa vaia mata hehe nona tamlohi tinapua. Pani Iesu mo vaia vahatelete purongo matan tui tui hin rani sei mo hasena silea sohena malamalai na talopeilopei. <sup>28</sup> La haratu la lo pñis aulu na ruhuru leu non Moses, la sopo eři vai na tatua hinau tinapua, matan enira la tamlohi purongo. Pani hitahu hin rani atu haratu sei God mo sile na leu, God mo viřoni Natuna na retitauhi na hijana hasena, ale God mo vai natuna mo tataholo tui tui.

## 8

*Křisto Enia Nořa Pñis Aulu*

<sup>1</sup> Ale řomřomi tavera kama lo vereea enia nahai:

Nořa Pñis Aulu mo sakele na jara aulu mata oloolo mo jeu na tinapua na tuka na tavalu liman God. <sup>2</sup> Hin jara atu nořa Pñis Aulu Iesu mo lo vavahinau na lolo jara tapu sei Tabernacle varařuhu na tuka God sei mo voroa, mo sopo tamlohi.

<sup>3</sup> Ale matan pñis aulu tari la lo sile na silesilea peresi na malamalai isan God, matan haratu mo tataholo vara nořa Pñis Aulu sohera i pa sile te hinau sohera. <sup>4</sup> Vara enia i pa lo toho hin varama nike, i pa sopo pñis matea, matan pñis la pete toho moiso mata sile na silesilea sei leu non Moses mo vereea. <sup>5</sup> La lo volitusi na

tent sei la tovia Tabernacle nike na varama, ale enia tovongin haratu na tuka purongo, hina varaʻuhu mo lo toho na tuka. Matan hin rani atu Moses mo tatamahu vara i voro Tabernacle atu, God mo sile retiʻoaroahai nike isan Moses mara, 'O lo kilau mamahunia vara ko lo voroa, o voroa usuri tovongi atu na vujangia isam nike na vutivuti'.

*Exo 25.40; 26.30*

6 Pani noʻa Pʻris Aulu mo lavi na vavahinaiu matea mo aulu mo jeu la haratu la lo volitusi usuri na leu tuai. Ale matan enia natu mo lo toho hinia, retitauhi sei God mo silea mo mele ʻuhu jea matan mo turu na retitauhi ʻuhu mo jeu la haratu mo lo silera tiroma.

7 Ra levosahia vara retitauhi atu tiroma usuri na leu mo sopo ʻuhu, matan God mo mele vai na harua retitauhi tinapua matea vara i lavi na jarana. 8 God hasena mo hitea vara tiroma retitauhi atu mo sopo ʻuhu hin haratu mo vere akerihi mara:

'Rani matea i pa mai, Moli God mo lo vere a vara:  
A pa vai na retitauhi paro matea

peresi na tavgavu in Israel peresi la haratu Judah.

9 Retitauhi paro nike i pa sopo sohen haratu na vaia tiroma peresi na nomim pua

hin rani atu na lo tauri na limara  
ale na tiroma hinira la malue Egypt.

La sopo usuri tataholoi na noku retitauhi ale na

vahaʻi hinira, Moli God mo vere a.

10 Pani matan harihi natu, a pa vai na retitauhi paro sei

peresi na tavgavu in Israel hin rani atu mo lo mai,

enau Moli God na vere a nara:  
A pa tau na noku leu na ʻomira,

matan vara la eʻi rongo-vosahira,

ale a pa ulira na mapura, matan vara la eʻi oloolo hinira.

Enau a pa nora God, ale la pa noku tamlohi.

11 Ale la pa sopo mele vujangi na tavgavura tinapua teni na voraira hate-hateahi lara,

"Ha levosahi Moli God!"

Matan tamlohi tari, mo tapulo na tamlohi purongo

mo tikeli na tamlohi aulu, enira mo isoiso la pa levosahiau.

12 Ale a pa ʻomi na nora hehe, ale a pa sopo mele ʻomʻomi na nora hehe.' *Jer 31.31-34*

13 Ale hin rani atu God mo retireti hin retitauhi paro nike, mo ʻaramia vara retitauhi tuai atu mo vaia tiroma mo pete isoiso moiso. Enia mo pete vajiaha moiso ale mariviti i tihai.

## 9

*Posposi Lotu Tuai Nona Jew*

1 Ale hin retitauhi atu tiroma God mo vaia peresi Israel, mo tau na retileu mata lotu peresi na nona tent tapu mata lotu matea

na varama. <sup>2</sup> Vara la turuhi tent atu, la pa viliroto na jara mo rua na lolon tent atu. Na tiroma jara, peri lamu matea, ale tep matea sei la lo tau na pereti tapu hinia. Tiroma jara nike la tovia Jara Tapu. <sup>3</sup> Ale tavalu ruru matea mo kehooro na harua jara sei la tovia Jara Tapu Jea. <sup>4</sup> Hin jara atu, la tau na votavota mata suli na hasori matea la vaia na gold, peresi na puhoro matea la evea na gold la tovia 'Puhoro Mata Retitauhi'. Ale na lolon puhoro atu, potele matea la vaia na gold, manna mo lo toho na lolona, tihonin Aaron sei mo lo juliha, peresi la vatu atu Moses mo lo uli la retileu atu mo sangavulu hinira. <sup>5</sup> La vai na tovongi angelo mo rua na gold la tovara cherubim na pusan puhoro atu. La firahi na hapara vara la tavuni na pusan puhoro atu, jara tataholo atu natu pris aulu mo lo turusi na rae mata malamalai hinia. Pani nakerihi kama sopo eri vereuli vevuhi la hinau nike.

<sup>6</sup> Vara la tau mamahuni la hinau atu mata lotu moiso, pris la eri tapulo unu ale la lo malue mata vai na nora vavahinau hin Jara Tapu atu. <sup>7</sup> Pani pris aulu hasena i eri unu hin jara atu mo tapu jea, ale vahatelete purongo na tauni matea, ale tarea peresi na rae sei mo lo silea isan God matan vara i tavuni na nona hehe peresi na hehe nona tamlohi tinapua sei la lo vaira na limara purongo, enira la lo toho vavano malele paro mata mai mariviti isan God mo pala.

mo vaia mo memera isaia nake vara malele atu sei God mo lo tinafihia vara tamlohi purongo la eri mai mariviti isana hin jara atu sei mo tapu jea mo sopo lo pala hin rani atu tent atu mo lo turu.

<sup>9</sup> Hinau nike enia tovongi matea mo lo pisuhi rani nike nahapani. Matan la otori atu peresi na malamalai sei pris la lo silera, la sopo eri vai na romi tamlohi sei la lo lavira la mai mata lotua la vokevoke. <sup>10</sup> Matan retileu matan tuai usuri na leu, enia mata hanhani peresi na wai, ale hoje na hinau tinatina-pua peresi la hinau sei tamlohi la lo vaira na limara purongo, enira la lo toho vavano malele paro mata mai mariviti isan God mo pala.

### *Kristo Enia Malamalai Tataholo*

<sup>11</sup> Pani nakerihi Kristo mo mai Pris Aulu mo aulu na hinahinau ruhu tari sei la mai moiso, ale mo unu hin Jara Tapu atu na tuka sei mo tataholo jea, hara sei lima tamlohi la sopo vaia, mo sopo sopesopen varama nike, <sup>12</sup> ale mo unu hin Jara Tapu Jea atu vahatea mata rani tari, pani mo sopo unu peresi na rae nani teni natu buluk, pani mo unu peresi na raena hasena. Ale na raena mo vai tataholo na malele mata noia juri matan tui tui.

<sup>13</sup> Matan vara posposi tuai mata turusi na rae nani peresi na rae buluk peresi na patmakovi mata natu buluk mo eri vai na epe tamlohi la vokevoke mata nora posposi mata tope na leu sei mo



vaira la lumiha, <sup>14</sup> ale ha to romromia sohena sava rae Kristo i efi onehi na mapuŋa na noŋa rasua na noŋa vavahinau purongo, matan vara i vaira ŋa efi lotu God sei mo mauri usuri na masalona. Kristo na suihan Tanumen God sei mata tui tui, mo hasena silea isan God sohena malamalai tataholo matea mata hehe. <sup>15</sup> Ale matan haratu, enia natu mo vai na malele matan vara retitauhi paro atu i efi mai, matan vara la haratu sei God mo lo tovira la efi lavi na koruna sei la sopo efi tihai God mo retitauhi hinira. Matan Kristo mo mate vara i vaira la materi na talai mata hehe sei la vaira na ruhuruhun retitauhi atu tiroma.

*Matea Non Iesu Mo Vai Na Retitauhi Paro Mo Mauri*

<sup>16</sup> Ale vara tea mo sile na nona reti matan te koruna ale hitahu i pa mate, i pa sopo tea i efi lavi te koruna i tikeli rani atu la levosahia mo ŋuhu vara mo mate. <sup>17</sup> Nona reti atu mata koruna i pa lo turu i tikeli rani atu tamlohi atu mo lo ulia mo mate. Vara mo pa lo mauri, tea i sopo efi lavi te koruna sei mo retitauhi hinia isara.

<sup>18</sup> Matan hinau atu natu, retitauhi atu tuai mo tapulo peresi na rae. <sup>19</sup> Matan Moses mara mo sile na retileu isana tamlohi tari usuri na hinau tari na leu, mo lavi na rae natu buluk peresi na nani, ale wai peresi na vulu sipsip hahara peresi na bras rihirihii matea la vaia na ranga hyssop vipahai matea, ale mo turusi na puku leu peresi na tamlohi tari na rae, <sup>20</sup> ale mo

lo vereea mara, 'Harihi enia rae mata retitauhi sei God mo retileu hinia vara ha lo turu hinia'. *Exo 24.8*

<sup>21</sup> Ale hin malele atu purongo mo turusi na tent peresi na hinau tari sei la lo vavahinau peresira mata lotu God.

<sup>22</sup> Varaŋuhu, ŋa efi vereea usuri na leu non Moses, mariviti hinau tari la mai la vokevoke na malele turusi na rae, ale God i pa sopo romi na hehe vara rae i sopo roro.

<sup>23</sup> Ale la hinau atu la lo masese na lolo tent, la lo tovongi na hinau na tuka, ale pŋis mo vaira la vokevoke na rae maji purongo. Pani hinau atu na tuka, God mo vaira la vokevoke na malamalai ŋuhuŋuhu jea matea, mo jeu na rae maji.

<sup>24</sup> Matan Kristo mo unu na tuka tataholo vara i turu na nahon God sohena noŋa tuetueni. Enia mo sopo unu na tent mata lotu nona tamlohi varama matan haratu na varama enia tovongi matea hin Temple atu na tuka. <sup>25</sup> Mo sopo unu na tuka matan vara i mele hasena silea tarea sohena pŋis aulu matea mo lo vaia hin rani atu mo lo unu na Jara Tapu Jea na tent hin varama nike na tauni hatehateahi vara i lo sile na rae maji. <sup>26</sup> Vara i sohena Kristo i pa lo mate vaha visa, i tapulo hin rani atu varama mo tapulo, pani mo vono. Mo mai vahatea mata rani tari hin rani hitahu nike vara i lavi naŋihi na suiha hehe jejeu na nona malamalai sei mo mate mataŋa.

<sup>27</sup> Ale God mo taua vara tamlohi hatehateahi la pa mate vahatea, ale hitahuna

la pa turu na aria, <sup>28</sup> ale mo sohena purongo, Křisto mo mate vahatelete purongo sohena malamalai matea mata lavi nařihi na hehe nona tamlohi matuvana. I pa mele mai, pani mo sopo mata nořa hehe. Hin rani atu i pa lavi na juri non la haratu sei la lo kilau matana.

## 10

### *Malamalai Non Křisto*

<sup>1</sup> Posposi tuai mata leu non Moses enia řořoa hinau purongo mata hinau řuhu sei la pa mai, hina varařuhu sei Křisto mo vaia matařa. Malamalai na posposi tuai mata leu, la lo vaia tarea na tauni hatehateahi, la sopo eři vai la haratu sei la lo mai mata lotu vara la vokevoke vevuhi. <sup>2</sup> Vara la pa lo eři vai na tamlohi la vokevoke vevuhi, malamalai korong mo isoiso moiso. Matan la haratu la lo lotu la pa vokevoke vahatea mata rani tari, ale puhoni nora hehe mo pete tihai isara moiso. <sup>3</sup> Pani la malamalai atu la lo vai na tamlohi la lo mele řomřomi na nora hehe na tauni hatehateahi. <sup>4</sup> Matan řae buluk peresi na řae nani la sopo eři lavi nařihi na hehe. <sup>5</sup> Matan hinau atu, na rani Křisto mo sinai na varama mo vereea isan God mara,

‘Ko sopo opoi na malamalai la lo vaia na maji teni na hanhani.

Pani ko sileau na epe matea vara a mai nom malamalai tataholo.

<sup>6</sup> Varařuhu ko sopo avulahi

na maji la lo sulira na votavota  
teni na silesile mata hehe.

<sup>7</sup> Ale na mele vereea nara:

Ko hiteau, enau nahai na sinai  
vara a vai na masalom God  
vara a usuri na sava la ulia moiso  
na Retitapu matakau.’ *Psa*  
*40.6-8*

<sup>8</sup> Sohen Křisto mo vereea moiso mara, ‘Ko sopo opoi na malamalai la vaira na maji teni na hanhani teni na maji la sulira na votavota teni te silesile tinapua mata hehe, ko sopo avulahi hinira.’

(Ko hitea, Iesu mo lo vereea sohen harihi, hina purongo vara leu non Moses mo vereea vara tamlohi la pa vaira.)

<sup>9</sup> Ale Křisto mo mele vereea mara, ‘Ko hitea, enau na lo mai vara a vai na masalom.’ Iesu mo vai na retitauhi matan tiroma vara i isoiso matan vara harua retitauhi nike i eři turu. <sup>10</sup> Ale usuri na masalon God enia mo vaiřa řa tapu na malamalai mata epen Iesu Křisto vahatea mata rani tari.

<sup>11</sup> Usuri na retitauhi tuai, pñis la turu na naho votavota na rani hatehateahi mata sile na malamalai sei la sopo eři lavi nařihi te hehe hin te rani.

<sup>12</sup> Pani nořa Pñis Aulu mo hasena silea isan God sohena malamalai matea mata hehe sei mo řuhu mata rani tari. Ale nake mo lo sakele na jara oloolo tavera mo aulu mo jeu na tinapua na tavalu liman God. <sup>13</sup> I pa lo sasaovi atu vavano i tikeli rani atu God i vai na nona meresahi la toho na ruhuruhu palona.

<sup>14</sup> Matan hin silesile atu matelete purongo, Křisto mo

vai tataholoi na nona tamlohi sei mo lo vaira la tapu mata rani tui tui. <sup>15</sup> Ale Tanume Tapu sohena mo vereulia vara enia mo sohena; matan mo lo vereia na reti non Jeremiah mara,

<sup>16</sup> 'Moli God mo vereia mara: Retitauhi paro akerihi natu,

a pa mele vaia peresi na noku tamlohi hin rani atu.

A pa tau na noku leu na mapura,

matan vara la pa levosahira,

ale a pa ulira na řomira, matan vara la pa eři oloolo hinira.' *Jer 31.33*

<sup>17</sup> Ale mo mele vereia mara, 'A pa sopo mele řomřomi na nora hehe peresi na nora tope na leu.' *Jer 31.34*

<sup>18</sup> Ale vara God mo řomi na hehe moiso, mata sava natu tea mo opoia vara i mele sile te malamalai mata hehe?

### *Ra Turu Rilangi Hin Křisto*

<sup>19</sup> Ale la vorai peresi na vevorai řuhuřuhu, nake řomiřa i eři řilangi mata unu hin Jara Tapu Jea atu na tuka mata řaen Ieřu. <sup>20</sup> Mateia non Křisto mo vai na malele paro sei mo lo sile na mauri, ale mo roia vara řa eři jeu tavalu ruru tapu atu řa mai mariviti isan God.

<sup>21</sup> Ale matan Iesu nořa Přis Aulu jea mo lo kilau na iman God, <sup>22</sup> mo řuhu vara řa mai mariviti isan God, řomiřa i sopo řomkaka, nořa rasua i řilangi, matan nořa řomřomi sasati God mo turusira moiso na řaen Křisto, matan vara

i vai na řomiřa la vokevoke, ale mo paptijo na epeřa na wai niro.

<sup>23</sup> Ha sopo řomkaka, pani řa lo taurilati řomtoho nike sei řa lo vereia vara řa lavia moiso, matan řa eři rasua vara God i pa sopo tope nona retitauhi paro nike.

<sup>24</sup> Ha aleale malele vara ha eři tueni kamim hatehateahi hinia mata vujangi na nomim opoia isana tinapua. <sup>25</sup> Ale řa sopo řomřomi purongo na nořa pulutahi jara matea sohena tamlohi hai la lo řomřomia,

pani řa retituetueni ale řa retiřoarõahaiřa hatehateahi, řa tau na řomiřa mata nořa pulutahi tarea matan nona mele mai mo lo mai mariviti.

<sup>26</sup> La tapala řuhuřuhu, vara řa lo opoia vara řa lo hehe, hina purongo vara řa lavi vevuhi na lelevosahi mata retivararõuhu moiso, mo sopo te mele malamalai tinapua vara i eři tavuhoro la hehe atu. <sup>27</sup> Pani ha lo levosahia vara řa pa sopo eři kilau matan te hina řuhu pani řa pa lo kilau purongo mata lolokoru sasati sei mata aria non God sei i pa mai sohena hapu řilangi jea matea matan vara i suli nařihi na nona meresahi.

<sup>28</sup> Tuai vara tea mo řohu vara i oloolo na leu non Moses, la pa sopo řomopoia, ale la pa vilimateia usuri na vereulia nona tamlohi mo rua teni mo tolu mata nona hehe.

<sup>29</sup> Ha lo levosahia vara i pa sati jea isan la haratu sei la rasua moiso ale la mele jovi na hehe, matan la lo varasi Natun God, ale la lo

vai na ņae mata retitauhi sei mo tapuhira hinia mo sohena hina purongo matea. Tamlohi sohena, la lo vaivai na Tanumen God sei mo lo lavi na ņomŕuhu non God mo mai isara.

<sup>30</sup> Matan ņa levosahia vara haratu sei mo lo vereea mara, 'Enau a pa kele.

Enau a pa mele sile na volira  
i tataholo na sava la vaira.'  
*Deut 32.35*

Ale mo mele vereea mara,  
'Moli i pa ari na nona tamlohi.'

*Deut 32.36; Psa 135.14*

<sup>31</sup> Enia hina sasati tavera mata matahu matea vara ko jovi sivo na liman God sei mo lo mauri.

<sup>32</sup> Ha sopo ņomaliho hin la rani atu tiroma sei ka lavi na lelevosahi hin Kŕisto hinira. Ha mele ņomŕomia sohena sava ka lo turu ņilangi, hina purongo vara ka levosahia vara ha pa lavi na rani ņilangi tavera matana.

<sup>33</sup> Hin la rani atu tamlohi la verelejileji kamim na naho tamlohi, ale la tamaji kamim, ale hin rani atu ka lo tueni na tinapua sei la lo lavi na rani ņilangi sohemim. <sup>34</sup> Ka lo lavi na rani ņilangi peresi la haratu sei la pulahira na ima ņilangi, ale hin la rani atu la lavi naŕihi na nomim hinahinau tari, ka tinaŕihia, ale ņomimim mo sopo sati matana, matan ka levosahia moiso vara hina ņuhuŕuhu jea hai matan tui tui la lo saovi kamim na pongi hitahu.

<sup>35</sup> Ha sopo tinaŕihi na nomim rasua ņilangi hin Moli, hina purongo vara sava

i pa masese. Ha ņomŕomia vara voli nomim rasua sei i pa mai mo tavera jea matana. <sup>36</sup> Ale nakerihi ha ņomperavu! Ha turu ņilangi mata vai na masalon God, matan hitahu ha pa lavi vevuhi na sava mo retitauhi hinira moiso.

<sup>37</sup> Ale God mo vereea vara,  
'I pa sopo tuai haratu sei mo lo mai i pa pala, ale i pa sopo vai malum.

<sup>38</sup> Ale tamlohi sei la tataholo na nahoku  
la pa hahau na nora rasua.

Pani a pa sopo avulahi hin la haratu sei la vahaŕi hiniau.'

*Hab 2.3-4*

<sup>39</sup> Pani enŕa ņa sopo sohen la haratu sei la vahaŕi hin God, ale la pelati na nora malele mauri tui. Noŕa rasua nike mo vaiŕa ņa levosahi mamahunia vara God i pa jurifa.

## 11

### *Tovongi Ruhu Mata Rasua*

<sup>1</sup> Rasua enia sava? Enia levosahi mamahuni sei vara sava ņa lo ņomtoho matana i pa masese. Enia noŕa levosahi mamahuni na hinau sei ņa sopo lo eŕi hitera nake. <sup>2-3</sup> Na rasua, ņa levosahia vara varama nike mo pa pala usuri na reti non God, ale na rasua ņa levosahia vara hinau tari ņa lo hitera la tai na hinau ņa sopo eŕi hitera.

God mo avulahi na tamlohi matan tuai mata nora rasua.

<sup>4</sup> Enia mata rasua sei, Abel mo sile na malamalai mo jeu Cain, ale God avulahi hinia ale hinau nike mo vujangia vara Abel mo tataholo na nahon God. Ale hina purongo

vara Abel mo mate tuai űuhu moiso, tovongi mata nona rasua mo pa lo retireti isaűa nake.

<sup>5</sup> Enia mata rasua sei, Enoch mo sahe na tuka mo sopo mate – ‘vahatea purongo mo tihai matan God mo lavi naűihia, matan God mo avulahi hinia mata nona rasua’.

<sup>6</sup> Ale ka hitea, o sopo eűi vai God i avulahi vara mo sopo te nom rasua. Tea vara mo opoia vara i mai isana, i pa rasua vara God mo lo toho ale enia i pa voli la haratu sei la lo alea varaűuhu.

<sup>7</sup> Enia mata rasu sei, Noah mo voro na aka matea vara i pa juri na vao imana hin wai tatave tavera atu. Matan mo lo lotu God na matahu, mo lo ooloo na nona retiűoűoahai mata hinau matea mo sopo lo masese hin te pongi. Sava mo vaia usuri na nona rasua mo sile na talai isana tamlohi tari na varama hin rani atu, ale matan nona rasua sei mo mai mo tataholo na nahon God.

<sup>8</sup> Enia mata rasua sei Abraham mo ooloo hin God hin rani atu mo tovia vara i malue na jarana vara i vano na jara tinapua matea, jara atu God i pa silea sohena koruna isana. Abraham mo vano pani mo sopo levosahia vara i pa vano tataholo epu.

<sup>9</sup> Ale mara mo kakau hin jara atu God mo retitauhi hinia isana, mo lo toho atu na rasua matan enia mo sohena vinano matea, ale mo lo juruvi na tent matea. Ale Isaac enia Jacob la juruvi na tent sohena. Retitauhi atu God mo silea isan Abraham enia nora

sohena. <sup>10</sup> Abraham mo pa vaia sohena matan mo lo kilau toho matan taon tavera atu sei mo puloha, ale God sei mo voroa usuri na űomina.

<sup>11</sup> Enia mata rasua sei Sarah enia Abraham la eűi tape na natirihi matea, hina purongo vara la vajiaha sasati moiso ale Sarah enia mo aroaro. Abraham mo rasua vara God i pa vai na nona retitauhi isan Sarah. <sup>12</sup> Ale vao tavera sei la malue hin tamlohi nike matelete purongo sei mo vajiaha sasati moiso vara i eűi vasusu, mahapina la vao vao sohena vitusarasara na masapa, ale mo sohena piri oneone na pahisa tasi sei tea i sopo eűi evira.

<sup>13</sup> La tamlohi tari nike la mate, pani la sopo lo lavi na sava God mo retitauhi hinia isara, pani na nora rasua la kilau vano la hitea mo lo toho asau, ale la avulahi na retitauhi non God. La majinga vara enira la vinano purongo ale mata hahau űalihi purongo na varama.

<sup>14</sup> Matan tamlohi sei la lo retireti sohen haratu na varama, la lo vujangia mo memera vara enira la lo kilau toho mata jarara tataholo.

<sup>15</sup> Vara la lo űoműomi na jara sei la malue hinia, korong la mele mule moiso. <sup>16</sup> Pani enira la lo ale na jara űuhu matea aulu na tuka. Matan haratu, God mo avulahi vara la tovia nora God matan enia mo tatamahu na taon tavera matea na tuka matara.

<sup>17</sup> Enia mata rasua sei Abraham mo sile Isaac sohena malamalai matea hin rani atu God mo vaihitea aulu hin vutivuti atu. Pa

Abraham atu sei mo lo lavi na retitauhi non God mo tatamahu vara i vilimatei natuna vorahese Isaac so-hena malamalai. <sup>18</sup> God mo retitauhi isan Abraham mara, 'Hin natun Isaac natu mahapim la pa lo tauri na hijam'.

*Gen 21.12*

<sup>19</sup> Abraham mo romromia mara vara Isaac i mate, God i eri mele vaia i mauri. Ale na malele matea, vararuhu Abraham mo pa mele lavi natuna na mateia.

<sup>20</sup> Enia mata rasua sei Isaac mo le'uhu hin la natuna atu mo rua, Jacob enia Esau. Enia mo levosahi mamahuni na sava God i pa vaia na pongi mo lo mai.

<sup>21</sup> Enia mata rasua sei Jacob hin rani atu mo vajiaha ale mariviti vara i mate, mo le'uhu na natun Joseph hate-hateahi, ale Jacob mo popovito-ho mata lotu God, ale mo lo tauri na tihonina.

<sup>22</sup> Ale enia mata rasua sei Joseph hin rani atu mariviti vara i mate, mo retireti sohen mo levosahi mamahunia vara God i pa lavi narihi na tamlohin Israel la malue Egypt vara la sahe Canaan. Mo levosahi mamahunia hin rani atu sei mo retileu isara mara vara la malue la pa lavi na suina peresira.

<sup>23</sup> Enia mata rasua sei taman Moses enia tinana la jarohia mata vitu mo tolu. La hitevosahia vara God mo silera na natirih matea mo tinapua, ale la sopo matahuni na sava supe nona mara Egypt i eri vaia isara.

<sup>24</sup> Enia mata rasu sei Moses hin rani atu mo ulua, mo rohu vara la kilaua sohena natun venatun supe nona

mara Egypt matea. <sup>25</sup> Moses mo tau na romina vara i pa usuri na malele mata rani rilangi peresi na tamlohi non God. Mo sopo opoia vara i avulahi na hehe sei avulahina mo lo toho mata makomo rani purongo.

<sup>26</sup> Enia mo levosahia vara i pa mele ruhu jea vara i lavi na rani rilangi matan K'risto, mo jeu haratu vara i lavi vevuhi na tavg matan Egypt, matan mo lo kilau toho mata nona otori tavera atu sei God i pa silea isana.

<sup>27</sup> Enia mata rasua sei Moses mo malue na lepan Egypt hina purongo vara supe nona mara Egypt mo lolokoru hinia. Enia mo turu mo lo vano matan mo lo kilau matan haratu sei tea i sopo eri hitea. <sup>28</sup> Hitahu enia mata rasua sei Moses mo retileu isana tamlohin Israel vara la taurilati na Passover, ale vara la turusi na rae na peri matarua matan vara angelo mata mateia i pa sopo vilimatei na natura vora tiroma.

<sup>29</sup> Enia mata rasua sei tamlohin Israel la hahau roto tasi sei la tovia Tasi Hahara sohena vara la lo hahau na lepa mamasa purongo. Pani hin rani atu mara Egypt lara la usurira, enira mo isoiso la pute la mate.

<sup>30</sup> Enia mata rasua sei, tamlohin Israel la hahau ralihi na taon tavera matan Jericho mata rani mo limaravrua, ale rorona la maroe la jovi.

<sup>31</sup> Enia mata rasua sei, Rahab harai malele atu mo sopo mate peresi na tamlohi tari hin nona taon tavera atu Jeri-

cho sei la řohu vara la oloolo hin God. Mo sopo mate matan enia mo avulahi vara i jarohi la tamlohin Israel atu sei la luhu na imana. <sup>32</sup> Vara mo sohen haratu a pa mele vere na sava? I pa mele lavi na rani peravu jea vara a vere vevuhi na sorasora mata rasua non Gideon, Barak, Samson, Jephthah, David, Samuel peresi na pŗovet tari.

<sup>33</sup> Enia mata rasua sei la tamlohi nike la pulahi na jara nona supe tinatinapua, la aulu na jarara usuri na posposi tataholo, ale la lavi na sava God mo retitauhi hinia isara. La pelati na jingo lion, <sup>34</sup> la vuni na pepe hapu, la rovo na mateia na voro sita vuro. Epera malokoloko, mo posi mai epe řilangi. La mai la řilangi jea na vuro ale la levuti na vao tamlohi vuro tinatinapua la maro. <sup>35</sup> Hařai la mele lavi la haratu sei la opoira na mateia.

Pani hai la rasu God, tamlohi la vailejlejira, la řomřomia vara mate i pa mele řuhu, i jeua vara la vaharı hin God vara la materi na ima řilangi.

La tau na nora řomtoho na sauteterahi mata mauri řuhu jea tinapua matea. <sup>36</sup> Tamlohi la kerehi hai, ale la rupi kotkotira na asi maja. Ale hai la lihora na jen na jara řořoha na lolo ima řilangi. <sup>37</sup> Hai la mate matan la parura, ale hai la soara sopera mo rua; hai la vilira na sita vuro, ale hai la pa lo hahau la ru na huri sipsip peresi na nani

purongo, la marohati, la lavi na rani řilangi jea ale tamlohi la vailejlejira. <sup>38</sup> Enira la řuhu hajavua mata toho hin varama nike. La hahau roto na tano koru peresi na vutivuti, la luhu na papa vatu ale na koko lepa.

<sup>39</sup> La tamlohi tari nike sei kama verera moiso, God mo avulahi hinira enira mo isoiso mata nora rasua, pani te vonara hatea mo sopo lo lavi na hinau tari sei God mo lo retitauhi hinira. <sup>40</sup> Matan God mo tatamahuni na hinau řuhuřuhu hai matařa matan vara God i eři vaira la tataholo řuhu peresiřa nake vahatea.

## 12

### *Aria Non God Mo Vujangi Na Nona Opoia*

<sup>1</sup> Ale matan řa eři hite vao tavera atu matan tuai sei la tovongi řuhu mata rasua, la lo turu řalihira mata vujangi mauri atu mata rasua isařa nake. Ale matana, mo řuhu vara řa pulahi nařihi na hinau tari sei la lo puhoniřa ale la vaiřa řa sopo eři maro řilangi, řa pulahi nařihira peresi na hehe sei la lo kaluti hiniřa, matan vara řa eři maro peravu hin maro matan mauri nike mo lo toho na nahořa. <sup>2</sup> Ale řa eři vaia vara řa lo kilau isan Iesu sei enia pulo nořa rasua na tapulona mo tikeli na isoisona. Matan enia mo avulahi vara i lavi na mateia mata mahanuhanu na talopeilopei, matan mo levosahia vara hitahunia i pa avulahi tavera matana. Nake mo lo sakele na jara oloolo

tavera mo jeu na tinapua na pahisa jara sakele mata supe non God na tuka. <sup>3</sup> Ha to řomřomi na rani řilangi tari mo lavira sei hin rani atu tamlohi hehe la vai na hina sasati jea isana, ha řomřomia matan vara ha sopo malokoloko, ale ha tinařihi taleu na nomim rasua hinia. <sup>4</sup> Ale kamim ka sopo lo tikeli jara atu vara ha pa mate matan ka lo valum peresi na hehe na nomim turu řilangi mata turuhoroa.

<sup>5</sup> Ale ka pete řomaliho moiso na retituetueni non God isamim, la natuna? Mo vereea mara,  
'Natuku, o sopo kilau puron-  
goi

vara Moli mo vujangiho matan te hinau ko vaia mo sopo řuhu.

Teni řomim i sopo sati matana,

<sup>6</sup> matan Moli mo lo vujangi la haratu mo opoira,

ale mo lo reti tataholo isana natuna tari sei mo lavira.'

*Prov 3.11-12*

<sup>7</sup> Vara God mo lo vujangi kamim matan te hinau ka vaia mo sati, ha lo řomřomia vara God mo lo vaia sohena matan kamim ka natuna tataholo. Sava natirihi mo vai na hina sati matea, pani la sopo vujangia matana?

<sup>8</sup> Vara God mo sopo vujangi kamim matan te hinau ka vaia mo sati sohen mo lo vaia isana natuna tari, mo řaramia vara kamim natu malele, ale kamim ka sopo natuna tataholo. <sup>9</sup> Vara tarea řa lo oloolo na tamařa mata varama sei la lo vujangiřa matan te hinau řa vaia mo

sati, i pa mele řuhu jea vara řa avulahi mata lavi na vujangi sei Tamařa na tuka mo lo silea matan te hinau řa vaia mo sati matan vara řa pa toho jejeu.

<sup>10</sup> Matan tamařa mata varama la vujangiřa matan nořa hina sati mata tauni mo visaleta purongo usuri na nora lelevosahi. Pani vujangi non God matan te hina sati isařa, enia tarea mo tataholo, ale enia mo řuhu matan mo vaia matan vara řa pa lavi maurina atu sei mo tapu. <sup>11</sup> Na rani řa lo lavi na vujangi matan te hinau řa vaia mo sati, mo sopo rani matea mata avulahi pani řa rongo mo sati matana. Pani hitahu, vuana enia tamata peresi na mauri tataholo isan la haratu la ulua hinia.

<sup>12</sup> Ale matana, ha vai na limamim sei la malokoloko sati moiso vara la mele tau- tauri i řilangi, ale ha turu tataholo i řilangi na jaramim, hina purongo vara palomim la lo savaravara. <sup>13</sup> Ha hahau na malele tataholo, matan vara la haratu la lo usuri kamim, hina purongo vara la malokoloko, teni la paka- jangjang moiso, la pa sopo eři tialahalaha vara la jovi, pani la pa mele řilangi. *Prov 4.26*

### *Ha Tapurongo Hin God*

<sup>14</sup> Ha vaihitea vara ha toho na tamata peresi na tamlohi tari, ale ha alea vara ha toho na mauri vokevoke sei mo tapu, matan la haratu sei la sopo tapu, la pa sopo eři hite Moli. <sup>15</sup> Ha kilau mamahuni kamim hatehateahi, matan vara te vonamim i pa sopo



eři jovi nařihia na řomřuhu non God. Ha sopo tinařihia vara te řomřomi sasati mata vahaři na rasua i malue hin kamim, vara i vono, i pa komo na vao tavera na honana, ale la pa jovi matana. <sup>16</sup> Ha sopo tinařihia vara tea i vai na posposi maji, teni i usuri na posposi varama sohen Esau. Enia mo sile na korun tamana tataholo isan tasina mata peleti hanhani matelete purongo. <sup>17</sup> Ale hitahuna, mara mo opoia vara i lavi na leřuhu non tamana, tamana mo řohu hinia. Hina purongo vara mo tangisia, pani i sopo eři mele posi na sava mo lo toho moiso.

### *Retitauhi Mata Leu Na Vutin Sinai*

<sup>18</sup> Matan kamim ka sopo mai isan God sohena tavitavin Israel tuai la lo vaia hin rani atu la lavi na leu isan God na vutivuti Sinai sei mo tapu vara la tikelia, teni na pepe hapu tavera sei mo lo hani aulu hin vutivuti atu, teni na řořoha tavera jea ea, teni na langi poripori tavera ea. <sup>19</sup> Matan la rongu na roroa trumpet tavera matea peresi na leo matea sei mo lo sile na retisohai matea. Ale mo vaira la tangi vara God i pa sopo mele retireti! <sup>20</sup> La rongoa vara nona retileu mo řilangi jea matan mo vereea mara, 'Hina purongo vara te maji palo vati purongo hatea, i tikeli pulon vutivuti nike, ha pa parumateia'.

*Exo 19.12-13* <sup>21</sup> Moses sohena, matahu tavera mo sohonia na sava mo hitea ale mara,

'Na matahu tavera, ale na savaravara'. *Deut 9.19*

### *Retitauhi Paro Mo Mele Ruhuea*

<sup>22</sup> Pani kamim ka mai na Vutin Zion, taon tavera non God mauri, Jerusalem matan tuka, ale ka mai isana vao angelo tavera sei la lo pulutahi na nora avulahi tavera. <sup>23</sup> Kamim ka mai na pulutahi nona vora tiroma non God sei hijara la ulia na tuka. Kamim ka mai isan God, hara sei i pa ari na tamlohi tari. Ale ka lo mai isana tanumen la haratu na tuka sei God mo volituhura moiso, ale mo vaira la tataholo řuhu na nahona. <sup>24</sup> Ka mai isan Iesu, hara sei mo lo turu na livuhan God peresi na tamlohi matan retitauhi paro nike, ale ka mai na řaena sei la turusia mata řomi na hehe, mo sopo sohena řaen Abel sei mo lo tangi isan God vara i sile na talai matana.

<sup>25</sup> Ha lo kilau mamahunia vara ha oloolo hin God, hara sei mo lo retireti isamim. Matan, vara tavitavin Israel la sopo eři rovo hin rani atu la řohu vara la tapurongo hin Moses sei vahařule matea enia tamlohi purongo, i pa mele sati jea vara řa řohu hin haratu mo lo retireti isařa sei mo tai na tuka! <sup>26</sup> Hin rani atu God mo retireti isara na vutin Sinai, leona mo hisuhi na varama. Pani nake mo mele vai na retitauhi tinapua matea mara, 'Mele vahatea, a pa sopo hisuhi na varama purongo, pani a pa hisuhi na tuka peresia'.

*Hag 2.6* <sup>27</sup> Haratu mo řaramia vara hinu tari na varama la pa hutehutehi, matan vara

hinau matan tui tui purongo,  
la pa lo toho jejeu.

<sup>28</sup> Ale matan řa pa lavi  
mauri atu God mo aulu hinia  
sei i pa sopo eři řovo, mo  
řuhu vara řa vere meje isana,  
ale řa vai God i avulahi na  
nořa lotua na oloolo sei mo  
vaiřa řa sile na oloolo tavera  
jea isana. <sup>29</sup> Matan nořa God  
enia hapu tavera jea matea  
mata suli vevuhi na hinau  
tari. *Deut 4.24*

## 13

### *Isoiso Retireti*

<sup>1</sup> Ha pa opoiopoi kamim  
hasemim tarea na opoia  
varařuhu. <sup>2</sup> Ha sopo  
řomaliho vara ha avulahi  
mata lavi na vinano na  
imamim, matan hai la vaia  
moiso isana angelo pani la  
sopo levosahia. <sup>3</sup> Ha sopo  
řomaliho hin la haratu la  
lo vailejlejira na lolo ima  
řilangi, ha řomřomira sohen  
kamim sohena ka lo toho  
peresira.

<sup>4</sup> Ha řomřomi i tataholo  
mata lahi, ha sopo mele ju-  
ruvi peresi te tinapua, matan  
God i pa ari la haratu la lo  
vai na posposi viriu, peresi la  
haratu la lo vaivaileu peresi  
na tinapua mo lahi moiso.  
<sup>5</sup> Ha toho asau na opoia mata  
mania, ha avulahi na sava  
enia nomim, matan God mo  
verea mara,

‘A pa sopo tinařihiho hin te  
rani.

Ale a pa sopo revusehiho  
hin te rani.’ *Deut 31.6;*  
*31.8*

<sup>6</sup> Matan haratu, řa eři vere  
vara,

‘Moli enia noku tuetueni,

ale matana, a pa sopo  
matahu.

Vara mo sohen haratu natu,  
tamlohi la pa eři vai na  
sava isaku?’

*Psa 118.6-7*

<sup>7</sup> Ha mele řomřomi la  
nomim patu tamlohi atu sei  
la lo vujangi kamim na reti  
non God tiroma. Ha řomřomi  
na hinau řuhu tari sei la  
mai isamim na maurira, ale  
ha rasu Moli sohen enira la  
rasua.

<sup>8</sup> Iesu Křisto mo lo sohena  
nanovi, nahapani, ale jejeu.

<sup>9</sup> Ha sopo tinařihia vara  
te vujangi paro tinapua la  
haluhalu kamim. Kamim ka  
lo lavi na suiha na maurimim  
mata řomřuhu non God, mo  
sopo na posposi tuai usuri  
na leu mata hanhahi sei la  
sopo eři tueni la haratu la lo  
usurira.

<sup>10</sup> Enřa nořa rasua paro  
nike mo sohena votavota  
paro matea, ale usuri  
řomřomi atu přis mata rasua  
tuai la sopo eři lavi na hina  
řuhuřuhu hinia matan male-  
lena mo tinapua. <sup>11</sup> Usuri

na rasua tuai na leu nona  
Jew, hin rani atu la lo toho  
na tano koru, přis aulu mo lo  
lavi na řae maji mo unu sivo  
na tent na Jara Tapu sohena  
malamalai matea mata hehe,  
pani usuri na leu la suli na  
tarape maji na tavalu rope  
jara tamlohi atu matan vara  
i vai na jarara i vokevoke.

<sup>12</sup> Ale rasua paro nike mo  
sohena purongo, Iesu mo  
mate na tavalu ropen taon  
tavera atu Jerusalem, matan  
vara i eři vai na nona tamlohi  
la tapu na řaena sei mo roro.

<sup>13</sup> Ale matana, mo řuhu vara

řa malue řa vano isana hin jara sati atu na tavalu ropen taon tavera atu matan vara řa lavi na rani řilangi sei mo lo lavia. <sup>14</sup> Matan varama nike mo sopo jarařa tataholo: Enřa řa lo kilau toho matan nořa taon tavera atu na tuka sei i pa mai.

<sup>15</sup> Hin Iesu, mo řuhu vara tarea řa lo sile na hasohaso isan God na nořa vereva vara enia mo řuhu sohena sava, sohena nořa malamalai řuhu matea řa lo silea isan God. <sup>16</sup> Ha sopo řomalihō vara ha vai na vavahinau řuhu ale ha lo ase na nomim hinahinau peresi la haratu la vejuveju, matan malamalai sohena, enia mo vai God mo avulahi tavera.

<sup>17</sup> Ha ololoo hin nomim patu tamlohi rasua, ale ha ololoo na sava la lo vereva isamim, matan enira la lo kilau na maurimim, ale la levosahia vara la pa turu na nahon God mata nora vavahinau. Mo řuhu vara ha vaira la vaia na avulahi, mo sopo na řomsati, matan vara i vono, i pa sopo tueni kamim hin rani atu mo lo mai.

<sup>18</sup> Ha usiusi matamam, matan kama levosahia vara řomimam la vokevoke, ale kama opoia vara kama toho na ololoo na hinau tari kama lo vaira. <sup>19</sup> Ale nakerihi, na opoi na nomim usiusi mo tavera jea matan vara a eři mele mai isamim vila.

<sup>20-21</sup> Ale na lo usiusi vara God mata tamata sei mo mele lavi nařihi nořa Moli Iesu Křisto na mateia, vara i vai kamim ha tatamahu na hinau tari mata vai na masalona. Na lo usiusi vara na suihan Iesu Křisto i pa vai

kamim ha vua na hinau tari sei i pa vai Iesu i avulahi. Iesu enia Tavui Sipsip aulu mata sipsip usuri na retitauhi matea matan tui tui, enia mo ulia na řaena. Ale hasohaso i pa vano isana tarea tui tui. Amen.

<sup>22</sup> Na usia řilangi isamim la vorai peresi na vevorai řuhufuhu, vara ha tapurongo i řuhu na sava na pete vereva moiso hin noku leta vejuveju nike.

<sup>23</sup> Na opoia vara ha levosahia vara voraiřa na rasua sei Timothy, mo malue na ima řilangi moiso. Ale vara i pala nike vila, a pa lavia perešiau kama mai kama hite kamim.

<sup>24</sup> Ha sile na noku reti-ololoo i vano isana nomim patu tamlohi tari na rasua, peresi na kalesia tinapua sei la lo toho atu. Kalesia sei la tai Italy la sohai na nora retioloooloo isamim.

<sup>25</sup> Na lo usiusi vara řomřuhu non God i pa toho isamim mo isoiso.

# James

## Leta

### James Mo Ulia

#### Leta Nike

Leta nike, enia mo vano isana tavgavu in Israel sei la tau na nora rasua hin Iesu Křisto. Mo vujangia mara vara te rasua varařuhu na maurim, tamlohi la pa hite na vaivaina, vara i vono, nom rasua enia hina purongo.

Mo retireti na hinau sohen harihi: vara ko tilavono, o sopo řomatano - o tauri řilangi na nom rasua na rani vaihite la mai isam. O sopo lolokoru vilavila. O sopo kilau na huri tamlohi purongo. O vai na hina řuhu isana tamlohi. O vaitataholoi na memem. O oloolo hin God, o turuhoro Tiapolo. O sopo retihapahapa na nom voko. Vara ko tavgav, o tueni na tilavono. Sopesopen puku nike.

#### Hin leta nike

1. Retioloolo (1.1)
2. Rasua enia hina lelevosahi na mauri (1.2-18)
3. Tapurongo moiso oloolo hin na reti non God (1.19-27)
4. Vaia i řuhu isana tamlohi tinapua (2.1-13)
5. Rasua peresi na voko (2.14-26)
6. Lelevosahi peresi na retireti (3.1-18)
7. Retiřoãřoahai isan la haratu la lo tapala peresi na varama (4.1-5.6)
8. Posi malum, řomřuhu peresi na ususi (5.7-20)

<sup>1</sup> Enau James, slev non God enia Moli Iesu Křisto, na uli leta nike mo vano isamim Jew ka kalesia, ka lo toho hatehateahi hin varama nike.

#### *Rasua Peresi Na Lelevosahi*

<sup>2</sup> La vorai ku peresi na vevoraiku řuhuřuhu, vara vaihite la mai isamim, ha avulahi matara, <sup>3</sup> matan ka levosahia vara te hinau mo vaihite na nomim rasua, enia i pa vai na nomim rasua i mele řilangi jea, matan vara ha pa turu řilangi tarea. <sup>4</sup> Ale vara ha turu řilangi sohena, enia i pa eři vai na maurimim i jejea řuhu, i pa mařivi na hinau řuhu tari, moiso ha pa sopo vejuveju hin te hinau na mauri kalesia.

<sup>5</sup> Pani vara te vonamim mo levosahia vara nona lelevosahi mo rihirih purongo, enia i pa usia isan God, enia haratu mo hansohai isana tamlohi tari, mo sopo hitesatihi tea, ale enia i pa silea isana. <sup>6</sup> Pani i pa usia isana na rasua moiso i sopo řomkaka matana, matan vara tea mo lo řomkaka, enia mo sohena suhusuhu na tasi, langi mo lo serea mo lo pulahia. <sup>7</sup> Matan tamlohi atu i pa sopo řomřomia vara i pa lavi te hinau isan Moli, <sup>8</sup> matan enia tamlohi řom rua matea, enia řomina mo sopo matea na posina tari.

#### *Tamlohi Tilavono Peresi Na Tamlohi Tavgav*

<sup>9</sup> Ale vorai atu na rasua sei mo tamlohi purongo i pa eři retihapahapa matan God mo tahea aulu, <sup>10</sup> ale haratu mo tavgav i pa eři retihapahapa

matan God mo taua atano, matan enia mo sohena vira řuvu matea, enia i pa tihai. *Isa 40.6-7*

<sup>11</sup> Matan alo mo vele peresi na langina tutuni, ale mo vai na řuvuřuvu peresi na vira na la mahoa, la jovi, ale majhira řuhuřuhu la tihai, ale i pa sohena isana tamlohi tavgav sei la lo tutungui na nora tavgav, la pa tihai.

### *Hinau Mo Vaihite Na Tamlohi*

<sup>12</sup> Avulahi isana tamlohi mo turu řilangi tarea na rani vaihite, matan vara i jeu la vaihite atu, God i pa silea na volina sei enia mauri tui mo usuri na nona retitauhi isan la haratu la lo opoia.

<sup>13</sup> I pa sopo tea mo lo toho na vaihite i eři vereea vara, "God mo lo vaihiteau!" Matan mo sopo te hina sasati hatea i eři vaihite God, ale God mo sopo vaihite te tamlohi. <sup>14</sup> Pani vaihite la vora usuri na masalon tamlohi hasena purongo, la lo reve nařihia, ale la lo haluhalua, <sup>15</sup> moiso, masalona atu mo ulua na lolona, ale hehe mo vora hinia, ale na rani hehe atu mo tavera mo řuhu, mo vasusui na mateia.

<sup>16</sup> La voraiku peresi na vevoraiku řuhuřuhu, ha sopo jalio na řomimim. <sup>17</sup> Ha lo levosahia vara otori řuhuřuhu tari peresi na otori la tataholo řuhu tari, la tai na tuka, la tai isan Tama memera aulu, la sinai atano. Ale enia mo sopo sohera matan mo sopo posposi, ale mo sopo te řořona. <sup>18</sup> Ale na masalona, mo vaiřa řa vora

na retivarařuhu matan vara řa pa mai sohena vora tiroma na nona vavahinau tari mo lo vaira.

### *Ha Vaia Ha Sopo Rongoa Purongo*

<sup>19</sup> La voraiku peresi na vevoraiku řuhuřuhu, ha levosahi harihi; ha tatamahu i řuhu vara ha tapurongo, pani ha sopo vilavila mata retireti teni lolokoru. <sup>20</sup> Matan posposi tataholo atu God mo opoia, mo sopo vora na lolokoru nona tamlohi. <sup>21</sup> Matan haratu, ha pulahi nařihia na posposi lumiha peresi na posposi sasati tari na maurimim, ale na řomatano, ha lavi reti atu God mo lavoa na mapumim moiso sei i eři juri na maurimim.

<sup>22</sup> Ale nake, ha mai tamlohi mata vai na sava reti mo vereea, ale ha sopo tamlohi mata tapurongo purongo sei la lo hase halura. <sup>23</sup> Matan vara tea enia mata tapurongo na reti purongo, ale mo sopo mata vaia, enia mo sohena tamlohi matea mo lo kilau na nahona na titiro, <sup>24</sup> matan enia mo lo kilau na niniuna, ale vara mo mele malue, ale vahatea purongo, mo řomaliho vara enia mo sohena sava. <sup>25</sup> Pani haratu mo lo kilakilau usuri na Leu řuhuřuhu non God mo řuhu, leu atu mo vaia mo materi, ale vara i lo vai na sava leu mo lo vereea, ale i sopo řomaliho na sava mo rongoa, God i pa leřuhu hinia na nona vavahinau.

<sup>26</sup> Vara tea mo řomřomia vara mo lo usuri na mauri tataholo, pani mo sopo

vaitataholoi na memena, enia mo lo halu na mapuna, romromi mata mauri tataholo non tamlohi nike, mo sopo ruhu hin te hinau hatea. <sup>27</sup> Mauri tataholo vara ruhu sei mo vokevoke na nahon God Tama, enia mo sohen harihi: vara o kilau mamahuni na natu marua peresi na malepu na nora rani rilangi, ale vara o toho asau na posposi varama.

## 2

### *Ha Sopo Tametame Na Tamlohi*

<sup>1</sup> La voraiuku peresi na vevoraiku, ha sopo tametame tea na mauri mata rasua hin noa Moli Iesu Kristo, enia Moli mata hasohaso tavera jea. <sup>2</sup> Matan vara te tamlohi la unu na nomim matavuhi, ale matea enia mo tau na gold ring na limana mo ru na ruru ruhu, ale tamlohi tinapua matea mo tilavono mo unu sohena, pani nona ruru mo mararari, <sup>3</sup> ale vara ha sile na ooloo hin haratu sei mo ru na ruru ruhu, ha vereea isana vara, "Tamlohi tavera, o sakele hin jara ruhu nike!" Pani isan haratu sei mo tilavono ha vereea vara, "O turu purongo sevano, teni o sakele purongo nike atano na paloku." <sup>4</sup> Harakerihi, enia posposi matahi isamim hasemim, ka mai ka tamlohi aria la lo ari na romromi sasati.

<sup>5</sup> La voraiuku peresi na vevoraiku ruhuruhu, ha tapurongo isaku, God mo vifoni la haratu la tilavono na varama vara la pa tavgav

na nora rasua, ale la pa lavi mauri atu God mo aulu hinia sei mo retitauhi hinia moiso isan la haratu la opoia. <sup>6</sup> Pani ka lo kilau purongoi na tamlohi tilavono. Mo sopo la haratu sei la tavgav natu, la lo sile na rani rilangi isamim, teni la lo reve kamim ka vano na court? <sup>7</sup> Mo sopo enira natu sei la lo veresatihi na hijan Kristo sei ka lavia?

<sup>8</sup> Pani vara ka lo ooloo hin Leu atu mo aulu na Retitapu sei mo vereea vara, 'O opoi na tamlohi la lo toho ralihiho sohen ko lo opoiho hasem.' *Lev 19.18* <sup>9</sup> Pani vara ka lo tametame na tinapua, ka lo vai na hehe, ale Leu mo vereea vara ka tamlohi tope na Leu.

<sup>10</sup> Matan hare mo lo ooloo na leu tari, pani mo tope matelete purongo, enia mo ori na leu tari. <sup>11</sup> Matan haratu mo vereea mara, 'Ha sopo vaivaileu peresi na tinapua mo lahi moiso!' Enia haratu mo vereea mara, 'Ha sopo vili na tamlohi!' Vara ka sopo vaivaileu peresi na tinapua, pani ka vili na tamlohi, kamim ka mai tamlohi matea mata tope na Leu moiso. *Exo 20.13-14; Deut 5.17-18* <sup>12</sup> Ale ha retireti, ale ha hahau sohen la haratu sei la pa lavi na aria non Leu mata materi. <sup>13</sup> Matan vara God i ari na tamlohi, i pa sopo rompoi tea sei mo sopo eri rompoi na tinapua. Matan rompoia mo vuni na aria non God.

### *Rasua Peresi Na Vaivaina*

<sup>14</sup> La voraiuku peresi na vevoraiku, mo ruhu sohena sava vara tea mo lo vereea vara enia tamlohi rasua,

pani mo sopo te vaivaina? Nona rasua i efi juria teni i vono? <sup>15</sup> Vara te vorai teni te vevorai hatea mo sopo te nora ruru teni te hara hinau, <sup>16</sup> ale vara te vonamim matea mo vereia isana mara, "Mo ruhu, o vano, God i pa le ruhu hiniho, o pa sopo hamariri, o pa sopo marohati!" Pani ko sopo sile te hinau hatelete isana matan vara i tueni na epena, sava hinau mo ruhu hinia?

<sup>17</sup> Ale rasua mo lo toho hasena vara mo sopo te vaivaina, enia mo mate.

<sup>18</sup> Pani tea i pa vereia vara, "Engko nom rasua, pani enau na lo vai na hinau matuvana!" Ale a pa vereia isana vara, "O vujangiau na nom rasua mo sopo te vaivaina, ale a pa vujangiho na noku rasua na noku vavahinau."

<sup>19</sup> Ko rasua vara God enia matelete, haratu mo tataholo, vara ruhu tanume sasati sohena la rasua, ale la matahu tavera la lo savaravara matana.

<sup>20</sup> Pani ko lo opoia vara a vujangia isam, tamlohi rongorongono vono, vara rasua mo sopo te vaivaina enia hina purongo.

<sup>21</sup> Ko levosahia vara Abraham tamafa mo tataholo na nahon God mata vaivaina, hin rani atu mo sile natuna Isaac na votavota isan God? <sup>22</sup> Ko hitea vara nona rasua mo sofoahi peresi na nona vavahinau, ale nona vavahinau mo marivisi na nona rasua, <sup>23</sup> ale mo marivisi na Retitapu sei mo vereia vara, 'Ale Abraham mo rasu God, ale God mo vereia vara enia mo tataholo na

nahona matana'. *Gen 15.6*  
Ale matana, la tovia tapalan God. *Isa 41.8*

<sup>24</sup> Ka hitea, tamlohi mo tataholo na nahon God na nona vavahinau, mo sopo mata rasua hasena purongo.

<sup>25</sup> Ale sohen haratu purongo Rehab, harai malele atu, mo tataholo na nahon God na sava mo vaia, matan enia mo lavi la vaha rule atu na imana, moiso mo verera na malele tinapua vara la mele malue hinia. <sup>26</sup> Matan sohena, epe tamlohi mo mate vara tanumena mo malue hinia, ale rasua mo mate vara mo sopo te vaivaina.

### 3

*Ha Lo Kilau Na Nomim Retireti*

<sup>1</sup> La vorai ku peresi na vevoraiku, mo sopo ruhu vara kamim vao tavera ha mai ha tamlohi vujangi, matan ha lo levosahia vara na rani aria, God i pa ari rilangi kamam tamlohi vujangi i jeu na tamlohi purongo.

<sup>2</sup> Matan enra mo isoiso ra jalio na malele matuvana, ale vara tea mo sopo jalio na sava mo lo vereia, enia tamlohi tataholo matan i efi tau-rilati na epena tari. <sup>3</sup> Vara ra tau na bit na jingo hos matan vara la oloolo hini ra, ra efi posi vevuhi na epera sohena. <sup>4</sup> Ha romromia, lanis sohena, la tavera hina purongo vara langi rilangi mo lo sohaira vara i vano, pani stiana rihirihi atu i efi posi lanis tavera atu i vano na sava jara tamlohin lanis atu mo opoia. <sup>5</sup> Sohen haratu

purongo, meme tamlohi enia mo rihirihi purongo, pani i efi retimangisi i tavera jea.

Ha romromia vara te tanume hapu rihirihi hatea purongo i efi suli na urata tavera. <sup>6</sup> Ale meme tamlohi enia hapu, hina sasati tari matan varama nike la marivi matana, enia hina rihirihi purongo na epera, pani mo sati mo jeu na epera tari, ale mo jilangi na malele mauri mo isoiso, matan hapu sei moruhapu mo lo polopoloa.

<sup>7</sup> Matan tamlohi la efi taurilati na maji tari sohena maji jala, maji haraho, maji avuavu peresi na maji tasi, ale tamlohi la taurilatira moiso, <sup>8</sup> pani tea i sopo efi taurilati na memena. Enia hina sasati matea mo sopo efi toho malum, mo marivi na poison sei mo sile na mate. <sup>9</sup> Ra hasohaŝo God Tamaŝa hinia, ale hinia ŝa lo veresatihi na tamlohi sei God mo vaira la tataholo na nahona. *Gen*

*1.26* <sup>10</sup> Hin jingo atu matea purongo, leŝuhu peresi na lesati la lo malue hinia. La voraiku, hinau atu mo sopo tataholo vara la sohen haratu. <sup>11</sup> Wai peresi na tasi la efi tia vutvut hin te patu wai hatea purongo? <sup>12</sup> La voraiku peresi na vevoraiku, pulo fig i efi vua olive teni grape i efi vua fig? Mo sohena purongo, paltungu tasi matea i sopo efi sile na wai purongo.

*Lelevosahi Atu God Mo Silea*

<sup>13</sup> Hare isamim enia tamlohi lelevosahi matea, ale

mo levosahi mamahuni na hinau? Vara tea, na nona posposi ŝuhu, mo ŝuhu vara i vujangi na nona vavahinau sei la vora mata nona posposi romatano usuri na lelevosahi varaŝuhu. <sup>14</sup> Pani vara ha marivi na mereimerei sasati, ale ka lo romromi kamim hasemim na mapumim, ha sopo retihapahapa, ale ha sopo turuleji na reti-varaŝuhu. <sup>15</sup> Lelevosahi sohen harihi mo sopo tai na tuka, pani enia mata varama, enia nona tamlohi purongo, enia mo tai isana tanume sasati. <sup>16</sup> Matan vara sava jara mereimerei peresi na posposi romromi kamim hasemim mo lo toho ea, patumasa peresi na posposi sasati tari la pa toho hinia.

<sup>17</sup> Pani lelevosahi matan tuka, tiroma hinau hinia, enia mo sopo te romsati hinia, mo usuri na posposi tamata, mo usuri na posposi romŝuhu, mo oloolo, mo marivi na romopoia, ale vuana ŝuhu mo marivi, mo sopo tametame tea, ale mo varaŝuhu. <sup>18</sup> Ale tamlohi sei la lo vai na tamata, la pa lavo na piri mata tamata, ale la vu na astauni ŝuhuŝuhu.

## 4

*Ha Mai Mariviti Isan God*

<sup>1</sup> Sava hinau enia pulo nomim vauriuri peresi na nomim vasvas? Pulona enia masalomim sei la lo valum na lolomim. <sup>2</sup> Ka romusuri te hinau, pani ka sopo efi lavia, ale matana, ka vilimatei na tamlohi. Ka romijea hin te hinau nona tinapua, ale ha



sopo efi lavia, ale matana, ka valum, ale ka vasvas. Ka sopo lavi te hinau matan ka sopo usia isan God. <sup>3</sup> Ka usia, pani ka sopo lavia matan ka lo usia na romromi sati matan vara ha pa jalahia na masalomim.

<sup>4</sup> Ka tamlohi vaivaileu! Ka sopo levosahia vara ha tapala peresi na varama i pa vai kamim ha meresahi isan God? Matana, hare mo opoia vara i tapala peresi na varama, mo hasena vaia mo meresahi isan God. <sup>5</sup> Teni ka lo romromia vara Retitapu mo vere purongoi vara, 'Romin God tari mo lo toho na Tanumena sei mo taua hiniŕa?' <sup>6</sup> Pani God mo mele sile na romruhu mo jeu tiroma. Matan Retiulia mo vere vara,

'God mo lo turuhoro  
na tamlohi hapahapa  
pani mo sile na romruhu  
isan la haratu la  
romatano.' *Pro 3.34*

<sup>7</sup> Matan hinau atu, ha hase tau kamim na ruhuruhun God. Ha turuhoro Tiapolo, ale enia i pa rovo isamim.

<sup>8</sup> Ha mai mariviti isan God, ale enia i pa mai mariviti isamim. Ha sopo lavi na hina lumiha na maurimim, ka tamlohi hehe, ale ha onehi na mapumim la vokevoke, ka tamlohi rom rua. <sup>9</sup> Ha romsati mata nomim hehe, ha tangtangi, ale ha tangi. Ha vai na nomim mana i mai tangtangi, ale nomim avulahi i mai romsati. <sup>10</sup> Ha hase tau kamim atano na nahon Moli, ale enia i pa tahe kamim.

<sup>11</sup> La voraiku peresi na vevoraiku, ha sopo veresatihi kamim hatehateahi. Haratu mo lo veresatihi na voraina matea teni mo lo ari na voraina, enia mo lo veresatihi na Leu, ale mo lo ari na Leu. Pani vara ka lo ari na Leu kamim ka sopo tamlohi vai na Leu, pani ka tamlohi ari na Leu. <sup>12</sup> God purongo mo sile na Leu, ale enia tamlohi aria, enia natu, i efi juri, ale i efi komo. Pani kamim hare matan vara ha pa ari na tamlohi la lo toho ŕalihi kamim?

### *Ha Sopo Hapahapa*

<sup>13</sup> Ha tapurongo, la haratu la lo vere vara, "Nohorihi teni pavuho ŕa pa vano hin te taon tavera nike, teni atu matan te tauni hatea, ale ŕa pa turuhi te bisnis atu mata lavi te mania tavera!" *Pro 27.1*

<sup>14</sup> Pani ka sopo levosahia vara sava i pa masese isamim pavuho? Maurimim enia sava? Matan ka sohena haravu na urata mo sinai mo toho makomona, ale mo mele tihai. <sup>15</sup> I pa mele ruhu vara ha vere sohen harihi, "Vara na masalon Moli, ŕa pa mauri, ale ŕa pa haranike teni harasevano." <sup>16</sup> Pani mo sohena natu, ka lo retimangisi na sava ha pa vaira. Retihapahapa tari sohen harihi enia hina sasati.

<sup>17</sup> Matan haratu, hare mo levosahi na hinau tataholo vara i vaia, pani mo sopo vaia, enia hehe isana.

## 5

*Retiŕoaŕoahai Isana Tamlohi Tavgav*

*Ha Sopo Ari Na Tamlohi*

<sup>1</sup> Ha tapurongo! Kamim tamlohi tavgav, ha tangi na tangtangi matan la rani řilangi atu la lo mai isamim. <sup>2</sup> Nomim tavgav la řovo moiso, ale nomim ruru řuhu pepe la hatiřarihira moiso. <sup>3</sup> Nomim gold peresi na silver la řaeha moiso, ale řaehara la pa pisuhi kamim, ale la pa hani na epemim sohena hapu. Ka pete takonahi na tavgav mata pongi hitahu moiso. <sup>4</sup> Ka hitea, voli nomim tamlohi voko sei la lo vu na isamim, ka taurilati na sopena, mo lo tangi matamim, ale tangi nona nomim tamlohi vu na isamim, mo tikeli na peron Moli Suiha Tavera Jea. *Deut 24.14-15*

<sup>5</sup> Ka lo mauri hin varama nike na masalomim peresi na nomim posposi řomřomi hasemim purongo. Mapumim la řavisvis na rani mata vilimatei na tamlohi. <sup>6</sup> Ka sile na talai, ale ka vilimatei na tamlohi tataholo sei la sopo turuhoro kamim.

### *Ha Romperavu Na Nomim Rani Rilangi*

<sup>7</sup> Matan haratu la voraiuku peresi na vevoraiku, ha řomperavu i tikeli rani atu Moli i mele mai hinia. Ka hitea sohena sava tamlohi isa mo lo saovi mata vua řuhuru mata lepa, mo řomperavu matana mo tikeli usa atu mo mai tiroma mo vano mo tikeli usa atu mo pa mai hitahu. <sup>8</sup> Ale kamim sohena, ha řomperavu. Ha vai na řomimim la turu řilangi matan mele mai non Moli mo lo mai mariviti.

<sup>9</sup> La voraiuku peresi na vevoraiku, ha sopo retireti varihi hin kamim hatehateahi, matan God i pa ari kamim matana. Ka hitea! Tamlohi aria mo lo turu na matarua.

<sup>10</sup> La voraiuku peresi na vevoraiku, sohena tovongi matea mata lavi na rani řilangi, ale mata řomperavu, ha řomřomi na řovet tuai sei la lo retireti na hijan Moli. <sup>11</sup> Ka hitea, řa lo řomřomi la haratu God mo leřuhu hinira sei la turu řilangi mo tikeli na isoisona. Ka pete rongoa sohena sava Job mo turu řilangi moiso, ale ka hitevosahi na řomřomi non Moli hinia moiso, ale sohena sava Moli mo vujangi na nona opoia peresi na nona řomopoia. *Job 1.21-22; 2.10; Psa 103.8*

### *Ha Retireti Varařuhu*

<sup>12</sup> Pani aulu hin la hinau sei la voraiuku peresi na vevoraiku, ha sopo retitauhi hin te hinau na tuka teni na varama teni hin te hinau tinapua, pani vara ka vereva vara 'io', ale ha vaia, ale vara ka vereva vara 'mo vono', ale ha sopo vaia, matan vara ha sopo lavi na talai matana. *Mt 5.34-37*

### *Suiha Mata Usiusi*

<sup>13</sup> Te vonamim mo lo lavi na rani řilangi? I pa usiusi matana. Te vonamim mo avulahi? I pa hasohaso God na vete matana.

<sup>14</sup> Te vonamim mo rojo? I pa usi na patu tamlohi na vao kalesia vara la mai la usiusi isan God matana. La pa tau surei na wel hinia na hijan Moli. <sup>15</sup> Ale usiusi na rasua

i pa juri haratu mo rojo, ale Moli i pa tahea. Ale vara mo vai te hehe, God i pa řomia.

<sup>16</sup> Matan haratu, ha taviti na nomim hehe isamim hatehateahi, ale ha usiusi matamim hatehateahi matan vara ha pa mele řuhu. Usiusi noņa tamlohi tataholo matea, suišana mo tavera jea vara mo lo usiusi. <sup>17</sup> Elijah, enia tamlohi matea maurina mo soheřa purongo, ale mo usiusi řilangi matan vara i sopo usa, ale mata tauni mo tolu vitu mo limarave, usa mo sopo jovi na lepa. *1Ki 17.1; 18.1*

<sup>18</sup> Moiso mo mele usiusi, ale usa mo mele jovi na tuka, ale isa la mele lavi na vuara. *1 Ki 18.42-45*

*Ha Tueni La Haratu La Jovi*

<sup>19</sup> La voraiku peresi na vevoraiku, vara te vonamim hatea mo jalio na retivarařuhu, ale tea mo mele lavia mo mai, <sup>20</sup> enia i pa levosahia vara hare mo lavi na tamlohi hehe matea mo jalio mo mele mai, i pa juri na maurina na mateia, ale i pa tavuhoro na hehe matuvana. *Pro 10.12; 1Pe 4.8*

## 1 Peter Tiroma Leta Peter Mo Ulia Leta Nike

Hin leta nike Peter mo sorahi mauri atu mo lavi na rani řilangi nona kalesia hinia. Mo vujangia vara hin malele atu Moli mo lo vaihite na rasua nona nona tamlohi hinia. Leta nike mo lo vano isana kalesia tari sei la lo toho řalihi na jara matan Asia Minor. Tamlohi la sopo rasu Iesu, la sile na rani řilangi isara, ale Peter mo vereea vara la pa tatamahu mata turu řilangi matan la pa mele lavia.

Peter mo retituetuenira na nora rani řilangi, ale mo vereea mara mo tataholo vara la avulahi matana, matan vara la jeua God i pa silera na otori řuhu hin rani atu vara Iesu i mele pala na varama (1.6-7).

Peter mo vereea isara mara Křisto sohena mo lavi na rani řilangi na varama, i pa tataholo vara nona tamlohi usuri la lavia pani mata posposi tataholo purongo, mo sopo mata posposi sasati (2.18-25; 4.12-17).

Matan Křisto sohena, mo lavi na rongohaji na rani mo mate mata nořa hehe vahatea mata rani tari, enia mo sopo lo hehe hin te rani, pani mo mate mata tamlohi hehe matan vara i eři laviřa řa mai isan God. Epena mo mate, pani mo mele turu, mo mauri na suihan Tanumen God. (3.18)

**Hin leta nike**

1. Retioloolo peresi na usiusi (1.1-2)
2. Hinau mata řomtoho (1.3-12)
3. Hahau usuri na posposi tapu non God (1.13-2.17)
4. Tovongi non Křisto (2.18-25)
5. Rani řilangi nona kalesia (3.1-4.19)
6. Retituetueni mata patu tamlohi kalesia (5.1-11)
7. Isoiso retioloolo (5.12-14)

1 Enau Peter, vahařule matea non Iesu Křisto, na lo uli leta nike, mo vano isan la haratu God mo viřonira la lo toho sohena vinano na province matan Pontus, Galatia, Cappadocia, Asia peresi Bithynia, <sup>2</sup> God Tama mo pete viřoni kamim tuai moiso usuri na masalona, ale Tanumena mo tapuhi kamim mata mauri tapu, ale matana, ka lo ooloo hin Iesu Křisto, ale řaena mo vai kamim ka vokevoke. Romřuhu peresi na tamata la pa mařivi savulevule hin kamim.

### *Mauri Tui*

<sup>3</sup> Ooloo tavera isan God sei Taman nořa Moli Ieřu Křisto! Na nona řomopoia tavera mo vaiřa řa mele vora, ale nořa řomtoho mo lo mauri, mo mauri matan Iesu Křisto mo sauteterahi na mateia, <sup>4</sup> ale God mo tau mamahuni mauri atu sei mo řuhuřuhu jea matamim na tuka sei i pa sopo eři řovo, i pa sopo eři komo, ale i pa toho jejeu, <sup>5</sup> ale God na nona suiha tavera mo lo matahi kamim na malele mata rasua, i vano i tikeli rani atu

i vujangi mauri řuhuřuhu atu mo tatamahunia moiso matamim na pongi hitahu. <sup>6</sup> Ale harihi natu, mo vai kamim ka avulahi tavera, hina purongo vara nake God mo opoia vara ha pa lavi te rani řilangi matan te makomo rani, <sup>7</sup> rani řilangi tinatinapua la pa lo vaihite na nomim rasua vara mo řilangi sohena sava. Nomim rasua enia hina řuhu matea mo jeu gold atu sei la sulia na hapu mata řuhina. Ale vara nomim rasua mo lo turu, ha pa lavi na hasohaso peresi na hija řuhu peresi na ooloo tavera hin pongi atu Iesu Křisto i pala hinia, <sup>8</sup> hina purongo vara ka sopo lo hitea hin te rani, ale ka sopo hitea nakerihi, pani ka lo opoia, ale ka lo rasua, ka lo avulahi tavera jea matana, avulahi tavera atu na mapumim mo sopo tea i eři vereaa, <sup>9</sup> mata vua nomim rasua enia maurimim la pa juri. <sup>10</sup> La přovet atu tuai sei la lo retimangovi na hina řuhuřuhu sei vara la pa nomim, enira la alea, ale la vaihite mamahunia, <sup>11</sup> la opoia vara la levosahia vara sava tamlohi natu, teni pongi tataholo natu, Tanumen Křisto hinira mo lo vereaa, matan mo lo vereulia tuai moiso vara rani řilangi atu non Křisto i pa sohena sava, ale hasohasona matan pongi hitahu atu la pa sohena sava.

<sup>12</sup> Ale God mo vereaa isara vara la hinau sei la pa sopo masese isara, pani isamim nake, ale nake, God na tuka

mo řule na Tanume Tapu vara i tueni la haratu la lo retivujavujangi na Retiřuhu isamim, la hinau sei angelo la opoia tavera vara la pa levosahi mamahunira.

<sup>13</sup> Matana, ha tatamahuni na řomimim mata vavahinau, ale ha hase taurilati kamim, ha tau vevuhi na nomim řomtoho hin řomřuhu atu sei i pa mai isamim hin rani atu Iesu Křisto i pa mele pala hinia. <sup>14</sup> Sohena natuvarihia la ooloo, ha sopo sarete vara ha mele sivo na masalomim matan tuai, <sup>15</sup> pani matan God atu sei mo tovi kamim enia mo tapu, ha tapu na nomim hahau. <sup>16</sup> Matan la ulia na Retiulia moiso vara, 'Ha pa tapu, matan enau na tapu'. *Lev 11.44*

<sup>17</sup> Ale sohena ka tovia Tamamim, ha lo levosahia vara enia mo sopo tametame tea na nona aria mata vavahinau nona tamlohi hatehateahi, i pa řuhu isamim vara ha hahau na nahona na ooloo tavera jea tarea matan nake ka lo vinano hin varama nike, <sup>18</sup> ka levosahia vara mo volituhu kamim na nomim posposi řomvono sei ka lavia isana pimim tuai. Mo sopo volituhu kamim na hinau la eři řoyo sohena silver teni gold, <sup>19</sup> pani mo volituhu kamim na řaen Křisto, volina mo aulu jea, sohena řae natu sipsip matea mo vokevoke řuhu jea. <sup>20</sup> God mo viřonia tiroma na pulo varama, pani mo pa vuhesia na isoiso rani matamim, <sup>21</sup> hin Křisto kamim ka lo rasu God, mo sauteterahi

Křisto na mateia, ale mo silea na hasohaso tavera matan vara nomim rasua peresi na nomim řomtoho la pa lo toho isan God. <sup>22</sup> Maurimim la vokevoke matan ka oloolo na retivararuhu, ale matana, ha opoiopoi kamim vararuhu, ale ha opoiopoi kamim i řilangi na mapu vokevoke, <sup>23</sup> matan ka mele vora paro, mo sopo na piri mata řovo, pani hin haratu i pa sopo eři řovo matan enia reti mauri non God sei mo lo toho jejeu; <sup>24</sup> mo vereea vara, 'Tamlohi tari la sohena řuvuřuvu, nora hasohaso mo sohena vira řuvuřuvu. Ale vara řuvuřuvu mo mahoa, virana la pa jovi, <sup>25</sup> pani reti non Moli i pa toho jejeu.' *Isa 40.6-8* ale reti nike enia Retiřuhu atu sei la lo retivujavujangia isamim.

## 2

### *Vatu Atu Mo Mauri*

<sup>1</sup> Matan haratu, ha tau nařihi na posposi vaisatihi na tinapua tari, posposi halu tari, tapnetano, řomusuri peresi na retiřeřen tari, <sup>2</sup> ale sohena pipi matea mo pa vora, ha pa mařohu matan wai susu vararuhu atu Tanumen God mo lo silea, matan vara hinia, ha pa ulua na mauri řuhu sei ka juri hinia, <sup>3</sup> vara vararuhu ka inu rongorongo na řomřuhu non Moli moiso, <sup>4</sup> ale ka lo mai isan Křisto. Enia natu, vatu atu mo mauri, tamlohi la tipahia, pani God mo viřonia, mo řuhuřuhu jea, <sup>5</sup> kamim sohena, ka sohena

vatu sei la mauri, God mo voro kamim sohena iman Tanume Tapu matea, matan vara ha pa vao přis tapu matea mata sile na silesilea sei God mo avulahi hinira hin Iesu Křisto. <sup>6</sup> Matan Retitapu mo lo vereea vara,

'Ka hitea, enau na lo tau na vatu matea hin Zion,\* enia tapulo pulo vatu sei na viřonia, mo řuhuřuhu jea, ale sava tamlohi mo tau na nona rasua hinia, řomina i pa sopo eři jovi hin te pongi matana.'

*Isa 28.16*

<sup>7</sup> Ale matan haratu, isamim ka lo rasua, enia mo řuhuřuhu jea, pani isan la haratu la sopo rasua, Retiulia mo lo vereea vara,

'Vatu atu tamlohi voro ima la tipahia, enia mo mai tapulo pulo vatu mata ima.' *Psa 118.22*

<sup>8</sup> Ale,

'Tamlohi la pa tialahalaha hinia, enia vatu mata vai na tamlohi la jovi hinia.'

*Isa 8.14*

La tialahalaha hinia matan la sopo oloolo na nona reti, la jovi sohen haratu matan God mo taua sohena matara moiso.

<sup>9</sup> Pani kamim vao tamlohi matea God mo viřoni kamim isana vao tamlohi tinatina-pua, ka vao přis matea la supe, ka vao tamlohi tapu matea, ka vao tavera matea God mo tapuhi kamim vara nona, matan vara ha pa vereuli na nona vavahinau

\* **2:6:** Zion: Zion enia Jerusalem

řuhuřuhu matuvana, enia mo tovi kamim ka malue na řořoha, ale ka mai na nona malarani řuhuřuhu.

<sup>10</sup> 'Tiroma ka sopo nona vao tamlohi matea, pani nake, ka tamlohi non God,

tiroma ka sopo lavi te řomopoia,

pani nake, ka lavi na řomopoia non God.'  
*Hos 1.6, 9; 2.23*

<sup>11</sup> La tapalaku řuhuřuhu, kamim ka sohena vinano hin varama nike, ale na lo retituetueni kamim hinia vara ha toho asau na masalo sasati sei mo lo vai na vuro na maurimim. <sup>12</sup> Ha vai na posposi tataholo na naho tamlohi řořoha, hina purongo vara la pa vereva vara kamim tamlohi sasati, matan la pa hite na nomim vavahinau řuhu, ale la pa tahe na hijan God aulu matana hin pongi atu vara mo pala.

### *Ha Sile Na Oloolo Isan La Haratu La Aulu*

<sup>13</sup> Ha vai Moli i avulahi tarea na nomim oloolo na tamlohi tari la aulu, vara isan te Supe nona mara Rome sei mo lo tauri na suiha, <sup>14</sup> teni isan te nona tamlohi tatavera sei mo lo řulera vara la sile na talai isan la haratu la vai te hehe, ale vara la sile na hasohaso isan la haratu la vai te vavahinau řuhu.

<sup>15</sup> Matan enia masalon God, vara ha vai na vavahinau řuhu matan i pa horo na řomvono non la haratu la rongorongovono. <sup>16</sup> Ha lo toho sohena tamlohi materi, pani ha sopo

řomřomia vara enia masapa matea mata vai te hina hehe, pani ha lo toho sohena volitusi non God. <sup>17</sup> Ha sile na oloolo isana tamlohi tari, ha opoi la haratu la rasua, ale ha matahun God, ha sile na oloolo isan supe matan Rome.

### *Slev*

<sup>18</sup> Volitusi, ha hase tau kamim na liman nomim tamlohi tavera na nomim oloolo tari, mo sopo isan la haratu la řuhu teni la řommalum purongo, pani isan la haratu la tamlohi řilangi sohena. <sup>19</sup> Matan God mo avulahi hin kamim matan nomim řomřomi hin God mo vai kamim ka lo turu řilangi na rani ka lo lavi na rani řilangi mata nora posposi řilangi sei mo sopo matan te hinau ka vai mo sati. <sup>20</sup> Ka hite na sava hinau mo řuhu hinia vara ka lo turu řilangi na rani ka lavi na talai matan te nomim hehe? Pani vara ha vai na vavahinau řuhu, ale ha lavi na rani řilangi matana, pani ka turu řilangi hinia, haratu natu, God mo avulahi hin kamim matana.

<sup>21</sup> God mo tovi kamim matan harihi, matan Křisto sohena mo lavi na rani řilangi matamim, mo tau na tovongi matea vara ha pa eři usuri na palona, <sup>22</sup> enia mo sopo vai te hehe teni te halu i malue na jingona. <sup>23</sup> Na rani la lo veresasatia, mo sopo kelera, ale na rani la silea na rongohaji, mo sopo talaira, pani tarea mo lo hase taua na liman God sei mo lo ari tataholo tarea. <sup>24</sup> Enia mo hasena

lavi naʻihi na noʻa hehe na epena hin rani atu mo sevu na talopeilopei matan vara ʻra pa mate na noʻa mauri hehe, ale ʻra mauri na posposi tataholo. Ka mai ka ʻruhu matan rongohaji atu mo lo lavia na epena. <sup>25</sup> Matan kamim ka jʻalio sohena sipsip, pani nake ka mele mai isan tavuimim, enia haratu mo lo matahi na maurimim.

### 3

#### *Haʻrai Lahi*

<sup>1</sup> Ale sohena, haʻrai lahi ha toho na ruhuruhi suiha tu-amim, hina purongo vara la sopo ooloo na reti non God, la pa rasua, mo sopo matan te reti ka vereaa, pani hina posimim purongo, <sup>2</sup> vara la hite na nomim posposi voke-voke matan ka matahun God.

<sup>3</sup> Ha sopo ʻromʻromia vara sava ka vaia na epemim purongo i pa vai kamim ha ʻruhu, vara hinau sohena peri vulu teni, tau na hinau la vaia na gold, teni ka ruru na ruru ʻruhu, <sup>4</sup> pani ha ʻromʻromi na sava mo vai kamim ka ʻruhu na lolo mapumim i pa sopo eʻfi ʻrovo sohena posposi ʻromatano, ale posposi malum, enira la ʻruhuʻruhu jea na nahon God, <sup>5</sup> matan tuai mo sohena, haʻrai tapu enira la haratu la lo ʻromtoho hin God, enira la hasera vaira la ʻruhu na nora posposi ooloo isana tuara, <sup>6</sup> sohen Sarah mo ooloo hin Abraham mo tovia mara ʻnoku tamlohi taveraʻ. Ale kamim ka mai venatuna tataholo vara ha lo vai na hina ʻruhu, ale

ha sopo matahu, ha turu ʻrilangi vara la ngurunguru hin kamim hin te hinau mo sopo tataholo vara ha vaia.

#### *Tamlohi Lahi*

<sup>7</sup> Tamlohi lahi, sohena, ha toho peresi na naroumim, pani ha sopo ʻromaliho vara enira la sopo ʻrilangi sohemim, pani la malum matan enira haʻrai. Ha sile na ooloo isara matan enira sohemim, la lavi mauri paro atu God mo silea moiso, vara i vono, God i pa sopo rongo na nomim usiisi.

#### *Kalesia Tari*

<sup>8</sup> Ale isoisona, kamim mo isoiso, ha matea na ʻromimim, ha ʻromʻromi na tinapua, ha opoiopoi kamim na ʻromopoi, ha ʻromatano, <sup>9</sup> ha sopo kele na posposi sasati teni te retileji, mo vono, pani ha leʻruhu, matan God mo tovi kamim vara ha pa lavi na nona leʻruhu. <sup>10</sup> Matan Retitapu mo vereaa vara, ʻVara tea mo opoi vara i opoi na mauri, ale i hite na rani ʻruhu, i pa isoiso na nona re-tiretileji, ale i isoiso na nona re-tiretihalu; <sup>11</sup> i pa vahari na posposi hehe, ale i vai na vavahinau ʻruhu, i pa ale na tamata, i tutunguia. <sup>12</sup> Matan, matan Moli la lo kilau la haratu la tataholo, ale perona la lo roi na nora usiisi.



Pani Moli mo lo turuleji isan la haratu la lo vai na hehe.'

*Psa 34.12-16*

<sup>13</sup> Ale hare natu, i pa komo kamim vara ka opoia řilangi vara ha vai na posposi řuhu? <sup>14</sup> Pani hina purongo vara ka lo lavi na rani řilangi mata nomim posposi tataholo, God i pa leřuhu hin kamim matana. Ha sopo matahunira teni ha řomkaka. <sup>15</sup> Pani ha vai Křisto i Moli na maurimim, ale ha tatamahu tarea mata ha řarami tea vara i usi kamim hin te retiusia vara ka lo řomtoho hinia mata sava. <sup>16</sup> Pani ha vaia na posposi malum peresi na ooloo tavera, ha turu řilangi na posposi řuhu matan vara tea i veresatihi kamim matan te nomim vavahinai řuhu sei ka vaira hin Křisto, ale la pa mahanuhanu matana. <sup>17</sup> Vara masalon God mo sohena, mo mele řuhu vara ha lavi na rani řilangi mata nomim posposi řuhu ka lo vaira, mo jeua vara ha lavia mata posposi hehe.

<sup>18</sup> Matan Křisto sohena, mo lavi na rani řilangi na rani mo mate, mata nořa hehe vahatea mata rani tari, enia mo sopo lo hehe hin te rani, pani mo mate mata tamlohi hehe matan vara i eři lavira řa mai isan God. Epena mo mate, pani mo mele turu, mo mauri na suiħan Tanumen God.

<sup>19</sup> Ale hin suiħana sei, mo sivo mo retivujavujangi isana tanume tamlohi sei God mo lo taurilatira na varama mata mateia, <sup>20</sup> isan la haratu sei la sopo ooloo hin God na pongi tuai sei God

mo lo saovira hin rani atu sei Noah mo lo voro na botina. God mo juri na tamlohi mo limaravtolu purongo hin wai tavei tavera atu. <sup>21</sup> Wai tavei atu, enia tovongi matea mata malele paptijo vara i juri kamim usuri na suiħa sauteterahi non Iesu Křisto. Paptijo enia tovongi matea mo sopo hoje nařihi na lumi epemim purongo, pani mo sohena řomtauhi řuhu matea ka lo vaia na řomimim řuhu isan God. <sup>22</sup> Ale Křisto sei mo sahe na tuka, mo lo tauri na suiħa non God na tavaluna, ale angelo peresi la haratu la lo tauri na suiħa peresi la haratu la řilangi, enira mo isoiso la lo toho na ruhuruhuna.

#### 4

<sup>1</sup> Ale, matan Křisto mo lavi na rongohaji na epena, ha tau na řomimim vara ha lavi na rongohaji sohen Křisto, matan haratu mo tatamahu vara i lavi na rongohaji, mo isoiso na hehe, <sup>2</sup> matan vara nake, i pa sopo usuri na masalona, pani i pa usuri na masalon God purongo i tikeli na isoiso maurina. <sup>3</sup> Matan tauni matuvana moiso, ka lo vai na opoia nona masalo tamlohi řořoha, sohena nora posposi viriu, la lo usuri na řomřomi lumiha, la lo putu na wai řilangi, la lo matavuhi mata lavilavi na tinapua, la lo matavuhi mata inu na wai řilangi, la lo vai na vaivaileu na nora lotulotu vono, <sup>4</sup> hin harihi, enira la vereea vara kamim ka tinapua, matan ka sopo mele vano peresira na nora posposi lumiha sei,

mo mai sohena wai tavei, ale la lo veresatihi kamim matana, <sup>5</sup> pani enira la pa turu na nahon haratu sei mo tatamahu vara i ari la haratu la mauri peresi la haratu la mate. <sup>6</sup> Varaʻruhu, matan hinau atu natu, Kʻristo mo retivujavujangi na Retiʻruhu isan la haratu la mate moiso, hina purongo vara la lavi na talai mata mate na epera, pani la pa efi mauri sohen God mo lo mauri.

<sup>7</sup> Nake, isoiso hinau tari mo lo mai mariviti; ale matana, ha hase taurilati kamim hasemim, ale ha tatamahu mata nomim usiusi, <sup>8</sup> hina aulu hin la hinau sei, enia vara ha opoiopoi kamim i ʻrilangi, matan opoia mo kamoti naʻrihi na hehe matuvana. <sup>9</sup> Ha roi na imamim isamim hatehateahi, ale ha sopo ngutungutu matana.

<sup>10</sup> Ale sohen kamim hatehateahi ka lavi na otori isan God moiso, ha tuetueni kamim hinira, sohena volitusi ʻruhu sei la lo kilau na otori ʻruhu matuvana non God; <sup>11</sup> vara tea nona enia mata i retivujavujangi, i pa reti sohen God mo lo retireti hinia, ale vara tea nona enia mata i tuetueni, i pa vaia hin suiha atu God mo silea isana, matan vara na hinau tari, God i pa lavi na hasohaso hin Iesu Kʻristo. Isan Kʻristo hasohaso tavera, ale suiha i pa toho na limana mata pongi tari tui tui. Amen.

*Mauri Rilangi Nona Kalesia*

<sup>12</sup> La tapala ʻruhuʻruhu, ha sopo maʻurahi hin te rani sasati mata vaihite kamim.

Ha sopo hitera sohena hina maʻurahi hai la pala isamim, <sup>13</sup> pani ha avulahi jea na rani ka lo lavi na rani ʻrilangi sohen Kʻristo mo lavia, matan vara ha pa avulahi i tavera jea sohena hin rani atu hasohasona i pala na naho tamlohi.

<sup>14</sup> Vara tamlohi la veresatihi kamim matan ka lo lavi na hijan Kʻristo, kamim la haratu sei la pa lavi na leʻruhu, matan Tanume mata hasohaso tavera sei enia Tanumen God, mo lo taua isamim. <sup>15</sup> Pani i sopo tea isamim i lavi na rani ʻrilangi mata mo ori sohena tamlohi vili tamlohi matea teni te tamlohi vavanaho matea, teni te tamlohi lejileji matea, teni sohena tamlohi matea mo lo sohai na ngalsuna na hinau nona tinapua. <sup>16</sup> Pani vara tea i lavi na rani ʻrilangi matan enia kalesia matea, i pa sopo mahanuhanu matana, mo vono, pani i pa tahe na hijan God aulu na hijan Kʻristo. <sup>17</sup> Matan nake, aria i pa tapulo na lolo vaon God tiroma; ale vara i tapulo hiniʻra tiroma, i pa sohena sava isan la haratu la sopo oloolo na Retiʻruhu non God? <sup>18</sup> Ale,

‘Vara mo ʻrilangi jea vara tamlohi tataholo la eʻfi juri, i pa sohena sava isan la haratu la lo usuri na posposi varama teni la haratu la lo hehe?’  
*Prov 11.31*

<sup>19</sup> Ale isan la haratu la lo lavi na rani ʻrilangi mata masalon God, mo tataholo vara na nora hahau tari la tau

na maurira na limana matan enia mo lo řomturu řilangi tarea.

## 5

<sup>1</sup> Ale matan haratu, na opoia vara a sile na retituetueni isana patu tamlohi rasua isamim. Enau patu tamlohi rasua matea sohemim, na hitea sohena sava Křisto mo lavi nona rongohaji, ale enau sohena a pa lavi na hasohaso tavera atu God i pa vujangia i pa sopo tuai, <sup>2</sup> ha tavui řuhu mata sipsip non God sei enia mo taura na limamim, ha kilau mamahunira na řomavulahi sohen God mo opoia, mo sopo matan vara tea mo ngurunguru hin kamim matana; mo sopo mata mania, pani mata nomim řomavulahi, <sup>3</sup> ha sopo vaia i řilangi isan la haratu la lo toho na ruhuruhi limamim, pani ha vai na tovongi řuhu isana sipsip. <sup>4</sup> Ale hitahu vara Patu Tavui sipsip i pala, ha pa lavi na řongořongo nona supe sei řuhuřuhuna i pa sopo eři tihai.

<sup>5</sup> Ale kamim uluvou, ha oloolo hin la haratu la kalesia vajiaha. Kamim mo isoiso ha ruru na posposi řomatano, matan 'God mo lo turuleji hin la haratu la lo mangisi, pani mo lo tueni la haratu la lo řomatano.' *Prov 3.34*

<sup>6</sup> Ale matana, ha řomatano, ha toho na ruhuruhi suiha tavera liman God matan vara na rani tataholo i pa

tahe kamim aulu. <sup>7</sup> Ha sile vevuhi na nomim řomkaka isana matan enia mo lo kilau kamim.

<sup>8</sup> Ha tatamahu, ha lo kilau matan nomim meresahi Tiapolo, enia mo lo řalihi sohena paheu matea mo lo aleale tamlohi vara i hanira.\* <sup>9</sup> Ha turuhoroa, ale ha turu řilangi na nomim rasua. Ha levosahia vara voraimim řalihi na varama sohena la lo lavi na rani řilangi tinatinapua sohen harihi.

<sup>10</sup> Ale ha pa lavi na rani řilangi mata makomo rani purongo, ale hitahuna, God mata řomřuhu tari, haratu sei mo tovi kamim ka mai na lolo hasohaso tavera non Iesu Křisto mata rani tui tui, enia hasena i pa vai mamahuni kamim, ale i pa vai kamim ha turu řilangi na nomim rasua, ale i pa vai kamim ha řilařilangi na mapumim, ale i pa vai kamim ha sopo eři juha na nomim rasua. <sup>11</sup> I pa tauri na suiha mata rani tui tui tarea, amen.

*Isoiso Retioloolo Non Peter*

<sup>12</sup> Silas†, vorai sei mo sopo lo tope na nona retitauhi hin te rani na noku kilakilau, mo tueniau vara a uliuli isamim vara a pa vere vujavujangi kamim, ale vara a vereulia vara řomřuhu varařuhu non God mo sohen harihi. Ha turu řilangi hinia.

<sup>13</sup> Ale la haratu la rasu nike Rome, harasei God mo viřonia sohemim, enira sohena la sohai na retioloolo

\* **5:8:** paheu: Peter mo vere na lion nike. † **5:12:** Silas: hin Greek la ulia hija sei vara Silvanus, pani enia Silas sei tapalan Paul.

isamim, ale natuku Mark  
sohena, mo sohaia isamim.‡

<sup>14</sup> Ha tapatapai kamim hate-  
hateahi na retioloolo mata  
opoia.

Tamata isamim tari sei ka  
tamlohi non Křisto.

---

‡ **5:13:** 5.13 Rome: Peter mo lo vere Babylon, Rome enia retilulu matea matan  
Babylon.

## 2 Peter Harua Leta Peter Mo Ulia Leta Nike

Peter mo ulia vara kalesia la pa hahau sohena God mo opoia na maurira (1.3), ale vara la pa taurilati na reti-varaŕuhu sei la lavia moiso (1.12).

Mo retiŕoaŕoahaira mara vara pŕovet peresi na tamlohi vujangi haluhalu la unu na vao kalesia matan vara la tikaulejira na retivaraŕuhu, pani Moli i pa sile na talai isana tamlohi sohen haratu (2.1-22). Kalesia la pa turu ŕilangi hin la rani atu, la pa hahau na mauri tata-holo ale la pa tovongi na tovongi ŕuhu. La pa hase taurilatira, ale la usuri na malele lelevosahi, peresi na ŕomperavu, ale vujangi na posposi opoia isana tamlohi tari.

Hina purongo vara tamlohi na varama la sopo rasua, ŕa pa kilau toho matan rani atu Iesu i pa mele pala hinia (3.1-18)

'La tapalaku ŕuhuŕuhu, ha sopo kilau purongoi hinau nike, vara isan Moli, rani matea mo sohena tauni mo tari vahatea (1000) ale tauni mo tari vahatea mo sohena rani matea. Moli mo sopo vaimalum vara i maŕivisi na nona retitauhi sohena tamlohi hai la lo ŕomŕomia vara enia mo lo vaimalum, pani mo lo ŕomperavu matamim, matan mo sopo opoia vara tea i tihai, pani vara

tamlohi tari la posi na nora hehe.' (3.8-9)

### Hin Leta Nike

1. Reti ooloo peresi na usiusi (1.1-2)
2. Kalesia la pa lo toho sohena sava (1.3-15)
3. Hasohason Kŕisto (1.16-21)
4. Tamlohi vujangi peresi na Pŕovet haluhalu (2.1-22)
5. Varaŕuhu Iesu i pa mele mai (3.1-18)

### Retioloo

<sup>1</sup> Enau Simon Peter, volitusi matea, ale vahaŕule non Iesu Kŕisto.

Na lo uliuli isan la haratu sei la lavi na rasua ŕuhuŕuhu sohen kamam. Iesu Kŕisto sei mo sile rasua sei isaŕa, enia noŕa God, noŕa Jujuri, enia natu, mo vaiŕa ŕa tata-holo na nahon God, <sup>2</sup> noku usiusi vara God i pa leŕuhu hin kamim na nona ŕomŕuhu peresi na nona tamata vara la pa tueni kamim vara ha ulua na nomim levosahi hin God peresi Iesu noŕa Moli.

### Ulua Na Lelevosahi Hin God

<sup>3</sup> Suihan God mo sileŕa na hinau tari mata mauri, la tueniŕa na noŕa hahau na mauri sei sohen God mo opoia, la mai isaŕa na malele levosahi hin Iesu, ale enia haratu mo toviŕa matan vara ŕa pa lavi na nona hasohaso peresi na nona posposi ŕuhuŕuhu. <sup>4</sup> Hin nona suiha tavera atu, mo sileŕa na nona retitauhi tavera matuvana, la ŕuhuŕuhu jea. Mo retitauhi vara ŕa pa hitevosahia vara maurin God sei mo lo mauri na mauriŕa mo sohena sava,

ale řa pete jelu moiso na varama peresi na nona posposi lumiha sei mo lo komo na mauri tamlohi hinia.

<sup>5</sup> Ale matana, ha vaihitea řilangi vara ha sořotahi na nomim rasua peresi na posposi řuhu, ale nomim posposi řuhu peresi na levosahi, <sup>6</sup> ale nomim levosahi peresi na posposi mata hase taurilati kamim, ale nomim posposi mata hase taurilati kamim peresi na posposi turu řilangi, ale nomim posposi turu řilangi peresi na posposi sei God mo opoia, <sup>7</sup> ale nomim posposi sei God mo opoia peresi na nomim opoiopoi kamim, ale nomim opoiopoi kamim peresi na řomopoia varařuhu. <sup>8</sup> Vara ka lo ulua hin la posposi akerihi, ale la lo vua řuhu jea, i pa vujangia vara ka sopo toho purongo, ale nomim vavahinau mo lo ulua matan ka lo tutungui na lelevosahi isan nořa Moli Iesu Křisto. <sup>9</sup> Pani vara tea mo sopo ulua hin la posposi řuhu sei, enia mo matavuso, ale mo sopo kilau vano řove, matan mo řomaliho vara God mo hoje nařihi na nona hehe mata maurina tuai moiso.

<sup>10</sup> Ale matana, la voraiku peresi na vevoraiku, ha vujangi mamahunia i memera vara God mo tovi kamim, ale vara mo viřoni kamim varařuhu, matan vara ha lo vai la hinau řuhuřuhu sei ha sopo eři tialahalaha hin te rani. <sup>11</sup> Matan hin malele sei God i pa vai na malele i roi i tavera jea vara ha pa unu hin

mauri atu God mo aulu hinia sei mo lo toho jejeu, enia nořa Moli, nořa Jujuri Iesu Křisto.

### *Ha Tapurongo Na Retitapu*

<sup>12</sup> Matana, tarea enau na opoia vara a lo vere řohařohai kamim hin la hinau řuhuřuhu sei. Hina purongo vara ka pete levosahira moiso, ale ka lo turu řilangi na retivararřuhu sei ka pete lavia moiso. <sup>13</sup> Pani na lo řomřomia vara mo tataholo vara a lo vere řohařohai kamim hinia nake na pa lo mauri, <sup>14</sup> matan na levosahia vara a pa mate i pa sopo tuai sohen nořa Moli Iesu Křisto mo vujangi mo mera isaku. <sup>15</sup> Na opoia řilangi vara hitahu hin rani atu vara na vano, ha pa eři mele řomřomi la hinau sei.

<sup>16</sup> Matan kamam kama sopo usuri te sorasora la vere mamahunia mata halu sei tamlohi la opoia vara la rongora hin rani atu kama lo vere mamahuni kamim na suiha peresi na mele mai non nořa Moli Iesu Křisto, ale kamam kama hitea na matamam epena sei mo memera tavera hin rani atu.

<sup>17</sup> Matan God Tama mo sile na oloolo peresi na hasohaso tavera isana, ale leo matea mo tai isan God na masapa mo memera tavera atu, ale leo sei mo mai isana mara, "Harihi enia Natuku na opoia mo tavera jea, ale enau na avulahi tavera hinia." <sup>18</sup> Kamam sohena, kama rongo leo atu mo tai na tuka, matan kamam kama lo toho peresia hin vutivuti tapu atu.

<sup>19</sup> Matana, kama eři mele řomřilangi na retisohai nona

přovet. Ha kilau mamahuni na sava la ulia matan nora reti la sohena lamu mo lo memera na jara řořoha i tikeli rani atu Křisto i mele pala hinia, ale sohena majou matea, merana řilangi i pa merasahi na mapumim. <sup>20</sup> Tiroma hinau mo aulu, enia vara ha lo levosahia vara mo sopo te retimangovi hatea i tai isana přovet na řomira hasera, <sup>21</sup> matan mo sopo te retimangovi hatea na Retitapu i malue na masalon te tamlohi, pani tamlohi la retireti sohena God mo opoia. Ale la retireti matan Tanume Tapu mo mangovira na retireti.

## 2

### *Tamlohi Vujangi Haluhalu*

<sup>1</sup> Pani přovet haluhalu sohena la pala isana tamlohi tuai, ale sohena, tamlohi vujangi haluhalu la pa pala isamim, enira la pa lo vujangi luhu na nora halu, vujangi atu i pa komo na mauri tamlohi, enjora, la pa vunvuni na vavahinau non Moli sei mo volituhura, ale matana, talai mata komo na maurira i pa mai vilavila isara. <sup>2</sup> Moiso, tamlohi matuvana la pa usuri na nora posposi lumiha, ale matara, tamlohi la pa veresatihi na malele mauri sei mo usuri na retivararuhu. <sup>3</sup> Ale mata nora řomusuri la pa haluhalu kamim na nora retimemeji. Ale nora talai sei God mo taua tuai tuai moiso mo sopo toho

purongo, ale nora rani komo mo sopo peka.

<sup>4</sup> Matan vara God mo sopo kilau purongoi na angelo tuai mata nora hehe, pani mo pulahira la sivo Tatarus na varama mata mateia, ale hin jara atu mo pesilatira na moru řořoha tavera, la pa toho atu i tikeli na rani aria tavera.\* <sup>5</sup> Ale vara God mo sopo kilau purongoi na tamlohi na varama tuai tuai, pani mo juri Noah sei mo lo retivujavujangi na malele mata mauri tataholo, peresi na tupu limaravrua tinapua hin wai tavei tavera atu mo mai isana tamlohi sasati na varama, <sup>6</sup> ale vara God mo posi na taon tavera non Sodom enia Gomorrah la mai patmakovi, enia mo silera na talai matan vara la tihai, mo vaia sohena tovongi matea vara tamlohi la pa levosahia vara i pa sohena sava isana tamlohi sasati, <sup>7</sup> ale vara God mo juri tamlohi tataholo atu Lot mata řomina mo kaka jea mata posposi sasati jea nona tamlohi sasati atu, <sup>8</sup> matan tamlohi tataholo atu Lot, mo lo toho peresira na rani hatehateahi, ale řomina mo lavi na rani řilangi na sava mo lo rongora, ale mata nora vaivaileu la lo vaira na nahona.

<sup>9</sup> Ale Moli God mo levosahia sohena sava vara i pa juri na tamlohi řuhu na nora rani řilangi, ale mo levosahia sohena sava vara i pa lo sile na talai isana tamlohi hehe i tikeli na rani

\* **2:4:** Tatarus: Tatarus enia hijan jara atu mo lo toho atano na pulo varama mata mateia.

aria tavera, <sup>10</sup> ale, mo mele řilangi jea isan la haratu la lo hahau usuri na posposi lumiha sei mo lo komo na maurira, enira la sopo opoia vara tea i aulu hinira. La ngurunguru jea, ale la lo usuri na masalora purongo, la sopo matahu vara la veresatihi la angelo suiha sei la aulu jea na merara tavera na tuka, <sup>11</sup> ale angelo, hina purongo vara la aulu jea na suiha peresi na řilangi mo jeu la tamlohi nike, la sopo veresatihi la angelo suiha atu, na nora aria na nahon Moli.

<sup>12</sup> Pani la tamlohi nike, la sohenā maji řomira mo vono, la vora matan vara la pa taurira la vilimateira, la lo verelehilehi na hināu la sopo levosahi te hināu hinira, ale nora posposi sasati i pa vano i tihai peresira. <sup>13</sup> La lo lavi na rani řilangi mata nora hehe. La opoia jea vara la vai na hehe na jara tavera. La lo toho isamim sohen hapila sasati sei la komo na naho tamlohi matea, matan la lo opoia jea na rani la lo hanhani matavuhi peresi kamim na nora halu, <sup>14</sup> la sopo kilāu purongoi na hařai, matan matara mo mařivi na vaivaileu, la lo marohati mata hehe. La lo jine na tamlohi řomira mo lo rua. Mapura la levosahi mamahuni na nora hanmarua pono. God mo pete viřonira moiso mata komo. <sup>15</sup> La sopo mele usuri na malele tataholo, ale la jalio, la usuri na malelen přovet Balaam tuai, natun Beor sei,

mo opoia vara i vai na hina sati mata mania purongo. *Num 22.2-20* <sup>16</sup> Pani God mo reti řilangi isana mata nona hehe; mo vai donki atu mo eři retireti, pa donki atu mo reti isana, ale mo horo Balaam pa přovet atu na nona posposi rongorongono vono.

*Num 22.22-35*

<sup>17</sup> La tamlohi atu, la sohenā patu wai mamasa, ale la sohenā haravu sei řořo tavera la lo pulahira la lo vano, God mo tau mamahuni na řořoha puaha matara. <sup>18</sup> Nora retireti tavera la vuruvuru purongo, la retireti matan vara la reve la haratu la pa jelu purongo na masalo varama, matan vara la usuri na nora posposi lumiha sasati. <sup>19</sup> La retitauhi isara vara la pa materi, pani la tamlohi atu, enira la slev matan mauri atu mata komo purongo. Sava hināu mo jeu na tamlohi enia mo slev hinia. <sup>20</sup> Matan, vara la pete rovo moiso na posposi sasati mata varama mata nora levosahi hin nořa Jujuri, Moli Iesu Křisto, ale la mele kali na posposi sasati, suiħara mo isoiso, maurira la pa mele sati i jeu haratu tiroma. <sup>21</sup> Matan i pa mele řuhu isara vara la sopo levosahi na malele tataholo, mo jeu haratu vara la levosahia moiso, pani la mele vahafi na retileu tapu sei God mo silea isara tiroma. <sup>22</sup> Sava retilelevosahi vara řuhu mo vereā mo masese isara mara, 'Viriu mo mele hani na luana, ale poi sei mo loloso moiso



mo mele hilu vano vara  
i vuluvului na maka-  
maka.' *Prov*  
26.11

### 3

*Rani Pala Non Moli Mo Lo  
Mai*

<sup>1</sup> La tapalaku řuhuřuhu, ka  
levosahia vara harihi enia  
harua leta na ulia isamim.  
Na lolon la leta nike, na  
lo retiřoarioahai na nomim  
řomřomi řuhu, <sup>2</sup> matan  
vara ha mele řomřomi na  
reti nona přovet tapu tuai  
peresi na retileu non Moli  
nořa Jujuri atu sei nomim  
vahařule la silea isamim.

<sup>3</sup> Hinau tiroma vara ha  
pa levosahia, enia vara na  
pongi hitahu, tamlohi vaivai  
na tamlohi la pa vaivai na  
tamlohi, moiso la pa usuri na  
masalora sasati, <sup>4</sup> la pa vere  
vara, 'Nene nona retitauhi  
sei mo vere vara i pa mele  
mai? Hin rani atu tamamam  
la mate, hinau tari la pa lo  
toho sohena pongi tiroma sei  
God mo vai na hinau tari mo  
tikeli nake.'

<sup>5</sup> Matan, enira la lo kilau  
purongoi na retivarafuhu  
sei vara reti non God mo vai  
na masapa aulu mo lo toho  
tuai tuai jea, ale mo vai na  
varama nařihi na wai, ale mo  
vai na varama hin wai atu,  
<sup>6</sup> ale hin malele atu natu wai  
tavei mo putehi na varama  
tuai, ale mo tihai. <sup>7</sup> Pani  
hin reti non God atu natu,  
nake God mo tatamahuni na  
masapa peresi na varama  
mata hapu, la pa toho i tikeli  
rani aria tavera atu peresi  
na komokomo nona tamlohi  
sasati.

<sup>8</sup> La tapalaku řuhuřuhu, ha  
sopo kilau purongoi hinau  
nike, vara isan Moli, rani  
matea mo sohena tauni mo  
tari vahatea (1000) ale tauni  
mo tari vahatea mo sohena  
rani matea. <sup>9</sup> Moli mo sopo  
vaimalum vara i mařivisi  
na nona retitauhi sohena  
tamlohi hai la řomřomia  
vara enia mo vaimalum, pani  
mo lo řomperavu matamim,  
matan mo sopo opoia vara  
tea i tihai, pani vara tamlohi  
tari la posi na nora hehe.  
<sup>10</sup> Pani rani non Moli i pa mai  
sohena tamlohi vavanaho  
matea, tamlohi la pa hutura  
hinia, masapa i pa tihai na  
řořoa hapu tavera, ale majou  
peresi na vitusarasara tari la  
pa koru la tihai, ale varama  
peresi na vavahinau nona  
tamlohi hinia la pa toho na  
jara tavera.

<sup>11</sup> Matan la hinau sei la pa  
tihai sohen harihi, kamim ha  
pa usuri na posposi mo tapu,  
ale la řuhu sohen God mo  
opoia na maurimim, <sup>12</sup> ha lo  
saovia, ale ha vaihitea vara  
rani non God atu i pala vila.  
Matan God i pa jilangi na  
masapa na hapu, ale i pa ti-  
hai, ale hinau tari na mas-  
apa la pa lolo hin tutuni hapu  
atu. <sup>13</sup> Pani enřa řa lo usuri  
na nona retitauhi matan tuka  
paro peresi na varama paro  
sei mauri tataholo i pa toho  
hinira.

<sup>14</sup> Matana, la tapalaku  
řuhuřuhu, matan ka lo saovi  
la hinau sei, ha vaihitea  
vara i pa sopo vilei te hina  
lumiha teni te hinau i eři  
tuvai kamim hinia, ale ha  
toho na tamata.

<sup>15</sup> Ale ha hitevosahia vara řomperavu non nořa Moli mo lo sile na masapa matan vara tamlohi la pa eři juri hinia. Mo sohen voraiřa Paul mo uliuli matana moiso usuri lelevosahi atu God mo lo silea isana — <sup>16</sup> mo sohen mo lo vai na nona leta tari na rani mo lo retireti hin la hinau nike. Te hinau mo ulira la řilangi vara tea i eři levosahira, harihi, tamlohi sei la sopo lelevosahi peresi la haratu la lo řom rua, la lo pori na řaramira, ale la lo pori na řarami retireti na Retitapu sohena — pani la pa vano na nora komo matan posposi sei.

*Isoiso Reti Non Peter*

<sup>17</sup> Ale matana, la tapalaku řuhuřuhu, matan ka levosahi la hinau nike moiso, ha lo kilau! Ha pa sopo majinga vara te tamlohi vaivaileu i tikauleji kamim na nona haluhalu, vara i vono, ha pa jovi na nomim pulo turu řilangi na retivarařuhu sei ka lo turu hinia moiso. <sup>18</sup> Pani kamim ha ulua na hina řuhu peresi na levosahi non nořa Moli, nořa Jujuri Iesu Křisto. Isana, řa pa sile na hasohaso tavera nake pongi tui tarea, amen.

# 1 John

## Tiroma Leta John Mo Ulia

### Leta Nike

John mo opoia vara tamlohi la rasua vara God i pa řomiřa hin rani atu vara la taviti na nořa hehe (1.9).

Tamlohi la vujangia vara la rasua varařuhu vara la lo opoi opoira (3.11–24). Matan God enia opoia, nona tamlohi varařuhu la pa sohena (4.1–21). Vara tamlohi rasua la jeu na nora hehe la pa hahau na malelen opoiopoira, ale la rasua vara Iesu Natun God enia Jujuri varařuhu mo mai tamlohi vara i mate matařa (5.1–12).

'Reti matan mauri atu mo lo toho tuai tiroma na pongi tiroma, ... haratu kama hitea na mata-mam' (1.1)

### Hin leta nike

1. Reti non God mo sile na mauri (1.1–4)
2. God enia malarani, Křisto enia nořa tovongi (1.5–2.6)
3. Retileu paro (2.7–17)
4. Meresahi non Křisto peresi na tamlohi non God (2.18–3.10)
5. Opoia non God peresi na nořa opoia (3.11–4.21)
6. Jeu na varama (5.1–21)

### Reti Sei Mo Sile Na Mauri

<sup>1</sup> Kama lo vereuli kamim na reti mata mauri atu mo lo toho tuai na pongi tiroma, haratu kama rongoa, haratu kama hitea na matamam, ale haratu kama kilaua, ale kama tikelia na limamam

tataholo, <sup>2</sup> mauri atu mo pala, kama hitea, ale kama lo vereuli na sava kama hitea moiso. Nake, kama lo vere kamim hin mauri tui atu, haratu mo lo toho peresi God Tama, ale nake mo asi isařa. <sup>3</sup> Kama lo vere varařuhu na sava kama hitea, ale kama rongoa matan vara ha pa eři lavi na mauri tui sei peresi kamam, moiso enřa řa pa matea peresi Tama enia Natuna, Iesu Křisto. <sup>4</sup> Kama lo uli na hinau tari isamim matan vara ha pa avulahi jea.

### God Enia Malarani

<sup>5</sup> Haranike enia Retiřuhu kama rongoa isana, ale kama lo vereea isamim: God enia malarani, ale mo sopo te řořoha hinia.

<sup>6</sup> Vara řa vereea vara řa lavi na mauri peresi God, ale řa lo toho na řořoha, enřa řa lo halu, řa sopo hahau usuri na retivarařuhu.

<sup>7</sup> Pani vara řa lo hahau na malarani sohen God mo lo toho na malarani, enřa řa pete pulutahi hin mauri atu moiso peresi na tatuařa, ale řaen Iesu Natuna mo lo hoje nařihi na nořa sasati. <sup>8</sup> Vara řa vereea vara mo sopo te nořa sasati, řa lo haluřa haseřa, ale retivarařuhu mo sopo toho isařa. <sup>9</sup> Vara řa taviti na nořa sasati isan God, God i pa vai na hiņa tataholo sohen mo vereea isařa moiso mara, i pa řomi na nořa hehe, ale i pa vai na nořa hehe tari la sopo vaiřa řa lumiha na nahona.

<sup>10</sup> Pani vara řa vereea vara řa sopo vai te hina sasati, řa lo vereea vara God enia tamlohi halu matea, ale nona reti mo sopo toho isařa.

## 2

### *Křisto Mo Tuenřa*

<sup>1</sup> La natuku, na lo uli la hinau sei matan vara ha sopo vai na hina sasati, pani vara ha vai na hina sasati, nořa tuetueni matea mo lo toho peresi God Tama, enia Iesu Křisto haratu mo tataholo. <sup>2</sup> Křisto mo hase silea vara i voli nařihi na nořa sasati, pani mo sopo matan nořa haseřa, pani peresi na hina sasati nona tamlohi tari na varama.

<sup>3</sup> Ra lo levosahia vara řa levosahi God hin malele akerihi: Ra lo levosahi God vara řa lo oloolo na nona retileu. <sup>4</sup> Vara tea mo vereea vara mo levosahi God, pani mo sopo oloolo na nona retileu, enia tamlohi halu, ale hina varařuhu mo sopo toho isana, <sup>5</sup> pani haratu mo lo oloolo na nona reti, opoia non God mo jea varařuhu isana. Hin malele nike, řa pa levosahi i řuhu vara enřa řa lo toho hinia: <sup>6</sup> haratu mo vereea vara enia mo lo toho hinia, enia i pa hahau sohen Křisto mo hahau.

### *Retileu Paro*

<sup>7</sup> La tapalaku řuhuřuhu, na sopo uliuli isamim matan vara a mele sile kamim hin te retileu paro, pani enia pa haratu la lo sile kamim hinia tiroma moiso, ale enia retireti atu ka pete rongoa moiso, <sup>8</sup> pani retileu atu na lo ulia isamim mo sohena retileu paro matea, ale mo lo toho na maurin Křisto peresi na maurimim, matan ka hite na řořoha mo lo majara, ale malarani varařuhu mo lo sasarami moiso.

<sup>9</sup> Haratu mo lo vereea vara mo lo toho na malarani, pani mo lo hitesatihi na voraina, enia mo pa lo toho na řořoha mo tikeli nake. <sup>10</sup> Haratu mo lo opoi na vorain Křisto, enia mo lo toho na malarani, ale mo sopo tea i eři jalio mata nona vavahinau. <sup>11</sup> Pani haratu mo lo hitesatihi na vorain Křisto, mo pa lo toho na řořoha, mo lo hahau na řořoha, ale mo sopo levosahi na jara mo lo vano ea, matan řořoha mo vusohi na matana.

<sup>12</sup> La natuku, na lo uliuli isamim matan nomim sasati God mo řomřa matan Křisto. <sup>13</sup> La haratu la vajiaha, na lo uliuli isamim matan ka levosahi haratu mo lo toho atu tiroma na tapulon vavahinau. La uluvou, na lo uliuli isamim matan ka jeu Tiapolo enia pulo sasati. <sup>14</sup> La natuku, na lo uliuli isamim matan ka levosahi Tama moiso, ale la vajiaha, na lo uliuli isamim matan ka levosahi haratu mo lo toho tiroma moiso na tapulo vavahinau. La uluvou, na lo uliuli isamim matan ka suiha, ale reti non God mo lo toho hin kamim, ale ka jeu haratu enia pulo sasati.

<sup>15</sup> Ha sopo opoi na varama teni te hinau non varama. Vara ha opoi na varama, ha pa eři opoi Tama sohena sava? <sup>16</sup> Matan hinau na varama mo sohen harihi: řomjea na masalom sasati, řomjea na hinau ko hitea, hapahapa na nom hinau, ale la hinau sei la sopo tai isan Tama, pani la tai na varama purongo, <sup>17</sup> moiso varama

sei mo lo vano vara i tihai peresi na masalona tari, pani haratu mo lo vai na masalon God enia i pa toho jejeu.

### *Meresahi Non Křisto La Pala*

<sup>18</sup> La natuku, nake enia isoiso rani. Sohena ka pete rongoa moiso vara meresahi non Křisto la lo mai, ale meresahi matuvana non Křisto la pala moiso, ale matana řa levosahia vara pongi hitahu mo mai moiso. <sup>19</sup> Hina purongo vara la tamlohi atu la tai na vaořa, pani enira la sopo tatuara. Vara la pa lo tatuara varařuhu, la pa lo toho peresiřa. Pani la malue isařa matan vara i memera vara enira la sopo tatuara.

<sup>20</sup> Pani kamim mo isoiso ka levosahi harihi moiso, matan God Tapu mo viřoni kamim. <sup>21</sup> Na sopo uliuli isamim matan ka sopo levosahi na retivarařuhu, pani matan ka levosahia moiso, ka pete levosahia moiso vara retihaluhalu i pa sopo eři tai isana retivarařuhu. <sup>22</sup> Hare natu, enia tamlohi halu, haratu sei mo lo vereva vara Iesu enia mo sopo Křisto varařuhu sei God mo viřonia. Vara tea mo vereva sohena, enia natu, meresahi non Křisto, matan mo řohu hin Tama peresi Natuna. <sup>23</sup> Haratu mo řohu hin Natuna mo sopo lavi Tama. Pani haratu mo vereva vara Iesu enia Natun God, Tama mo lo toho peresia. <sup>24</sup> Moiso, vara ha turu řilangi tarea na sava retireti ka rongoa tiroma moiso, ale ha pa lo matea na mapumim

peresi Tama enia Natuna. <sup>25</sup> Mauri tui enia retitauhi sei mo retitauhi hinia isařa.

<sup>26</sup> Enau na lo uliuli isamim matan la haratu la lo tikauleji kamim, <sup>27</sup> pani Křisto mo viřoni kamim na Tanume Tapu, ale mo lo toho hin kamim. Ale kamim ha pa sopo mele opoi te tamlohi vujangi tinapua vara i vujangi kamim. Pani mo řuhu vara ha toho hin Křisto, ale ha usuri na sava hinau Tanume Tapu mo vujangi kamim hinia matan hinau tari mo vujangia mo varařuhu, mo sopo te hina halu hinia.

### *La Natun God*

<sup>28</sup> Natuvarihi, mo řuhu vara ha toho jejeu hin Křisto, matan vara hin rani atu i mele mai, řa pa sopo eři matahu, ale řa pa sopo mahanuhanu hin te hinau hin rani atu, <sup>29</sup> matan ka levosahia vara Křisto mo tataholo, ha pa levosahia sohena vara haratu mo lo vai na hinau mo tataholo, enia mo vora isana.

## 3

<sup>1</sup> Ka hite na opoia tavera non God Tama isařa mo sohena sava, matan mo toviřa vara enřa natuna, ale mo sohen haratu natu. Pani tamlohi varama la sopo levosahiřa matan la sopo levosahi God Tama. <sup>2</sup> La tapalaku řuhuřuhu, enřa natuna nake, pani mo sopo pala vara řa pa sohena sava hin pongi hitahu, pani řa levosahia vara hin pongi atu Křisto i mele pala hinia, enřa řa pa sohen Křisto, matan enřa řa pa hitevosahia i řuhu

vara enia mo sohena sava. <sup>3</sup> Ale la haratu la ŀomtoho sohen harihi, la hase vaira la vokevoke ŀuhu, sohen Kŀisto enia mo vokevoke ŀuhu.

<sup>4</sup> La haratu la lo vai na hehe tarea, enira la lo vaivaileu tarea, ale hehe enia vaivaileu. <sup>5</sup> Ale ka levosahia vara Kŀisto mo pala vara i lavi naŀihi na hehe, ale mo sopo te hehe isana. <sup>6</sup> Haratu la lo toho isana la sopo eŀi vai na hehe tarea, vara tea mo hehe tarea enia mo sopo levosahi Kŀisto, ale enia mo sopo hitevosahia teni levosahia hin te rani.

<sup>7</sup> Natuvarihi, ha sopo tinaŀihia vara tea i halu kamim! Harepu mo vai na hinau tataholo tarea enia mo tataholo mo ŀuhu sohen Kŀisto mo tataholo. <sup>8</sup> Harepu mo lo hehe tarea enia non Tiapolo. Tiapolo mo lo hehe tiroma na tapulo varama mo tikeli nake. Pani Natun God mo mai vara i pa vaikomokomo na vavahinau non Tiapolo. <sup>9</sup> Haratu la vora isan God, la sopo eŀi vai na hehe tarea matan suihan God mo lo toho na maurira, mo vaira la mai natuna, ale matan haratu la pa sopo eŀi vai na hehe tarea.

### *God Enia Opoia*

<sup>10</sup> Ha pa levosahi la haratu la natun God isan la haratu la natun Tiapolo sohen harihi: haratu la sopo taura vara la vai na hinau i tataholo tarea la sopo non God, ale sohen haratu, la sopo opoi na voraira. <sup>11</sup> Pani retisohai sei enia retisohai atu ka rongoa moiso na pongi tiroma vara, ŀa pa opoiopoiŀa, <sup>12</sup> moiso,

vara ha sopo sohen Cain atu tuai sei mo vilimatei tasina, enia non Tiapolo. Mo vili-mateia mata sava? Mo vaia matan tarea tasina enia mo lo vai na hinau mo lo tataholo, pani enia mo lo vai na hinau mo lo hehe matan enia tamlohi hehe. *Gen 4.8*

<sup>13</sup> La voraiku peresi na vevoraiku ŀuhuruŀuhu, ha sopo maŀurahi tavera vara tamlohi varama la ŀohu hin kamim. <sup>14</sup> Ra levosahia vara ŀa tai na mateia moiso ŀa vano na mauri moiso matan ŀa opoi na voraiŀa kalesia. Pani haratu mo sopo te nona opoia, enia mo pa lo toho na suiha mateia.

<sup>15</sup> Vara tea mo lo hitesatihi na voraina, enia tamlohi vili tamlohi matea moiso, ale ka levosahia vara mo sopo te tamlohi vili tamlohi hatea vara mauri tui mo lo toho isana. <sup>16</sup> Ra levosahia vara opoia varaŀuhu enia hin posposi sei; Iesu mo sile na maurina mataŀa, ale matan haratu, mo ŀuhu vara ŀa sile na mauriŀa mata vorai kalesia tinapua. <sup>17</sup> Ale matana, vara tea nona hinau mo matuvana, ale mo hite na vonana matea mo vejuveju na hinau matea, pani mo sopo tuenia, opoia non God mo lo toho hinia sohena sava? <sup>18</sup> Natuvarihi, ŀa sopo retireti vono purongo, pani ŀa pa opoi na tinapua na noŀa vavahinau peresi na retivaraŀuhu.

<sup>19</sup> Vara ŀa opoi na tinapua ŀa lo vujangia vara enŀa non retivaraŀuhu, ale ŀomiŀa la sopo tialahalaha na nahon

God, <sup>20</sup> hina purongo vara ņomiņa la lo ariņa hin te hinau, God mo aulu na ņomiņa, ale enia mo levosahi na hinau tari la varaņuhu. <sup>21</sup> La tapalaku ņuhuņuhu, vara ņomiņa la sopo hase ariņa na nahon God, enņa ņa pa eņi ņomņilangi vara ņa mai mariviti isana, <sup>22</sup> moiso enia i pa sileņa na sava hinau ņa usia isana matan ņa opoia vara ņa oloolo na nona reņileu, ale tarea ņa lo vai na sava God mo avulahi hinia. <sup>23</sup> Ale God mo sile nona reņileu akerihi: vara ņa tau na noņa rasua hin Natuna Iesu Kņisto, ale ņa opoiopoiņa sohena Iesu mo reņileu hinia isaņa moiso. <sup>24</sup> Ale haratu mo lo oloolo na reņileu non God, mo lo toho hin God, ale God mo lo toho hinia, moiso hin malele akerihi natu, ņa levosahia vara God mo lo toho isaņa, matan Tanumena atu mo silea mo lo toho isaņa.

#### 4

##### *Ha Pa Rasu Na Sava Hinau*

<sup>1</sup> La tapalaku ņuhuņuhu, ha sopo rasu na tanume tari vara la verea vara la lo retireti na suiņan Tanume Tapu, pani ha vaihitera vara la tai isan God teni mo vono, matan pņovet haluhalu matuvana la vano na varama moiso, <sup>2</sup> ale kamim ha pa eņi levosahia varaņuhu vara sahara mo tai isan God sohen harihi: haratu mo verea vara Iesu enia Kņisto, ale vara mo verea vara Iesu mo mai tamlohi varaņuhu, tanume atu natu mo tai isan God. <sup>3</sup> Pani haratu mo sopo taviti vara Iesu enia Kņisto mo sopo tai isan God, ha pa levosahia

vara enia meresahi non Kņisto sei ka rongoa moiso vara i pa mai, ale nake mo pete toho na varama moiso.

<sup>4</sup> Natuvarihi, kamim non God, ale kamim ka jeu la meresahi atu moiso matan Tanumen God mo lo toho hin kamim, ale enia mo suiha mo jeu haratu mo lo toho na varama. <sup>5</sup> La meresahi nike, la tai na varama, ale matana, tamlohi na varama mo tapurongo isara matan la lo retireti na masalon varama.

<sup>6</sup> Enņa non God, ale la haratu sei la levosahi God la pa tapurongo isaņa, pani la haratu la sopo levosahi God la pa sopo tapurongo isaņa. Hin posposi atu natu, ņa pa eņi levosahia i ņuhu vara hare mo lo retireti: Tanume Tapu atu mo varaņuhu teni te tanume haluhalu.

<sup>7</sup> La tapalaku ņuhuņuhu, ņa pa opoiopoiņa mata opoia mo tai isan God, ale haratu mo lo sile na opoia, enia mo vora isan God, ale mo levosahi God. <sup>8</sup> God enia opoia. Ale vara tea mo sopo opoi na tinapua, enia mo sopo levosahi God. <sup>9</sup> God mo vuhesi na nona opoia isaņa sohen harihi: mo ņule Natuna vorahese mo mai na varama matan vara ņa pa mauri hinia. <sup>10</sup> Pulo opoia varaņuhu enia mo sohen harihi; enņa ņa sopo opoi God tiroma, pani God mo opoiņa tiroma. God mo ņule Natuna vara i voli naņihi na noņa sasati. <sup>11</sup> La tapalaku ņuhuņuhu, matan God mo opoiņa mo tavera sohen

harihi, mo řuhu vara řa pa opoiopoiřa.

<sup>12</sup> Tea mo sopo lo hite God hin te pongi, pani vara řa opoiopoiřa, God mo lo toho hiniřa, ale nona opoia mo lo toho varařuhu na mapuřa.

<sup>13</sup> Matan God mo sileřa na Tanumena, řa levosahia vara enřa řa lo toho hinia, sohen enia mo lo toho hiniřa. <sup>14</sup> Ale kama hitea, kama lo vereulia isana tinapua vara God mo řule Natuna vara i mai Jujuri mata varama. <sup>15</sup> Vara tea mo taviti vara Iesu enia Natun God, God mo lo toho isana, ale enia mo lo toho isan God. <sup>16</sup> Ale řa levosahi mo řuhu moiso, řa rasua vara God mo opoiřa varařuhu. God enia opoia. Vara řa lo opoiopoiřa, enřa řa pa matea na mapuřa peresi God, ale enia i pa toho peresiřa. <sup>17</sup> Hin malele akerihi, opoia mo jea varařuhu matan vara řa pa eři řomřilangi hin rani aria atu, ale matana, řa pa hahau sohen Křisto mo lo hahau na varama. <sup>18</sup> Opoia jea sohena, i pa levuti nařihi na matahu. Ale haratu mo lo matahu enia mo matahu mata řomřomi mata aria, ale mo vujangia vara nona opoia mo pa lo makire.

<sup>19</sup> Ra opoi God matan God mo opoiřa tiroma. <sup>20</sup> Pani vara řa mo vereia vara mo opoi God, pani mo sopo opoi na voraina, enia tamlohi halu. Mo sopo eři hite God nake, pani mo sohena sava natu, vara mo vere

vara mo opoi God, pani mo sopo opoi na voraina mo eři hitera? <sup>21</sup> Retileu sei God mo sileřa hinia mo sohen harihi, "Haratu mo opoi God, enia i pa opoi na voraina."

## 5

### *Jeu na Varama*

<sup>1</sup> La haratu la rasua vara Iesu enia Křisto, enira natun God. Ale la haratu la opoi God Tama, la pa opoi na natuna tari. <sup>2</sup> Ra levosahia vara řa opoi na natuna tari hin posposi sei: matan řa opoi God, ale matan řa oloolo na nona retileu. <sup>3</sup> Matan řa vujangi na nořa opoia hin God na nořa oloolo na nona retileu, ale mo sopo řilangi mata usurira.

<sup>4</sup> Haratu la vora isan God la pa eři jeu na varama mata nora rasua, enia natu, mo vaira la jeu na varama. <sup>5</sup> Ale haratu mo jeu na varama enia haratu mo rasua vara Iesu enia Natun God.

### *Iesu Enia Hare*

<sup>6</sup> Iesu Křisto mo mai na malele wai peresi na řae, mo sopo na wai hasena, pani wai peresi na řae.\* Tanume Tapu mo vereulia matan Tanume Tapu mo varařuhu. <sup>7</sup> Varařuhu, hinau mo tolu la vereulia, <sup>8</sup> Tanume Tapu, wai peresi na řae la turu na jara matea purongo.

<sup>9</sup> Vara řa lo rasu na retireti nona tamlohi purongo, sava God mo vereulia hinia hin Natuna mo mele řuhu jea.

\* **5:6:** wai peresi na řaena: wai peresi řaena mo roro hin rani atu tamlohi vuro matea mo urai Iesu. Hite: Jn 19.34. John mo ulia nike, vara řa levosahia vara Iesu mo lavi na epe tamlohi, mo sopo nunua purongo sohena hai la vereia.



Retivuhesi atu mo sohen har-  
 ihi: <sup>10</sup> Vara řa tau na nořa ra-  
 sua isan Natun God, řa lo vu-  
 jangia vara řa rasu na vereu-  
 lia non God hin Natuna. Pani  
 vara řa sopo rasu na sava  
 God mo vereulia hinia hin  
 Natuna, řa lo vereia vara God  
 enia tamlohi halu. <sup>11</sup> Ale  
 vereulia atu mo sohen har-  
 ihi: God mo sile na mauri tui  
 moiso, mauri tui atu mo lo  
 toho isan Natuna. <sup>12</sup> Ale vara  
 haratu mo lavi Natun God mo  
 lavi na mauri tui, pani haratu  
 mo sopo lavi Natun God, mo  
 sopo lavi na mauri tui.

### *Vujangi Mata Mauri Tui*

<sup>13</sup> Na lo uliuli isan la haratu  
 la rasu Natun God, matan  
 vara ha pa levosahia i řuhu  
 vara kamim ka lavi na mauri  
 tui moiso. <sup>14</sup> Ale řa pa lev-  
 osahia vara řa usiusi i usuri  
 na masalon God, enia i pa  
 tapurongo isařa. <sup>15</sup> Ale vara  
 řa levosahia vara God mo lo  
 tapurongo na nořa usiusi, řa  
 pa levosahia varařuhu vara  
 řa pa lavi na sava řa usia  
 isana.

<sup>16</sup> Vara tea mo hite na vo-  
 raina matea mo lo vai na  
 hehe sei mo sopo matan vara  
 i mate matana, i pa eři usiusi  
 vara God i silea na mauri.  
 Pani vara hehe atu enia hehe  
 mata mate, i pa sopo eři  
 usiusi matana. <sup>17</sup> Lejileji tari  
 enira hina sasati, pani hina  
 sasati tari la pa sopo sile na  
 mateia.

<sup>18</sup> Ra lo levosahia i řuhu  
 vara haratu la vora isan God  
 la pa sopo eři vai na hehe  
 tarea. Natun God mo lo tingi  
 horora, ale Tiapolo i pa sopo  
 eři komora.

<sup>19</sup> Ra levosahia mo řuhu  
 vara enřa řa tai isan God,  
 pani tatuara tinapua tari na  
 varama la lo toho na suihan  
 Tiapolo.

<sup>20</sup> Ra levosahia vara Natun  
 God mo mai mo sile na lev-  
 osahi vara řa pa eři levosahi  
 God varařuhu. Ale řa lo toho  
 hin haratu mo varařuhu,  
 Natuna Iesu Křisto enia God  
 varařuhu, enia mauri tui.

<sup>21</sup> Natuvarihia, ha toho asau  
 na posposi mata lotulotu  
 vono.

## 2 John

### Harua Leta John Mo Ulia Leta Nike

John mo uli leta nike, matan vara tamlohi rasua la pa eñi levosahia vara opoia enia hina aulu na mauri rasua. Mo vujangia vara opoia peresi na retivarañuhu la pa toho jara matea na mauri rasua. Mo vujangia vara Iesu enia tamlohi varañuhu matea. John vujangia vara enña ña pa opoiopoiña.

#### Hin leta nike

1. Retioloolo (1-3)
2. Opoia peresi na reti-  
varañuhu (4-11)
3. Isoiso reti (12-13)

<sup>1</sup> Leta nike, enau patu tamlohi rasua sei John, na ulia isan hañai sei God mo viñonia peresi na natuna.\* Enau peresi la haratu la levosahi na retivarañuhu, kama opoi kamim mo isoiso. <sup>2</sup> Kama opoi kamim mata retivarañuhu mo lo toho na mapuña, ale i pa toho atu na pongi tui. <sup>3</sup> Moiso na ususi vara God Tama peresi Natuna Iesu Křisto vara la pa řomñuhu hiniña, ale la řomopoiña, moiso vara la pa sileña na nora tamata, na nora retivarañuhu, ale na nora opoia. <sup>4</sup> Enau na avulahi tavera matan na rongoa vara te natum la lo oloolo na retivarañuhu sohen

God Tama mo retileu hinia isaña moiso.

#### Tamlohi Vujangi Haluhalu

<sup>5</sup> Vetasiku řuhuñuhu, na sopo uliuli vara a vereho vara o pa oloolo hin te retileu paro hatea, mo vono, pani na lo uli haratu mo vereha tiroma moiso vara ña opoiopoiña. <sup>6</sup> Opoia varañuhu enia vara ña vai na sava God mo retileu hinia moiso, ale haratu ka rongoa moiso na tapulo rani, vara ña pa hahau hinia. <sup>7</sup> Matan ka levosahia vara tamlohi haluhalu matuvana la vano na varama moiso. La tamlohi haluhalu atu la retihalu vara Iesu Křisto mo sopo mai tamlohi varañuhu. La tamlohi haluhalu atu enira meresahi non Křisto. <sup>8</sup> Ha lo kilau matara! Mo sopo řuhu vara sava kama voko řilangi matana matamim i vano hina purongo, pani ha vaihitea vara ha lavi vevuhi na nomim otori isana. <sup>9</sup> Haratu řomina mo lo vano asau na hinau la vujangia hin Křisto moiso, ale mo sopo turu hinia, haratu natu, God Tama mo sopo lo toho peresia. Pani vara tea mo toho jejeu na sava hinau la vujangia moiso, God Tama peresi Natuna la pa lo toho peresia. <sup>10</sup> Vara tea i mai, pani mo lavi na vujangi tinapua, ha sopo tinañihia vara i unu na imamim, ha sopo silea na retioloolo, <sup>11</sup> matan, vara haratu mo sile na retioloolo isara, enia mo lo tuenira na nora hehe.

\* **1:1:** hañai peresi na natuna: reti sei hañai peresi na natuna la vereha vara John mo lo řaramia vara hañai atu enia vao kalesia matea, ale natuna enia vao kalesia matan vao kalesia atu.

*Isoiso Retioloolo*

<sup>12</sup> Varaʻuru na opoia vara a mele vere kamim na hinau matuvana, pani na sopo opoia vara a uli na leta purongo. I pa mele ʻuru vara a mai vara enʻa tolu ʻa pa sorasora, ale ʻa pa avulahi tavera matana. <sup>13</sup> Reti oloolo mo lo mai isamim mo tai isan la natun vetasimim nike God mo viʻonia.

## 3 John Hatolu Leta John Mo Ulia

### Leta nike

John mo uli leta nike matan vara kalesia la pa řomiřomi mata tueni la haratu la lo vai na vavahinau non Moli na jara tinatinapua na varama. Mo ulia isan Gaius, tamlohi tavera matea na rasua ale mo lo usuri posposi akerihi moiso.

### Hin Leta Nike

1. Retioloolo isan Gaius (1-4)
2. Kalesia la pa hase tuetuenira (5-12)
3. Isoiso retioloolo (13-15)

1 Leta nike, enau patu tamlohi rasua sei John na ulia isan tapalaku řuhuřuhu sei Gaius, na opoiho na retivarařuhu. 2 Tapalaku řuhuřuhu, na usiusi vara hinau tari la pa řuhu isam, na lo řomtoho vara epem i pa suiha sohen ko suiha na nom mauri rasua. 3 Na rani vorai kalesia la rohi kamam nike, la vereea vara engko, ko lo hahau usuri na retivarařuhu, ale enau na avulahi tavera matana. 4 Mo sopo te hinau hatea i vaiiau a avulahi tavera sohen harihi hin haratu na rongoa vara natuku la lo hahau usuri na retivarařuhu. 5 Tapalaku řuhuřuhu, ko vai na hina tataholo mata rasua matan ko lo tueni na vorai kalesia sei la lo mai isam, hina purongo vara enira la tamlohi tinapua, 6 enira la vere na nom opoia isan la vao kalesia nike. Ale mo řuhu

vara o řulera na nora hahau na posposi mo tataholo na nahon God, 7 matan la lo hahau mata hijan Moli, la hatihia moiso vara la pa sopo lavi te tuetueni isan te tinapua vara mo sopo levosahi God. 8 Matana, mo řuhu vara řa tueni na tamlohi sohen harihi, matan vara řa eři voko peresira na retivarařuhu. 9 Na uliuli mo vano isana vao kalesia atu moiso, pani Diotrefhes mo opoia vara enia i pa tiroma hinira, mo řohu vara i tapurongo hin kamam. 10 Ale vara a mai, a pa reti isana matan mo lo verelejileji kamam, ale mo sopo haratu purongo mo vaia, pani mo lo turuhoro na voraiřa la lo mai vara la rohi na vorai rasua ea. Ale mo tau nařihi na tamlohi mata vao kalesia matan la opoia vara la sile na retioloolo isara. 11 Tapalaku, o sopo tisuri na posposi sasati, pani o tisuri na posposi řuhu matan haratu la lo vai na hina řuhu enira natun God, pani la haratu la lo lejileji tarea la pa sopo levosahi God. 12 Tamlohi tari la vereea vara Demetrius enia tamlohi řuhu matea, ale nona vujangi mo varařuhu matan la vujangia vara enia tamlohi řuhu. Kamam sohena, kama lo vereea vara enia tamlohi řuhu matea, ka levosahia vara kama lo vereea varařuhu.

### Isoiso Retioloolo

13 Varařuhu na opoia vara a mele vere kamim na hinau matuvana, pani na sopo opoia vara a ulia hin leta nike purongo. 14 Pani

na lo řomtoho vara a pa  
mai nohorihi purongo, ale  
řa pa sorasora matavuhi.  
<sup>15</sup> Na usiusi vara tamata  
non God i pa toho isam.  
Tapalam nike, la sohai na  
nora retioloolo isam, ale o  
pa sile na retioloolo isana  
tapalařa hatehateahi atu.

## Jude Leta Jude Mo Ulia Leta nike

Jude mo vere na hinau matuvana mata tamlohi vujangi haluhalu, enira tamlohi sasati ale God i pa sile na talai tavera isara, matana, kalesia la pa lo kilau mamahu vara la pa sopo tapurongo na nora vujangi.

Isoiso reti non Jude hin leta nike enia usiusi matea mo lo sile na leʻruhu isan God:

‘Ale nake, ʻra pa sile na oloolo tavera isan God, matan enia hasena i pa eʻri turuhoro kamim vara ha sopo jovi, ale enia i pa lavi kamim i tau kamim na nahona ha vokevoke, ale ha pa avulahi tavera jea. Mo tataholo vara God noʻra Jujuri hin noʻra Moli Iesu Kʻristo, i lavi na oloolo tavera, auluna, suiha, ale suiha mata i aulu na hinau tari. Amen.’ (24–25)

### **Hin leta nike**

1. Retioloolo (1–2)
2. Turu ʻrilangi na rasua (3–13)
3. Turuhoro na tamlohi vujangi haluhalu (14–23)
4. Isoiso usiusi (24–25)

<sup>1</sup> Leta nike, enau Jude na ulia. Enau slev non Iesu Kʻristo, enau tasin James. Na uliuli isan la haratu, God Tama mo viʻronira, ale mo taura na nona opoia, Iesu Kʻristo mo lo matahira.

<sup>2</sup> Na lo usiusi vara tarea, God i pa leʻruhu hin kamim

i tavera jea, ale vara tarea, i pa silea kamim na nona ʻromopoia peresi na nona tamata peresi na nona opoia!

### *Tamlohi Vujangi Haluhalu*

<sup>3</sup> La tapalaku ʻruhuʻruhu, a pa vere a vara, tiroma na lo ʻromʻromia vara a uliuli isamim vara God mo juriʻra sohena sava, pani nake, na hitea vara a pa uliuli vara a retituetueni kamim vara ha pa valum ʻrilangi tarea mata taurilati vujangi varaʻruhu atu, God mo lo silea isana nona tapuhi moiso na rani matea mata rani tui tui. <sup>4</sup> Te tamlohi la mai luhu, la unu matan te ʻromira na livuhaʻra, ale la lo vere a lara, ‘Mo ʻruhu purongo vara ʻra vai na hehe peresi na haʻrai teni ʻra vai te hina sasati matuvana, matan ʻromʻruhu non God i pa vai God i ʻromira.’ Posposi sohen harihi, mo lo vujangia vara la vahari hin Moli Iesu Kʻristo noʻra Tamlohi Tavera, enia sei mo matelete. Pani tuai jea, la ulia moiso, ale Retiulia mo retiʻroaʻroahai vara God i pa ari na tamlohi sei la ʻrohu na posposi tataholo non God sohen harihi.

### *Angelo Sasati Matan Tuai*

<sup>5</sup> Pani nake na opoia vara a mele vere a isamim na sava ka levosahia mo ʻruhu moiso, vara sava mo masese isana tamlohi atu Moli God mo jurira tuai Egypt, pani hitahun haratu, enia mo komo la haratu la sopo rasua. *Exo 12.51; Num 14.29–30* <sup>6</sup> Ale sohena sava, God mo pesi la angelo atu tuai, haratu la sopo avulahi na suiha sei God

mo taua isara, ale la malue na jarara tataholo, ale matana, God mo lo taurilatira na jara řořoha tavera matea. La pa toho atu, i tikeli na rani tavera mata aria. *2Pe 2.4, 9* <sup>7</sup> Ale ha řomřomi na sava mo maseše isana taon matan Sodom enia Gomorrah peresi na taon la lo toho mariviti hinira tuai, matan nora tamlohi la vaia sohen la angelo atu tuai, matan la lo hahau usuri na posposi viriu matuvana peresi la haratu la sopo tataholo isara, ale sohen sava God mo komora na hapu, mo vaia sohen tovongi matea isařa mata talai tui tui. *Gen 19.1-24*

### *Tamlohi Sasati La Mangisi*

<sup>8</sup> Sohen la haratu tuai, la tamlohi nike la unu, la vai na posposi hehe na epera mo sati, matan la vere na tamlohi vara la pa vai na sava la lo mavuho hinira. Ale la tipahi na suiha tari sei la aulu hinira, ale la verehilehi na angelo aulu. <sup>9</sup> Pani Michael moli nona angelo, mo sopo vaia sohen. Hin rani atu mo opoia vara i lavi nařihi na tarapen Moses, enia Tiapolo la vauriuri matana, pani hina purongo hin haratu vara enia mo angelo aulu matea, mo sopo retilehilehi na hijan Tiapolo, mo vono, Michael mo vere purongo mara, "Moli God i pa sileho na talai!" *Dan 10.13, 21; 12.1; Rev 12.7; Zec 3.2*

<sup>10</sup> Pani la tamlohi nike, la unu, tavalura matea la lo kerekerehi, ale la lo kali na hinau la sopo levosahi te hinau hinira, pani mele

tavalura tinapua, la lo usuri na nora rongovosahi purongo sohen maji, ale řomira mo vono, pani hitahuna posira i pa komora hasera.

### *Talai Tavera I Pa Jovi Isara*

<sup>11</sup> Rani sasati tavera i pa mai isara, matan la lo usuri na sava Cain mo vaia tuai, ale la lo vai na hehe sohen Balaam mo vaia tuai, matan la lo řomřomi na mania purongo. Ale sohen a posposi sei non Korah tuai, la lo usuri na posposi lejileji atu, mo vaia tuai isan God, ale la pa tihai sei matana. *Gen 4.3-8; Num 22.1-35*

<sup>12</sup> La tamlohi nike, la sohen a ratarata sasati na lolo tasi, boti la lo takosa hinira, matan la lo toho na nomim hanhani matavuhi kalesia, pani la sopo mahanuhanu vara la lo řomřomira hasera purongo. La tamlohi nike, la sohen a telangi langi mo lo serera, pani la sopo eři sile te usa na rani alo mo řilangi. La mate vevuhi sohen a pahai sei, mo marivu mo koru, mo sopo te vuana, mo sopo te rauna. <sup>13</sup> Nora hinau mahanuhanu la pala sohen a valval loloputu tavera na tasi langivili. La sohen a vitusarasara sei la jalio na malelera, ale la pa toho jejeu na jara řořoha tavera atu God mo tau mamahunia matara.

### *Enoch Mo Retimangovi Hin Moli*

<sup>14</sup> Ale sohen a Enoch sei, enia mo halimaravrua pina mo usuri Adam, ale enia mo lo retireti hin la tamlohi nike

moiso, mo vereea mara, 'Ha hitea! Ha kilau sahe aulu, Moli God mo lo mai peresi na nona vao angelo tapu, tea i sopo efi evira, *Gen 5.18, 21-24* <sup>15</sup> matan vara i ari na tamlohi tari. I pa sile na talai isan la haratu la rohu na posposi tataholo sei God mo opoia, matan nora sasati tari la vaira na nora lejileji vano isan God. Moli i pa sile na talai isan la tamlohi lejileji sei, mata nora retihehe tari sei la vereea isana. <sup>16</sup> La tamlohi nike, la lo retireti varihi, ale la lo ngutungutu, la lo usuri na masalora purongo. La lo retimangisi hinira hasera, ale la lo haluhalu na tinapua mata lavi te hinau isara.

### *Pongi Hitahu*

<sup>17</sup> La tapalaku ruhu ruhu, ha sopo romaliho na retiroaohai sei vaha rule nona Moli Iesu Křisto la silea isamim moiso. <sup>18</sup> La vereea isamim vara mariviti na isoiso rani, tamlohi hanmarua peresi na tamlohi lejileji la pa tapulo kerehi God. <sup>19</sup> Ale la tamlohi nike, tarea enira la pulo patumasa matan enira tamlohi non varama purongo, ale Tanumen God mo sopo toho isara. <sup>20</sup> Pani la tapalaku ruhu ruhu, ha tuetueni kamim vara ha ulua na nomim rasua tapu, ale na rani vara ka lo usiisi, ha tinañihia vara Tanume Tapu i pa tiroma hin kamim. <sup>21</sup> Ha vujangia vara ka opoi God na nomim hahau, ale ha tau na romimim na romopoia non Moli Iesu

Křisto sei vuana enia mauri tui. <sup>22</sup> Ha vujangi na nomim romopoia isan la haratu sei, la lo romkaka mata nora rasua,\* <sup>23</sup> Ale ha juri na tinapua, ha reve nañihira na hapu aria. Ale tatua tamlohi ha pa romopaira, pani ha lo kilau vara ha vaia, ha pa nikei na nora ruru sohena vara nora hehe mo lo kaluti hinira.

### *Isoiso Reti*

<sup>24</sup> Ale nake, řa pa sile na ooloo tavera isan God, matan enia hasena i pa efi turuhoro kamim vara ha sopo jovi, ale enia i pa lavi kamim i tau kamim na nahona ha vokevoke, ale ha pa avulahi tavera jea. <sup>25</sup> Mo tataholo vara God nořa Jujuri hin nořa Moli Iesu Křisto, i lavi na ooloo tavera, auluna, suiha, ale suiha mata i aulu na hinau tari. Amen.

\* 1:22: vujangi: hai la vereea vara 'vaira la rongvosahi'.



## Revelation Puku Nike

Puku nike, John mo ulia hin rani atu mo lo toho na Ureuren Patmos. Patmos mo sohena ima řilangi matea mara Rome la lo tau na tamlohi hinia. La tau John ea matan enia mo retivu-javujangi hin Kristo. John mo lo vere na hinau God mo vujangia isana hin rani atu mata vavahinau non Iesu Křisto matan pavuho na pongi hitahu (1.2). Retisohai sei sopena mo tolu. (1) Suiha sasati la lo toho na varama, la lo řohu na tamlohi non God, ale la opoia vara la vilimateira; (2) Iesu enia Moli Aulu, enia i pa jeu na tamlohi tari peresi na suiha aulu sei la lo řohu hin God; (3) God i pa sile na silesilea řuhu jea isana nona tamlohi sei la lo turu řilangi na nora rasua hinia, ale i pa leřuhu tavera hin la haratu la mate matan Iesu.

Retisohai sei mo tueni na tamlohi rasua sei tuai hin rani řilangi atu la mate mata nora rasua. Tamlohi rasua la levosahia vara hina purongo vara suiha na varama sohena nona mara Rome tuai la lo turu, pani God mo vujangia vara Natu Sipsip non God i pa jeu vevuhira. Levosahi atu mo vaira la řomřilangi na maurira.

Na tapulon puku nike, leta mo limaravrua la vano isana vao kalesia mo limaravrua, la lo vujangiřa na posposi tamlohi na vao kalesia hatehateahi, haratu mo řuhu, haratu mo sati (2.1-3.22).

John mo uli na hinau tari mo hitea sohen God mo vujangia isana. Mo sohena mavuho matea, pani John mo sopo juruvi. Mo hite na hinau matuvana la lo vujangi na suihan God peresi na talai tavera sei i pa silea isan la haratu la lo řohu hinia. Mo hite na jara sakele nona supe non God (4.1-11) peresi na viriviri pepa non Natu Sipsip (5.1-14). Natu Sipsip hasena i eri roi la pulu atu mo limaravrua hin viriviri pepa atu (6.1-8.5), angelo la tiv na trumpet non God (8.6-11.19), la surerei na jilivi mata talai (16.1-21) hin haratu la lo vujangi na aria tavera non God sei i pa mai.

Hitahu vara la rani řilangi atu la isoiso, tamlohi non God sei la jeua, la pa lavi na leřuhu tavera non God sohen harihi:

'Ka hitea! Nike, jaran God sei mo lo toho hinia, i pa toho peresi na tamlohi. I pa toho peresira, ale enira la pa nona tamlohi, ale God hasena i pa toho peresira, sohena nora God. I pa kamoti na wai matara tari na matara, i pa sopo te mateia, řomsasati teni tangi teni epe varihaji, matan hinau matan tuai la tihai.' (21.3-4)

### Hin puku nike

1. Reti mata hinau la pa masese (1.1-8)
2. John mo hite Moli (1.9-20)
3. Leta la vano isan la vao kalesia atu mo limaravrua (2.1-3.22)

4. Haratu la lo lotu na tuka (4.1-11)
5. Viriviri pepa peresi la pulu atu mo limaravrua (5.1-6.17)
6. La lotu God na tuka (7.1-17)
7. Trumpet mo limaravrua (8.1-11.19)
8. Dragon peresi na maji jala sasati mo rua (12.1-13.18)
9. God mo vujangi na nona aria (14.1-15.8)
10. Jilivi mo limaravrua mata talai (16.1-21)
11. God mo jeu na nona meresahi (17.1-20.10)
12. Aria tavera non God (20.11-15)
13. Tuka Paro peresi na Varama Paro (21.1-8)
14. Jerusalem Paro (21.9-22.5)
15. I pa sopo tuai Křisto i pa mele mai (22.6-21)

### *Reti Mata Hinau I Pa Masese*

<sup>1</sup> God mo silea vara Iesu Křisto i vujangi na sava hinau mo viřonia vara la pa masese, i pa sopo tuai, isana nona volitusi hin malele sei; Iesu mo řule na nona angelo vara i vujangia isan nona volitusi John. <sup>2</sup> Ale enia mo vereuli na reti non God, peresi na sava hinau Iesu Křisto mo vujangia isana, hinau tari sei mo hitera. <sup>3</sup> Ale avulaři isan haratu mo evi reti sei isana tamlohi, mata hinau la pa masese i vano isana tamlohi tinapua, ale avulaři isana tamlohi tari sei la rongoa, ale la ooloo hinia, matan pongi atu mo mariviti. <sup>4-5</sup> Uliuli non John mo vano isan la vao

kalesia atu, mo limaravrua na province matan Asia.

Romřuhu peresi na tamata la mai isamim, la tai isan God Tama, isan Iesu Křisto peresi la tanume řuhu atu mo limaravrua sei la lo toho na naho jara sakele nona supe non God. God enia mo lo toho nake, mo lo toho tiroma, ale enia i pa mai hitahu. *Exo 3.14; Zec 4.1-10* Ale Iesu Křisto, haratu sei mo lo turu řilangi na nona vereulia, enia vora tiroma hin la haratu la pa mele turu na mateia, enia mo aulu na supe tari na varama.

Iesu Křisto enia haratu mo opoiřa tavera, ale řaena mo roro, ale mo volituhuřa na nořa aria mata nořa hehe. *Isa 55.4; Psa 89.27* <sup>6</sup> Ale enia mo vaiřa řa mai na vao matea mata přis, řa tauri na suiha aulu isan nona God sei Tamana, i pa lavi na hasohaso, ale suihana i lo turu rani tui tui tarea. Amen. <sup>7</sup> Ka hitea! Iesu mo lo mai na telangi, ale tamlohi tari la pa hitea na matara, la haratu la lo řurua tuai sohena, la pa hitea, ale tavitavi tari na varama la pa tangi matana. Enia i pa sohena natu, amen. <sup>8</sup> Ale Moli God mo vereea mara, "Enau pulo hinau tari, enau na isoiso hinau tari, enau na lo toho nake, ale enau na lo toho tiroma, enau a pa mai. Enau suiha aulu atu mo tavera jea."

### *Hinau John Mo Hitea*

<sup>9</sup> Enau John, voraimim matea, ale enřa řa lo turu matea na rani řilangi hin mauri atu God mo aulu hinia, řa lo turu řilangi

na řomperavu hin Iesu purongo, enau, la tauau na ureuren Patmos matan na lo retivujavujangi na Reti non God, ale matan na lo sorahi Iesu. <sup>10</sup> Ale, na rani lotu non Moli, Tanumen Moli mo mařivisiau, ale na rongo na leo matea mo tavera mo memera na hařiku sohena leo trumpet matea, <sup>11</sup> leo atu mo vereea mara, "O uli na hinau ko lo hitea na lolon te puku hatea, ale o sohaia i vano isan la vao kalesia atu mo limaravrua: isan Ephesus, isan Smyrna, isan Pergamum, isan Thyatira, isan Sardis, isan Philadelphia peresi Laodicea." <sup>12</sup> Na posi vara a hitea vara leon hare natu, mo lo retireti isaku, ale na posi moiso, na hite na peri lamu mo limaravrua la vaira na gold la lo turu atu. <sup>13</sup> Ale na hite matea mo sohen Natun Tamlohi\* mo lo turu na livuhara. Mo ruru na ruru matea mo peravu mo tikeli na palona atano, ale ruru matea la vaia na gold mo eve řalihi na řumana hinia. *Dan 7.13; Dan 10.5*

<sup>14</sup> Patuna peresi na vuluna la lulu sohena katen, matana, o hitea la mera sohena pepe hapu. *Dan 7.9; Dan 10.6* <sup>15</sup> Palona la lo angiangi sohena bronze aen sei la tunia na hapu tavera, ale leona mo puhoni sohena řum tasi tavera matea. *Ezek 1.24; 43.2* <sup>16</sup> Mo lo tauri na

vitusarasara mo limaravrua na matuana, ale sita matea mo voro tavalu rua mo lo malue na jingona. Nahona mo memera mo sohena alo tavera. <sup>17</sup> Nara na hitea, na jovi na palona sohena tamlohi matea mo mate, pani mo tau na matua limana hiniau mo vereea mara, "O sopo matahu, enau natu, Pulo Hinau Tari, ale enau Hitahu, <sup>18</sup> ale enau sei na lo mauri, na mate, pani ko hitea, nake na mele mauri, ale a pa mauri jejeu, ale na lavi na kia mata mate peresi na kia mata varama mata mateia.† <sup>19</sup> Ale matan haratu o uli na sava ko hitea. Haratu ko hitea moiso, ale na sava mo lo toho nake peresi na sava la pa masese hitahu. <sup>20</sup> A pa vereuli na řaramin la vitusarasara atu mo limaravrua sei ko lo hitera na matuaku peresi la peri lamu atu mo limaravrua sei la vaira na gold. La vitusarasara atu mo limaravrua, enira angelo matan la vao kalesia atu mo limaravrua, ale la peri lamu mo limaravrua atu, enira la vao kalesia atu mo limaravrua."‡

## Leta La Vano Isana Vao Kalesia

### 2

#### Leta Isan Ephesus

Ale mo vereea vara:

<sup>1</sup> "Hinau akerihi natu, o pa ulia i vano isan angelo

\* **1:13:** Natun Tamlohi: enia natu, Iesu. † **1:18:** kia mata mate peresi na kia mata varama mata mateia: Kia mo lo řarami na suihan Iesu matan mo jeu na suihan mate peresi na jara atu mate la lo toho hinia matan i eri vaira la mele turu. ‡ **1:20:** angelo: Angelo akerihi enia angelo teni patu tamlohi, pani la sopo levosahia i fuhu vara mo lo vereea isan hare.

mata vao kalesia hin Ephesus: 'Harihi retisohai sei non haratu mo lo tauri na vitusarasara mo limaravrua na matuana, ale mo lo hahau na livuhan la peri lamu mata gold atu mo limaravrua.'

<sup>2</sup> Mara, 'Na levosahi na nom vavahinau, nom voko peresi na nom romperavu vara o lo turu rilangi na mauri rasua. Na levosahia vara ko sopo lavi te tamlohi sasati, ale ko vaihite na tamlohi hai sei la vereea lara enira la vaharule, pani mo vono, ale ko vileia vara enira la tamlohi halu. <sup>3</sup> Na levosahia vara ko lo tauri na nom romperavu na rani rilangi mata hijaku, ale ko sopo tinarahi na nom rasua.

<sup>4</sup> Pani hinau matea na sopo avulahi hinia isam! Enia mo sohen harihi: Nom opoia mo sopo mele rilangi sohen tiroma. <sup>5</sup> Matana, o to romromia vara ko jovi epu na nom opoia matan tiroma, o mele posi na nom hehe, ale o vai na nom opoia sohen tiroma. Pani vara i vono, a pa mele sinai a lavi narahi na nom peri lamu vara o sopo posi. <sup>6</sup> Pani mele hinau matea ko vaia mo tataholo, ko rohu na sava hinau tamlohi non Nicholas\* la lo vaira, ale enau sohen na rohu hinira.

<sup>7</sup> Isan haratu mo lo rongo, o tapurongo na sava Tanume Tapu mo lo vereea isan la vao kalesia atu, haratu mo jeu na suihsan sasati, ale mo turu rilangi mo tikeli na isoiso maurina, enau a pa majinga

vara i hani na vuan vipahai atu mo lo sile mauri sei mo lo toho Paradise na tuka non God.' "

### *Leta Isan Smyrna*

Mo mele vereea mara: Rev 22.2; Ezek 28.13

<sup>8</sup> "Hinau akerihi natu, o pa ulia i vano isan angelo mata vao kalesia hin Smyrna: 'Harihi retisohai sei non haratu enia pulo hinau tari, enia isoiso hinau tari hitahu, mo mate, pani nake mo mele mauri!'

<sup>9</sup> Mara, 'Na levosahia vara ko lavi na rani rilangi sohena sava moiso, ale na levosahia vara ko tilavono, pani engko ko tavgav, na levosahi la retisasati sei la vereea matam mo tai isan la haratu la vara enira Jew, pani enira la sopo Jew tataholo, mo vono enira vaon Setan.

<sup>10</sup> O sopo matahu matan la hinau rilangi sei la tatamahu moiso vara la mai isam, ale ko hitea, i pa sopo tuai, Tiapolo i pa tau te tatuamim na ima rilangi vara i vaihite kamim, ale ha pa rongo i sati mata rani i sangavulu, pani vara o romturu rilangi, hina purongo vara o mate matana, pani a pa sileho na nom rongo rongo nona supe mata mauri.

<sup>11</sup> Isan haratu mo lo rongo, o tapurongo na sava Tanume Tapu mo lo vereea isan la vao kalesia atu, isan haratu mo jeu na suihsan sasati, ale mo turu rilangi mo tikeli na

\* 2:6: tamlohi non Nicholas: Tamlohi hai la lo romromia lara Iesu mo lo retireti na tamlohi non Nicholas mara Antioch (O hite: Acts 6.5).

isoiso maurina, i pa sopo eʻi vano na harua mateia!’ ”

*Leta Isan Pergamum*

Mo mele vereea mara:

12 “Hinau akerihi natu, o pa ulia i vano isan angelo mata vao kalesia hin Pergamum: ‘Harihi retisohai non haratu sei mo lo tauri na sita voro tavalu rua mata vuro!’

13 Mara, ‘Na levosahia vara ko lo toho na jara sei Setan mo supe ea, pani ko lo taurilati na hijaku, ale ko sopo vunvuni na nom rasua hiniau, hina purongo vara la taurilati Antipas noku tuetueni sei mo lo ʻromturu ʻrilangi, la vilia mo mate hin jara atu sei Setan mo lo toho ea.

14 Pani na hite na hinau hai ko lo vaia mo sopo ʻruhu: tatuamim la lo usuri na vujangi non Balaam. Tuai mo vere Balak vara i vujangi na natun Israel vara la eʻi hani na hanhahi sei la silea isana tamasi moiso, ale vara la usuri na mauri maji, 15 ale tatuamim sohena la lo usuri na vujangi non tamlohi non Nicholas,† 16 Ale matana, o posi! Vara i vono, nakerihi purongo vara a mai a pa valum peresi la tamlohi sei la lo usuri Nicholas, ale a pa taira na sita tavalu rua mata vuro na jingoku.

17 Isan haratu mo lo rongo, o tapurongo na sava Tanume Tapu mo lo vereea isan la vao kalesia atu, Isan haratu

mo jeu na suihan sasati, ale mo turu ʻrilangi mo tikeli na isoiso maurina, enau a pa silea hin hanhahi atu sei la tovia mana sei la jarohia.‡ Moiso enau a pa sile na vatu lulu matea isana, ale hin vatu atu hija paro matea mo lo toho hinia, pani haratu mo lavia enia hasena purongo i pa levosahi na ʻfaramin hija atu.’ ”

*Leta Isan Thyatira*

Moli mo mele mauri mo vereea mara:

18 “Hinau akerihi natu, o pa ulia i vano isan angelo mata vao kalesia hin Thyatira: ‘Reti nike enira retin Natun God! Matakula lo hani sohena pepe hapu, paloku la lo angiangi sohena bronze aen mo tutuni.’

19 Mara, ‘Na levosahi na nom vavahinau, nom opoia, nom rasua peresi na nom ʻromperavu mata turu ʻrilangi, ale na levosahia vara ko lo vai na hinau nake mo jeu haratu tiroma.

20 Pani hinau matea na sopo avulahi hinia isam: haʻrai sei Jezebel sei mo lo hase vereea vara enia pʻrovet matea, ko majinga vara i lo vujangi na noku volitusi na malele halu matan vara la lo usuri na mauri maji, ale la hani na hanhahi sei la silea isana tamasi moiso. 21 Na sile na masapa isana moiso vara i posi na nona hehe, pani mo sopo opoia vara i

† 2:15: tamlohi non Nicholas: hite: 2.6. ‡ 2:17: mana: Hin rani atu tavitavuin Israel la lo hahau na jara tano koru tuai, God mo vahanira hin hanhahi sei la tovia mana. Hai la vereea lara matea mo jarohi na sopesopena hai na puhoro tapu, vara i toho i tikeli rani atu Messiah i pa mele mai hinia matan vara i pa vahani na nona tamlohi hinia.

isoiso na nona mauri maji.  
<sup>22</sup> O lo levosahia vara a pa ari Jezebel na rojo matea na vatana, ale la haratu la lo vaivaileu peresia, la pa lavi na rongohaji tavera vara la sopo isoiso hin nona posposi sei, <sup>23</sup> ale a pa vilimatei na natuna, ale vao kalesia tari la pa levosahia vara enau haratu mo lo ale na hinau tari na lolo romi tamlohi peresi na lolo mapu tamlohi. A pa sile na volimim i tataholo isamim hatehateahi i tataholo na nomim vavahinau. *Psa 7.9; Jer 17.10*

<sup>24</sup> Pani isana tatuamim Thyatira la haratu la sopo lelevosahi teni la usuri na vujangi non Jezebel sei hai la lo vereea vara enia vujangi puhoni non Setan, ale isamim a pa sopo eri mele vere te retileu tinapua hatea isamim matan vara a sopo mele tau te hinau puhoni isamim, <sup>25</sup> pani na vereea vara ha lo tauria rilangi na sava ka lo tauria moiso i tikeli pongi atu a pa mele mai hinia.

<sup>26</sup> Isan haratu mo jeu na suiha sasati, ale mo lo turu rilangi na noku vavahinau mo tikeli na isoiso maurina, a pa silea na suiha vara i aulu na mara jara tinatinapua, *Psa 2.8-9* <sup>27</sup> ale i pa aulu hinira, i pa kilaura na maja aen, ale i pa viliroiroira sohena jilivi lepa purongo, i pa sohen suiha atu Tamaku mo sileau hinia, <sup>28</sup> ale a pa silera na majou řalavuhu. §

<sup>29</sup> Isan haratu mo lo rongu, o tapurongo na sava Tanume Tapu mo lo vereea isan la vao kalesia atu.' ”

### 3

#### *Leta Isan Sardis*

Mo mele vereea mara:

<sup>1</sup> “Hinau akerihi natu, o pa ulia i vano isan angelo mata vao kalesia hin Sardis: ‘Haruhi enia retisohai non haratu mo lo lavi la tanume řuhu non God atu mo limaravrua peresi la vitusarasara atu mo limaravrua.’

Mara, ‘Na levosahi na nom vavahinau, ale tamlohi tari la lo rasua vara nom rasua mo lo mauri, pani mo mate! <sup>2</sup> O lo kilau! Na hitea sohena vara nom rasua ko sopo ololo vara řuhu hin God, ale o mele vai na nom rasua i mele suiha matan vara i vono, i pa tihai. <sup>3</sup> O mele řom řomi haratu sei ko lavia moiso peresi haratu ko rongoa moiso, o taurilatia i řilangi, ale o posi mata nom hehe. Vara o sopo tatamahu, enau a pa mai sohena tamlohi vavanaho matea, o pa sopo levosahia vara a pa mai isam pangisa.

<sup>4</sup> Pani tatuamim Sardis nomim ruru la sopo lumiha na hehe. La pa hahau peresiau na ruru lulu matan mo tataholo vara la vaia sohena.

<sup>5</sup> Isan haratu mo jeu na suiha sasati, ale mo turu řilangi mo tikeli na isoiso maurina, i pa ruru na ruru lulu sohera, a pa sopo jarai na hijana na Puku mata Mauri,\*

§ 2:28: majou řalavuhu: Rev 22.16 Hija atu Kristo enia ‘Majou řalavuhu’. \* 3:5: Puku mata Mauri: Puku atu God mo uli na hijan nona tamlohi hinia.

pani enau a pa vere na hijana isan Tamaku peresi na nona angelo vara enia noku. *Psa 69.28; Rev 20.12*

<sup>6</sup> Isan haratu mo lo rongo, o tapurongo na sava Tanume Tapu mo lo vere a isan la vao kalesia atu.’ ”

### *Leta Isan Philadelphia*

Mo mele vere a vara:

<sup>7</sup> “Hinau akerihi natu, o pa ulia i vano isan angelo mata vao kalesia hin Philadelphia: ‘Harihi retisohai sei non haratu mo tapu, enia mo varaʻruhu, ale enia mo lo lavi na kia mata suiha non Supe David, enia mo roi na pelati, i pa sopo te hatea i eʻfi mele pelatia, vara enia mo pelati na matarua, i pa sopo te hatea i eʻfi mele roia.’ *Isa 22.22; Job 12.14*

<sup>8</sup> Mara, ‘Na levosahi na nom vavahinau, ale ko levosahia, enau na tau na matarua mo lo roi na nahom, i pa sopo te hatea i eʻfi pelatia. Na levosahia vara engko ko sopo ʻrilangi, pani ko lo ololo na noku reti, ale ko sopo vunvunia vara engko noku tamlohi. <sup>9</sup> Ale ko levosahia, a pa vai haratu la vere a vara enira Jew, pani enira tamlohi halu vaon ima lotu non Setan, o pa hitea, enau a pa vaira la mai vara la papaohi na palom matan vara tamlohi la pa hitevosahia vara enau na opoiho. *Isa 49.23; Isa 43.4*

<sup>10</sup> Matan ko lo taurilati na noku reti vara o pa ʻromperavu mata turu ʻrilangi, ale matana, a pa kilau mamahuniho na rani vaihite

atu mo lo mai mata tamlohi mo isoiso na varama vara la pa vano hinia. <sup>11</sup> I pa sopo tuai a pa mai, ale o tauri ʻrilangi na sava ko lo tauria matan vara tea i sopo eʻfi lavi naʻrihi na nom ʻrongoʻrongo nona supe.

<sup>12</sup> Isan haratu mo jeu na suihan sasati, ale mo lo turu ʻrilangi mo tikeli na isoiso maurina, enau a pa vaia i mai peri tavera matea na ima lotu non noku God, ale i pa toho jejeu atu. A pa uli na hijan noku God peresi na hijan taon tavera atu non noku God hinia, jara atu enia Jerusalem Paro atu noku God i pa sohaia i sevuti na tuka i pa mai na varama. Ale enau sohena a pa uli na hijaku paro hin tamlohi atu.

<sup>13</sup> Isan haratu mo lo rongo, o tapurongo na sava Tanume Tapu mo lo vere a isan la vao kalesia atu.’ ”

### *Leta Isan Laodicea*

Mo mele vere a vara:

<sup>14</sup> “Hinau akerihi natu, o pa ulia i vano isan angelo mata vao kalesia hin Laodicea: ‘Harihi retisohai non haratu la lo tovia Amen! Enia haratu sei enia tuetueni atu mo lo ʻromturu ʻrilangi enia mo varaʻruhu, ale enia pulo vavahinau non God.’ *Prov 8.22*

<sup>15</sup> Mara, ‘Na levosahi na nom vavahinau, pani ko sohena hanhani mo sopo ʻruhu hin te hinau, ko sopo noha, ale ko sopo koku, pani enau na opoia vara o noha teni o koku, <sup>16</sup> ale matan ko sopo noha teni koku, pani ko wai wai purongo,

a pa hasorihiko na jingoku,  
 17 matan, ko vereā kora,  
 “Enau na tavitav, na takonahi  
 na hināu matuvana, na sopo  
 mele opoi te hināu hatea.”  
 Pani ko sopo levosahia vara  
 engko tamlohi marua matea,  
 engko tamlohi matea la sopo  
 efi romromiho, engko ko  
 tilavono, engko ko matavuso,  
 ale engko ko malamala.

18 Ale matana, na lo  
 retituetueni vara o voli te  
 gold isaku, gold sei la kuku  
 narihi na utauta hinia, ale  
 enia i pa vaiho o tavitav, ale  
 vara o voli te ruru lulu isaku  
 matan vara o efi tatavuhoro  
 na nom malamala hinia. O  
 voli te meresin matan vara o  
 efi pasia na matam vara o efi  
 kilau.

19 Isan haratu na opoira,  
 na vereuli na nora hehe, ale  
 na sile na talai isara. Ale  
 matana, o tuntuni na mau-  
 rim, ale o posi na nom hehe.  
 20 O kilau nike! Enau na lo  
 turu na lo riringi na pelati;  
 vara tea mo rongo na leoku,  
 ale mo roi na matarua, enau  
 a pa unu, ale a pa hanhani  
 peresia, ale enia i pa hanhani  
 peresiau.

21 Isan haratu mo jeu na  
 suihan sasati, ale mo lo turu  
 rilangi mo tikeli na isoiso  
 maurina, a pa majinga vara  
 i sakele peresiau na noku  
 jara sakele nona supe, sohen  
 enau na jeu na noku mere-  
 sahi moiso, ale na lo sakele  
 peresi Tamaku na nona jara  
 sakele nona supe.

22 Isan haratu mo lo rongo,  
 o tapurongo na sava Tanume  
 Tapu mo lo vereā isan la vao  
 kalesia atu.’ ”

## 4

1 Hitahun la hināu atu  
 na kilau sahe, e! Matarua  
 matea mo roi na tuka. Ale  
 leo atu tiroma sei mo sohena  
 trumpet mo mele retireti  
 isaku mara, “O sinai nike  
 aulu! A pa vujangiho na  
 sava mo viřonia vara la pa  
 malue hitahu na hināu ko  
 hitera moiso.” 2 Vahatea atu  
 suihan Tanume Tapu mo mai  
 isaku, e! Jara sakele non  
 supe matea mo lo turu na  
 tuka, ale na hite haratu mo lo  
 sakele hinia, 3 ale haratu mo  
 lo sakele atu mo lo angiangi,  
 majhina mo sohena vatu  
 řuhu sei jasper mo joriha  
 řořoha, ale sohena vatu řuhu  
 sei carnelian mo hahara.  
 Nuenue matea mo řalihi jara  
 sakele non supe atu, majhin  
 nuenue atu mo sohena vatu  
 řuhu sei emerald mo heja rau  
 pahai.

4 Moiso, jara sakele non  
 supe mo ngavulu rua mo vati  
 tinapua la toho řalihi jara  
 sakele non supe atu na livuha  
 jara. Ale hin la jara sakele  
 nona supe hatehateahi atu,  
 tamlohi aulu mo ngavulu rua  
 mo vati la lo sakele hinira,  
 la ruru na ruru lulu, ale la  
 tau na řongořongo mata gold  
 nona supe na patura. 5 Vaha  
 mo vilasi, piri mo roroa la  
 lo malue hin jara sakele  
 non supe atu na livuhan  
 jara atu. Hapu jilangi mo  
 limaravrua la lo hani na  
 nahon jara sakele non supe  
 atu, enira natu, la tanume  
 řuhu mo limaravrua atu non  
 God. *Exo 19.16; Ezek 1.13;*  
*Zec 4.2* 6 Ale na nahon jara  
 sakele non supe atu, lepa mo



sohena tasi mata glas mo niro  
sohena crystal. Ralihi na jara  
sakele non supe na livuha  
jara, hinau mauri mo vati la  
lo turu ea, matara mo lavi  
vevuhi na epera na nahora  
peresi na hařira. *Ezek 1.5-10,  
22; 10.14*

<sup>7</sup> Ale tiroman la hinau mauri  
atu mo sohena Lion, haruana  
mo sohena natu buluk, ale  
hatoluna mo lavi na naho  
matea mo sohena naho  
tamlohi, ale havatina mo  
sohena mala mo lo avu  
aulu. <sup>8</sup> La hinau mauri atu  
enira hatehateahi, hapara  
mo limarave, ale epera tari  
la mařivi na matara. Ale  
la lo lalavete tarea na rani  
peresi na vutepongi mo sopo  
te isoisona lara, *Ezek 1.18;  
10.12; Isa 6.2-3*

“Tapu, tapu, Moli God sei mo  
tapu,  
enia suiha aulu atu mo  
tavera jea,  
mo lo toho moiso,  
ale mo lo toho nake, ale i  
pa mai!”

<sup>9</sup> Ale vara la hinau mauri  
atu la lo sile na hasohaso  
peresi na ooloo, ale la lo  
vere meje isan haratu sei mo  
lo sakele na jara sakele non  
supe atu mo lo mauri mata  
rani tui tui tarea, <sup>10</sup> ale la tam-  
lohi aulu atu mo ngavulu rua  
mo vati (24)  
la lo sakele řalihi haratu sei  
mo lo sakele na jara sakele  
non supe, la lo papaohi na  
nahona, ale la lo lotu haratu  
sei mo lo mauri mata rani  
tui tui, ale la pulahi na nora  
řongořongo mata gold nona

supe na naho jara sakele non  
supe atu, ale la lo vereea lara,  
<sup>11</sup> “Nomam Moli, nomam  
God,  
mo tataholo vara o lavi  
na hasohaso,  
ale ooloo tavera peresi na  
nom suiha tavera,  
matan engko ko vai na  
hinau tari,  
ale masalom ko vaira la  
lo toho.”

## 5

*Natu Sipsip Mo Roi Na  
Viriviri Pepa*

<sup>1</sup> Ale na hite na matua li-  
man haratu sei mo lo sakele  
na jara sakele non supe, na  
hitea mo lo tauri na viriviri  
pepa matea sei la uliuli hinia  
tavalu rua.\* ale la puluia na  
jara mo limaravrua tinatina-  
pua. *Ezek 2.9-10; Isa*

*29.11*  
<sup>2</sup> Na hite na angelo suiha  
tavera matea, ale mo vereea  
na leo tavera matea mara,  
“Hare mo tataholo vara i roi  
viriviri pepa nike, ale vara  
i řari na puluna?” <sup>3</sup> Pani  
mo sopo tea na tuka teni na  
varama teni na lolo varama  
mata mateia vara i tataholo  
vara i roi viriviri pepa atu  
teni i hite na lolona.

<sup>4</sup> Ale, na tangi tavera matan  
mo sopo tea mo tataholo vara  
i roi viriviri pepa atu teni i  
hite na lolona. <sup>5</sup> Ale vonan  
la tamlohi aulu atu matea  
mo vereea isaku mara, “O  
sopo tangi, o to kilau vano,  
haratu la tovia Lion sei enia  
tavgavin Judah matea,† ale

\* **5:1:** viriviri pepa: Scroll la vaia tuai na huri nani teni pepa, ale la tau puluna peresi wax mata kandeli. † **5:5:** Lion: Lion enia puskat jala mo tavera jea la suiha. Vaon Israel enia Judah la tovia Lion, Supe David mo tai isan tavgavin Judah.

enia pin David mo jeu na nona meresahi moiso, ale, enia i efi roi viriviri pepa atu peresi la puluna atu mo limaravrua.” *Gen 49.9; Isa 11.1, 10*

<sup>6</sup> Ale na hite na natu sipsip matea mo lo turu na livuhan jara atu. Hin jara atu natu, la hinau mauri mo vati atu peresi la tamlohi aulu atu mo ngavulu rua mo vati (24) la lo sakele řalihi na jara sakele non supe ea. Ale natu sipsip atu, mo sohena la vilimateia moiso, pani mo lo turu, ale palana mo limaravrua, ale matana mo limaravrua, enira la tanume řuhu atu mo limaravrua non God sei mo lo řulera vara la vano na jara tari na varama. *Isa 53.7; Zec 4.10*

<sup>7</sup> Ale Natu Sipsip mo sinai mo lavi viriviri pepa atu na matua liman haratu sei mo lo sakele na jara sakele non supe, <sup>8</sup> ale mo lavia moiso natu, la hinau mauri mo vati atu peresi la tamlohi aulu atu mo ngavulu rua mo vati (24) la juruvi popovi na lepa atano na nahon Natu Sipsip, enira hatehateahi la tauri na pue tangtangi matematea peresi na puru mata gold la mařivi na hasori, ‡ hasori sei natu, enia usiisi non nona tapuhi. *Psa 141.2*

<sup>9</sup> Ale la lavi na vete paro matea lara, “Engko hasem ko tataholo vara o lavi viriviri pepa atu, o roi na puluna matan la vilimateiho,

ale řaem mo volituhu na tavgavui tari, na leo tari,

ale tamlohi purongo peresi na mara jara tinatinapua tari vara la mai non God,

<sup>10</sup> ale ko viřonira la mai na vao matea mata pŕis la tauri na suiha aulu isan nořa God, ale la pa tauri na suiha na varama.”

*Exo 19.6; Rev 1.6*

<sup>11</sup> Ale na kilau vano, na rongo na leo angelo matuvana la toho řalihi na jara sakele non supe atu peresi na leon hinau mo vati atu peresi la tamlohi aulu atu, peresi la vao tavera hajavua atu, tea i sopo efi evira. *Dan 7.10*

<sup>12</sup> Ale la lo vereea na leo tavera matea lara,

“Natu Sipsip la vilimateia, enia mo tataholo matan vara i lavi na suiha, tavgav, lelevosahi, řilangi, oloolo, hija aulu peresi na haso-hasu.”

<sup>13</sup> Ale na rongo na hinau tari la lo mauri na tuka, na varama, na lolo varama, ale na tasi, ale hinau mo isoiso sei la lo toho hinira, la lalavete isan la tupra rua atu lara,

“Isan haratu sei mo lo sakele na jara sakele non supe,

peresi Natu Sipsip, la pa avulahi řuhu,

ale la pa lavi na haso-hasu, peresi na hija aulu,

‡ 5:8: hasori: Hinau sohena tobak la sulia mata, ale asuna mo hasori mo řuhu.

peresi na suiha tavera tarea  
mata rani tui tui  
tarea!”

<sup>14</sup> La hinau atu mo vati atu  
la vereea lara, “Amen!” Ale  
la tamlohi aulu atu la juruvi  
popovi na lepa atano, ale la  
lotu.

## 6

### *Mo Roi Na Pulu Viriviri Pepa Atu*

<sup>1</sup> Na pa lo kilau na hite Natu  
Sipsip mo roi na pulu matea  
vonan la haratu mo limar-  
avrua, ale na rongo vonara  
matea hin la hinau mauri mo  
vati atu mo ulo, ale leona mo  
sohena roroa piri mo vereea  
mara, “O mai!” <sup>2</sup> Ale na ki-  
lau sahe, e! Hos lulu matea.  
Haratu mo lo sakele hinia mo  
lavi na paka matea, ale la  
silea na rongoŕongo matea  
nona supe. Ale tarea enia mo  
lo jeu na nona meresahi, ale  
mo malue vara i mele jeu tea.  
*Zec 1.8; 6.3, 6*

<sup>3</sup> Na hite Natu Sipsip mo roi  
na harua pulu, ale na rongo  
na haruan hinau mauri atu  
mo vereea mara, “O mai!”

<sup>4</sup> Ale hos tinapua matea  
majhina mo hahara mera  
mo malue. Ale haratu mo lo  
sakele hinia la majinga vara  
i lavi naŕihi na tamata na  
varama maŕan vara tamlohi  
la pa vilivilira na vuro, ale  
la silea na sita tavera matea  
mata valum. *Zec 1.8; 6.2*

<sup>5</sup> Natu Sipsip mara mo roi  
na hatolu pulu, na rongo na  
hatolun la hinau mauri atu  
mo vereea mara, “O mai!” Ale  
na kilau sahe, e! Hos viriha  
matea. Haratu mo lo sakele  
hinia mo lo tauri na skele

matea mo lo keho na limana  
matea. *Zec 6.2, 6*

<sup>6</sup> Ale na rongo na hinau  
matea sohena leo matea mo  
lo malue na livuhan la hinau  
mauri mo vati atu, mo vereea  
mara, “Kilo wit matea volina  
i pa tataholo na volvoli mata  
rani matea. Ale kilo barley  
mo tolu volina i pa tataholo  
na volvoli mata rani matea.  
Pani o sopo komo na wel  
mata olive peresi na waen.”

<sup>7</sup> Ale Natu Sipsip mara  
mo roi na havati pulu, na  
rongo na havatin la hinau  
mauri atu mo vereea mara, “O  
mai!” <sup>8</sup> Ale na kilau vano, e!  
Hos matea majhina mo heja  
joriha. Hijan haratu mo lo  
sakele hinia enia Mateia, ale  
varama mata mateia mo lo  
usuria. La sile na suiha isara  
vara la vilimatei na tamlohi  
matea na tamlohi tupu vati  
na varama. La pa vilira  
sohen harihi: peresi na sita  
vuro, peresi na marua, peresi  
na rojoa sati tinatinapua, ale  
na maji jala. *Ezek 14.21*

<sup>9</sup> Ale Natu Sipsip mara mo  
roi na halima pulu, na hite  
na pulo votavota na Temple,  
tanumen la haratu sei la vil-  
imateira na varama mata la  
lo vereuli na reti non God,  
ale mata nora rasua. <sup>10</sup> La  
ulo rilangi na leo matea lara,  
“Moli Suiha, engko ko tapu,  
engko ko varaŕuhu, pangisa o  
pa sile na talai isara, pangisa  
o pa kele na ŕaemam isan la  
haratu na varama?”

<sup>11</sup> Ale la silera hatehateahi  
na ruru lulu matematea, ale  
la vereea isara vara la lo mapu  
makomona tako, i vano tikeli  
na rani evin la voraira voli-

tusi tinapua peresi na voraira na rasua la mate sohera.

<sup>12</sup> Natu Sipsip mara mo roi na halimarave pulu, ale na kilau vano, e! Mihi tavera matea, ale alo mo posi mo viriha ŋoŋoha, ale vitu mo posi mo hahara sohena ŋae.

<sup>13</sup> Ale vitusarasara na masapa la jovi na varama sohena poroti vua pahai la jovi na langivili. *Isa*

34.4 <sup>14</sup> Masapa mo maŋari mo tihai sohena la viriviri naŋihi na epa matea, ale vutivuti tari peresi na ureure tari la juha la rovo na jarara. *Rev* 16.20

<sup>15</sup> Ale supe mata varama peresi na tamlohi la lo lavi na hija tavera, patu tamlohi mata vuro peresi haratu la tavitav peresi la haratu la suiha, ale tamlohi tari, slev peresi tamlohi materi la luhu na papa peresi na patumalo na vutivuti. *Isa* 2.19-21

<sup>16</sup> La ulo isana vutivuti peresi na patumalo lara, "Ha jovi, ha tatavuhi kamam, ale ha jarohi kamam na nahon haratu mo lo sakele na jara sakele non supe peresi na talai lolokoru mata hehe non Natu Sipsip, *Hos*

10.8 <sup>17</sup> matan rani tavera atu mata talai lolokoru non God mata hehe peresi non Natu Sipsip mo mai, ale hare natu, i pa eŋi turu hinia?" *Joel* 2.11; *Mal* 3.2

## La Lotu God Na Tuka

### 7

144,000 Non God

<sup>1</sup> Hitahun haratu na hite la angelo atu mo vati, la lo

turu hin la pulo varama atu mo vati, ale la angelo atu la lo taurilati la langi atu mo vati na varama vara i pa sopo te langi hatea i eŋi sere na varama teni i sere na tasi teni i sere te vipahai hatea.

<sup>2</sup> Ale na hite na angelo tinapua matea mo lo vele Opa mo tauri na taipulu non God mauri, ale mo ulo tavera isan la angelo atu mo vati sei la lavi na suiha vara la pa eŋi komo na varama peresi na tasi, *Jer* 49.36; *Dan* 7.2; *Zec* 6.5 <sup>3</sup> mo verea mara, "Ha sopo komo na varama teni tasi teni te vipahai hatea tako matan ŋa sopo lo tau na taipulu na punghori volitusi non noŋa God." *Ezek* 9.4, 6

<sup>4</sup> Ale na rongo na evin la tamlohi atu la tau na taipulu hinira, mo tikeli 144,000 ale la tamlohi atu la tai na tavitavui tari matan Israel:

<sup>5</sup> 12,000 na tavitavuin Judah,

12,000 na tavitavuin Reuben,

12,000 na tavitavuin Gad,

<sup>6</sup> 12,000 na tavitavuin Asher,

12,000 na tavitavuin Naph-tali,

12,000 na tavitavuin Man-asseh,

<sup>7</sup> 12,000 na tavitavuin Simeon,

12,000 na tavitavuin Levi,

12,000 na tavitavuin Is-sachar,

<sup>8</sup> 12,000 na tavitavuin Zebu-lun,

12,000 na tavitavuin Joseph, peresi

12,000 na tavitavuin Benjamin.

*Vao Tari Na Varama*

<sup>9</sup> Hitahun haratu na kilau vano, e! Vao tavera matea tea i sopo efi evira, la mara jara tinatinapua tari, tavgavui tari, ale tamlohi purongo tari, peresi na leo tari la lo turu na naho jara sakele non supe, ale na nahon Natu Sipsip. La ruru na ruru lulu peravu, ale la lo tauri na rau viniu na limara, <sup>10</sup> ale la lo ulo lara,

“Suiha mata juri na tamlohi mo lo toho na liman noŋa God, mo lo sakele na jara sakele non supe peresi Natu Sipsip.”

<sup>11</sup> Ale angelo tari sei la lo turu ŋalihi na jara sakele non supe peresi la tamlohi aulu tari atu peresi la hinau mauri atu mo vati, enira mo isoiso la juruvi popovi na lepa atano na naho jara sakele non supe, ale la lotu God.

<sup>12</sup> Lara,

“Amen! Avulahi isana, hasohasona, lelevosahi, vere meje, ooloo, suiha peresi na ŋilangi, enira non noŋa God mata rani tui tui tarea! Amen!”

<sup>13</sup> Ale vonan la tamlohi aulu atu matea mo usia isaku mara, “Ko levosahi la tamlohi nike sei la lo ruru na ruru lulu peravu? Ko levosahia vara la tai epu?”

<sup>14</sup> Na ŋaramia nara, “Tapala, mo vono, pani engko ko levosahia!”

Ale mo vere a isaku mara, “La haranike natu, la jelu hin pongi ŋilangi tavera atu. La hoje na nora ruru peravu na

ŋaen Natu Sipsip ale mo vaira la lulu. <sup>15</sup> Ale matana, la efi turu na naho jara sakele nona supe non God vara la lotua tarea na nona Temple, ale haratu mo lo sakele na jara sakele nona supe enia i pa lo kilaura. <sup>16</sup> La pa sopo efi marohati teni la maŋohu hin te rani, ale alo i pa sopo efi vilira, teni langi tutuni i komora, <sup>17</sup> matan Natu Sipsip sei na livuha jara mata jara sakele nona supe i pa kilaura, ale i pa tiromara la vano na patu wai sei la sile na mauri, ale God i pa kamoti na waimata na matara.”

**8***Mo Roi Na Halimaravrua Pulu*

<sup>1</sup> Ale moiso Natu Sipsip mo roi na halimaravruan la pulu atu, ale mo sopo te vaore na tuka korong mata sope aoa matea. <sup>2</sup> Ale na hite la angelo atu mo limaravrua sei la lo turu na nahon God la silera na trumpet matematea.

<sup>3</sup> Ale angelo tinapua matea mo lavi na jilivi mata gold matea mata i suli na hasori, mo sinai mo turu na votavota atu. Ale la silea na hasori matuvana matan vara i sohaia peresi na usiisi nona tapuhi tari na votavota sei la vaia na gold na naho jara sakele non supe. <sup>4</sup> Ale asu hasori peresi na usiisi nona tapuhi la tai na liman angelo atu, la sahe aulu na nahon God.

<sup>5</sup> Moiso angelo atu mo sohoni na vara hapu hani mata votavota na jilivi hasori, ale

mo pulahia na varama, ale piri mo roroa, vaha mo vilasi, ale mihi matea mo hisu.

### *Trumpet La Tiv*

<sup>6</sup> Ale la angelo atu mo li-maravrua la lo tauri na trumpet la tatamahu vara la tiv la trumpet atu.

<sup>7</sup> Ale tiroma angelo mo tiv na nona trumpet, ale vatu aes peresi na hapu la hoi peresi na ŕae la jovi na varama, ale mo suli na hatolu vipahai tari peresi na hatolu ŕuvuŕuvu tari na varama.

<sup>8</sup> Harua angelo mo tiv na nona trumpet, ale hinau matea mo sohena vutivuti tavera mata hapu hani, la pulahia mo sivo na lolo tasi, ale hatolu tasi na varama mo mai ŕae, <sup>9</sup> hatolu maji tasi tari na varama la mate, ale mo komo na hatolu lanis tari sohena.

<sup>10</sup> Hatolu angelo mo tiv na nona trumpet, ale vitusarasara tavera matea mo jovi na masapa mo hani mo pepe tavera mo jovi na hatolu wai roro tari peresi na hatolu patu wai tari na varama.

<sup>11</sup> Ale hijan vitusarasara atu enia Hohona, ale hatolu wai tari atu la mai la hohona, ale tamlohi matuvana la mate matan wai hohona atu. <sup>12</sup> Havati angelo mo tiv na nona trumpet, ale hinau matea mo vili narihi na hatolu mera alo, peresi na hatolu mera vitu peresi na hatolu mera vitusarasara. Alo mo sopo mera na hatolu rani matea, ale vitu peresi na vitusarasara la sopo mera na hatolu vutepongi matea.

<sup>13</sup> Ale na hite na mala matea mo hasena avu roto na masapa, mo lo ulo mara, “Rani sasati, rani sasati, rani sasati isana tamlohi tari sei la lo toho na varama matan la angelo atu mo tolu la tatamahu vara la tiv na nora trumpet.”

## 9

<sup>1</sup> Halima angelo mo tiv na nona trumpet, ale na hite na vitusarasara matea matan tuka mo jovi na varama, ale la sile vitusarasara atu na kia mata mataruan koko tavera jea atu sei mo sivo atano jea na lolo varama mata mateia. <sup>2</sup> Ale mo roi koko tavera jea atu sei mo sivo atano jea na lolo varama mata mateia, ale asuna mo lo malue sohena asu hapu tavera matea. Alo peresi na masapa la ŕoŕoha na asun koko atu. <sup>3</sup> Ale hatpoha la malue na asun koko atu la tatavu na varama. La silera na suiha mo tataholo na suiha novu lepa.

<sup>4</sup> La vereea isan la hatpoha atu vara la pa sopo komo na ŕuvu teni te hinau mo lo ulua teni te vipahai hatea, pani vara la pa komo la tamlohi atu purongo sei la sopo lavi na matamata non God na pungorira. <sup>5</sup> La majinga na hatpoha vara la vailejilejira mata vitu i lima, pani la horora vara la sopo vili-mateira, ale epe varihaji la silea mo sohena novu lepa mo hatira. <sup>6</sup> Hin la rani atu tamlohi la pa opoi na mate, pani la pa sopo eri mate. La pa ŕomtau mata mate, pani mateia i pa rovo hinira.

<sup>7</sup> La hatpoha atu la sohena hos la tatamahu mata vuro. Na patura la tau na hinau sohena rōngorōngo mata gold nona supe, ale la lavi na naho tamlohi, <sup>8</sup> vulura mo peravu sohena vulu haʻai, ale huʻura la sohena huʻu lion. <sup>9</sup> Na ŋumara la ruru na ruru vuro la vaira na aen. Rum hapara mo sohena ŋum palo takonahi hos la lo reve na kartira la maro na vuro. <sup>10</sup> Viʻira la sohena viʻi novu lepa, ale suiha varihaji matana, i pa tikeli na vitu i lima. <sup>11</sup> Nora supe enia pa angelo atu sei mo lo aulu hin koko tavera jea atu sei mo sivo atano jea na lolo varama mata mateia, hijana na leon tavitavin Israel enia ‘Abaddon’, ale na leo mara Greek enia ‘Apollyon’.\*

<sup>12</sup> Ale tiroma rani sasati mo mase moiso, pani ka hitea, rani sasati mo rua la lo ususurira la lo mai.

<sup>13</sup> Halimarave angelo mo tiv na nona trumpet, ale na rongo na leo matea mo malue hin la pala atu mo vati na pingo votavota atu la vaia na gold sei mo lo turu na nahon God, <sup>14</sup> leo atu mo vere a isan angelo atu mo lo tauri na trumpet mara, “O uli naʻihi la angelo atu mo vati sei la pesilatira na pahisa wai roro tavera Euphrates.” <sup>15</sup> Ale la tatamahuni la angelo sei mo vati moiso matan aoa akerihi, rani akerihi, vitu akerihi peresi tauni akerihi vara la pa uli naʻihira matan vara la pa vilimatei na hatolu tam-

lohi tari na varama. <sup>16</sup> Na rongoa vara evin la tamlohi vuro atu la lo sakele na hos mo tikeli 200,000,000.

<sup>17</sup> Na hinau sei God mo vujangiau hinia, na hite la tamlohi atu la lo maro na hos la ruru na ruru vuro mata ŋumara, majhira mo hahara mera, ale mo heja tasi, ale mo joriha. Patu hos la sohena patu lion, hapu peresi asu hapu peresi na vatu tutuni mata volkeno la lo malue na jingora. <sup>18</sup> Ale hatolu tamlohi tari na varama la pa mate matan rongohaji sasati mo tolu sei, ale hapu atu peresi na asu hapu peresi na vatu tutuni mata volkeno mo lo malue na jingora. <sup>19</sup> Matan suihan la hos atu mo lo toho na jingora peresi na viʻira matan viʻira la sohena mata, ale patura la sile na epe varihaji.

<sup>20</sup> Vao tamlohi na varama la sopo mate hin la rongohaji sasati atu, pani la sopo posi na nora vavahinai, ale la sopo isoiso na nora lotu mata tanume sasati peresi na tamasi sei la vaira na gold, silver, bronze, vatu teni laho pahai atu la sopo eʻi kilau, teni tea i rorongō teni i hahau. <sup>21</sup> La sopo isoiso na nora vilimatei na tamlohi, na nora sui, na nora mauri maji peresi na nora vavanaho.

## 10

*Angelo Atu Peresi Na Viriviri Pepa Rihirihī*

<sup>1</sup> Ale na mele hite na angelo suiha tinapua matea mo

\* **9:11:** Abaddon: Raramin hija sei Abaddon enia ‘Haratu mata komokomo’.

lo sevuti na tuka. Telangi matea mo leputia, ale nuenuenu matea mo lo toho aulu na patuna. Nahona mo sohena alo, ale palona mo sohena peri hapu mo lo hani, <sup>2</sup> ale na limana mo lo tauri na viriviri pepa rihirihi matea sei mo roi moiso. Mo lo turu atu, ale matua palona na tasi, ale marau palona na lepa, <sup>3</sup> ale mo ulo na leo matea ŋumuna mo puhoni sohena ulo lion, ale na rani mo ulo na rongo la piri atu mo limaravrua la roroa na leora.

<sup>4</sup> Piri atu mo limaravrua la roroa, ale na pa lo tatamahu vara a uli na sava la vereea, pani leo matea mo tai na tuka mo ulo mara, “O sopo uli na hinau la vereea! O jarohira vara tea i pa sopo levosahia.”

<sup>5</sup> Ale angelo atu na hitea mo lo turu na tasi peresi na lepa mo tahe na matua limana na tuka, <sup>6</sup> Ale mo vai na retitauhi matea na hijan God atu mo mauri mata rani tui tui sei mo vai na tuka peresi na varama peresi na tasi peresi na hinau tari la mauri. Angelo atu mo vereea vara God i pa sopo mele sasaovi, <sup>7</sup> ale sava God mo vereea moiso isan la nona volitusi sei la pŋovet mata nona hina luhu tavera, mo vara nakerihi hinau tari la pa masese hin rani atu vara halimaravruan la angelo atu i tiv na nona trumpet.

<sup>8</sup> Ale leo atu mo tai na tuka mo mele retireti isaku mara, “O vano o lavi viriviri pepa atu mo vuhesi moiso na liman angelo atu mo lo turu na tasi peresi na lepa!”

<sup>9</sup> Ale na vano isan angelo atu na usia vara i sileau hin viriviri pepa rihirihi atu. Ale angelo atu mo vereea mara, “O lavi viriviri pepa atu o hania! I pa vai na pangem i nini, pani na jingom i pa memeje sohena wai sugabag.” <sup>10</sup> Ale na lavi viriviri pepa rihirihi atu na liman angelo atu, ale na hania. Memejina mo sohena wai sugabag, pani na pangeku mo nini.

<sup>11</sup> Hitahu la vereea isaku lara, “O pa mele vere na hinau la pa masese isana tamlohi purongo matuvana peresi na mara jara tinatina-pua matuvana peresi na leo matuvana, ale peresi na supe matuvana.”

## 11

### *Tuetueni Mo Rua*

<sup>1</sup> Hitahun haratu la sileau na vipahai ava matea, ale la vereea lara, “O turu o ava ŋalihi na Temple non God, ale o sopo ŋomalihō na votavota peresi na evi tamlohi la lo lotu ea. <sup>2</sup> Pani o sopo ava na jara mo ŋalihi hin rope atu na jingoima Temple matan God mo majinga vara i pa toho na lima vao tamlohi jara tinapua tari atu na varama sei la sopo noku tamlohi vara la pa varasi taon tavera tapu atu Jerusalem, i tikeli te vitu i ngavulu vati i rua. <sup>3</sup> A pa sile na suiha isan la noku tuetueni nike mo rua sei la ruru na ruru mata ŋomsati sei mo sohena paki niu, vara la pa retimangovi mata rani



i tari vahatea i ngav sangavulu rua i ngavulu limarave (1,260).”

<sup>4</sup> La tupra rua nike, enira pulo olive mo rua peresi na peri lamu mo rua la vaira na gold sei la lo turu na nahon Moli God non varama. <sup>5</sup> Ale tea vara i vaihitea vara i komora, hapu i pa malue na jingora i pa komo na nora meresahi. Ale vara tea mo opoia vara i komora, enia i pa mate. <sup>6</sup> Hin rani atu vara la lo retimangovi, la lavi na suiha vara na sava rani la opoia, la pa horo na masapa matan i sopo sile na usa i jovi, ale la efi posi na wai tavera la mai rae, ale la pa efi vili na tamlohi na varama na rongohaji tavera tinatinapu.

<sup>7</sup> Hin rani atu vara la tamlohi tuetueni tupra rua atu la isoiso na nora vereulia, maji jala sasati atu i pa malue hin koko tavera jea atu sei mo sivo atano jea na lolo varama mata mateia vara i valum peresira, ale i pa jeura i vilimateira. <sup>8</sup> Tarapera la plahau hinira na malelen taon tavera atu sei tuai la vosae nora Moli na talopeilopei hinia. Taon tavera atu raramina mo sohen taon sati atu Sodom teni jara tavera atu Egypt.

<sup>9</sup> Ale ko hitea, mata rani mo tolu peresi na sope rani matea, tatua tamlohi purongo, tadvavui tamlohi, leo tari, ale mara jara tinatinapua la pa lo varoi na tarapen la tamlohi tuetueni tupra rua atu. La pa sopo majinga vara la taura na taptap, <sup>10</sup> ale tamlohi tari na varama la

pa vai na hanhani tavera, ale la pa avulahi moiso la pa silesilera na otori mata sava mo masese isan la tamlohi tuetueni atu mo rua matan la lo sile na rani rilangi isan la haratu na varama. <sup>11</sup> Pani rani mo tolu sopena matea mo vano moiso, ale God mo mongovira, ale la mele mauri. La mele turu moiso tamlohi sei la hitera la matahu tavera matara.

<sup>12</sup> Ale la tamlohi tuetueni atu mo rua la rongo na leo tavera matea mo tai na tuka mo vereea mara, “Ha mai nike!” Ale nora meresahi la hitera la sahe aulu na tuka na telangi matea. <sup>13</sup> Vahatea mihi tavera matea mo komo na sopen taon tavera atu matea hin la haratu mo sangavulu. Evi tamlohi la mate hin mihi tavera atu mo tikeli tari vaha limaravrua (7,000). Ale sope vaon taon atu la pa lo mauri, la sile na hasohaso isan God haratu mo aulu na tuka. <sup>14</sup> Harua rani sasati atu mo masese moiso! Pani ka hitea, hatolu rani sasati mo lo mai vilavila.

### *Halimaravruan La Trumpet Atu*

<sup>15</sup> Halimaravruan la angelo atu mo tiv na nona trumpet, leo tavera hai la retireti na tuka lara, “Suiha mata aulu hin varama nike, nake i pa vano na liman nofa God peresi nona Kristo, ale i pa tauri na suiha mata rani tui tui tarea.”

<sup>16</sup> Ale la tamlohi aulu atu mo ngavulu rua mo vati (24) sei la lo sakele na nora jara sakele nona supe na nahon God, la juruvi popovi na lepa atano, ale la lotu God, <sup>17</sup> lara,

“Moli God engko suiha aulu  
 atu mo tavera jea,  
 ko lo toho nake, ale ko  
 toho tuai moiso.  
 Kama vere meje isam matan  
 ko tapulo vara o  
 vavahinau na nom  
 suiha tavera  
 vara o aulu na hinau tari.  
 18 Mara jara tinatinapua tari  
 na varama la lolokoru,  
 pani nom talai lolokoru  
 mata hehe mo mai,  
 ale nake rani mo mai vara o  
 sile na nom aria isan la  
 haratu la mate,  
 ale nake rani mo mai  
 vara o sile na otori  
 isana nom volitusi,  
 haratu la p̄rovet peresi na  
 tapuhi,  
 ale isan la haratu la lo  
 ooloo na hijam,  
 la haratu la tamlohi purongo,  
 peresi la haratu la tam-  
 lohi aulu jea,  
 ale rani mo mai vara o komo  
 la haratu la lo komo na  
 varama.”

19 Ale Temple non God aulu  
 na tuka mo roi, ale o ēri hite  
 na puhoro mata nona reti-  
 tauhi mo lo toho na lolo nona  
 Temple, ale vaha mo vilasi,  
 piri mo roroa, ale mihi tavera  
 mo hisu, ale ņoņo vatu aes  
 tavera la jovi.

## 12

### *Hārai Matea Peresi Na Dragon*

1 Ale matamata māurahi  
 tavera matea mo pala na  
 tuka: enia hārai matea  
 mo ruru na alo sohena  
 ruruna, ale vitu mo lo toho  
 na ruhuru palona, ale  
 vitusarasara mo sangavulu  
 ņomana mo rua la vai

na ņongoņongo nona supe  
 matea na patuna, 2 mo  
 pangepange, ale mo tangi  
 aulu mata rongohaji tavera,  
 mo lo tangi matan mo  
 tatamahu vara i lavilavi.

3 Ale matamata tinapua  
 matea mo pala na tuka, e!  
 Dragon hahara tavera matea.  
 Patuna mo limaravrua la lavi  
 na ņongoņongo matematea,  
 ale palana mo sangavulu.  
 4 Ale vīrina mo haro na  
 hatolu vitusarasara tari na  
 tuka mo pulahira la sivo na  
 varama. Moiso dragon atu  
 mo turu na nahon hārai atu  
 mo tatamahu vara i ņolomi  
 na natuna vara hārai atu i  
 lavilavi.

5 Hārai atu mo vasusui na  
 natirihi lamane matea sei  
 enia i pa aulu na mara jara  
 tinatinapua tari na varama,  
 ale i pa tamajira na maja  
 aen matea. La reve nārihi  
 natirihi lamane atu mo sahe  
 isan God, ale mo sakele na  
 nona jara sakele nona supe.  
 6 Ale hārai atu mo rovo mo  
 vano na jara hasetoho matea  
 sei God mo tatamahunia  
 matana moiso. Ale la pa  
 kilaua atu mata rani i tari  
 vahatea i ngav sangavulu rua  
 i ngavulu limarave (1,260).

### *Vuro Na Tuka*

7 Hitahun haratu vuro mo  
 tapulo na tuka, ale Michael  
 patu angelo peresi na nona  
 angelo la valum peresi  
 dragon atu tolu na nona  
 angelo, ale dragon atu peresi  
 na nona angelo la vai na vuro  
 peresi Michael, 8 pani enira  
 la jeu na dragon peresi na  
 nona angelo hin vuro atu,  
 ale la titiura na tuka, 9 Ale

dragon tavera atu, enia mata sasati atu tuai, haratu la tovia Tiapolo teni Setan, tarea enia mo lo halu na tamlohi tari na varama, la pulahia peresi na nona angelo la sivo na varama.

<sup>10</sup> Ale na rongo na leo tavera matea na tuka mo vereea mara, "Nake rani mo mai moiso vara vavahinau mata juri non noŕa God la masese, nake i pa turu na nona ŕilangi peresi na nona suiha mata supe, nake rani vara Kŕisto i tauri na nona suiha, enia sei God mo viŕonia vara enia i pa Jujuri. Ale matana, mo pulahi naŕihi meresahi atu vara i sivo na varama, enia haratu mo lo tuvai na voraiŕa na nahon God tarea. <sup>11</sup> Ale la jeu Setan mata ŕaen Natu Sipsip ale mata nora vereulia na retivaraŕuhu matan la tatamahu vara la mate mata nora rasua. <sup>12</sup> Matana, tuka aulu ha pa avulahi peresi la haratu la lo toho atu, pani varama peresi na tasi ha ŕomsati matan la pulahi Tiapolo mo sivo isamim, ale mo lolokoru patuna matan mo levosahia vara nona rani mo vejuveju."

<sup>13</sup> Na rani dragon atu mo hitevosahia vara la titiua mo sivo na varama, mo levuti pa haŕai atu sei mo lo vasusui natuna lamane atu. <sup>14</sup> Pani la sile na hapa mala tavera mo rua isana vara i avu i rovo i vano hin jara atu God mo tatamahunia matana, vara la pa kilaua hin jara hasetoho atu. Dragon i pa sopo eŕi koma hin jara atu mata tauni i tolu peresi na sope tauni

matea.

<sup>15</sup> Ale dragon atu mo sosoro na wai sohena wai roro matea, mo malue na jingona mo usuri haŕai atu, ale mo vaihitea vara i tivesi naŕihia hin wai tatave atu, <sup>16</sup> pani lepa mo tuenia, lepa mo roi, ale mo ŕolomi wai tatave atu sei mo lo malue na jingon dragon atu. <sup>17</sup> Ale dragon atu mo lolokoru sasati hin haŕai atu. Ale mo malue mo vano vara i vai na vuro peresi te natun haŕai atu tinapua. Enira la tamlohi atu sei la lo ololo na retileu non God, ale la lo usuri na vereulia sei Iesu mo vujangia isara. <sup>18</sup> Moiso dragon atu mo turu na pahisa tasi na oneone.

## 13

### *Maji Jala Sasati Mo Rua La Mai*

<sup>1</sup> Ale na kilau vano na hite na maji jala sasati matea mo lo malue na tasi. Palana mo sangavulu, ale patuna mo limaravrua. Ale ŕongoŕongo nona supe mo sangavulu la lo toho na palana matematea. Ale la uli na hija hai na patuna hatehateahi, enira mo isoiso la lo kali God. <sup>2</sup> Maji jala sasati atu na hitea mo lavi na epe leopard, palona mo sohena palo bear, ale jingona mo sohena jingo lion. Dragon atu mo silea na nona ŕilangi peresi na nona jara sakele nona supe vara i tauri na nona suiha tavera. <sup>3</sup> Sola matea mata mate mo lo toho na patuna matea, mo sohena vara i pa mate matana, pani mo mele mavo, ale tamlohi tari na

varama la usuria matan la maʔurahi hin maji jala sasati atu, <sup>4</sup> ale la lotu dragon atu sei mo lo sile na nona suiha isan maji jala sasati atu, ale la lotu maji jala sasati atu lara, “Mo sopo tea i sohena maji jala sasati nike! Tea i pa sopo eʔi valum peresia!” <sup>5</sup> God mo majinga vara maji jala sasati atu i retihapahapa, ale i kalia moiso mo silea na vitu mo ngavulu vati mo rua (42) matan vara i vaihite na suihana. <sup>6</sup> Maji jala sasati atu mo kali God, ale mo kali na hijan God, ale mo kali jara atu God mo lo toho ea peresi na tamlohi sei la lo toho atu peresia na tuka. <sup>7</sup> Ale God mo majinga vara i vai na vuro peresi na nona tapuhi, ale vara i jeura. God mo silea na suiha vara i aulu na tavgavi tari, tamlohi purongo, leo tari peresi na mara jara tinatinapua tari, <sup>8</sup> ale la haratu la lo toho na varama la pa lotu maji jala sasati atu, enira mo isoiso hijara la sopo ulira na Puku mata Mauri sei la ulia tuai tiroma na vavahinau mata varama.

<sup>9</sup> Haratu mo lo rongo, i tapurongo!

<sup>10</sup> Vara engko mata la pa taurilatoho,  
la pa taurilatoho,  
vara engko mata la pa vilimateiho na sita vuro,  
la pa vilimateiho na sita vuro.

Raramina mo sohen harahi: tapuhi non God la pa tatamahu mata turu ʔilangi na ʔomʔomi matea na nora hahau mata rasua.

<sup>11</sup> Ale na mele hite na maji jala sasati tinapua matea mo malue na lepa. Palana mo rua mo sohena natu sipsip, ale mo retireti sohena dragon. <sup>12</sup> Mo lavi na suihan maji jala sasati atu tiroma sei solana mo mavo moiso, Ale mo vai na varama peresi na tamlohi hinia la lotu maji jala sasati atu tiroma. <sup>13</sup> Ale mo vai na hina maʔurahi tatavera tinatinapua, sohen mo vai na hapu mo tai na masapa mo sinai na varama na naho tamlohi, <sup>14</sup> ale hin la hinau maʔurahi atu God mo majinga hinira vara i vaira na nahon maji jala sasati tiroma atu, mo halu na tamlohi tari la lo toho na varama, ale mo vereea mara la vai na tamasin maji jala sasati atu tiroma sei la vilia na sita vuro, pani mo pa lo mauri, <sup>15</sup> ale God mo majinga vara harua maji jala sasati atu i mangovi tamasi atu vara i mauri matan vara i eʔi retireti, ale matan vara tamasin maji jala sasati atu i pa vilimatei la haratu la sopo lotu tamasin maji jala sasati atu, <sup>16</sup> ale enia mo sile na retileu matea vara tamlohi tari la pa lavi na taipulu na matua limara teni na pungorira. Hina purongo vara la aulu, teni la tamlohi purongo, teni la tavgav, teni la tilavono, teni la tamlohi materi, teni la slev, <sup>17</sup> matan vara tea i sopo lavi taipulu atu, enia i sopo eʔi volvoli teni i haʔehi te hinau hatea. Taipulu atu ʔaramina enia hijan maji jala sasati atu peresi na evi hijana.

<sup>18</sup> Hinau nike, mo opoi na lelevosahi. Vara ko opoia vara o levosahi na evin maji jala sasati atu, enia evi hija tamlohi matea, ale evina enia 666.

## 14

### *Natu Sipsip Peresi Na Vaona 144,000*

<sup>1</sup> Ale na kilau vano, e! Natu Sipsip mo lo turu na vutin Zion,\* ale tamlohi mo 144,000 la lo turu peresia. Hijana peresi na hijan Tamana la ulia na pungorira. <sup>2</sup> Ale na rongo nā vaore matea na tuka, mo sohena ŋum tasi tavera, ale mo sohena roroa piri tavera. Leo atu na lo rongoa mo sohena leo pue tangtangi sei tamlohi mata roro na pue tangtangi la lo roro hinira, <sup>3</sup> la lo lalavete na vete paro matea na naho jara sakele nona supe non God peresi la hinau mauri mo vati atu peresi la tamlohi aulu atu. Tea i sopo eŋi levosahi vete atu, pani la tamlohi atu purongo evira 144,000 sei God mo volituhura na varama. <sup>4</sup> Enira mo isoiso la lamane, la sopo lo juruvi peresi te haŋai hin te rani, ale vara Natu Sipsip mo haipu, la lo usuria. God mo volituhura na varama matan vara la mai sohena asitauni mata varama isan God enia Natu Sipsip. <sup>5</sup> Enira la sopo eŋi halu, ale la vokevoke.

### *Retisohai Nona Angelo Tupu Tolu*

<sup>6</sup> Hitahun haratu na hite na angelo tinapua matea mo

lo avu aulu na livuha masapa. Mo lo lavi na Retiŋuhu matan tui tui matan vara i vereea isana mara jara tinatinapua tari, tavitavui tari, leo tari, ale tamlohi purongo tari la lo toho na varama, <sup>7</sup> angelo atu mo ulo mara, “Ha sile na oloolo isan God, ale ha tahe na hijana aulu, matan rani mo mase moiso matan vara i ari na tamlohi. Ha lotua matan enia haratu sei mo vai na tuka peresi na varama peresi na tasi peresi na patu wai.”

<sup>8</sup> Harua angelo mo usuria mo ulo mara, “Babylon mo tavera mo jovi, mo jovi. Mo reve na mara jara tinatinapua tari la inu na waen nona mauri maji tinatinapua.”

<sup>9</sup> Hatolu angelo mo lo usuri la haratu mo rua tiroma mo pala mo ulo mara, “Hinau nike natu, i pa pala isamim vara tea i lotu maji jala sasati atu teni tamasina teni i lavi na nona taipulu na limana teni na pungorina, <sup>10</sup> ale enia sohena i pa inu waen atu mata talai lolokoru non God mata hehe sei mo sureia na nona paniken mata nona lolokoru, ale i pa rongohaji na hapu peresi na vatu tutuni mata volkeno, pani i pa sopo eŋi mate. La pa vaia na naho angelo tapu peresi Natu Sipsip. <sup>11</sup> Ale vara tea i lotu maji jala sasati atu peresi na tamasina teni i lavi na nona taipulu mata hijana, ale i pa sopo eŋi isoiso na nona rongohaji na hapu mata rani tui tui.”

\* 14:1: Zion: Zion enia Jerusalem.

<sup>12</sup> Haranike enia reti matea mo vano isana tamlohi viřoni non God vara la turu řilangi, la haratu la lo taurilati na retileu non God peresi na nora rasua hin Iesu.

<sup>13</sup> Ale na rongo na leo matea na tuka mo vere mara, "O uli harihi: mo tapulo nake, avulahi tavera isan la haratu non Moli la pa mate."

Ale Tanume Tapu mo řaramia mara, "Enjora! Avulahi řuhu isara matan la pa mapu na nora vavahinau la lo kalvono hinira, ale vua nora vavahinau řuhu la pa lavia hitahu."

### *Angelo Atu Mo Lo Sakele Na Telangi*

<sup>14</sup> Ale na kilau sahe, e! Telangi lulu matea. Na hite matea mo lo sakele hinia sohen Natun Tamlohi. Rongořongo matea la vaia na gold mo lo toho na patuna, ale mo lo tauri na sita kole voro matea na limana. <sup>15</sup> Ale angelo tinapua matea mo malue na Temple mo ulo isan haratu mo lo sakele na telangi mara, "O tapulo taitai na nom sita kole. Rani mata lavi na asitauni na varama la mena." <sup>16</sup> Moiso haratu mo lo sakele na telangi mo vuřahi na nona sita kole, ale mo lavi na asitauni na varama.

<sup>17</sup> Hitahun haratu angelo tinapua matea mo malue na Temple, ale enia sohena mo lo tauri na sita kole voro matea. <sup>18</sup> Ale angelo tinapua matea mo malue na jara votavota enia mo lo kilau na hapuna, ale mo ulo na leo tavera matea mo vano isan angelo atu mo lo tauri na sita kole voro mara, "Vua grape

tari na varama la mena! O vuvu na vurungina na nom sita kole voro." <sup>19</sup> Ale angelo atu mo vuřahi na nona sita kole na varama, ale mo vu na vua grape mo pulahira la sivo na koko varavarasi mata talai lolokoru non God mata hehe. <sup>20</sup> Ale la varasihira na koko varavarasi sei mo lo toho na jingoiman taon tavera, ale řaera la roro la malue hin koko varavarasi atu mo vano mo tikeli 296 kilometre asau hinia, ale puahana mariviti vara i lovi te hos.

## 15

### *Isoiso Talai Tavera La Lo Mai*

<sup>1</sup> Hitahun haratu na kilau sahe na tuka, na mele hite na matamata tinapua matea, enia hina mařurahi tavera matea, ale angelo mo limaravrua la lo lavi la isoiso rongohaji sasati tavera atu mo limaravrua, ale enira mo isoiso talai lolokoru non God mata hehe.

<sup>2</sup> Ale na hite na hinau matea mo sohena tasi mata glas mo hoi peresi na hapu, ale la tamlohi atu sei la jeu na suihin maji jala sasati atu peresi na tamasina peresi na evi hijana, la lo turu na pahisan tasi mata glas atu. La lo tauri na pue tangtangi non God, <sup>3</sup> ale la lo lalavete na vete non Moses volitusi non God peresi na vete non Natu Sipsip lara,

"Moli God engko suihin aulu atu mo tavera jea,  
nom vavahinau la tavera jea,  
ale la řuhuru jea,

nom vavahinau la tata-  
 holo,  
 ale la varaŕuhu,  
 engko ko Supe nona vao  
 tamlohi jara tinatina-  
 pua tari na varama!  
 4 Moli, hare natu, i sopo eŕi  
 sile na oloolo tavera  
 isam,  
 teni i tahe na hijam aulu?  
 Matan engko hasem ko tapu,  
 ale mara jara tinatina-  
 pua tari  
 la pa mai la pa lotuho  
 matan ko vujangi nom  
 aria sei,  
 mo tataholo mo ŕuhu.”

5 Hitahun haratu, na mele  
 kilau, ale na hite na jara tapu  
 na lolo Temple na tuka mo  
 roi. 6 Ale na hite na angelo  
 mo limaravrua sei la lo tauri  
 na jilivi talai mata rongohaji  
 sasati atu mo limaravrua la  
 malue na lolo Temple. La ru  
 na ruru lulu peravu, la eve  
 na ŕumara na oti la vaia na  
 gold. 7 Ale vonan pa la hinau  
 mauri atu matea mo sile na  
 jilivi talai mo limaravrua la  
 vaira na gold matematea isan  
 la angelo atu mo limaravrua,  
 jilivi talai atu la lavi na talai  
 lolokoru non God mata hehe  
 sei mo mauri mata rani tui  
 tui, 8 ale Temple mo maŕivi  
 na asu memeran God mata  
 suihana, ale tea i sopo eŕi unu  
 na Temple vavano la hinau  
 rongohaji sasati tavera sei la  
 angelo atu mo limaravrua la  
 lo lavira, la pa vaira i isoiso.

## 16

*Jilivi Talai Mata Lolokoru  
 Tavera Non God*

1 Hitahun haratu na rongo  
 na leo tavera matea mo

malue na Temple mo vere  
 isan la angelo atu mo li-  
 maravrua mara, “Ha vano  
 ha surei la jilivi talai mata  
 talai lolokoru non God mata  
 hehe atu mo limaravrua na  
 varama!”

2 Ale tiroma angelo mo  
 vano mo surei na nona  
 jilivi na varama, vahatea  
 vosavosa ŕanga la pala isan  
 la tamlohi atu sei la lavi na  
 taipulu non maji jala sasati  
 atu peresi la haratu la lo lotu  
 na tamasina.

3 Harua angelo mo surei na  
 nona jilivi na tasi, vahatea  
 tasi mo posi mo mai sohena  
 ŕae tarape moiso hinau tari  
 na lolo tasi la mate matana.

4 Hatolu angelo mo surei na  
 nona jilivi na wai roro peresi  
 na patu wai moiso la mai ŕae.

5 Ale na rongo angelo  
 atu sei wai la lo toho na  
 ruhuruhi suihana, mo vere  
 isan God mara, “God, talai  
 ko silea mo tataholo, matan  
 engko hasem ko tapu, ko  
 lo toho nake, ale ko lo toho  
 tuai moiso. 6 Mo tataholo  
 vara tamlohi la inu ŕae sei  
 ko silera hinia matan la vili  
 na tapuhi non God peresi na  
 nom pŕovet matan ŕaera la  
 roro na varama.”

7 Ale na rongo na leo matea  
 mo tai na votavota mara, “Io,  
 Moli God engko suiha aulu  
 atu mo tavera jea, nom ta-  
 lai tari la vokevoke, ale la  
 varaŕuhu.”

8 Ale havati angelo mo  
 surei na nona jilivi na alo, ale  
 alo mo tapulo suli na tamlohi  
 na hapuna. 9 Tamlohi tari  
 tutuni alo mo sulira, ale la  
 kali na hijan God matan mo  
 lo vai la rongohaji sasati

tavera sei, pani tea mo sopo posi i vano isan God teni i silea na oloolo.

<sup>10</sup> Halima angelo mo surei na nona jilivi na jara sakele nona supe non maji jala sasati atu, vahatea řořoha mo tavuni jara atu mo lo tauri na suiha hinia, ale nona tamlohi la tapulo hatihati na memera matan la lo rongohaji. <sup>11</sup> Ale matan la lo rongohaji tavera peresi la nora vosavosa řanga atu la hajira, la kali God na tuka, pani la řohu vara la posi na nora hehe.

<sup>12</sup> Halimarave angelo mo surei na nona jilivi hin wai tavera atu Euphrates, ale wai atu mo mamasa matan vara la supe atu la tai Opaē, la eři hahau rotoa. <sup>13</sup> Ale na hite na tanume sasati mo tolu la sohena puroko, matea mo malue na jingon dragon atu, matea na jingon maji jala sasati atu, ale matea isan nona přovet haluhalu. <sup>14</sup> Matan la tanume sasati atu la lavi na suiha matan vara la vai na hinau mařurahi, ale la vano isana supe tari na varama vara la takonahira matan vara la pa vai na vuro peresi God, enia suiha aulu atu mo tavera jea na nona rani tavera.

<sup>15</sup> Ale Moli mara, "Ha lev-osahia! A pa mai sohena tamlohi vavanaho matea, avulahi tavera isan haratu mo sopo juruvi, pani mo lo kilau moiso mo tatamahu na nona ruru matan vara i vono i pa hahau řalihi i malamala, ale i mahanuhanu matana."

<sup>16</sup> Ale la tanume sasati atu la takonahira na jara matea

la lo tovia Armageddon na leon tavitavuvin Israel.

<sup>17</sup> Ale halimaravruan la angelo atu mo surei na nona jilivi na masapa, ale leo tavera matea mo tai na jara sakele nona supe aulu na lolo Temple mara, "Mo isoiso!" <sup>18</sup> Moiso piri mo roroa, ale vaha mo vilasi, ale mihi tavera matea mo sopo lo tea i sohena na varama i jeu haratu, matan enia mo tavera jea. <sup>19</sup> Mihi atu mo vuhai na taon tavera matan Babylon tavaluna mo tolu, ale mo sohena isana taon tavera tari nona mara jara tinatinapua tari la jovi. God mo mele řomřomi na hehe tari non Babylon taon tavera atu, ale mo vaia mo inu vevuhi na waen mata nona lolokoru sasati na nona talai lolokoru mata hehe sei mo mařivi hin paniken atu. <sup>20</sup> Ale ureure tari la tihai, ale vutivuti tari la tihai. <sup>21</sup> Vatu aes tatavera na tuka la jojovi sivo isana tamlohi, puhonira matematea la tikeli na kilo mo ngavulu vati (40). Pani tamlohi la kali God matan rongohaji sasati atu mo tavera jea.

## 17

### *Hařai Malele Peresi Pa Maji Jala Sasati Atu*

<sup>1</sup> Ale vonan la angelo atu matea hin la haratu mo limaravrua sei la lo tauri na nora jilivi, mo mai isaku mara, "O mai, a pa vujangiho na talai non hařai malele atu sei mo lo sakele na wai matuvana, <sup>2</sup> ale supe mata varama la vai na mauri maji peresia, ale tamlohi na varama la



drong na nona mauri maji tinatinapua.”<sup>3</sup> Ale angelo atu mo laviau na vano na suihan Tanume Tapu na jara hasetoho matea. Hin jara atu na hite na haʻrai matea mo lo sakele na maji jala sasati hahara ʻroʻroha matea, ale maji jala sasati atu mo lavi na hija matuvana na epena la lo kali God, ale na hite na patuna mo limaravrua, ale palana mo sangavulu.<sup>4</sup> Haʻrai atu mo ruru na ruru peravu majhina mo perpel, ale mo hahara ʻroʻroha, ale mo ruru na gold peresi na watu vilasi ruhuʻruhu peresi na huʻrutavila. Na limana mo lo tauri na paniken waen matea la vaia na gold mo maʻrivi na nona posposi lumihā peresi na nona posposi viriu.<sup>5</sup> La uli na hija matea na pungorina ʻraramina mo vara:

**Enau Taon Tavera**

**Matan Babylon**

**Tina Ha Rai Malele**

**Peresi Na Posposi Lumihā**

**Mata Varama**

<sup>6</sup> Ale na hite haʻrai sati atu mo drong na ʻrae tapuhi non God peresi na ʻrae tuetueni non Iesu. Na hitea na maʻrurahi tavera hinia.

<sup>7</sup> Pani angelo atu mo vereau hinia mara, “Ko maʻrurahi mata sava? A pa vereuliho na ʻraramin haʻrai nike peresi maji jala sasati atu mo lo sakele hinia sei patuna mo limaravrua, ale palana mo sangavulu.<sup>8</sup> Maji jala sasati atu ko lo hitea mo lo toho, pani nake mo tihai, ale i sopo tuai i pa malue hin koko tavera jea atu sei mo sivo atano jea na lolo

varama mata mateia i mai, ale i pa vano na nona komo. Ale tamlohi tari na varama sei God mo sopo uli na hijara na Puku mata Mauri tiroma moiso mo pa tapulo vai na varama, la haratu natu, la pa maʻrurahi tavera hin maji jala sasati atu matan mo lo toho tiroma moiso, ale mo tihai, ale i pa mele pala.

<sup>9</sup> Ale tea vara i tamlohi lelevosahi, i pa levosahi hinā nike. La patuna sei mo limaravrua enira vutivuti atu mo limaravrua sei haʻrai atu mo lo sakele hinia. La vutivuti atu la ʻrarami na supe mo limaravrua.<sup>10</sup> Supe mo lima hin la haratu la jovi moiso, ale matea mo lo toho nake, ale matea mo sopo lo mai, ale i pa mai, pani God i pa majinga hinia mata makomo rani purongo.<sup>11</sup> Ale maji jala sasati atu sei mo lo toho tiroma moiso, pani nake mo tihai, enia i pa halimaravtolura, pani enia vonan la haratu mo limaravrua atu, ale enia i pa vano na nona komo.<sup>12</sup> Ale la palana atu mo sangavulu ko lo hitera enira supe mo sangavulu sei la sopo lo lavi na suiha, pani la pa tauri na suiha sohena supe peresi maji jala sasati atu mata makomo rani purongo.<sup>13</sup> La supe atu ʻromira mo matea, ale la sile na nora suiha isan maji jala sasati atu vara i tauri na suiha.<sup>14</sup> La pa vai na vuro peresi Natu Sipsip, pani Natu Sipsip i pa jeura matan enia Moli nona Moli, ale Supe nona Supe, ale la haratu la lo toho peresia, enia mo tovara,

ale mo viřonira, ale řomira la řomturu řilangi.”

<sup>15</sup> Ale angelo atu mo verea isaku mara, “Wai matuvana atu ko lo hitera sei hařai malele atu mo lo sakele hinira, enira tamlohi purongo peresi na vao matuvana, peresi na mara jara tinatinapua peresi na leo tinatinapua. <sup>16</sup> Ale la palana mo sangavulu atu ko lo hitera peresi maji jala sasati atu, la pa řohu hin hařai malele atu, ale la pa komoa, ale la pa vaia i malamala, ale la pa hania moiso la pa sulia na hapu. <sup>17</sup> Matan God mo taua na mapura vara la vai na masalona vara la mai matea na řomira, ale la pa sile na nora suiha isan maji jala sasati atu vara i tauri na suiha, vavano reti non God la masee.

<sup>18</sup> Ale hařai atu ko lo hitea, enia taon tavera sei suihana mo aulu na supe tari na varama.”

## 18

### *Babylon Mo Jovi*

<sup>1</sup> Hitahun harihi, na mele hite na angelo tinapua matea mo lo sevuti na tuka. Enia mo lavi na suiha tavera jea, ale sasaramina mo vai na varama mo mera, <sup>2</sup> ale enia mo ulo na leo tavera matea mara, “Babylon tavera, mo jovi, mo jovi! Enia mo mai jara luhu nona tanume sasati, jara luhu nona tanume lumiha tari, tau maji avuavu lumiha tari, ale jara luhu nona maji jala sasati sei la lumiha, tamlohi la nikehira. <sup>3</sup> Matan mara

jara tinatinapua la inu na waen mata opoia řilangi mata nona mauri maji, supe tari na varama la vai na hehe peresia, ale tamlohi ařeařehi, la tavgav mata nona mauri maji.”

<sup>4</sup> Ale na mele rongo na leo tinapua matea mo tai na tuka mara, “Noku tamlohi, ha rovo hinia! Ha sopo pulutahi peresia na nona hehe matan vara ha pa sopo lavi nona rongohaji sasati peresia, <sup>5</sup> matan nona hehe la takonahia mo sahe vara la tikeli na tuka, ale God mo tatamahu vara i aria mata nona hehe. <sup>6</sup> O vaia isana sohen haratu mo vaia isana nom tamlohi. O mele kelea aulu vaha rua hin haratu mo silea isara. O vaia i inu na mana wai mata rongohaji i vaha rua hin haratu mo lo silea isara. <sup>7</sup> Hařai atu mo řomaulu hinia hasena na nona hina tavgav matuvana, ale o vailejilejia, o vai na řomina i sati matan enia mo verea mara, “Na sakele sohena vesupe matea, enau a pa sopo malepu hin te rani teni a pa řomsati”. <sup>8</sup> Matan hinau atu nona rongohaji sasati la pa mai isana na rani matelete purongo, mateia, řomsati, ale marua, hapu i pa komo na tarapena, matan Moli God suiha, enia haratu mo aria.”

<sup>9</sup> Ale supe mata varama sei la vai na mauri maji peresia, ale la lavi na tavgav matana, la pa tangisia hin rani atu vara la hite na asu tarapena i lo koru. <sup>10</sup> Ale la lo turu asau hinia matan la matahuni na nona rongohaji, ale lara,

“Rani sasati, rani sasati mo mai isam taon tavera, ko taon suiha, Babylon! Matan, vila űuhu purongo, nom talai mo mai isam.”<sup>11</sup> Tamlohi aűearehi na varama la pa tangi, ale la tangtangi matana, matan tea mo sopo voli na nora hinahinai,<sup>12</sup> nora gold, silver, vatu űuhuűuhu, huűutavila, ruru űuhu, ruru perpel, silk, ruru hahara űoűoha, vipahai pona űuhu tinatinapua, hinai la tai naűihira na huűu elephant, hinai la vaira na vipahai űuhuűuhu jea, bronze, aen peresi na vatu sei marble,<sup>13</sup> cinnamon peresi na spaes sei tamlohi la lo hanhani peresira, hasori, hasori sohena myrrh peresi na frankincense, waen, wel mata olive, flaua űuhu, wit, buluk, sipsip, hos, kart mata vuro peresi na slev, enira tamlohi mauri.

<sup>14</sup> Ale leo atu mo mele vereea mara, “La vua atu sei mapum mo lo opoira la rovo hiniho moiso peresi na nom hina űuhuűuhu peresi na nom lakolako űuhuűuhu la tihai isam, ale o pa sopo eűi mele hitera hin te rani.”

<sup>15</sup> Tamlohi aűearehi matan la hinai sei, la tavgav matana, la pa turu asau matan la matahuni na nona rongohaji, la tangi la tangtangi,<sup>16</sup> lara, “Rani sasati, rani sasati isan taon tavera, haratu sei mo lo ru na ruru űuhu, ale mo lo ru na ruru perpel, ale ruru hahara űoűoha. Mo ru na gold peresi na vatu űuhuűuhu, peresi na huűutavila,<sup>17</sup> pani vila

űuhu purongo, nona tavgav la tihai!”

Captain mata lanis tari peresi na tamlohi voko na lanis peresi na tamlohi la lo lingira peresi la haratu la lo vai na mania na tasi la turu asau,<sup>18</sup> ale la tangi aulu matan la hite na asuna mo lo koru lara, “Sava taon mo sohen taon tavera akerihi!”

<sup>19</sup> Ale la lo tangi aulu, ale na nora űomsati la pulahi na tangotango na patura, ale lara, “Rani sasati rani sasati isan taon tavera! Haratu sei la lo maro na lanis na tasi la tavgav matan nona tavgav, pani vila űuhu purongo, mo maroe,<sup>20</sup> ale matana, tuka o avulahi peresi na tapuhi non God peresi na vahaűule peresi na pűovet, matan God mo sile na talai isana matamim.”

<sup>21</sup> Ale angelo űilangi matea mo lavi na vatu matea sohena vatu tavera matea mata pete na piri wit, ale mo pulahia mo sivo na lolo tasi, ale mo ulo mara, “Hin malele űilangi akerihi natu, taon tavera matan Babylon i pa jovi hinia, ale la pa sopo eűi mele hitea hin te rani,<sup>22</sup> ale Babylon, roroan la haratu la lo roro na pue tangtangi, ale tamlohi roro, ale haratu la lo roro na flute, ale haratu la lo tiv na trumpet la pa sopo eűi mele rongora na lolom, ale tamlohi eűieűi la lo vai na nora vavahinai hiniho, la pa sopo mele hitera hiniho hin te rani, ale roroa mata pete na wit la pa sopo mele rongoa hiniho hin te rani,<sup>23</sup> lamu la sopo eűi mele memera hiniho

hin te rani, ale leo tamlohi i pa lahi peresi na nona haʻai la pa sopo eʻi mele rongora hiniho hin te rani, matan nom tamlohi aʻeaʻehi tiroma enira tamlohi tatavera mata varama, pani nake sava? Ale nom mahu mo halu na mara jara tinatinapua tari, <sup>24</sup> ale ʻrae pʻrovet peresi na ʻrae tapuhi non God peresi na ʻraen la haratu ko vilimateira na varama mo lo toho hiniho.”

## 19

### *La Lalavete Na Tuka*

<sup>1</sup> Hitahun haratu na rongo na hinu matea mo sohena leo vao tavera matea na tuka mo ulo mara, “Hasohaso God! God enia Jujuri! Hasohasona tavera peresi na suiha, enira non noʻa God, <sup>2</sup> matan nona aria la tataholo, ale la vokevoke matan enia mo ari tina haʻai malele atu sei mo lo komo na varama na nona posposi viriu, ale God mo kele na ʻrae nona volitusi sei la lo toho na liman haʻai malele atu.” <sup>3</sup> Ale vao tavera atu la mele ulo lara, “Hasohaso God! Asun haʻai malele atu i pa sahe aulu, rani tui tui tarea.”

<sup>4</sup> Ale la tamlohi aulu atu mo ngavulu rua mo vati (24) peresi la hinu mauri atu mo vati la juruvi popovi atano na lepa, ale la lotu God mo lo sakele na nona jara sakele nona supe. La ulo aulu lara, “Amen! Hasohaso God!”

<sup>5</sup> Ale leo matea mo tai na jara sakele nona supe mara, “Hasohaso noʻa God kamim mo isoiso nona volitusi sei ka lo sile na ololo isana, haratu

la aulu peresi la haratu sei la atano.”

<sup>6</sup> Ale na rongo na vavaore nona vao tavera matea mo sohena ʻrum tasi tavera, mo sohena roroa piri matuvana, mo ulo mara, “Hasohaso Moli noʻa God, enia suiha aulu atu mo tavera jea mo lo sakele na nona suiha. <sup>7</sup> Ra avulahi ʻra avulahi tavera, ale ʻra sile na hasohaso tavera isana matan lahi non Natu Sipsip mo masese, ale nona haʻai mo hase tatamahunia. <sup>8</sup> God mo silea vara i ruru na ruru lulu mera mo vokevoke.” Matan ruru lulu atu, mo lo ʻrarami na vavahinau ʻruhu nona tapuhi.

<sup>9</sup> Ale angelo atu mo vereea isaku mara, “O uli harihi: Avulahi isan la haratu la usira vara la pa mai na hanhahi lahi non Natu Sipsip.” Ale mo mele vereea mara, “Retivaraʻruhu sei la tai isan God.”

<sup>10</sup> Ale na jovi na juruvi popovi atano na palona vara a lotua, pani mo vereea isaku mara, “O pa sopo vai hinu atu! Enau volitusi matea sohem peresi na vorai peresi na vevorai, la haratu la lo taurilati na vujangi non Iesu. O lotu God.” Vara tamlohi la lo vereuli Iesu enira la lo retimangovi na suiha Tanume Tapu.

### *Reti Non God Mo Vai Na Vuro*

<sup>11</sup> Ale na hite tuka mo roi, e! Hos lulu matea, ale haratu mo lo sakele na hos la tovia:

### **Romturu Rilangi**

#### **ale**

#### **Vara Ruhu**

ale nona aria mo tataholo, ale mo vai na vuro. <sup>12</sup> Ale

matana mo sohena pepe hapu matea, ale řongořongo matuvana nona supe aulu jea la lo toho na patuna, ale hija matea mo lo toho hinia, pani enia hasena purongo mo levosahia.

<sup>13</sup> Mo ruru na ruru peravu matea la řuřunia na řae, ale hija sei la tovia hinia enia:

### **Reti Non God**

<sup>14</sup> Ale vao tamlohi vuro tavera na tuka la lo usuria hin hos lulu atu, la ruru na ruru lulu řuhu la vokevoke. <sup>15</sup> Na jingona, sita voro tavalu rua matea mo lo malue hinia vara i vilijovjovi na mara jara tinatinapua. I pa kilaura peresi na maja aen mata tamajira hinia, mo varasi na koko varavarasi mata lolokoru sasati mata talai lolokoru non God mata hehe sei enia suiha aulu atu mo tavera jea. <sup>16</sup> Ale hija matea la ulia na nona ruru peresi na vosena mara:

### **Supe nona Supe Moli nona Moli**

<sup>17</sup> Moiso, na hite na angelo matea mo lo turu na alo, ale mo ulo na leo tavera matea isana maji avuavu tari sei la lo avuavu aulu na masapa mara, "Ha sinai! Ha pulutahi mata hanhani tavera non God, <sup>18</sup> matan vara ha pa hani na visihon la haratu la supe, peresi la haratu la patu tamlohi mata vuro, peresi la haratu la lo tauri na suiha, peresi na hos peresi na tamlohira, peresi la haratu la materi, haratu la slev, tamlohi aulu peresi na tamlohi purongo."

<sup>19</sup> Ale na hite pa maji jala sasati atu peresi na supe tari

na varama peresi na nora vao tamlohi vuro la mai jara matea vara la vai na vuro peresi haratu mo lo sakele na hos tolu na nona vao tamlohi vuro. <sup>20</sup> Ale la tauri maji jala sasati atu peresi přovet haluhalu atu, enia haratu mo lo vai na matamata tavera na nahon maji jala sasati atu sei mo lo halu la haratu la lo lavi na nona taipulu, ale la lo lotu na tamasina. La pulahi maji jala sasati atu peresi přovet haluhalu atu la pa lo mauri, la sivo hin tasi hapu sei mo lo hani na yatututuni mata volkeno. <sup>21</sup> Ale isoisora, la mate hin pa sita tavalu rua atu sei mo lo malue na jingon haratu mo lo sakele hin pa hos atu, ale maji avuavu tari la masu mařari na visihora.

## **20**

### *Tauni 1000*

<sup>1</sup> Moiso, na hite na angelo matea mo tai na tuka mo lo lavi na kia matan koko tavera jea atu sei mo sivo atano jea na lolo varama mata mateia na limana, ale mo lo tauri na jen tavera matea. <sup>2</sup> Mo taurilati dragon atu, enia mata sasati atu matan tuai sei la tovia Tiapolo teni Setan, <sup>3</sup> ale angelo atu mo pulahia mo sivo hin koko tavera jea atu sei mo sivo atano jea na lolo varama mata mateia, ale mo pelati horoa, ale mo ringea vara dragon atu i pa sopo eři mele halu na mara jara tinatinapua vavano i tikeli na tauni i tari vahatea (*1000*) i vano, ale hitahuna i pa mele materi mata makomo rani purongo.

<sup>4</sup> Ale na hite te jara sakele nona supe peresi haratu la lo sakele hinira sei la silera na suiha vara la ari, ale na hite na maurin la tamlohi atu sei la tai roto na patura matan la lo vereuli Iesu, ale mata reti non God. Enira la sopo lotu maji jala sasati atu teni tamasina teni la lavi na nona taipulu na pungorira teni na limara. Enira purongo la mele mauri vara la tauri na suiha vara la aulu peresi Křisto mata tauni i tari vahatea (1000).

<sup>5</sup> Haranike enia tiroma sauteterahi. Haratu la sopo mauri la pa sopo eři mele mauri i tikeli na isoison tauni atu mo tari vahatea (1000). <sup>6</sup> Avulahi tavera isan la haratu la tapuhi non God sei la turu na tiroma sauteterahi, matan harua mateia i pa sopo eři taurira na suihana. Enira la pa prıs non God peresi Křisto, ale la pa aulu peresira mata tauni i tari vahatea (1000).

### *Isoison Setan*

<sup>7</sup> Ale na isoison tauni atu mo tari vahatea (1000), la pa teri Setan na nona ima řilangi, <sup>8</sup> ale i pa malue vara i halu na mara jara tinatınapua la tovira Gog peresi Magog vara i pulutahira na jara matea vara la vai na vuro; evira mo sohena evi oneone na tasi. <sup>9</sup> Ale enira la hahau roto na jara tari na varama vara la řalihi vao tapuhi tavera atu la lo toho řalihi hin taon tavera atu God mo opoia, pani hapu mo tai na tuka mo jovi isan la haratu la lo mai mo hani tihaira. <sup>10</sup> Ale la pulahi Tiapolo

haratu mo lo halura peresi pa maji jala sasati atu peresi pa přovet haluhalu atu, la sivo hin tasi atu sei mo lo hani na vatu tutuni mata volkeno, ale la pa vailejlejira na rani na pongi ea mata rani tui tui tarėa.

### *Aria Tavera Non God*

<sup>11</sup> Ale na hite na jara sakele mo lulu non God, ale enia mo lo sakele hinia. Varama peresi na tuka la rovo na nahona, la tihai jejeu. <sup>12</sup> Ale na hite la haratu la mate, haratu la tamlohi aulu peresi la haratu la tamlohi purongo, la lo turu na naho jara sakele nona supe, ale puku la roi, ale puku tinapua matea mo roi enia – Puku mata Mauri. La ari la haratu la mate na sava la ulia hin la puku atu, mo tataholo na hinau tari la lo vaira na maurira.

<sup>13</sup> Tasi mo sile la řaratu la mate hinia, ale mateia peresi na varama mata mateia la sile la haratu la mate hinira. Ale la arira enira hatehateahi usuri na sava la lo vaira na maurira. <sup>14</sup> Moiso, la pulahi mateia peresi na varama mata mateia na tasi hapu. Nipu hapu atu la tovia Harua Mateia. <sup>15</sup> Vara tea hijana la sopo hitea na Puku mata Mauri, enia, la pulahia mo sivo na tasi hapu.

## 21

### *Tuka Paro Peresi Na Varama Paro*

<sup>1</sup> Hitahuna, na hite na tuka paro matea peresi na varama paro matea. Tuka tuai peresi na varama tuai la tihai moiso, ale mo sopo te tasi hinia.

<sup>2</sup> Ale na hite taon tapu atu – Jerusalem Paro, mo lo tai aulu na tuka isan God. Mo sohena haʻai matea mo ruru na ruru lahi mo tatamahu matan tuana.

<sup>3</sup> Ale na rongo na leo tavera matea mo tai na jara sakele nona supe, mo vere a mara, “Ka hitea! Nake, jaran God sei mo lo toho hinia, i pa toho peresi na tamlohi. I pa toho peresira, ale enira la pa nona tamlohi, ale God hasena i pa toho peresira, sohena nora God. <sup>4</sup> I pa kamoti na wai matara tari na matara, i pa sopo te mateia, ŋomsasati teni tangi teni epe varihaji, matan hinau matan tuai la tihai.”

<sup>5</sup> Ale haratu mo lo sakele na jara sakele nona supe mo vere a mara, “Ale ha levosahia! Na lo vai na hinau tari la paro.” Ale mo vere a isaku mara, “O uli hinau nike, matan la reti nike, o pa eʻi rasura, ale la varaʻuhu.” <sup>6</sup> Ale mo mele vere a isaku mara, “Mo isoiso! Enau pulo hinau tari! Enau isoisona! Enau tapulo hinau tari! Enau hitahu hinau tari! Isan haratu mo maʻohu, a pa silea hin patu wai mauri atu, mo sopo te volina. <sup>7</sup> Haratu mo jeu na nona meresahi i pa lavi la hinau atu. Enau a pa nona God, ale enia i pa natuku.

<sup>8</sup> Pani isan la haratu ŋomira mo sopo ŋilangi; teni haratu la lo vahaʻi na nora rasua; haratu posira la lumihia; teni haratu la lo vilimatei na tamlohi; teni haratu la lo vai na posposi viriu; teni haratu

la lo mahumahu na suiha tanume; teni haratu la lo lotu na hinau mo sopo God, ale haratu la lo halu, jarara enia tasi hapu atu sei mo lo hani na vatu tutuni mata volkeno, enia Harua Mateia.”

### *Jerusalem Paro Mo Tai Na Tuka*

<sup>9</sup> Ale na hite na angelo matea mo mai isaku, enia vonan la angelo atu mo limaravrua sei, tiroma la lo lavi na jilivi mo limaravrua sei la maʻivi na rongohaji sasati mo limaravrua, ale mo vere a isaku mara, “O mai, a pa vujangiho hin haʻai atu i pa lahi, enia naroun Natu Sipsip.” <sup>10</sup> Ale angelo atu mo laviau na suihan Tanume Tapu na sahe aulu na patu vutivuti tavera matea. Angelo atu mo vujangiau hin taon tapu atu Jerusalem, mo lo tai aulu na tuka isan God, <sup>11</sup> sasaramin God mo lo malue hinia, mo mera ŋuhu sohen vatu vilasi ŋuhuŋuhu matea, sohen vatu atu jasper majhina mo heja rau, ale mo hahara, mo niro ŋuhu sohena crystal glas. <sup>12</sup> Taon tavera atu ropena mo tavera mo aulu, ale mataruana mo sangavulu ŋomana mo rua, ale angelo mo sangavulu ŋomana mo rua la lo turu hin la mataruatu. Hin la mataruatu la uli la hija tavitavin Israel atu mo sangavulu ŋomana mo rua na <sup>13</sup> tavaluna vano Opa e mataruana mo tolu, tavaluna sahe Auta mataruana mo tolu, tavaluna sivo Tahuna mataruana mo tolu, ale

tavaluna sivo Marino mo tolu. <sup>14</sup> Ropen taon tavera atu, pulona mo sangavulu ōmana mo rua, ale hija vahaŋule mo sangavulu ōmana mo rua non Natu Sipsip la lo toho hinira.

<sup>15</sup> Haratu mo lo retireti isaku mo tauri na ava matea la vaia na gold vara i ava na taveran taon tavera atu tolu na mataruana peresi na ropena. <sup>16</sup> Ale avana mo sohen harihi: taverana peresi na peravuna la sohe-sohera purongo, ale taverana peresi na peravuna peresi na auluna avara mo tikeli 12,000 stadia (2,220 km) enira hatehatea. <sup>17</sup> Moiso mo ava na aulun rope atu mo tikeli 144 cubit (66 m) angelo sei mo ava harihi mo tataholo na tamlohi la lo ava hin pongi atu.

<sup>18</sup> Ropena la voroa na vatu ūhuruŋu sei jasper, ale taon tavera atu la vaia na gold vokevoke mo niro sohena glas. <sup>19</sup> La pulo ropen taon tavera atu la lakolakora na vatu vilasi ūhuruŋu sei majhira la tinatinapua. Tiroma vatu enia jasper, haruana enia sapphire, hatolura enia agate, havatira enia emerald, <sup>20</sup> halimara enia onyx, halimaravera enia carnelian, halimaravruara enia chrysolite, halimaravtolura enia beryl, halimaravatira enia topaz, sangavulura enia chrysoprase, sangavulu ōmana mateara enia jacinth, sangavulu ōmana mo ruara enia amethyst. <sup>21</sup> La vai la mataruana atu mo sangavulu ōmana mo

rua na huŋutavila tavera mo sangavulu ōmana mo rua, ale malele na lolon taon tavera atu la vaia na gold mo niro sohena glas.

<sup>22</sup> Na sopo hite te Temple na lolon taon tavera atu, matan Moli God enia suiha atu mo tavera jea peresi Natu Sipsip enira natu, nona Temple. <sup>23</sup> Ale taon tavera atu mo sopo opoi na alo peresi na vitu vara la sasarami hinia matan memeran God mo lo sasarami hin taon tavera atu, ale Natu Sipsip enia nona lamu.

<sup>24</sup> Mara jara tinatinapua la pa hahau na memerana, ale supe tari na varama la pa lavi na nora tavgav la sivo hinia, <sup>25</sup> Ale mataruana la pa sopo pelati hin te rani hatea matan mo sopo te ōroha mata vutepongi.

<sup>26</sup> Mara jara tinatinapua la pa lavi na nora tavgav peresi nora na nora ololo la unu na lolona. <sup>27</sup> Pani i pa sopo te hina lumiha hatea i eŋi unu hinia teni haratu posira mo lumiha teni haratu la halu, pani la haratu purongo sei la lo uli na hijara na lolo Puku mata Mauri non Natu Sipsip.

## 22

<sup>1</sup> Ale angelo atu mo vujan-giau hin wai roro mata mauri atu sei mo niro sohena glas sei crystal, ale mo lo roro mo lo malue na jara sakele nona supe non God enia Natu Sipsip. <sup>2</sup> Ale mo roro usuri na livuha malele tavera hin taon tavera atu. Na tavalun wai roro atu hatehateahi vipahai sei mo lo sile na mauri peresi



na vuana mo sangavulu  
řomana mo rua tinatinapua,  
la mena na vitu hatehateahi  
na tauni matea, ale raura la  
pa vai mamahuni na rojoa  
nona mara jara tinatinapua.  
*Gen 2.9*

<sup>3</sup> I pa sopo te hinau hatea  
God i pa řohu hinia atu,  
matan jara sakele nona supe  
non God peresi Natu Sipsip  
i pa lo toho ea, ale nona  
volitusi la pa lotua. *Zec 14.11;*  
*Gen 3.17* <sup>4</sup> Ale la pa lo hite na  
nahona, ale hijana i pa toho  
na pungorira. <sup>5</sup> Vutepongi  
i sopo eři mele pala, ale la  
haratu la lo toho ea, la pa  
sopo eři opoi na memera  
lamu teni alo matan Moli  
God enia i pa sasarami isara  
moiso, enira la pa tauri na  
suiha mata rani tui tui tarea.  
*Isa 60.19; Dan 7.18*

*I Pa Sopo Tuai Křisto I Pa  
Mai*

<sup>6</sup> Ale angelo atu mo verea  
isaku mara, “La reti atu o pa  
eři rasura, ale la varařuhu.  
Ale Moli enia God mata  
tanume přovet, ale enia natu,  
mo řule na nona angelo vara  
i vujangi na sava God mo  
viřonia vara i pa masese  
i pa sopo tuai isana nona  
volitusi.”

<sup>7</sup> Iesu mo verea mara, “Ha  
lo levosahia! A pa mele mai  
i sopo tuai! Avulahi isan la  
haratu la lo taurilati la reti  
hin puku mata retimangovi  
nike.”

<sup>8</sup> Enau John, enau natu na  
hitea, ale na rongo la hinau  
nike, nara na rongora, ale  
na hitera, na juruvi popovi  
atano na palon angelo atu mo

lo vujangiau hin la hinau sei  
vara a lotua, <sup>9</sup> pani angelo  
atu mo verea isaku mara,  
“O sopo vaia sohena! Enau  
volitusi matea sohem peresi  
na voraim la přovet tolu la  
haratu la oloolo na reti hin  
puku nike. O lotu God!”

<sup>10</sup> Ale mo verea isaku mara,  
“O sopo jaroři na reti mata  
retimangovi hin puku nike,  
matan i pa sopo tuai la pa  
masese. <sup>11</sup> Haratu mo lo vai  
na hehe, i pa lo vai na hehe;  
haratu řomina mo lumiha,  
řomina i pa lo lumiha; ale  
tamlohi tataholo i pa lo vai na  
hina tataholo, ale haratu mo  
tapu i pa lo tapu.”

<sup>12</sup> Ale Moli mara, “Ka lev-  
osahia! Enau na lo mai vila,  
ale a pa sile na voli tamlohi  
tari i tataholo na sava la vaia  
moiso. <sup>13</sup> Enau na tiroma  
na hinau tari, enau na isoiso  
hinau tari, enau pulo hinau  
tari, enau na hitahu, enau  
tapulo hinau tari, enau isoiso  
hinau tari.”

<sup>14</sup> Avulahi isana tamlohi  
tari sei la lo hoje na nora  
ruru peravu matan vara la pa  
tataholo vara la hani na vuan  
vipahai atu sei mo lo sile na  
mauri, ale la pa eři unu hin  
taon tavera atu na mataru-  
ana. *Gen*

*2.9; 3.22* <sup>15</sup> Pani na jingoima  
hin taon tavera atu, viriu sei  
haratu la lumiha peresi na  
tamlohi mahumahu na suiha  
tanume peresi haratu posira  
la lumiha peresi na tamlohi  
vilimatei na tamlohi peresi la  
haratu la lo lotulotu vono, ale  
tamlohi tari sei tarea la opoia  
vara la lo halu.

<sup>16</sup> “Enau Iesu, enau na řule na noku angelo vara i vereuli la hinau tari sei isamim mata vao kalesia tari. Enau tahisan mahapin Supe David, ale enau na majou řalavuhō sei mo memera.”

*Isa 11.1, 10*

<sup>17</sup> Ale, Tanume Tapu peresi hařai atu i pa lahi lara, “O mai!” Ale isan haratu mo eři rongo, o vereā vara “O mai!” Ale isan haratu mo mařohu, “O mai!” Ale isan haratu mo opoia, o lavi na wai mata mauri mo sopo te volina.

<sup>18</sup> Haranike enia noku retiřoāřoahai isana tamlohi tari sei la rongo la reti mata

retimangovi hin puku nike. *Deut 4.2; 12.32*

Vara tea i mele tau te reti tinapua na sava la ulia moiso, God i pa tau la rongohaji sasati atu puku nike, mo lo vereā isana. <sup>19</sup> Ale vara tea i lavi nařihi te reti hin retimangovi nike, God i pa lavi nařihi na rungana hin vipahai atu mata mauri peresi taon tapu atu sei la uliuli matana hin puku nike.

<sup>20</sup> Ale haratu mo lo vereuli la hinau nike mara,

“Io, enau na lo mai vila!”

Amen! O mai Moli Iesu!

<sup>21</sup> Romřuhu non Moli Iesu i toho isamim mo isoiso. Amen.